

LA/LIB/8-ASY/PRO (MIZO)/255

OFFICIAL REPORT

**PROCEEDINGS OF THE
MIZORAM LEGISLATIVE ASSEMBLY
(MIZO)
VOLUME-II**



सत्यमेव जयते

**ELEVENTH SESSION
OF THE
EIGHTH ASSEMBLY
HELD FROM 7th – 28th February, 2023
(12th – 15th Sitting)**

**Published by
MIZORAM LEGISLATIVE ASSEMBLY SECRETARIAT
AIZAWL**

www.mizoramassembly.in

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR TWELFTH SITTING ON THURSDAY, THE 23rd FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

**FINANCIAL BUSINESS
DISCUSSION AND VOTING ON DEMANDS**

2. **PU TJ. LALNUNTLUANGA**, Minister to submit to the vote of the House various Demands under his charge.
3. **PU R. LALZIRLIANA**, Minister to submit to the vote of the House various Demands under his charge.
4. **DR. R. LALTHANGLIANA**, Minister to submit to the vote of the House various Demands under his charge.

LALHMAHRUAIA ZOTE
Commissioner & Secretary

* Please see Bulletin Part-II No. 288, dated the 15th February 2023 for Demands to be moved by Ministers.

SPEAKER : *Chuvangin, infuih tawnin, intisawt tawn theuh rawh u, in tih reng thin ang hian.* -I Thesolonika 5:11

QUESTIONS & ANSWERS

Zawhna & Chhanna ah kan kal nghal ang a. *Starred Question* No.181 - Zawt turin member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka lawm e.

Transport Minister zahawm tak chhana tan, ka zawhnate chu –

- a) Inland Water Transport lamah hian Mizoram sorkar hian hmalakna a nei em?
- b) Nei ni se, khawiahte nge hmalak tan anih a, he department hmanga hmalakna hi engtik atangin nge Mizoram sorkar hian a kalpui tan?

SPEAKER : Chhang turin a changtu Minister zahawm tak Pu TJ Lalnuntluanga ka sawm e.

PU TJ. LALNUNTLUANGA, MINISTER: Pu Speaker, MLA zahawm tak Pu Lalrintluanga Sailo zawhna chhanna chu –

- a) Nei e.
- b) Transport Department hian IWT subject hi Mizoram PWD hnen atangin 30th August, 2019 ah mawhphurhna a la tan a. Hemi hnu atang hian Mizoram a lui hman tangkai theihthe dap chhuakin, IWT lama hma kan sawn theihna atan theihtawpin hmalak nghal a ni a. A hnuaia lui tarlanah te hian hmalak mek a ni a: -
 - i) Tlawng Lui
 - ii) Khawthlang Tuipui
 - iii) Chhimtuipui.

Tin, Chhimtuipui Lui-a Maurap kaiah Lawngtlai District chhunga inkalpawhna tha zawk a awm theihna atan Lawngtlai East bialtu MLA zahawm tak hmalaknain leh kan Chief Minister zahawm tak duhsaknain marboat leh boatmen te tan *hut* sak a ni a. June 1, 2022 khan Lai Autonomous District Council kutah an enkawlzui tura hlan fel a ni.

SPEAKER : *Zawhbelhna* - Zawhna neitu, Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka zawhbelhna chu hei hi a ni –

Ka biala Khawthlang Tuipui ina a kual vel chhungah hian Rengkhoa te, Silsuri Village Council East leh West te, Hnahva leh Gudasuri te, Marpara te a awm a. He lui hi border trade kan sawi fo thin te nen pawh inkaihnawih thil a ni a. Tin, Tlabung thlengin he Khawthlang-tuipui hi a luang a; hetah hian Inland Water Transport hi hman tangkai ve theih a ni em? Sorkarin helai bikah hian hmalakna a nei em?

He lua hi kan hriat angin lui dam tak mai a ni a, hma la lutuk lo pawha hman tangkai theih nghal tur niin leh, Bangladesh nena kan insumdawntawwna tura kawng pawimawh tak a ni dawn a. Tin, inkawlpawhna kawng hi tunhma atangin kan la nei tha lova, Pukzing atanga Silsuri te heng Gudasuri, Hnahva, Silsuri kalna kawnga hi PWD hian an la take-up chiah lova. Kumin furpuiah pawh khan ration supply leh engkim mai hi marboat (private-in engine neia an siam) hmanga lak mai mai chu a ni a. Chuvang chuan, heng khaw pangate tan hian a pawimawh leh zual a, heng hi telh a lo nih chiah loh pawhin sorkar hian telh turin hma min lak sak thei ang em?

SPEAKER : *Zawhbelhna* - Member zahawm tak Pu Nihar Kanti Chakma ka sawm e.

PU NIHAR KANTI CHAKMA: He project *Inland Water Transport* hi a lawmawm em em rualin ka zawh duhna chu - Environment te a effect nasa si a, impact nasa takin a nei dawn a. “Sorkar laipui hian environment effect a neih theih te leh social impact assessment te a nei tawh em?” tih kha a hmasa berah chuan a ni a.

Tin, “Inland Water Transport project hna hi physical-a kalpui tan a ni tawh em?” tih te;

Tin, pathumnaah chuan – “He project-ah hian kawng sial ngawr ngawr bakah thil dang a ken tel a awm em?” tih te kha ka zawt a ni e.

SPEAKER : A theih ang ang chhang turin a changtu Minister zahawm tak, Pu TJ Lalnuntluanga ka sawm e.

PU T.J. LALNUNTLUANGA, MINISTER: Pu Speaker, kan MLA zahawm tak Pu Rintluanga Sailo in a biala tlangdung khung – “Marpara te, Silsuri tlangdung te, Rajiv Nagar thleng khuan hman tangkai ve theih a ni ang em?” tih a zawhna kha, kei pawh a hmunah lawngin ka zu kal kual tawh a, he lai hi han sawi zau hlek ka duh a.

He Inland Water Transport hi kan mi-hmasa te chuan a tangkaina an sawi thin a, tin, hmun dang, Khawthlang-tuipui ni kher lo lui dang te pawh tih ve ni se kan ti a. Kan mitthlanaah chuan phai lampang ram rai thaa lui lian ang te khu a ni a. Amaherawhchu a taka han kalpui tur hian tlang kara zuk luh thukna a ni a, a hman tangkai dan tur nena han chhut hian, hmun thenkhat hi chu beisei a sang lutuk lova. Chutih rual erawh chuan a area-a awmte ina an hman tangkai theih dan tur kha ngaihtuahpui a ngai a. Nichinah kan MLA zahawm tak khan a bialah ration lak nan te an hman tangkai zia te a rawn sawi tawh a. Chuvang chuan, thil tha tam tak hmalakna turah hei hi kan thlang chhunzawm a, chutah chuan Marpara tlangdung pawh lawngin kan zuk kal kual a.

Chutih lai chuan, Mizoram-ah tui tam leh tlem lai a lo awm a, tui tlem lai chuan beisei hi a sang lutuk lo thin a. Amaherawhchu fur lai hi chuan ‘lui tui hi a hman tangkai theih viau dawn hi’ tihna lian tak a awm bawk a. Chutiang avang chuan Khawthlang-tuipui, Tlabung atanga Rajiv Nagar thlengin techno-feasibility survey neih turin central-ah kan thlen a, Minister te leh Secretary te pawh kan zu hmu tawh a. Tichuan, an niin hma an rawn lak tur thu min rawn hrilh a, tunah hian a taka kalpui turin kan ngaichang mek a ni.

Tichuan MLA zahawm tak, Pu Nihar Kanti Chakma zawhna - “Environmental effect te a awm ngei dawn a, hei hi a taka kalpui a ni thei dawn em?” tih kha; Ni e, environmental effect te a awm theih dawn avangin forest clearance kan dil a, tunah hian stage 1 atan approval min rawn pe tawh a, Khawthlang-tuipui bik atan sawn. Tichuan, “tunah a taka kalpui a ni tawh em?” tih chhanna atan chuan - E-tender kan chhuah a, chu chu a tirah mi pahnihin an chhang a. Central lam duh dan ala fulfill loh deuh avangin kha tender khan awmzia a nei ta lova. Tunhnaiah khan tender hi kan chhuah nawn leh a Tunah hian e-tender bawkin mipuite leh contractor a fit zawkte leh a criteria zawm thei turte kha kan ngaichang mek a ni.

SPEAKER : *Starred Question* No. 182 - Zawt turin Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka zawhna hi kar hmasa lam khan kan chai nasa tawh a, ka rawn zawt tho ang a.

Chhungtin tana SEDP-Healthcare awm anga Assembly House-a Chief Minister-in a sawi chhuah hi, a takin mipui tan ‘SEDP-Healthcare’ hi a awm reng em?

SPEAKER : Chhang turin Chief Minister zahawm tak, a department changtu ni bawk Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Zodintluanga Ralte zawhna chhanna chu -

Mizoram Sorkar flagship programme SEDP hnuaiah hian healthcare hi ngaih pawimawh ber zinga mi a ni a. Mizoram State Healthcare Scheme (MSHCS) kalpui nan SEDP fund atangin sum thahnem tak a hnuaia tarlan ang hian dah a ni -

2020-2021 - ₹10 crore;

2021-2022 - ₹10 crore;

2022-2023 - ₹20 crore.

Hei bakah hian 2019-ah khan ₹50 crore kan dah bawk a. Tun Financial Year-a hian kan hriat theuh angin ₹60 crore dah a ni bawk a. Tuna kan budget pass meka kan

dah nen belhkhawm chuan, SEDP fund atanga Healthcare-a pawisa kan tih hi ₹150 crore lai a nih chu, tun term-a kan dah belh pawh. Heng sum te hi MSHCS hnuaia inziak lut damlote inenkawina senso, an MR bill ba rulhna atan sorkarin a hmang a ni.

SPEAKER : *Zawhbelhna* - Member zahawm tak Dr. Vanlalhlana.

DR. VANLALTHLANA : Pu Speaker, ka lawm e.

Planning & Programme Implementation Department changtu Minister zahawm tak chhana tan –

SEDP Policy kan nei a, 2019-ah kan tichhuak a. He policy ang hian SEDP-family oriented programme kan kalpuia hi tih a ni em? Tun hnaia an kalpui dan hi nikum lama UQ zawhnaah te pawh chhan a ni tawh a. “Tuna kan kalpui dan leh a thu inziak dan hi a inmil em?” tih ka zawt belh a ni e.

SPEAKER : *Zawhbelhna* - Zawt turin Member zahawm tak Pu Vanlalhlana ka sawm e.

PU VANLALHLANA : Pu Speaker, tuna kan han ngaihthlakah khan, SEDP-Healthcare atan hian 150 crore a tling der mai a. Asian Development Bank atang khan pawisa kha a awm dawn bawh a. Mipuite, bill submit tawh la hmulo te hian engtikah nge a takin an hmuh ang? Engtikah nge sem tan tum a nih?

SPEAKER : Chhang turin Chief Minister zahawm tak, Planning changtu Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Mathlantea zawhna kha ‘Family Oriented Programme-a SEDP kalpui dan’ tih kha a ni a. Family pakhat, in pakhatah ₹50,000/- angin kumkhatah kalpui a ni a. Installment hmasa-ah ₹25,000/- a ni a, installment hnuhnung-ah ₹25,000/- sanction tih vek tawh, sem chhuah tep a ni a, kan sem chhuak mai ang a.

Kumin 2022-2023 inkar hi han tih tan theih a ni a, 2019-2020-ah khan eng emaw zat chu kan ti tawh a, *family-oriented* tho in. Mahse, family-oriented zau zawka kan tih chu, Covid a han reh tan ta a, 2022-2023-ah hian kan dah tam thei ta deuh a. Family Oriented-in chhungkaw 60,000 hnenah chhungkaw pakhat tan ₹50,000/- kumkhat atan kan han ti tan phawt a ni. Vawikhata nuai 3 kha chu kan thei lova, la chhunzawm zel tur a ni a, a hmasa-ah ₹50,000/- in kan han tan phawt a. ₹25,000/- chhungkhatah pek tawh a ni a, sanction tihfel diam tawh, draw tura tih tawh, tunah sem dawn mek a ni. Kha kha SEDP - Family Oriented Programme kan kalpui dan chu a ni a.

Hei bakah tanpuina hi a chi dang dang pawhin a awm thei a. A chhan chu, a hming angin ‘Socio-Economic Development’ atana kan flagship programme fund pui kan dahkhawmna a nih avangin, Healthcare pawh kan ‘Socio’ tel a, kan ngaih pawimawh anih avangin kha tah khan kan dah a. Covid vanglai leh kan tih theih ngang loh lai pawhin chuta tan chuan fund pawh tlem tal chu kan ti a, kan ti chho zel a. Covid lo thlen hma 2019-20 ah phei kha chuan crore 50 kan dah tawp a. Hei, kumin chu a ziaawm ta baw k a, 2023-24 lo awm tur ah hian crore 50+10=60 kan dah leh a. Kan sorkar hnu ah hian Covid harsatna karah SEDP fund atangin Healthcare-a kan dah hi crore 150 a lo tling ta hial a ni.

Engpawh nisela, a mipuite expenditure hi a tam tham ve a, kan rul hleitheh lova; kan hre theuh a, a hrehawm khawp a. Amaherawh chu, tunah chuan kan theih ang taw k kan rul a, tun financial year thara kan dah tur crore 60 hian kan han rul leh ang a. Tin, tun financial year tharah hi chuan Asian Development Bank atanga kan tih pawh kan hmuh hman kan inbeisei a. India sorkarin a harsa lai bera min rulhsaktu tur leh min peksaktu turin a rem ti tawh a. Amaherawh chu, tunah chuan official procedure-in a kal mek a, kan um char char a. Asian Development Bank-a a thawktute pawh an phur khawp a. Hei hi, kan sawi ang khan a thlawn a India sorkarin min rulhsak tur chu crore 720 a ni a, a bak crore 280 bawr vel kha keimahniin kan tum ve ang a. Tichuan, crore 1000-in healthcare hi kan kal chhohpui chuan, chu chu a dahna turah kan dah ang a, a pungte a lo awm ang a, mipui contribution nen; tin, keimahni state-in kan tih theih ang ang ti bawkin he Healthcare hi chu harsa lutuk lova kalpui hram kan tum a. Tichuan, kan fund dah kan rawn materialized-ah hian rulh chhohsak zel kan tum e.

DR. VANLALTHLANA : Pu Speaker, ka zawhna kha – “Policy lehkhabu angin kalpui a ni em?” tih leh, 2022-ah khan a kalpui dan tura kha Planning Department-in an rawn siam leh a. “Tuna kan kalpui dan hi khami thu inziak ang kha a ni em?” tih kha a ni a. Kan CM zahawm tak phei chuan, ‘kan thei sem dawn lova, a project ang tein an rawn ti ang a, chutiang chuan kan kalpui ang’ tih kha a sawi thin dan a ni a. Tuna kan kalpui dan ka han en hi chuan, ‘a ni em; ni lo em’ tih chu ka sawi lo ang a. Policy bu leh nikuma Planning lamin kalpui dan tur an tih khan ‘₹25,000/- kan pe leh ang’ tih te; hemi, ‘kan inpe leh ang’ tih ang hian kalpui a ni em? Ka zawhna kha min chhang tlat lo.

SPEAKER : A fiah viau emaw ka ti a, han chhang leh mai se.

PU ZORAMTHANGA, CHIEF MINISTER: A bua kan tih angin kalpui ni e. Amaherawh chu, a bu ah khan a policy a guideline puiin an ti a, Planning mil khan a sem dan tur pawh an rawn identify a. Tuna kan kalpui pawh hi a trade-wise in selection pawh tih vek a ni e.

SPEAKER : *Starred Question* No. 183 - Zawt turin Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, ka lawm e. Ka zawhna hi hun hmasa lamah khan kan Member te atangin a lo lut nual tawh a, kan Minister pawhin a chhanna min pe fiah viau tawh a. Mahse, ka zawt tho ang a, a supplement erawh chu ka nei lo vang. Ka zawhna chu -

- a) JJM hnuaia tui connection pekna atan hian plastic pipe hman phal a ni em?
- b) Tui connection siam fel tawhte hian a takin tui an dawng vek em?

SPEAKER : Chhang turin Dy. Chief Minister zahawm tak Pu Tawnluia, PHE changtu ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Pu Lalsawivunga zawhna chhanna chu -

- a) JJM hnuaia tui connection pekna atan hian (hei hi house connection a ni a) Plastic pipe (UPVC) hman phal a ni. Hei hi central - JJM Ministry ina an minute thlap tawh an rawn thawna copy a ni a, duh chuan a en theih a. Tin, hei hi State a departmental purchase board in approval an tihna a ni a, dan ang thlapin phal a ni a. Chutiang chuan procurement pawh tih a ni e.
- b) Tui connection siam fel tawh te hian a takin an dawng tawh a, amaherawh chu hmun thenkhatah design LPCD kan ti a, nitina an tui hmuh tur zat, nikhata tui litre 55 mitinin an hmuh theihna tura kan hisap ang erawh chu tunah chuan an la hmu chiah lova. Khaw thenkhatah chuan an hmu a, thenkhatah an hmu lova. Hei hi a chhan dik tak chu - kan hna kal lai mekah hian kan tuilakna - a hnar atanga kan dawh leh kan pekchhuahna inkara hna thenkhat kha kan duh angin kan la zo tawk lova, chumi kan zawhfel hunah chuan 55 LPCD chu mitin dawn theih tura ruahman a ni a. Tun dinhmunah an vai erawh chuan an hmu lo nain, an hmu dawn e.

SPEAKER : Awle, Member zahawm tak Pu Lalrindika Ralte ka sawm e.

PU LALRINDIKA RALTE: Pu Speaker, ka lawm e. Ka zawhbelhna chu –
 “Zawlnuam town ina tui harsatna an neih khu sorkarin a hriatpui em? A hriatpui anih chuan, an harsatna khu chin fel sak engtikah nge sorkar hian a tum?” tih a ni e.

SPEAKER : Chhang turin a changtu, Dy. Chief Minister zahawm tak ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Hachhek bialtu ina a rawn zawhbelhna kha –

Zawlnuam town-in tui an mamawh dan leh tuna an dinhmun khu sorkarin a hria a, department-in tunah hian ‘engangin nge kan pek belh theih ang?’ tih hi hmachhawpah a nei mek a, kan lo enzui lai a ni e.

SPEAKER : *Starred Question* No. 184 - Zawt turin Member zahawm tak Pu C. Lalsawivunga ka sawm e.

PU C. LALSAWIVUNGA : Pu Speaker, kalawm e. Higher & Technical Education Department changtu Minister zahawm tak chhan atana ka zawhna chu -

- a) Engvangin nge MZU Southern Campus-ah tun thlenga class tan a la nih loh?
- b) Temporary Campus atana hman tur Lunglei Engineering College chei leh buatsaih hna peih fel a ni tawh em?
- c) MZU Southern Campus dinna tur DPR approval central atangin dawn a ni tawh em?

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LATHANGLIANA, MINISTER: Pu Speaker, Member zahawm tak Pu C. Lalsawivunga zawhna chhanna chu:

- a) Mizoram University Southern Campus-ah tun thlenga class tan a la nih lohna chhan chu - Southern Campus hi a taka kalpuina turin Campus sakna tur DPR approval central sorkar atangin hmuh a la nih loh vang a ni.
- b) Temporary Campus atana hman tur Mizoram Engineering College Lunglei chei leh buatsaih hna hi peihfel a la ni lo.
- c) MZU Southern Campus dinna tur DPR approval hi Central atanga dawn a la ni lo.

SPEAKER : *Zawhbelhna* - Zawhna neitu Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, chanchinbu-a kan lo hmuh thin dan leh vawiina chhanna kan hmuh kha chu a inpersan hlein ka hria a. Mipui hmaah kan sawi a, mahse kan sawi anga thil a kal lo thin hi a paw ka ti em em thin a. Vawinah pawh hian a paw ka ti a, class te pawh tan tum anih thu he kan House-ah ngei hian a changtu Minister-in a lo sawi tawh a, mahse tan anih loh chhan kan ngaithla a. ‘A taka chantir turin kan Minister hian engtinng e hma a lak theih ang?’ tih ka zawbelhna pakhatna a ni a.

Tin, Lunglei Engineering College chei that leh buatsaih hna te pawh peihfel loh a la ni a, kan Chief Minister zahawm tak pawh a hmunah a kal a, kalkawng te, electric te, tui connection te siam turin thuchhuah a siam a. Lunglei DC pawhin thuchhuah a

siam a, tin, DIPR-ah pawh ziahlan a ni. Mahse, vawiin thlenga peihfel a la nilo hi engnge ni a chhan? Tih tak tak tumna a awmlo em ni zawk? Politics thil te hi a ni ang tih a hlauhawmin ka hria a. Chuvang chuan, tun thlenga peihfel a la nilo hi a mak hlein ka hria a, politics hmanrua atan nilovin, heng hi ramin a mamawh, kan infrastructure anih angin rang taka class tan thei turin thil tih tur tulte peihfel thuai theih beisei a ni ang em?

SPEAKER : *Zawbelhna* - Zawt turin Member zahawm tak Er. H. Lalzirliana ka sawm e.

ER. H. LALZIRLIANA : Pu Speaker, ka zawhbelhna chu hei hi a ni. –
Starred Question No. 193-ah khan a awm tho a. NIT Campus Lengpui hi hmalak lohin a awm reng mai a. “Lengpui NIT Campus chungchangah tun dinhmunah hian eng harsatna chiah nge kan tawh? Engtikah nge hma lak tan theih anih ang?” tih kha ka zawbelhna a ni e.

SPEAKER : *Zawhbelna* - Dr. K. Pachhunga.

DR. K. PACHHUNGA : Pu Speaker ka lawm e. MZU Southern Campus class tan chungchang hi he House-ah hian kan sawi leh sawi loh kei chuan ka hre lova. Kan lo sawi tawh reng em le? Nichin khan Member zahawm tak khan a sawi si a.

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, a hnuhnung ber, Dr. K. Pachhunga *Zawhbelhna* kha –

Ni e, class tan tumna phei chu a awm a, amaherawhchu, ‘chumi hunah’ tih kha a sawi theih lova. A chhan chu - University Campus din dawn reng reng hian tunhmain Mizoram-a NEHU Campus din dawn pawhin state sorkar kan mawh thin hi a ni lutuk lova. Hei hi chu University liau liau a ni a, tunah pawh hian hma latu tak chu Mizoram University a ni a, a peng tur a ni a. Chuvang chuan, thahnemngaihna avangin keipawhin DO letter vawi 4-5 ka ziaak tawh a bakah a hmunah vawi tam tak ka zuk kal a, tiang chuan kan innawr kha a ni a; thil kan hriat chian thain ka hria a. Mizoram Engineering College tur Pukpui-ah sak a ni a, sorkar hmasa hun lai khan cheng vaibelchhe 26-in hostel te pawh a awm a, class kalna tur leh cafetaria te pawh. Amaherawhchu, building awm si, approach road km 3 siam a ngai a, motor lut hleithei lovin a awm a ni, a pakhatnaah chuan.

A pahnihna-ah chuan - Electric pawh-luh a ni lova. In tenau ni lo, campus-a electric pawt-lut tur chuan cheng vaibelchhe tel pawisa a ngai a ni. Tin, chu mai bakah

tui connection a thleng lova, khang zawng zawng nen han hisap khan vaibelchhe 10 ai tlem lo a ngaihrim hrim a, chuvang chuan, state sorkar tan han tih thu kha a harsa a. Chutianga mombati emaw, khawnvar chhia campus class kal ngawt kha a ni tawh lova.

A pathumna-ah chuan - class tan tur hian, Pu Speaker, a tak takah chuan central sorkar hian post a rawn create ang a, MZU-in proposal fel tak a nei vek a, DPR-ah hian a awm vek a ni. Academic-a professor mamawh tur te, teaching leh non-teaching zawng zawng fel takin a awm a, an thehluhna pawh a rei tawh a, state sorkar-in kan nawr bawk a.

Tin, phalna a principle-a min pekna hi Ni 17 January, 2000 kha a ni a, hei a copy pawh a awm a. He tah hian chiang deuhin a rawn ziaak a. Amaherawhchu, ‘a ram erawh hi chu state sorkar-in min pek ve a ngai ang’ an rawn ti a, chupawh chu Pukpui VC ten thahnem ngai takin an ram an rawn donate a, ram pekna tak tak erawh chu Land Revenue & Settlement tih tur anih avangin kan Revenue pawhin Land Lease hi Mizoram University hmingin an rawn pe a, chung zawng zawngte nen chuan kan thawn thla vek a, a rei tawh mai a. Amaherawhchu, thu hnuhnung ber hi House pawhin kan hriat a tha a. January Ni 20, 2023 thla hmasa mai khan kei pawh Delhi-ah ka zuk kal a, he thil buapui biktu Economic Adviser te nen pawh kan inhmu a, “engatinge campus kan neihna tur atana thawktu tur hi min pek theih loh?” tiin ka zawt rawt a, chuta an sawi chu - Govt. of India pawh hian post creation hi tun angah hi chuan a harsat khawp mai a, tihngaihna a awm lova, Mizoram University, Tanhril-a kan neih atanga va hmui tur khan tih theih dan kawng te a awm a nih si loh chuan a harsa khawp mai. Amaherawhchu, DPR in siam, a building sakna tura campus thar bik, engineering college nilo laia hi chu Nefa loan atang emaw, university funding kan tih atang pawh hian tih theih dan a awm ang tih kha min hrilh dan a ni. Chu chu thu hnuhnung a ni.

Chuvang chuan, ramhnuaiia class va pawngpaw tih ngawt kha a ni lova, University kut liau liau a nihna piah lamah University Grant Commission leh Govt. of India, MHRD Ministry te ina thil an rawn tih fel har vang hi a ni. Kan vanduai ve deuh hlek a ni. Ministry of HRD hi ministry kan dawr tawh zawng zawngah chuan thil tih a harsa khawp mai, thil dang tam takah pawh. Chuvang chuan, he harsatna hi kan tawk a ni. State sorkar din ngawt chi pawh ni lova, ‘helaia MZU kan neih kaltlanga DPR leh engkim mai correspondent pawh kal a ni’ tih kha Pu Speaker, kan hriat a tha a.

Pu Zira zawhna kha - National Institute of Technology (NIT) Mizoram hi, Govt. of India, Ministry of Education-in a din tura tih a ni a, a rei tawh khawp mai a, Lengpui-ah khuan a ni a. Amaherawhchu harsatna lian tak an tawk a, keini pawhin theih tawp kan chhuahpui a. Tlawng Lui kam nen khuan a lo inngheng hnai deuh nge ni, Forest clearance hi ministry lampangah dil a ni thin a, min comply tha lo deuh a ni. NIT helama thawktute pawh an buai khawp mai a, wawi tam tak keini pawhin kan zuk thlen tawh a, an la chingfel hlei thei lova; sum pawh tam tak an seng tawh a, la sen zelna tur thil

ruahmanna a awm mek laiin, *Ministry of Environment & Forest Climate Change* te hian online-a helam pawhin an zuk dil chamchi Parivesh portal hmanga clearance an dil kha an la hmu thei lova, chuv chu tunhnaiah an hna a thuanawpna chhan dik tak chu a ni.

SPEAKER : *Starred Question* No. 185 - zawt turin Member zahawm tak Pu Lalduhoma ka sawm e.

PU LALDUHOMA : Pu Speaker, tuna zawhna chhunzawmna deuh tho kha a ni a. Higher & Technical Education Department changtu minister zahawm tak chhan atan -

- a) MZU Southern Campus, Lunglei atana Pukpui Village Council-in ram acre 100 a zau a pekah hian, Southern Campus din phalna hi MHRD-ah engtikah nge dilna thehluk a nih? A copy min pe thei em?
- b) Tun thlengin MHRD hian Southern Campus din phalna hi a la pe thei lo em ni? A nih chuan, eng vang nge?
- c) Phalna nei tur hian engtinngge bawhzui a nih?

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, hemi chungchang hi ka chhanna hmasa nen a inkaihhnawih deuh hlek a, ka chhiar chhuak tawh lo mai ang. Pu Duha zawhna bik chhanna kha chu -

Pakhatna - MZU Southern Campus, Lunglei-a din a nih theihna atana dilna hi kum 2013 November thla khan MHRD-ah lehkha No. 1-24/13/MZU(VC)/12523 Dt. 6.11.2013 chu thehluk a ni a, lehkha copy pawh chilh tel a ni e.

Pahnihna - MHRD hian Southern Campus din phalna hi a thuphung (in principle) in Ni 17.1.2020-ah a pe tawh a, chu chu a copy pawh hi member-te hnenah an duh chuan kan pe theiin ka ring a, Delhi-a ka awm lai ngeiin min pe fel a, VC a rawn address a, hei hi a copy din phalna *in principle*-a min phalsakna a ni a. Chuta thil Chiang deuha an sawi chu – ‘State sorkar hian a ram erawh chu free of cost-in pe se’ tih te kha a inziak a, chu chu ka chhanna a ni a.

Tin, ‘Phalna nei tur hian engtin nge bawhzui anih?’ tih kha chu, nichina ka sawi khan a chhang thoin ka hria.

SPEAKER : Aw le, *Zawhbelhna* zawt turin Member zahawm tak Pu Lalduhoma, a zawhna neitu ka sawm e.

PU LALDUHOMA : Pu Speaker, Lunglei-Southern Campus atan hian Village Council Pukupui ten ram acre 100 lai min pe a, a lawmawm khawp mai a, Land Lease pawh peih fel a ni tawh a. Dilna MHRD ah thehluh a ni a, *in principle*-a remtihna pawh lak a ni tawh a. Chuti ni si tun thleng mai pawha hmalak theih a ni ta miah lo mai hi kan beidawng ti ti tawh em? “Beiseina a la awm em?” tih kha ka hre duh a. Ram te engkim mai kan nei tawh a, ‘class tan’ tih te pheih chu a building awm hawt hma leh, a sum pawh hmuh chhuah hma hi chuan sawi rik loh hi a tha khawp mai a. Southern Campus building hi sawi phawt ila, chumi hnuah a staff-te kha chu a la ni ang a, hemi tura hi MZU nena tangruah hian theihtawp han chhuah leh ta ila, ‘political forcep’ te pawh kha a hman chi lawm ni, Pu Speaker? Tih hram dan ngaihtuah a va tha em! ‘Kan beidawng tawh nge, kan la beidawng lo’ tih kha kan chiang duh viau a.

Pahnihna-ah chuan - Southern Campus chu ‘thu lo’ a la nih avangin, a bula Engineering college sak a building hi hmang mai riha, class te pawh tan mai theih tur angin kan ti a, mipui pawhin an hria a sawi a awm a ni. Amaherawhchu, a Engineering College ber pawh chu kan peih leh hleithei ta lo em ni? Central lamin recurring expenditure tam takte kha ‘kan rawn tum leh thei dawn lo an ti’ tih te kan lo hria a. Chuti anih chuan, keini state tan chuan han tih chi rual kha a ni dawn lova. Chuvang chuan, Engineering College pawh hi engnge kan dinhmun chiah? Tin, tunah hian a building thui tak tih a ni tawh a, approach road leh eng eng emaw hmabak a la ni mai a. State sum te nen pawha saw tal saw chu han tihpuitlina, Southern Campus atan pawh phalna kan neih chuan hman mai theih a ni ta a. Hei tal hi engtikah nge peih a nih theih ang? Bialtu MLA zahawm takte pawh a inrawlh a, supervisor tur te kha ziakin, ‘hei hi lo hmang rawh’ tih te kha kan lo hmu ve a, a zialo ka ti khawp mai a.

Member-te zingah hian la naupang deuh leh politics tuinu nghawng thlenga la dai lo te hi chu, mithiamte an nih bawk hi chuan kan lo beisei sang viau a. *That theihlohna Bawm* a awm pawha an lo danglam chuang miah lo te hi a pawh khawp mai a. Chuvang chuan, Engineering College tal kha engtikah nge peihfel theih a nih ang?

SPEAKER : *Zawhbelhna* - Member zahawm tak Dr. L. Thangmawia.

PU L. THANGMAWIA : Pu Speaker, ka lawm e.

Ka zawhbelhna chu - Zirna in pawimawh tak mai, anmahni tel loa zirtirtu pawh dil theih loh ‘IASE - Institute of Advance Studies and Education’ ah hian thawktu indaihlohna a nasa em em a. Official loin ka va tlawh a, hman kum khan. Hengte hi sorkar hian an mamawh zualpui – “Assistant Professor’ kan ti dawn nge ni, ‘Lecturer’ kan tih thin ang kha tihbelh theih turin a ti em?” tih kha.

A pahnihna-ah chuan - India sorkar hian college ho quality control nan hian ‘NAAC a ti a, NAAC accredited neilo tan chuan fund tam tak hmuh theih a ni tawh lova. Ka zawhna chu - Mizoram sorkar hnuuia college-ah hian NAAC accreditation neilo an la awm em?

Tin, Pu Speaker, NAAC accreditation-ah hian kan hniam hauh lova kan college ho hi, lawmthu pawh kan sawi tel duh a. Tin, accreditation neilo an la awm a nih chuan, chu chu ka rawn zawt a ni e. Ka lawm e.

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, tlemin a inkar kik deuh hlek a, zawhna kha. A hnuhung ber a ni naa, chhan a har lovin ka hria a.

Dr. L. Thangmawia zawhna – ‘IASE’ kan tih hi a pawimawh khawp mai a, Republic Veng-a awm a ni a. Hetah hian Ph. D leh M. Phil te, B. Ed leh M. Ed zawng zawng a zir theih tawh a. Kohhran school-a thawk tam tak leh pawn lam mite pawh tam fe kan dah thei a. Tlem lai deuh pheih kha chuan India ramah hetiang ang chiah hian pakhatna, tun kan sorkar chung khan a ni ve zawk nghe nghe a, kan lawm ve khawp mai.

Chutih mek lai chuan, tuna Member zahawm tak zawhna hi a dik a. Tunhmain CSS hnuiaian an lo thawk a, Assistant Professor-te kha. Amaherawhchu a scheme a lo tawp ta si a, an buai khawp mai a, De-recognition lam thleng khan min rawn vau a. Amaherawhchu, hemi chungchangah hian theihtawpin sorkarin hma a la a, kan Chief Minister te nen. DP & AR leh Finance Department te’n phalna min pe ta a. ‘Reiloteah post 20 kan la dawn’ tih kha House ka han hriattir a ni. A lawmawm hle mai a, sum harsatna karah.

Tin, Dr. L. Thangmawia zawhna kha chhan nghal mai ila. College zawng zawng hi ‘NAAC’ kan ti mai a, assessment fel tak tih niin Peer team te college tlawhin an rawn kal thin a. Tunhnai takah pawh Govt. Aizawl West College an rawn tlawh a, an ti tha ve khawp mai a, B+ an hmu a ni, a hmaa C thin kha. Tikhan achievement ropui tak kan hmu a. College thenkhat khati lama la tang deuh kan nei a, a pawih khawp a. Amaherawhchu a chhan leh avang te pawh hi kan hriat a tha a. A bik takin chhim lampanga college lam hla tak te hi internet facilities leh khatiang lam kha a la that loh avangin duh angin an kal thui thei lo thin a. Tunah erawh chuan tan an la khawp mai a, hun reilote ah NAAC hi kan hmachhawn vek theih kan beisei a, tin, paltlang tur pawhin beiseina sang tak kan nei a ni.

Pu Speaker, college pathumah PG zirna kan nei tawh a, chungte chu - Govt. Aizawl West College - History Department; Govt. Aizawl College-- Education Department leh Govt. Hrangbana Collge - Commerce te an ni a. Hengte avang hian nasa takin kan hming a that phah a. Tichuan NAAC hnuaiia accredited college te zingah a hmu sang bik an awm a, hei hi a ropuin ka ti khawp mai a. Tun hnaiah Zirtiri Science Residential College hian Grade A+ a hmu a, a ropui ka ti khawp mai; Govt. college direct a A+ hmu kan neih chhun a ni. Tin, Govt. Serchhip College hian nikumah A Grade hmuin, Aizawl khawpui pawn college A Grade hmu hmasa ber a ni bawk a ni. B+ hmu pahnih - Govt. Hrangbana College leh Govt. Aizawl West College anni a. B hmu hi Govt. Aizawl College leh Govt. Mamit College an ni bawk a ni. B hi eng emaw zat an awm bawk a, a bak pawh kan la nei tih kha ka chhanna ni mai se la. Tunah hian India ramah a sang ber kan ni. Tin, nichina ka sawi A+ hmu kha Govt. J. Thankima College zawk a ni e. A tawi zawngin college hming hi an dah a, ka lo tisual palh a ni. Chutih mek lai chuan Govt. Zirtiri Residential Science College, Pu Vanlalhlana bial a mi khan A Grade an hmu bawk a ni. Tunlai chu kan 'A' tawp tawp mai. Ahma chuan Pachhunga University College deuh chiah hi A Grade nei kha an ni thin a, tunah chuan kan nei ve ta fur a, kan lawm khawp mai. India ramah a sang ber, tuna Mizorama kan government college-te hi Pu Speaker, kan ni a, 83% kan ni a, hei hi a lawmawm ka ti a, House ka han hriattir a ni.

Tichuan, Lunglei-Southern Campus bawkah ka han lut leh ta ila. Pu Duha han sawi kha thahnemngaihna a ni a. Keipawh a ni tho a, ka bial hlui, kum 25 lai ka lo bial tawh a ni a, ka hrechiang a, hlawhtlin hi chu kan duh khawp mai. Beidawn ngawt hi chu a dik ka ti lova. Kumin January thlaah ka zuk kal a, nichina HRD adviser-te leh official, a khawih tu takte nena kan han titi naah pawh, 'engtin nge maw ni dawn le? Nangni pawhin commitment in nei tawh a, ram kan pe che u a; hei hi chu a diklo' ka ti a. Kan han ti deuh dat dat a. Anni chuan, 'a bul tanna chu Mizoram University in lo neih tawh sa atang hian engtin emaw tih dan ngaihtuah a ngai a ni' an ti a, mahse State sorkar tan hian MZU zuk tih ngawt dan kha a vang viau mai a. A enga pawh ni se, India sorkarin post min pek theih lohna chhan chu, tlang deuhin, Covid avang hian Finance Ministry, Govt. of India hian post create leh fill-up te hi a remti lova. Kan han tum thin a, an turn-down zel mai a. Amaherawhchu, 'hei, Covid pawh a zia tawh a lawm' kan ti a, kan inhnial kan inhnial a. Chuvang chuan, khawvelah tihtheih loh a awm lova, a tihran theih loh a nih pawhin kei chu beidawn turah ka ngai lova. Kan tuma, kan bei a nih chuan, engtik niah emaw chuan, India sorkar pawhin a la ti thei turah ngai ila. DPR leh engkim mai Mizoram University hian a buaipui a, an fakawm a, amaherawhchu, kan la sutlang lo mai a ni.

Chutih mek laia 'Engineering College tal hi; MZU Southern Campus anih loh pawhin' tih lai kha, nichina ka sawi thil pathum lian tak tak, a panna kawng siamna tur cheng vaibelchhe 10 ngai te, tui leh electricity te kha chu kawng dang ni se la. Khami piah lamah khan thil buaithlak deuh chu, a in saknaah hi Govt. of India hian vaibelchhe

26 sorkar hmasaah khan a pe a. Hetiang chi bawk (House-ah pawh kan sawi fo) Nursing School - Serchhip, Siaha leh Champhai-ah te a sak chiah an sa zova, a bak post chungchang state sorkar tih tur kha ruahmanna a awm lova. Chutiang bawkin Mizoram Polytechnic hmun hrang hranga sak mek leh sak zawh tawh te pawh khatiang kha a ni zel mai a; hei hi a pawl khawp mai a. Sorkar kal chhoh zelna tur, nakin zelah a in sak ringawt lo, a function theihna tur atana mamawh zawng zawng chhuta heng project hi kan kalpui loh chuan a pawiin ka hria a. Tumah indem thu a awm lova, a sorkar leh zel tan khan hetah hian harsatna lian tak kan tawk a, kan la function theilo a. Amaherawhchu theihtawp chhuahin heng hi kan la indawr zel turah ngai ila, kan khamkhawp loh deuh pawhin, (kei pawhin ka khamkhawp chuang lova) central sorkar hmalakna hi. A har ve a ni; kan kuta awm a ni si lo. Pu Speaker, ka lawm e

SPEAKER : *Starred Question* No. 186 - Zawt turin Member zahawm tak Pu Lalduhawma ka sawm e.

PU LALDUHOMA : Pu Speaker, Land Revenue & Settlement Department changtu Minister zahawm tak chhan atan zawhna -

“Four lane kawngpui, Vairengte to Sarang atan hian -

- a) Zangnadawmna engzat nge pek a nih tawh?
- b) Mi engzat hnenah nge pek a nih?
- c) Eng package chhunga mite nge an nih?” tih a ni e.

SPEAKER : Chhang turin a changtu Minister zahawm tak Pu Lalruakima ka sawm e

PU LALRUATKIMA, MINISTER : Pu Speaker, Member zahawm tak Pu Lalduhoma zawhna chhanna chu –

- a) Zangnadawmna hi Revenue Department atanga pekchhuah a ni ngai lova, Ministry of Road Transport & Highways - CALA atana ruatin a pek tawhte chu hetiang hi a ni -
Package 3 ah ₹144,86,013.13;
Package 4 ah ₹121,32,18,196.49 te a ni.
- b) Package 3 hnuai ram pass neitu mi 234 hnenah pekchhuah tawh niin, Package 4 hnuai ram pass neitu mi 200 hnenah pekchhuah a ni tawh bawk.
- c) Package 3 leh Package 4 chhunga mi te an ni.

SPEAKER : *Zawhbelhna* - Zawhna neitu member zahawm tak Pu Lalduhoma ka sawm e.

PU LALDUHOMA : Pu Speaker, NHIDCL hnenah hian kan sorkar hian (Forest Department ani turah kan ngai a); ‘Mizoram Forest Department hian package thumna chin hi a enkawl a ni’ tiin ziakin an thlen em tih kha ka zawt a. An lo thlen a nih

chuan, a copy min pe thei se ka duh a. Tichuan package 2 hi Assam lam chan a ni a, hetah hian Vairengte-a mizo chhungkaw 15 ram nei an awm bawk si a. Chu chu Assam ram chana a luha, an ni kaltlanga NHIDCL hian compensation a pek chuan, nakinah ‘heti chin hi kan ram a ni’ tihna, tanfungah, document-ah an rawn hmang ang tih kha a hlauhawm bawk si a. Chuvang chuan, package 2 pawh ni se, khami kan ram chin kha chu keini kaltlanga pek tur khan a tih theih lawm ni? Ramri issue nen a inkaihhawih tlat mai a, chu chu engtinngge sorkar hian hma a lo lak tawh? Tin, khami tihtheihlohna chhan ber chu, ‘*Package 3 atang hian Mizoram-in a enkawl a ni* tih te kha a awm vang a ni’ tih hi a dik em?

SPEAKER : *Zawhbelhna* - Member zahawm tak Pu Lalrindika Ralte hnen atangin.

PU LALRINDIKA RALTE: Pu Speaker, ka lawm e.

Ka Zawhbelhna chu – “Ram tehfel chungchangah hian department hi a indaihlo hle a. Hemi ram tehfel hi mimal hnenah emaw, company hnenah emaw department hian pek (out-source) tumna a nei em?” tih a ni e.

SPEAKER : *Zawhbelhna* - Member zahawm tak Pu Lalrinsanga Ralte hnen atangin kan la leh ang.

PU LALRINSANGA RALTE: Pu Speaker, ka lawm e.

Ka Zawhbelhna *pakhatna* - Kan Opposition Group Leader zahawm tak rawn zawhna kha ka rawn tawm dawn a.

Ka bial chhung package 3 leh 4 hnuai compensation late ka lawmpui khawp mai a. Chutih rual chuan Vairengte Police Checkgate thlanglamah khuan pass nei mi 15 an awm a, chu chu package 2 ah NHIDCL hian a dah avangin, compensation an la ve lova, an buai khawp mai a. Hemi chungchangah hian nasa takin a bialtu ka nihna ang pawhin hma kan lakpui a. Kolasib DC-ah a ram neitu aiawhte kan kokhawm a, kan hon. Minister Pu Rintea, Kolasib bialtu MLA te nen Kolasib DC hoin meeting kan neihpui a. Tin, kan Chief Minister zahawm tak te pawh meeting kan neihpui bawk a. Chulaiah chuan engnge harsatna awm? Vawiin niah hian package 2 chhunga awm an nih avanga Assam rama document dah ngai ang boruak awm te hi a dik reng em? ‘Engti kawng zawng pawhin package 2 bik te hian Mizoram sorkarah compensation an lak a ngai a, an document te pawh Assam lamah an theh thla tur a ni lo’ tih hi kan ngaihda a ni bur mai a. Chutiang tur chuan kan minister te, kan sorkar te hian engnge hmalakna an neih? Package 2 chhunga miten Mizoram Sorkar - Kolasib DC CALA hnuai an lak ngei theihna tur hian engtinngge hma kan lak tawh? tih hi ka zawhna pakhatna a ni a.

Tin, Bilkhawthlir - town extension tura hmalakna a kal mek niin ka hria a, “hei hi engnge kan thlen chin?” tih kha ka zawhna a ni bawk e.

SPEAKER : *Zawhbelhna* - Member zahawm tak Dr. F. Lalnunmawia ka sawm e

DR. F. LALNUNMAWIA : Pu Speaker, ka Zawhbelhna chu –

“Mizoram sorkar hian Aizawl West-by pass Road lo kal turah hian ram pass pek belh tumna a awm em?” tih leh, “Henga ram nei sa VC pass nei hote hi engtia chin fel sak tur nge? An ramte hi sut-buai leh a sut-hek tur a awm nual dawn a, hengte hi sorkarin engtia chin fel sak nge a tum? Compensation te a pe thei dawn em?” tih te a ni e.

SPEAKER : Awle, zawhnate a inkarkik viau nain, a theih ang ang chhang turin, a changtu Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, kan hriat angin Silchar - Aizawl kawng hi ‘National Highway-306’ leh ‘National Highway-06’ tea then a ni a, 306 hi Bilkhawthlir thleng a lo kal ang a, 06 hian khithah Zokhawthar lam a pan chho dawn a ni. Chutah chuan Four-Lane lai turin package 1 - 8 thleng tunah hian ruahmanna a awm mek a, chutianganng chuan theihtawp chhuahin hma lak a ni a. Chumi hna thawk tur chuan Ministry of Road Transport & Highway...

SPEAKER : Ngawi lawk rawh aw. Official gallery-ah hian telephone hmang an awm a, kha kha chhuak nghal rawh se. House chhungah phal a ni lo a ni.

Awle, chhonzawm rawh le.

PU LALRUATKIMA, MINISTER: NHIDCL-in hma lain, *The National Highways Act, 1965* angin ruahmanna, mawhphurna a rawn pe a. Chutah chuan Kolasib Addl. DC kha CALA mawhphurna pein, *Gazette of India*-ah a rawn gazette thlap a. Chutianganng chuan tuna package 3 leh 4 chhunga compensation mi eng emaw zat dawng an awm lai khan, package 3 huam chhungah hian pass la surrender lo leh dispute avang te in ram pass mi 14 hnenah pek tur nuai ₹177,96,274.41/- pek a la ni lova. Tichuan, package 4 ah hian original pass surrender lo leh dispute vang vekin ram pass 19 neitute hnenah nuai ₹697,72,225.17/- pek a la nilo bawk a. Chutianganng chuan, package 3 hi Environment & Forest lamin ‘kan ram a ni’ an tih kan hre lova, chuvang chuan, lehkha NHIDCL lamah an pek leh pek loh revenue department chuan a hriatpui lo a ni.

Chutih lai chuan Member zahawm tak Pu Lalduhoma leh Pu Lalrinsanga Ralte tena an rawn zawhna... (**Speaker:** Ngawi rawh aw. *Zawhna & Chhanna* hun a tawp a, kan chhan zawh tir law law dawn em? *House-in a remti a*. Awle, chhangzo law law rawh le)... package 1 leh 2 hi Assam lamah a awm si a, chutih lai chuan package 2 huam chhungah hian chhungkua 15 dawn lai mai Vairengte mite an awm bawk si a. Heng mite

hian Assam lama CALA hnen atanga pawisa compensation an dawn chuan, ramri kan inchuh buai bawk nen, “nakin atan kan tan a thalo palh thei e” tih kha a ni a.

Sorkar chuan hemi chungchang hi a hranpain hriattirna a hmu lawk lova, NHIDCL hian an mahni package tura kha a remchan dan angin a kilometre laklawh lo ang khan an rawn teh chho mai a. Chutah chuan Vairengte ram nei mi 15 zet mai kha package 2 huam chhungah khan a awm a ni. Chung chu anih avangin mi tam takin hlauhthawna an nei a. Amaherawhchu, package 3 hnuaiah hian Vairengte khua package 2 a bet chhungkaw eng emaw zat awmte ram hi Kolasib CALA in Gazette of India, Kolasib CALA hnen documents zawng zawng submit vek tur leh assessment pawh a tih a nih vek avangin, Kolasib CALA hnen atangin engkim a la dawn a ni. Amaherawhchu, package 1 leh package 2 hi CALA dang anni a, chuvang chuan General Manager - Project Management Unit, Silchar in helam hi a khawih dawn thung avangin, package 1 leh package 2 chhungah khan an awm leh lawi bawk si a. Amaherawhchu, Gazette of India, Kolasib CALA in a chhuah fel vek tawh si avangin document engkima kha Silchar lam changtu hnenah khan thehluh a ngai ta lova, keimahni lam Kolasib CALA hnenah khan a kal dawn ta a ni. Chutiang chu kan dinhmun a ni.

Hlauhthawn tur a awm lova, a tul ang ang te pawh tunah hian Kolasib DC leh CALA ten hma lain NHIDCL hnenah transfer tur thil te a awm anih chuan, “rawn transfer vek rawh u”, tiin lehkha kan pe fel tawh a, a tul ang chu tihfel a ni. Chutih lai chuan package 1 leh 2 te hi compensation sum an la pek-chhuah ve loh avangin, khang mi 15 te khan Pu Speaker, an la dawng ve thei ta rih lova. An dawn velah Kolasib CALA hnenah an rawn transfer ang a, anni hnen atangin an dawng dawn a ni.

Tin, hei bakah hian, package 3 leh 4 zawnga kha Mizoram chan a ni a, package 5 leh 6 hi tunah hian NHIDCL lamah te thehluh a ni a, Package-V hi pawm tawh a nih laiin Court lama zualko an awm avangin harsatna kan tawk hret a, chuvangchuan duh angin hna a kal chak theilo thung a ni.

Tin, Member zahawmtak Pu Lalrindika Ralte zawhna - “Ram teh chungchangah hian Surveyor indaihlohna a nasa si a, chuvang chuan out-sourcing a theih ang em?”, a ti a, a dik khawp mai a. Tunah hian kan dinhmun hi a thalo khawp mai a, Surveyor post ruak 15 fill up turin Recruitment Board-ah ka thawn tawh a, hun reilote ah a fel theih kan ring a ni.

Chutih karah chuan mamawhna a sang a, chhungkaw tinin kan damchhunga kan tu leh fate thlenga kan hnutchhiah tur ram neih kan duh theuh si a. Chungah te chuan kan ram tehfel anih theihna turin ngaihtuahna kan hmang lo thei si lova, chuvang chuan, “out-sourcing kalpui mai ni se”, tih ngaihtuahna kan hmang a. Chutah chuan a bik takin SEDP sum atangin tunah hian Saitual Town chu out-source niin hma kan la a, an tifel khat tawh a. Tunah hian District thar dang - Khawzawl hi sanction kan hmu tawh a, out-

sourcing turin quotation te kan khawn a. Tin, Hnahtial pawh ti turin kan inruahman bawk a ni. Chuvang chuan, empanelled fund nei turin theihtawp chhuahin sorkar chuan hma a la ni.

Tin, Member zahawmtak Pu Lalrinsanga Ralte khan mi 15 te an dinhmuna harsatna chungchang a sawi kha chu, nichina ka chhannaah khan a fiah maiah ka ngai a. Tin, “Bilkhawthlir - town extension chungchanga hmalakna kha engnge a thlen chin?” tih a rawn zawh kha - Bilkhawthlir hi mihring kan lo pung ta deuh deuh a, chutah chuan inhmun lo ram nei si, in saa pass la nei silo eng emaw zat an la awm a. Bialtu MLA zahawmtak hian thahnem a ngai em em a, “pass kan neih ve chuan bank loan te kan la thei ang a; theihtawp min lo chhuahpui rawh u,” tiin thahnem ngai takin vawi duailo ka office-ah pawh a lo kal a. Chutiang chuan hma la turin kan official te kan hriattir a. Tunah hianin Govt. approve turin a tul ang ang te tifelin an rawn thawn chhoh tawh thu kan hre bawk a ni.

Tin, Member zahawm tak Prof. F. Lalnunmawia zawhna - “Aizawl West by-pass road ah pass pek tumna a awm em?” tih kha, hei hi kan nghakhlel tlang vek mai a, kan Chief Minister zahawmtak remhriatna leh thahnemngaihna India ram budget-a la chuang ngailo - PM-DeVINE atanga kan hmu hi Zoram mipuite pawh kan lawm hlein ka hria. Aizawl khawpui motor tawt lutuk, a bik takin Bawngkawn lama motor lian rawn lut thin te pawh ‘by-pass road-ah chuan an kal theih tawh ang,’ tih te hi kan hmawthlir a ni lo thei lova. Chutah chuan, hemi rama hi keimahni atang chuan pass thar pek tumna a la awm lova, kan freeze vek tawh a, freezing order pawh nikum, Ni 13 June, 2022 khan kan pe tawh bawk a ni. Chuvang chuan, helai alignment chhungah hi chuan tumah pass thar pek theih a ni tawh dawn lo a ni.

Chutiang bawk chuan, package 8-ah khan ‘Aizawl Tunnel’ tih a awm a, lei verh turin NHIDCL a inbuatsaih a, chu chu anih dawn avangin khami ina a paltlang tur leh a tihbuai theih turah kha chuan ram pawh pek theih loh turin sorkarin a freeze vek tawh bawk a ni. Chuvang chuan, lei verh pawm leh pawm lo pawh hi awm a ni a, ‘an verh hmel hle mai’ tih kha chu tunah hian a lang ta a ni.

Tin, VC-pass nei mimal a paltlang turah an awm a nih chuan, sorkarin a ngaihtuah zel a, a ram hlutna (land value) erawh kha chu an la thei lo ang a, an thlai man erawh kha chu lak theih a ni ang a. Infrastructure te a lo awm tawh anih pawhin, kha kha chu sorkarin a tul angin a ngaihtuah zel tur zinga mi a ni dawn a ni. Chungte chu memberte zawhna tlangpui ka chhan theih te chu a ni e. Pu Speaker, ka lawm e.

FINANCIAL BUSINESS

SPEAKER : Awle, tunah chuan kan tihtur dang - *Financial Business*-ah kan kal ang a.

Vawiinah hian kan Minister zahawm tak tak - Pu TJ Lalnunluanga, Pu R. Lalzirliana leh Dr. R. Lalthangliana te demand kan sawiho dawn a, hun kal tawh a kan tih than angin, a pathumin in kan la kawp ang a, pass kan tum nghal bawk dawn a ni.

Awle, tunah kan Minister zahawmtak Pu TJ Lalnunluanga kan sawm ang a, House dawhkanah hian a demand te –

- Demand No. 4 - Law & Judicial Department;
- Demand No. 12 - Parliamentary Affairs Department;
- Demand No. 36 - Environment, Forests & Climate Change Department;
- Demand No. 42 - Transport Department

te rawn submit turin ka sawm e.

PU TJ. LALNUNTLUANGA, MINISTER: Pu Speaker, ka lawm e. Governor of Mizoram recommend na leh i phalnain, he House zahawmtak ah hian heng ka demand te –

Demand No.	Purpose	Amount (in ₹)
4	Law & Judicial	29,58,51,000.00
12	Parliamentary Affairs	101,86,000.00
36	Environment, Forests & Climate Change	1,616,513,000.00
42	State Transport	56,61,22,000.00
TOTAL		2,48,86,72,000.00

hi kum 2023 – 2024 chhunga hman atan ka rawn move e.

SPEAKER : Awle, tunah Minister zahawm tak Pu R. Lalzirliana, House dawhkanah heng a demand te submit turin ka sawm e –

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

PU R. LALZIRLIANA, MINISTER: Mr. Speaker, Sir, on the recommendation of the Governor of Mizoram, and with your permission, Sir, I moved the Demand Nos. 23, 27, 33 and 39 for ₹13,68,51,83,000 only for meeting expenses during 2023-2024 in respect of the following Departments –

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

SPEAKER : Awle, tunah Minister zahawm tak Dr. R. Lalthangliana, House dawhkanah hian a demand te rawn lay turin kan sawm e.

DR. R. LALTHANGLIANA, MINISTER: Hon. Speaker Sir, on the recommendation of the Governor of Mizoram and with your permission, I moved the Demand Nos. 21, 24 and 40 for ₹10,84,56,36,000 only for meeting expenses during 2023-2024 in respect of the following Departments –

Demand No.	Purpose	Amount (in ₹)
21	Higher & Technical Education	2,71,49,16,000.00
24	Health & Family Welfare	7,51,06,54,000.00
40	Commerce & Industries	62,00,66,000.00
TOTAL		10,84,56,36,000.00

SPEAKER : Awle, kan Minister zahawm tak tak ten an demand-te House ah an rawn submit ta a. Sawihona kan nei ang a, mi pakhatin minute 10 kha kan kalpui leh mai dawn em ni? (*House-in a remti a*) Awle, nimina kan sawi ang khan, minute 2 in la neihah bell kan rawn hmet ang.

Tunge sawi hmasa ang le? Awle, Dr. BD Chakma, member zahawm tak ka sawm e.

PU B.D. CHAKMA : Pu Speaker, ka lawm e. A hmasa berah Demand No. 44 - Transport Department hi sawi ta ila.

Pu Speaker, Chawngte leh Longpuighat te hi ka bial chhungah chuan khaw lian tak an ni a. Auto-rickshaw chungchangah hian sawiselna a tam a, Auto-rickshaw nei si, permit neilote an buai khawp mai a. Permit neilo thenkhat te phei chu local police-in an man thin a ni. A chang changin Lawngtlai atangin District Transport - MVI te an lo kal thin a, *Surprise checking* neih laia an man ho kha chuan pawisa an chawi te a ngai thin a ni. Khatiang harsatna sutkianna turin khawngaihin Pu Speaker, Auto-rickshaw nei tawh ho tal hi chu permit ka ngen sak a.

Tin, chumi bakah tunlai chu Mizoram-a sum harsat lai tak a ni a, India ram pumah, khawvel pumah pawh unemployment problem a nasa a a. Chutiang karah

pawisa nei ten driving license an lei theih chuan, heng a leina tur nei ve lote hi taxi permit emaw auto-rickshaw permit emaw pek theih dan hi a awm lo em ni? Hei hi sorkar sum tuak nan, tax lak nan te pawh a thain ka hria. Chuvangin, Chawngte leh Longpuighat khaw pahniha auto-rickshaw nei si, permit la nei lote hi khawngaihin special permit pek ni se a lawm ngawt ang.

Tin, Demand No. 27 - District Council & Minority Affairs Department-ah hian thil tam tak sawi tur a awm a. Pu Speaker, Chakma District Council budget 65 crore vel deficit a awm nia sawi a ni a, sum a harsa em em a. Chutiang dinhmuna kan ding chung leh Governor Rules hnuai a awm chungin a ruka sorkar hna lak a la awm tho zel a hi a paw ka ti a. Hei, documentary proof pawh ka nei a, Proceedings of the Meeting of Executive Secretary with all Heads of the Departments of CADC on 10th February, 2023 in CADC Conference Hall, Kamalanagar at 12:30 PM - *Resolution No. 5*-ah hian chiang takin a inziak a. Chanchinbu-ah pawh, “who has not joined and reported for duly ... duty till that self is strike out from the A-Roll from the month of January, 2023” tia chiang taka tihlan a ni. Pu Speaker, hetiang budget deficit kan neih avanga sum kan harsat e mem lain sorkar hna a ruka pek a ni hi paw ka ti khawp mai.

Chu bakah hei, *Resolution No. 7*-ah pawh hian, ‘who’s services were restored and join services, but salary has not been received till date shall be reported to Finance & Accounts Deptt. including the date of joining’ tiin a ziak baw ka ni. Hetah court thutlukna pakhat a awm a, employee thenkhat te chu court-ah an kal a, mahse khami court judgement hmang khan sorkar hna an thun leh zel a. Pu Speaker, hei hi chu thil serious a ni a, *internal enquiry* emaw, *departmental enquiry* emaw kan mamawh khawp mai. Chutiang anih loha CADC sum harsatna hetiang a kal chho zel a nih chuan, 2023-2024 budget ah chuan kan deficit hi cheng vaibelchhe 100 a la ni thei dawn a ni. Chuvangin, financial management hi kan control loh chuan harsatna hi a awm zui zel a hlauthawnawm a ni. He thil hi CADC tan bikin hian serious tak a ni.

Tichuan, hei, Governor Speech, 2021-2022 ah pawh - “Without permission of the Governor, no service should be restored and no new recruitment should be done” tih, Ni 29th March, 2022-ah chiang takin DC & MA Department atangin chhuah a ni a, hei hi thil serious tak a ni.

Tin, Vety Minister-in bawng damlo phurhna turin RD Block tinah ambulance tha tak a dah a, a lawmawm ka tiin, Vety Department te an fakawm ka ti a. Chutih rualin, kan Union Minister for Veterianry lo kal lai khan a sample atan Selesih-ah ambulance dah a ni a, atha khawp mai a, mi pawh phur theihna tur a ni. Oxygen leh emergency service bungrua zawng zawng kha ambulance-ah khan a kim vek a ni. Ran tana khatiang thil tha kan neih theih chuan, mihring damlote hman turin PHC tinah hian ambulance nei ve ila a va han tha dawn em ka ti a ni.

Chawngte block bikah pawh hian National Ambulance Service hnuaiah hmanah khan ambulance pakhat min pe a, mahse tunah chuan a hlu tawh a, a hmantlak tawh lova, kawr sirah off road-a dah mai mai a ni. Tunah hian he ambulance hi mi-anglo pakhatin riah nan a hmang thin nghe nghe a ni. Chuvangin, Pu speaker, khawngaih takin PHC tin a theih loh pawhin Community Health Centre, Chawngte-ah tal chuan ambulance hi min dah sak thei se kan lawm ngawt ang.

Tin, Medical Officer chungchang hi nimin khan recess room-ah kan Minister zahawm tak nen privately-in kan sawiho a. Medical Officer thar ngen hi chuan awmzia a nei lova, a thawktu tur MBBS hmuh a har zia kei pawhin ka hrethiam a; mahse, kan tan chuan a buaithlak a ni. Zing tin mai hian phone call kan dawng a, tele-medicine emaw, tele-prescription emaw hi kan pe lo thei lo a ni. 'Thin-na; luakchhuak etc' tiin zing tin phone ka dawng thin a, kan tan han tih vak ngaihna a awm lo a ni. Tunah hian Longpuighat leh Borapansury PHC-ah hian Medical Officer kan nei lova, kan Minister chak tak hian khawngaihhi he hi min lo enfiah sak se ka duh khawp mai.

Tichuan, Higher & Technical Education demand-ah lut ila. Govt. Kamlanagar College-ah hian NAAC Peer Team te vawi 3 vawi 4 lai chu an lo kal tawh a, mobile signal thatloh vangin required data te upload theih a ni thin lova. Tunah tak hi chuan Airtel leh Jio signal hi Chawngte bialah hi chuan a tha lutuk tawh a. Chuvangin, NAAC Peer Team te an lo kal leh hun nghakin beiseina sang nen tunah hian kan awm a ni tih kha ka sawi lang duh a. Pu Speaker, tun thlengin Govt. Kamlanagar College hian NAAC Accreditation a la nei lo hi a paw kan ti a. Khawngaih takin he hi Higher & Technical Education Minister-in min hriat sak se.

Tin, Art & Culture Department chungchangah hmanah kan Chief Minister zahawm tak, Finance Minister ni bawh hian kan Kutpui (Community Festival) lawmna tur nuai eng engaw zat kan budget-ah dah a nih thu kha a sawi a. Mahse, minorities - Lai, Mara, Chakma leh Bru te hian kan dawng ve ngai lova. Keini bik pawh hian kan social festival 'Biju' kum tin kan hmang ve thin a. Chuvangin, Pu Speaker, heng minorities - Lai, Mara, Chakma leh Bru te tan hian allotment hi min siam sak ve thei se kan hlawkpui ngawt ang a. Hetiang fund hi Tripura-ah chuan tam tham tak an pe thin a, Pu Speaker. Chutiang bawkin Assam-ah pawh minority ten an hmu bawh a, an social festival hmanna tur khan. Chuvangin, Mizoram-ah pawh minority unaute'n an social festival hman vena tur sum min earmark sak se kan lawm ngawt ang, Pu Speaker.

SPEAKER : Hun i hmang dik e. Tiang khan ti ang aw. Dr. L. Thangmawia ka sawm e.

PU L. THANGMAWIA : Pu Speaker, ka lawm e.

Vawiin hi i office atanga sawiho dan tur an rawn rem danah hian ka rilru lo la zawk a awm a. An record, khum har tak tur leh khum theih tawh loh tur te vawiinah hian rawn rem tlar a ni a. Kan Law Minister zahawm tak Pu TJ Lalnuntluanga hi KTP kum over hmaa minister a niin ka hria a, a khum thei chu an awm maithei a, thil har tak a nih tho ka ring a. Tichuan, kan Power Minister, Pu R. Lalzirliana hi Mizoram pian tawh hnuia Cabinet Minister a zawna term 3 awm thei kan neihchhun a ni a, khum a har ve viau maithei bawk a. Tin, Dr. R. Lalthangliana hi India ram University hnuiaia MLA tlin vanga leave la rei ber a nih ka ring a, tunah phei chuan MZU hian kum 10 bak a phal tawh lova. A record hi Mizoram-ah chuan kan khum tawh dawn lo a ni.

Eng pawh ni se la, Pu Speaker, Demand pawimawh tak tak an nih avangin, ‘ka thlawp vek’ tih kha ka han sawi sa ni se, a tawp lam kan hmanhmawh deuh thin a.

Transport-ah hian hmel thar kan hmu niin ka hria a. ‘Inland waterways’ hi tun ang em ema sawi zin leh hmalak hi a la awm lovin ka hria a, sorkar kal taah pawh. Tin, hnam inpumkhatna tura hmalakna Transport kaltlanga a nasat ber tum a ni a. Tunah phei chuan Tripura Service hi tan a lo ni tawh a; Manipur hi tihfel tep a ni tawhin ka hria a. Myanmar lam erawh chu an ram buai avangin nghah deuh hlek a la ngai awm e.

Tin, mipuite awlsawm zawk nan online-a fee pek theihna hi 31.8.2021 atang khan tan a ni a, lirthei neitute kan awlsam phah viau a ni. Tin, November, 2021 atang khan Learner’s License phei chu office-a kal kher ngai lovin online-a dil theih a ni tawh a, kan chhungkua ngei pawhin kan hmang tangkai tawh nghe nghe a. Chhungkaw tam tak pawhin an hmang tangkai tawhin ka ring a.

Tin, Online Trade Certificate te pawh ‘nikum April atang khan tan a ni’ tih kha kan hre theuhin ka ring a. MNF sorkarin manifesto-a a lo neih tawh, a hma chuan kum 15 lawih mai kha lirthei neite tan chhiah pek a ngai thin a. Khang te pawh kha tunah chuan kum 5, kum 10, kum 15 tih vel niin ka hria a, mipuite tana awlsam zawk tura pek theih a lo ni ta hi a lawmawm khawp mai a.

Tin, Forest Department-ah hian nakuma KTP General Conference thleng tur kan nih avangin ‘Ngopa Forest Rest House te min chei that sak rawh’ te ka ti a, min chei that sak dawn niin ka hria a lawmthu ka sawi ni bawk se.

Tichuan, Power & Electricity-ah hian, ka biala megawatt 4 pechhuak thei tur Kawlbem - *Small Hydel Project* kha Power Minister zahawm tak hovin kan han hawng a; min sawm ve hlauh mai a, ka lawm khawp mai a. Hei hi sorkar hmasa in bul a lo tan kha a ni a, kan sorkar tirh atangin kan han chhunzawm ve ngar ngar a. Kei pawhin vawi 2-3 vel ka tlawh a, DO Letter te pawh kan Minister te leh a thawktu Nortech Company te pawh ka thawn hial a, an hna a muan avangin. Hawn theih a ni ta te pawh hi a

lawmawm khawp mai a. He lai pawh hi sawi vak chu a chakawm a; khati chin kha ni ta se la.

Tin, Vankal - *Solar Park* phei chu Zoram mipuite'n kan tangkaipui tur megawatt 20 pechhuak thei tur a ni a. Chhuna khawl hmang mamawh leh thil dang tam takah he megawatt 20 hi Zoram pumin kan la hmang tangkai dawn a ni. Hmanni khan kan Minister zahawm tak hian 'han tlawh dun ang' a ti a. mahse programme dang pawimawh avangin kan thulh ta a. Mahse, min la sawm duh a nih chuan, kan la kal dun turah ka ngai a. He mi kaihhnawihah hian Kawlkulh-ah pawh Power & Electricity Sub-Division hawn hi a tul hle tawh a. Tin, he mi kaihhnawih lovah pawh hian Ngopa lama tihfel ngai leh electric connection an duh avanga va kal hi a lehlina chin a awm a, Kawlkulh area tan hian. Hei hi 'kan nghakhlel em em a ni' tih kha ka han sawi tel ni se.

Tin, tun budget-ah hian thil thar kan hmu a, hman atanga ka lo vei tawh a ni a. Art & Culture-ah hian NGO te tan nuai 50 dah a ni a, hei hi a bul tanna a ni a. Ka rilrua tun hnaia ka vei a ni lova. Mizo te chu NGO anga hna thawk thiam kan ni a, mahni ina chhuat nawt tura tirh kal theih mang lo pawh hi, YMA hnatlangah te hi chuan kawr bawlhhlawh thenfaiah te hian a tangkai ber ber an ni thin a ni. Chuvangin, NGO tam tak a awm a, (a lian zual te hi chu sawi ngai lovah dah ta i la,) tum neiin an awm thin a. Kei pawh hi NGO 4-5 ah ka lo tel thin a; kan thil tih tum theihtawp chhuah ngai bawk, sum tlem sen ngaia kha dil kual ngai bawk, kan thawh khawmin a lo daih lova. Chungte chu a lo nih thin avang hian, he scheme hi tih len chhoh zela, NGO te pawhin anmahni area zawnah zirlaite tana thawk tur NGO te, ruihhlo tana thawk tur NGO te, khatiang hrang hrang ho kha sorkar pawhin *approved-scheme* anmahni kaltlangin nei i la. 'A tira vei ve lo' NGO te pawhin an tih theih hial turin. Tin, NGO kan va funding si, ti thalo kha chu a kum leh atanga black-list theih mai a ni a. Hei pawh hi budget-ah a bul min tan sak hi ka lawm em em a. Minister te'n an duhzawng an tih ve tur chin chu a awm ang; amaherawhchu, tam tak erawh chu scheme awm sa ang, Mizo mipuiten kan mamawh *scheme*, faina lam a ni emaw, ruihhlo lam a ni emaw, khatiangin ti i la. Hei hi crore tel a tlin chhoh hun pawh hi ka nghakhlel viau a.

Tin, he mi kaihhnawihah hian, Demand nen chuan a inkaihhnawih tho ang a, Higher & Technical nen Heh mi ruala ka han sawi duh chu - kan thalaite hian hunawl hi an nei a ni. Exam result nghah lai te, civil service exam an tlin hnua interview result an nghah lai te, henga kar khat hun nei, thlakhat hun nei, kum chanve dawn hun neite pawh an awm a ni, kan lekhathiamte zingah hian; hengho tha awl hman tangkai hi. Hmanlai chuan lo neih te a ni a, nu leh pa te exam chawlh lai chuan an va pui mai thin a. Vawiinniah erawh chuan a ni tawh lova. Nileng deuhthawa phone khal ringawt leh, nasa taka hna an thawh tawh hnua exam tura an inbuatsaih tawh hnua intih engthawl duh si kha, heng hi sorkar ang hian kawng tam takah survey-ah te leh thildangah kan hmang tangkai theiin ka ring thin a, khawi ber nge tih tur chu ka hrethiam lova; vawiinniah hian a hlawmpuiin kan thet a ni. Chuvangin, hetia kan tih phawt chuan, education sector

ah te pawh kan tangkaipui ka ring a, kar khat chhung class va lak tir kan duhlo anih pawhin, school ban hnua a thiamlo ho tuition lo pe tur tal pawhin, a thlawnin, hlawh nei lovin. Chutianga ram tana karkhat ti thei, thlakhat hun pe thei hi Mizo thalai zingah tam tak an awm ka ring tlat a. Hei hi ngaihtuahna kan hotute pawhin lo seng chho se thil tangkai tak anih ka ring; NGO kaltlanga tih te pawh a tha maithei e.

Tin, a tawpna lamah chuan, Pu Speaker, Pu Thangtea, kan Minister zahawm tak Higher changtu demand-ah hian lut ta ila.

Health Clinic Centre te hi ka bialah pawh pali ngawt mai minrawn dahsak a, ‘a in tur hi kan sa zo vek tawh a ni’ tih kha ka report duh a. ‘Sorkar atanga sanction awm hun kher hi i nghak lovang u; hei chu kan khawtlang tan a ni’ kan ti a, hlep nei lovin khawtlang tangrual nen kan sa zo vek tawh a, tunah hian. ‘Hmanraw ngai zual pawh hi rawn tithla ula sorkar nghak kher lovin, hei hi chu mipui tangrual leh MLA fund pawhin a tul zual hi kan ti dawn nia’ ka ti a, tunah hian kan tichho mek a. Raipuar km km 5-10 dawn lai lai vaccine la tura an kal thin chu a bo dawn ta a, ka bial khua zawng zawngah Health Department-in hmun a nei ta a ni. A lawmawm hle mai. Amaherawhchu khawlian zual - Ngopa Chhim Veng leh Kawlkuh North angah te hian, a khua a len avangin Health Clinic Centre kha kan dil mek bawk a, hei hi min puan sak theih chuan khawtlang tangrualin a in te kan lo sa leh ang a, tiang khanin kan sawilawk ni ta sela.

Tin, Health & Wellness Centre-a hlankai Sub-Centre a awm te hi a lawmawm khawp mai a. Tin, District thar pathum hi hlanchhiah miah lova covid laia kan han ti hi a lawmawm bawk a. Tunah pawh hian CMO office hi sak mek a ni a, Saitual, Khawzawl leh Hnahthial ah te Chief Medical Officer tur. Tin, District Hospital khum 50 awm theihna tur buaipui mek a ni te hian min tilawm hle bawk a.

Tichuan, a tawp ber atan chuan Pu Speaker, Higher & Technical-ah pawh sawi tur chu ka ngah naa, ka vei zawng deuh mai thil pakhat han sawi ka duh a. College kan kal ve laia civil service-a luh tum ho chu chhungkaw hausa vek an ni lova, chhungkaw hausa tam takin an zir tha peih lo bawk a, churang chuan, *Competition Success Review* te pahnih pathumin an inlak tawm thin a ni. Aizawl khawpui te, Lunglei te leh district capital-ah chuan college zirlai competitive neite tana zan pawha va kal theihna tur, inhlawh chawp te pawhin zana an zir theihna tur *24 hrs- service*, a material erawh chu anni tana lei ngai lovin, competition-a chanchinbu lei ngai lovin subscribe sak ila, online a lei theih online-in computer nen tihsak ila. Tin, lehkhabu tharlam ber ber dah sak ila, Mizo thalaite hi tam tak, tuna kan hmalakna bakah hian civil service-ah an tlin theih ka ring a ni. Ka lawm e, Pu Speaker.

SPEAKER : Hun in hmanng tha chat chat hle mai. A ropui e. Member zahawm tak Pu Lalchhuanthanga ka sawm e.

PU LALCHHUANTHANGA: Pu Speaker, ka lawm e. Minister zahawm tak Environment, Forest & Climate Change Department atang hian tan ila. Demand No. 36.

Hei, sahan enkawl nan hian kumtin cheng nuai za chuang hman a ngai thin a. Amaherawhchu, sahan enkawl nan hian sum dah a ni ngai lova. Nikum 2022 chhung khan dan lova ramsa a ruka tawlh lut 261 lai man a ni a, heng ramsa man khawmte han dahkhawmna tur ‘*Animal Rescue and Rehabilitation Centre*’ pawh a awm lova, heng te hi an mamawh khawp mai a. Tin, ramsa enkawl na tur hianin vety doctor an neilo bawk a, AH & Vety atangin kar khatah vawi 2 te an zuk tlawh thei chauh a ni a. Chuvangin, Vety doctor hi kan mamawh khawp mai. Central atangin sahan enkawl nan hian puihna an hmuh mumal loh avangin tunah khuan an tla bal chho mek niin a lang a. Sahan ramsa awmna siam belh leh chei that te pawh a ngai a, kan Forest Minister hian beng lo chhi deuh sela a tha ang e.

ZMC lampang hi han sawi ka duh a. Kan zirna sang, kan ro. ZMC hi sorkar hmasa Congress hunlai khan hmanhmawh leh duhthusam loh tak khan MBBS zirna an han hawng kha a ni a, hei, tunah hian an kal chho mek a. Amaherawhchu, hmasawna a chak lo hle mai a, tunah hian saw Medical College saw recognized a la ni lo a ni. A first batch hian thla thar maiah final an exam dawn ta a, heng first batch te hi lo pass chhuak ta sela, engtianga awm tur nge ni ang? Recognised an nih loh chuan zirna sang zawk ‘Specialist’ kan tih ang te, PG zir turin khawiah nge zirna seat an hmuh theih ang? Tin, recognised an la nih loh chuan, medical practice pawh tihtheih a ni dawn lova, chuang chuan, an recognition hi a hmanhmawh thlakin, a pawimawh hle mai a. “ZMC hi engtikah nge recognize a nih ang?” tih kha ka zawt a.

Tin, “A faculty strength hian minimal criteria a phak em?” tih te, “Heng faculty kan neih te hi National Medical Commission norms angin an qualify chiah em?” tih te ka zawt duh bawk a. National Medical Commission danah chuan Medical College Hospital te hi teaching faculty te hnuai a awm tur a ni a, amaherawhchu, tunah hi chuan Directorate Health & Medical Education hnuai a an la awm tlat a ni. Heng te pawh hi tihfel a ngai a. Tin, National Medical Commission hnuai a chuan Medical Supdt. te, Director te, Dy. Medical Spdt. te pawh hi dan ang tak, norms fel taka (*Hon. Dy. Speaker-in chair a la a..*)

DEPUTY SPEAKER : Sawi chhonzawm rawh le.

PU LALCHHUANTHANGA: Ka lawm e, Dy. Speaker. Hengte ah hian National Medical norms hi a duh khirh khawp mai a, “kan neih mek ang te hi National Medical Commission Norms nen hian a inmil em?” tih te ka zawt a. Hei hi a pawimawh khawp mai a, Medical College kan han nei ve a, hei vang hian kumdanga State danga kan quota ang kha kan nei tawh mumal lova. Chuvang chuan, kan Medical College hi recognize anih vat loh chuan doctor indaihlohnaah te harsatna kan tawh dawn a ni.

Nikum lamah khan kan Chief Minister zahawmtak khan Central-ah ZMC hi Central University hnuai a dah tur khan an zuk sawi niin kan hria a. Khangte kha ‘engnge a thlen tawh?’ tih te pawh ka zawhna a ni. Tin, tun kum ZMC batch, 2022-23-a MBBS zir tur thlanah hian seat ruak 3, category I - Zohnahthlak te puala mi tur kha Guwahati High Court-in Assam- merit list a mi mi 3 a thun niin kan hria a. Heng te hi a dik chiah em? A lo dik a nih chuan. kan Minister zahawm tak hian min enzui sak se la a lawmawm khawp ang.

Tin, ka bial chhunga health clinic te, health sub-centre te pawh kan tlawh kual a, ka rin aiin an lo tlabal em em mai a. Furniture-ah te, hmanrua BP check-na te, naupang lungphu enna chi te khatiang neuh neuh te pawh kha an lo nei mumal lova. Theih ang angin MLA fund atangin kan han phuhruk a. A thenah phei chuan lapua te, bandage te pawh an lo tlachham a ni. Hengte hi kan Minister hian min hriatpui se la. Kan health sub-centre te, kan health clinic te, hmundang a mi te pawh an ni ve tho ang, heng te hi thuam that deuh theih se la. Tin, furniture te pawh an nei mumal lo khawp mai a, hengte pawh hi a pawimawh khawp mai a, kan Minister hian min lo hriatpui se la.

Tin, Demand No. 39 - Power chungchangah hian, ka bial chhung -Kulikawn West-a an transformer te khu a tha lo khawp mai a, a chawm zo lo a ni. Hei hi kan Minister hian min hriatpui se la. Tlangnuam-a kan transformer a accessories te pawh khi a hlui lutuk a, kan buai kan thin a. Hei pawh hi ‘a thara thlak theih a ni em?’ tih te pawh kha kan zawt duh a.

Kan sorkar kal mekah hian hydel project, intodelhna lampang hi kan kalpui lo hle mai a. Potential kan nei tha kan tih reng si laia hetiang anga power kan indaih lo hi engnge a chhan ni ang? Engvangin nge hma kan lak loh? “Tuirial Hydel Project compensation avang khan hma thar hi kan la ngam lo em ni?” tih hi Power Minister hian min chhang thei se la, a lawmawm khawp ang. Kan power mamawh te kan in phuhruk lo em em a, potential nei sia hetiang dinhmuna kan ding reng mai hi engnge a chhan? “Power lama intodelh tur hian eng anga hmalak zel nge a nih?” tih te a ni e. Pu Dy. Speaker, ka lawm e.

DEPUTY SPEAKER : Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Dy. Speaker, kan sawi nghal zung zung ang e.

Demand No. 36 - Forest Department hi, kan Forest Minister chungah hian a bik takin lawmthu kan sawi duh a. Kan bial hi hmunphiah tamna hmun a ni a, sorkar leh Forest Department ten ruahmanna siamin *mahal* an han ti a, mahal rate hi kg-ah ₹25/- a ni a. Amaherawhchu, mipui ten a aia to zawk a hralh theihna an hriat avangin kan Minister hmalakna a zarah *mahal order* kha cancel a ni a, mahal rate ₹25-a hralh thin

kha, a tuk lawkah ₹40/- in an han hralh nghal thei a, kan lawm tak zet a, hmunphiah hralhna chungchanga hma min lak saknaah. Kan area, a bik takin kan bialkhu 'hmunphiah area' a nih avangin, 'kan lawm tak zet a ni' tih kha ka sawi hmasa duh a ni.

Tin, Saiphai-ah Forest IB min sak sak dawn a, kan lawm khawp mai a. Engkim pawisa ruahmanna tihfel a ni vek tawh a, tan a ni mai dawn a. Saiphai khu ramri hmun pawimawh tak, riahbuk pakhatmah awmlohna a nih avangin Forest Deptt. in hma min lak sak avangin kan lawm tak zet a. Tin, *Pualreng - Wildlife Sanctuary* cheithat leh thawmthat an ni chho zel a, North Hlimen-ah khuan a awm a. Khung te khu a hma aia nasa zawk a hma kan lak theihna turin minister leh department lam ten ruahmanna min neih sak zel turin ka ngen bawk a ni.

Tin, Pu Dy. Speaker, Serlui-balu hi tunah hian lakchhuah theih a ni tawh a, Phainuam leh Saiphai inkarah khuan kawng tha zet maiin tunah hian siam a ni tawh a. Khumi Serlui balu kan lak chhuahna kaw 4-5 thlang lawkah khuan Bagha-balu angin an lo lachhuak a, khumi kan lui luang balu tho khu. Chuvangin, 'Bagha-balu a tha' kan ti a, kan duh em em a, man to zawkin kan lei a; a aia tha, a chhak kaw 4-5 leka awm Serlui-balu hi lachhuak ila, hengte hi Forest Department enkawl na hnuai a awm niin ka hria a. Royalty mumal zawk leh pangngai taka siama lak chhuah zung zung a nih theihna turin tan han la thar deuh se thain kan ring a ni.

Demand No. 42 - Transport chungchangah hian han sawi duh ka nei a. Vairengte-ah commercial vehicle check-gate, 'terminal check-gate' kan tih bawk kha hawn a ni ta a, kan lawm tak zet a. Four-lane kawng laih thar a ni a, four-lane a rawn chhuah chuan a thlang lamah hian check-gate sawn tho a ngai dawn a. Chuvang chuan, tuna building tha takah khuan ADTO min dah sak ta ro ro bawk a; ADTO hi Kolasib-ah hnathawh tur mumal nei lovin an thu mai mai tho a, Vairengte-ah khuan ADTO hi pangngai takin function se revenue pawh tam tak kan hmuhchhuah belh ka ring a. ADTO a function theih ngeina turin ruahmanna min neih sak theih chuan kan lawm ngawt ang.

Tin, Demand No. 33 - Soil Department hi tlem han sawi tel ka duh a. Department pawimawh tak ni si, a pawimawhna sorkar pawhin kan hriatpui tawk lo hi a paw hle a, kan hmang thiam tawk lo viauin ka hria. Soil Department hi directorate hran nei, directorate-a awm ni si hi an hmalaknaa mithiam tak tak kan neih te kan hmang tangkai lo hi a paw ka ti tak zet a. Lei tha luangral mai turte leh thil chi hrang hrang an kuta an thawh theih tur thil tam tak hi a awm a. hengte hi kan hmang tangkai theihna tur hian Soil Department hi ngaihven thar deuh hlek ila thain ka hria a. District tinah an office pawh hmuh tlak a awm mang tawh lova, district tina an office te hi district danga officer leh office-te nen hian a inthlau khawp mai a. Tin, a thawktute tan pawh hian phur awm lo rawih khawp ni hian ka hria a. Sorkar hian kan enkawl that deuh a ngai mang e ka ti a ni.

Tin, Demand No. 39 - P&E Department demand hi han sawi ve ka duh a. North Chawnpui-ah khuan line-extension kan dil a, kan dilna te kan minister-in ruahmanna min han siam sak a, a hlawhtling dawn niin kan hria a, kan lawm tak zet a. Tin, ramri buai avanga ramri kawng kan laih, sipai duty post kan siamna atanga hla tak Aitlang-ah te, Buarchep-ah te current min pawh luh sak a, kan lawm tak zet a. Tunah chuan kan police duty post te pawh in nuam tak tak leh current hnuaiah an awm tawh a, lawmthu kan sawi nghal a ni. Tin, session hmasaah pawh khan ka sawi tawh a, Mizoram chhunga current line upa ber pawl chu Vairengte - Bilkhawthlir - Bawktlang line khu a ni a. He line hi a pawimawh khawp mai a kan sawi tawh a. Tin, official lam pawh hian ruahmana siam in hma la chho in proposal siam a ni tawhin ka hria a Hengah te hi kan Minister hian chak takin hma min lak sak thei se. SASCI rawn chhuak leh tur emaw, DoNER atang pawhin sum hmuh theih theihna kan zawn a tulin ka hria a. He kan line upa tak hi kan ngaihven vat loh chuan Mizoram pum hian kan tuar tel thei a ni. A bik takin Vairengte leh Bilkhawthlir tlangdungah te chuan thli a thawt hlekin line-fault a awm thin a, current a awmlo nghal mai thin a. Chuvang chuan, he line han check thata, a thar hlak kan ti thei lo a nih pawhin a tul ang ang ruahmanna siampui a ngaiin ka hria.

Tin, North Hlimen leh Thingthelh hi Sentlang atang hian a line hi siamthat a ni tawh a, Bukpui thlengin an rawn zo phei tawh a. North Hlimen leh Thingthelh hi ala thleng phei ve lova, session apiang mai hian ka sawi a, hei hi kan ngaihven a ngai khawpin ka hria a. A ban te pawh a tuiekin, a tlu ti tih tawh a, khawtlangin buaipuinin cement te an han chhung kual a, thing tein an do a. Tin, a line a hlui tawh em avangin thli thaw leh eng emaw hlekah a chah a hlauhawm a, current off te a ni a. Khawtlangin hnatlangin kan bei mup mup thin a, saw mi khaw hnih saw; a thui lo bawk a. Hei hi thawh vat anih theihna turin ruahmanna min siam sak theih chuan a lawmawm hle ang.

Pu Dy. Speaker, Demand No. 24 - Health & Family Welfare Department hi a lawmawm hle in ka hria. Zoram puma an hmalaknate kan hmu a, health-clinic centre thar tam tak kan han nei a kan lawm takzet a. Kan bialah pawh hian clinic centre 10 chuang kan nei thar a. Tin, health clinic centre-a thawktu tur health-worker te, helper te kan han nei a, lawmawm kan ti takzet a. Session-ah kan sawi fo a, 2019-20 khan health clinic mamawh ngawih ngawih, khaw te tak te ni si, khaw eng emaw zat kal kana sub-centre hla tak va pan kha raipuarate tan a buaithlak zia te kan sawi a. Chughah chuan health clinic centre kan han nei thar a, thawktu tha tak tak kan han dah thei te hi a lawmawm hlein ka hria a. Chu mai ni lovin, kan minister zahawm takin a rawn sawi tawh a, health clinic centre, a building khawtlang te nen tang hova sakna tur pawisa kan han nei tur leh, a hmanraw tul pawimawh zual kan han nei vat tur te hi a lawmawm hlein ka hria. Hei hi chak leh zuala kan kalpuia, health clinic centre a awm vat theihna turin kan minister zahawm tak hian hma han la chak se ka duh a ni.

Tin, Bilkhawthlir PHC building min sak thar sak a, kan lawm takzet a. X-Ray khawl thar min pe a, a dahna tur In min pek pawh hawn a ni tawh a kan lawm tak zet a.

Tin, Vairengte CHC ruahhmana min neihsak a min chei chhoh sak a; isolation ward leh laboratory room te tunah hian sak a ni chho hi kan lawm takzet a. Kan mamawh tak tak zawka chu - 'hei hi kan mamawh lo e' tihna ni lovin, doctor leh nurse quarter hi kan mamawh hle a, hei hi min hriatsak thei se ka duh bawk a.

Ka sawi nawn leh duh chu – he House ah hian ka sawi ngun tawh viau a, kan session leh hmaa kan neilo a nih chuan kan in-au ve viau tawh maithei a. vairengte-ah hian X-Ray khawl dah ngei ngei a ngai a. Kan official lam te pawh ka sawipui ngun tawh a, vawiin ni thleng hian 'dawn nia; dawn nia' tiha a ral hi a tha lovin ka hria. Kan minister hian hei hi kan neih thei ngeina turin hma a lak a tulin ka hria a.

Tin, tunah hian health-worker awmlohna khua kan nei nual mai a, hei pawh hi SEDP atanga kan dah theih chuan, health-worker pangngai kan neih lohna hmunah te thihna avanga health worker post ruak kan neihte hnawhkah zung zung a ngai hle a mai.

Tichuan, Pu Dy. Speaker, heng kan Minister zahawm tak tak pathumte demand hi tha ka ti a, ka rawn support a ni e. Ka lawm e.

DEPUTY SPEAKER : Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Dy. Speaker, ka lawm e. Vawiinah minister pathumte demand kan sawiho a ni a, a bikin senior minister Pu R. Lalzirliana hi, a zawnin minister vawi thum a ni thei hi a lawmawm ka ti a, keini hi 1989 khan Assembly-ah kan lut hova, ka lawmpui hle a ni.

Awle, Pu Dy. Speaker, a hmasa bera chuan, Demand No. 42 – Transport, Land Resources, Soil & Water Conservation chungchang ka sawi duh a.

Pu Dy. Speaker, *Tlabung 35* - West Tuipui Constituency hi niminah pawh ka sawi tawh a, Tlabung-ah hian infrastructure lama hmalakna a la awmluh thu hi. Keini hi lui kama awm kan ni a, soil erosion kan tuar nasa hle a, ka bial pumpuia khaw hrang hrangte lui kama awm deuh vek an ni. Kan khua hi 'Nursuri' a ni a, Nursuri-a chhungkaw zahve deuhthaw chu soil erosion avangin an pem darh vek tawh a ni. Chuvangin, kan tan chuan he department hi a pawimawh khawp mai a, rin aiin an budget-ah sum dah a tam lo hi pawh ka ti khawp mai a. Tin, chuti ruala ka sawi duh chu - Ministry of Shipping, Govt. of India chuan Tlawng Lui chu *National Waterways 102* atan a puang a, a lawmawm ka ti khawp mai a. Inland-water Transport Authority of India economic survey-ah pawh hei hi a lang a ni. Tlawng Lui dunga Khamrang leh Garmura, Assam inkar inkalpawhna hi siam theih ni awmin survey a lang a, a tak takin hei hi puitling se a duhawm khawp mai a.

Tin, thil lawmawm ka tih deuh pakhat chu - Economic Survey of Mizoram, 2022-23-a a lan danah chuan, Khawthlang Tuipui tan hian MS Right Consultancy Firm-in detailed project report a buatsaih a, a lawmawm ka ti khawp mai a, he project atan hian Ministry of Shipping chuan ₹2,294.94 lakhs a phal sak a ni. Keini hi lui kama awm kan nih vangin waterways (lui kawng) hi tun thlengin kan la hmang tangkai mek zel a. Chutih lain tuna problem kan neih chu - siltation, soil deposit nasat avangin Khawthlang Tuipui hi a kam chak khawp mai a, chuvangin tuna kan sawi project hi anih dan tur dik taka hman ni se, kan bial tan bik chuan a lawmawm hle dawn a ni. Tin, zawhnaah pawh ka zawt a, he project hi a tak taka hna an thawk a nih chuan, social impact assessment leh environmental effect assessment te hi sorkar hian a tilo hi a pawika ti a, hei hi tih ngei a ngai a ni. Indo-Bangladesh border fencing project hi a lian a, crore tam tak senga tih a ni a, mahse sawrkar hian kan han sawi assessment te a ti lo kha pawika tak zet a. Chutiang tho chuan tuna kan sawi project pawh hi a tak taka an tih a nih dawn chuan, social impact leh environmental assessment hi nei ngei se ka duh khawp mai.

Demand No. 40 - Commerce & Industries Department demand-ah pawh hian chutiang tho chuan border haat hi economic survey-ah a lang a ni a, a lawmawm ka ti khawp mai a. Hemi *border haat* concept hi a tha a, tih puitlin anih chuan a hnaivaia awm farmer te tan eizawna a tling dawn a. Hetah hian - Silsuri, Marpara, Tuipuibari leh kan khua Nunsuri hming te pawh a lang a, a lawmawm ka ti a. Kam minister hnena ka ngen duh chu, helamah hian engchen nge hmalak anih tawh tih hi min hrilh thei se a lawmawm khawp ang a.

Hospital chungchangah hian ka sawi duh chu, Pu Dy. Speaker, kan area hi backward anih mai bakah malaria prone area a ni a, chuvangin Tlabung Sub-Division Hospital hi tuamthat a ngai a ni. Tin, Borapansuri leh Longpughat hospital te hi sak zawh tawh a ni na a, a la function lova. Ka bialah hospital pakhat chiah Tlabung-ah a awm a, chuvang chuan damlo ten an pan nasa hle thin a. Chuti chung chuan X-Ray khawl te kan la nei lova, ultrasound kan neih te pawh a chhiat avangin repair a ngai tawh a. Heng medical equipment kan neih loh avangin Lunglei-ah damlote refer chho zel anni a, mirethei tan chuan a harsa khawp mai a, Lunglei-a inentir tura va kal ziah ngai kha. Chuvang chuan, 'ngaihtuah kan ngai hle a ni' tih kha ka sawi duh a. Kan Minister zahawm takin hei hi min chhinchhiah sak se ka lawm hle ang.

Pu Dy. Speaker, a tawpna atan Demand No. 39 - Power & Electricity Department-ah hian thil pakhat ka hriatthiam loh a awm a. Kan transformer englai pawha chhe reng hi engnge maw a awmzia le? A thlakna lah hi kan harsat e mem bawksi a, hei hi awlsam deuha thlak dan te hi awm thei se kan duh khawp mai a. Tunah pawh hmun hrang hrang atangin phone call, transformer a chhiat avangin an dawng thin a, a eng thei lova, tunlai exam hunlai te a ni bawk nen. Hei hi a rang lama min thlak sak thei se kan duh khawp mai a.

Pu Dy. Speaker, Power & Electricity Department hian hma a sawn chho zel a, kan bialah te pawh eng emaw chen chu a ni a, lawmawm ka ti khawp mai. Ka lawm e.

DEPUTY SPEAKER : Member zahawm tak Pu C. Lalmuanpuia ka sawm e.

PU C. LALMUANPUIA : Pu Dy. Speaker, ka lawm e.

Vawiinah kan Minister zahawm tak tak pathumte Demand kan sawi thei hi a lawmawm ka ti a. Hetianga hun tha min petu Pathian hnenah a hmasain lawmthu ka sawi a ni. Demand kan sawi turte hi chipchiar takin kan luhchilh hman dawn lo va minute 10 chhung a nih avangin tawite tein kan han sawi ang a. A hmasa berah chuan, Demand No. 4 - Law & Judicial ah hian ka lut ang a.

He department hi department pawimawh tak a ni a, a tangkai em em a, ‘department zawng zawngin kan intawm’ te pawh a tih theih awm e. Engkimah dan leh dun siam angai a, tin, he House zahawm takah pawh hian dan te kan han siam thin a, chungah te pawh chuan he department tel lo chuan a famkim lo thin a ni. Chuvang chuan, he department hi thuam chak a ngaiin ka hria a, staff an indaih lo em em a, engkim law-vetting tih te a ngai a, chuvang chuan he department hi thuam chak a tulin ka hria a ni.

A pahnihaah chuan, Demand No. 42 - Transport Department hi a pawimawh khawp mai a. Hetah hian sawitur tam tak a awm a, chung zingah chuan ka han tuipui ve em em pakhat chu – ‘Inland Waterways Transport’ hi a ni a. Ka hmaa kan Member zahawm tak pawh khan arawn sawi a, he Inland Waterways chungchangah hian hmalakna kan hmu a, a lawmawm ka ti a. Hemi Tlawng Lui te pawh hi Mizoram chhunga National Waterway kan neih chhun a ni a, National Waterway 102-na a ni a. Kan ngaihthlak tawh ang khan Khamrang atanga intanin Garmura, Hailakandi District, Assam thlenga ruahmanna kal tur a ni a. He ruahmanna, Ministry of Ports, Shipping & Waterways, Govt. of India in a arawn tih anga Minister zahawm tak leh he department changtuten ruahmanna an kalpui hi a lawmawm ka ti a, a tha ka ti a, a hlu ka ti khawp mai. Chu mai a ni lova, Khawthlang Tuipui Bangladesh nena kan insumdawnna tawwna tur atana ruahmanna awm mek te, tin, Khawthlang Tuipui Rajivnagar – Tuichawng-a hmalakna awm te hi a phurawm ka ti tak zet a, he project kal mek hi hlawhtling takin kal thei se mipuite hian kan chhawr tangkai dawnin ka hria a ni.

Tin, kan sawi leh duh chu - Transport Department hmasawwna kan hmu a, *online payment* kan kalpui thei te hi a hluin ka hria a. Mipuite hun tam tak sen ngaia a hmuna kal lova, keimahni inchhung lum atanga online payment kan han kal tir thei te hi a lawmawm hlein ka hre bawk a ni. Tin, Transport Department hian public transport a ngai pawimawh hlein ka hria a, chuta lo lang ta chu - ZMC, MZU, Lengpui Airport te mipui tan an pawimawh em em a. Aizawl khawpuia awmte tan chuan heng ruahmanna

Aizawl City Bus Association te nena inbe rawnin hengah te pawh bus kaltir a ni hi a lawmawm hlein ka hre bawk a ni.

Pu Dy. Speaker, ka bial chhungah ka han lut ve zawk ang a. Transport Department hian kan bial chhung - Govt. Mizo High School hmunah sawn *multi-level parking & multi-level purpose* hall min sak sak a, kumin hian zoh hman kan tum a. Covid-in min tibuai lo sela chuan kan zoh hman ngei pawh kan beisei a. Sawlai saw hmun pawimawh tak mai a ni a, parking kan mamawhna a sang em em a, Zarkawt leh Chanmari ten tangkai takin saw parking saw kan hmang thei dawn a ni a, a changtu Minister leh Transport Department te chungah pawh lawmthu kan sawi a ni. Tin, commercial vehicle te ngaipawimawhin *terminal* sak a ni te hi lawmawm ka ti a. Tlabung, Vairengte leh Serchhip-ah te heng ruahmanna an nei hi a lawmawm ka ti tak zet zet a ni.

Tin, Demand No.36 - Environment, Forests & Climate Change Deptt-ah hian sawi duh ka neih chu, 'Aizawl sahan' hi a ni a. Tun hnaiah Aizawl sahanah sakei a lar khawp mai a, '*Keipui*' kan tih ang chi hmuh tur a awm khu hmasawna ropui tak niin ka hria a. Tin, dahbelhna tur ruahmanna an siam mek tih te ka lo hria a. Hmanni lawk pawh khan kan Minister zahawm tak hnung zui hian ka zuk tlawh ve a, tlawhtu pawh an thahnem khawp mai a, naupang zirlei te pawhin an hlut hlein ka hria a. Tin, *Sakeibaknei*, 'lion' kan tih ang te pawh dah belh tuma hmalakna a awm hi a lawmawm ka ti a, hemi kawngah hian hma la zel tur pawhin kan chah duh a. Tin, ka rilru khawih deuh chu - ransa dan lo anga an man te an dah-khawmna ka zuk hmu a, duat tak maia kan sahana an lo enkawl khu a lawmawm ka ti a, a hlu ka ti khawp mai. Rannungte hi an lainatawm hma em em mai a, duat tak maia an man khawm sahana an dah khu a lawmawm ka ti a, an chungah pawh lawmthu ka sawi a ni.

Demand No. 23 - Art & Culture Deptt-ah hian hmasawna kan hmu bawk a. NGO te tan pawisa nuai 50 lai mai ruahman a ni hi a lawmawm hlein ka hria a Cchu chu ka han tarlang zawk duh bawk a ni.

Demand No. 39 - Power & Electricity-ah pawh hian hmasawna thar kan hmu a. Tlawva-*Small Hydrel Project* (5 mw) commission a ni hi a hlu hlein ka hria a. Power kan intodelh loh dan kan hria a, hetiangah thil thar hawn theiha a han awm hi power lamah hmasawna step khat chu a ni a. Tin, Kawlbem-*Small Hydrel Project* (4 mw) ruahmanna pawh hi a hlu hlein ka hria a.

Tin, Solar lamah pawh hmalakna tam tak a awm a. Vankal-*Solar Park* leh hmun hrang hrangah power hmanga intodelhna tur ruahmanna kalpui mek a ni hi Pu Dy. Speaker, a lawmawm hlein ka hre bawk a ni.

Electric Department hi an hah hle a, power supply semkual leh ruahmanna siam ringawt pawh hi a buaithlak tham hle dawn a. Tun kan dinhmunah Mizoram chhungah pawh power an semrual thain ka hria a, an fakawm khawp mai. Mitin mamawhna a sang a, power hi. Zingah pawh badminton khel dawn ila, power tel lovin kan khel thei tawh lova. Chutiang khawpa mamawhna sang a ni a, a department staff-te an chhuanawm tak zet a.

Tin, ka bial chhungah hian electric ban mamawhna Hunthar leh Edenthar Veng-ah a awm a. Kan Minister khan min lo chhinchhiah sak sela. Khungte khu min ngaihtuhsak theih chuan kan lawm ngawt ang a. Tin, in pakhat power-line hian a delh tel ve a, sawn kan duh khawp mai a. Ruahmanna min siamsak theih chuan kan lawm ngawt ang

Pu Dy. Speaker, a tawp berah chuan Demand No. 24 - Health Department hi, an hmalakna a ropui khawp mai a. Hei, Aizawl khawpui bialtu ka nihna angin Aizawl Civil Hospital hi kan ngai pawimawh em em a. ICU kha a tlem thin em em a, he House-ah pawh hian kan sorkar tirh khan ka sawi thin a. A hmaa ICU khum 5-6 vel lek awm thin kha tunah chuan 10-a ruahmanna an siam chho ta leh, tunah hian 10 dang ruahmanna thar a awm niin ka hria a, kan lawm em em a ni. A chhan chu - ICU awm ngai mi tam tak kan awm a, private hospital-ah te kan han indah a; sum leh pai a hautak si a, a luhai thlak em em thin a. Tin, ICU awm ngai kan nih tawh chuan mihring hi mamawhna a lo sang a, Mizoram mipuite'n Aizawl hi kan pan khawmna a ni a, natnaah pawh. Hei hi a lawmawm ka ti khawp mai.

Tin, heart problem kan nei nasa tawh a, cardiologist-ah super specialist kan han nei thar te hi a lawmawm ka ti khawp mai. Chu mai a ni lova, *kal* lamah chutiang bawkin super specialist kan han dah thar thei te hi a lawmawm ka ti a, lawmthu ka sawi bawk a.

Tin, Civil Hospital kawtah *trauma centre* sak a ni te hi a hlu hlein ka hria. Civil Hospital hi kan indaih tawh lo em em a, mipui kan thahnem tawh a, kan doctor te pawh hi an khawngaihthlak a. A chhan chu - pressure a na em em a, thil kan indaih lova, civil hospital hian min zo tawh lova. doctor te thil tihsual vawi hnih khat lek te hi a lar hma em em a, an tihthat erawh hi chu kan sawi mang lo a ni. Va thlir chiang ula, kan doctor te inpekna leh thawh nasat zia kan hmu ang. Chuvang chuan, thawmthatna tura hetiang ruahmanna a awm hi vawiinah hian lawmthu ka sawi duh bawk a ni.

Tichuan, Pu Dy. Speaker, kan Minister zahawm tak pathumte demand hi a tha ka ti a, ka rawn thlawp a; 'pass ngei ni se' tiin ka rawn thlawp e. Ka lawm e.

DEPUTY SPEAKER : Member zahawm tak Pu Lawmawma Tohhawng ka sawm e.

PU LAWMAWMA TOCHHAWNG: Pu Dy. Speaker, bung nghal chawt i la, Demand No. 36 - Environment, Forests & Climate Change Deptt-ah hian.

Anni enkawlna hnuaia awm ramhmul damdawi - anchiri te, kaihtluang te, sumbul, hlonuar te hi ngaihven thara humhalh a tul hle mai a. Hei hi chak zawka kan enkawla kan humhalh loh chuan a rem mai dawn a; kan ram thil hlute zing a mi anni si a.

Tin, thing leh mau humhalhna kawnga department te hmalakna hrang hrangte a fakawm a. Sum leh pai, tha leh zung leh hun hlutak an senso te nena chhutin chhenfakawm leh zuala thiltih dan erawh chu ruahman thiam a tul viauin a lang. Thingphun tam tawh dan leh a nung zel ta te, phun tur thing leh a hmun te pawh hi, kanin senso leh kan hlawhtlinna teh hian tihdanglam hret hret a hunin ka hria. *Duh* leh *tum* inang reng siin heng department dang - PHE, Soil, PWD leh LAD te nen hian hmalakna tur inngaichang tawna ke pen a tul viauin a lang tan a, harsatna insiam sak tawn lo zawnga hnathawh thiam pawh a ngai khawp mai. Inkaihhruaina *Dan leh Hrai* kan neihte inzah sak erawh chu a pawimawh hlein ka hria. Anni hi thilsiam dang thing leh mau, lui tui leh nungcha dangte nena ram leilung boruak thianghlim kan neih zel theihna tur atan leh kan khawsak ho zel theihna tur atana pawimawh tak an ni.

Demand No. 42 - Transport-ah hian Zoram chhung leh pawn thlenga zin mi leh mipuite chet velna ti-awlsama man tlawm zawka zin theihna, mipui chhawk zangkhaitu a ni. Sorkar sumbawma revenue chhungluttu department pakhat a ni a, a pawimawh khawp mai. Kumin financial year kal mekah pawh hian November thla thleng khan revenue cheng nuai 2,738.15 a chhunglut tawh a, sorkar kumthar a lo nih meuh chuan, cheng nuai 4000 chuang zet hmuh beisei a ni. Sorkar tan department hlu tak a ni awm e.

Rampum tana a hmalaknaah sawi tur, hriattur tam tak a awm a. Two-wheeler taxi permit pechhuakin mi sang chuang tan eizawna siamsak an ni a. Motor vehicle tax kan ngaihthlak tak ang khan zangkhai zawka pek theihna siam a ni bawk a. Tin, boruak thianghlim kan neih theihna tur leh kan lo hriselna zawkna tur atan pollution control buatsaih a ni te hi thil lawmawm tak a ni.

Keini Lunglei lam tana bus lian chi service nitina pahnih kan han nei te hi vanneihna a ni a. Inland Water Transport atana Khawthlang-tuipui km 23 thlan a ni hi chhimlam mipui tan a tangkai takzet dawn a, rampum tan pawh chhenfakawm tak a nih kan beisei tlat a ni. Indo-Bangla border trade hmahruaitu a ni berin kan hria. Chhimtuipui - Inland-water Transport km 138.26, Myanmar nena kan insumdawn tawna tur ruahman a ni te hi a nghahhlelh awm takzet tawh a ni.

Khawpui thangzelah Lunglei-a kan DTO office saw a te lam deuh a ni ta a, min dawl zo lo tan a. Kan Minister zahawm tak hian khawngaih taka min lo hriatsak theih chuan a lawmawm ngawt ang.

Law & Judicial hi ‘*lungthu-pathum* ram kaihruaitute zingah an ni e’ an ti thin a. *Legislature, Executive* leh *Judiciary* te hi an pawimawh tawp a, mihring pung zelah an pawimawh telh telh dawn tih pawh a lang reng mai a. Sawi tur dang tam tak karah an hnathawhna, *dan leh hrai* lekkawhna kawnga mipui kan zalen zelna kawngah te pawh hian Lunglei-a Court building sak tura ruahmanna kal mek hi a rei ta viau mai a. ‘Harsatna kan nei em? Hmasawna kan nei em? Engnge kan thlen chin tawh?’ tih hi Lunglei mipui pawhin hriat kan chak khawp mai a. Khawngaih takin kan Minister in min lo hriattir theih chuan a lawmawm khawp ang.

Demand No. 33 - Land Resources, Soil & Water Conservation Deptt. pawh hi Bible thu anga ram leilung leh a chungga awm te enkawla, vawngghima, leilung tharchhuah tipung deuh deuh tur leh malsawm van ruahtui luangliam hum hum thin lo khuapa, tuihna kang zel veng tipungtu *department* a ni. Chutiang tak chuan ‘Pathian leh mipui rawngbawlna a ni’ tih hriaa an beih fat fatna hi a fakawmin ka hria a. Chhuan lo awm leh zel tura tan Pathianin luah atana ram min pek hi luah tlak ni zel tura cheibawltu leh vawngghimtu a ni. Department hmalakna avangin Lunglei lamin heng - gabion wall, contour trench, farm ponds, dug-out ponds, changkham te leh rubber sawngbawlna khawl leh smoke-house eng emaw zat kan dawng hi kan lawm a, ‘kan lawm e’ tih ringawta tawp lova, awmze nei zawka lawmthu kan sawi zel pawh kan ringin kan beisei a ni. Lunglei tuitlan pialthleng lui lamah sawn hetiang hi uar zawka min kalpui theih chuan Lunglei khawpui tuichawmtu a kang zel tur te eng emaw chen chu kan veng theiin a rinawm a ni.

Hmunphiah SEDP trade hnuaia kalpui Lunglei khawthlang lamah sawn an seng mek a, hmuhnawm tham a ni. An hmunphiah sengkawm te a mualin an dah a, a khawlna tur *Chhek-In*, ‘warehouse’ kan tih ang chi hi an mamawh khawp mai a, kan Minister-in hei hi min hriat sak theih chuan a lawmawm ngawt ang.

Demand 39 - Power & Electricity Deptt-ah hian, kan khawsak sang zelin a ken tel *kawlphetha* hi hriat theihin mipuiin kan chhawr nasa ta a. ‘Leitu’ ni ngawt lova, ‘hralhtu’ nih tel a tul ta khawpin ka hria; mamawhna a sang zel si a. Minister zahawm tak leh department te thahnem ngaihna azarah Lunglei lam pawhin lawmthu sawina tur kan nei nual mai. 132 kV alternate-line kan sawi thin kha tihpuitlin a ni ta a, Kawmzawl-a transformer lian 2 hun belh a ni ta hian power supply-ah Lunglei min chawm thain, ‘in-en-chhawk’ tih te pawh kan nei ta mang lova. Tin, Khawivah panna kawng siam mek saw nasa taka lawmthu sawina tur a ni. Nikum budget session, March Ni 3 zana kan CM leh Dy. CM zahawm takina assurance min pekte zinga mi kha an ni nghe nghe a, min tiam thlawn lo tawp mai.

A dang lelah chuan, Lungsen lamah pawh PGCI-in 132 kV sub-station hna an thawk mek a, Lunglei western belt tan chuan a tangkai khawp a ni. Thawktute mawlh saw an fakawm ka ti thin, zan thim leh vawt, ruah sur hnuaiah pawh complain a awm phawt chuan nunna thap tak meuhin an thawkchhuak mai thin a; harsatna leh bahlahna a awmin, mobile phone hmangin information pein an dawng zung zung a, harsatna sutkian a ni vat vat thin a, a lawmawm thlawt a ni.

Lungsen - Chawngte 132 kV tower thlun hna tunhnai mai khan PGCI-in an thawk zo a. Fur a lo thlen hma hian hman phalna pek hman ni thei sela, kan Minister zahawm takin min lo hriat sak sela a lawmawm khawp ang. Tin, Mamawh lam - Power & Electricity-ah Lunglei khawpui chhung 11 kV line hnawh zualpui saw sawn emaw, siam rem theih dan awm se kan duh khawp mai a.

Pahnihna-ah chuan, thawktu lam indaihlohna nasa hi chu inthlahrunawm teh mahse, han tarlang ve hram hram ila. Lunglei khawpui thang zelah distribution transformer dah belh leh LT line thlun belh kan mamawh nasa hle mai. Khawpui chhung electric ban te saw a hmanlai ta deuh a, a hniam bawh a, ban lian leh sang zawk a tul ta hle a ni. Hmun thenkhatah chuan chenna in chunga electric wire kal te a awm a, a hlauhawm khawp mai a, tihsual palh a hlauhawm a, a bik takin mihring tan a hlauhawm a; Chandmari Veng-a SP office bul hnaia mi saw siamfel sak theih ni se kan duh khawp mai.

Pu Dy. Speaker, Demand No. 21 - Higher & Technical Education hi, department hmalaknaah hian Lunglei-a JB College leh Lunglei Govt. College ten lawmthu sawina tur kan nei nual a ni. SPF fund atanga Lunglei Govt. College auditorium sak zawh a ni ta te, regular teacher pek belh an ni ta te saw kan tangkaipuiin, a lawmawm kan ti. Chuti laiin Librarian mamawhna a sang khawp mai a, college-in bus an nei ta lova, an neih sa kha hluihlawn a lo ni ta a, min ngaihtuah sak thei ang em le?

JB College-a RUSA funding kaltlanga multipurpose hall sak leh classroom sak te saw an hmangtangkai khawp mai a, a lawmawm hle. Tunhnaiah zirtirtu eng emaw zat *regularized* an ni a, college mamawh hria a, teaching faculty hrang hrang min phuhruksak avangin lawmthu kan sawi a ni. JB College-ah hian non-teaching staff indaih lohna - library staff, Grade-IV leh driver posts te hi min hnawhkhah sak thei ang em aw?

Pu Dy. Speaker, a laklawh riau bawh a tlem min pek belh leh theih chuan. Kan chawl mai dawn tho si a, ka han zo hram ang e.

Khawpui daifema zirilaite'n bus an mamawh a ni, JB college sawn; hmun hrang hrang atangin an rawn pankhawm a ni si a. Tin, Govt. J. Buana college permanent site Melte ramah sawn project kalpui mek a ni a, chak zawka kalpui theih ni se a lawmawm

ngawt ang. (**Dy. Speaker:** a zawh theih hram kha chuan zawh kha kan duh deuh dan kha a ni tawh a. I laklawh viau em ni?)

Pu Dy. Speaker, kan chawl mai dawn si a (**Dy. Speaker:** Midang kan la leh thei turah ka han ngai a.) Anih chuan, Pu Dy. Speaker, khati zawng kha ni mai sela. Ka lawm e.

DEPUTY SPEAKER : Tunge sawi leh ang le, Sawi leh tur kan awm tawh lo a nih hmel riau mai a; dar 1 a la ri lo deuh hlek a, chawlh a ngai leh tawh tihna a ni a. Hun tlem a la awm hian han din a han sawi mai pawh hi a pawl lohna lai a awm a, hun tlemte chu a ei hek ve thei tho a ni.

Awle, Member zahawm tak Dr. F Lalnunmawia kha a phar niin ka hria a; ka sawm e.

DR. F. LALNUNMAWIA : Tawi tea sawi ka tum ang a, Pu Dy. Speaker. Nakin tlai lamah hun a inhnawh tawt dawn si a, chumi han khek nan chuan tawi fel deuhin minute 10 tling lo a sawi te pawh ka tum ang a, ka han sawihram ang e.

Pu Dy. Speaker, a hmasain kan Minister-te zingah kan Minister zahawm tak Pu TJ Lalnuntluanga chan Transport atang hian ka han sawi ang a.

He department hi sorkar revenue hmuhna pawimawh tak a ni a, sorkarin lirthei chhiah leh road-tax atangin sum tam tak a hmu a. Anniin nasa taka hma an lakna azarah sorkar pawhin tangkai takin sumte an hmuh phah a ni. Tax pek dan awlsam zawk *online application* an han tichhuak hi a lawmawmin ka hria a, two-wheeler taxi permit thahnem tak an pek chhuah avanga mi tam takin eizawna an nei hi a lawmawm ka ti hle bawka ni. Auto-rickshaw chungchanga ka sawi duh chu - ka bialah sawn traffic jam a tibuai miah lova, chhim-pei tlangdungah te hian a then chuan feh nan leh chawhmeh phurh nan te an hmang a ni. Hmanni pawh Hlimen-a ka va kalin chawhmeh Aizawl-a rawn supply-na turin an hmang a, an tangkai khawp mai a, min pek belh thei hlauh chuan kan lawm hle ang.

Environment, Forests & Climate Change-ah hian, he department kaihhruainain ramngaw leh nungcha humhalhna lamah nasa takin hma lak a ni a, mipuite pawh kan thangharh zel a ni. Chutih rual chuan, sa kah leh sava veh ching an la awm a, tunhnaiah pawh kan bial lamah air-gun tha chi, en-hlatna awma sava vehte YMA-te pawhin man an nei a ni. Helamah hian sorkar hian YMA-te thawhpuaia, nasa leh zuala hma lak a tul hlein ka hria a ni. Hlimen-ah hian 'Lalsavunga Park' kan nei a, Aizawl khawpui thalaite pan ngun ber pakhat a ni a. Hetah hian ram a kang thin a, amaherawhchu, tunhnaiah sorkar hmalakna avangin leh Chhim-pei YMA tangrualte hmalakna avang tein ram kang eng emaw chen a awm ta lova, a ngaw leh tan tawh a. Tunah hian ram a lo ro leh

tan a, chuvang chuan, ram a kan loh nana lo invenna turah hian hmalak a tul hlein ka hria a ni. Tin, Hlimen tlang, Lalsavunga park-ah hian rest house siam tur khan Minister zahawm tak hi kan ngen ve a, min tihhlawhtlin sak ngei ka beisei.

Tin, a piah lawk, Hranga Veng tlangah sawn tlang nuam em em a awm a. sawtah sawn waiting-shed emaw, rest house emaw min dah sak ve theih chuan kan lawm hle ang.

Kan Minister zahawm tak, Dr. R. Lalthangliana department chan - Higher & Technical Education-ah hian

DEPUTY SPEAKER : Ngawi rawh aw. Kan chawlh hun dar 1 a lo thleng ta a. Kan sawi chhonzawm tir dawn nge? (*House-in a remti a*) Awle, sawi chhonzawm rawh le.

DR. F. LALNUNMAWIA : Pu Dy. Speaker, college lamah hmasawna tam tak kan hmu a, RUSA Scheme hi college te pawhin hma nasa takin an sawnpui a ni. Tin, NAAC Accreditation – assessment ah pawh grade tha tak tak an hmu chho a, Grade A te, B+ te college eng emaw zahin an hmu a, kan lawmpui hle a ni. Tin, college zarlaite fee pawh college hmasawna tur atan dah a ni ta hi a lawmawm ka ti a. Cheng vaibelchhe 1.5 zet mai an fee atangin college hmasawna tura dah a ni hi lawmthu ka sawi a ni.

Chutih rual chuan, hemi Job-oriented Education leh training lam hi kan uar a tul hlein ka hria a. College atangin lekhathiam, hna neilo tam tak an chhuak a, heng ho tan hian Job-oriented training hi neih tul riauin ka hria a. A bik takin kan neih chhun - Govt. Polytechnic te, Women Polytechnic te hi changtlung leh zuala siama, mahni kut kea ding thei tura kan zirlai thalaite kan chher chhoh a pawimawh hlein ka hria a ni.

Commerce & Industry Deptt. hi han sawi nghal ta ila. Industry lama mi-tui college zir chhuak te, college zir chhuak kher lo te pawh anni ang, hengho chhawmdawl tura hmalak hi a tul hlein ka hre bawk a ni.

Tin, Health & Family Welfare-ah hian sorkar hmalakna nasa tak kan hmu a. Kan hriat angin health clinic 235 lai hawn thar a ni a, a lawmawm hlein ka hria. Chubakah chuan, health sub-centre building leh quarter sak a ni tawh a, sak chhoh mek zel a ni te hi a lawmawm hle.

Pu Dy. Speaker, sorkar hmalakna lian tham deuh zinga ka han tarlan duh chu - ka bial chhunga awm ‘ZMC’ hi a ni a, nasa takin kan sorkar chhung hian tihchangtlun a ni. Referral Hospital building hi vertical extension-a zauh niin, ward tam tak siam belh a ni a. Tin, cabin building, (VIP tan ni bawk) sak zawh a ni tawh bawk. Tunah hian khum 400 chuang awmin, ICU pawh thahnem tak a lo awm ta a ni. ZMC Academic

building nalh em em mai, India ram huap pawha zahpui awm lo kan sa zo tawh a, hawn hmabakin a awm a, Boys and Girls hostel sak a ni bawk.

Tin, Pu Dy. Speaker, thil lawmawm em em chu - tun hnaiah social media leh chanchintharah te kan hmuh angin ZMC-ah phir - conjoined twins chu hlawhtling taka zai phel an ni a, doctor-te hlawhtlinnaah lawmthu ka sawi a, a ropui tak zet a ni. Heng zawng zawng ni thei tura sorkarin ZMC a lo ti changtlung hi ka lawm a. Phai pan ngai tawh lovin natna tam tak helai hmun leh hmunah an tidam thei ta hi a lawmawm a, 'kan Health Minister leh kan CM zahawm tak te thahnemngaihna vang a ni' tih vawiinah hian ka sawi duh a ni.

Pu Dy. Speaker, hengah hian tu tute emawin sorkar hi 'sum hmang hnem' an ti thin a; hmasawn tur chuan sum hman hnem te pawh a ngai ve a ni tih ka sawi duh a. Kan hmasawna hi a lawmawm hlein ka hria a. I veilama thute pawh hian ZMC te saw minrawn hmuhpui ve se, an lawm ve ngawtin ka ring a, heng kan hlawhtlinnaah te hian. Tute emaw sawi anga social media-ah chauh inngat lovin a tak ngeia minrawn hmuhpui turin ka sawm a ni, Pu Dy. Speaker. Rawn hmu ve se chuan, 'sum hmang hnem' tih te pawh hi, sorkar hian a thlawnin a hmang lova, mipuite tan a hmang a, hlimhlawp leh tul lovah sum a hmang lo a ni. Chuvangin, heng hmasawna tak tak kan hmuh hian mipuite tan rah tha a chhuah a. Tunah phei chuan ZMC-ah hian mi tam tak an lo kal a, thingtlang mi phai panna nei lo te Zoram hmun hrang hrang atangin an lo kal a. Pu Dy. Speaker, kan Minister zahawm tak Er. Lalrinawma pawh hi a taima khawp mai a, Sunday tin deuh thaw hian ZMC-ah a lo kal a, a hre hneh viauin ka ring a, a fakawm ka ti a. Hetiangah hi chuan ani pawhin hmasawna tam tak hmuh tur leh sawi tur a neiin ka ring a ni.

Tin, P&E lamah hian hmasawna tam tak kan hmu chho mek a. A bik takin ka bialah sawn electric hrui hlui leh a dish hlui a tam em em tawh a. Thli a han tleh deuha, ruah a han sur deuh hian a chhe mai thin a, current a tawp mai thin a. Chung chu min tih thar sak turin kan Minister zahawm tak hi ka ngen duh a, ka bial khawdung eng emaw zat atan proposal leh kan mamawh thu te pawh kan thlen a ni. Chungte chu min tih hlawhtlin sak theih chuan kan lawm hle ang.

Kan Minister zahawm tak tak pathumte demandrawn siam hi lawmawm ka ti a, lawm takin karawn thlawp ve a ni e. Ka lawm e.

DEPUTY SPEAKER : Awle, tunah kan chawl ang a, chawhnu dar 2:00-ah Sitting kan chhonzawm leh dawn nia.

(Recess till 2:00 PM)

2:00 PM

DEPUTY SPEAKER : Member zahawm tak Pu Lalsawivunga ka sawm e.

PU C. LALSAWIVUNGA: Pu Dy. Speaker, ka lawm e. Hun a chep deuh avangin Demand No. 4 - Law & Judicial-ah hian lut nghal mai ila.

Kan ram kan kalphung han en hian corrouption case nuaibo tumna hi, ‘chhim leh hmar anga inpersan’ tiin a sawi theih a. Special Court, Prevention of Corruption Act, 1988 hnuaiia sorkar tana Ukil ding te hi ruling party ukil te an ni thin a. Tuna kan kalphungah hi chuan heng sorkar ukil te hian an mahni pute jail-a han khung kha chu an hreh khawpin a rinawm a. Hemi atana pawimawh deuh chu - Special Court - *Prevention of Corruption*-ah tal hi chuan Standing Council, a ngheta thawk tur hi kan mamawh a. Tuna ruling party te pawh hian chu chu an mamawh vek a, an hre vek thova.

SEDP Bu kan en chuan - directorate of prosecution, directorate of establish an tum thu kan hmu a. Amaherawhchu, hemi kawngah hian vawiin ni thlenga hmalakna a la awm lo hi a pawl hlein ka hria. Chuvang chuan, “Prosecution Directorate SEDP Bu a zia ang hian din tura hmalak dan kawng zawn dan a awm em?” tih hi tawitein ka sawi duh a.

Tin, Demand No. 42 Transport department bikah hian ka sawi duh chu - Inland Waterways-a hmalakna kha a lawmawm ka ti a. Khawvela bungraw thiar velna (transport system) man tlawm ber chu lawng hmanga bungrua thiar velna hi a ni a, hei hi a thlakhlehawm em em a ni. Chuvang chuan, kan ram economy siamthatna tur pawha kan sum hnar tur anih avangin, hemi kawngah hian tun aia chak zawka hmalak theih nisela a duhawm hle ang.

Tin, vehicle replacement chungchanga han tarlan kan duh chu - a bikin taxi te, two-wheeler taxi-a eizawngtute hi an khawngaihthlak a, an tlan danah hian; a kawng-chhawng kan siam hleithei bawkw silova. Taxi lamah hian a kawng-chhawng siam ta mai zawkah ngai ila. Nitina an eizawnnah hian an khawngaihthlak a, loan la te an ni hlawm a, an tan a harsa em em mai a. Chutih rual chuan vehicle replacement chungchangah “tuna *Dan* kan hman mek hi ennawna, tihdanglam sak te pawh a tha awm mang e” tih hi tawite-in ka tarlang duh bawkw a ni.

Tin, Demand No. 33 chungah hian, ka bial - Bethlehem Vengthlang te, Bethlehem Veng te, College Veng te, Republic Vengthlang te; tin, ka bial pawnlam - ITI, Salem, Mualpui leh Chite ralah te huan nghet neia eizawng chungkua eng emaw zat an awm a, an riahchilh thin a. Thlai an ching a, thei an ching a, vawkw leh arte an vulh bawkw a. Chuta harsatna an tawh lian ber chu *tui* anih avangin, heng mite tan hian tui

dahkhawlna tanky lian dah sak theih ni sela a lawmawm hlein ka ring a, chu chu kan Minister ka ngen a.

Tin, Demand No. 39-ah hian, Joint Electricity Commission, Manipur leh Mizoram hian Mizoram leh Manipur hi electric bill chungchangah JERC kaihhraina hnuaiah kan awm a. Bill tihsan pawh JERC thuneihna anih avangin, Mizoram sorkar pawh hian bill tihsan a nih dawn chuan JERC hnenah petition a thehlut thin a. Chutah chuan kan sorkar hian 2016 atang khan kum tin deuthaw mai electric bill tihsanna tur petition hi JERC-ah a thehlut thin a, kuminah pawh hian thehluh a ni. Nikumah khan ZPM ten chu chu duh lovin, an complain a, sorkar ina bill tihsan a rawtna ang khan tihsan a ni ta lova. Hei, kuminah pawh hian Consumers Union te'n objection an thehlut ve leh a, engangin nge a kal ang tih ngaihtuahna ah a lo lut a. Manipur chuan petition an thehlut ngai miah lova, 'keini hian engatinge petition hi kan thehluh bik fo mai' tih te hi ngaihtuahnaah a awm a. A chhan chu - kan ramah hian Pathian-in lui khuah tur potential tha min pe a, kawlphehtha-a kan intodelhna tur atana tha lutuk, lui khuah tur remchang tak tak Pathian-in min pe a ni. Tunah hian lui tereuh te te pawisa tam tak sengin kan khuap a, kawlphehtha tharchhuah kan beisei zat hi megawatt 34 bawr vel niin zawhna-chhannaah min hrilh a, mahse a tak takah chuan a ni miah lo. Tlawva, nikuma hawn te pawh kha tunah a hman theih tawh loh. Khitah pawh khian megawatt 5 peak hour-ah pechhuak thei tura ngaih a ni. Mahse, August thlaa hawn kha tunah a pechhuak thei tawh lo; chutiang chu kan dinhmun a ni a.

Kawlphehtha lama kan budget han en hian, kan intodelh theihna tura sum dah hmuh tur a awm lova, a beidawn thlak ka ti a, a pawl pawh ka ti. Kawlphehtha a awm loh chuan, Vety-ah a intodelh theih loh; industry leh factory lian pawh a din theih loh; Damdawi in pawh kawlphehtha tel lovin doctor te thiamna a chhawr tak tak theih loh; industry ah chu tho chu a ni. Chuvang chuan, kan thalai lekhathiamte leh lekhathiamlo lo pung chho zel ten eizawna, thawh tur leh tih tur an neih theihna turin, kawlphehtha hmanga leilung hausakna Pathian-in min pek kan haichhuaha, chung atanga thawh tur leh tih tur kan thalaite tana siam hi sorkar kan nih chuan kan mawhphurhna a ni a, a pawimawh em em a ni. Chuvang chuan, 'kan sorkar kal tawhte' ka han ti teh ang, state kan nih hnu kum 36 kan kal chhoh tawhnaah hian, chulam hawi zawnga ke penna hi hmuh tur vawiin ni thleng hian a la awm lova, a pawl hlein ka hria a. Lui kan khuap a nih rau rau chuan kawlphehtha lian tham, 'mw 50 chin chung lam tal siam chhuak thei hi i buaipui ang u' tih te ka rawt duh a ni.

Tichuan, Demand No. 40-ah hian, SEDP Bu-ah hian kut hnathawktute dinhmun siamthatna tur leh chawikanna tur chi hrang hrang - 'A rate hre sain thlai/thei kan chin tir ang' tih te, 'price support kan pe ang' tih te pawh a inziak a ni. Mahse vawiin niah he SEDP bu hi Pu Dy. Speaker, i ding lama thute khan an hre tawh lo a nih ka ring; an theihngilh tawh a ni ang; pakhatmah hemi bu atanga hmalakna hi sawi tur leh hmuh tur vawiin thleng hian a awm lo. Kut hnathawk tuten sawhthing, hmarcha, zikhlum leh

thil chi hrang hrang an ching a, a hralhna lamah harsatna tawkin vawiin niah chuan an mittui titlatu a ni. Kuminah sawhthing kg 1-ah ₹20/- in an han hralh thei a, an lawm hle mai. Chu chu kan dinhmun mek hi a ni. Chuvangin, SEDP Bu han keu hian a tha em em mai si a, mahse, kan bawhzui lo hi a pawh hlein ka hria. Mipuih tih tur kan intiam leh kan inzawrhna hi kan tih tur a ni a, tih hlawhtlin hi kan bat a ni. Chuvangin, SEDP bu ringawt atang pawh hian hlawhtlinna hmel hmuh tur awm lo hi a beidawn thlak ka ti a, pawh ka ti.

Health & Family Welfare Department-ah pawh hian sawi tur tam tak a awm a. Niminah zawhna ka zawt a, Kulikawn damdawi-in saw a building a bikin Psychiatrist building te hi a chhe lutuk, sak a ngai ka ti a ni. Pu Dy. Speaker, ka lawm e.

DEPUTY SPEAKER : Member zahawm tak Pu Zothantluanga ka sawm e.

PU ZOTHANTLUANGA : Pu Dy. Speaker, ka lawm e. Vawiinah kan Minister zahawm tak tak pathumte demand - department 11 te minute 10 chhunga han sawi chu a huphurh awm leh hle mai a. Chuvang chuan, kan duh lai lai kan chuk mai ang a -

A hmasa berah chuan, Demand No. 36 - Environment, Forest & Climate Change Deptt. hi a ni a. Ka bialah sahan a awm a, rannung chi hrang hrangte an dah a, a entu mipui pawh kan nei tha thin viau a. A bik takin mizote hian sakei hi 'kan lo ngai ropui hle a ni' tih a hriat a; sakei a awm hnuah zoo tlawhtu an pung nasa em em a, a bulah khuan kal hlei theih loh khawpin traffic-te a jam a. Kan Forest Minister-in a sawi ang khan, tunah khuan tiger-nu kan nei a, (a dang te chu kan sawi lo ang a) tiger-nupa dang dah leh tumna a awm a ni tih han hriat hian a tha leh zual hle dawnin ka hria. Chuvang chuan, kan forest department hma lakna tam tak zingah hei hi kan sawi duh a.

Tin, a dawt leh ah chuan Demand No. 42 - Transport Deptt-ah hian, kan hriat angin kan sorkar hma khan vehicle - life time tax kan pe a, kum 15 a tan; tam tak chuan kum 15 kan nei zo lova, khami a pumpui kum 15 atana chhiah pek kha a hautak em em a ni. Tin, mihausa chauhin motor an nei lova, sumdawng leh mi harsate pawhin loan hmangin transport vehicle-te an lei a, chutiang chuan chhiah pe chungin tuna kan sorkarin kan remchan dan ang - kum 5 te, kum 10 atan tea pek theihin a siam hi, 'he sorkar hi miretheite tan a va hlu em' tih kan sawi duh a.

Tin, khawpuia mi tam zawk ten vei vahna atan lirthei - taxi te, two-wheeler te, auto-rickshaw te kan hmang a, a *main-spine* a han kal hian 'traffic a ti jam; a tam tawh' kan ti a, kan thalai tam tak te hian chungte hmang chuan ei an zawng mek reng bawk a. Amaherawhchu, keini bial - Sakawrtuichhun-ah lo kal ula, hawna tur two-wheeler han zawng ula, kan hmu lovang. Chutiang chuan - Zonuam leh Chawlhmun-ah te stand pawh kan la nei lo a ni. Chuvang chuan, a tam tawh viau lai hian, kan thalaite eizawnaa an hman zel theihna turin 'permit pek belh a la tha lawm ni' tih te kan ngaihtuah a.

Tin, taxi pangngai permit hi, ka hriat sual loh chuan tuna kan sorkar hian pakhatmah Aizawl khawpui bik atan a la pe lo niin ka hria a, lawmawm ka ti a. Replacement te a lo tih theih bawk si avang hian, permit pe zel ila hei ai hian traffic hi a buai zual dawn a. Hemi kawnga party-workers te, thalaite'n an it ngawih ngawih kan pe lo thei hi ropui ka ti a.

Keini bial ang khawpui chhung a *main-spine* lut lo hian kan thalaite eizawna tur kan sorkar chak takin auto-rickshaw permit a pe te hi a lawmawm khawp mai a, kan la indaih lo viau zawk a. Taxi ai hian auto-rickshaw te, two-wheeler service te hi a tlawm zawk a, mahni chauha han kal duh te hian taxi hire ai chuan a lo tlawm zawk a, kan bial mipui rethei leh harsa te te lo neia eizawng tam tak tan chuan a hlu hlein ka hria a. A mamawh ang zela pekchhuah te hi han ti thei se la kan minister hian, a lawmawm hle ang a.

Tin, hnam party sorkar-ah chuan – “*ramin 'ri' a nei a, hnamin 'ri' a nei lo*” tih a ni a. Chuvang chuan, kan unaute state dang dangah an awm a, international boundary pawnah an awm a, khang kha chu kan khawih theih a ni lova. Amaherawhchu, inter-state ah chuan kan minister chak takin hma a la a, Tripura - Zampui tlangdung te nena kan inpawh leh zualna tura tan bus-service an lo awm ta te hi a lawmawm em emin ka hria a. Tin, Manipur - Imphal, Churachandpur lam panga kan unaute nena kan intlawh pawh theihna tur atan ‘bus-service tih tumin hmalak mek a ni’ tih te han hriat hian, minister la naupang tak, rilru leh taksa pawh la zang tak kaihhruainah hian hma kan sawnin ka hria a, lawmthu sawi tur kan bain ka hria.

Tin, Demand No. 33 - Land Resources, Soil & Water Conservation Deptt. hi tun sorkar bikah hian a pawimawh khawp mai a. Kan minister hian he department a chan tirh khan, ‘dying department’ a ti a ni; ‘department thi tur’ ti hian a sawi a, ka la hre reng a. Amaherawhchu, tuna kan sorkar hnuaiah chuan kuhva chingtute tanpuitu leh, an harsatnaa support-tu department-ah a tang a. Tin, rubber ching tam tak kan awm tawh a, chungte chuan he department hi kan hmang tangkai em em a. Rubber chingtute hian mipuite tan rubber man tlawm zawka a process-na tur khawl min han pe te, kuhva te pawh mirethei harsa zawk ten tlawm tea an lei theihna turin SEDP hnuaiah kuhva chi miretheite hnenah an han sem te hi a ropui ka ti a. Kan ramah hian thil chin tur tam tak kan nei a, a ram geographical dinhmun a inang lova, hmun hniamah chuan rubber a tha duh em em a, khawthlangah khuan thla khatah nuai 4 - 5 lalut tawh tam tak an awm a ni. Chutiang chuan, tunah rubber hnai la theih chiah si lo chhungkaw tam takin rubber china eizawn tumin hma an la a, kuhva te pawh a ni a, Hachhek tlangdungah khuan kuhva atangin nuai tam tak kan lalut mek a ni, Pu Deputy Speaker. Heng kan huan neitute hamthatna tura hma kan lakna hi a ropui ka ti a ni.

Demand No. 21 - Higher & Technical Education chungchangah hian kan minister chak takin contract basis-a Asst. Professor dah ngheh eng emaw zat a lo nei te hi

lawmawm ka ti a, college-in hma a sawn zel a. Aizawl West College pawh hmanna ka zawhna ang khan, khawpui chhung traffic ti jam tu anihna hmun atangin Luangmual - Handloom & Handicraft ramah college sawnna tur ram min pe a. Nichina zawhna-chhanna an grade 'B+' ti khan ka hria a, amaherawh chu NAAC assesment hnuhnung nimin emaw, nimpiniah emawa chhuakah khan B++ an ni tih kha ka han sawi duh a. Tichuan, kan college ten hma an sawn chho zel a, amaherawh chu college hmun sawn tur a nih avangin a building construction chungchangah te hma min lakpui turin ka ngen duh bawk a ni.

Tin, Demand No.24 - Health & Family Welfare chungchangah hian han sawi leh zawk kan duh chu, thil tam tak bakah hmasawna atana kan mamawh berte zinga mi chu he department hi a ni a. Tin, mihringte hmun hrang, khaw hrang hrangah awm mah ila, kan mamawh leh em em chu 'kan hriselna' hi a ni. Sum leh pai nei mah ila, kan hriselna a that chuan loh chuan awmzia a nei lova. (Pu Dy. Speaker, he point chiah hi kan complete ang e.) Ka bial chhung khaw 6-ah health sub-centre kan nei lo a ni. Tichuan, tunah hian health clinic hmun 6-ah kan sorkarin min pe thar a, kan lawm hle mai a. Hetiangah hian sorkarin min equipt vek hman lova. A hmun tur te kan thlang a, tichuan, MLA fund atang tein equipment te kan lo ti ve a ni tih te kha ka sawi duh a. Hmun hla tak taka tanga sub-centre kan pan thin, mahni veng theuha kan pan theih ta te hi kan lawm em em a, he department-ah hian lawmthu kan sawi a ni.

A tawp berah chuan, he kan Minister zahawm tak tak pathumte demand hi pass turin ka karawn support a ni e. Ka lawm e.

DEPUTY SPEAKER : Member zahawm tak Pu VL Zaithanzama.

PU V.L. ZAITHANZAMA: Pu Dy. Speaker ka lawm e.

Demand No. 39 – Power Supply Deptt. ah hian ka han lut nghal mai ang a. General Discussion-ah ka sawi nual tawh nanging han sawi leh hram ka duh a ni. Mipui ten hnianghnar taka power supply kan hmuh theih nan 'cheng vaibelchhe 400' tih kha kan hmu a, khami chungchang kha eng emaw chen karawn sawi tawh a, khalam kha chu ka sawi tawh lo ang a, 'engtin nge kan intodelh ve theih ang?' tih ngaihtuahna nei chungin kan sawi dawn a ni.

Tuna Mizoram-in kan enkawl power project tereuh te te hmang hi chuan kan intodelh dawn lovin a lang a ni. Mw 2, mw 5 tih veh eng emaw zat kan nei ve a, hmanni lawkah Thlawva mw 5, August Ni 11, 2022 a commission te kha lawmthu kanrawn sawi a. Khang te kha December thlaa power generate lo nghal ringawt leh, khatiang tereuh te tea sum tam tak sengin power tlemte kan pechhuak ve a, intodelh kan la hlat hle a ni. Nimin khan ka zawhna-chhanna arawn chhuak a, Mizoram Hydrel Power Station kan neih 15 zet mai arawn zia thla a, amaherawh heng 15 zingah hian ka han

en vang vang a, 9 vel bak hi awmze nei a ni tawh lova. Serlui 'A' phei hi chu ziah tel chi a ni tawh lova, engmah awmzia a nei tawh lo tih kan hretlang vek awm e. Lamsial te pawh hi awmzia a neih tawh loh dan tichiang tur chuan, hemi zinga tlema tha deuh 9 hi ka han thlangchhuak a, chung te chuan kum 2020 a power an pekchhuah loh dan leh a tlem dan atang hian kan dinhmun chiang takin a lang thei awm e. Power supply pechhuak tam bera kan sawi Serlui-B khu hmanna ka sawi tak ang khan, 2022 kum khan thla 5 chhung power a pechhuak lova, Kau-Tlabung-in thlakhat a pechhuak lova, Teirei-in thlahnih, Khawiva-in thlahnih a pechhuak lo bawk a, Maicham-in thlathum a pechhuak lova, Tuipui leh Tuirivang phei chu an 'nil' tluan zak a ni. Kan sawi ang khan Thlawva erawh chu thlakhat a pechhuak lova, a reilo teh hlawm em mai a, han lawman tur a vang hle. Kawlbem erawh hi chu Ni 15.12.2022 a commission kha a ni a, 2022 chhung chuan 'a la nung ve' tih ang vel a ni.

Chumi ka sawi duhna chu Pu Deputy Speaker, tuna kan dinhmun hi a chhe em em mai a. Nimin veka Dr. K. Pachhunga zawhna-chhanna ah khan - thlatina kan power kum kal ta atanga enin thlatin power tharchhuah dan tlangpui 'hetiang hi a ni' tih chhanna kan hmu bawk a. Khangah khan fur lai June thlaah pawh mw 7.5 kan pechhuak a, a that lai ber October thlaah mw 17, khang vel kha kan dinhmun a ni a. Tun hma deuh khan Mizoram khawpui hrang hrang - Aizawl leh District capital ten tui kan mamawh pump chhuak turin mw 15 vel kan mamawh niin ka hria a. Kan tui in tur min pump chhuahsak daih pawh power supply pawh kan neilo a ni. Chuvang chuan, hun kal leh zel turah chuan hetiang chhe te te, awmze nei manglo pawisa tam tak senga hma la tawh lo hian, awmze nei tham 'Koladyne Phase-II' kan tih te leh eng emaw hi kan hotuten hmalak nan hmang tawh se tih hi ka rilruah a awm a, ka han sawi a ni.

Kum 2022-a record nei tha ber chu Tlungvel Solar Project - mw 2 hi a ni a, kumtluan khan vawikhat mah 'nil' a nei lova, a tlema tlemin power chu a pechhuak tluan parh a ni. Chuvang chuan, cheng tam tak senga mini-hydel project kan siam thin ai hian, 'solar lama hmalak hi a tha zawk mah em aw' tih ka lo ngaihtuah a. Tin, Solar Park - Vankal kha March, 2021 a zawh tur vawiin thlengin zawh a la ni lova, 'engtikah nge zawh a nih dawn?' tih kha ka han zawt pah a ni e.

Demand No. 24 - Health & Family Welfare-ah hian healthcare scheme chungchang kha an rawn sawi deuh zel a, tawitein han tihrik ve ka duh a. Tun hma kha chuan healthcare scheme-ah in register-na tlingkawm leh corpus fund pung nen kalpui a ni thin a. Kan tlintawk ang turin natna thlan bikte tan he healthcare scheme hi tha taka kalpui a ni. Pu Dy. Speaker, I ding lama mite khan healthcare scheme tha-mi an rawn zuar ta a, natna thlan bikte chauhin an chhawr theih scheme kha, natna tam zawk a vai deuhthawin he 'scheme tha-mi' hi an rawn hmang thei ta a ni.

Kan Chief Minister zahawm takin damlo apiang hman tur ₹2,00,000/- SEDP a dah thu te kan ngaithla a, kut kan beng a ni. Mahse, hun a lo kal a, he scheme thar hi a

tha lutuk a, kan enkawl zo ta lo a ni. Kan tlin ta lo a ni. Thil tha lutuk kan tlinloh kan zuar a ni. Nuai ₹3,00,000/- sem ang mai khan engmah pek tur kan nei ta lova, vaibelchhe 65 zet ba chungin vawiinah hian kan awm ta a ni. Damlo thenkhat phei chu sorkar leibat an dawn hmaa thi hmante pawh an awm hial a ni. Ka han sawi uar duh lai chu - mipui an mangang em em a, khawtlang hruaitute an mangang a, keini thlengin minrawn zentu an tam ta hle a, mipuite damlo mangang tan sum thawhkhawmin khaw tam takah chuan mi harsate an dawmkang a ni. Vawiinah hian hetiang khawbil tana healthcare scheme siam te pawh hi kan mangan takah chuan an lo piang ta zel a, Leng te, Lungdai te, Tualbung te, Khanpui te chuan an mahni khaw bilin sorkar a an beidawn avangin healthcare scheme an kalpui ta a ni. Henghote hnen atang hian kan sorkar pawh hian zir tur a nei a, a tul phei chuan tanpuite pawh an ngai hlein ka hria a. Mahni phurh zawh loh zuar tawh lo turin kan inngen a ni e.

Demand No. 36 – Forest Dept hi, NHIDCL hian National Highway-06, Seling - Champhai kawng laihna atan hian environmental clearance an nei lova, an nei lo mai ni lovin an dil lo hrim hrim tih ka han sawi duh a. A pahnihna-ah chuan hmana ka sawi tawh Chalfilh reserve forest chhunga tourist lodge leh construction dangte chu thiat vek tur leh, a thiahna hnawkte chu senghawi vek turin Ni 19.1.2022 khan order khauh tak mai *National Green Tribunal* chuan arawn siam a. Mizoram sorkar chuan Supreme Court-ah a appeal mek thu kan hria a ni. Ka sawi tum tak chu, Pu Dy. Speaker, kan ramah reserve forest tichhe zawnga sorkar hmalakna central atangin National Green Tribunal ten minrawn hau a ni. Kan ramah Mizoram pawn lam Company NHIDCL ten kan forest tam tak tichhiain environmental clearance pawh nei lovin hma anrawn la a, “kan ngawi reng dawn em ni?” tih ka in zawt a ni. Keini aiin central lam te khuan kan ram hi anrawn hmangaih ta zawk em ni aw tih ka ngaihtuah a ni, Pu Deputy Speaker. Chalfilh tlang te khi a lo pawimawh hle mai a, khi ngawpui atang khian, khi lai a behbawm khuate ka han zawt kual a, khaw 15 zet chu Chalfilh tlang ngawpui khian tui in tur a pe mek a ni.

Pakhat chiah, Pu Dy. Speaker, minute khat a tling lo ang. Demand No. 23 - Art & Culture hi, Zokhua - Cultural Centre, Falkawn-a awm saw enkawl uluk loh, inthiarna toilet mumal pawh awm lo; hnamdang terawn kalin anrawn en ve a, kan thalai lo awmte an zak thin a. Hei hi, ‘uluk deuh a enkawl a va tha em’ tih kha ka sawi theih tawk ni mai rawh se. Pu Dy. Speaker, ka lawm e

DEPUTY SPEAKER : Member zahawm tak Pu K. Laldawngliana kan sawm ang a, hun hmandik hram hram tum ta ila a tha ang e.

PU K. LALDAWNGLIANA: Pu Dy. Speaker, ka lawm e.

Kan Minister zahawm tak tak pathumte – Pu TJ Lalnunluanga Demand No. 36 - Environment, Forest & Climate Change, Eden huan ang maia ransa leh rannung, thing

leh mau, mihring zawng zawng enkawltu, sik leh sa buaipuitu Mizoram chhungah harsatna tam tak kan neih ang chite pawh Central YMA te nen tangkawp a, boruak tha kan neihna tur te, nungcha humhalh te, tui lam humhalh tea a thawktute an hnathawhna a ropui ka ti a. Chumi hmalakna zel turah *Nagar Van* scheme liamtham tak, Khawpui lian - Aizawl leh Champhai tea pilot project liantham tak tih tur awm mek te hi a ropuiin, a tha ka ti hle a ni.

Demand No. 42 - Mihringte kein kan kal vek theihloh chin a awm a, a bak hma latu Transport Department hi a ropui ka ti a. Kan sawi ang khan hnam inpumkhatna turah Tripura bus service te, tunah Manipur bus service tura hma lak mek te hi a ropui ka ti hle a ni. Mizoram State Transport hi 'an loss nasa' tih mipuiin kan sawi fo thin hi, sorkar anih avangin leh bus-fare concession a tam em avangin hlawka kal theih a ni lo tih hi kan sawi lang ve duh hrim hrim a. Chuti chung chung chuan sum hlauh tam lutuk lo tur hian department-in engti zawngin nge hma an lak tih hi ka sawi lang tel duh bawk a ni.

Hei ka bial Hortoki-ah vanneihthlak takin eizawna Auto-rickshaw service te min siam sak a, an chungah lawmthu ka sawi a. Kan hriat angin rampuma thalai rual tan two-wheeler taxi hmang te leh zokhaw lamah auto-rickshaw hmang tea eizawna tha tak mai an siamna hi a tha ka ti a, a ropui ka ti hle a ni.

Pu R. Lalzirliana, Minister zahawm tak Demand No. 23 - Art & Culture Department kaltlanga Zonun-zemawi leh Mizo nihphung leh intihlimna kut - Chapchar Kut, Pawl Kut leh Mim Kut te, Central YMA leh NGO hrang hrangte nena tangkawpin hun kan han hmang thin a. Hemi puala budget an han dah te pawh hi a lawmawm hlein ka hria a. Kar leh maiah Chapchar Kut hlimawm tak kan hmang dawn a, Zoram mipui zawng zawng advance in Chapchar Kut chibai ka buk nghal bawk che u a ni.

Demand No. 33 - Land Resources, Soil & Water Conservation Deptt hi kum kal ta 2022 - 2023 chhung khan RKVY leh NABARD kaltlangin rubber chingtute tan rubber smoke-house unit 50 lai mai Mizoram hmun hrang hrangah siam a ni te kha a ropui ka ti a. Kan bial chhung - Mualkhang leh Hortoki-ah te pawh malsawmna kan lo dawng ve a, a lawmawm kan ti hle a ni.

Demand No. 39 - Power & Electricity Department hi kan sawi tam tawkhawp mai a, kan intodelh lo tih chu kan hria a ni. Amaherawhchu, chuti chung chung chuan current kan nei tha te hi a lawmawm ka ti a. Kan sawi ang khan project mw 5 leh mw 4 han tihhlawhtlin te, project lian 8 kalpui mek a ni te hi a lawmawm ka ti a. Mipuiin electric bill sang taka kan pek lohna turin kan budget-ah subsidy atan cheng vaibelchhe 157.90 dah a ni te hi a lawmawm ka ti hle a ni. A changtu minister-in min hriatsak se la, Zuantui 132 kV - Lungdai sub-station survey vek tawh hi eng tikah nge hma minrawn lak sak ang? Tin, Bawktlang - Kawnpui, Kawnpui - Lungdai, hmanlaia tanga ban leh a hrui awm tawh hi engtin nge hma min laksak ang? Tin, hnathawktu an indaih lo

nasa khawp mai a, SEDP atang te hian, keipawh hi kum khat leh thla hnih he House zahawm takah hian ka thu ve chauh a ni a, kan hlawh atangin linesman indaih lohna avangin kan ruai reng mai a, 'hengte hi tihdan kawng a awm em?' tih te ka han sawi lang tel duh bawka a ni.

Kan Minister zahawm tak Dr. R. Lalthangliana Demand No. 21 - Higher & Technical Department hi kan hriat angin, tun hnai khan college Asst. Professor contract-a thawkte mi 64 lai mai dahngheh an ni hi a lawmawm ka ti hle a ni. Kan hriat angin, Tuirial bialah khuan khawtlangin mipui college an din ve a, mipuiin kan tawhkhawm a, village vouncil-in an thawhkhawm a, MLA fund atangin kan thawhkhawm bawka a. Kum 5-6 a kal ve ta a. Heng te hi 'min rawn hre ve reng u la, hma min rawn lakpui ve raw u' tiin kan rawn sawi lang ve bawka a ni.

Demand No. 24 - Health & Family Welfare Department chuungchang hi sawi tur a tam hle mai a. Malsawmna tam tak kan dawng a, keini bial chhungah pawh kan nghahhle em em mai Kawnpui PHC hi CHC-a hlankai a nih hun tur hi bial mipui te'n kan thlir thap mai a. Hei hi min lo chhinchhiah sak se la, a hma lamin min hlankai sak se kan han ti a ni. Chumi piah lamah chuan National Highway bul a nih angin motor accident a tam thin a. Kumthar chibai buk pahin ka zuk kal a, chutah chuan x-ray a chhiat avangin khawl dang kan mamawh em em a, hei pawh hi kan lo nghakhlel em em mai a ni. Department hotute bulah pawh kan sawi tam tawh a, a thei loh chuan MLA fund atang pawha kan tih mai loh chuan mipuiin harsatna kan tawka nasa hle a ni.

Tichuan, Health Department-ah hian malsawmna kan dawng nasa hle a. PHC Bukpui building tha tak min sak sak mup mup mai a, kei pawhin wawi 4 ka va en tawh a ni. An sa zo tep tawh a, department hotute chungah lawmthu kan sawi a ni. Tin, Health Sub-Centre hi Nisapui, Serkhan leh Zanlawn-ah te min sak sak bawka a, kan lawm hle a ni. Tin, thingtlang khua health clinic kan neih miah lohna hmun - North Chaltlang leh Khamrang bakah khawvel MLA zawng zawngin an la hmuh lohna hmun Dilzau-ah te pawh min dahsak a, Rajdali-ah te pawh; an chungah lawmthu kan sawi bawka a ni. Mualvum - sipai awmkhawmna hmun khu a pawimawh khawp mai a. Ramri buai chungchangah pawh khu laia mite khu kan koh ber an ni a. Chuta kan doctor chu lakchhuah a ni a, doctor hi kan mamawh khawp mai a. A remchang hmasa berah, ngaih pawimawh hmasak berah min lo nehsak turin kan sawi lang duh bawka a ni.

Demand No. 40 - Commerce & Industry-ah hian, hei Vice-Chairman ka ni ve a, theih ang tawkin, quarterly tein Committee te ka han neihpui ve a, kei pawhin. Kan hriat angin Mizoram-ah sorkar hnathawk 10% bak hi lak tur a awm tawh lova, 90% vel hi chu thangthar lekhathiamte zawng zawngin sumdawmna, Commerce & Industry kaltlanga hma la tur an nih avangin ngaih pawimawh a ni a. Amaherawhchu, tun ai hian kan sorkar kal leh zel tur te pawhin kan ngaihpawimawh thar a pawimawh hle a ni. Handloom project atan hian mi 438 lai Mizoram tan hma kan la tawh a, *family oriented-*

ah pawh hian mi 13,266 tunah hian SEDP kaltlangin pek mek a ni bawk a ni. Chutiang chuan theih ang tawkin hmalakna a kal mek a ni. Ram hmasawna kal zelna tur chuan capitalist, sumdawng lian awmna hmun a nih ve theihna turin leh, kan ram hi Commerce & Industry kaltlanga hma kan sawn theihna atan lehkha thiam zawng zawngte rawn inngahna tur a nih avangin, helamah hian hma laa, thang zel turin sorkar ni mek leh sorkar kal zel tur pawhin kan ngaih pawimawh a tul hle mai.

Tichuan, heng kan Minister zahawm tak tak pathumte demand hi ka rawn support a, pass ngei turin ka rawn dilpui a ni e. Pu Dy. Speaker, ka lawm e.

DEPUTY SPEAKER : Member zahawm tak Pu Lalrindika Ralte kan sawm e.

PU LALRINDIKA RALTE: Pu Dy. Speaker, ka lawm e.

Ka sawi hmasak ber duh chu, Demand No. 21 - Higher & Technical Education Department chungchangah hian a ni a. Kan bial Zawlnuam-ah khuan college a awm a, Political Science faculty hi kan nei limited deuh hlek a, min lo enchiansak se thain ka hria a, kan Minister hian. Tin, nimin *Unstarred Question*-ah kha URSA hnuai building sak khu 90% leh 70% zo tawh anga chhanna kha a awm tawh a, hei hi min enchiansak deuh se ka duh bawk a ni.

Tin, Demand No. 24 - Health Department-ah hian, building te a ngaih pawimawh awm rual rualin, a pawimawh ber chu - thawktu hi a ni. Tin, khawl a lo pawimawh bawk a. Chuvang chuan, thawktu doctor leh nurse-te hi kan lakbelh thei em? Thawktu hi kan ngaih pawimawh a tulin ka hria a ni.

Tin, Demand No. 23 - Art & Culture Department-ah hian ka lut ang a, ka sawi tawh thin a, a hma lam pawh khan. Hei, *Pu Buanga Dictionary* bawk kha ka sawi leh duh a, hei hi a thain ka hre si a. Tin, mizo-tawng zirnan a thain ka hria a. A bu hi tunlai deuh hlek, changkang deuh, a ziate pawh hraw deuh hlek hian siam ni se, hralh leh tur a nih avangin sorkar tan loss a awm dawn em ni? A copy tam vak lo pawh quality tha zawk hian siam thei se ka duh khawp mai.

Tin, Demand No. 33 - Land Resources, Soil & Water Conservation Deptt-ah hian, hei kan sawi a, ram leilung fate humhalh hi kan ngaipawimawh a, a dik a. Chutiang chiah chuan ram leilung, kan ram chhunga kan tharchhuah hi kan humhalh a ngai ta hlein ka hria a. Ka bialah pawh harsatna nasa tak kan tawk a. Kuhva kan tharchhuak a, amaherawhchu, kan rama kan tharchhuah ni lo hi kan rama tharchhuah hian a buan hneh lo a ni. Hei hi a pawu hlein ka hria a, a changtu Minister pawh hian hei hi a ngaih pawimawh ka ring a. Ram leilung tharchhuah hi kan ngaih pawimawha, a thlang

kan hauh pawh hi a ngaiin ka hria a. Heti zawng hian ngaihtuahna min sen sak se, chak thei ang bera hma min lak sak turin ka ngen duh bawka a ni.

Tin, Demand No. 36 - Environment, Forests & Climate Change Deptt-ah hian, hei kan hria a, sorkarin plantation-ah teak tam tak a nei a. 'Soil erosion' kha kan sawi a, teak kal ral pawh hi kan ngaihpawimawh a thain ka hria a ni. Teak luangral hi a tam em em a, hei hi sorkar sum bawma a luh theih dan kan ngaihtuah ran hi a thain ka hria a; heti zawng hian ngaihtuahna kan neih ngei a tul bawkin ka hria a ni.

Tin, Demand No. 42 - Transport-ah hian ka han sawi leh duh chu – A changtu minister hi, sum hi in thawhchhuah tam tehreng nen hian, a vur letna hi a pe chau angreng khawp mai a. Engpawh ni se la, thahnemngai tak chuan thawkzui zel turin ka han ngen duh bawka che u a.

Tin, ka ngaihpawimawh pakhat chu - motor hi kan uar a, motor khalhtu kan tam a, amaherawhchu harsatna tam tak kan tawhna hi kan kawng a chep bawka si a, kan inpel tur vel duh anga kawng zau bawka si lo velah hian patling pawh hi kan inhnial nasa a ni. Helaia hi motor khalhtu te hian kan hriat tura ka duh chu - kan kawng te a zim bawka si a, kan dinhmun hetiang a nih avangin 'tlemin polite deuh hlek teh ang u, motor khalhtu te hi' tih hi ka sawi duh a. Tin, motor inpelh that theihloh avanga patling han intin vel hi kei a ho angreng hian ka hre khawp a. Chuvang chuan, heng te hi ching lo i la a thain ka hria a. Kan kawng a zim bawka si a, inhrethiam tlang takin. Tin, hlam 2-1 han back te hi tlawm riauah kan inngai nge, heng te pawh hi kan inenchian a thain ka hria a. *Chapo* hi a hman tlak vak loh khawp mai; hman hi tum lo ila a thain kha hria. Chu chu motor khalhtute ka han ngen a ni. Tin, a department pawh hian heti zawng hian tan la se, zirtirna hi kan uar lehzuah a pawimawhin ka hria a ni.

Tin, a tawp berah chuan ka ngaihpawimawh em em, Demand No. 4 - Law & Judicial Deptt. hi, Peace Accord-ah khan High Court hi a hranpaa neih te kha a awm a, kha kha kan sorkar hian a bawhzui em ka hre lova, tin, a la bawhzui theih zel turah ka ngai a, 'heti zawng hian sorkar hian hma a la em?' tih ka zawt duh bawka a. Tin, '*Dan* hi tute emaw tan a ni lova, kan zavaia tan a ni' tih hi kan hriat nawn a thain ka hria a. Tin, *Dan* hnuaiia nunho pawh hi kan zir tlan a pawimawh hlein ka hria a ni. Ka han sawi duhna chhan chu - vawiinah hian dan hi palzutin a awm nasa lutuk, kan ramah hian. Thuneitu milian zawk ten, thil ti thei zawk ten *Dan* kan palzut nasa lutuk hi a dik lovin, a ngaihmawhawmin ka hria a. Tin, thil diklo tih hi vawiinah chuan a inthlahrunawmlah riau hian a hriat tawh. Thil diklo tam tak tihin a awm a, kan hria a. Kuhva tawlh chungchangah te pawh hian thil tam tak a awm. Amaherawhchu dan bawhchhiaa kan ngaih te hi an huangtau em em a ni. Chuvang chuan cowboy hunlai anga, 'a phawi rang rang' tih kha tun lai khawvelah chuan a ni lo. Dan fel tak a awm a, '*Dan* hnuaiiah kan zavai hian kan awm a ni' tih hi kan hriat nawn a thain ka hria a. A bik takin thuneitu sangte hian hei hi kan hriatchian lehzuah a thain ka hria a ni. Dan bawhchhia mi-tenau

deuh chu kan man mai, kan hrem mai. Amawherawhchu, ka ngaihpaawimawha chu - chung ni lo, milian pui pui, an thuneihna leh an thil tihtheihna hmanga dan an bawhchhiatna hi ka ngaihpaawimawh chu a ni. Hei hi kan titawp tur a ni a. Mahni thil tihtheihna leh mahni thuneihna *Dan* bawhchhiatnaa hman hi a fel lovin ka hria a. Hetiang mite hi ‘chhungril nun tlabal, ngaihtuahawm tak an ni’ tih hi ka sawi duh bawk a ni. Ka lawm e.

DEPUTY SPEAKER : Member zahawm tak Dr. K. Pachhunga ka sawm e.

DR. K. PACHHUNGA : Pu Dy. Speaker, ka lawm e.

Minister zahawm tak tak pathumte - kan senior minister Pu Thangtea, Pu R. Lalzirliana leh Pu TJ Lalnuntluanga demand te kan sawi a. Pu Dy. Speaker, kuhva tawlh te kan sawi a. Term hmasa kha ‘Golden period of kuhva tawlh a ni’ tih kha ka han sawi ve leh hrim hrim duh a ni. Congress period kha, ‘golden period of kuhva tawlh’ a ni.

Pu Dy. Speaker, vawiinah hian medical a thawkte he House atangin ka salute duh a. Mihring nunna enkawltu te an ni a, chhun leh zan pwh sawi lovin kan thawktute an hah em em a. Bial kan nei theuh a, kan tibuai a, zan dar 2-4 ah te pawh kan bia a, chutiang chuan kan nunna enkawltu medical-a thawk zawng zawngte ‘ka salute e’ tih ka sawi duh a.

Chutiang bawkin Electric Deptt - eng min petu te an hah em em a, *24 hrs. service* an ni a, anni pawh ka salute a. Midang pawh an pawimawh lo a ni chuang lo ve; lo thik lo se la.

Hei, medical hi tun term-ah hian bung thar a kaiin ka hria a. Kan hriat angin kan hmelhriat ngai miah loh pandemic-in min rawn bawh a. Kan medical facility hi eng hospital-ah pawh hian a chhe tlang a, a bikin government-ah. Tichuan kan hotute’n tehiltawpa tan khawhin khawl kan neih ngai loh, sap rama an neih ang te kan nei ve a. Hmanrua kan lamna leh laknaah duh angin thil a kal fuh thei lova, chu chu tu ten emaw remchangah lain sorkar min vaw vak vak a. Mahsela, kan *overall achievement* hi chu a chik mite leh thil hriate tan chuan an fakawm a, ‘theiltawp an chhuah a ni’ tih pawh kan hria a.

Tin, ‘covid-ah sorkarin cheng khat mah a seng lo’ tih zirtirna te pawh a awm a. Mahse, kan neih bak bak kan seng a, MLA fund te pawh kan pe nasa a, VLTF leh thil hrang hrangah. ‘MLA fund hi sorkar sum tho a ni’ tih kan sawi ve leh duh hrim hrim a.

A bikin ka bialah han lut ta ila. Kan neih ngai loh PHC te, clinic building te kan sa mek a, a thente pheih chu kan hawng tan dawn a. Chutiangin SEDP leh State sorkar

sum atangin sub-centre, health-worker leh helper te kan neih tena thingtlang rethei te te medical facility an pe thei hi, ‘sorkar tha a ni’ tih hi kan sawi nawn leh duh a.

Tin, cancer vei kan tam em em a, kan hria a, ‘cancer hi chumi vang a ni ang’ tih te a awm a ni. Nimahsela, genetic inthlahchhawn anih a rinawm deuh zawkin ka hria a. Phaiah kan kal a, sorkar pawhin medical reimbursement-ah nasa takin sum a seng a, nunna pawh kan chan a. Chu chu hriaiin kan sorkarin thapui a thawh a, JICA nen tunah cheng vaibelchhe 700 ngawtin Zemabawk-ah a in kan sa mup mup te hi a ropui a, mipui tan a ni a. Tin, infrastructure, (a ruhrel lian) heng - building lian emaw, power generation emaw, hydel project emaw, border trade emaw te hi a hun a duh rei a, naktuka hlawhtling zung zung hi thil a tha lem lova; hengte pawh hi kan hriatthiam a ngai a. Tutu emaw ten social media-ah an han ti vak vak a, an hmanhmawh lutuk thin hi kan insawiselna pawh niin ka hria a ni.

Medical-ah sawi tur tam tak a awm a, Lunglei-ah te pawh kan neih ngai miah loh kan nei dawn a, Inrinni khan kan Minister zahawmtakin a hawng dawn niin ka hria a. Tin, hmasawna chitinreng mai, oxygen plan te hi kan dam chuan kan mamawh miah lova; han damloh tak tak chuan oxygen plan te hi district hospital-ah kan nei ngai lova, vawiin niah chuan kan nei vek a ni. Hengte hi achievement ropui lutuk a ni. Mahse, kan dam chuan kan ngaihsak lova; ‘Mi-bawrhsawm ten doctor an ngai’ an tih ang deuh khan, lawmna chang mi thenkhat ten an hre lo hi a dik lova, medical-ah thil tam tak achievement a awm a, lawmawm ka ti a ni.

Tin, Higher & Technical Deptt. ah han lut leh ta ila. Kan hria a, zing lama kan ngaihthlak angin Mizoram college te improvement nasa tak a awm a, India-ah te pawh kan mark a tha a, kan che chhe lova, zirtirtu 64 ngawt mai kan han la thei te hi a ropui ka ti a. Chutiingin, Trade & Commerce-ah hian, Myanmar nena *Act East Policy* hmalakna te hi ruhrel lian a ni a, ni 2-3 leka zo thei a ni lova, hengte hi kan ram tan rohlu a ni a. Tin, ‘Tlabung - border trade’ kan tih Kawrpuichhuah te pawh rohlu a ni a, he sorkar hian bul a tan a, a ti mek zel bawk a ni.

Tin, Forest-ah, ka han sawi pawlh nawk nawk ang a. Kan hriat angin “Zoo” keipawh ka kal ngai lova mahse hmanni kan kal chu mak ka ti a, traffic jam khawpin kan lo ngaihlu a ni a. He sorkara Forest Deptt. hmalakna hi a hlawhtling takzetin ka hria a, ka lawmpui bawk a ni. Thingtlang bial te kan ni a, kan mipuite ei zawna hi ramngaw ah a inngat lo thei lova, Forest Deptt. hi hma an lak lutuk chuan kan chep angreng a, kan mipuite, mipui rilrem zawnga hma kan lak te hi a pawimawh ka ti a.

Tin, Transport Deptt-ah pawh hian sawi tur tam tak a awm a. Zofate inpumkhatna Manipur leh Tripura te nen pawh hma kan la a, a lawmawm a ni. Tin, ‘Inland Waterways’ kan tih leh ‘National Highway’ kan tih ang deuha central pawhin arawn

puan - Tlawng leh Khawthlang Tuipui, Tlabung kan nei te hi a lawmawm takzet a ni.

Tin, Pu Dy. Speaker, electric power chungchangah hian lawmthu sawi ka duh a. Ka bial thingtlang chengker tak tak sorkar kal ta ina eng an pek ve miah loh khaw 6 lai mai kan sorkarin eng min pe a, lawmthu ka sawi a ni. Hmunthar bik hi a la problem deuh a, Mautlang hi PMGSY kawng an laih avangin a ban hi sawn a ngai a, an eng hleithe i lova, hengte hi min chhinchhiah sak ula. Tin, thawktute kan indaih lo em em tih kan hria a, naichina member hmasa ten an sawi ang khan, thawktu - a ban lawn tur kan nei lo lutuk hi a buaithlak hle mai a, transformer a lo chhe lo thei lova. Nichin khan kan hotute'n an sawi a "A chhe lo thei lo em ni?" an ti a, khawl a ni a, a chhe thei a. transformer problem-a min ngaihsak zel te hi lawmawm ka ti a.

Tin, ka bial khawpui chhung bik - Lunglawn hi eng kan nei tha lo thin a, 'hei hi engnge a chhan ni ang aw?' kan ti a, a ngaihna tak kan hre lova. 'A line emaw, a transformer sizing emaw te hi a ngai ang em aw?' tih te hi kan ngaihtuah a, min lo chhinchhiah sak ula.

Tichuan, Pu Dy. Speaker, kan Minister pathumte demand hi pass ila, kan ram leh hnam tan hmasawna pawh a nih ngei ka beisei a, ka rawn support a ni e.

DEPUTY SPEAKER : Member zahawm tak Dr. Vanlalhlana ka sawm e.

DR. VANLALHLANA : Pu Dy. Speaker, kan Minister pathumte - Pu TJ Lalnuntluanga, Dr. R. Lalthangliana leh Pu R. Lalzirliana te demand kan han sawi ho a ni a, department zawng zawng ka lut thei dawn lova, ka han kal nghal zung zung ang a.

Hei, Pu TJ Lalnuntluanga, Minister zahawmtak demand thenkhatah hian han lut ila. India ramah 'forest cover area kan ngah ber' kan ti a, 38% chuang kan ram chhung zau zawng atanga teh chuan '84% bawr vel a ni e' kan ti a. Amaherawhchu, hei, kan CM zahawmtak 'leiba tarmit' ka han vuah a, kan lo nei tam reng reng lova, Odisha te khu kan lo pha lo nasa khawp mai a. Andhra Pradesh, India rama forest cover area nei chhe ber pawla kan lo ngaih pawh kha kan lo pha lova; kan minister-te hian kan CM zahawmtak tarmit hi lo vuahpui ve sela ka han ti ve a.

Tin, Dr. Thangtea, kan Minister zahawmtak te pawh khan 'HIV/AIDS vei kan tam e' a han ti thin a; a leiba tarmit kha lo vuahpui ve sela; kan lo tam reng reng lo a ni; 'keini aia tam State dangah vei an lova tam ve' tih kha kan han hmu chhuak ve a. Amaherawhchu, tehna tur dik lo a thil teh talh hi chuan thil tamtak rawn lang a awm nghal a, chu chu 'mipui te hian an hre si a ni' tih ka rawn sawi a ni.

Hei, kan Minister Pu TJ Lalnuntluanga chan hi Legislator-te Law & Judicial Deptt. a ni a, a pawimawh khawp mai a, ani pawhin theihtawp a chhuahin ka hria a. Tin,

Forest lampangah hian ‘Forest Deptt’ ti ila a chiang ber awm mang e. NHIDCL-in hma an laknaah hian kan ram leilung an suasa a, a dal thei bertu chu kan Minister hi a ni a, “hma nasa takin lo la leh teh se”, tih kha ka han ngen duh a ni. Mi feh kawng, mi dil, mi huan, kan luidung, kan nungchate, kan tu leh fa te hmalam hun thlengin tihchhiat ani tih hi ka han tarlang tel duh a. Kum 50 kan thlir chhoh tel a ngai a, chumi ngaihtuah chuan tuna NHIDCL ina ram/kawng an laihnaah hian hmasawna a awm tur chu a ni a, tlema zawng chu kan tuar ve ang. Amaherawhchu, “Awmze neiin hma la rawh se”, tih kha kan Minister zahawmtak ka han ngen tel duh a ni.

Tikhan a dang, Dr. R. Lalthangliana, Minister zahawmtak department chanah hian ka han lut ve leh duh a. Mizoram State Healthcare Scheme ah hian vaibelchhe 60 dahbelh a ni a, a lawmawm khawp mai a. Ngenna ka siam duh chu - tunah hian vaibelchhe 60 chuang ba kan nei a, “Corpus Fund-a dah lo hian tuna kan ba neihsa ho rulh nan hian hman mai a tha lo maw?” tiin ka han ngen duh a ni. Mipuite phaia kal tum leh a hmaa kan lo bill tawh sa te beiseiin an awm a, hospital lut leh turin an han inbuatsaih a, pawisa an nei tawh si lova; helamah kan lo intiam tingtang tawh si a, sum te kan inpe ve tingtang tawh si a, kan CM zahawmtak pawhin min rawh tawng thlamuan a ni. Chutiang anih avang chuan vaibelchhe 1000 loan lak tur kan nei tho bawk a, kha kha Corpus Fund-a lut turin ti ta ila, vaibelchhe 60 hian a za vai hian ala pha lo maithei a, mahse “ i hmang mai ang u”, tih rawtna ka han siam duh a. Subscriber-te te hi an thinrim lo zawk hi ka ti a; leiba he ti khawpa healthcare scheme ba kan pe hlei thei lo hi chu *Consumer Protection Act, 2019* ngaihtuah phei chuan ‘*deficiency in service*’ te pawh a ni leh lek lek mai lo maw tih rilru ah a awm a ni. Court thenkhatte inkhinna te kan han en ve a, insurance-ah ‘*default in payments*’ te a lo awm a, ‘chungte chu a ni tel em?’ tih te rilru ah a awm a ni. Kan dawng lo chu a ni lo. Amaherawhchu, *deferred payment*, pawisa dawn har lutuk te hi service tih khawtlaina; mipuite tana harsatna thlenna a ni tlat.

‘SEDP-Healthcare, scheme tha mi’ kan ti a, helaiah awm kan chum dum dum a, dawhkan kan beng ri a, chutah chuan a tawp ta kha paw ka ti hle mai. Fund flow statement - Cash flow statement tih a ngai a, ‘financials’, a saptawng tak pawhin; buaipui a ngai a ni. Program vaibelchhe 200 chuang kan kalpuina turah chuan ruahmanna felfai kan nei a ngai; ‘interest engzat nge lo lut dawn?’ tih te; ‘Chutah chuan mi engzat nge rawnin ziah belh ang a, engtin nge kan pekchhuah leh ang? tih te. A hma a an lo pekchhuah dan atangin, ‘trend’ an ti a, a kal chhoh dan tur te kan zir ve thin a, ‘chutiang chuan mumal takin hmalakna a awm lo em ni?’ tih kha rilruah a awm a. Harsa tak tak, mangang tak tak kan hnena rawn kal an tam ta khawp mai. Awm chum ringawt lo hian rilru te hi seng ve deuh ang u ka han ti a nih chu, Pu Deputy Speaker.

Tin, Higher & Technical Education-ah hian, hei, kan Minister leh zirtirtute hmalakna te pawh a ni a, kan Minister zahawm tak hi college zirtirtu thin a ni a, kan senior lo ni tawh thin a ni a. Tin, ani hnuaiiah Zirtiri Residential Science College-in

‘Grade-A’ a hmu a, Serchhip College-in Grade-A; chutiang chuan J. Thankima College-in A+ a hmu a. ‘Ka lawmpui khawp mai’ tih kha ka han sawi duh a.

‘Min lo ngaihven sak se’ ka han tih chu - Zirtiri College-in Ramthar Veng-a hmun a kalsan tak thenkhatah sawn ‘Common Facility Centre for Home Trades’ kan ti a, college zirlaite pawh an rawn tel theihna turin, niminah pawh ka sawi tawh - plumbing te, electric wiring te, steel fabrication te, aluminium fabrication te college kal paha an zir theihna din turin ngenna ka siam a. College lampangin department-ah an theh lut a, file a tang ta char char mai a, kan engto viau mai a. Hei hi a rawn chhuah chuan, zirlaite pawhin lehkha an zir pahin hman tlaka anmahni intodelh theihna turin hma lak kan tum a. Hei hi, ‘a file kha min enpui deuh se’ tiin ka han ngen duh a.

Tin, react leh tura ka ngen duh chu - Govt. Aizawl North Colege zirlaite leh zirtirtute nen kan CM zahawm tak kan hmu a, chuta a lo sawiah chuan, “DIET Principal quarters te pawh North College tan buaipui a ni; ngaihven mek a ni. Sawtah sawn in sang tak kan sa dawn a, a chhakah, DIET Campus-a Transit Building te pawh saw college hman theih turin hma lak a ni ang” tiin min lo tawng thlamuan a. Chu te pawh chu engtin nge hmalak zel a ni dawn?

Tin, North College saw Ramhlun Veng pangngain kan intawm tih theih ‘Ramhlun Market’ atan luah a ngai a. Saw mi te saw, zirlaite pawh an khawngaihthlak a. Chu bakah Commerce & Industries minister a nihnaah pawh, saw market chhawng thumah sawn, a hnuai ber chauh saw mipuiin market-ah kan hmang a, a kaw huau a. Sawi mawi lo pawh ni lo ta se la, thenkhat an lo inthiar a, zingkarah; tikhan hrehawm takin an lo thian thin a ni, saw laiah sawn. Tichuan, a chungah anthurium zawrh a ni a, a hmaa enkawl that loh vang te pawh a lo ni ang a. A chung leh college a lo ni a, kawng sirah, motor khu karah chawhmeh kan zuar leh si a. Hei hi chu ngaihven a ngai a ni.

Tin, college hian kumin budget receipt side-ah khan nuai 300 vel sum dawng ve thei tura beisei an ni a. Aizawl Civil Hospital-ah hian ‘RKS’ tih scheme hi a awm a, member kan ni ve a. Civil Hospital hian a sum dawn hi ama inenkawl nan a hmang leh a. Modular OT te kan nei a, Dialysis te kan han ti chho leh a; Pace-maker te pawh vuah theih a ni tawh a ni. Tangkai takin kan hmang a. College hian 50% vel emaw hi chu Library atan emaw, zirtirtu rawih belhna emaw ‘khatieng atan te khan hmang ve thei ta se la’ tih kha rawtna ka han thlen duh a ni.

Tin, ‘Aizawl pawn’ han ti i la, Aizawl sir lampangah college kan han sawn chhuak chum chum a, bus service-in kan um zui leh si lova. Hei hi kan Minister zahawm tak, Transport Minister demand sawi ni te pawh a ni bawk a, khatieng kan um zui tel kha a ngaiin ka hria a. Zirlai harsa tak tak te an ni ve a, chung hote tan chuan helaiyah scheme kan tih chuan, a dang nen kan um zui ngaiin ka hria a, chu chu ka han tarlang tel ve duh a.

Tin, Commerce & Industries Deptt budget-ah khan GIA-*Non-Salary* ah nuai 20 a awm a, *Other Charges* kha eng atan nge kan hman dawn chu a hriat loh naa, nuai 60 leh tih a lo awm a. Kha chauh kha hma lakna tur a ni a, a bak chu inenlkawlina tur vek. Entrepreneurs te, industry lama tuite, mahni kea ding duh te'n he budget hi an lo enin eng nge an hmuh? Kal ngaihna an hre lo a ni; lo hlin tur an nei lo. “Engtin nge kan kal ve ang? Budget atang hian engtin nge kan lo in buatsaih ve ang?” tiin mi chuan budget an lo thlir ve thin a ni. Keini chuan ti hian kan nei lova, kan minister leh kan officials te pawh hi an khawngaihthlak tak zetin ka hria a.

Power & Electricity Department-ah ka han lut ang a. Whatsapps Group an siam a, P&E hian; MLA te min telh a, khawtlang hruaitute min telh a; current awm loh ve leh a chhan an rawn sawi thin a, a ropui ka tiin lawmawm ka ti. Phone call te kan han dawng a, tha takin kan han chhang thei a; an hmalakna a tha ka ti takzet a, ‘department dang pawhin entawn se’ tiin ngenna ka siam ve duh a.

Inthlan kum te a ni a, power tariff rawtna lehkha thehluh hun te pawh nimin piah khan a tawp a. A punna kha a tlem angreng riau a, loneitute power tariff erawh khan chu tlem chuan a han pung ve deuh a. Khalamah chuan ka lut thui lo vang a. (Pu Dy. Speaker, minute khat pawh ka hman belh lo ang.)

Power budget-ah hian kan BE, RE leh *Actual* inthlau leh lutuk hi a manganthlak a. Kum kan hman lai mek 2022-23-ah hian BE-ah chuan, thla tin khan ‘vaibelchhe 14 chuang kha kan hlep ang’ tih a ni. Amaherawhchu, RE a rawn kal a, vaibelchhe 9 leh tih (vaibelchhe 10 dawn) kha kan hloh leh si a ni. Chuvang chuan, budget-ah hian kan tan a ngai a, kan inzir a ngai hle a ni. Ka lawm e.

DEPUTY SPEAKER : Member zahawm tak Er. H. Lalzirliana ka sawm e.

ER. H. LALZIRLIANA : Pu Dy. Speaker, vawiinah hian kan Minister zahawm tak tak - Pu TJ Lalnuntluanga, Pu R. Lalzirliana leh Dr. R. Lalthangliana te demand kan han sawiho a ni a, an zavai chungah hian lawmthu sawi tur a awmin ka hria a, a wholesale-in ka han sawi mai ang a.

Kan ram, kan bial leh district tan te pawh bungthar heng department-ah te hian min kaipui a ni. A mal mala sawi tur te pawh a awm awm e. Mahse, hun a tawi avangin chutah chuan ka han duhtawk mai ang a.

Environment, Forests & Climate Change Deptt. chana ka han sawi lawk duh chu - Dampa Sanctuary-a tiger tihbo kha hmuh leh tawh a ni a; ‘lo ti bo tawh suh u’ tih kha ka han chah duh che u a ni. Tunah Tiger Reserve-ah khuan tiger a awm leh tawh a, a nihna tur angin a function leh thei tawh turah ngai ila.

Hei, Transport hi, hman budget session hmasa bera ka sawi baw kha a ni a. Kan Transport Department te hi hna an thawk nasa hle a, a thawktute, a minister changtute pawh an zahawm a. Chutih mek lai chuan, ‘revenue earner’ ni thei hi ‘loss-making’-ah kan la siam tlat lai hi ‘engtin nge ni ang’ tih hi a sorkar ang te, a department ang te leh a mipuite pawhin ngaihtuahna sen ngaiin ka hria a. State dang tam tak chuan Transport Department hi Corporation-ah an thlak deuh vek tawh a. North East ah te pawh - Assam Transport Corporation te, Meghalaya te pawh a ni a. Tin, South India leh mainland-ah chuan ‘Transport Corporation’ angin an kalpui vek a ni. Chu chuan revenue kha ‘loss-making’ ni lovin, ‘revenue-earner’-ah a chan phah ta a. Chutah chuan, suggestion te pawh a ni ang a, department lam te pawhin min lo ngaihthlak that sak se langin, kan MST te district tinah hian a kal deuh vek a. Tin, inter-state ah te, tunah pheih chuan foreign - Burma lam te pawh kan hawi a nih kha. Chuvang chuan, he kan transport hi corporation-ah leh dan ngaihtuah i la. Chutah chuan hmun tinah, district tinah hmunhna mumal tak neiin office emaw, godown type emaw, station ang type emaw siam ni se; a thawktute’n a chhiat emaw pawha an han repair theihna tur ang chi ruahmanna te siam ila.

Tin, *fuel station* hi a pawimawh em em baw kha a ni. Tuna kan han neih hi chu ‘consumers petrol pump’ tih a ni a, hei hi chu mahni consumption tur a ni a. Tichuan, *retail outlet* petrol pump-ah chuan kha kha sumdawna chi khat a ni a. *PSU - State run* angah te leh corporate angah chuan oil industry atang hian advertisement through pawh nilovin *direct dealership* a hmuh theih a ni. Tichuan, district tinah ram lian tha taw k neiin, khatiang zawng zawng facilities awm theihna kha ni se; ‘khatiang zawng khan ngaihtuahna han hmang ta ila’ tih kha ka sawi duh a ni a.

Transport Department-ah hian bungthar kan kai a. Hei Inland Waterways-ah te ka bial chhung Khawthlang Tuipui - ‘Rajivnagar to Tuichang’ tih te pawh a awm a, henge te hi *Thumtea-thlira kan thlir* a ni. Tin, thil pakhat kan sawi duh chu - Transport lam tih tur nge, Home Deptt. lam tih tur ka hre chiah lova. Saturday-ah hian kan bazaar thin a kei chu; ka walk thin a, ka bazaar pawh ni chiah lovin. Kawngpui dungah hian chawhmeh-zuar kan thu deuh fur mai a, intihpalh a hlauhawm thei em em mai a ni. A bik takin heti lai Agri-office atanga Zodin lai hi, *two-ways* anih hian a hlauhawm tak tak a, bus te a lo kal a, a lehlam zawng atangin motor dang a lo kal baw kha a, a sir tawn tawnah bazaar ho an thu baw kha si a. Hei hi ka ngaimawh khawp mai a, ‘Saturday chauh hi chu helam Vaivakawn lam atanga lo kal hi *one-way* in kal nileng ve ta se la a tha lawm ni’ tih hi, a sawina hun leh hmun a ni em ka hre chiah lova, ngaihpawimawh zawng kan sawi ve tawp a nih chu. Accident leh intihpalh te a awm hmian fimkhur nan kan ti a ni.

Hei, power sawi rual hian Forest pawh sawi tel tho ka duh a. P&E Department-a kan mutan chu - 132 kV, Bairabi - West Phaileng via Mamit a ni. Hei hi Forest leh P&E Department a ni ber mai a. Ngunthluk takin min lo ngaihtuah sak ula, pa-hausa

deuh chu ni ila chuan, he kan forest clearance tur pawh hi, 'kha, hei hi' ka ti duh tawh maiin ka ring a. Chutiang khawp chuan mut-mawh, hnar-mawhah kan nei tawh a ni. Hei hi khawngaih takin department lam ten theihtawp min chhuahpuia, rang taka he kan mutan hi min solve-pui turin kan ngen che u a. Tuna 33 kV Phaileng atanga kan lak phei hi ngaw kar kal a ni a. Tin, hemi kan Assembly House kaltlang hian Mamit Division hnuai P&E Department hnuai hnathawk zawng zawngte chungah lawmthu kan sawi duh a. An thawkrim em em a, ruah a sur hlek chuan an buai nghal a, zankhaw tairek in chutiang chuan mipuite'n harsatna kan tawh loh theih dan ber turin hrehawm pawisa lovin hna an thawk a ni. Chuvang chuan, hemi 132 kV hi kan nghakhlel em em a ni. Tuna kan mutan 'forest clearance' kan tih ang chi te kan hriat vek kha, a sawi pawh kan sawi nasa, sawi tam pawh a ngai awm lo e; heng hi min ngaihtuahpui turin ka han duh che u a.

Tin, Hmunpui-line hi a hmian Rawpuichhip atangin kawng a kal a, helai kawng hi a awm mumal tawh lova, kawngpui thar Lengpui lam atanga kal hi an kawng ber a ni tawh zawk a. Hetah hian he line hi shift theih ni sela kan duh khawp mai a. Kan sawi thin a, hei hi department leh kan Minister zahawm takin min lo hriatsak sela ka duh a. Tin, tunah khuan 'Mamit - ring road' kan ti a, tlak lam leh chhuah lam kan bei a, khutah khuan mi tam tak an cheng tawh a, kawng te kan siamthat phei chuan an tam lehzual dawn a. Khungah khuan power supply a rang thei anga min pe turin kan han ngen che u a ni.

Tin, Land Resource, Soil Water Conservation Deptt hi, khu lam khu rubber leh kuhva tamna a ni a, tunah hian District Officer, Mamit a mi hian Aizawl-ah Dy. Director, Planning nen a chelh kawp a, a buai hle ang tih ka ring a. Hei hi dedicated DO min pek dan a awm em khulaiah khuan? District hnufual te pawh kan ni a, tih tur leh thawh turte a tam a ni. Chuvang chuan, min lo hriatpui turin ka duh a.

Tin, Health & Family Welfare Deptt-ah phei chuan Mizoram State ah leh a bik takin kan bialah pawh malsawmna tam tak kan dawng tih kha sawiloh theih a ni lova. Health-ah hian India ram hian 1% GDP hi kan spent a ni a; Thailand te hian an lo hmang hnem khawp mai a, 4% GDP an hmang a ni. Tin, India ramah hian guidelines leh min beiseinaah 6.3% of budget (ka hriatsual loh chuan) health-sector a hmang tur kan nih lain, state tam ber hian kan hmang pha lo vek a, Mizoram chu a hmang tha pawl tak kan ni zawk a; hetah hian nasa takin improve chu a la ngai a. Tin, health clinic 15 ngawt mai te min han pe a, tin, health-worker te sub-centre upgrade-ah te, health & wellness-ah te, ANM school-ah te, 'mi panga ngawt MLA fund-in kan la ruai' kan tih kha, khangte kha min hriatsak ka duh a.

Tin, Lengpui PHC-ah khuan x-ray an neih lohna hi a rei tawh a, kan sawi thin a, Minister-ah pawh. Amarawhchu, department leh Minister pawhin min lo hriat sak atan - hei hi chu kan lo chhawk thei dawn che u niin a lang a; tunah hian company CSR kan

dil a, min approve sak tawhin kan hria a. Lengpui PHC-ah khuan oil industry CSR atangin x-ray kan beisei a ni.

Hei Commerce & Industries Deptt-ah te pawn ka sawi duh hram chu - MSME hi nasa lehzuala kan kalpui a ngaiin ka hria, Mizoramah hian. Hei hi central sorkar pawhin min target-pui te a ni a, ‘eizawna thalaite leh a tithei ten an neihna tur a nih avangin’ tih te kan sawi anih chu. Chuvang chuan vawiin nia kan Minister zahawm tak takte demand hi a pawmawm ka ti a, ka support a ni e. ka lawm e.

(*Chairman, Pu K. Laldawngliana’n Chair a la a.*)

CHAIRMAN : Pu Lalrintluanga Sailo i lo sawm ang.

PU LALRINTLUANGA SAILO : Pu Chairman, ka lawm e.

Zawhna pakhat Pu Chairman, ka zawt duh a - Nikum lamah ka sawi tawh a, hemi Assembly bulletin-ah hian Geology & Mineral Resources Department hi a lang lo ziah mai a, ‘Commerce & Industry’ han tih mai hian kan hrefiah tawk lo deuhin ka hria a, helai hi ‘ka ngaipawimawh khawp mai’ tih ka sawi hmasa duh a. Chutihruah chuan he department hi Demand No. 40 khan a huam turah ka ngai a, hei hi a pawimawh khawp mai a. A thawktu an tlem nachungin, State’s *revenue-earning department* tak tak a ni a.

Tin, an pawimawh zia hi kan sawi lo hian ka hre thin a. Lei a che a, lei a min a, indaihlo chung chungin anni mithiam kan ko a. Lir a nghing a, kan ko a, hetah building lian synod-in a sak dawn pawhin kan ko zel a. sorkar a ni emaw, corporation a ni emaw khatiang chi khaah khan an pawimawh hlein ka hria a ni.

Ka question-ah khan a lo chhuak lova, mahse vawiina *Unstarred*-ah khan a lo chhuak a. Ka biala Bungmual ram, West Phaileng-ah lung tha tak tak lakchhuah tur volume lian em em mai a awm a, ‘min lo survey sak vek tawh a ni’ tih te chhannaah ka hmu a, ka lawm hle mai a. Chutih rual chuan hmannah Bangladesh - Border Trade chungchangah Bangladesh-ah a changtu Minister zahawm tak Dr. R. Lalthangliana te nen kan zu kal pawhin, Bangladesh lamin an demand chu - lung (stone) kha a ni a. Chuvang chuan, hemi kawngah hian, ‘tan han la thar leh deuh se’ tih kha ka ngaihtuahnaah a awm a, kan tarlang hmasa duh a ni.

A dawt lehah chuan Member zahawm tak Dr. K. Pachhunga khan ka tawngkam hman tum tak mai kha a hmang a, kan hmang lui tho ang a. Health Department Demand No. 24 hi vawiin hian fak tlak a niin ka hria a. Kan Bible in a sawi ang deuhin, “*Thihna a ta a chhuak a, nunnaah a lut ta zawk a*” a tih ang deuh khan Pu Chairman, kan ram thihna a ta kan chhuak a, nunnaah min senglut hlahu tu department a ni a. Chuvangin, vawiinniah hian tih tak zetin ka salute a ni.

Ka han fakna em ema chu - indaih lo chungin midang volunteer tur te pawh awareness pein an incho-phur a, khalama mithiam hlawh pawh nei lova inpe tura an han tichhuak thiam te kha a ropui ka ti a. Chutih rual chuan, kha ti khawpa 24 hrs Covid donaa hna an thawk chung khan, an thawhna a dal chuang miah lo kha thil mak tak a ni a, an inpekna a ropui thlawt ka ti a. A chhan chu, ka bialah te pawh PHC building lian pui pui pahnih min sak sak rualin khawtinah health clinic centre min din sak a. Tin, health-worker awmna hmunah min rawn upgrade a, khatiang khan min han tih chhoh sak a, department-a an hnathawh thulh miah lovin. Tin, hripui leng karah hna an thawk chungin tiang khan an kal a, ropui ka ti takzet a ni.

Chutih rual erawh chuan vawiin niah hian ka biala health clinic centre dahna tur khaw 4 - Bawngthah, Chhippui, West Phulpui leh Bawlte te henga thawktu tur pawh information kan lo pe vek a, order ah khan a lo tel hauh lo mai a. Hei hi a changtu Minister zahawm tak hian min hriat sak se, action min lak sak ngei se ka duh a.

Tin, sorkar hmasa lam daih tawhah khan West Phaileng PHC-ah x-ray khawl an dah reng mai a, vawiin niah ka bialah pawh hian PHC-5 kan nei a, pakhatmah a function lova, thawktu technician kan nei lova. Heta damlo cent percent deuh thaw hi kut-hnathawktu an ni a, ruh tliak leh thidang han x-ray ngai thin hi a buaithlak khawp mai a. Chuvang chuan, helai hi min ngaihtuah sak sela ka duh a ni. A khawl min dahsak theih chuan, a thawktu chu ka fund atang a nih loh pawhin ka hlawh atangin ka chawm mai ang tih kha ka tarlang tel duh bawk a ni.

Chutih rual chuan Pu Chairman, Demand No. 39 leh 36 - Power & Electricity Department leh Environment, Forests & Climate Change Department te hi sawi kawp loh theih niin ka hre lova a. A chhan chu - ka bialah hian power grid hovin 132 kV sub-station dinin, power & electricity tha tak kan neih ve theih nan kum tam tak an thawk tawh a. Nichina Mamit bialtu zahawm takin a sawi ang khan, harsatna hi namen lovin kan tawk a, amaherawhchu tunah chuan forest clearance te kan nei fel tawh a. Nizan maiah khan power-grid hotute ka inah an lo leng a, kan session zawh kha min nghak a ni, Pu Chairman. Chutiang chuan harsatna lian tak an lo nei a ni tih ka hria a. Chu chu thil dang ni lovin, forest-ah hian power grid ho hian April, 2021 khan compensation ₹16,81,22,451 an lo pe tawh a. ‘Compensatory afforestation’ tihah te, ‘net present value’ tihah te, ‘cost of raising medicinal plant’ tihah te, ‘felling of trees in such location’ tihah te, ‘felling of trees in corridor’ tihah te, ‘demarcation of diverted land with RCC pillars’ tihah te, tin, ‘fund for reducing public dependence & forest & traditional livelihood support’ tihah hian compensation ₹16,81,22,451 lai mai power hian a lo pe a.

Tichuan, tluang taka an thawk thei dawn emaw kan tih lain, mimal ram a bikin Lallen, Saithah, Phuldungsei leh Pukzing-ah te a lo awmah khan compensation crops-ah chuan an pe tel thova. Amaherawhchu, kha mite ram chhunga thing leh teak dingte kha an demand ta a, heng khaw li hian harsatna an siam a. Chu chu power-grid lam hian

‘kan tih tur a ni lo e’ an ti a, Forest Deptt. lamah an pe a. Forest Deptt. lamin pe tura kan ngaih lain, an lo pe chiah si lo laia hi kan Minister te pahnih Demand-ah khan ka han sawi kawp a. Khawngaihmin min enzui sak ula ka duh khawp mai. A nih loh chuan, khu laia khaw tam tak kms 182 vel (khawvela line thui ber anih ka ring a,) khu engtikah mah kan solve dawn lovin a lang tlat. Court-a an kal chuan kum tam tak min delay leh dawn a ni. Chuvang chuan, helaiah hian in negotiate-a, tlawm deuh pawhin, kei ni a bialtu pawh kan tangkai theih chuan ka lo pui ang che u, a tul angin tih te kan tarlang duh a. Border boundary te kan ni a, khu laiah khuan power tha tak nei hi kan state security tan a that rualin, development kawng hrang hrangah hma kan lak ve theihna a ni dawn a ni.

Chutih rual chuan, forest hi kan ram leh kan hnam tan a pawimawh a, kan climate chungchangah te boruak thianghlim min petu, tui in tur tha min petu a nihna chen a awm a. Amaherawhchu, keini ang bial khutiang backward takah khuan, he House ah hian Pu Chairman, ka sawi duh chu - awareness nei lo hian a thawktu turte a khaw hmuna mite han la nawk nawk te kan nei a, thiamna bik nei lo te an ni a. Amaherawhchu, khatianga appointment kan neih khan a latu ten awareness pe chhonzawm lem lovin an thawk mai a, ‘mautuai laru an awm chuan man tur; chakai manru an a awm chuan, man tur’ tih kha a ni mai a. Chakai manruk case avangin kum nga te Aizawl-ah an court thin a, a hahthlak em em mai a ni. Chuvang chuan, awareness an neih ka duh a. Kan Bru unaute phei chuan, ‘police lau lauah chuan forest an sual bel’ an ti a nih chu. chuvang chuan, helai hi a changtute pawhin min ensak se ka duh khawp mai.

Tin, silai hi Mizote hian kan lawm hle a, pi pute atangin; *Dan* ang taka silai nei ten Forest Deptt. ram chhung ni lova sa an kap lai leh, khatiang pawh ni lova fehnaa an ak te kanin mansak mai mai thin a. Hmanniah an man lai ka hmu a kei pawhin, ‘ngawi rawh u; nitin helaia BSF kal te in man sak anih loh chuan, lo pe leh mai teh u’ te ka ti a ni. *Dan* ang taka nei tho, State sorkarin license a pek thlap te, a kap lai pawh ni lo, an ak mai mai hanin mansak kha buaithlak lai te kha a awm a, a thawktute hi tlema kanin aware deuh chu a thain ka hria a ni. Chu chu he House zahawm takah hian, heng Demand sawi pah hian Pu Chairman, ka han tarlang tel duh a ni tih ka sawi duh a.

Tin, Demand No. 27 - District Council & Minority Affairs hi in sawi tam lova, kan sawi duh tlat a. Khu lai keini *aspirant district* - Mamit leh Lawngtlai lam tan a pawimawh leh zual a ni. 2019-20-ah khan central funding-in tuna PMJVK namen lova ka bula miina development fund a hui chhuahna sports-lover zawng-zawngin an buaipui, keini pawhina kan buaipui vek hi, ‘PMJVK’ a nih hma khan ‘MSDP’ a ni a. 2019-20 chhovah khan central-in khami hming khan works a khawih a, department hrang hrang - health sector, education leh forest te, chutiangin Anganwadi leh Social Welfare thlengin a khawih a ni. First instalment an la a, second instalment pek awm tawh lovin kum li a liam tawh a ni. A thawktute’n an chawi thlawn ringawt mai a. Secretary level ah te pawh kan zawt thin a, tih vak ngaihna an hre lova. Hei hi ministry

level atanga buaipui chi niin ka hria a. A nih loh chuan sum tam tak bial rethei taka kan mipuite in duhsak a, in hmangaihna avanga kan lo pek ve te'n vawiin thleng hian an leiba in a delh rit ta riau mai a. Hei hi 'MSDP' a nih laia mi kha a ni a. A dik tak chuan, '*utilization certificate* te kan lo inpe mumal lo deuh kha kan tuar ta a ni' tih he House-ah hian, demand sawi pahin ka ha tarlang tel duh a ni.

Aw le, Pu Chairman, ka sawi tawp chu a ni deuh mai a. Amaherawchu thil pakhat lek; Demand No. 42 - Transport hi a pawimawh hle, a thenin 'earning department a ni e, loss in kal suh se' an ti a, keini bial chuan vawiin niah hian, 'development department a ni' kan ti a ni. A chhan chu - Aizawl atanga Marpara, Silsuri thleng tur chuan tumahin bus fare kan nei lo; tlawm zawka Transport Department-in min pe hi 'rawngbawlna a ni' tih hi kan pawm dan a ni a. Chuvangin, a hlep ringawt um zawnga kal tur a nih chuan, taxi lo kal mai rawh se; department khan rawn tir mai rawh se. 'Bus service hi titawp lul suh u' kan ti a ni. Chuvang chuan, mipui tan rawngbawlna sang tak min hawn saktu a ni a, vawiin niah hian thinlung leh tih tak zetin an chungah lawmthu ka sawi duh a.

Tin, a bik takin inland-water transport, inland-waterway chungchangah, 'ka bialah hma, kan Minister zahawm takin a lo la a ni' tih vawiinah zawhna-chhanna atangin ka lo hria a, ka lawm hle a. Heng hi kan ram tan a pawimawh hle ang tih ka ring a, lawmthu ka sawi a. Chutih rual chuan, (Pu Chairman, minute khat pawh ni lo, eng emaw hlek ka han tarlang leh duh a) Demand No. 40 – Trade & Commerce-ah khan, hei border trade kan buaipui a, a lawmawm hle a, 'vawiin niah hian engnge kan thlen chin?' tih te pawh hriat a chakawm a, nakinah kan minister zahawm takin a wind-up hunah lo hre ta se la. Khu laia *border-haath* siamna hmun tur pawh a village neituten min earmark fel thlap tawh a ni tih te ka han tarlang a. Chuvang chuan, he ram tana kan thawh chhoh zelnaah hian heng department pawimawh tak tak, minister pathum demand han han sawi hi Pu Chairman, thinlung takin ka support a, pass ngei turin he House-ah hian ka rawn thlawp a ni e. Ka lawm e.

CHAIRMAN : Tunah chuan MLA zahawm tak Pu Vanlalhlana i lo sawm ang.

PU VANLALHLANA : Pu Chairman, kan lawm e. Bawng-insi ang deuhin, warm-up pawh awm lovin i han tan chawt mai teh ang aw.

Kan Parliamentary Affairs Minister zahawm tak kaihhraina hnuaiah Mizoram Legislative Assembly kum 50-na kan lawm a, a tihzia khawp mai a, kan hlim tlang pawhin ka hria e. Amaherawhchu Pu Chiarman, hei hi chu a hnawk deuhin ka hre thin a, a la work si lova, a inhung reng mai bawk si a. Amaherawhchu tun hnaiah khan ngaihtuahna thar ka nei a, a tha hi ka ti leh hnahnawh a. Ruling party lampang ka va en

thin a, tihian an ti a, an muthlu hmiah mai a; a lang der tawh si lova, a tangkaina tak kha a lo awm ve reng mai a, a tha khawp mai.

Demand No. 21-a *one-time replacement* public service vehicle hote permit a thi hma lutuk hi kan buai a nih hi! Eizawna kumhlun te kan sawi a ni si a, chuvangin *one-time replacement* mai ni lo hian, ‘rei deuh teh se’ tih kha ka han ngenpui a ni.

A dawt lelah chuan, Demand No. 36-ah hian, NHIDCL kawng lai tute chungchang a ni. Mizoram-ah kawng tha tak min laih sak turah ngai i la, a lawmawm khawp mai. Amaherawhchu, heng sorkar company te hian hna an *Dan* an zawm ve tur a ni. *Dan* a awm a, heng Seling - Champhai kawng lai tute NHIDCL hian mud-disposal plan an nei lova, environment-management plan an nei lova, environment-impact assessment pawh an nei lo a ni. Chutiang chu an nihphung a ni a, chungte chu an neih ngei tur, an neih si loh a ni a, hna an thawk reng bawk si a, chu chu kan minister hian lo hria se ka duh a. Tin, hetia kawng an laih hian Mizo mipuite’n kan tawrhna nasa tak a awm a ni. Kan kawng ve te an leivungin a chhilh a, kan huan te, kan lo te, kan dil te, kan lui te thlengin kan tuar nasa em em a ni. Chuvangin, fimkhur deuh turin ka han chah duh a ni. Tin, nidanga kan la hriat ngailoh ‘inland waterways’ kan sawi kan sawi a, a lawmawm ka ti a, Mizoram, tlang ram hetiangah tun hmain kan sawi thin a, mahse ‘a takin a thleng ang’ tih pawh kan ngaihtuah phak vak lo a ni. Tunah chuan a takin a thleng dawn niin a lang a, a lawmawm ka ti khawp mai.

Demand No. 21 - Higher & Technical Education hnuaiah hian sawi ve duh ka nei a, ‘Higher Education’ han tih mai tur J. Thankima College te, Zirtiri Residential Science College te, Women Polytechnic te, Hindi Training College te, Trade Institute of Rural Development te, IGFAI te leh ATC te kan nei a ni. Keini constituency-a IGFAI leh ATC hi chu sorkar enkawl a ni lova, a dangho kha sorkar enkawl te an ni a. Problem kan neih taka chu - Women Polytechnic panna kawng khi a chhe em em mai a, tin internal road pawh km chanve vel awm hi a ni a, a chhe em em mai bawk a, kum tam tak kal taa siam kha a ni a. Tunah hian Silchar Highway atanga penguin Women Polytechnic pan chuan PWD-in kawng a sial mek a, an gate bulah khuan an siam tawp chiah mai a. Women Polytechnic chhunga km chan ve emaw lek siam hmabaka khi min han siam sak thei se kan duh hle mai a; kan minister hian min hriatpui se. Tin, kan PWD minister pawh a awm a, khawngaih takin chu chu kan han ngen tak meuh a ni.

Tin, Zirtiri Residential Science College khian college building thar an luah a, 8th grade, NAAC assessment atangin an hmu bawk a, an hlim khawp mai a. Khi pawh khi bul tan, luah thar a nih avangin hmabak khi a la tam khawp mai a, a tul zual - a parking area leh pavement vel te a diak dawn a, a khu bawk a, tunah khian, khingte khi siam theih ni se kan duh khawp mai. Tin, J. Thankima College pawhin A+, NAAC assessment atangin a hmu te hi kan lawmpui a, midang te pawh hian A+ an hmuh ve pawh kan beisei a ni.

A dawt leh ah chuan, Demand No. 24 - Healthcare hi Mizoram a policy lo piang tawhah chuan a tha ber pawl, Mizo mipui ten kan hlawkpui be pawl tur nia ka ngaih a ni a, Minister pawh a phurin ka hria a, hemi bul tan dawn khan MLA te lehkha a rawn thawn vek a, “I bial chhung chhungkua Mizoram Healthcare Society hnuai a inziak lut thei zawng zawngte kim taka inziah luh theih nan hunbi tuk ral hmian inziak lut turin hma min lakpui turin ka ngen a che”, tiin, kei pawhin he lekha hi ka dawng a, MLA ten kan dawng vek a ni. Chutiang khawpa tha chu a ni a, minister pawh a tang a, keini pawh kan tang khawp mai, keimahni bial chhungah. VC te NGO te pawh kan bia a, sub-centre ah te pawh kan kal a, “engzat nge enrollment ni tawh; in enroll lo an awm em; engvang nge an in enroll loh; harsatna an nei em; ₹1,000/- an nei lo em ni; BPL in ₹100 registration-ah harsatna an nei a mi; a tul a nih chuan ka tum sak vek ang” tiin keini pawhin tan kan lakpui a, a registration china kha chu a hlawhtling khawp mai. Starred Question chhanna kan en pawhin a registration fee ringawt pawh ₹7 crores a tling a ni. Chuvangin, hei hi policy tha a ni a, mipui pawhin kan bawh a ni. Tin, a booklet-ah te pawh hian, ‘Sorkar hnathawk ten sorkara an bill sak theihloh chhungkaw member zawng zawng an inziak lut thei ang a, healthcare hamthatna an hmang thei ang; Mizoram Healthcare Society hnuai a inziak lutte hian damdawiin a an inenkawlna senso chhungkaw khatin kum khat atan cheng nuai 2 thleng an bill thei ang’ tih a ni. Sorkar hnathawkte chuan medical reimbursement an nei a, an bill mai a, sorkar hnathawk lo tena kan bill ve theih tur hetiang policy lo chhuak hi a tha em em a, support pawh kan support a ni. Amaherawhchu tun hnuah hian an duh vanga damlo pawh ni lovin, damlohna, harsatna ten a tlakbuak a, an neih zawng zawng khawngin an seng a, pawisa te an puk a. Reimbursement claim an han theihlut a, an hmu leh thei tawh si lova, manganna a thleng ta a ni.

Tunah hian chutianga mangang chu mi 23,000 chuang an awm a ni. Tukin zingah khan kan House Leader chhanna te kha a ngaihnawm viau mai a; ‘healthcare-ah pawisa a awm lo’ kan ti a, mi sing tam tak hnena kan bat sak lai khan crore 150 ang kha ka chhiar thei tlat a ni. SEDP hnuai, 2019-ah 50 crore, 2020-21 ah 10 crore, 2021-22-ah 10 crore, 2023-24 ah 20 crore. Tichuan, 60 crore, hei bakah hian Asian Development Bank atangin crore sangbi sawi a ni leh bawk a. Chuvangin sorkar hi ka ngen duh chu - damlohna avanga mi mangang tak takte hi i tanpui ang u. Kan tanpui theih dan hnai ber chu - an healthcare bill tang hi i pe ang u. Pawisa pawh a awma lawm, corpus fund pawh hman ngai lovin kan pe thei niin a lang a. Chuvangin, ‘hei hi i ngaipawimawh hram teh ang u’ tih kha vawiinah hian ka tarlang duh a ni.

A dawtlehah chuan National Health Mission a awm a. Chutah chuan thawktu tam tak - doctor, nurse, pharmacist, technician, driver leh grade-IV senior tak tak an ni. ‘Seniority angin sorkarah an hna hi absorb hram ni thei se’ tih kha ka ngen sak duh a. Hlawh te pawh hi, ‘thla thara hlawh la thinin ni 10-ah an la’ kan ti a, kan phun kan phun a. Anni hi chuan December atang khan hlawh pawh hi an la la lo a ni. Chuvangin, ‘hengte hi sorkar hian ngaipawimawh se’ tih kha ka han ngen duh a.

A tawp bera ka sawi duh chu power chungchang hi a ni a. Mizoram-ah hian hydel project lian kan nei ta lova, ‘kan nei dawn lo mai ang’ tih te hi ka hlau a. Bairabi hydel project khuah theih reng kan nei a, chu chuan mw 120 pechhuakin 1984 lamah khan DPR pawh peih a ni tawh a. Amaherawhchu, congress sorkar khan a ennawn a, Brahmaputra Board-in investigation leh estimate te siamtharin mw 80 thawk chhuak thei turin estimate an rawn pe a, kum 2001 khan Mizoram sorkarah Brahmaputra Board pawhin a hlan fel tawh a ni. Chu chu, ka hriatsual loh chuan, *environment* leh *forest clearance* te pawh a awm vek a, pawisa awm loh avanga khuah loh mai niin a lang a. Tunah hian sorkar hian ‘ngaihtuahna te hmang thar leh se’ tiin ka ngen duh a.

Hei, kan Minister chak tak Pu Zira a awm a, (ani nen hian bialnu intawm nei ang deuh kan ni ta awma sin le). Electric hrui a thlung zung zung a, kan tluk lo ang tih pawh ka hlau ta khawp mai. Pu Chairman, chu chu ka sawi theih tawh ni rawh se. Ka lawm e.

CHAIRMAN : Member zahawm tak Dr. ZR. Thiamsanga i lo sawm ang.

DR. ZR. THIAM SANGA : Pu Speaker, ka lawm e.

Vawiinah demand pawimawh tak, kan Minister pathumte demand kan sawiho a. Hun a tlem si a, Pu Chairman, darkar khat vel han nei ila sawi ka chak khawp mai a, healthcare chungchang ringawt pawh hi. Amaherawhchu, ka sawi thei dawn lova.

Hei, vawiinah hian ka kawr ka rawn hak pawh hi, Indian Medical Association blazer a ni a. A chhan chu - vawiinah hian thil chhinchhiah tlak tak kan Mizo doctor te hian an ti a ni. Covid dona atan nasa takin kan ram leh hnam him nan an thawk a ni. Vawiinah hian ka chhuang a ni.

Northeast-ah pawh a la awm mang lo ang, tuna conjoined twins an zai te hi. Nuai khatah pakhat te an awm thin a, Northeast-ah pawh hian an zai tlem khawp ang. Mizoram-ah a vawikhat nan kan doctor ten an han zai thei hi a lawmawm khawp a. Ni 9.2.2023-ah Lawngtlai-ah an zai a, ni 18.2.2023-ah hetah an rawn refer phei a, an zai ta a. Pakhat erawh chu vanduaithlak takin a tira tang khan a tha lo sa a, an thin a inzawm avangin pakhat kha chu thisen supply theih a ni lova, vanduaithlak takin nizan dar 6:20 khan a boral a, a pawh hle mai a. Amaherawhchu, pakhat zawk erawh chu tunah hian a condition a tha viau a, a dam chhuah ngei pawh kan beisei a ni. Hetiang achievement ropui tak kan doctor ten an ti hi an va chhuanawm tak em! Pu Chairman, a lawmawm hle a ni.

Kan member zahawm tak Aizawl South-II MLA khan “ZMC hmasawna hi a chak lo a ni” a tih kha han sawi ve ka duh a. ZMC hi covid hma khan khum 120-150

vel a awm a, tunah erawh chuan khum 315 tha tak tak a awm a. Cabin pawh March thla velah chuan a hawn theihin ka ring a, cabin 52 lai kan nei a ni.

Tin, covid thlen hma khan oxygen plant hi 200 litres/minute tichhuak thei kan ni a, chu pawh chu a hmantlak mang lova, a chhe tawh leh nghal a. Tunah erawh chuan 1500 litres/minute tichhuak thei kan nei a ni. ZMC mai ni lo, district hrang hrangah tunah hian oxygen plant hi kan nei tha vek tawh a ni. Tin, MNF sorkar hnuah hian civil hospital-ah te pawh tunhmaa 200 litres/minute tichhuak thei chauh kha, tunah chuan 750 litres/minute tichhuak thei kan nei a ni. A hmunin a zir loh avangin a lian kan dah thei lo mai a ni. (**Pu Lalchhuanthanga:** Pu Chairman, *point of order* - Hma an sawn chak lo ka tihna chhan chu, *recognition* ah a ni. Recognition tun thlengin kan la neilo tlat. Recognition an neihloh chuan kan zirlaite tan hian harsatna a awm dawn tlat a ni.) Khang kha chu ka rawn la sawi dawn.

Tunah hian kum 40 a ni. *Recognition* chungchangah chuan, hmanni lawk khan emergency inspection an rawn nei a, NMC khan, an findings-ah an lungawi viau a ni. Pathian khawngaihna zarah final inspection hi March emaw, April emawah hian an rawn neih ngei kan ring a. Tunah hian faculty-ah tlem eng emaw deficiency kan nei a ni mai a, Pathian khawngaihnaa zarah *full-recognition* hi kan neih ngei kan beisei a ni.

Tichuan, OT phei saw chu keini zirlai mi ang khan ka la hmu ngai reng reng lo. Modular OT neiha hmanna inspection team rawn kal pawh khan a han enkual a, “hetiang OT tha hi India rama sorkar hospital-ah hian pakhatmah a awm lo, a tha ber in ni” a ti a ni. Chutiang khawp chuan ZMC hi he MNF sorkar hnuah hian Covid-in nasa taka min nuai hnuah pawh hma kan sawn a ni tih kha Pu Chairman ka rawn sawi duh a ni.

Civil hospital kha ka sawi tawh a, ICU kha tunhmain khum 5 kan nei thin a. Tunah chuan Civil-ah hian Medical ICU 9, Surgical ICU 6 leh SNCU 12 kan nei a ni. Tunah hian Paediatric HDU leh PICU 10 kan buatsaih leh mek a, Cardiology tan tunah hian hawn theih maiin 10 kan nei a. Chuvang chuan, tunah hian 47 hi rei lo teah neih theih kan inbeisei a ni.

Dialysis Unit pawh tunah hian kan nei tawh a, a hma sawrkar hmasaah khan kan nei lo a ni. Tuna Dialysis unit 14 kan han nei te hi thingtlang mirethei tan chuan a va han ropui tak em! Chu mai bakah chuan, district tinah kan sawi tawh ang khan PHC sak thar te, sub-center sak thar te, quarter sak thar te tam tak kan nei a. A pawimawh ber chu, he sorkar hian primary healthcare hi a ngai pawimawh a ni. Chuvang chuan, thingtlang miten hriselna an neih thatna turin sum harsa tak karah pawh health clinic 235 an siam te hi a va han lawmawm tak em! Mizoram-a sub-center 305 lai tunah hian Health & Wellness Center-ah hlankai a ni te hi thil mak a ni, hetiang karah hian.

Chuvang chuan, Pu Chairman, he sorkar hian miretheite hriselna enkawlina tur hi a ngaipawimawh hle a ni.

Mizroam hi, kan sawi tak ang khan cancer kan tam a, India ramah pawh a tamna ber State kan ni, 'khawvelah pawh kan ni' te kan ti thin. Chuvang chuan, kan Chief Minister te, kan Health Minister te leh kan hotute thahnemngaihna avangin tunah hian Cancer Specialty Hospital din theihna tur JICA nena tangrualin Zemabawk-ah Crore 700, (*Hon. Dy. Speaker-in Chair a la a.*) Ministry of Finance-te nen tunah agreement felfai taka siam a ni te hi a ropui a. Tunah hian hna pawh kan tan thei lek lek tawh niin kan hria a, a lawmawm hle a ni.

Tin, Pu Dy. Speaker, (in va kal tawh em ka hre lova) cancer hemna khawl 'Linear Accelerator' kan neih hi hi India ramah pawh a tha ber chi a ni a, nei an tlem khawp mai a, sorkar hospital angah phei chuan a nei hmasa pawl ber kan ni. Hmanah khan kan Chief Minister hian hawwna a nei a, saw saw khawngaih takin minrawn enpui ve teh u a; kan khawl neih ropuite saw va hmu ve teh u. Chumai bakah cancer hemna khawl tha chite, 'cobalt therapy' te hi kan nei tha tawh a, tunhma ami ang kha ni lova. Tunhmaa channel 2-3 lek kan nei kha tunah chuan channel 20 chuang te a lo ni ta a. Chuvang chuan cancer pawh kha, a cancer lai bik han hem theihna khawl bakah 'Brachytherapy' pawh kan nei tawh a, a ropui a ni. 'Hengte hi hmasawwna ropui tak a ni' tih hi wawiinah hian ka sawi duh a ni.

Mahni bial chhungah tlem ka han lut ve hlak ang a. Tunah hian Champhai-ah Critical Care Hospital sakna tur tunah hian crore 14 chuang kan ICU-te tihchangtlunna tur engkim sanction kan hmu leh te hi a lawmawm ka ti a, sawi loh theih ni hian ka hre lo a ni. Ka bial chhunga Hnahlan-ah erawh chuan x-ray khawl kan la nei lova, han neih ve ka duh khawp a.

Transport-ah hian MST bus ticket *online payment* an tithei hi a ropui ka ti a. Tin, Inland-water transport lama hma nasa tak kan han la chho te, Tlawng Lui - National Waterways, No. 112 a tan puan a ni ta rup mai te hi a lawmawm ka ti a. Tin, kan bialah DDO office tha tak mai min sak sak a, an sa zo tep tawh a, a lawmawm ka ti a. Chutiang chuan miretheite eizawwna tur two-wheeler taxi permit tam tawk kan hmu a, lawmawm ka ti a ni.

Law & Judicial hi tunhma Covid lai khan kan indawr thin a, an fel khawp mai a. Law & Judicial staff-te hi dawr an nuam khawp mai a, anni hi fak ve hrim hrim ka duh a, an thawkrim khawpin ka hria a ni. Tichuan, Aizawl District Court building tha deuh mai kan han luah thei ta a, chu lovah chuan High Court building MINECO-ah tunah hian hawn theih mai turin sak a ni a, a lawmawm ka ti a. A bik takin Champhai District-ah District Session Judge leh Addl. & Session Judge pawh Mizoram Judicial Service-a rintlulh a lo ni te hi lawmawm kan ti, keini Champhai pawh hian.

Tin, Forest Deptt-ah hian tunhmaa DFO luah thin kha tunah chuan CCF thutna hmuna hlankai kan han ni ta a. Mizo ten nuam kan tih, kan thalaite tana pawimawh em em park, Champhai leh a chhehvelah khian chhawkhleih leh nauban te hi a tha lutuk a, chumi atana Ngur Khua-ah 'Nauban Park' min siam sak tur te hi kan lawm khawp mai a. Tin, Murlen National Park pawh hi han en ve ula tha ka ti a. Rabung leh Murlen inkar, khimi kawng pawimawh tak tlawh a nih avang khian kawng khi min sial sak se. Tin, Tualcheng hi park area a nih avangin, heath hian Forest Rest House awm ve se ka duh khawp mai.

Pu Dy. Speaker, a pawimawh berte zinga mi - Power & Electricity Department hi sawiloh theih a ni bawk si lova, Art & Culture pawh sawiloh theih a ni bawk lova. Art & Culture lamah NGO tan cheng nuai 50 lai ruahman a ni te hi a ropui ka ti a. Art & Culture hi kan pi leh pute sakhua thangtharten lo hriat leh zirchianna research an tih theih turin *seminar symposium workshop* leh *visual document* an nei a. Tin, Mizo Publication Board chuan Mizo tawng a thih loh nan lehkhabu an han chhuah te hi a ropui hle a ni.

Tichuan, Power & Electricity Departmentt-ah hian hmalakna tam tak a awm a. Power lama kan indaihlohna puhrukna tura tan solar plant hmun tam taka buatsaih a ni te hi a lawmawm a. A bik takin Champhai-ah 132 kV line East Lungdar atangin min pe a, kan lawm khawp mai a. Chubakah chuan, Champhai District-in 12.5 mVA kan neih bakah a thar 12.5 mVA min han pe leh a, power-ah hian kan buai tawh dawn lovin kan hria a, kan lawm hle a ni.

A tawpna atan, Trade & Commerce hi vawikhat chiah a pawimawh avangin. Champhai khi tunhmaa sumdawanna hmunpui a. Amaherawhchu, kan sumdawanna zawng zawng khi tunah hian tihchhiatin a awm vek tawh a Myanmar buaina avangin. Kan sumdawng ho lirthei te khi tunah hian a ding thup tawh a. Trade & Commerce lam atang hian Indo-Myanmar Border Trade hi mumal taka kan neih a tulin ka hria a. Myanmar khi buai mahse, eng emaw ti kawngin kan tih a ngai a. Oil a tlawm a, ei leh bar a tlawm a, in sakna bungrua a tlawm a. Chuvang chuan, khilai khi khawngaih takin kan Trade & Commerce Minister khan min lo hriatsak se la. Indo-Myanmar Border Trade, *border haat* pawh kawng pahnih tha deuh mai Hnahlan leh Zote-ah min sial sak tawh, a tlang ruih tawh a ni. Chubakah chuan, Indo-Myanmar Trade khi kan kalpui thei tawh a, khi khi theih ang tawh a hma min lak sak turin leh, mumal taka min lak sak turin ka ngen a, ram buai chung chung khian a tihtheih a ni.

Tichuan, Pu Dy. Speaker, kan Minister zahawm tak tak pathumte demand ka rawn sawi tak te kha, tha ka ti a, ka rawn support a ni e. Ka lawm e.

DEPUTY SPEAKER : Dar 5-a chawlh kan tih thin ang khan, dar 5 a chawl turin kan inruahman tawh a ni. Tunah Member zahawm tak Pu KT Rokhaw ka sawm e.

PU K.T. ROKHAW : Pu Dy. Speaker, a hmasain Demand No. 39 - Power & Electricity Deptt. hi ka han sawi ang a.

Kan Minister hi senior minister a ni bawk a. Nikum budget session-ah khan kan biala kan hriat duhte kan han sawi hlawm a, mahse engmah a rawn react lova. Mahse, a hnuah khan kan biala hriat kan duh te kha *written* in min rawn pe vek a, kan lawm hle a ni. Chuvang chuan, vawiinah pawh hian *written*-a min lo pek leh ngei ka beisei a ni. Tin, Minister dang te pawh hian khatiang khan ti thei hlawm se la a lawmawm viauin ka ring. A chhan chu wind-up naa han react vek kha a theih lova, department head leh department hotute an awm tho a. Chuvang chuan, point kan hriat duh ho kha chu *written*-in, kan Power Minister ang khan min pe zel thei se chuan MLA-te tan hian a lawmawm khawp ang.

Pu Dy. Speaker, ka han sawi hmasak duh chu - Tuipang Lui Hydel Project khawl awmna kha hman a leimin khan a chhill a. Tichuan department hotute'n theihtawp an chhuah a, "vawiinah hian eng chen nge hma an lak tawh? tih leh "he hydel project hi engtikah nge a function dawn?" tih te kha a bialtu ka nihna angin hriat ka duh a ni.

A pahnihnaah chuan, Siaha – "Chakhei power transmission line thar hi siam a ni tawh em?" tih leh "Chakhei 33 kV Sub-station dah tur tih kha vawiin niah hian hmalak a ni em?" tih te ka hre duh bawk a.

Tin, Demand No. 27 - District Council & Minority Affairs hi tlem han sawi lan ka duh a. District Council hruaitute, a bik takin MADC te hlawh chungchangah kan sorkar hi wawi tam an lo hmu tawhin ka hria a. Mahsela, vawiin ni thleng hian an hlawh hi ngaihtuah a la ni lovin ka hria a, an dilna te tih hlawhtlin a la ni lo va. Chuvang chuan sorkar hnena ka rawn ngen duh chu – 'hei hi a rang lama tih hlawhtlin hram ni se' tih leh, dil ang hian an hlawh hi pek ni se' tih ka han sawi duh a. District Area Council area-a piang leh seilian kan ni a, kan MDC te khi an hah khawp mai a, mipuite khian an hlawh hi an eipui tak zet a ni. Mikhual an ngah em em a, damlo zawng zawng khi anni buaipui turah hian an indah a. Chuvang chuan, tuna hlawh an lak mek pawh LDC, UDC te hlawh nen a in ang vel ang a. Chuvang chuan, 'an harsain, an rethei hle a ni' tih hria a, an hlawh hi a rang lama tih hlawhtlin sak hram ni se a lawmawm hle ang.

Pu Dy. Speaker, Demand No. 42 - Transport Deptt-ah hian tlem han sawi ka duh chu – Siaha bus station khi khawpui lailia awm a ni a, a hmun khi a rem em em mai a. Mahse, tunah chuan bus kal tir a ni tawh lova, a hmunah khian engpawh ni se terminal building sak ni se, chutah chuan, maxi-cab te leh transport motor reng reng kan dah thei dawn a ni. Chu chu kan Transport Minister khan min lo hriatsak ka duh a. Tin, district khawpui Siaha hi a tawt tawh hle mai a, nitin mamawh phur - truck, motor liante parking tur a awm tawh lova. Chumi avang chuan Saiha thlen hma, Saiha khawpui tawntirh teah khian truck terminal min ruahman sak thei se a lawmawm ngawt ang.

Tin, Inland Waterways hi Tuipui-D (Hnahtial) atangin ka bial Lawngmasu thlengin lawng kalna tur tunah hian survey mek a niin ka hria a. Hei hi kan Minister hian hlawhtling ngei turin min bawhzui sak se. Tin, Siaha - Lawngtlai via Tuipui Ferry short-cut through hian Lawngtlai leh Siaha inkar a hnai em em a, Kawlchaw lamah chuan darkar 3 vel kan hmang a. Mahse, Ferry lamah hi chuan darkar 1 lekah Siaha kan thleng thei a. Tunah hian he PMGSY kawng hi blacktop vek tawh a ni a, mahse Chhimtuipui saw fur lai chuan leilawn kan neihloh avangin a inkalpwh theih lova. Chuvang chuan, Transport Consultative Committee ina an rel tawh ang khan, kan Minister hian eng pawh nise marboat min leisak se la chuan fur lai pawhin duh duhin kan kal thei tawh dawn a ni tih ka sawi leh duh a.

Tin, Pu Dy. Speaker, kan sawi leh duh chu, Demand No. 24 - Health & Family Welfare hi a ni a. Nimin piaha *Question Hour*-a kan zawh lai kha kan minister zahawm tak awmlah lai kha a ni a, vawiinah hian sawi nawn leh ka duh a. Siaha District - Mara Autonomous Council Area-ah kha PHC pali kan nei a, chungte chu - Tipa PHC, Phurra PHC, Chhaolo PHC leh Chakhei PHC te an ni. Khi PHC pali-ah khian, doctor pakhatmah kan nei tawh lo' tih hi kan Minister hian a hria em?" Tin, chuta ka han sawifiah duh chu - Tipa PHC-ah khian NHM hnuaiah doctor min dahsak a, mahse, January thla khan chhuah a tum a, mahse refugee kan ngah si a, damlo kan ngah bawk si a, doctor lova awm thei kan nihloh avangin Tuipang khawtlang hruaitute'n "engpawmise February thleng tal hi chu min awmpui rawh" an ti a. Tunah hian February thla a tawp tawh dawn a, a chhuah a dawn ta a ni. Chumi avang chuan, doctor pakhatmah he PHC pali ah hian kan nei dawn lo a ni.

Tin, Phura PHC-a doctor kan neihlohna hi kum khat leh a chanve a ni tawh a,. Chhaolo PHC-ah doctor kan neih lohna kum khat a ni tawh bawk a. Tin, Chakhei PHC-ah pawh doctor kan nei a, nimin maiah khan Tlabung a sawn a ni a, a aiah doctor dang min lo dahsak lo bawk a ni. Chuvang chuan, Pu Dy. Speaker, Siaha District hian doctor kan pawimawh em em a. Tunah hian Mizoram district zawng zawngah hian Burma raltlan - refugee kan unaute tam tak kan nei a, Siaha District hi refugee ngah ber kan ni. A bik takin ka bial tlak lam Phura lamah phei chuan refugee an tam lehzuah a.

Tin, tunah khian sik leh sa inthlak dawn vang nge ni, damlo an tam em em mai a. Hmanni chu free clinic nei turin minlo chah nasa mai a. Ka fapa hi doctor a ni a, cancer institute ah sawn a thawk ve a. Tichuan, 'ka bialah free-clinic nei turin kal a ngai a ni' ka ti a. Kar hnih chhung chhuti a la a, damdawi tam tawh kan lei a. Tichuan, a va kal ta a, khaw riat vel a va tlawh a, khaw lian deuhah phei chuan mi 250-300 te inentir an awm a ni. Chu chu tuna kan dinhmun a ni. Tin, free clinic hi tun tum chauh ni lo, a hmain wawi 2-3 ka fapa hian a va nei tawh a ni. Hei hi a chhan chu - doctor kan neihloh vang a ni. Chutiang chu kan dinhmun a ni a. Chuvang chuan, Pu Dy. Speaker, hetiang kan dinhmun anih laia PHC pali kan neiha doctor pakhatmah awm lova MNF sorkar hian minsiam hi mak kan ti a. Congress sorkar lai kha chuan PHC pali ah hian doctor

min pe vek thei a ni. Mahse MNF sorkarah hi chuan vawiinah chuan doctor pakhatmah nei lovin kan awm a. Chuvang chuan, Siaha District hi chu engkimah duhsak kan hlawh loh avangin ‘Congress sorkar kan ngai hle a ni’ tih, he House-ah hian kan sawi duh a ni.

Kan Minister hian a hma khan ‘CT Scan kan pe ang che u, Siaha tan’ a ti a, vawiin thleng hian pek kan ni lova, Siaha Hospital hian CT scan kan pawimawh takzet a. Vawiinah stroke te, damlo serious tak tak te, Lunglei leh Aizawl panpui tur hian darkar 10 a ngai a, chumi chhung chuan damlo tam tak an thih phah a ni. District headquarters dangte chu Aizawl an hnaih a, Lunglei an hnaih a, Siaha erawh chu a hla a, khawpui pan tur hian darkar 10 a ngai thin a ni. Chutiang anih avang chuan, ‘khawngaihin CT scan a rang lamin min lo dahsak hram se’ tiin ka lo ngen bawk a ni. Ka lawm e.

DEPUTY SPEAKER : Member zahawm tak Pu Ramthanmawia ka sawm e.

PU RAMTHANMAWIA : Pu Dy. Speaker, ka lawm e.

Kan minister zawhawm tak tak pathumte demand kan sawi mek a ni a. A hmasa bera kan sawi duh chu - Power Minister zahawm tak Pu R. Lalzirliana Demand No. 39 - Power & Electricity hi a ni a.

Hei electric pawimwh zia kan hria a, a tel lovin kan awm thei tawh lo a ni ber a. Aizawl khawpuiah hi chuan electric supply hi kan nei tha fu a, tunhma te ngaihtuah chuan, a lawmawm pawh ka ti a. Amaherawhchu, keini ang bial kilkhawr, khawpui atanga hla East Tuipui ah te hi chuan helaia current kan neih pawh hian kan nei lo fo mai a. A chhan tam tak zingah an han sawi thin chu - tun hma atanga kan eletric ban khi *old-model* kha ni a. Champhai atangin 33 kV line lo kal hi Khuangleng-ah a tawp a, Khuangleng atangin Khawbung, Khawbung atangin Farkawn; tiang chuan electric ban pangngai kha hman a la ni a. Thing tlu leh eng emaw hian a tichhe reng mai a, helam atanga current kan pek chhoh pawh khian khilai bilah khian harsatna kan tawk fo mai a. Chuvangin, electric ban ho khi tower a thlak theih ni se; chutianga project siam theih anih chuan a lawmawm khawp ang.

Tin, nikum pawh khan ka sawi a, sub-station building pawh hi a pawimawh khawp mai a. Chung zingah chuan Khawbung kha, a chung far min rawn siam sak tawh a, khaw hnih - Khuangleng leh Farkawn te hi furah a far a la hlauhawm em em a. Thil hautak lutuk a ni lo pawhin kan ring a. Eng pekna panel-board ber a far thin avangin a hlauhawm hle a, a thawktute pawhin an hlau hle a ni tih te ka han sawi nawn leh duh a. Tin, chubakah Khawbung-a control panel khi a chhe tawh hle mai a, siamthat hleih theih loh in a dinhmun khi a tha tawh lova, a hmui rum rum reng mai a ni. Hei hi a rang thei ang bera ngaihtuah a ngai a, control panel hi a chhiat chuan Khawbung chin zawng

bakah Farkawn lam thlengin a thim vek dawn a ni. Khawngaih takin a chhiat rup hmaa hma min laksak turin kan Minister zahawm tak hi kan ngen duh bawk a ni. Tin, Farkawn, Khuangleng leh Khawbung-ah hian staff quarter kan mamawh khawp mai a. Tin, Farkawn-ah te pawh khian staff quarter a awm loh avangin staff ten bial fan chungchangah harsatna an tawh thin a ni.

Tin, lawmthu kan sawi duh chu - ruah a sur changa power supply amaha in cut-off thei kha kan Minister zahawm tak hian a dish thlak a ngai a ni tih hriain polymer dish min pe a, kan lawm takzet a. Tin, Tlawva-small hydel project, Khuangthing-a mw 5 pechhuak thei nikum hmasa khan min hawn sak a, hei hi kan sawi fo a, a tir atanga design fuh tawh lo a awm a; furah chauh hman theih tura siam a lo ni a. Hei hi a fur leh thal hman theih tura siamna tur taka chu 'vaibelchhe 3 vel a ngai ang' an ti a. Thalah pawh tui han khuaha, 'tuikhuah tling kha thalah pawh hman theih a ni ang' tih kha a department lama an sawi kan hria a. Hengte pawh hi kan Minister zahawm tak hian min tih sak theih chuan, khilai Tlawva-small hydel project khi tangkai takin fur leh thalah kan hmang thei dawn a ni.

Thildang chu kan Minister ho hian kan sawi a, ama ho hian thlathar-ah kan bialah kan zin chho dawn a, a hmunah te min hmuhpui dawn a. Thil tamtak min tihsak a, kan lawm a.

Tin, Soil & Water Conservation Department atang te pawhin kan bial - Khawbung leh Bungzung ah te hma min rawn lak sak a, kan lawm takzet a.

Demand No. 24 - Minister zahawm tak Dr. R. Lalthangliana hi kan sawi thin a, kan hria a. Kan bialah ngei pawh Health Department hian hmasawna ropui tak min thlen a, hei hi kan sawi chhuak ve duh hrim hrim a. Tunah hian Farkawn leh Bungzung-ah PHC building tha tak mai min sak sak mek a, tin, Khawbung leh Sesih PHC te sak mai theih tura a buatsaih mek anni bawh a, kan lawm hle a. Kan bialah hian PHC pali a awm a, a vaiin min sak thar sak dawn a, Health department chungah lawmthu kan sawi a. Tin, chu mai nilovin health clinic kan bialah 5 min hawn sak a, chungah chuan health-worker leh helper te min dah sak bawh a. Tin, chubakah chuan kan bial chhung PHC-ah staff nurse pakhat theuh min pe te, Bungzung leh Farkawn-ah SED-Grade IV min han dah thar sak te kan lawm takzet a. Tin, sub-center zawng zawng Health & Wellness Center ah hlankai niin B. Sc Nursing min dah sak vek bawh a ni. Hengte hi a minister tawngkam han hmang i la, 'tuilet hnuah kan la hmuh ngai loh, kan la hriat ngai loh' a ni. Kan lawm takmeuh meuh a ni.

Chutih rual erawh chuan health sub-center sak that/repair ngai leh staff quarter sak ngai te pawh kan la nei bawh a. Hengte pawh hi min lo hriat sak sela. Tin, health clinic hawn thar 5 te hian clinic building pangngai leh a thawktute chenna tur quarter pawh an la nei lo bawh a ni.

Tin, kan sawi tak ang khan Bungzuang PHC hi PWD in an sa a, an sa tha khawp mai a, a lawmawm pawh ka ti a. Hei hi khua atanga km khat vela hlaah sak a va ngai tlat a, a chhan chu a hlui hmun kha lei a khik avangin khaw pawnah va sak a ngai a. Mual pakhat kha an rawt a, km khat vela hla anih avangin staff-quarter hi bilh telh leh, khilai building khi han zo pawh ni ila, doctor te leh staff te kha km khat vel va kal a ngai dawn a. Chuvangin, staff quarter - doctor quarter leh nurse te awmna tur kha kan mamawh hle dawn a ni. Tin, tui connection leh electric supply te a thara tih a ngai a, tin, khilai km khat dawna hi blacktop ngai, kawng khi siam ngai a ni bawk a, hengte hi kan Minister zahawm takin min hriat sak se kan duh bawk a ni.

A tawp berah chuan, Pu Deputy Speaker, Pu TJ Lalnuntluanga department chan, Demand No. 42 - Transport hi hei keini bial chuan MST bus hi kan hmang tangkai em em a, kan sorkar hlim phat atang khan kan Minister hnenah hian MST bus lo service ngai tawh lo, MST hi a awm tawh lo emaw kan tih hial a, kan bialah te chuan; tichuan kan harsatnate kan thlen a, a niin kan dinhmun te min hriatthiampui a, MST bus service kha min han siam sak leh a. Tunah hian Khawbung, Zawlseih leh Khuangthinah te service mekin, 'mipui pawhin an chhawr tangkai hle' tih kha kan sawi duh a. A hmaa min lo pek thin Farkawn pawh hi, bus indaih deuh sela min pek ve ka han ngen bawk a. Tin, chu mai nilovin, kan hriat tak ang khan mipuite eizawna tha kan neih theihna turin Two-wheeler taxi te, auto-rickshaw permit te min han pe a, hei kan thalaite mi tam takin eizawna an neih phah a, a lawmawm ka ti a; lawmthu kan sawi bawk a ni.

Tin, Demand No. 36 - Forest & Climate Change Department hi, kan bial Khawbung-ah Forest RO a awm a, Forester leh Forest Guard quarter te khi a chhe tawh em em a, hei hi min lo chhinchhiah sak sela, sakthat a ngai a ni. Chubakah Khawbung forest Rest House, IB hi a chhe nasa zual a, hei pawh hi min lo hriat sak sela, Pu Deputy Speaker. Tin, Khawbung Range-ah hian staff pakhat RO chiah awm ang a ni tawh a. Forester awm mek hi tunthla tawpah a pension dawn a, staff RO chiah kan nei tawh dawn a ni. Hengte pawh hi hma min laksak a ngai hle a. Tin, Bungzung leh Vanzau-a Forest department te khi thawktu awmlo ang maiin an ram zo a, hengte hi eng tianga kalpui tur nge tih te pawh Pu Deputy Speaker, ngaihtuah a ngai hle mai. Ka Forest Deptt. hmunhma awm te khi hunrei tak ngaihthah a lo nih tawh avangin ngaihsak a tul tawh khawp mai.

Tichuan, Pu Dy. Speaker, Minister pathumte demand hi pass ngei turin kei pawhin ka rawn thlawp a ni e. Ka lawm e.

DEPUTY SPEAKER : Member zahawm tak Dr Vanlaltanpuia ka sawm e.

DR. VANLALTANPUIA : Pu Deputy Speaker, ka lawm e.

Vawiinah kan Minister zahawm tak tak pathumte te demand pharh a ni a, a lawmawm takzetin ka hria a ni. A hmasa berin Demand No. 21 - Higher & Technical Education Department-ah ka han lut nghal ang a.

Kan Minister zahawm tak hi ‘Academician’ a ni a, department pawh an phur viauin ka hria a, tin, achievement pawh an nei tha hlein ka hria a, a lawmawm takzet a ni. Mizoram-ah tun anga kan college te mark an hmuh that hi a la awm lovin ka hria a, tukin zinga report kan han ngaihthlak ang khan, NAAC Accreditation-ah hianin Serchhip College in Grade-A an hmu a, Govt. J. Thankima College in A+ an hmu bawk a ni. Tin, Government Zirtiri Residential Science College in A, Govt. Aizawl West College in B+, Hrangbana College in B te an hmu a, a lawmawm takzet a ni. Kan hriat angin RUSA project-ah hian NAAC-Accredited college lo chuan project te an dil thei tawh lova. Kan institute te hma an sawn hlein ka hria a, a department pawh an thlamuang viauin ka hria a ni.

Mizoram University Southern Campus din tur chungchang hi zing lamah khan kan han raise a, hei kan Chief Minister zahawm tak zarah kan Minister puitu angin ka awm ve mek a, kan nawr nasa viau mai a. 2020 khan approval for establishing Southern Campus kan hmu tawh a. Amaherawhchu rin aiin thil hi a taka han chantir dawn hian a process te alo la thui a, University lam atanga Human Resources kan neih ang ang te pawh va share a, bul tan nawk nawk tur anga hriattir te kan ni a. Amaherawhchu, post create si lova va tih tawpa kha a lo harsa a, extra burden tam tak a awm thei a. Tin, a la chian chiah loh avang hian han tan rawih hi thil harsa tak a ni a.

Kan Chief Minister hi thawkkhat lai khan a hmunah te lo va kalin, a hmun hmate pawh a va en a, a hnena proposal kan pek te pawh min ngaihtuah pui hle a, a lawmawm ka ti a. Tun dinhmunah hian tui te, electric te, quarter te, kawng te, (kawng hi Kawmzawl helipad atang hian km 2.7 a ni a) chungte chu han siam tur chuan vaibelchhe 11 vel a ngai a. Kan Chief Minister kha a va kal a, kei pawh a hmun atangin mi rawn bia a, Aizawl lama programme eng emaw ka neih lai a nih avangin, ka tawiawm thei lova. Kan Chief Minister zahawm tak hian chungte pawh chu min pek a remti vek a, “lo tan mai rawh u” tiin keima hnenah pawh min hrilh a. Amaherawhchu, khami ai mah khan central lam atanga an commitment-a kha thil pawimawh nia kan hriat avangin kan tan leh ta rih lo deuh hi a ni a. Keimahni State Govt. lam chuan kan tih tur ang ang chu kan in ready viau a ni tih ka sawi duh a.

Nichinah khan kan opposition leader khan ‘a bialtupa’ ti khan min han kap deuh a. Ani hi in thlan a hnai deuh nge, a tan ulh lutuk hian thil hi a hre dik lo deuh thin a. Ram hi acre 100 a ni lova, acre 300 chuang kha kan pe a, land leased thlap tawh a ni a. Chu chu, ‘land, free from all encumbrances’ central govt-in an beisei ang thlap kha kan pe a ni. Tin, kha hmunah khan hnathawh tur kha a la awm lo reng reng a, bialtu ang pawh khan proposal emaw, recommendation emaw pawh ‘ka ziak lo reng reng’ tih kha

kan sawi duh bawk a ni. Hemi chungchang hi chu theihtawpin kan buaipui mek zel a, dam tea kan awm chuan kan tih theih thuai pawh kan beisei fan a ni.

Kei ngei pawh hi, kan CM hriatpuiin Union Minister, Dharmendra Pradhan pawh kha a office-ah ka zuk hmu tawh a. “Ka pu, han ngaihtuah la, Central University kan nei a, fully-funded Central University a ni a. Chu chu a extension campus kan nei dawn a, chu chu self-financing course emawm, a mode dang deuha enkawl kha a rem lova, Central University tur a ni si a,” ka ti a. Kan Minister zahawm tak pawhin, “min convince khawp mai” a ti nghe nghe a ni. Chuvang chuan, rei vak lovah chuan kan la neih nge nge chu ka ring nghet tlat a ni.

Demand No. 39 - Power & Electricity-ah hian ka han kal daih ang a. He department hi a hlu takzetin ka hria a. Vankal-Solar Project mw 20 pechhuak thei tur thlalak te tunlaiin social media-ah te a rawn lang deuh ut ut a, a phur awm hlein ka hria a ni. Khawiva-Mini Hydrel Project ka bialah hian a awm a, hun rei tak ngaihtuah tawh loh a ni a. A kawnga hi kum 20-30 lai siam tawh loh a ni a. Tunah hian kan Minister chak tak hmalakna te, kan Chief Minister duhsakna te avangin a kawng siam a lo ni dawn ta a, kan lawm tak zet zet a. Sawng lai vela ram lo neite leh mipuite pawh hian department ta tur ni mah se la, remchanna lo awm tur hi kan lawm em em tih hi ka sawi duh a.

Tin, kan Minister hi he House-ah hian lawmthu han hrilh ka duh a. Thawkkhat lai khan, ka bial Thiltlang-ah inchung hnai te tea grid line kal, hlauhawm pui pui a awm a. Chung avang chuan chetsualna a thleng fo a; An in hliam a, ramtui lei loa awm chhunzawmte pawh an awm a. Chung te chu House-ah hian ka sawi a, re-alignment te kha min tihsak ta vek a ni. Hei hi a khuate pawh hian thil tih theihloh tluk hiala an lo ngaih tawh a ni a. Kan Minister hmalaknain hetiang grid line re-alignment te min han tihsak hi kan lawm takzet a ni.

Hei hi min lo chhinchhiah sak se kan Minister khan ka duh chu - ka bial Mausem khuah hian karthum liam taah khan incident tha lo ang reng deuh mai kan tawk a. Transformer awmna kha hung loh a lo ni a, naupang duhawm deuh mai, hmeltha deuh mai hi a va lut a, current in a man a ni. A lu hi, a chhipah hian a kaw huau mai a, tunah hian ZMC-ah a awm a, an zai mek a. Tun Sunday khan ka va tlawh a, a khawngaih thlak takzet a. Hei te hi zangnadawmna, tanpuina te a awm thei te a nih chuan min pe se kan duh takzet a. Tin, engatinge khatiang transformer hlauhawm em em mai te kha hung loha a awm theih tih kha ka han zawt duh a. Heng te hi Mizoram hmundangah te a awm a nih pawhin serious taka en chi niin ka hria a. Khawngaih takin kan Minister khan min lo hriatpui se.

Tin, NH 54 - widening project NHIDCL ten a an kalpui mekah hian, ka bial Pangzawl tlangdungah khian electric line te tihchhiat a ni nasa a. Company lam chuan,

“Sorkarah kan tihchhiat man te kan chhunglut tawh,” an ti a. Line hlui tak tak tawh a ni hlawm a, khua a han chhiat deuh hlek hian power supply te kan hmu tha hleithe lova. Khawngaih takin hei hi min ensak se. Tin, Chhipphir tlangdung, hei hi ka sawi tawh a, Haulawng atanga power rawn pek luhna lama hi a kawng a thui em em mai a. Tin, Vanva lui ruam - deep gorge a kal kan a, thli leh ruah a chet deuh hian thing tang ten a vua a, current kan nei lo nghal zel a. Hei hi Zote, Thenzawl lam atanga lak hi kan duh em em mai a. Hmanni khan SDO hote pawhin an en a, panel board hi a hma chuan ‘a in daih lo e’ an ti a, mahse, hei pawh hi a awm thei dawn niin ka hria a, khawngaih takin min ensak se kan lawm ngawt ang.

A tawp berah, Pu Dy. Speaker, Demand No. 3 - Environment & Forest Minister hi, minister naupang tak, minister duhawm tak kan nei niin ka hria a, lawmawm ka ti a. Environment, Forest & Climate Change-ah hian ngaih pawimawh hi ka nei thin a. Mizoram-a kan forest tlahniam zela hi a uiawm ka ti a. Amaherawhchu, tunah chuan India ramah a nei tha pawl tak chu kan ni awm e. Ka han sawi duh tak a chu - nungcha hi an tlem em em mai a. Tunlai hian silai tha deuh deuh mai, ‘free-keyhole’ an tih emaw ni chi te; tin, Youtube-ah hian Zupawl (ransa) man ang chi te hi tihlan a tam ta em em mai a. Tin, kawng sira inpho hoah te hian (a pho chu an pholang chiah lova), sarep lei tur ang te hi a tam em em mai a, ‘hetiang khuahkhirh dan hi a awm lo maw’ tih te hi min ensak se ka duh a.

Nakinah min react lawk se ka duh chu – Wildlife Sanctuary te enkawl na fund-flow hi, engtin nge kan hmuh dana hi, central sorkar atanga kan hmuhdan te hi hriat ka duh viau mai a. Ka bialah hian ‘Khawnglung-Wildlife Sanctuary’ a awm a. A mipuiten an sawi thin a chu, thal lai hian fireguard te lak a ni thin a; hetiang te hi a la awm reng em? Tin, minor-work han thawh tur ang chi te hi, ‘sorkar leh bialtu MLA te nena tlema inhnerem deuhin a awm thei em?’ tih hi kan hre duh deuh hlek a. Hei hi min react theih chuan ka lawm ngawt ang.

Tichuan, kan Minister pathumte demand rawn pharh hi a tha ka ti a, kan thlawp a ni e. Ka lawm e.

DEPUTY SPEAKER : Tu nge sawi leh tur? Member zahawm tak Pu C. Ngunlianchnunga ka sawm e.

PU C. NGUNLIANCHUNGA: Pu Speaker, ti nghal char char mai ang aw.

Demand No. 27 - District Council & Minority Affairs-ah hian lut nghal mai ila. A pakhatnaah chuan, District council te State sorkarin kan enkawl dan hi, (tun sorkarah hian a ni leh zual a) nikum session budget-ah pawh khan *General Discussion* ah leh *Demand*-ah te khan ka lo sawi ve nasa tawh a. Hlawh daih lo takin kan siam sak thin a, nikumah khan hlawh an indaih lohna (hlawh ngau ngauah) khan nuai 2,61,197 an dil a,

tichuan, VC hlawh indaih lohna - nuai 40, leave salary - nuai 50.02 leh DCRG- District Council Staff pension hote tunah hian an ba nasa em em a, cheng nuai 3,98,499 an dil lain nuai 2,321.02 pek an ni a. An hlawh pawh an indaih lova, chumai pawh ni lovin leave salary tur te, pension-a chhuak ve district council-ah hian staff 2,000 dawn an awm a, khata tang khan pension chhuak an awm ve reng bawk a, khangho kha pek theih lovin an awm a. Kuminah 2321.02 pek an nih laiin, nikum RE-ah khan nuai 21684.48 a ni a, kumin BE-ah hian sing 19,942.42 a ni. Nikum BE Supplementary Demand-ah hian kan pawisa pekna a lang veng a, an hlawh indaih lo kan pe a, chuti chung chuan nikum BE pawh, RE pawh pha lovin kumin BE pawh kan han dah sak leh a. Zoram-ah hian kan hriat angin Autonomous District Council 3 an awm a, kan enkawl dan hi an khawngaihthlak hle a ni.

Chu mai pawh ni lovin (Pu Dy. Speaker nang pawhin i hriat chian em em kha) 2021-2022 leh vawiin he Budget Session 2023 - 2024 thleng hian *Non-Salary* ah 2021-2022-a mi kha a la ngai reng a ni. Lai Autonomous District Council (LADC) ah hian nuai 1360.50 kum 2021 atang khan, 2022 leh 2023 ah pawh rin tir a ni a. Tunah pawh hian budget-a lan dan chuan 1360.50 a ni. MADC-ah hian 1230.62, chu chu 2021 leh 2022, vawiin ni thlengin a la pung lo reng reng. District council ve riang ruang *non-salary*-a cheng nuai 1360 a kumkhata han kal tur chuan eng hmasawwna mah thawhtur a awm lo hrim hrim; an office inenkawlna tur pawh a daih lo a ni. Chakma Autonomous District Council-ah pheih chuan nuai 662.98 chiaah a awm a ni. A vanduaithlak hlein ka hria a, district council te hetiang taka ngaihsak loh an nih hi, thuneihna lian neih an chak ve em emna chhan a ni. He State Govt. hian a theih ang angin enkawl tha ila chuan, ‘thuneihna-lian, ‘direct funding’ kan han tih te hi an sawi an sawi pawh ka ring lo. Amaherawhchu, kan enkawl danah hian kan ti khawngaih thlak em em a; zalen an duh ve a, ram tan hmasawwna hnathawh an duh ve a ni.

(*Hon. Speaker-in Chair a la a.*)

Tin, chumi piah lamah chuan, *Salary & Allowances* - pension tih dan an nei ve a, district council-te sawn anmahniin hlawh an insiam ve thei a ni. Tichuan, an insiam theihna hmang chuan, Mizoram-a MLA-te hlawh a lo pun takah chuan district council-a member-te pawhin an hlawh tihpun ve an lo duh a, helaia Tipa bialtu MLA zahawm takin a sawi tak ang khan, vawiina kan CEM te, kan Chairman te, kan EM te, kan MDC-te hlawh sawn UDC junior deuh hlawh vel chiaah an hlawh; an hnuaia district council-a thawkte hlawh an UD te hlawh zat pawh hlawh mang lo anni. LADC hian 12.10.2020-ah khan an house-ah an pass tawh a ni. Chutiang chuan MADC hian 20.11.2020 ah; Chakma Autonomous District Council hian 13.7.2020 ah; anmahni house theuhah an pass a, hetah Mizoram-ah an rawn thawn a, vawiina kan sorkar - Council of Ministers te cabinet meeting pawhin a ngaihtuah tawh a, hei hi a awm-ai viau a ni. “Tun dinhmun atan chuan a sang deuh a ni” tiin thutlukna an siam a; a lo sang deuh anih pawhin, district council hotute nen dawhkan khat kila sawi hova, ‘hei hi chu tihnam ve deuh

rawh u; heti chinah hian in rawt-bung teh u,' tih emaw tal ni se, a la ziaawm deuh tur a ni a; ngaihsak-zui a awm ta lo hrim hrim a. Vawiiinah hian kan Minister zahawm tak DC&MA changtu hi minister senior a ni a, maherawhchu district council a enkawlinaah hi chuan 'a khawngaih thlak hle a ni' tih hi Pu Speaker, ka sawi duh a.

District Council & Minority Affairs Department kaltlangin PMJVK nuai singa sing tel Sports Department-ah an hnuk chhuak a, a lawmawm ka ti. Chutih rual chuan, District Council-ten an thawh ve theih reng tur - volleyball court te, basketball court te, community centre te, Girls' hostel te, cheng tam pawh ni lo, nuai 31 te, nuai 260 te, nuai 102 te hi autonomous district council area-ah a bikin Chakma leh Lai Council area ah cheng nuai 1,880.59 man zet hi a awm a ni. Helaiia kan sawi tak ang khan, *Non-Salary* ah cheng 1360 leh tih an hmu si a, henga te tham deuh thawk turin Sports Department te an nei ve a; tin, technical mi pawh SE thlengin an nei ve a. Lai leh Chakma area-a awm te hi chu han thawh phei sak ve se la chuan an lawm ve tur a ni a. Sawlaihah party puite tho anni a. Pu Speaker, sawi tur a tam si a, a buaithlak a nih hi. Kha kha district council chungchangah ni se.

P&E chungchangah hian tawitea han sawi ka duh chu - kan bialah kan hriat theuh angin Rulkual YLA ten hnatlangin electric hrui an pawhpui a, vanduaithlak takin mi 3 an boral a. "Khangte kha *ex-gratia* pek an ni ve tawh em?" tih kha khawngaih takin kan minister-in min react thei se la. Chumi piah lamah chuan, lawmthu han sawi ve pawha tha a. Power supply a thain ka hria a, transformer erawh a chhia a; keini bial hi khua a tam a. Kan va sawi hian, Lawngtlai EE leh thawktute, a bikin kan Minister zahawm tak pawhin mi an ngai pawimawh a, min thlak sak zung zung thin. Chutih rual chuan a phurhna a khua mite'n an tum zel erawh hi chu, a buaithlak khawp mai. Khaw tereuh te te, anmahnia electric nei ve anni bawk si a.

Department a tam a, minute tlemte kan nei tawh bawk si a. Pu Speaker, ka han sawi leh duh chu – Transport demand hi. Lawngtlai DTO office, kan Minister zahawm takin nikum lama a hawn taka kha, pawisa an la pe zo lova. Kha kha kan minister hian a hria em? An luah tawh vek leh nghal a, pe turin hmalak sak thei hram se la, pe rang se. An khawngaih thlak khawp mai; leiba nen an awm a ni.

Pu Speaker, a tawp ber atan chuan E&F hi tawitea han sawi ka duh a. Helai House-ah pawh hian zawhna pawh ka lo siam a, a hma pawhin ka lo zawt tawh a. Ni 24.4.2021-ah khan Ngengpui Sanctuary chhunga Hmunnuam, ka biala mi Hniang-hniangi saiin a chil hlum a, kha kha *ex-gratia* pek a ni tawh em? Pek a nih loh chuan, engtikah nge pek a nih theih ang? 'Pek hram dan a awm thei em?' tih te kha ka zawt a.

Tin, Pu Speaker, E&F ah hian keini lam saw Lawngtlai-ah 'Chhimtuipui Wildlife' a awm ve a, an ngaihsak lo khawp mai a. Sum leh pai pek dan hi January Ni 31-a an LOC sem danah te pawh hian, kan Minister bial Champhai lama nuai 105 a

awm laiin, Lawngtlai-ah chuan nuai 20 a awm a, kawngpui, National Park - Lengpui Sanctuary te a awm a. Hemi chungchangah hian, ‘ngaihsak ve deuh ni se, a va tha em’, tih kan zawt duh a.

Pu Speaker, pakhat chia. Kan Minister min re-act atana ka duh, he kan session chhungah ngei hian. Kan Minister Personal Branch atang hian hetiang works department ina an thawh thin hi ‘20% chhunglut turin an dil thin’ tih hi kan Minister-in a hriatpui em? A chhan rualin, chunglama miin min hmu tih hriain, thudikin min chhang se ka duh a. A lo hriatpui lo anih chuan a hriatpui lo a ni mai a. A lo hriatpui em, ‘20% an dil thin hi?’ tih hi. Pu Speaker, kha kha ka sawi theih tawk a ni e. Ka lawm e.

SPEAKER : Minute khatin i pel a, ruling lam an vaiin minute 10-in an pel tawh a, Opposition an ti tha zawk a ni. Awle, Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e. Hei demand sawi dawn apiangin sorkar minister tena hnathawhna tur an neihloh zia, *Salary and Wages* ringawt kan han chai nileng leh thin hi sawi a ngai leh thin a; a lungchhiatthlak ka ti a. Hei wawiinniah pawh kan Minister zahawm tak tak te - Pu TJ Lalnuntluanga, Pu R. Lalzirliana leh Dr. R. Lalthangliana te demand kan han sawi a ni a, a phurawm vak lova. Mahse, hmalam mamawhte han sawi dawn sela, kan minister te hian, ‘kan chief minister-in a phal chuan..’ tih kha an chhanna tur a ni mai a. Khati lo zawng deuh khan han sawi kan tum ang a.

Demand No. 24 - Health & Family Welfare hi Pu Speaker, tukin zing chanchinbu ka chhiar a, Vanglaini, a front-page ah - Nau pianghlim ZMC ah, taksa inzawm hlawhtling taka an zai thu ka hmu a. Khatiang, India ramah pawh ni lo, sap ramah te an zai thin a ni tih kan hriat, kan ram, kan khawpui ngei maia an zai thei kha kan doctor-te leh hospital tha kan han nei ka hmuh hian ka lung a chhia a, ka hnuk a ulh lek lek a ni.

Ka ngaihtuahna a kalthui khawp mai a, kum 2008 khan Congress kha lo sorkar ta lovin MNF kha la sorkar tlang se, hetiang opportunity hi kan nei dawn lo reng reng a ni. Pu Speaker, kan hria a, Referral Hospital Congress sorkar hmasain a bul a tan kha, kum 10 chhungin ar leh kel vulhna atan chauha hman tlakah kan chhuah a ni. Kum 2008 ah sorkar a lo piang a, Kan Chief Minister zahawm tak Pu Lal Thanhawla leh, Pu Speaker, nangmah ngei health minister i ni a; vision neiin wawiin ni ang hi in hmu thleng a, bul in tan a. Nangmah ngei a hmunah ar in leh kel in te i va phiatfai a, bul in va tan a nih kha. Khatih hun lai khan a sawiseltute, veilam atangin an rawn sawi a, “Aizawl atangin Falkawn saw a hla lutuk; mirethei ten kan thleng pha loving” an ti a ni. Mahse, nangni chuan vision in nei a, wawiinni in thlen a; kel leh ar vulhna kha building tha takah in rawn siam a, mipui tam takin dam nan kan hmang a. Wawiin niah pawh

khawvela an tih tur emaw kan tih kha Aizawl-ah kan tithei a ni. Pu Speaker, ka chhuang khawp mai che, vawiinah hian. Thil dik a ni; vawiina ka sawi hi.

Chu mai a la ni lo; a building atangin bul kan tan a, Medical College kan han nei a, kan kawtkaiyah Mizo nula-tlangval ten phaiah harsa takin doctor ni thei tura zir ngai thin kha, vawiin niah kan nula-tlangval tam tak kumtin an han lut te hi a ropui ka ti a. Heng anih lai hian, party thenkhat ten, ‘kum 30 chhungin sorkar kal tawh ten engmah an ti lo’ an ti te hi chu; Pu Speaker, kan thalaite thudik lo an zirtir hi a pawui ka ti. Vawiin niah Referral Hospital kan sawi, Vanglaini Chanchinbu-a nau pianghlim an zai kan hria te hi thil ropui a ni a, hmasawna tam tak a ni. Chulo pawh chu sawi tur tam tak a awmin ka ring.

Tin, saw hospital saw bul lo tan lovin MNF sorkar hmasain hralh a tum, tihral an tum, kalpui ngaihna an hriatloh te kha lo ti ta ang se chuan, Covid 19 a lo kal khan engtinnghe he sorkar hian a hmachhawn ang le? Falkawn hospital tha tak Congress sorkarin a lo din kha Pu Speaker, awm lo sela chuan, Covid 19-ah khan kan ram chu ‘kan che chhe viau ang’ tih kha ka rawn sawi duh a ni.

Tin, Pu Speaker, Health chungchangah bawka lut ang a. Tukin zingah leh kar hmasa lamah te healthcare chungchang kan sawi a, a that zia ruling member zawng zawngin an rawn sawi a. Vawiin nia ka rawn sawi duh hi chu ‘data’ a ni. Ka data neih hi a dik lo anih chuan, ngaihdam ka dil a, a dik turah ka ngai a ni. October, 2019 leh September Ni 30, 2020 chhung khan healthcare scheme-a inziaklut hi chhungkaw 1,13,720 anni a, 1st October, 2021 - 3rd March, 2022 atana inziaklut chu chhungkaw 87,695 anni. Tunkum kal mek 1st April, 20-22 - 31st March, 20-23 chhunga tana inziaklut chu chhungkaw 39,505 chiah anni, Pu Speaker. Vawiin nia Pu Zoramthanga kaihhruai sorkar, kum li em pawh la sorkar lo hi mipui ten kan rin tawh loh zia he healthcare scheme atang hian a tichiang em em mai a ni. Chhungkua 1,13,720 inziaklut te kha an beidawng tawh a, leiba vaibelchhe 65 chuang, healthcare bill mirethei tak takte an bat sak a, mipui hi an beidawng a ni. He sorkar lakluh ni khan ropui takin *Halleluiahs chorus* nen kan tan a, mahse kan tawp dawn kan han chhuak tur kha, *Jana, Gana, Mana*-a kan han tawp khan a hril thui viauin ka hria.

Tin, Pu Speaker, Champhai lam MLA te kan awm bawka a, hei hi kan Minister zahawm takin nakin a wind-up naah min han hrilh sela - UNICEF atanga hmanhmawh taka ICAR kaltlanga Champhai District Hospital tana RTPCR khawl, October Ni 12, 2021, hei kum khat leh thla 6 a ni tawhin ka hria a (*interruption*)

PU LALRUATKIMA, MINISTER: Pu Speaker, sawi bawrhban tumna a va ang ve; kha kha chu House record-ah awm lo se a va tha ve? National Anthem helai House zahawma han tih kha chu a mawi dawn em maw ni le? Kha kha tihdan phung a ni a, Govt. function-ah chuan.

PU ZODINTLUANGA RALTE : Pu Speaker, ‘Jana, Gana, Mana’ a kan tawp kha ka sawi mai a ni. (**Speaker:** A la dai pel lo e.) In lo *Indian* ve ta hle mai. Ka lawm e.

Kum khat leh thla 6-na a lo ni tawh a, kan Minister zahawm tak Pu TJ-a’n Champhai Hospital atan a han hlan kha ‘tun thlenga la bun fel loh a ni’ tih hi kan hriat dan a ni a, kha kha kan minister zahawmtak khan min rawn hrilhfiat se la. An bun tumna Eye-ward repair phawt a ngai a, a repair-na tur sum k-deposit ah a tang a ni awm e. Kha kha sorkarin han release vat se la. He khawl hi tunah chuan hmanna tur pawh a awm tawh lem lo pawh a ni thei a, mahse a rei tawh em a, ka han sawichhuak a ni. Tin, Champhai - Trauma Centre, Congress sorkarin a bul kan tan kha kum 4 chung hian ‘zawh vat vat atan han ti se la’ ti kha ka han ngen bawk a ni e.

Demand No. 39 - Power & Electric Department hi, Pu Speaker, ka rawn sawi ve ang a. Hun hi a kal chak si a, sawi tur a tam si a. A hmasain P&E Minister leh a Staff te chungah hian lawmthu kei pawhin ka sawi a ngai a.

Thingtlang bialtu kan ni a, thingtlangah transformer te a lo kang ve a, department-ah minister hian a lo hrilh tha anih ka ring a. Kan department official-te ka han phone a, an niin motor te hire-in zankhaw tlaivarin an han kal a. Pu Speaker, hei hi department dangte pawhin hreve se ka duh a, nikhat pawh an cham ngai lo. zingah an rawn thleng a, transformer thar tha tak tak an lo ngaihtuah sak a, an tlan haw leh thin a ni. Zankhat pawh Aizawl-a riah ngai lovin P&E Department te hian thingtlang mite harsatna an sutkian sak thin a ni.

Congress sorkar kha P&E lampangah pawh hian a lo thawk nasa khawp mai a. Khi, Vankal-Solar Park te an han hawng thei dawn tawhin ka hria a, an hawng tawh nge ni, Khawzawl leh Champhai inkara 132 kV line kan han tithleng hi, ‘chhim lam tan hmasawanna ropui tak min thlen a ni’ tih kha ka rawn sawi duh a. Chumi piah lamah chuan, MNF sorkar bawk hi sawi leh a ngai thin a. Congress sorkarin Tuirial-Hydel Project bul an tan a, kan lawm em em a; an han sorkar ve a, kum 10 an sorkar chung khan Tuirial-Hydel Project chu, sum duhna te, sum siam tumna avang tein an hluihlawn der a. Hmanni lawkah chanchinbuah phei chuan tute emaw chu court-in rorelna an chungah a siam nghe nghe a. Khangtiang te kha Pu Speaker, Congress a lo sorkar khan bul tan tha leh in, India ram Prime Minister hawn theih turin Tuirial-Hydel Project kha kan siam tha leh a ni. Hengah te hian sorkar hian thil tam tak a ti a ni. Chutih laiin, ‘engmah an ti lo’ tia, kum 30 chunging engmah ti lo, awm mai mai anga kan inchhuahte hi a diklo a ni.

Demand No. 36 - Environment & Forest Department-ah hian tawitein Pu Speaker, ka rawn lut leh duh a.

Kan Minister zahawm takin min lo chhinchhiah sak sela, react pawh ka beisei lova, a taka min tihhlawhtlin sak mai ka ring a. Thenhlum-ah Forest Deptt. hnuaiia thawkte, hlawh la lovin an awm rei tawh em em mai a. Sawng saw khawngaih takin, miharsa te te, an hlawh pawh a tam lova, sawngte saw min rawn tihfel sak turin ka ngen a. Tin, Mizoram hmun hrang hrangah hmasawna avangin kawngpui laih te a ni a, Champhai lamah pheih chuan tunah an lai nasa a. A detailin ka sawi tawhlo mai ang a, an lung lakna leivungin kan lui te a chhilh nasa em em a, khing te khi ‘uluk taka ven a pawimawh a ni’ tih kha a tawi zawngin ka rawn sawi a.

Pu Speaker, warning bell i rawn hmeh hmain, Demand No. 21 - Higher & Technical chungchang hi kan rawn sawi lawk duh a, chutah chuan tawp kan tum ang e.

Nikum July Ni 9 khan kan Chief Minister zahawm tak hi Kawmzawl Helipad-ah a kal a, July Ni 9, 2022 khan MZU-Southern Campus-a hman tur Engineering College, hei hi ka han sawi pawlh deuh thin a. Engineering College kha tlawh a tum a, kawng chhiat avangin a thleng thei lova, a hmun a thlen theihloh avangin, Kawmzawl atangin hmalak dan turte an thlir ho a ni. Pu Speaker, khatah khan kan Chief Minister zahawm tak khan, tui lakna tur te, power lakluhna tur te Engineer ten ruahmanna an lo siam tawh chu hna tan nghal turin leh, a tul anga pawisa sanction nghal mai turin ruahmanna a siam a; heng hnathawk nghal tur hian PWD, PHE leh P&E Department te pawh khatah khan hriattir nghal anni a. Chumi hnuah Kawmzawl atangin Lunglei - Hnam Run ah, vaibelchhe 11 velin a daih tur thu a sawi avangin, “special assistant fund atanga cheng vaibelchhe 11 hmang turin an sanction nghal” tih kha party - press release ah khan kan hmu a ni. Vawiin niah kan Minister zahawm tak hian min react tura ka duh chu - Chief Minister-in verbal-sanction order a sawi hi H&T Department emaw, Finance Department emaw hian ‘thutlingah a pawm em; an hriatpui em; bawhzui a ni em; engnge tunah a thlen chin; PHE, P&E leh PWD te hian hma an la em;’ tih te hi min rawn hrilhfhiah thei se ka duh a. A chhan chu - he kawng siamna tur hi ‘Hnamrunpui sak chhunzawmna atan MNF sub-headquarter hruaitu ten an hauh nghal’ tih kha kan hriat dan a ni e.

Pu Speaker, hun tha tak min pek avangin, i chungah lawmthu ka sawi e.

SPEAKER : Awle, House rawn che u ka duh a. Nimin khan party hrang hrang hotute’n rawtna an rawn siam kha ka han chhut vang vang khan, tunah kan chawl thei chiah chiah-ah ka ngai a. Mahse memberte thahnem in ngai a, minute 16 velin kan pel ta a ni. Chu chu kan leng lo ta hlak a. Tichuan, kan Minister *Zawhna leh Chhanna*-ah khan a rawn pel thui bawk nen.

Tunah hian 25-na tur, Pu Duha a la awm a; hei hi sawi zo leh lawk law law se, tichuan lungmuangin chawl ta ila, kan vai atan a tha mai em? House ka rawn e. (*House-in a remti a*)

Awle, member zahawm tak Pu Lalduhoma ka sawm e.

PU LALDUHOMA : Pu Speaker, ka lawm e.

Demand No. 27 - District Council & Minority Affairs-ah hian ka lut ang a. Starred Question zawhna ka pe a, chu chu Minister hian min chhang a – “PMJVK atanga sum lo kal atang hian Sports Department-in engzatnge a chan?” tih ka zawt a; min chhanna chu – “2018-19 ah 100%; a vaiin hemi kum chung hian Sports-in an chang zo vek a, 2019-20 ah 80%; 2020-21 ah 100% bawk; 2020-23 ah 44.11% a chang” tih a ni a. PMJVK in *thrust area* a tih chu, “he fund atanga 80% hi Education, Health leh Skilled Development-ah a kal tur a ni” tih a ni. He *thrust area* kalh tawp hian Sports hian a nei fai deuh vek a. 80% a kal phawt ang a, ngaih pawimawhah hian a chuang 20% hi chu midangin an insem tur a ni a. Chumi zingah chuan Sport hi tel ve chauh tur a nih lain, major share mai pawh ni lo, kum 2 ngawt 100% a chang fai vek mai te hi a zia lo hle mai a. SAACI atang te pawhin vaibelchhe 18 lai a chang a ni.

Tin, Pu TBC Lalvenchunga RTI chhannaah hian - 208 crore PMJVK atanga an hmuh tawh thu leh, hman zawh tawh pawh 118 crore a nih thu kan hmu a. Member zahawm tak Pu C. Lalsawivunga zawhna, Sports Minister ngeiin a chhannaah hian - 2021-23 inkarah ringawt project 87, vaibelchhe 123 man an thawk a ni.

Tin, Member zahawm tak Pu Ramthanmawia zawhna, hmanni lawka mi Sports Minister-in a chhannaah khan - tun Sorkar chung PMJVK scheme hnuaia Sports Department-in hna a thawh chu project 84 a ni a, a amount hi vaibelchhe 436 a ni. Hei hi chuan an rawn duan dan hi a kalh nasa a, *induhsakna uchuak* ni deuhin a lang a.

Tichuan District Council & Minority Affairs Department leh NECS hian *Deed of Agreement* an sign a. Tahchuan, an inrawihna rate chu hetiang hi a ni – “NECS in project cost nuai 100 chinah - 2% a ei ang; Nuai 100 atanga 500 inkarah 1.5% a ei ang; Nuai 500 chin chunglamah 1% a ei ang” tih a ni a, a tam duh hle awm e. Sumdawanna hlawk tak chu a nih hmel a ni.

Tin, *Request for Proposal* (RFP) atanga an dawn tur hi nuai 100 chinah 0.4%; nuai 100 - 500 inkarah 0.3%; nuai 500 chin chunglamah 0.2% a ni dawn a. Tin, consultation fee hi fund dawn atangin ni 10 chhungin 100% pek zel tur a ni bawk a ni. An induhsak tha hle a ni. Tin, inhriatthiam lohna *arbitrary* tih lo tul ta se la, ‘Aizawl chhung Court-ah chauh sawi a ni ang’ tih a ni bawk a. A aia court sanga han appeal te pawh kha a rem dawnlo niawm tak a ni. Tin, *Deeds of Agreement*-ah hian thil inziak pakhat chu - ‘hemi chungchang information reng reng, file te, document te hi tunah leh hun lo la awm zel turah ‘*confidential*’ a ni ang’ tih a ni. Pu Speaker, hei hi mipui sum a ni a, a hmanna leh document zawng zawng confidential-a han dah tlat te hi khawi dan

nge maw an hman reng reng le? Heng atangte hian a rinhleh awm sa a, kan sum hrawmna ber PWD ai pawhin an chang tam daih a ni. Chutiang chu thil awmdan a ni a.

Tichuan, heng an inrawihna hian *Public Procurement Act* leh *Rules* kha a kalh a ni. *Single Source Selection*-in an kalpui a, ‘consultancy firm tha dang an awm em’ tih han zawmna pawh a awm reng reng lova. An intihtir chawt mai a. Hetah hian *single source selection*-a a kal dawn chuan, *Dan*-in a sawi dan chu, ‘*extremely urgent* - a urgent hle tur a ni’ tih a ni a. A urgent lem lo a ni ang, an thawk muang em em a, an thawh sen loh an hmu a, kan hria a. Tin, National Security Interest, ram pum security atana pawh a nihin a pek theih bawk a. Tin, exam question paper ang chi, confidential thil a nihin *single source selection* hi a tih theih leh bawk a. Tin, ‘*exceptional circumstances* – loh theih loh thil bik’ a ti a, chu chu natural disaster, emergency te, requisite expertise (midangin an thawh ve thiam miah loh) nei bik an nih chauhin a ni. Tin, chu pawh chu lo ni se, la a procedure kha Works Advisory Committee-in an recommend phawt tur a ni, Single Source Selection a nih dawn hian. Works Advisory Committee-in an recommend phawt ang a, a minister changtuin a approve leh phawt ang; chumi hnuah Finance Minister-in a approve leh ang. Heng approval hi an la a ni chawk ang a, vawiinah hian a changtu Minister leh kan Chief Minister zahawm tak thleng hian hetah hian an inhnawh hian tih loh theih a ni lo. An tel lovin hei hi a tih theih tlat loh a ni.

Tichuan, ‘NECS hi tu ta nge?’ tih hi ka sawi duh a ni. Supreme Court chuan *power of attorney* pek hi a phal tawh lo a ni; a theih tawh loh a ni. Tichuan, kan Sport Minister zahawm tak hian he House chhung ngeiah NECS neitu hi a fapa a ni tih a puang a. Tichuan, a nomination file, inthlanna a kan thehluh thin ‘*dependent*’ ah khan, ‘amaha inngat a ni’ tih hmun eng emaw zatah a ziak bawk a. Tichuan, a fapa ta; a fapa consultancy firm chu agreement an sign pui a, a pa kaihruai department-in chu chu a execute ta a ni. Hei hi chu a fair tawh lo hrim hrim mai a.

GST website kan en leh chuan, he NECS neitu hi kan Minister hi a la ni reng tlat a ni, tunah hian. An pa-fain NECS neitua an inziaklut ve ve a, trade-name a inang chiah a, an address a inang chiah bawk a ni. Tin, Sports Minister hian NECS hming hian GST pawh a la pe char char a ni. A pek hnuhnun ber chu, December, 2020 kha ni. A fapa hian NECS hming tho hian GST a pe a, a pek hnuhnun ber chu, kumin January kha a ni. Chutiang chu a lo ni ta a. Tichuan, consultancy firm 10 bawr vel an hnuaih hian an thawk a. Heng consultancy firm-te hi kan hriat ngai lem loh, lar lo tak tak te, khawiah nge office an neih pawh kan hriat hleihtheih loh te an ni hlawm a. Tin, *empanelled list* kan han en a, a then hi chu kan hmu mang lova, kan lo hmuh hmaih te a nih loh chuan. GST registration an neih leh neih loh pawh hi a rinhleh awm a ni, a then hi chu. An zinga pakhat DJ Consultancy hian Reiek-ah hna an thawk a. Hmanniah tute’n emaw an han endik a, DJ Consultancy ni lovin, ‘NECS vekin a lo thawk a ni’ tih pawh a hmunah han finfiah a ni a. Heng a hnuaih consultancy firm tete te pawh hi tu emaw ta deuh vek, tu emaw control deuh vek an ni hian a lang deuh tlat mai a. Tichuan, proprietorship-in

an kal a, khing hnate khi an lo thawk ta a. Tichuan, Junior Consultancy hi kum 2022, September, 29-ah khan empanelled an ni chauh a, khami hma khan hnathawh te pawh a nei niin a lang a. Kha kha an hminga an thawh si chuan, tunge thawk ta ang? A nih leh, ‘hengho hian GST pawh pe ve lo hian hna eng emaw zat hi an lo thawk teuh tawh mai tihna em ni ang?’ tih te hi ngaihtuah a ngai ta em em mai a ni.

Chuvang chuan, *Representation of Peoples’ Act* hnuaiiah te pawh hian, ‘MLA a nihna atang te hian disqualify theih a ni mai lo ang a’ tih hi sawi theih a ni ta lova. ‘Conflict of interest’ tih te, ‘office of profit’ tih te, ‘breach of oath’ tih te, Minister-a tana lakluh an niha thutiam bawhchhiatna pawh niin a lang ta a. Chuvang chuan, induhsakna pawh hi a uchuak em em mai a. Heihi ‘crony capitalism’ an tih thin ang tluk hial hi niin a lang ta a ni. Chuvang chuan NECS hming, Minister ni chungin a neitu nihna la nei renga, GST pawh pe reng tho bawh si ina chumi consultancy firm chuan contract hna department pakhat nen *deed of agreement* neiin, chu hna chu ama chan department-in a han khawih ta a. Hei tluka thil fel lo hi engnge awm tawh chuang ang? Chuvangin, kan kal soal lutuk deuh hlek lo maw?

Hetiang chiah hian tunhma khan thil thleng a awm tawh a, Pu Lalthanzara (Patea) chungchangah khan; biscuits supply chungchangah khan sawi a awm a, ani chu ama thuin a bang mai a, inthlan leh a nghak mai a ni. Vawiinah hian kan Minister zahawm tak hi moral responsibility lain, ama thuin a bang ve ngam ang em; nge, ‘tute’n emaw dan hmanga an tih kher a nghak dawn?’ tih zawhna a awm ta a ni.

Awle, chumi baka kan sawi leh duh chu Pu Speaker, kan district council-te hi kan *own-tax* atangin an hman tur sum hi pe kan ni a, kan pe tam thei lova. Engatinge *direct funding* an neih hi kan phal mai loh? Kan Village Council leh Local Council-te pawhin direct funding an nei vek a; AMC pawhin direct funding-a nei a; 15th Finance Commission atangin an dawng mai a. Eng nge a pawina? *Direct funding* an neih chuan Finance Commission atangin an hman tur sum a lo kal ang a, min zangkhai zawk dawn a ni a. Keiniin kan budget, kan own-tax atangin tlemte chauh kan pe thei a; an lungawi lova, chutiang chuan an awm a. Chu chu engatinge kan phal loh tlat? Keini ZPM chuan kan phal. Heihi kan tan pawha zangkhaia tur, min relieve tu tur a ni; khami hnua kan pekbelh thei a nih leh an vannei a ni mai a. Chuvang chuan, a pawina hi a awm reng reng lova. Keini Mizoram pawhin direct-in kan dawng a, direct-in dawng lo ila kan duh dawn bik em ni? Chuvang chuan, direct funding te hian kan insawithaih a; thil awmzia kan hriat loh vang niin ka hria a.

Tin, *Recruitment Rules* te pawh an la nei lova. Recruitment Rules a awmlah na na na chuan, a sorkar apiang khan midang an ban a, a thar an la leh vak a. **(Pu C. Ngunlianchunga:** Pu Speaker, District Council-in fel takin a nei. Hna lak dan tur leh inenkawl dan tur; khang kha chu a nei vek. Hriatsual palh a ni.) CADC-ah chuan a nei lovin ka hria. **(Pu BD Chakma:** CADC-ah chuan a awm lo; Governor pawhin chiang

takin a ziak a.) CADC-ah chuan RR a la nei lova. Chumi avang chuan eng eng emaw harsatna an tawk ta a, Governor-in *suspend*-in a dah a ni. *Dan* a awm loh miau chuan kha kha tih duh mai awl tak a ni a.

Chutiang chu an dinhmun a nih avangin, kan enfel sak hi a tha a. Tha taka an mahni area-a zalen taka an awm a, helaia sorkar apiang tlawn ngaia kan siam leh, inleh tir ngai reng, *stability* awm lova kan Autonomous District Council area kan siam hi a dik ka ti lova. Zalen takin awm rawh se. ‘Tha takin an sum te pawh dawng ve rawh se’ tiin ka duhsakna ka hlan bawk a ni. Ka lawm e.

SPEAKER : Awle, kan chawl ang a. Dar engzatah nge kan luh leh ang le? Darkar chanveah kan inkhung leng thei ang em? Dar 5:45 PM -ah i lut leh ang u aw. Tichuan, chaw eitur kha Banquet Hall, Annexe Building-ah siam a ni e. I chawl lawk ang aw. Dar 5:50 PM-ah kan lut leh dawn ania.

(Recess at 5:17 PM)

5:50 PM

SPEAKER : Quorum an la form lova, ilo nghak ang. Minister an lo lut a, Member te quorum an la form lova, ilo nghak ang aw.

Awle, tunah chuan quorum kan tling tawh a, kan lo tan tawh ang a. Kan Minister zahawm tak Pu TJ Lalnuntluanga kan sawihona te wind-up turin kan sawm ang a, sawifiah ngai a tih te rawn sawifiahin, a demand te House-ah pass rawn dil nghal turin ka sawm e.

PU TJ. LALNUNTLUANGA, MINISTER: Pu Speaker, ka lawm e.

Hei, vawiinah demand tha takin kan sawiho a, kan deptt. demand te pawh kan MLA zahawm tak tak ten min rawn sawipui hlawm a, ka lawm khawp mai a. Hei, department 4 han khaikhawm tur te a ni a, hmalakna han thlir hian sawitur hi a lo awm deuh nual tawh mai a. Amaherawhchu, heng hmalakna zawng zawng hi han sawi dawn vek ila hun a rei viau dawn bawk si a, kan deptt. officer hrang hrangte ina mahni deptt. theuhin a hma an han laka kan thawhhona a that avanga hma an han lakna te han sawiloh chu ka ui viau mai a. Chutihruah chuan vawiinah helaia kan hun neih dan te enin, sawi vek lo ila, a pawimawh leh kan hmalakna thenkhat te han tarlang dawn ila.

A hmasaa ka sawi duh chu, kan officer te, kan deptt. hrang hrang - Law & Judicial; Parliamentary Affairs; Environment & Climate Change leh Transport Deptt. tea thawktute zawng zawng chungah lawmthu ka sawi a ni.

Law & Judicial Deptt-ah hian mi 5 in an sawi a, mimal mala react loh mai tha ka ti a, kan memberte khan lawmpuina te, advise te an rawn sawi hlawm a ni a. Kan officer ten an lo chhinchhiah tho avangin, a zualpui helaia kan sawi tlanglawnah hian rawn tel turah ngai tho ila a tha awm e.

Law & Judicial Deptt. hian Secretariat leh Directorate function te an kawp a, heng hnuaiah hian Mizoram State Law Commission te, Registrar General and Marriages te, Advocate General Office te, Fast track Special Code te, Public Prosecutor Office te leh Supreme Court Council Office te kan enkawl a. Helaiah hian kan office hrang hrangte hnathawh theihna tur hian sorkarin theihtawp a chhuah a, Court lamah pawh hian kan sorkar ukil tha tak tak te an awm a. Case-ah te pawh tunah hian tunhma aiin chakna kan nei tam tawh a, case chakna te pawh a neih tam tawh thu te report kan dawng a. Tin, a bik takin *Prevention of Corruption Act* ah pawh kan sorkar ukilte an tha khawp mai a, chakna percentage pawh a sang tawh viau a ni. Chutihruah chuan decision siamtu chu, kan hriat theuh angin a Court zawk a ni a, khang kha chu tumah va inrawlh theihlohna hmun kha a ni ve thung a ni. Tin, hetih rual hian Law Deptt. hi *Dan* chungchangah enforcement agency anga ngaiin, heng kuhva tawlh te thlenga hma la tura ngaih te pawh hi a awm thei awm e. Tin, Prosecution Directorate chungchang din theih turte a awm thei awm e. Amaherawhchu, khang kha keini lam chan ni lovin Home Deptt. lam chan a ni.

Tin, Guwahati High Court-a Registrar, Joint Registrar leh Dy. Registrar te hi helaia service chungchangah han sawilang leh lawk ila.

Mizoram Judicial Service ah rinluh an ni a. Tin, Champhai Judicial District-a District and Session Judge leh Addl. District and Session Judge te hi Mizoram Judicial Service-a rinluh an ni bawk a ni. Kolasib hmunah Fast track Code building tur 20.9.2022 khan sak tan a ni a, tluang taka sak zawh anih chuan, March-April, 2023 ah hian sak zawh kan beisei a ni.

Tin, Infrastructure lamah vek, Champhai Vengsang-ah Champhai District Court thar sa tura hmalak a ni a. Kan hriat tlan tawh angin Champhai-ah hian Judicial District hawn thar a ni a, full-fledged District Judge a awm tawh a, hei hi tun term chhunga kan tih thar a ni. Tin, infrastructure chungchangah hian district dang dangah hmasawn turin hmalak mek a ni a, district tam zawkah chuan kan han sa chho mek a ni a. Tunah hian district tharah te pawh a hmun turte kan enkual a, kan Central Ministry te pawh fund kum danga kan hmuh aia tam hmu thei turin kan dil a. Hmanni ah Kavadia, Gujarat-ah meeting kan nei a, chutah chuan Law Minister-te, kan Secretary-te, khangtiang khan Central Ministry kan dawr a, anni pawhin kum dang aia fund rawn dah tam tura rawn inbuatsaihin tawngkam tha min rawn hmuh a; Court hmun tur kan nei anih chuan hma chak taka lak kan tum a ni. Tuna district kan neih tharah te pawh hian District Court hmun tur kan hmuh hunah hetiang hian hma lak chhoh kan tum bawk a ni.

Tin, Lunglei District Court chungchangah hian, Lunglei hi kan hriat tlan angin khaw-upa tawh leh lo inbengbel tawh a ni a, chumi avang chuan hmun hi a har tawh em em mai a; District Court hmun tur hi a vang deuh tawh bawk nen Trade & Commerce building thenawm lawka ram kan dil a, Cabinet pawhin hei hi min pawmpui tawh a ni. Chutih rual erawh chuan Trade & Commerce te nena sawifel ngai ala awm avangin, joint-meeting Trade & Commerce minister zahawmtak Pu Thangtea hovin meeting leh turin kan in buatsaih mek a ni. District Court, Aizawl building tur Mizoram Capital Complex - MINECO ah cheng nuai 2,080 senga sak kha December Ni 16, 2022 khan hawn a ni a, tunah luah mek a ni. Tin, High Court building thar tur hi Mizoram New Capital Complex - MINECO ah sak mek a ni bawk a, Civil works leh Structural works te zawhfel a ni tawh a, hun reiloteah hawn theih tura beisei a ni.

The Mizoram Court hi Vol. 11 published a ni tawh a, he lehkhawh hian rules te, ordinance te, regulation te, notification te kum 1994-1995 thlenga Mizoram sorkarin a lo chhuah tawh te a awm a ni. Mizoram State Legal Service Authority awm atanga a vawikhatna atan, *Mizoram Victims of Crime Compensation Scheme, 2011* hnuaiiah crime-victim te tan Mizoram sorkarin corpus fund crore 1 min dah sak a, sum indaihlo chungah kan Finance Minister leh kan Chief Minister zahawm takin min ngaihpaawimawh avangin, victim ten hei hi an tangkaipui ngei kan beisei a ni. Kha kha Law Department ka han khaikhawm theih dan ni se la.

Environment, Forests & Climate Change Department-ah hian han lut leh ta ila Pu Speaker. Helai sawihonaah khan member zahawm tak tak mi 26 ten Forest Deptt. hming lamin an rawn sawi a. Hetah hian advice-te a awm a, tin, react ngai point 2-1 awm kha chu nakinah ka rawn react ang a. Amaherawhchu a tam zawk kha chu *advice* leh, hmasawna kan lo kalpui tawha *lawmpuina* te kha a ni bawk a, khang kha chu ngailo turah ngai ila.

Kan hriat tlan theuh angin Mizoram-ah hian ramngaw leh kan thing leh maut te kan climate avanga humhalh turin theihtawp chhuah a ni a. Helaiah hian kum 1995-ah Forests Department hmalak theihna turin *Mizoram Forests Act* te a lo awm tawh a. Chu chu a tirin '*Lushai Act*' a ni a, tunah hian khami Dan hmang khan Forests Deptt. ram te enkawla humhalh a ni a. Chu mai ni lovin, kha Dan zulzui khan notification te chhuahin, kan luidungte humhalhna leh a bik takin lui 16 humhalhna te bakah kawng humhalhna te a awm a. Kha kha Central Act-ah, *Forests Conservation Act, 1980* in a rawn khung ve leh a. Chutiang chuan theihtawpin Forests Department hian Dan tlawhchhan hmangin ram leh forests humhalhna te, kan boruak inthlakthleng venna chungchangah te hna an lo thawk tawh thin a. Hetah hian tlawmngai-pawl NGO hrang hrangte nen thawk hovin nasa takin theihtawp an lo chhuah a, hma pawh kan sawnin ka hria a. Hetih laia kan sawi tel duh chu – 'kan hlawhtling a ni' tih leh, 'mipuiiah awareness pawh a tha chho tan a ni' tih fiamthua kan sawi thin a awm a. A taka thawktute zawk Forests Department te pawh hian forests activities telna tura ngaiha an dukhawp lohna leh an

mit han tlinlohna te kan lo nei hial tawh zawk te pawh hian, Forests Department ina hma kan lak thatna leh awareness kan neih thatna a tilangin ka hria a. Chungte chu thuhmaah kan sawi a ni.

Tin, helaiiah hian kan hmalaknaah hian central atanga fund lo kal hi kan inngahna a ni deuh ber a. *Green India Mission* leh *National Afforestation Programme* te kan kalpui a. National Afforestation Programme hnuaiah te, GIM hnuaiah te hian kan forest ram humhalhna bakah kan tuihna humhalhna thlengin kalpui a ni a. National Afforestation Programme hnuaiah hian *Village Forests Development Committee* leh *Eco-Development Committee* te pawh khaw 600-ah din a lo ni tawh a ni a. Tin, Green India Mission hi Forests Division 5, a district ang zawng chuan 4 ah neih a ni a. Amaherawhchu, hei hi kan hmalakna pui leh lian, thingphun chungchangah te, nursery thlengin a ni a, churang chuan, ‘hei hi tih len a ngai a ni’ kan ti a; tihlen mai bakah kan kal dan phung pawh hi tihdanglam a ngai, mipui tena an rawn hnek hnaihna tur leh, mipuite nena kan thawhho theihna tur - *people participation* a tam theihna turin kan kalpui dana pawh hi thlak hret hret a ngai a ni.

Tin, Forests Department ina kan thingphunte pawh a chang chuan a lo tlo deuh a, ‘YMA flag te emaw kan han dah hian a lo tlo deuh a ni’ kan tih te pawh hi, mipuite nena kan inhnek hnaihnaah hian ‘hmasawn ngai kan la nei a nih hi’ tih ngaihtuahna kan nei a. Chumi avang chuan tunah hian kan economy lam hawi thei tur - *Agro-forestry* lam kan kalpui dawn a, chutah chuan central ministry-ah kan thlen a. Kan thu thlena chu forest ina chutiang lama hma kan lak theihna tur scheme a kha *Green India Mission* kha a ni a. Chu *Green India Mission* chuan division 5 chauh a huap si a, ‘Zoram pum bakah District Council te thlenga huap turin’ tiin central-ah kan dil a, tunah hian central lampang pawhin a thuphungin min pawmpui tawh a. Hei hi kan hlawhtling anih chuan mimal huan nei - farmers hote, kuthnathawktute an huanah thlai puitling nghet nei thei turin hetah hian tan lakpui kan tum a. Chutiang chuan mipuite an eizawna -economy sawi-danglam thei turin he agro-forestry hi tuna kan tum lian ber te zinga mi a ni.

Pu Speaker, a dawt leha kan sawi duh chu - khawpui chhungah hian khawpui thang zelah mipui hmasawna avangin khawpui eizawna te a lo awlsam zel a, thingtlang atang te pawhin kan pan khawm zel a, mipui kan tam avangin khawpui chhungah boruak tha hip tur hi Forests Department chuan a ngaihtuah pui tak pakhat a ni bawk a. Chumiah chuan *Nagarvan Scheme* - central project hmang tangkaiin tunah hian Aizawl leh Champhai-ah bul kan tan a, central atangin fund pawh an rawn pe tawh a, chu chu tunah hian thawh mek a ni a. Tin, hemi bakah hian town area - *notified town* thlengin central-in min rawn phalsak a. A tirah chuan he Nagarvan Project hi municipal Area-ah chauh tih tur a ni a; Mizoram-ah chuan Municipal Area pakhat chauh kan nei a kan ti a; Lunglei kan neih hma kha a ni a. Chu chu central-a kan thlen avangin leh, khami kan sawi te an lo ngaihpawimawh avangin *notified town* thlenga kalpui min

phalsak a. Chumia khaw 14 te tan tunah hian he Nagravan Scheme, khawpui chhunga boruak tha hipna tur, thing leh maute humhalhna tur hi kan kalpui chho mek a ni.

Tin, a dawt lehah chuan, Pu Speaker, Mizoram zahve hi kan ramri a ni a, a aia tam zawk pawh a ni mai thei e, ramria awm kual kan ni a. Chuvang chuan, ramsa chungchangah pawh dan lova sumdawna a tam em em mai a. 'Exotic animals' kan tih ho hi an man a, court lamin sahuana dah tur te in an han ti thin a. Chutih lai chuan sahuana lamin inkhuahkhirhna dan a lo nei a, sahuana hian wild animals te hi a lo dah nghal ngawt theih loh a; kan hotute'n remchang an han siam mai thin zawk pawh a, harsatna kan tawh fo a ni. Chumi chhawk-zangkhai thei turin leh khang illegal trade chungchanga kan control theihloh thil a awm avangin Aizawl Zoo - Satellite Rescue Centre hi Champhai – 'an manna hmunpui leh boundary hnaihah hian dah ila' kan ti a, tunah hian vaibelchhe tel siamin project central-ah kan thehluh tawh a. Hei hi central lampanga Minster leh Secretary rualte pawhin an ngaihpawimawh thu min lo hrilh tawh bawh a, beiseina sang tak kan nei bawh a. Hemi a nih chuan, ramsa dan lova lo lut te lo chhanchhuahna hmun leh, lo dah-lailawkna tur kha kan nei dawn a ni.

Tin, heng bakah hian ramriah forest reserve area, India ram chhung rau rau ah ram buai kan hre thin a. chutiang lo pawh heng ramsa tuna kan sawi ang chi, dan lova tawh te protection nei thei turin 'protection squad' te pawh hi central-in a bikin minrawn tihsak turin kan dil bawh a, hengte pawh hi an ngaihpawimawh thu min lo hrilh bawh a ni. Heng hi tuna hma kan lak len lai tak mai a ni a, kan sawilang tel a ni.

Tin, a dawt lehah chuan, Mizoram hi khua a thalin a thal na em em mai a, ram kang a nasa a; chutihual chuan ram kang venna chungchangah hian nichina kan sawi tawh angin fund kan hmuh ho hi (central atanga hmuh a ni bawh thin si a) a bei tham em em thin a; Zoram pum tan nuai 100 tha awrh chauh hi a ni thin a. Hengte hi a aia tam zawk leh awmze nei zawka kan thawh theihna turin leh, awareness te kan tihthat theihna turin kan dil a, central lamin project te siam turin min ti a. A bik takin tunah hian nikum lampang record-a ram kang tamna hmun - Champhai leh Lawngtlai District-ah hian vaibelchhe 20 ve ve kum 5 chhunga hman tur Ministry-ah kan thehluh a, beiseina sang tak kan nei a, hetiang a nih chuan awareness tha tak te kan nei thei dawn a ni. Tin, hetiang hi hmundang atan pawh kan siam bawh a ni.

Tin, a dawt leha ka sawi leh duh chu - Mizoram-ah hian 'Wetland' kan tih hi Tam Dil leh Pala Dil-ah kan nei a, chutah chuan development te kan han kalpui a. Palak Wetland te phei chu 'Ramsar Site' an ti a, Wetland pangngai aia dinhmun sang zawk leh development chungchangah pawh fund keng tam thei zawk a ni a. Chu chu central-in *Ramsar Site*-ah minrawn puansak tawh a. Heta tang hian henglai a chheh vel ho eizawna tur petty-shop tur chungchang te, kut-hnathawka eizawngte puihna tur te, tin, pressure cooker semna tur te, an nitin nuna pawimawh, an livelihood improvement tur te helaiah hian a tel a. Nikum kan Session inkarah khan eng emaw zat hengah hian sem

a ni a, a catchment area kuate tan heng tanpuina hi kan pe a ni. Tin, heng khua ten kan hmun pawimawh te tha taka an lo ven avangin leh, min support avangin vawiinah hian lawmthu ka sawi tel nghal a ni.

Tin, a dawt leha ka sawi leh duh chu - zirlaite, naupangte rilruah ramngaw thing leh mau te, thlai leh pangpar, nungcha tinrengte Pathian siam ho hi ngaihhlutna leh, a tangkai zia an hriat theihna tura inzirtirna tur atan scheme pakhat '*School Nursery Yajona*' chu school hrang hrangah kalpui a ni a, tunah hian school 50-ah kan kalpui mek a ni. Heng hi a lo hlawhtling chho a nih chuan, naupang rawn thanglian tur ten nungcha, thing leh mau hmangaihna chungchangah hma an rawn sawn phah kan ring a, kan ram pawhin hma a sawn phah kan ring a ni.

Tin, a dawt leha ka sawi leh duh chu - Forest ram theihtawp chhuaha kan lo enkawl thinah hian ram mipuite hmasawinna te, sorkar hmasawinna te, mimal hmasawinna te avangin khang ang kha sut-chhiat a ngai thin a, chutiangah chuan *clearance* lak te a ngai thin a; helaiah pawh hian inzirtirna kan neih tam a ngai khawp mai a. Forest Deptt. lam atanga ngaihtuahnaah chuan, hmalak hma hian Deptt. hrang hrangte emaw, mimal emaw te hmalakna tura clearance la tur hian inzirtir tha ila, a hnuah buai leh tawh hnuah hi chuan thil a lo kal thui leh tawh thin a. Chuvang chuan, 'a tirah hian lak hma theih ni se' tiin kan han inzirtir thin a, heng pawh hi hma kan sawn chho zel turah kan ngai a. Chutihruah erawh chuan, Central Ministry-ah pawh *clearance*, mipuite mamawh hmasawinna ruhrel rawn kalna turah pawh *clearance* dil hi tichak tur pawhin kan nawr bawh la ni. Tin, heng chungchangah pawh hian nichina thu bul lama ka sawi ang deuh khan theihtawp lo chhuahtute hi, thawk lutuk lova lo ngaih palhna te pawh la thleng thei a ni. Amaherawhchu, kha kha *awareness* kan neih that avanga hlawhtlinna lo lanna niin a lang bawh si a. Theihtawp chhuahin dan bawhchhiate hnenah action lain notice te kan pe a, a then phe chu *stay order* te kan pe a. Hmun thenkhata an hotu thenkhat te phe chuan 'Forest Deptt. hian hma in la nasa lutuk deuh a ni; tha lo thlahdul thei deuh ula' tih te pawh an rawn sawi hial zawk a. Engpawh ni sela, 'deptt-in theihtawp kan chhuah a ni' tih kha ka sawilang ni sela.

Tin, Forest clearance chungchangah hian, khatianga clearance fee tlingkhawm kha CAMPA scheme-ah a lut ve leh a; khang kha ramngaw te lo that zel theihna tur te leh ramngaw siam thar lehna tur te atan khan hman leh a ni a, mipui nawlpuite lo inhlahwna tura tan pawh heng hi hman thin a ni.

Pu Speaker, project pakhat, '*Mizoram Bio-diversity and Forest Enrichment Project*' kan buatsaih a, chu chu JICA - rolling plan hnuah dil a ni a, kar hmasa khan JICA hotute pawh helai kan Session laiin an lo kal a, Session chhuahsan lawkin meeting te pawh kan zuk neihpui a, office lamah. Kumin February thla laihawl (tun thla chung) hian inbuatsaihna/zirchianna an rawn nei dawn a ni. A tira he kan project dilna kan theluha hi crore 527.68 a ni a, hei hi a hlawhtlin hunah kum 8 chhung hman tur a ni a.

Hetah hian kan ram leilunga thing leh mau chereu tur humhimna tur te, lo awm tawhsa tuaihnumna tur te, kan luidung humhalh te, catchment area treatment plan siama tuihna kang mekte humna tur *rejuvenate* lam te a huam a ni. Tin, mau sawngbawlina (bamboo processing) pawh kalpui tur a ni a, hemi atan hian Bamboo Centre te dina khawl tunlai ber chi ‘*State of the Art Machinery*’ bun tum a ni a, a thawktu te awmna tur quarter zawng zawngte pawh hei hian a keng tel vek a ni. Tin, research te neia, chuta tana FRC-BR nena thawhho tum a ni bawk a ni.

Tin, a dawt lehah chuan Pu Speaker, boruak tha hralh - Carbon Trading Project, hei hi Mizoram tana thil thar a ni a, department hian kalpui a tum mek a, chuchu Zoram leh a ram mipuite tan chhenfak awm tak tura duan a ni a, thu neitute lam nen inbiakna a kal chho mek a. Hemi a nih hi chuan kan ramin revenue tam tak kan chawlut thei dawn a, kan ram hmasawna ruhrel pawimawh takah a chang thei dawn a ni.

Tin, a dawt lehah chuan, Aizawl Zoo chungchang han sawilan leh lawk ka duh a. Kan sahanah hian naupang school chawlte, puitling thleng pawhin ramsa ngainatute an awm a, chungte anih avang chuan zoo hi tihchangtlun chhoh zel a ni a, tunah hian kan exotic animal te leh, tuna awm tawh sa te pawh hmuh tham a awm tawh a. Tin, kan sahanah khuan ramsa dahna (enclosure) te pawh tunah hian kan siam belh bawk a. Tin, kan hriat tlan tawh angin sakei – Mizote’n sapuia kan neih pakhat kan dah a, khu khu tunah hian dah belh leh kan tum a; Bhubaneswar, Orissa atangin sakei pahnih laklul belh turin tunah hian kan inbe fel tawh bawk a ni. Tin, Aizawl Zoo alo hlut belh zelna turin entute tan pawha nuam zawka a awm theihna turin project dang kan siam bawk a ni.

Tin Pu Speaker, helaiiah hian ka sawilan leh duh chu - nikum lama ram kang avanga nunna chan Pi Khupsiamsang chu victim compensation (ex-gratia) cheng nuai hnih, ni 27.10.2022 khan a pasal Suannghaidin hnenah hlan a ni. Tin, Kepran khuaa in kanga kang hlum Pu K. Zamawia pawh, Ni 1.10.2022 khan a fapa K. Lalbiakhluna hnenah sum hi kan hlan bawk a ni. Tin, Lawngtlai ‘W’ bialtu zawhna a chhanna pakhat zawk chu - Pi Hnianshniangi, Hmunnuam khua, Ngengpui Sanctuary a Sai in a chil hlum chungchangah “ex-gratia te a hmu ve thei dawn tawh em, engnge a chanchin?” tih kha, Hnianshniangi kha sanctuary chhungah Sai nena an intawhsualna hmun kha sanctuary chhung a lo ni si a; ex-gratia han pe tur khan a lo harsa a. Ngun takin kan ngaihtuah a, department lampang pawh a lu a hai em em mai a. *Dan* lamah a rem silova, churang chuan, ‘*State Board for Wildlife* ah ngaihtuah turin thawn chho mai ang’ kan ti a. Hei hi Pu Lalthawmliana, kan EM (LADC) pawhin a rawn sawipui nasa thin a. Hetah hian ngaihtuah nawn leh phawt ila; thu thui a sawi ngam lova. Helaiiah ‘*State Board for Wildlife* atangin ngaihdan siam leh phawt a ngai a ni’ tih kha kan in chhanna ni se. Chutihruah chuan helaiiah kan sawilan leh duh chu - Pi Hnianshniangi pasal Pu Ropuia kha wildlife guard ah hna pek a ni a, hei hi hna nghet chu a ni hauh lo na a, amarawhchu, scheme awm chhunga awm tur chi a ni.

Chutihrual chuan zawhna pakhat – ‘20% personal branch atanga lak’ tih kha ka bo khawp mai a; amaherawhchu, nikum lama mi zawttu ngai bawk kha mi zawttu a ni bawk si a. Hei hi ‘kan hre lo reng reng’ tih hi ka chhanna ni teh se; ‘Forest Department-a 20% beisei’ tih kha kan hre lo a ni.

Tichuan, Mizoram Pollution Control Board chungchang kha - Mizoram Pollution Control Board hi boruak bawlhhlawh endik, tui bawlhhlawh endik, industrial pollution control, damdawi-in enfel, plastic waste management, motor khu test leh *Dan-in* a beisei anga pollution hrang hrang endikna hna kalpui reng a ni a. Hna chak zawka kalpui anih theihna turin tunah hian Laboratory tha zawk, khawl tha zawk nei turin hma kan la mek a. Tin, helaiah hian kan luikawrte a thianghlim leh thianghlim loh te pawh en a ni a, a thawktute taimak chhuahna kawngah an fakawm hle a ni.

A tawp lam atan chuan *Forest Research Centre for Bamboo and Ratan* hi Bethlehem Veng-ah khuan kan nei a, mau lam kaihhnawih te zirchianna niin, thawktute’n kan rama maute zirchiangin a hman theih dan te research an nei thin a ni. He centre hi hman-tangkai a nih lehzualna turin leh tihchangtlun dan tur ngaihtuah a ni a, tuna centre hi institute a hlangkai turin tunah hian kan thlen a, anni pawhin an lo ngaihtuah zui tura an tih avangin beiseina sang tak min neih tir a. Tin, exam centre pawh, khulaiah khuan Zofate kan luh tam ve theihna turin central sorkarah kan dil mek bawk a, hei pawh hi ‘beiseina sang tak kan nei a ni’ tih kha Forest Department lam atanga kan sawi theih ni sela.

A dawt lehah chuan Pu Speaker, Transport Department hi - He department hnuaiah hian hmalakna a nasa khawp mai a, nichin khan kan sawi kim vek seng lova, a tlangpui ka han sawi leh ang a.

Transport Department-ah hian MST bus te a lo upat tawh hlawm avangin eng emawzat lei thar a ni a. A hnuaiah hian Zofate inpumkhatna, he MNF ministry leh Zoram mipui leh NGO hrang hrangte pawhin kan ngaih pawimawh - hnam inpumkhatna bus service tir turin kan sorkar tantirh atangin hma kan la nghal a. Amaherawhchu, thil hi a lo tluang lo khawp mai a, kan thenawm state te an lo fimkhur a. Tunah pawh hian hlawhtling nghal mai tura kan ngaih Manipur lampang pawhin rawtna dang te an rawn nei leh a. Chutihrual chuan Manipur chungchangah agreement sign theih mai turin kan inbuatsaih a, Manipur sorkarin ‘keimahni atang pawhin rawn tih ve kan duh e’ an ti a; reciprocal agreement sign turin tunah hian bus te pawh kan lei ve a, bus in service tawn turin thu thar kan nei ta a, tunah hian ‘beiseina sang tak kan nei a ni’ kha ka han report duh a. Tin, tunah hian Zampui-tlangdunga kan unaute tlawhpawh turin Phuldungsei thlengin bus hi tlantir tan tawh a ni. Tin, MST bus ticket chungchangah Pu Speaker, MST bus hi thui tak tak intlara lak te a ni thin a, tunah hian mipuite tana awlsamna anih theih nan *online booking* ti thei turin hmalak mek a ni a, kan la zo lo hret a ni.

Tin, motor chhiah chungchangah *lifetime tax* motor lei thar tena motor man a percent sang tak mai, kum 15 tan vawikhata pek tur kha a harsat deuh avangin, lifetime tax kha ti danglam a ni. Pu Speaker, Transport department hi *Motor Vehicle Wing* leh *MST Wing*-a thenhran a ni a, MST wing audit velah department hi hloh angin kan lang nasa a, department lam pawh hian hreawm kan ti thin a. Chu chu ‘engtin nge a chhawk zang khai theihna tur’ tiin kan han zawng a. Kan officer-te nen theihtawp kan chhuah hnuah; MST lama hlawh la, MST lama thawk ni si lo te kha an lo awm nual a, chuvang chuan ‘kan pay head siam rem a ngai a ni’ tiin tunah hian kan siam rem tawh a. Audit leh hunah chuan kan loss percent sang tak pawh kha a hniam kan ring viau tawh a. Hei hi hmasawna thar a ni a, Transport Department chu kan lawm khawp a ni.

Pu Speaker, tun financial year kal lai mekah hian Transport Department tana revenue target min tuk sak hi cheng nuai 4,059.21 a ni a. Kum 2022, November thleng khan cheng nuai 2,738.15 hmuh tawh a ni. Tuna a lan danah chuan, target hi khumin cheng nuai 4,070 chuang hmu theih kan inbeisei a ni.

Nichina kan sawi deuh nual tawh - Inland-water transport chungchangah hian tawi tea han sawi lan leh ka duh a. Kan hmalakna hrang hrang - Tlawng te, Chhim-tuipui te, Khawthlangtuipui te a ni a. A bik takin Khawthlang-tuipui chungchangah hian, tunah hian e-tender chhuah tawh a ni. A hma khan kan lo chhuah tawh a, mahse kha kha central lam thlirna (criteria) ah a tling lo deuh a. Central ministry te nen insiam remin tender hi chhuah thar leh a ni a, e-tender (open-tender) hi Ni 16.2.2023 khan kan chhuah thar leh a ni.

Tin, social and environment impact assessment pawh helaiah hian tha taka neih a ni a. Member zahawm tak Pu Nihar-a khan a zawt a. Tlabung leh a chheh vel khaw hrang hrangte social impact chungchang kan sawipui a, anni pawhin tha an ti a, chutiang chuan hmalak a ni a. Tin, environment impact assessment chungchangah pawh environment clearance leh forest clearance pawh kan kalpui mek a, hetah hian stage 1 approval kan hmu tawh a. Hei hi a bik taka kan han ngaih pawimawhna chhan chu - kan hriat theuh angin Silchar ramri kan chaw laknaah harsatna kan tawk thin a ni. Kumtin, hriat lawk si loh hian buaina a chhuak thut thut a, lirnging nen ka tehkhin thin a. Kan economic route dan-chahin a awm thin a, chuvang chuan, ‘Bangaldesh kawtchhuah lam hi hawi tel a ngai a ni’ tih hriain hma kan la chak zual a, kan nghahhlelhna pawh a ti zual a, Khawthlang-tuipui hi hlawhtling turin theihtawp kan chhuah chhunzawm dawn a ni. Tin, kan sawihonaah khan water-ways chung chang hi memberte’n an rawn nual tawh avangin, khati chinah khan duh tawk phawt ila.

Tin, e-Challan system chungchang han sawi tel leh lawk ka duh a. Ni 3.10.2023 tanga hman tan theihin e-challan application hi kan nei tawh a. Lirthei khalhtuten dan an bawhchhiata an lo man khan, kha system-ah khan an block nghal a ni. Chu chu a neitute a hnuaa buai zui ngei ngeina tur a ni a, e-challan system hian enforcement duty

te kut nasa takin a ti chak dawn a ni. Tin, bank loan hmanga lir thei lei ten bank NOC hmanga DTO office-ah *data base* - 'loan hmanga lei a ni' an tih kha, paih tir ngei kha a ngai thin a. Hei hi mipuite tana a awlsam zawk nan leh, mahnia buai pui zui ngai lovin loan hmanga lirthei lei te chu loan rulh zawh rualin automatic data base-ah a inpaih nghal zel tawh tura siam a ni. Lir thei zuar ten awlsam zawk a trade certificate an lak chhuah tawh theihna turin April 25, 2022 atang khan online trade certificate system hman tan a ni a, online faceless learner license chu November 1, 2022 khan hman tan a ni tawh bawk a. Tin, Aadhar authentication hmanga lir thei leh driving license service chi hrang hrang 58, hming thlak te, driver license thlalak thlak te, renew duplicate, transfer of permit chu kalpui turin testing chu kalpui mek niin tuna tang rei vak loah chuan hman theih tura beisei a ni.

Pu Speaker, thil thar pakhat leh transport department chuan online cab booking system kalpui turin hma a la mek a, tih hlawhtlin a nih hunah chuan lir thei hman tu ten rate dikz awkin public transport, taxi leh a dangte pawh kan hire thei tawh dawn a. He online cab booking system hi uber leh ola te ang a kalpui tur kha a ni.

Pu Speaker, vawiina ka'n sawi lan leh duh chu taxi, two wheeler taxi te leh commercial vehicle dang te replacement chungchangah hian kan lo kalpui tawh dan chhawm chhoh chngchangah kan Chief Minister zahawm tak advice angin ennawn leh mek a ni a. hemi-ah hian commercial vehicle leh mi dang dang eizawna neite tana hmasawna awm turin tunah hian kan inbuatsaih mek a ni.

Pu Speaker, special permit chngchangah zan lamah commercial vehicle te district dang leh state pawna ah te an kal dawnin office tanga special permit lak ngai thin tunah hian online special permit ti thei turin kan kalpui tawh a. Hei pawh hi commercial vehicle nei te tan kan awlsam phah kan ring bawk a ni.

Zirlai awm tamna leh MZU-ah regular taka City bus tlan theihna turin Aizawl city bus owner Association te nen ruahmanna siamin tunah hian tlan tan tir tawh a ni a. Kan damdawi in pawimawh ZMC-ah pawh city bus te nen insiam remin tunah hian service tir a ni tawh bawk a. Kan hmun pawimawh Aizawl Municipal area ni si lo Lengpui-ah taxi leh two wheeler taxi te tan pick up leh drop te a remchang thin lo a. Tunah chuan special permit lak kher ngai loin passenger drop leh pick up te kha kan phalsak tawh a. Chutih rual erawh chuan khunglai stand-ah passenger te la tur a din erawh phalsak a la ni lo thung a ni.

Lir thei neitute tana a sam khai zawkna turin district tinah tunlaia kan mamawh leh test-na lar tak pollution test-na, pollution analyzer hi dah vek tawh a ni a. District thar pathumah pawh dah tura tunah hian hma lak mek a ni.

Transport department chhungah IOC hnuaiiah consumer petrol pump kan nei thin a, tunah chuan revenue tam zawk lalut thei turin vantlang mipuite chhawr theihna tur *retail outlet* a let turin hmalak mek a ni a, hemi tur atan hian agreement sign turin kan inngaichang mek bawk a ni.

A dawt leh ah chuan Pu Speaker, motor fit leh fit loh chungchangah a tehna bik leh hei chu a hlui tawh a, ‘a khu nasa; tlan chi a ni tawh lo’ tih ang chi te tan scrubbing policy emaw te lo chhuak ta ang sela, khatiang kan tih theih thin loha kha tunah chuan hma la turin Automated Vehicle Inspection and Certification Centre, Hlimen-ah, October, 2022 atang khan kan sa tan a. October, 2023 ah zawh fel hman kan beisei a. I&C centre ah hian pollution leh fitness khawl hmanga enfiah a ni tawh dawn a ni. STA chungchang, a bikin commercial vehicle - pick-up te, camper te hi sumdawwna atana hmang ve duh loh te tan private-a register phalsak an ni a, tunah hian kan kalpui tan mek bawk a ni.

Tin, Pu Speaker, Aizawl city bikah Transport Department chuan kum 2019 atanga tun thlengin 2-wheeler taxi permit mamawhte tan kan pechhuak a, hetah hian mi 2995 zet te eizawwna thar siam sak an ni a. Tin, taxi, auto-rickshaw leh maxi-cab te pawh hmundang dangah permit te pawh pein, eizawwna thar siam sak an awm nual bawk a ni. Tin, Pu Speaker, District thar pathum - Khawzawl, Hnahthial leh Saitual ah te DTO office hawng turin DTO leh staff mamawh te post siam a ni tawh a, a hnawhkhahna tur kan dil leh mek a, phalsak kan nih hnuah DTO office hawng turin tunah kan inbuatsaih mek bawk a ni. Tin, commercial vehicle terminal hi Tlabung, Vairengte, Serchhip ah te sak a ni a, Vairengte hi tun December thla krismas hma lawk khan kan zuk hawng a, Tlabung leh Serchhip hi tunah hian hawn theih mai turin peih fel a ni tawh bawk a ni.

Tin, multi-level car parking tur hi Chanmari ah sak mek a ni a, hei pawh hi zawh fel thuai kan beisei bawk a ni. Tin, Kanhmun-ah vehicle enforcement checkgate, motor - Assam leh Tripura atanga rawn lut leh te Mizoram atanga chhuak te pawh lo check-na tur hi Ni 10.12.2022 khan hman theihin hawn a ni tawh bawk a ni. Tunah hian Champhai DTO office hlui chhe tawh tak mai Disaster lam ten, ‘sak that a ngai; thiah a ngai tawh a ni’ an tih chu sak that nghal mek a ni a, kumin chho ah hian luah hman tumin theih tawp chhuahin tan lak mek a ni. Tin, Lawngtlai Transport Office chungchang kha - kan MLA zahawm tak kha, a source kha a fuh lo deuh nge ni, kei hian ka hrethiam lo zawk, ka hre lova. Kha kha Transport Department atanga fund a ni lova, PWD leh Finance lam tih a ni a. Chu chu PWD-in ‘a luah theih e’ an tihah Transport Deptt. min rawn hand-over chauh a, a bak Transport Department atang chuan hriat kan nei lova. A contractor ten PWD emaw, Finance emaw lamah an nawr a ngai zawk ni awm tak a ni a; keini chuan, ‘a luah theih e’ an tih hnu a an rawn hand-over chiah khan kan lo luah ve tawp a ni. Kha bak han chhan thui ngaihna vak pawh ka hre mai lo a ni. **(Pu C. Ngunlianchunga:** Minister zahawm tak kha a sawi dik ang a, amaherawhchu tunah hian

a bill cheng nuai 39 an la pe lova; luah a ni tawh si a, kha kha Transport Minister atangin hma lakpui theih dan awm sela a tha khawp mai. Kei pawhin ka buaipui a, Finance ah te, Planning ah te, PWD te; Transport Minister ber khan a baa luah reng kha a fel lova, umzuipei se a tha khawp mai ka ti a ni e.) Awle, theihtawp kan lo chhuahpui ang e.

Tichuan, Demand No. 12 - Parliamentary Affairs Department hi kum dangah chuan tawi tea sawi thin kha a ni a, kumin kan budget session, tun term atana hnuhnung ber tur a ni bawk a, thui deuh hlek ka han sawi ve thung ang a.

Parliamentary Affairs Department hnathawh leh mawhphurhna pawimawh ber pakhat chu - felfai taka dan siam, rorel, legislative business kalpui a ni a. India rama danpui - *Executive, Legislative* leh *Judiciary* te kan awm hrang thliah a, he lungthupathumte hi a hrang theuh, in dip-dal lova thawk tura ruahman a ni a. Parliamentary Affairs Department hi Legislative leh Executive te hnathawhhona leh kan *Nodal Department*, mawhphurhna sang tak nei, inlaichinna tha tak leh thawhhona tha tak a awm theihna tura pawimawh em em 'department' a ni a. Parliamentary Affairs Department-ah hian bill regulation leh a dangte pawh, he Legislative Assembly Secretariat a thlen hmain uluk taka lo endik thin a ni.

Heng bakah hian Parliament Affairs Department hnathawh tlangpui te han tarlang lawk ila. Legislator lo ni tawh te leh an chhungte tan hamthatna awm theite ngaihtuah sak leh enkawl te a ni a, hemi chungchangah hian Ex-MDC te, Ex-MRC te pension leh family pension te a pechhuak thin a. Tun dinhmunah hian pensioner mi 9 leh family pensioner mi 40 ten Parliamentary Affairs Department kaltlangin *pension* leh *family pension* an dawng thin a ni. Tin, MLA hlawh te tihpun a lo nih takah hian, heng kan mi-hmasa te pension leh family pension te pawh tipung turin hmalak mek a ni bawk a. *The Mizoram Salaries and Allowances of the Govt. Chief Whip and the Dy. Chief Whip Act, 1999* (As amended upto date) ah chuan, "Govt. Chief Whip means, the Minister of Parliamentary Affairs" tih a ni a. Party hrang hrang leader-te whip leh group dangte inkar thawhhona tha a awm theihna a tana hma latu a ni. Hemi chungchangah hian India Danpui Article 77 (clause 3) in thu neihna a pek anga siam, *Govt. of India Allocation of Business Rules 1961*, India danpui Article 77 (clause 3) in Ministry of Parliamentary Affairs hnenah mawhphurhna a dah a, chutiangin kan state sorkara Allocation of Business ah pawh Govt. Chief Whip hian Parliamentary Affairs hi a chang thin a ni. Govt. Chief Whip chuan mawhphurhna pawimawh bik a nei a, chu mawhphurhna pawimawh tak govt. business chungchanga hun ruahman te, thawhhona-tha siam te, chet velna enzui leh ruahmanna tul siam te a ni a. Govt. Chief Whip-in chanvo a neih dang pawimawh tak chu - House boruak thli-thlaia, a mar deh a ni. Govt. Whip hi House Leader te, ruling party member te leh party dang whip te nena inngheng tawna awm thin tur a ni bawk a ni. Tin, Legislative Assembly kaihhnawih zawng zawngte mumal zawka a kal theihna tura ruahmanna siam te; sorkarin committee hrang hrang a duanna tel tur Assembly member lo ruat te; tin, department hrang hrang hnuai

Consultative Committee hnathawh dan tur lo duan te; Minister-te hnena legislation kalphung chungchang a tul dan anga thurawn lo pek te a ni. Tin, hengte bakah hian Govt. Dy. Chief Whip office leh establishment hi Parliamentary Affairs Department enkawlina hnuai dah a ni. Department lian tak angin lang lo mahse, Parliamentary Affairs Department hi 'department pawimawh tak' a ni a, an hna chanpual uluk leh fimkhur taka thawh ngai a ni a, *Legislative* leh *Executive* inkungkaihna ah mawhphurhna thui tak a nei a ni. Chutih rualin, kan Legislative Assembly zahawmna vawnhim kawngah te, dik tak leh felfai taka rorelna kalphung kengkawh chungchangah te mawhphurhna thui tak a nei a. *Parliamentary form of Government*-ah hian he department hian mawhphurhna nasa tak a nei a, chu mawhphurhna chu theihtawp chhuahin hlenchhuah kan tum thin a ni.

Pu Speaker, vawiina ka han sawilan duh chu - Assembly Secretariat a hnathawkte, helai Assembly kan neih chungga hlim tak maia member kalte min lo dawngsawng a, min lo welcome thin hi, vawiinah hian han sawilan hrim hrim ka duh a. Tin, Assembly Session tuna kan neih chungchanga a hlawhtlinna atana kan House Leader te, kan Speaker te, kan Dy. Speaker zahawm tak tak te, kan Commissioner leh thawktu zawng zawngte thawhrimna avangin lawmthu ka sawi a. Tin, kan Commissioner thar Pu Lalhmahruaia Zote pawh hi rilru leh thinlung takin lawmpuina leh duhsakna ka hlan a. Hmalam hun kal leh zel turah pawh duhsakna ka hlan baw k a ni.

Tikhan, ka department chan te ka zo a; Pu Speaker, ka dil nghal mai dawn em ni ang? (**Speaker:** Awle, dil nghal mai rawh.) Ka lawm e.

Pu Speaker, ka Demand-te –

Demand No.	Purpose	Amount (in ₹)
4	Law & Judicial	29,58,51,000.00
12	Parliamentary Affairs	101,86,000.00
36	Environment, Forests & Climate Change	1,616,513,000.00
42	State Transport	56,61,22,000.00
TOTAL		2,48,86,72,000.00

he kum 2023 - 2024 chhunga hman atan ka rawn dil hi, he House zahawm tak hian min pawmpui turin ka rawn ngen e.

SPEAKER : Awle, tunah chuan Minister zahawm tak Pu TJ Lalnuntluanga'n a Demand-te –

Demand No.	Purpose	Amount (in ₹)
4	Law & Judicial	29,58,51,000.00
12	Parliamentary Affairs	101,86,000.00
36	Environment, Forests & Climate Change	1,616,513,000.00
42	State Transport	56,61,22,000.00
TOTAL		2,48,86,72,000.00

House-ah pass a rawn dil a, remti apiangin ‘remti’ ti rawh u le. (**Members:** Remti). Remti lo kan awm em? Kan awm chuan, ‘remti lo’ ti ula. (*Remtilo an awm lova.*)

Awle, Minister zahawm tak Pu TJ Lalnuntluanga chan - Demand No. 4, 12, 36, leh 42, a vaia belhkhawm 2,48,86,72,000 chu House-in lungrual takin a pass ta a ni. (**Pu TJ. Lalnuntluanga, Minister:** Pu Speaker, ka lawm e).

Awle, tunah chuan a dawt lehah kan kal ang a. Minister zahawm tak Pu R. Lalzirliana’n a department chante – Demand No. 23 - Art & Culture Department; Demand No. 27 - District Council & Minority Affairs Department; Demand No. 33 - Land Resources, Soil & Water Conservation Department leh Demand No. 39 - Power & Electricity Department te hi rawn wind-up se la, sawifiah ngai a tih te rawn sawifiahin House-ah pass rawn dil nghal turin ka sawm e.

PU R. LALZIRLIANA, MINISTER: Pu Speaker, ka lawm e.

A hmasain - waviin chauh pawh a ni lova, tunlai hi ka tawp ang reng riau mai a; ka hrawk te hi, tawng rin leh tawng rei lutuk hi a tuar lova. Doctor ten, ‘zai te phei chu, i zaithiam hle naa, lo in sum rawh’ min ti a. Chuvangin, ka department chana react ngai, MLA zahawm tak tak rawn sawi tam bera kha chu ka react lo ang a. Amaherawhchu, office lamah kan officer fel tak tak ten ngun takin an lo ngaithla a, an record a; kha kha nidanga kan tih ang bawh khan *ziaka* react a thaa hriatna ka nei a. MLA zahawm tak Pu Rokhaw pawh khan, ‘a tha zawk daih’ a tih kha, nichinah. Khatiang khan, tun session chhung hian ka react-na kha rawn peka, rawn sem leh kan tum mai dawn a ni.

Tin, chu mai piah lamah, tunlai hi ka BP a che a; nichin khan ka han check tir a, 150 a hnuaiah 90 a ni a, ka lu a hai lek lek a; a thei chuan min lo tawngtaipui turin kan ngen che u a ni. A hmasain P&E hi a rei ber tur a ni ang a, ti hmasa ila. Han hriat ngai nia ka hriat, mipui nghawng deuh a awm a, chu chu ka han react ang a.

Pu Nihar Kanti Chakma kha 1998 atanga ka MLA nihpui, waviin thlenga chawl lova Pathian hruaina duhawm tak dawnga la thu dun kan ni a. Nichina a thusawi kha ka lo chhinchhiah fel viau a, theih tawpin, ‘a bial phei chu duhsak bik pawh kan rawn tum dawn a ni’ tih kha ka han hrilh duh a.

Tin, Pu Lalsawivunga, MLA zahawm takin nichina a sawi kha han react loh theihloh niin ka hria a. JERC te hian Manipur-ah kum tin electric bill an thehlut ve ngai lo a ni; ‘tariff petition hi an theh lut ngai lo a ni’ an ti a. Hei hi keini chuan dan leh hrai fel tak kan nei a, Manipur pawhin kan dan leh hrai ang chiah hi an nei ve a. Chuvangin, kan danah chuan tariff petition hi JERC - Mizoram and Manipur hian multi-year *Tariff Regulation, 2014* (clause 17) khan tariff petition hi ‘kum tin JERC-ah an thehlut tur a ni’ a ti a. Chuvang chuan, keini hian ti hian kan thehlut a. “*Thil thalo titute avangin in ti lungngai duh suh*” tih kha keini chu ka rilruah a lo awm hlauh mai a. Hetianga miin thil thalo an tih dan, an palzut thin ang te hi, palzut loh hram hram a tha ka ti a. Tin, kan hriat dan chuan Manipur sorkar pawh hian tariff petition hi kumtin an thehlut thin a ni. Hei, helai maiah chairman pawh a awm a, duh chuan phone-a va zawh nghal theih a ni ang.

Tin, Pu Zaithanzama, MLA zahawm tak khan, ‘duhsak takin hydel project lamah hian tan kan la lo a ni’ a ti a, a pawl khawp mai a. Hydel project-ah hian tan kan han lak dawn kumin covid-19 a lo chhuak hlauh mai a, Tuirini pawh kha a rem vei nen, mahse khami avang khan sum puk, loan lak te kha kan ngam ta lova, kan ti ta lova; kan rilru te pawh hi a inang hle hlawmin ka hria a, helam mi pawh kan inang a. Amaherawhchu, ‘hun harsa zual a liam hunah heng hi chu ti ila’ tiin ngaihtuahna kan seng a, chumi atan chuan Tuirini mw 24 leh Tuivawl mw 24 te DPR pawh zawh tawh a ni a, forest clearance tunah hian kan nghak mek a ni.

Chumi piah lamah chuan, Mat-Sekawi mw 70 lai pe chhuak thei tur leh Kolodyne, 460 mw pechhuak thei tur a hmaa DPR lo siam kha chu a ni a, amaherawhchu hei hian foreign, Burma lam te a chim dawn avangin, kan kalpui hlei thei lo ang a; thil tih nasat viau tawh hnuah hian kan hlauh chham ang tih kan hlau a. Chuvang chuan, mw 150 – 180 inkar velah DPR kha review turin tunah hian CWC kutah kan dah mek a ni.

Tin, ‘tuikhuah te tak te-te’ han tih kha a dik a, te tak te-te te hian fur laiin mw 16-17 vel an pechhuak ve thei a ni; thalah erawh chuan mw 6 bawr vel a ni a, a beitham hle reng a. Chuvang chuan, ‘solar lam hi uar ang’ kan ti a, tunah hian hmun 11 ah kan VC ten phal takin ram min pe a, chu chu tender kan chhuah a, ni 15 kha a tawp ni a ni a, an hawng tawhin ka ring a. Tin, Vankal mw 20 pechhuak thei te pawh hi tunah hian *trial-run* tih mek a ni a. Kan hriat tawh ang khan mw 9-10 vel pechhuakin an sawi a, tunah hi chuan a trial-run kan neih chhung zawng zawng nen a man chanve kan chawi dawn a ni. Hei hi ni 30 atang chauh hian commercial ang chuan a kal dawn niin ka hria a. Hei hi kan hlawhtling dawn niin kan hmu a, a lawmawm khawp a ni. ‘A commission hun kha 2021 kha a ni si a, hei hi engnge a awmzia’ tih te kha a awm a. Covid avangin tumahin hna an thawk thei lova, sorkar pawhin kan thawk thei lova, contractor vai lo kal emaw, a tu emaw pawh kha kan khap a nih kha. Chuvang chuan, khang ang kha chu in dem emaw, han sawi han sawi pawr chi niah ka ngai lem lo a ni.

Tichuan, Pu Rintluanga hian a bial lampang kha a rawn sawi a; kan officer te hian an rawn chhang nghal tuk tuk mai a, kan MLA te hi an ngai pawimawh khawp a ni. Nakinah a rawn chhang dawn a, fiah zawkin. UC hi pek tawh a ni a, ‘sanction pawh dil mek a ni’ tih kha ka ka hriatdan a ni. A dik nge, midang chhanna ka ngaihrawlh deuh ka hre lova.

Tin, Dr. Vanlaltanpuia khan a biala transformer hungna awmlah avanga naupang hliam tuar khaa rawn sawi a, ‘hengte hi ex-gratia pek theih a ni ang em?’ a ti a. *Dan* kan nei a, hetiang civilian-in electric vanga hliam an tuar anih chuan, an hliam nat dan ang zela ex-gratia pek dan kha kan nei a, chutiang chuan pek an ni ang a. Tin, he transformer hi hung loh a nih chuan, ‘naktukah an hung zo vek tur a ni’ tih kha order a ni.

Pu Ngunlianchunga sawi – saw laia electric siam avanga mi-taima thi te kha ex-gratia pek tawh an ni a, a bak hi chu DC & MA lam a ni a, a chhan nghal chi chiah lo ang a. Kha zawng kha ka han chhan theih ni mai sela.

Pu Rintluanga zawhna kha - utilization certificate hi 13th October 2021 khan ministry ah submit tawh a ni a, 2nd installment dil nghal a ni a. Ministry in ‘a thlak han thil tel rawh u’ an ti a, chu chu a concern DC Lawngtlai leh Mamit-ah Ni 15 December, 2021 khan dila thawn tawh an ni a, tun thleng hian a chhanna kan la hmu lova. Ni 21 February, 2023 khan reminder DC Lawngtlai leh Mamit te hi thawn an ni.

PU LALRINTLUANGA SAILO: Pu Speaker, khawngaihin – kha lai min chhanna kha a chiang lo deuhin ka hria a. A chhan chu khulai 132 kV line power grid buaipui mek khu tha takin a kal a. Amaherawhchu, compensation cheng 1,68,122,451 hi power grid khan Forest Deptt-ah a pe tawh a. Khami zulzui khan mimal, khaw pali khan compensation an dil a, kha kha la pek loh a nih avangin ban phun theih a ni lova. Nizan hmasa khan power grid General Manager a lo leng a, ‘hei hi kan harsatna a ni a, engtin nge ni ang? Keini chuan kan pek tur kan pe niin kan hria’ tih lai kha a ni a. Kha kha Power leh Forest Department inkar a nih hmel a. Lallen, Saithlah, Phuldungsei leh Pukzing te kha compensation beisei khuate an ni a. ‘Khami a nih loh chuan, vantlangin thawh an phal lo’ tihlai kha a ni, Pu Speaker.

PU R. LALZIRLIANA, MINISTER: Kha kan thawktute’n an lo hria ang. Power & Electricity tun kan season kal mekah hian cheng nuai 64488.03 kan nei a. Heng atang hian hna tam tak kan thawk a, kan thawh tam tak zinga tlemte chauh han sawilang ila –

2X25 mVA 132/33 kV sub-station Kawmzawl a mi transformer kan va dah hi, he aia lian Mizoram-ah kan nei chuang lova. Hetiang ang pahnih lai hi kan va dah a. Nichina kan ngaihthlak tak ang khan chhim lamin eng an hmuh that pah theih kan beisei a.

Vanneihthlak takin Tlawva Mini-Hydel Project 5 mw lai pechhuak thei tur leh, Kawlbem mw 4 pechhuak thei tur te hi hawn an ni tawh a. Heng hi kan duh ang a ni lova; kan sawi tawh ang khan Tlawva pawh hi khuah belh tura hma lak chhoh mek a ni.

Tin, P&E Department hi kawlphehtha siamchhuaktu chauh kan ni lova, a siam chhuah hnuah khan hna a awm dawn chauh emaw tih tur kha a ni a. A hruipui han zam te, han sem zai te, a line leh transformer enkawl tih ang zawng zawng kha kan hna a ni a. Tin, domestic consumption - house tina thlunluh piahah khan, agricultural land lamah hian hma kan la bawk a. Kut hnawthawktute'n nuam zawk leh hahdam zawka hna an thawh theihna turin ramhnuai a an huan lo ramah te eng pek dan kan ngaihtuah a. Tun hun kal mekah pawh hian district hrang hrang 7-a zau 16 lai ah 11 kV feeder tunah hian fit mek a ni a, an thawk mek a ni. Heng bakah hianin SEDP te Plan Works atang tein project hrang hrangte hi thawh thin a ni a, tin, hei thlasik alo thlen dawn te hian kan power hman hi a tam zual thin a, chung a kan chhiat dal tur chuan nasa takin kan thawktute hi an lo in warm-up ve thin a. Chutiang chuan, transformer tam tak thlak a ni a, a thar a tam tak bun thar a ni bawk a ni.

Tin, kan ramri lama kan sipai ten eng tha an neih ve theihna turin theihtawp sorkarin a chhuah a, hemi atana kan Finance Minister, kan Chief Minister ni bawk ina ui nei miah lova min kal tir theihna chhan hi keini chakna ni lovin, kan sorkarin kan force mite a ngaihsak vang a ni. Chuvangin, Chief Minister chungah pawh hian lawmthu kan sawi a ni. Kumina kan BE leh revise hi a inthlau viau mai a, thenkhat te'n hetiangah hian kan officer-te rinhle ngawt te kan han tum thin a. Chutiang nilovin, kan power purchase atana sum kan hman *Other Charges* leh a dang avang hi a ni pakhat a. Hei bakah hian BE a lang lo, major works eng emaw zat kan pawisa neih tam zawk hi khulam atanga lo kal a ni a, khang kha budget-ah telh hman anih thin loh avangin BE-ah khan a lo lang thin zawk a ni.

Power purchase bikah hian Covid lai khan kan dinhmun a chhe deuh a, chutiang anih avang chuan 2020-2022-ah hian leiba hrang hrangte puhrukna tur state sorkar ina min siam sak avang hian kan lawm viau a. Nidangah chuan, 'kan Finance Minister-in min pe ta lo a lawm maw le', tih kha ka department-ah hian a tam riau a, tun tum chu lawmthu sawina hi a tam ka ti mah mah a ni. Kumin kan budget estimate-ah hian kum kal ta ai khan cheng nuai 18,697 laiin a pung a, department-a thawkte hlawh tur piah lamah heng hi chu a daih ngei dawn a ni tih a chiang sa a. Tin, kumin BE a power purchase leh subsidy-ah sum tam tham tak min pek belh bawk a, a lawmawm kan ti viau mai a; heng hi thil chhinchhiah tlak tak mai niin kan hria.

Minors works hnuaiah pawh hian sum eng emaw zat min pek belh bawk a. Hei erawh hi chu tariff filling-a inter-state leh intra-state transmission atana provision zulzuia dah, helaiah hian an rawn dah loh avangin, 'hei hi hman tura an tih a ni' tih te pawh kan hria a, kan sorkar Finance enkawltute chungah lawmthu kan sawi nawn leh

a. Tin, Central atanga sum dawn tur SMS te pawh hi kan mamawh leh ngei dawn a ni tih kan hria a, henga min pek leh zel bawh dawn avang pawh hian lawmthu kan sawi lawk bawh a ni.

Hei JERC leh ZEDA hi grant in aid-a sum pek thin a ni a, sum hi thawktute awm dan tun dinhmunah chuan an indaih thawkhat turah kan ngai a. *Other Charges* ah hian kan hmanna pawimawh ber chu - power generating station atanga power leina hi a ni ber mai a. Kan mamawh a tam chhoh zel avangin sum pawh pek belh chhoh zel kan ngai a. Mumal taka mipuite mamawh power kan pek theihna tur atan chuan kan mamawh ang ang min pek zel hi a pawimawh a, kan beisei bawh a ni. Tin, power lei zat tur hi han sawi fak hleih theih a ni lova, bill lo kal dan tura pawh sawi fak hleih theih anih loh avangin, kan mamawh zat tura hi kan sawichiang hleithei lova ni. Budget siam hunah hian heti zat bul tanna atana min pe erawh hi chu lawmthu kan sawi a ni.

Major works-a CSS atan hian nuai 732.19 chauh hi a lo lang a, hei hi han en mai chuan, 'P&E Department hian hnathawh an tum lo em maw ni le?' tih mai tur a ni a, chutih rual chuan power siamchhuahna hna te, a hrui zam hna te, sub-station siam hna te kan thawk a ni a. Hengte pawh hi state flagship programme, SEDP atang te, NEC atang te, NECIT atang te hian Pu Speaker, pawisa hi hmuh thin a ni a. Chuvang chuan, Chiang taka dah theih a nih thin loh avang hian RE ah hian a lo lang leh mai thin zawk a ni a, heng centrally sponsored scheme - DDUGJY, IPDS, NERSIT-ah te tunah hian kalpui mek a ni. IPDS atana kan sum hmuh tur erawh hi chu *major works* ah tih lan a ni bik thung a. Hei hi DDE, UGJY leh NERSIT atang tihlan chian a la nih loh avangin a dang hi chu tarlan hleih theih a la ni lo a ni. '*Revamp Distribution Sector Scheme*' kan ti a, hei hi chak taka kalpui mek a ni a, Ministry of Power-in prepaid metering atan hian cheng vaibelchhe 178.92 lai min pe a. Tin, loss tihhnamna atan hian, infrastructure siam nan cheng vaibelchhe 233.82 lai min ruahman sak bawh a. Hengte hi infrastructure awm sa tihchangtlunna tur ni pah fawmin sanction hmuh thuai kan inbeisei a, tender vek tawh a ni. Tin, *Smart Metering* hi pilot project-in Zarkawt lai saw tih a ni a, hei hi February thlaah hian hman theih tura beisei a ni nghe nghe a ni. Chutiang chuan, hydel project lam atang hian power hi tihtham kan siamchhuak lova, keimahni hian; kan han siamchhuah chhun pawh fur laia inngat deuh a nih hlawm avangin, thal lai chuan kawlpheha hi kan state hian kan siam chhuak tam lo hle a ni. Chuvangin, thal laia tih theih ve chi solar lampang kha nichina ka sawi tawh ang khan 20 mw, Vankal-ah tunah *trial run* tih mek a ni. Tin, Keifang daiah 10 mw pechhuak thei tur kuminah ngei hian tan kan tum a. Tin, NABARD sum hmangin Thenzawl-ah 10 mw pechhuak thei tur siam tum a ni bawh a, sum leh pai NABARD atanga hmuh beisei a ni. Tichuan, thal laia tih atan chuan tender kan hawng tawh a, 52 mw lai pechhuak thei tur a ni; a hmun min pek dan chuan. Thil dang dangah hian tam tak tih kan nei a, amaherawh chu kan sawi duhtawh tawh mai ang a, kha lai kha chu.

Art & Culture hi reilote hun kan hmang ang. Art & Culture Department hian kumina kan hman mek hi cheng nuai 1059 a ni a, hemi hnuai hian kan kal chho dawn a. Chapchar Kut kan hma lawkah a awm a, hemi atan hian kan sorkarin cheng nuai 100 lai min dah sak a, min pe leh fel tawh niin ka hria a, a lawmawm khawp mai a. Tuna pawisa kan hmu tawh leh kan hmuh tur, kan hmuh mek atanga kan chhut chuan, hnathawktute hlawhah 64.36% lai a kal a. Chutiang a nih chuan 34% pawh tling lo 33.7% vela kha hnathawhna tur chu a ni mai a, office han enkawl na te a ni.

Lai District auditorium hi cheng nuai 473-in kan sa a. Tin, Art & Culture hian sorkar hriatpuiin NGO library 513 tunah hian kan nei mek a, chumi zinga 132 chu *Grant in Aid* a sak an ni a, heng hi state sorkar leh RRRLF tangduna sak thin a ni. District Museum, Lunglei hi cheng nuai 919 zet senga sak mek a ni a, 80% zawh a ni tawh a ni. Kum 2023-24 BE ah hian nuai 1095.36 kan nei dawn a ni a. Tichuan, Art & Culture Department hnuai hian office establishment hrang hrang hi kan awm ve a, tlem te anga lang, tamtak kan nihna lai a awm ve a. Tribal Reseach Institute te, Mizoram State Museum te, Mizoram State Archive te, Mizoram State Library te, District Library leh District Art & Culture Office, Lunglei te, Archeology Wing leh Institute of Music and Fine Arts Wing te kan awm ve duah a ni. Art & Culture hian kan culture humhimna leh pipute hmun hlui cheibawla enkawl hi kan hna, kan sum hmanna deuh ber a ni a. Heta tana kumin budget-a min dah sak hi kan lawm viau a. Tin, NGO zawng zawng hian tanpui an dil a, kan neih tawh hi kan han pe ve thin a. Hengte hi min hriatpuiin kan CM zahawm tak hian a tul angin kan dil ang te phal taka min pek ve thin avangin SEDP sum hi kan eipui thin a, kan lawm hle a ni.

Tin, Lehkhabu ziaktu hi, Mizote hi lehkhaha ziaak leh chhiar tam hnam kan ni a. Lehkhabu publication atana nuai 10 min han pe reuh thin hi a lawmawm viau a. Amaherawh chu, kan kal zel dan ngaihtuah hian kan thangtharte lehkhaha thiam tak tak, sorkar hna emaw, thildang hna emaw pawh nei chuang lo, mi-lungleng, sum leh pai lama tla chhia, rilru lama hausa hnam kan ni a. Chuvangin, kan sorkar-a, Art & Culture Department in lehkhabu kan lo leisak thinna te hi min pek belh thei se la, nakin zela kan dinhmun hi tun atanga kum 100-ah chuan hriat a ni tawh mang dawn lo, ziaka a awm loh chuan. Chutiang hre tur chuan hnampui apiangin an culture leh pipute sulhnute hi an humhalh nasa thin. Chutiang chuan sum hi min pek belh se kan ti khawp a ni.

Tin, 2022-23 chhung khan central sorkarah NEC project eng emaw zat thehluh a ni a, chung atang chuan state matching share a ngai dawn a. Hengah hian ngai ngei tura kan ngaih zual bik a awm a. Provisional approval kan hmuh tawh – ‘Construction of Tagore Cultural Complex’ tih te, ‘Construction of Aizawl Institute of Music and Fine Arts, Tuivamit’ tih te, ‘Our Heritage, Our Treasure, Vangchhia’ tih te ah hian nuai 2,400 lai a awm a; heng lo pawh hi thehluh tam tak kan nei a. Amaherawh chu heng hi tak tak ram a thleng dawn em tih la hriatloh a ni a, ka sawi lo mai ang a. Chu chu Art & Culture Deptt-a ka sawi theih ni mai se.

Demand 33 - Land Resources, Soil & Water Conservation hi nikumah, tun kan hun hman mekah hian cheng nuai 1980.57 kan hmu a. Hemi hnuai atang hian RKVY leh NABARD kaltlang tein Soil Conservation hian district hrang hrangah hna kan thawk ve a. Tin, 2022-2023 budget-a dah theih nilo, RE a dah leh tur centrally sponsor scheme eng emaw zat RIDF atang te leh NABARD atang te hian kan hmu ve thin a, heng hi BE ah a lo lang dawn a ni.

Tin, kum kal meka kan sum hmuh atang hian Smoke-House 50 lai kan sak sak tawh a, chumi piah lamah tunah hian rubber chingtute tan tiin a khawl - a chemte leh a hnaina tur te, a lo dawhna te leh tuthlawh te, suahdur te, pipe te thil chi hrang hrangte hi kan ngaihtuah sak ve thin a. Tuirial catchment area treatment project sum hi eng emaw zat kan hmu ve a, hei hi soil conservation hnathawh nan hman a ni a, SEDP-family oriented atangin chhungkaw 2300 hnenah kuhva chinna tur sum kan pe a; chhungkua 3317 hnenah hmunphiah chinna tur sum pek a ni bawk a ni. Commerce & Industries Department nena thawk ho hian kuhva hralh harsatna kawngah hma te kan la ho thin a, sut kian pui ngei an tulin kan hria a. Chuti rual chuan kumkhat chhunga kuhva kan ei ral zat hi AMC huam chhungah hian data fel tak neih ni se kan ti a, hemi kawnga kan intodelh theihna tur hian theihtawp kan chhuah ve mek a ni a. Tin, kuhva processing atan hian NEC-ah project kan siam a, vaibelchhe 5 lai vawm luh a ni a, hei hi hmuh kan inbeisei a, NEC nen tunah hian kan indawr mek a ni.

Tin, Automotive Tyre Manufacturing Association (ATMA) hian Rubber Board of India te nena thawhhona NE-MITRA Mizoram leh North East a rubber lama hamthatna turin hmalak chhoh mek zel tunah hian a ni a, nimin maiah khan Rubber Board of India, Executive Director Dr. K.N. Raghavan pawh a lo kal a, a hovin growers meet te niminah Chanmari YMA Hall-ah kan va nei a, a hlimawm viau mai a. Anni hian Manimalayar Rubber Pvt. Ltd. ho hian Republic Veng-ah outlet minrawn hawn sak a, niminah khan Executive Director hian a zuk hawng nghe nghe a. Heta tang hian rubber chingtute mamawh hrang hrang lei theihin a awm dawn a, hmalam panna ropui tak niah kan ngai a ni.

Kumin kan Budget 2023-2024 ah hian kum dang ang lo deuhin kum kal ta budget aiin cheng nuai 86.57 laiin tihlem a ni a, hei hi thawktute pension avang leh vanduaina tawk, chatuan ram min pan san ta te salary kha han paih a ngai lo thei lova, hengte avang pawh hian a ni ang tih kang ring a. Chutih rual chuan department hmalakna tur hrang hrang - RKVY te, NABARD te leh centrally sponsor scheme dangte hmuhna tur, tunah hian engzat chiah nge kan hmuh dawn kan hre lova, kan hmu leh ngei kan ring a, chu chu tun kum budget estimate-ah hian a lo lang hman lo a ni.

Tin, hmalakna tur hrang hrangte pawh hi kan nei ve a, RKVY leh NABARD te hnuai hian Soil Conservation Enhancement kalpui mek a ni a, kum 2023-2024-a NABARD RIDF - Watershed Development Works 2nd instalment pawh hmuh kan

inbeisei a ni. Rubber, kuhva, hmunphiah leh coffee te hi soil-plant crops a ni a, hengte hi hmun tam takah mi tam takin hlawhtlinpui an awm tawh a, amaherawhchu, duh angin lakchhuah theih a ni lova. Oil palm te pawh agriculture crops a ni a, heng kawngte nen tam tak a awm a. A kawng siamna hna hi ‘ruahman ni se’ kan ti a, kuminah hian nuai 600 chuang laiin sengin cement concrete, cement pavement kan ti dawn a ni. Hmachhawp lian tak Tlawng Lui humhalh project kan nei ve a, MEC lamah he project hi thehluh a ni a, Tlawng Lui ti bawlhhlawhtu plastic, leivung leh thil dangte lo dawlna tur *spoil bank* siamna tur kan thehluh mek a ni. Kha kha kham lo takin soil-ah ka react theih ni se.

Tin, hmanni a Pu C. Lalsawivunga, MLA zahawmtak ina min zawh – “Rain-water harvesting hi kum 2 chhungin engzat nge siam a nih” tih kha, amah a lo chhuak leh daih tawh si a, khawi atang emaw chuan a lo ngaithla ve ang chu maw.. (**Speaker:** Chhiat tawhna lamah. Arawn dil thlap a, a haw e.) Awle. Kum 2021-2022 khan hmun 7-ah unit 31 siam a ni a, 2022-2023 khan hmun 9-ah unit 160 ah heng tuizem hi siam tir a ni a, a vaiin 191 lai siam a ni.

Minute 39 ka hmang tawh a, tunah chuan a tawpna atan. Hei hi chu a thui vak lova, amaherawh chu min rawn tibuai anih chuan a thui viau thei bawh a. District Council & Minority Affairs Department hi Pu Speaker, kan engto vak lo em maw ni, MLA pathum chauhin an sawi a. A tawp lamah khan kan Opposition Group Leader khan arawn khar tha khawp a, a hun zawng zawng kha arawn hmang a. Opposition group leader tihah chuan ‘a mawi em aw’ ka ti a. A mawh phurtu ber ka ni a, keimah hi min han bei vak chu ni se la a awm ka ti a. Amaherawhchu Sports Minister, a demand pawh kan la sawiho dawn reng a, a han bei vak mai kha chu - niman lama amah nen an inhniaa a thiam lo zawk a niha, ngaihdam a dil kha, ‘a ngai lungrun ta lutuk a, phuba arawn la nge ni’ tih te kha ka ngaihdam deuh a ni a.

PU LALDUHOMA : Pu Speaker, chutiang lam a ni lova. Hei hi Sports Department hnuai a ni lova, PMJVK sum hi District Council & Minority Affairs hnuai a ni a. Chuvang chuan, a sawina tur dik tak a ni, hei hi.

PU R. LALZIRLIANA, MINISTER: Pu Speaker, a thawktu kha Sports Department a ni a, khami hnuaihan khan a chhiat leh a that chu an sawi tur a ni a. A pek dan diklo a tih kha chu a duh chuan arawn sawi thei tho ang a. Amaherawhchu, a pek dana chungchangah midang han tikai kher lo khan, keimah hi consultant, a lo ruaitu ka ni a, a mawh a awm chuan ka phur vek tur a ni. Chuvang chuan, keimah hi beihtham lohah min ngai deuh nge ni, tikhan midangah a vawm per daih mai a. A lawmawm viau rualin, han ngaihbel tur khan phuba lakna remchangah a hmang em maw ni aw ka ti deuh a. Kan senior MLA-a ni a, hetiang hi chu a nachang pawh hriaa, mite pawh zirtir zawk tur niah kan lo beisei a; a pawh ka ti khawp mai. Khatiang, House-a mimal intihna hi thleng tawh lo se la. Amah pawh, thu kalhnu a ni a, hman deuhah ban a ni a. Ban a ni maw

kha? (**Speaker:** Aw, ni e.) Ban a ni a, Pu Speaker, khalaiah pawh khan ama lo tawrh hnu a ni a. Kha lam thleng thlenga thil a han sawichhuak duh kha, a lehlahmah chuan ka khawngaih angreng khawp mai a.

Tin, District Council chungchang a rawn sawiah khan han react lo theihloh a ni a, amah chauh rawn sawitu kha a ni si a, *direct funding* chungchang kha. Hetiang hi sawina tur a ni ang em? MLA zahawm tak, senior MLA a ni a, Upa a ni a, Group Leader a ni bawk a. Helaiiah hian MKHC inthlan thuchah No. 5-ah hian - '*Political Party te'n a taka tihtheih loh tur zuara mipui bumna ang thil intiam loh ni se*' tih a ni a. Hei hi vote zawna atana intiamna a niin kei chuan ka hria a. 'Keini min thlantlin chuan, direct funding hi kan pe ang che u' tihna hmanrua, a hmawr tawnga kan MLA zahawm tak hian a rawn hmanna niin ka hria a, a paw ka ti khawp mai a.

PU LALDUHOMA : Pu Speaker, khati zawnga an ngai a nih chuan, an ngai ni mai se la. Hei hi chu kan *stand* a ni a, a rei tawh a. Mara District Council inthlanah pawh khan kan lo aupui daih tawh a, chutianga tuna thuthara ti mai kan ni lo; kan *stand* awmsa ka han sawi nawn a ni mai.

PU R. LALZIRLIANA, MINISTER: Chumi kan sawina chhan chu - helai political party pakhat ina kan duha kan pek a, kan pekloh theih a ni lova. *Sixth Schedule* hnuaiami a ni a, Sixth Schedule hi India Constitution ..(**Pu Lalduhoma:** A dik chiah lo.) Ka sawi dawn a lawm. I duh leh i rawn react dawn nia.

PU LALDUHOMA : A dikchiah lohna chu - Mizoram Sorkar an rawn rawn a ni. 125th Amendment Parliament-in an tih dawn khan an rawn rawn a, tuna kan sorkar pawh an rawn rawn a, *negative comment* pek anih avang khan a harsa ta a. Keini chuan negative comment kan pe dawn lova, *positive comment* kan pe dawn a ni. A pe theitu chu kan ni lova, amaherawhchu, kan ngaihdan a pawimawh a, min rawn dawn a ni. Rawn tawh pawh a ni, tunah hian. Chu chu a ni a; kan *stand* ka han sawi mai a ni.

PU R. LALZIRLIANA, MINISTER: Tichuan, hei hi ministry hmasaah pawh khan ka chelh reng a ni a. Chuvangin, keini Congress party pawh khan 'kan ti ang' kan ti a, kan va zuar a ni. Amaherawhchu keini chauh hi Autonomous District Council nei kan ni lova; State dang - Bodo ramah te, Meghalaya-ah te leh Karbi-ah te an awm a. (**Speaker:** Maharastra-ah te.) Tripura te. Chungte chu an remtihna lak vek a ngai a ni. Chumi a nih loh chuan Sixth Schedule hi a amend theih mai loh reng reng. Chuvangin, keini ina kan tih theih loh hi vawinah hian inzawrhna atana hetiang tih mai mai hi thil tha lo tak niin ka hria a. A paw ka khawpin ka hria a ni.

PU C. NGUNLIANCHUNGA : Pu Speaker, *Point of Information* – Ka han sawi vel awk teh ang, khawngaih. Ka sawi ve lawk teh ang; Please.

Pu Speaker, khalaiah khan, Congress hunah kha kan Chief Minister kal ta Pu Lalthanhawla khan min recommend a, Pu CL Ruala, MP pawh khan min remcommend a, Congress khan state-ah chuan harsatna an nei lova. Mahse vawiin ministry chuan 125th Amendment-ah khan Parliamentary Standing Committee-a din a, chu chuan Mizoram sorkar ngaihda a rawn rawn a. Council-in *Thuneihna-lian* an neihna tura kha vawiin ni sorkar hi chuan a remti lo fai deuh vek a, ‘a theih loh’ tiin a chhang a. Chu zawk chu a nihphung a ni e. State hian a pek theih pheizawng a ni hauh lo. Mahse state a rawn rawn a, state erawh hi chuan a positive, a chhe zawngin, a *pawmlo* zawngin thuneihna lian an neihna tur a recommend a ni.

PU R. LALZIRLIANA, MINISTER: Keimahni hian duh eng ang mah ila, midangin an duh ve loh chuan; state pakhat pawhin a duh loh chuan; an lungrual loh chuan an ti dawn chuang lova. Chu chu kan kalphung a ni.

PU B.D. CHAKMA : Pu Speaker, *Point of Order* - Ka hriat danin Meghalaya-ah pawh Chief Minister-in a pawm vek a, Assam-ah pawh Pu Himanta Biswa Sharma pawhin a pawm vek a, Tripura-ah pawh khatih hunlai khan Pu Biplab Kumar Deb khan a pawm vek tawh a ni. Mahse, Mizoram chauh a pawm lo kan ni tih kha ka sawi duh a ni.

PU R. LALZIRLIANA, MINISTER: Pu Speaker, hetiang tawngka ringawta pawm vek tawh, ni vek tawh, hre vek tawh nia insawi hi a zia an rawn lekkan loh chuan, a document a awmluh chuan, mi bumna mai mai vek a ni. Nakin lawkah kan inthlang dawn a, ‘vote zawna mai mai a ni’ tih hi kan hriat a ngai a ni.

PU C. NGUNLIANCHUNGA : Kha lai kha chu amahin a chhan ang deuh khan, kan la pe thei ang, a document chu. Mizoram sorkar chiah hi a commit thei lo chu a ni.

PU R. LALZIRLIANA, MINISTER: Kum 10 chuang ka chan tawh a ni a. He laia ‘Congress Chief Minister-in a remti’ tih pawh kha, a thuruk chu ka hre vek; mahse hotu hluite phawrh mualpho ka duh lo. Sorkar atanga kan tih zawng zawng kha ...

PU C. NGUNLIANCHUNGA: Pu Speaker, khatih lai khan Parliamentary Standing Committee a la awm lova, Parliament-ah a bill kha a la lut lova.

PU R. LALZIRLIANA, MINISTER: A hretu ka ni; Hengho hian engmah an hre lo. Khu lama kan thawn thlaka kha Pu Nguna te ho hian engmah an hre lo, Pu Speaker.

PU C. NGUNLIANCHUNGA: Khalai kha chu a hresual zawk a ni. A hrechiantute kan awm. Minister kum sawm anih chhung khan comment an rawn dil lo.

PU R. LALZIRLIANA, MINISTER: Pu Speaker, *hre ber* ni awma engkim sawi hi a tisualin ka hria.

SPEAKER : Ngawi rawh aw.

PU C. NGUNLIANCHUNGA: Parliamentary Standing Committee khan tuna a dil zawk an comment duhloh avang khan ...

SPEAKER : Pu Ngun, Pu Zira hi a te a tein, a hre zawkin ka ring tlat mai.

PU C. NGUNLIANCHUNGA: Pu Speaker, khalai a hriat fuh loh kha chu khawngaih takin ...

SPEAKER : A hre zawk ang. A chhan chu kum 10 chuang a enkawl tawh a ni.

PU C. NGUNLIANCHUNGA: Tuna bill-a hi Parliament-ah a lut tawh a. Chutah chuan Committee an din a, chu committee chuan Guwahati-ah meeting an nei a, Mizoram sorkar hnenah pawh a rawn zawt ta a ni.

PU R. LALZIRLIANA, MINISTER: Meeting an neih zawng zawng pawh ka hre vek. Helaiah hian an rawn rawn a, kan Chief Minister ..

PU C. NGUNLIANCHUNGA : Aw, i hre vek. Khamiah khan in commit duh lo a lawm.

SPEAKER : Awle; lo tibuai tawh lo la.

PU R. LALZIRLIANA, MINISTER: Kan Chief Minister tawngkam pawh ka hria, sorkar committee-ah pawh khan ka tel reng. Chuvangin, hotute phawr mualpho hi a tul lo. Chuvangin, *lem kan va der* mai mai a nih kha. Saw lamah Congress khan vote zawn nan kan va hmang mai mai a, anni ho hian an lo awih ve em em a. Kha chauh kha a ni. A ho tak tak a nia.

PU C. NGUNLIANCHUNGA: Pu Speaker, vawiina kan sawi chu -125th Amendment tur Parliament-ah a lut a, chuta tang chuan Parliamentary Standing Committee an din a.

PU R. LALZIRLIANA, MINISTER: Guwahati-ah, Hotel Radisson Blue-ah ...
(*interruption*)

PU LALRINTLUANGA SAILO: Pu Speaker, Minister hian a sawi tur sawi teh se a. An duh tawkin thu an sawi tawh a. Thu hi sawi tir mai rawh.

SPEAKER : A tawk tawh e; a tawk tawh. Khalaiah kha chuan engmah in sawifel dawn chuang lo.

R. LALZIRLIANA MINISTER: Pu Speaker, au rin vak kha a tirah khan ka thei lo tih kha ka sawi tawh a. Ni dang chu ni sela ka au nasa ngawt ang.

A awm ka ti a, tuna budget session phei hi chu, tun bak hi Pu Nguna te ho chu an tel ve tawh lo maithei a. A chhan chu, a bial Tuithlang lam saw an chhe em em tawh mai si a; kan candidate tur hi a feh phei reng mai a, a ngaihawm sa in ka hria a. A tawng-theihna te, dawt leh dawt lem lo pawh, thutak leh tak lem lo pawh rinawm deuha sawi ve thei a ni a, kan inang tlang deuh thual maithei baw k e.

Tichuan, ka han sawi ve tawh ang a. Minute 15 tunah khan a kal a ni. Minute 51 a ni tawh a, darkar khata khung ngei ngei tum ka ni a. Minute 15 a pelh pawhin, darkarah chuan ka khung tih min lo hriatpui dawn nia.

BE hi kuminah chuan District Council & Minority Affairs-ah hian cheng nuai 49,203; hemi hnuaiah hian han en hian, nichina an sawi ang khan, kan duhsak loh vang ni lovin, sum neih chin tawk hi pek loh theih loh a ni a. An budget atanga han thlir hian a thawktute hlawh hi 93% lai a ni a, a tam hle mai a, hnathawhna tur chu a awm vak lo a ni. Tin, ADC te hi *Grant in Aid* a pek thin a ni a, chu chu *salary* leh *non-salary* a then a ni. *Salary* chu an hlawh lam tur kha a ni mai a, *non-salary* chu hna hrang hrang thawh vena tur leh an office inenkawlna tur a ni a; chu pawh chu an ‘indaihlo a ni’ tih kha a Chiang reng a; tunhma atanga hei hi chu lo kal tawh a ni a. Kum kal ta chung khan *Grant for creation of capital assets* hnuaiah hian CSS sum hmuh thin a ni a. CADC-ah chuan *construction of students’ hostel* atan hman a ni a, hei hi NLCPR atanga hmuh a ni.

Tin, *Major works* ah hian CSS atangin cheng nuai 311.85 hmuh a ni baw k a. Hei hi 2021 ami tawh kha a ni a, mahse central-in pawisa an rawn release tlai avangin 2021-2022 budget-ah khan a lang hman lova, revalidate dil a ni a. 2022-2023-ah PMJVK hnathawhna atana he sum hi rawn kal a ni. Autonomous District Council hi an hlawh bakah sum awm hi ‘a tam lo’ tih kan sawi tawh kha. Chung te anih avang chuan, project siam thin a ni a, a concern ministry leh NLCPR ah te, NEC ah te helai sorkar kaltlangin dilpui an ni thin a, chung atang chuan hna an lo thawk ve thin a ni deuh ber mai. Kumin chhunga DC&MA budget punna hi - Salary GIA ah nuai 1373.15 in a pung a ni. Chutih rual chuan nikum revise estimate pawh a pha chiah lova, chuvangin, kumdang ang bawkin additional allocation kan pek leh a ngai dawn a ni.

Nichina kan sawi tawh ang khan, ADC hrang hrang pathum an awm ve a, LADC-ah GIA *salary* atan nuai 19942 pek a ni a, tin, *non-salary* ah nuai 1360.50 pek a ni bawk a. MADC-ah hian GIA *salary*-ah nuai 16,517.86 pek a ni a, tin, *non-salary* ah cheng nuai 1,230.62 a ni. CADC ah GIA *salary* ah hian nuai 10861.61 a ni a, *non-salary* ah cheng nuai 662.98. A vaiin, kan sawi tawh ang khan nuai 50576.29 a ni.

PMJVK kha kan sawi nasa khawp mai a, hei hi sawi hlawh ve tur a ni a, kumdang aiin sum tuna kan hman mek hi a lo kal tam em avangin sawi hlawh awm pawh a niin ka hria a, a lawmawm pawhin ka hria a, hetia han sawikhawm ve hrim hrim hi. Tichuan, ‘perspective plan 2025 thlengin rawn siam rawh u’ an ti a, helai ah hian crore 700 chuang kan siam a; a concerned department hrang hrangte siam turin kan ti a. Chungah te harsatna nei an awm anih chuan ‘kan consultant te in ruai thei ang’ kan ti a, an ni pawhin an rawn ruai a, an lawm viau a ni. Tichuan, Department DPR, Autonomous Distric Council chauh an ni ta lova, Mizoram pumpui hi a huap a. Chuvang chuan, a concerned pawh a zau deuh tak avang khan DPR siam pawh an tam ta viau a. Hei hi state sorkar, kan department-ah a lo lut a, chuta tang chuan State level committee-ah a lut chho a, an niin awm an tih kha Ministry of Minority Affairs-ah an pe thla ve leh a. Chutah chuan PMJVK guideline-in priority sector deptt. a thehluk zinga mi ngei kuminah hian Sports leh Education sector-ah te leh, IT ah te sum kan hmu ta a ni. Chu chu nichin deuha kan han sawi liai liai te pawh kha a ni a, hei hi min pawmsak hmasakah an rawn nei mai a ni.

Tin, *centrally-sponsored scheme* hrim hrim hi kan hria a, a bawhzui tua zir a ni a, tun hma pawhin hetiang hi PWD-ah hlir a kal thin a. Chuvangin, eng emaw quarry an rawn siam hian a chhan lawk thei thin lova, kum 4-5 sanction pek tawh chhunzawm hleitheih loh a awm thin a. Chuvangin, heng hi ti danglam ila, ‘a thawk ve thei te pawh siam ila’ tiin sorkar hmasa khan kan han ngaihtuah chhuak a, chutiang chuan, tunah hian firm hrang hrang din a ni a. Khatiang khan firm tena a hmuna an zu bawhzui loh chuan thil hi hmuh mai mai theih a ni tawh meuh lova. Chuvang chuan, tuna kan firm hrang hrangte pawh hi ‘a hmuna an kal taimak avanga hmu an ni’ ti te pawhin kan hria a a ni. Tichuan, Ministry-ah kan theh thla a, a Ministry chuan a concerned Ministry - DPR project neitute Ministry-ah khan Education a ni emaw, Sports a ni emaw khatiang khan an han theh pheih ve leh a. An niin comment an han siam a, chungte nena inrawn tlanga sanction rawn tih thin a ni.

Kan ngaihthlak tawh ang khan, project 84 tunah hian thawh mek a ni a, project 3 zawh tawh a ni a, tunah hian. Tin, PMJVK hi kan inrin hmain, a lehlamah central sorkar hi a tha khawp a, sum min rawn pe vak mai a, keini a department enkawltu DC&MA hi department zawng zawnga te ber kan ni awm e; staff ngah lo ber kan ni a, chu chuan vaibelchhe heti zat monitoring hi ti tur kan ni. Chumi atan pawh chuan Adm. cost 2% emaw min pe tur anni a, chu chu min pe bawk silova, IT cell dina khatianga ti zung zung tur a hmunah, district-ah te kala khatianga ti tur kan ni a, vawiin niah hian

chu chu kan ti thei lova. Chuti chungin hnathawh tur tam tak correspondent a lo thleng a, a thawktute hi an indaih lova, an khawngaihthlak em em a. Tunah tak phei chuan kan hotute an awm a, kan DPR te, kan assistance fund te min sawi sak a. pakhat, pakhat pension mai tur anni bawk si a, a thar min rawn pe a. Mahsela a thar hian thil harsa lutuk hi chu amahin a ti thei dawn lova, chuvangin a pension lo zawka kha min lak kir leh sak ula kan duh a ni; thil chinchang hria an awmlah chuan, kan lo inthlahdah avangin sorkar hmasa lamah pawh tunah a lo lang a, vaibelchhe tam tak kan dawn tur kan dawn loh phah a; khatiang khan thil hi a awm ve palh ang tih a hlauhawm a. Vawiin hian assistance fund chungchang mah ni se helaiah hian ka han ngen duh a nih chu.

Tin District Council-ah hian power tam zawk pek sorkar hian kan duh a ni; kan duhsaklo a ni hauh lova. Amaherawhchu tunah hian Mara te, Chakma te leh Lai te - an pathum hian budget-ah hlawh tihpun te pawh an rawn dil a, an rawn siam a, an rawn pass ve vek a, an rawn theh phei a, chu chu ngaihtuah a ni a. Anmahni hi sorkarin kan duhsak lo a ni hauh lova; kan duhsak a, a tun kum buget-ah pawh hian heti zat lai khan a pung a ni a, a punna hi a tam em em a ni. Chutiang anih rual chuan, Constitution Sixth Schedule-ah hian ADC te mawhphurhna para 3-na ah ziaak a ni a. Chungah chuan - North Cachar te, Karbi Anglong Autonomous Council '3A' ang te leh Bodo Territorial Council '3B' ang tein thuneinna sang tak Mizoram ADC te hi pekbelh an ni tawh a, hengte hi thenkhatin, 'Sorkarin an ti duh lova, an duhsak lo che u; chuvangin heng hi an pek belh duh lo che u' an ti a, diklo taka thu veivir te a awm thin a, a paw ka ti khawp mai a. Heng hi mipui rilru dik lova hruaikawina a niin ka hria a.

Hetih rual hian, a nihna dik tak chu - Sixth Scheduled-ah hian Mizoram ADC pathum-te hnena thuneihna pek bak hi Mizoram sorkarin Sixth Schedule-ah hian subject 19 tunah hian kan pe mek a, ADC pathumte hnenah hian; chungte chu 3A leh 3B ah te hian enchian chuan hmuh theih a ni a. Mozoram Sorkar ina subject pakhat hnuai kan dah - Art & Culture hi thensawmin, sixth schedule - para 3B hi Bodo Territorial Land ah hian thu neihna kha keini ina Art & Culture hnuai a kan dah Cultural Affairs te, Library Service te, Museum & Archeology Institution te, Tribal Reseach Institution te hi Mizoram sorkara Art & Culture Department hnuai, department khatah kan dah vek a. Hengte hi anni chuan department 4-5 tea an lo then avangin, thuneihna nei tam ta viau ang khan an inngai a, 'chutiang chu a ni lo e' tih hi vawiin niah hian kan sawi tel duh a ni.

PU C. NGUNLIANCHUNGA: Pu Speaker, zah lovah min ngai lo sela, khawngaih takin kan Minister khan thil kha a hre chiang lo a ni.

Sixth Schedule hnuai a awm kan ni a, Sixth Schedule thuneihna kan nei ve a. Sixth Schedule hnuai ah chuan khatiang khan Art & Culture kha then darh a ni lo. Art & Culture kha kan then darh lova, kan neih saah Art & Culture Department pangngaiin a kal ve mai a ni. Khatah khan Library te chu Art & Culture hnuai ah a awm a. Kan

minister hian a concern hi a hre chiang lo a zawk a ni, Pu Speaker. Khatiang zawnga kan thu neihna sawisaka kha chu a dik lo. Pathian khawngaihna a zarah

PU R. LALZIRLIANA, MINISTER: Ngawi rawh; Sixth schedule hnuaiiah tunah hian subject - department 19 pek a ni tawh a. Hetiang an rawn dilnaah pawh hian midang entawnin, ‘heng hi, heti zat an nei a ni’ an ti a. Chuvangin, heti zat an neihna chhan hi he department pakhat atang hian, department anga chhiarin panga laiah an rawn then a, chu an then zawka chu tunah hian ka rawn sawifiah a ni.

SPEAKER : A tawk e. Pu Ngun, duh tawk tawh rawh. I duh ang anga ngaihthiam loh zawng zawng hrikthlakna tur a ni lo. Duh tawk tawh rawh le.... (*interruption*) Duhtawh tawh rawh; khati em em bik tur a ni lo. Mi thusawi laia vawi sawm dawn din kha a dik bik lo; khatiang em em kha chu a dik lo a nia. House hi zah ve bawh tur). Tin, ‘*Point of Order*’ in ti a, ka ngai thiam che u a. *Point of Order* chu - a thusawi lai meka ‘kan dan leh constitution emaw te nena inkalh a ni’ tih lai kha kan *Point of Order* tih tur a ni. ‘*Point of Clarification*’ in in kal tawh dawn nia, nakinah hriatthiamloh in lo neih chuan. Le, chhonzawm rawh le.

PU R. LALZIRLIANA, MINISTER : Pu Speaker, House hi i vawng zahawm ka ti a, ka lawm ngawt mai. Hetianga a hun lova rawn inrawlh fo te hi intihtheihna chi chu a ni lem lo khawp mai.

Tichuan, heng ka department chante Demand hi he House zahawm tak hian min pass pui turin ka rawn ngen e –

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

Ka lawm e.

SPEAKER : Awle, tunah chuan kan Minister zahawmtak Pu R. Lalzirliana’n, heng a hnuia a department chan demand-te :-

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

House ah pass a rawn dil a. Remti apiangin “Remti” ti rawh ule. (**Memberte:** Remti.)

Remti lo kan awm em? Kan awm chuan “Remti lo” ti ula. (*Member remti lo an awm lo.*)

Awle, tunah chuan Minister zahawmtak Pu R. Lalzirliana Demand No. 23, 27, 33 & 39 te, a vaia belhkhawm cheng vaibelchhe 13,68,51,83,000.00 te hi House-in lungrual takin a pass ta a ni. (**Pu R. Lalzirliana, Minister:** Pu Speaker, ka lawm e.)

SPEAKER : Awle, tunah chuan kan Minister zahawmtak Dr. R. Lalthangliana’n kan sawihona te rawn wind up-in, sawifiah ngai a tih te rawn sawifiah sela, a Demand te House-ah pass rawn dil nghal turin ka sawm e.

DR. R. LALTHANGLIANA, MINISTER: Pu Speaker, ka lawm e. Rang deuh hleka sawi ka tum ang a; hei, a lo tlai leh viau tawh a.

Vawiinniah hian kan budget, tun term bika a hnunung ber tur kan sawiho thei hi a lawmawm ka ti a, ka deptt. chan min sawipuitute zawng zawng hnenah lawmthu ka sawi duh a ni. Health hi mi 20 in an sawi a, Higher & Technical Education hi 12 in, tin, Commerce & Industries hi mi 11, ka record danah chuan a ni a. Tin, *Assembly Question* hi tun tumah hian ka chhang tam khawp mai a, chhannaah khan thil tamtak a kal tawh a; tukina Mizoram University Campus chungchang thleng pawh khan. Chuvang chuan, Pu Speaker, House-a repeat ngai lo a awm tho ka ring a. Health hi abik takin i lo chan tawh hrep kha a ni a, deptt. pangngai anga ngaih pariat (8) vel a inthlungkhawm a, chuvang chuan, tlemin a buaithlak deuh a ni. Hei, kan official te pawh an kal tha hle mai a, deptt. dang tana entawntlak tak mai a niin ka hria. Pu Speaker, i remruatna fel tak avangin hei, chaw te kan han ei hlauh a, a rei deuh pawhin tihdan a awm thei turah ngai ila a tha awm e.

Pu Speaker, Covid hian hun rei tak kan khawvel a tibuai kha a ni a. India ram mai ni lo, kan khawvel a tibuai a, Mizoram pawh kan bang bik lova. Chutiang karah chuan vawiinniah hian hun remchang ka han lak zawk duh chu - Covid buaipui laia kan thawhpui zawng zawngte, vawiinnia kan MLA zahawm tak tak, a tua te pawh hian theihtawp kan chhuah tlangin ka hria a ni. Kan fund te leh fund lo te thleng pawhin kan insawr chhuak a, a ropui ka ti a, lawmthu sawina ka nei duh a ni.

Tin, chutih mek lai chuan sorkar deptt. zawng zawng te, kan Kohhran pawl intelkhawm MPHC-a inthlungkhawmte leh inthlungkhawm lo pawl hrang hrangte, kan NGO te leh kan Task Force leh Volunteer bakah thawktu zawng zawng - Health Deptt. chauh pawh ni lo, Zoram mipui min tawngtai saktu zawng zawngte chungah vawiinniah hian lawmthu ka sawi nawn duh a ni. Tun bak hi chu helaiyah a budget ang zawng chuan kan din ka ring tawh lo deuh hlek a, a ropui ka ti a. Pathian-in kan tawngtaina a

ngaithla a, a taka hlawhtlinna min hmuh tir hi sawi lo thei lo niin ka inhria a, ka han tarlang hmasa duh a ni.

Tichuan, Pu Speaker, ka han sawi hmasak duh ber chu - Higher & Technical Education lamah hian rei ve tawh deuh hlek ka lo thawh tawh avangin, heta tang hian sawi tan daih teh ang.

Mizoram-a University Grant Commission hnuaiah hian ‘recognised’ kan tih zirna hmun Higher Education Institution hi 23 tunah hian kan nei mek a. Chung institution zinga 19 te hian NAAC (National Assessment & Accreditation Council) atangin *valid accreditation* tunah hian 19-in kan nei mek a. Tukin zingah khan ka sawi zuai tawh a, thil lawmawm deuh mai chu - India ramah hian Mizoram hi college hrang hrang leh institution an rawn assess-ah hian, tun dinhmunah hian mark kan hmu sang ber a. Kan hriatthiam theihna zawngin - mark 83% hmuin India ramah *pakhatna* kan ni tih hi kan sawi nawn leh duh a ni. Min hnaih bertu chu Chandigarh a ni a, anni hian 60% an hmu a ni. Kan achievement hi tun dinhmunah hian ‘kan chhuang hle a ni’ tih ka sawi duh a.

Tin, chutih lai mek chuan National Education Policy, 2020 leh University Grant Commission te hian heng buaipuina kawngah hian a strict khawp mai a. NAAC accreditation paltlang lo, ‘*accredited institution* lo hi chuan financial assistance an dawng thei lovang’ te pawh a ti a, min karna khawp mai. Chungah chuan kan ti tha thawkhat hlein ka hria a. A lawmawm riauna chu - Kan thenawm State (heti zawng hian sawi ta ila) Manipur-ah hian a hmu sang ber college college chu Ryban College niin, B++ a hmu a, keiniin A+ kan hmuh lai khan. Kan inthlau hle a ni tih kha kan sawi duh hrim hrim a ni. Chuvang chuan, kan dinhmun hi ‘a chhe lo a ni’ tih kan sawi duh a ni.

Tin, sawi hlawh lo ang reng tak, ‘IASE’ kan ti a, hei hi institution pawimawh em em mai a ni a. India ramah hian kum 2-3 kal ta khan hetiang institution B. Ed. leh M. Ed. te, tin, tunah pheichuan M. Phil. te, Ph. D. (doctorate degree) zirna te pawh kan han hawng ta a. Chutih mek lai chuan harsatna lian tak kan tawh a; tlem lai deuh khan de-recognition tur te pawhin min rawn vau a. Amaherawhchu, vanneithlak takin tun hnuaiah zirtirtu chawl mai tawh tura ngaih, an chawl palh a nih pawhin a thlakna tur npost thar vawiinah hian kan han neih belh leh thei tur te hi a lawmawm ka ti khawp mai. Chuvang chuan, he kan institution hi vawiinah hian a pawimawh hle mai a, kan hriatzau te pawh a thain ka hria a, chu chu ka han tarlang lawk a ni.

Tichuan, sum harsatna karah tun hnuaiah *contract* Professor mi pali, Mizoram Hindi Training College a thawkte regularised kan nei ve nawlh mai a. Chutih mek lai chuan *contract* Asst. Professor mi 64 tawp mai vawikhatah kan regularised bawh a, a ropui ka ti a. A bik takin kan CM, hetiang min ngaihtuahpuina kawngah a chungah pawh lawmthu ka sawi a, kan DP&AR Minister nen. Tin, covid lai, hun harsa leh hun khirha

kan awm lai leh, zirlai tam tak Mizoram pawn atanga a sang bia lo lutte college-ah admit loh theih an ni ta si lova, churang chuan harsatna lian tak kan tawk a. Tin, a nghet lo pawh ni se, ‘an tlawmngai thei ang’ tiin 25,000/- hlawhin casual teacher 100 kan la a, vawiin thlengin an la thawk chhonzawm a. Tin, chutih rual chuan ‘casual attendant’ kan ti a, mi 42 bawr vel kan la bawk a, chu chuan kan indaihlohna min phuhruk khawp mai a, a lawmawm hle a. Tin, tun hnaiah kan hon. Chief Minister-in *in-principle* approval minrawn pe a, casual teacher mi 36 n nei leh turah kan inbeisei mek a, financial year tharah hian. Tin, regular post fill up tur 33 nei thei turin tunah hian kan inbuatsaih mek bawk a ni.

Higher & Technical-a thil pawimawh tak mai chu – ‘RUSA’ kan ti a, hei hi an hmang tangkai khawp mai a. RUSA I & II a zo ta a, an zawh dawna RUSA III a piang dawn emaw kan tih chhung hi a rei khawp mai a. Hei, vawiin thleng pawh hian central cabinet-in thutlukna a la siam lova. Thla kalta January thla tawp lama ka zu kal khan, ‘hei hi a kar in ti-awl rei si a,’ kan ti a. India ramah RUSA zirtirtu mi 300 emaw lek awmah Mizoram-in 72 kan chang te hi a ropui ka ti a. An han thawk a, amah erawhchu *central sponsored scheme* anga hlawh la annih avangin, an tawp ta kha kan buai laih laih a. A hnuah ‘engtin nge kan kal zel dan tur’ tiin kan han zawt thin a, mahse, zirtirtu hlawh pek chhonzawm ang zawng hi chuan an kalpui thei dawn lo niin a lang a. Amaherawhchu, RUSA III hi a lo kal chho leh anih chuan leh, an tum dan anga central cabinet ina an ruahmanna hi a tihlawhtling anih chuan tlema *flexible* (pawhfan theih) dawna hriatna kan nei deuh hlek a. Churang chuan, college tam tak infrastructure building nei tha lo te, hostel nei tha lo te leh library nei tha lo te - khang kan phuhrukna tur te; tin, chu bakah equipment hmanrua kan leina ang chi te pawh kha, ‘kan dah leng thei awm mang e’ tihna tun hnaiah kan nei mek a ni.

Southern Campus chungchang hi, helaia zawhna kan chhan hnu pawh hian kan sawi zel tho si avangin, kan hriatchian viau ka duh a. Rei tak, chhim lamin hei hi a bik takin an vei a, kan vei a, chumi avang chuan theihtawp chhuahin a tua te pawhin kan buaipui kha a ni a. Hei ‘chhim lam’ han tih hian Lunglei District, Siaha District leh Lawngtlai District chhungah hian college hi 7 a awm a. Lunglei Govt. College, JB College, HATIM (Higher and Technical Institute of Mizoram) hi college a ni bawk a, Govt. Hnathial, Govt. Lawngtlai, Govt. Kamalanagar, Govt. Saiha College, chungho tan pawh chuan a tangkai tur bika kan ngaih mek lain, DPR Mizoram University in a siam hian he Campus hi kan lo hawng a nih ngai chuan, hemi kan MZU a subject awm lem lo ang chi te dah kha a tirah chuan an tum viau mai a. *Entirnan*: International Relation, Peace and Conflict Studies, Women & Gender Studies Commerce, International Trade Business and Finance te leh tunlai khawvela khatiang zir an awma, an chhuah hnu pawha hna han hmuh awlsamna tur chi te pawh khawvelin a mamawh chhoh zel hriain, ngaihtuaha tih chhoh te a ni a.

Tin, chu mai chu a ni lova - a DPR ah hian building sakna tur project chi hrang hrang tam tak a awm a , a tawpkhawk tak takah chuan nawr hi an ngai a ni. Hemi *in-principle* permission min han pek hma pawh hian vawi tam tak nawr thin a ni a, amaherawhchu, vanneihthlak takin eng emaw tiin kum 2020, Janury Ni 17 khan Mizoram University Vice-Chancellor hnenah lehkha a lo kal a, “Proposal for Establishment of Mizoram University Campus Lunglei regarding...” tiin a rawn ziak a. Hetah hian rem an tih thu leh ram erawh chu Mizoram sorkarin ngaihtuahsak tur ang chi khan a rawn ziak lang a. Chumi kal zelah chuan nichina kan ngaihtlak ang khan, a bik takin a bialtu, kan MLA zahawm tak Dr. Vanlaltanpuia pawh a tangkai khawp mai a. Ani hi Pukpui khua a lo ni a, Pukpui ram a lo ni bawk a, hmun min peka hi, an VC te nen theihtawp an chhuah a, tichuan ram hi Land Revenue & Settlement Deptt-in Mizoram University hmingin a pefel thlap tawh a, an tih leh tur hi chu, kan DPR pawma tih mai chu a ni. Amaherawhchu, kan innawr kan innawr a, kan inbia kan inbia a. An sawiah khan thil pakhat a awm a - Covid hian kum hnih zet Mizoram chauh min nuai lova, India ram sorkar laipui pawh post creation te, post ruak fill-up kawngah te nasa takin harsatna an tawh thu min hrilh ta a, tun thla kalta mai khan. Chumi avang chuan, han innawr luh a har deuh hlek a. Amaherawhchu, infrastructure eng emaw, a building leh khang thil pangngai kha chu a kal thei tur ang chuan kan inhriattir a Chuvang chuan Pu Speaker, he chapter hi kan beidawng lova, theihtawp kan chhuah zel ang a, ‘hlawhtlin hun chu a la awm ang’ tih ka beisei tlat a.

Tin, sawlam saw a tul pawh a tul a, tin, chhim lampangah trade activities pawimawh tak tak te kan han nei a, Zochachhuah te, Zorinpui te, Kawrpui chhuah tih te kan han tih tak tak pheichuan, sawlamah sawn institution, Higher Education-ah University level hi kan neih hrim hrim a pawimawhin ka ring a. Chuvang chuan, neih hun a la awm ang, kan beidawng turah ka ngai lo a ni. Kha kha Higher bikah chuan ni ta mai sela.

Hei, ‘thil lawmawm’ ti ila, lawmawm ziktluak chu a ni lo maithei a, mahse, a danglam ve deuhhleka, Health-ah ka han lut lawk ang a.

Pu Speaker, Member zahawmtak pakhat, kan group leader Pu Zodintluanga khan a rawn sawi zuai tawh a. Niminah ZMC-ah thil danglam tak mai a thleng a. ZMC - kan State Referral Hospital, Falkawn-ah hian *conjoined twin* hlawhtling taka zai a nih thu min rawn hrilh a. ‘Conjoined twin’ tih awmzia hi ‘nautephir pianghlim, taksa inzawm emaw, taksa peng leh kawchhung inzawm’ tihna a ni a. Nautete hi February Ni 9 khan an piang a, Lawngtlai District atanga refer niin, February Ni 18 khan ZMC -ah dah luh anni. Heng phirte hi hmeichhia an ni a, an pian hlima an weigh belhkhawm chu kg 4 leh gram 200 a ni. Nautete hi an awm leh an dul a inzawm tlat mai a. Tin, chu mai chu a ni lova, mihring organ a buaithlak lai ber, ‘a delicate lai ber’ te pawh kan ti ang chu thin (liver) kha a inzawm tlat mai a ni. Chutah chuan, nautete hi an dinhmun a thatloh avangin incubate nghal anni a, an rawn dahluh hlim, ‘NICU’ an ti a, naupang ICU-a

dahluh an nih rualin ventilator support pek anni nghal a. Tin, Pu Speaker, doctor team - Dr. John Laldingliana, Surgeon leh a team te an titha khawp mai a, an thiamna thawhkhawma an khawihrawn a ngai ta a. Chutiang chuan, Pediatric Surgeon te, Plastic Surgeon te, General Surgeon te leh Aenesthologist te tangho khan darkar thum chung an zai ta a ni, nimin khan. Tichuan, thin (liver) pakhat intawm annih avangin naute pahnih hi thin (liver) pakhatin a chawm zawh dawn loh avangin naute pakhat zawk chhan nan an thin zai phel a lo ngai ta a ni. A buaithlak khawpin ka ring a. Surgery tihzawh hnu hian NICU-ah dahluh nghal anni a, hetih lai hian, vanduaithlak takin naute critical zawk kha nizan dar 6:30 khan a boral hlauh mai a, naute pakhat zawk erawh chu 'tun dinhmunah chuan a la tha rih e' tih ZMC Director-in minrawn hrilh a. A chin tur zel erawh chu hriat a la ni lo a ni.

Engpawh ni sela, regional news-ah pawh nizan khan an lo chhuah hman a, hei hi a thlalak a ni a; an inzawm dan hi a buaithlak khawp mai a. Hei hi thil thleng khat tak mai, kan Medical College denchhena kan hospital-a an han zai thei hrim hrim hi *significance event* niin ka hria a, House kaltlangin Mizoram mipuite hriat atan pawh kan sawi a nih chu.

Hei baka ka sawi leh duh chu, Pu Speaker, Health Service-a titha leh titha lo tehfung indicator pawimawh em em mai pakhat chu – Infant Mortality Rate (IMR) a ni a. Chuta SRS nikuma tihchhuahin a tarlan dan chuan, India rama nau piang kumkhat hnuai lama thih tlemna ber state-ah Mizoram hi min puang a nih chu! A ropui ka ti khawp mai. 'Kan thi tlem ber; kan survive tha ber, India ramah' tihna a nih chu. A lawmawm khawp mai. Tin, 202-a thilthleng ni tawh mahsela, a hnuah result puan a la awm lo niin ka hria a. NITI-Aayog ina ranking a tihchhuahah Mizoram chu state te zingah a titha ber nihna dinhmun min luah tir a ni. Hei hi thil lawmawm ve tak a niin ka hria a ka han sawinawn anih chu.

Kan sawi tam angreng a, kan sawi thenkhat inang tak takte pawh a awm a, 'Sub-centre ah bungrua kan nei tha lo, kan tlabal e; BP check-na, zunthlum check-na, inbukna te a awm tha taw lo' tihte kha chu, theitawp kan chhuah ve a, tun atanga reiloteah procurement kan han tifel ang a, kan hnianghnar turah kan ngai a ni. Tin, 'NHM hnuai hnthawkte hlauh la lo' tih pawh kha, thlahnih vel an la lo kha, tunah chuan an la deuh vek tawh a; tin, ASHA lawmman pawh 'an la mek e' tih kha kan inhriattir anih chu.

Tichuan, MLA thenkhatte khan an biala x-ray khawl te kha anrawn sawi a. Hei, Pu Lalrinsanga Ralte pawh hian a bial Vairengte a vei em em mai a, a tang thei khawp a. Tin, MLA zahawm tak Pu Nihar Kanti pawh khan a sawi a. 'Indian Public Health Standard' an ti a, IPHC norms hian PHC-a x-ray khawl awm hi a ngiat vak lova, amaherawhchu, mamawh in sawite kha chu kan hre tho a. Chuvang chuan, kan MLA ten in ngaipawimawh bawka, kan pe thei dawn che u in a lang a. A sawi ve lo te bialah pawh khan a nei lo te chu kan pe thei turah kan ngai. **(Pu BD Chakma: Pu Speaker,**

Chawngte CHC tan ambulance kha min pe thei dawn em?) Sawlai saw a kilkhawr nen, in vanduai a, Ambulance kha kum 15-a upa a ni a, tlem chuan a lo chhe deuh tawh a. Engpawhnise, theihtawp kan chhuah dawn nia aw.

Tin, kan MLA thenkhatte tihdan tha deuh chu - in bial chhunga contractor lian deuh te biak thiam chuan, CSR hmang pawh hian nuai ruk bawr vel man eco-ambulance te an leisak mai thin a, khatiangte pawh khan MLA thenkhatte chuan an inphuhruk ve bawk a ni. Awle, kan lo hre dawn nia. (**Pu B.D. Chakma:** Pu Speaker khawngaihin, nikum khan CSR fund atangin ambulance kan dil a, CS hnenah dil tur an tih a ni a, Pi Renu Sharma tunah chuan a awm lova; ama office ah ka va dil a, mahse outcome engmah kan la hmu miah lo a ni.) Keini pawhin kan lo ziak sak dawn cheu nia aw. Ka ziah sak chuan an hmu deuh zel tlat; ka lo hrela a ni. Theihtawp kan chhuah dawn nia. Engpawhnisela, khatianga thil tul ah chuan theihtawp kan chhuah tlang turah ngai ila a tha mai tiraw? Tha deuhin kan ziak dawn nia.

Tichuan, doctor chungchang hi kan sawi nasa khawp mai a. Nimin piahah House-ah Pu Speaker, ka rawn kal loh ni pawh khan sawi a tam deuh niin ka hria a. An han sawi uar tak tak a, Siaha District-a Pu Rokhaw bialah te khan awm lo fai vek ang khan an han sawi a, nichin, chhunah pawh khan, ‘engatinge maw ni le?’ ka han ti deuh a. Harsat hi chu a harsa, tunah hi chuan harsa tak a ni. Amaherawhchu, tuna in dinhmun hi chu Dr. Beipaduaasa, MO Ayush kha Chakhei CHC-ah tunah hi chuan a awm zui dawn tih kha lo hre phawt ula. Tin, Tipa PHC-ah khan NHM doctor kha a awm a, a ban tur thu hi sorkar khan kan hre bik si lova. A la bang chiah lova; awm miah lo anga sawi kha chu, hetia in han sawi vak vak takah khan kan lo hre ve a. Engpawhnisela, a lo bang palh anih pawhin....

PU K.T. ROKHAW : Pu Speaker, Chakhei doctor kan neih lai mek kha Tlabung-ah sawn a ni a, a order pawh kan hmu tawh a, a aiawh tur tumah ruat an ni lova. Tin, Tipa doctor kha January thla khan chhuah a tum a, mahse refugee leh damlo kan ngah si avangin, khawtlang hruaitute khan, “engpawhnise thlakhat chu awm hram rawh” tiin an ngen a. Tichuan tun February thla hian a chhuak dawn a, doctor pakhatmah kan nei tawh lo a ni.

DR. R. LALTHANGLIANA, MINISTER: Sorkar thiamloh ang khan a inpuh vak theihloh. NHM doctor te pawh an tangkai thova, ‘min lo zawn teh a, sing 6-7 bawr vel hlawh chuan kan la thei reng a nia’ tiin, min hmuhsak kha kan la mai a ni. Amaherawhchu, min bansan thin a, PG te zirin an chhuak thin a; khatiang hun khaihlak deuh hlek lai kha kan nei ve thin a ni tih kha min hriatsak ka duh a. Engpawhnisela, Chhaolo chungchangah erawh chuan, ‘Siaha District Hospital-a Medical Superintendent leh CMO office atang te in doctor lo zuk depute u la’ kan ti a, a hla lutuk lo bawk a. Tunah hian PHC eng emawzat, saw lampang chauh pawh nilo doctor kan

post theih lohna a awm a, chu chu a chhan chiang taka sawi ka duh a, min lo ngaihthlaksak ula.

A chhan chu - PG specialist zirlai tunah hian mi 25 an awm a, rin ai hian admission an hmu thei riau mai a, chu chuan nasa takin min nghawng ta a. Tin, doctor PG zir 25 bakah hian kum 2019 kan sorkar atanga vawiinni thleng hian doctor pension a chhuak ta hi 22 kan nei a ni; khang nen khan han belh ta ila. Tin, chumi piah lamah chuan, doctor 4 record ah hian kan chan a. Chumi awmzia chu - doctor ruak anga ngaih theih, entirnan PG an zir chuan an awmna kha a ruak ta a, mi 51 kum 2-3 chhunga han neih loh duak khan a lo kal thar lak zung zung harsatna karah harsatna kan tawk ve bawk a. Chuvang chuan, tunhnaiah mi 6 te kan han la a, MPSC ah, chu chuan eng emaw chen chu a phuhruk a. Tunah pawh hian doctor awmlohna khaw eng emaw zat kan nei a ni; kan zep lo. A harsa khawp mai a, khatiang practical harsatna kha kan tawk a ni. Sawlai Siaha district chauh ni lovin, Lawngtlai district ah pawh, Lunglei district ah pawh doctor awmlohna a awm a ni. Tin, Mamit district leh hmun dang dangah PHC-ah te pawh doctor mamawhna lian tak kan nei a ni.

Hei hi, ka sawi zau hlek duh chu - Pu Speaker, doctor hi MBBS an nih chuan tun hma chuan Ayush doctor te, dental doctor te pawh 'doctor tho an ni' tiin NHM hnuaiiah kan la thei mai a. Tunah chuan central lamin 'MBBS zir chhuak lo chu' tih kha a ni ta a, chuvang chuan tunah hian doctor kan hmu hlei thei lo a ni; a buaithlak khawp mai. Mizoram ah hian private hospital eng emaw zat a awm a, a tlangpuiin khawpuiiah kan nei si a. An han zir chhuak a, Health Mission lamah kanhan ruai dawn a, keiniin kan dahna tur kha Lungsen, Chhualung etc. tih velte a lo nih khan khawpui an lo duh zawk si a. Market-ah hian hralh hi an tla lutuk tlat mai a, kan chang zo thin lo lai hi a buaithlak a ni. Tlang deuhin ka sawi a nih chu.

Tin, ZMC pawh hi a buaithlak em em mai a. ZMC recognition hi a la hun lo hrim hrim a, Member thenkhatte khan an hrechiang lo a nih ka ring a; kumin kumtir lam ni turah phei chuan kan ngai a. Inspection an lo kal leh dawn a, uluk takin an han en ang a. Chuvang chuan, a hunah recognition ti tura commission te an lo kal hunah khan a chiang mai turah ngai ila. Hun harsa, hun khaihlahkah kan sawrkar hi a ding a ni.

Tin, chiang deuha ka sawi duh chu – doctor lak kha Health Mission hnuaiiah chuan a theih reng a, lak tur an awm miau loh chuan tihngaihna a awm lova. Tunah pawh hian ZMC-ah hian associate professor kan han la dawn a, department bik zel kha a lo awm a ni, medical college-ah chuan. Rin aiin India ramah hian medical college a tam em em mai a, kan chang thei mang lova, pitar-putar ve tawh tak tak kha kan thlem lungawi vel a, a buaithlak khawp mai. An han awm a, kan thlaler ve bawk si a, Mizoram awmna hi. An han haw leh a, a then chu tha taka (kum 70 pawh) awm chu an awm a. Mahse, rin ai hian market ah hian hmuh tur an vang em em a ni. Chuvang chuan, kan Chief Minister zahawm tak, kan governing society Chairman pawh kan rawn a, a awlsam zawng -

online interview te, ‘Mizoram-a lo kal kher lova interview awlsam dan hi apply ang u’ kan ti a. Chutiang chung pawh chuan a buaithlak; a har khawp mai. Faculty-ah hian pawisa awmlah vang ni lovin, a mihring hmuh hi a har em em a ni, medical bikah hian.

Tunah pawh hian thil lawmawm deuh chu (tukin zingah khan kan ngaithla a,) Aizawl civil hospital-ah cardiology - super speciality doctor tha lutuk mai; pawn lamah chuan nuai hlawh pawhin an sawm ka ring a Mmahse, kan chang hram hram a ni. A har lutuk; cardiology-ah Dr. Loncy deuh chiah kan nei a, mahse, kan neih belh ta a. Tin, kal (nephrology) hi a pawimawh lutuk a, chuta doctor tha tur chu pakhat a rawn zir chhuak nawlh mai a. Kan chang lo ang tih hi kan hlau lutuk a, Aizawl a lo thlen hma khan kan book lawk a, tunah hian kan *engaged* tawp mai a ni. MPSC nen pawh recruitment an tih hian (midang compete tur an awm loh pheh chuan) ‘a awlsawm zawnga tih dan min ngaihtuah sak rawh u’ tih chen khan kan indawr a. Chu chu vawiina doctor-te dinhmun a ni a, lak mai tur awm lo lai kha kan buaina a ni. Kha kha member ten an hriatthiam loh chuan, ‘engatinge, min duhsak lo bik em ni’ tih kha a awm duh khawp mai a. Mahse, kha lam kha a ni lova. Tunah hian ZMC-a MBBS zirlai - first batch, 2018 mi 100 dawn lai kumin kum tawp lama an chhuah chuan, lak tur kan ngah tawhin ka ring a, kan harsatna pawh a kiam deuh duakin ka ring a. Chu chu chiang deuha kan hriat ka duh a ni. Kan tlangval - nula te rinai hian an zir chhuak a, kan han dawr a, kan tlawn kual vel a, “ti hian lo thawk phawt ula; Lungsen-ah te, Tuipuibari-ah te; cheng sing 6-7 hlawhin” kan han ti a, kan sawm tlu thei lova; Aizawl ah vel bawk lo chuan kan sawm tlu thei lo a ni. Covid laia volunteer tam tak te ang kha a ni bawk si lova. Chuvangin tlang deuhin, ‘harsatna kan tawk a ni’ tih House hian kan hriatloh chuan sawrkar demna kha a awm thei a. ‘Tu pawh sawrkar se, he harsatna hi an tawng’ tih kha kan hriat tlan a tha a. Hmanni khan hei hian sawi a hlawh em avang khan, sawifiah tulin ka hre deuh a nih chu.

Thil lawmawm ve tak tak Health Department-ah hian a thleng thin a, kan lawm ve khawp mai a. National Health Mission hi India Prime Minister - *flagship programme* a lo ni bawk a. Kum 2022 December thla ral hma khan india ram pumpuih sub-centre 1,50,000 lai Health & Wellness Centre-ah hlankai tumna kha a awm a. India ram pumpui achievement ka hre lova, Mizoram chu kan ti tha viau mai a. March, 2023 ral hma hian sub-centre 313 te upgrade vek hman turin tunah hian hma kan la ta a. Sub-centre chauh a ni lovin, Urban Public Health Centre 8 lai kan upgrade dawn bawk a. Tichuan, 378 te hi Health & Wellness Center-a hlankai, March Ni 31 hma hian kan inbeisei a ni. A lawmawm khawp mai. Tichuan, Health & Wellness Centre 368 hlankai tawh bakah khan, tlem te tunah kan bakah hian min han belh ang a, chu chu kan achieve thei turah kan ngai a ni.

Health & Wellness hian pawimawhna hrang hrang a nei a. Sub-centre te kha, *entirnan* - Health & Wellness a nih chuan, B. Sc (Nursing), M. Sc (Nursing) kan post ta a. Mahse khang ho kha post tawp ni lovin, thla 6 chhung IGNOU-ah training an va nei

phawt a, damdawi an chawh ve na tur te kha, ‘doctor te nau an ni e’ ka ti a, fiamthuinn; khangho khan eng emaw chen chu sub-centre kha an ti changtlungin, thisen test kit te, leh equipment leh hmanrua neuh neuh ang chi te kha hei hian an keng tel bawk a. Chuvang chuan, tun dinhmunah Mizoram hian kan ti tha khawp mai a, ‘kan lawm ve khawp mai’ tih kha ka han sawi duh a ni.

Tin, a dang lebah chuan, IPHL hi ‘Pradhan Mantri’ an ti a, ‘PMJVK’ an ti bawk a, he scheme hnuaiah hian laboratory changtlung zawk neih theihna tura ruahmanna tunah hian a kal mek a. IPHL chu ‘Integrated Public Health Laboratory’ tihna a ni a, Mizoram bik district 10-ah hospital din turin Ministry of Health & Family Welfare-in tunah hian min ruahman sak a, kan lawm khawp mai a. Hei hi thil thar danglam tak a ni dawn a, chubakah chuan Covid Care Block (CCB), ‘covid-care hospital’ te pawh kan ti awm e; PMJVK leh ECRP-2 atang hian district pahnihah (hospital a ni mai ang chu) pakhat ve ve din phalna kan nei thei dawn a. Sum pawh hi a tam tham ang reng riau a, vaibelchhe 23.75 ve ve a ni dawn a. Pakhat champhai-ah (hmun an neih sa avangin champhai hospitalin an chang dawn a) engkim mai a fel vek tawh a, pakhat ZMC-ah a ni a. Hmun a ngai zau a, district hospital tam tak erawh chuan kan chang thei lo tlat, a leng lo a ni. Hetah hian emergency service te, inzaina - surgical lampang te, ICU te kha a keng tel dawn a. Tin, tunlai khawl tha tak tak te kan dah dawn a, covid vanga central sawrkarin fimkhur taka kal a pawimawh a ni tih hriatna atanga heng thil hi lo chhuak a ni’ tih a lang a ni. A lawmawm ang reng khawp mai.

Tichuan, kan Medical College recognition chungchang kha chu ka chhang maiin ka hria a; *final recognition* hi huphurhawm ang reng takin lang mah se la, kan paltlang turah chuan kan beisei a. A hnua thil awm dan tur kha chu - tikhan a *in-kahphuk-chaw* mai a.

ZMC chungchangah hian, *achievement* pui ve deuh deuh kan ngah riau mai a, chungte chu -

1. Academic building hi Mizoram-a single project (buiding) ah chuan ‘a lian tha ber mai awm e’ ka ti a. Kan hon. CM hian, “Union Minister-in hawng zawk se, min rawn tlawh pahin,” te a ti a, hun a la fix chiah lova. Tunah hian vaibelchhe 103 senga kan sak kha kan zo tawh a.
2. Boys & Girls Hostel, students 160 awm theihna vaibelchhe 10 man hi kan zo tawh bawk a, Director chenna tur quarter pawh kan zo tawh a. Tin, tunah hian Boys & Girls Hostel pakhat ve ve, vaibelchhe 10 ve ve (avaiin vaibelchhe 20) tunah hian thui tak kan kalpui tawh bawk a.
3. Intern Hostel, mi 60 leng tur hi vaibelchhe 67000 hmangin tunah hian sak mek a ni bawk a.
4. Civil Hospital ai hian an nei that ka ring deuh a, Paying Cabin an nei tha dawn khawp mai, ZMC hian. Paying Cabin hi 52 kan nei dawn a, hetah hian sum pawh

ruahmanna a kal a, an sa zo tep tawh a, thla leh hi chuan a hawn theih mai awm mang e.

ZMC hian medical department 7 tunah hian kan nei a, clinical department pangngai 14 kan nei baw a. Faculty hi Professor Associate, Professor Demonstrator leh JR te, khang zawng zawng nena belhkhawmin 140 tunah hian kan nei a ni. Kum khata student *in-take* (kan admit theih) hi 100 a ni a. Seat allocation kan tih dan hi - State quota - 70 a ni a, 15% central quota a awm ve a, NRI quota - 15% a ni baw a, khatiang kha admission kalphung chu a ni.

Tukin zingah khan kan Vice-Chairman khan chiang takin a rawn sawi a, ZMC hi kan han sorkar hlim khan ICU a lo tam lo angreng khawp mai a, 13 a awm a. Tunah hian NICU (naupang ICU) neuh neuh nen chuan 50 chuang kan lo nei ta der mai a, khum pawh 140 - 150 inkar vel kan han lak hlim kha chuan a awm a, tunah erawh chuan khum 400-a chhiar theih tur ang thuakin kan nei ta a. Tin, khum 100 dang dah belh leh turin ruahmanna kan peih leh tawh baw a, khum 500 awm theihna tur hospital tunah hian kan peih thawkhat tawh a ni. Pu Speaker, hei hi a ropui ka ti em mai a, khum 500 awm theihna hi tam tak a ni. Civil hospital, Aizawl hi 300 anga ngaih a nih laiin ZMC chu 500 a tling dawn ta hi a lawmawm em mai a, ka han tarlang ve hrim hrim duh a ni.

Tin, heng bakah hian thil tam tak a awm a, nichinah khan kan ngaithla tawh a. Oxygen plant hi ZMC-ah hian *litre per minute* (LPM) 1000 chuang kan nei tawh a, tunah chuan kan hnianghnar khawp mai. Covid awm tan tirh lai kha chuan kan thlaphang a ni; tunah erawh chuan kan hnianghnar ta a, Aizawl Civil Hospital ah pawh hian kan nei tha thawkhat tawh khawp mai a. Tin, oxygen plant hi 'Cancer Hospital' kan tih, Mizoram State Cancer Institute ah kan dah baw a, tin, Kulikawn hospital ah kan dah baw a, hmun thumah tunah hian kan nei a. Tin, District Hospital zawng zawngah oxygen plant kan bun fel vek tawh a ni.

Tin, heng bakah hian thil tam tak ZMC ah sawn a awm a, ka sawi vek tawh lo mai ang a, a neuh neuh kha chu. Nakinah Health Department a thil awmte hi ziakin, a bu ang deuh te pawha siam kan tum tho baw a, ka sawi zel tawh lo mai ang a, tikhan duh taw k mai ang.

Thil pakhat – Member thenkhat khan an sawiin ka hria a. Mizoram-a State Cancer Institute kan neih lai meka saw saw tlawh ve ula ka duh khawp mai. Tuna kan khawl pui ber, nikuma kan Chief Minister-in a hawn pheih kha chu khawl turu tak mai, *computerized* vek a ni a, sawng saw chu Pu Speaker, international level-a an hman a nih ka ring a, India ramah hian hmun tam takah a awm ka ring miah lo. A to a, crore 20 dawn lai a nih ka ring a; USA siam a ni a, a tha khawp mai a; sawng te saw kan han dah thei ta a.

Tin, chubakah, tun hnaiah kan khawl rei tak kan lo hman tawh Dr. Silvera hunlaia neih tawh kha, a lo rei tawh deuh a, a lo tha tawh lova. Chung khawl hlui thlakna te pawh a ni ang chu, Global Therapy - Equinox 80 tunah hian kan commission (ti mai ila) kan bun fel vek tawh a ni. Tin, heng bakah hian ‘brachy-therapy’ an ti a, taksa chhunga cancer hemna khawl ang chi te, tin, linear accelerator leh global therapy te hmanga hem kim theih loh hemna tur kha a ni a, a danglam khawp mai a. Tunlai thil siam dan hi hmanlai nen khan a inang tawh lova, khang te kha kan han nei ve ta zel a. Tin, heng zawng zawng hi kan lo neih tawh sa tih changtlunna angah khan ngai ta ila.

Tin, tun sorkar-a thil danglam tak thleng ta chu – kan sorkar hlim khan kei pawhin ka huphurh khawp mai a, sum te a ngai tam si a. Tin, State sorkar pawhin eng emaw chen ‘commitment’ ti mai ila, kan inzuam ve a ngai a, kan inphal ve pawh a ngai a, mahse khang zawng zawng karah kan paltlang zo ta a. India ramah pawh zahpui awm loh tak, hmarchhak state ah pheih chuan, kan sak zawha kan din chuan a tha ber tura ngaih Pu Speaker, Mizoram State – Super Specialty Cancer & Research Project hi JICA (Japan International Cooperation Agency) nen thil kan ti fel ta hi a lawmawm ka ti a. A nuai hlir, cheng nuai 70,000 a ni. Hei hi Zemabawk tlangah sawn kan tifel thei dawn ta a. Tunhnai lawkah kan Principal Secretary te an zuk kal a, March thla tir khan India sorkar leh JICA hian a final lehkha kha sign turin an ti a, keini pawh kal thlak kan duh ve a, mahse G20 avang hian kan tlai deuh hlek maithei a; chu chu vawinah hian peihfel vek a ni ta hi a lawmawm ka ti a. He hospital hi *200-bedded* anih angin nuclear medicine te, PET scan te, cancer research & training te a keng ang a, tin, ‘capacity building of healthcare personnel’ tih te a a keng tel dawn bawk a. Research tihtheihna tur hmun a ni dawn bawk a, a tha viau dawn niin a lang a. A satu Japanese ho hman deuh khan ka zawt a, ‘engtikah nge in peih theih ang’ ka ti a. Kan ram leilung awmdan, Zemabawk tlang vel saw a rem lo ve deuh bawk a, a landscape te saw tihdanglam a ngai turah ngai ta ila. An sawi dan chuan, “kum 2028 tawp lamah hian commission theih kan beisei” ti khan min chhang a. Kumin kum tawp hian (kan sawrkar leh chuan) a lehpek inthlan dawn hnaihah chuan a hawn theih vel dawn ni ang. Pu Sangte, kan hawng hman vel chiah chiah maithei a ni. Engpawh nise, hei hi kan kutchhuak ve ah ka ngai a, a lawmawm ka ti ve hrim hrim a. Cheng vaibelchhe ₹700 chu telo tak a ni. Nuai ₹70,000/- tihna a ni a. Pu Speaker, chu chu he House hi ka han hriattir ve duh hrim hrim a, a lawmawm ka ti em mai. **(Pu KT Rokhaw:** Khawngaihin, Siaha hospital tana CT scan ‘ka pe ang che u’ I tih kha, engtikah nge min pek theih ang?)

E..., ngawi rawh; ngaihtuahna ka pe ang che u; chuti tawp chuan ka sawi ka ring chiah bik lo; amaherawhchu, a pawimawh zia kha chu ka hriatpui ve che u. Tin, han vui dawn chuan, vuina tur hi a tam khawp a, khawvel hi; district hospital building nei tha berte zinga mi inni a, ka rawn hawn te kha; Lawngtlai pawh a thar. Kan district te chu district thar a ni a, kan la nei reng reng hleinem. Lawmna tur hlir chu a nihloh pawhin, *lawmna* percent kha chu a sang ve tak turah ka ngai deuh a. Engpawh nisela, kan lo hria ang e. Kan lo chhinchhiah ang a, tih theih dan tur kawng remchang kan lo ngaihtuah

pui dawn che u nia. Engpawh nisela House-a commitment siam ngawt theih a ni lova, khatiang khawl thilah kha chuan.

A dang leh ah chuan - hei hi tumanin in sawi lova, mahse sawi hi tul ka ti deuh a, Pu Speaker. Sawlai, Zemabawk tlanga sawn kan sawrkar hnathawh anga sawi theih chiah loh, 'RIPANS' kan ti a; Pu Speaker, nang chuan i hre bel khawpin ka ring a, 'Regional Institute of Paramedical and Nursing Sciences' tihna a ni a. Kum 1995-96 khan NEC hnuaiah a awm a; tichuan, 1st April, 2007 atangin Ministry of Health & Family Welfare hnuaiah a awm leh ta a, development saw a turu khawp mai a. Tin, hetah hian course chi hrang hrang - nursing te, medical technology te, pharmacy zirna te, radio imaging technology te, optometry leh course tam tak a awm a ni. Tin, MLT certificate neih theihna te, health-worker te, MLT-diploma course, D. Pharm te, ophthalmic-technician te, ECG-technician te, x-ray technician te, B. Sc (Nursing), B. Sc (MLT) te, B-Pharm, M-Pharm thlengin Pu Speaker, tunah chuan a zir theih ta a, a chhuak pawh hi an lo tam khawp mai. India ramah hian RIPANS ang hi, hmarchhak-state ah hian Mizoram hi beneficiaries state-ah pawh kan intitatu ve ta riau a. Tin, Govt. of India pawhin min ngai pawimawh a, mi 3291 lai mai sawta tang sawn an han pass chhuak tawh a. Tin, thil lawmawm deuh chu, market-ah hralh an tla a ni. Heta zir chhuak hna hmu lo an tlem khawp mai a, placement hi 100% chu a ni chiah lova, 93% vel a ni. A lawmawm khawp mai.

Hei hi ka sawi lo thei lova. Kan han sawrkar hlim khan project lian tak a kal a, zuk nawrchhuah a har ve khawp mai a. Amaherawh chu kan vannei ve ka ti a, 2019 khan saw mi upgrade-na tur cheng vaibelchhe 480.12 crore kha a ni a, chu chu Ministry of Health khan, (covid awm hma deuh te pawh a lo ni bawk nen) engtin tin emaw a rawn sanction ta a, civil work - construction work-ah vaibelchhe ₹217. 97 a lo kal a. Tin, a hna zawh hun chhung tur te pawh a rawn tuk thlap mai a, '24 months' tih a ni a, tun thla ni 28 hi zawh hun tur a ni a, mahse covid avangin hei, an thei dawn ta lova. Hetah hian guest house unit 10 sak hna hi 97% an zo tawh a, staff-nurse quarter unit 18 te, general hostel block - single room ringawt pawh 168 a awm dawn a. Tin, *100-bedded hospital* tunah sawn an sa mup mup a, keini state hian 100-bedded hospital sak nana vaibelchhe ₹20 kan sen lain, anni chuan budget provision ah vaibelchhe ₹60 an dah a, an sa tha dawn khawp mai a. Tin, resident doctor quarter unit 22 te, academic block atan ringawt pawhin classroom 18 te, laboratory ringawt pawh 32 a keng tel a ni. Tin, indoor sport complex lian deuh mai tunah sawn cheng vaibelchhe 480 sengin an khawih tawh a. Tin, PG department hrang hrang 7 hawn belh a ni dawn a, chu chuan post chi hrang hrang 154 a keng dawn a, a lawmawm ka ti em mai a. Mizoram hi a awmna a ni bawk a, RIPANS hi a chhawr ber turah Pu Speaker kan inngai a, hei hi ka han sawi chak ve hrim hrim a ni.

Thil dang dang chu sawi tur chu ala tam mai a, mahse thenkhat chauh ka han tarlang leh puat puat ang a. Healthcare chungchang kan sawi thin a, a sawiloh theih

lohin ka hria a, kan opposition te pawh khan tha kha in ti hlein ka hria a, kan sawrkar hlim khan. Tin, in ziaklut chungchanghah khan, ni e, tun hnaiah tlemin a tlahniam tih te kha chu a dikna lai a awm a, mahse ti zawng hianin ka han sawi ang a - Congress sawrkar laia inziak lut an tam lai ber khan 76,746 a ni a, MNF sawrkar laia inziaklut tam ber lai chuan 1,13,720 a ni, Pu Speaker. Tan kan la kha a sawt khawp mai. Tun hnaiah inziaklut tlema a tlak hniamna chu – eng emaw chen lo inziaklut tawh an awm a, an beidawn vang lampang pawh a niin ka hre lova.

Tin, bill an lak harna chhan pawh kan hriatchian tha ka ti a. State Fund atangin budget-ah vaibelchhe 50-60 bawr vel kan han nei ang a, kha kha chu kawngdang ni sela. Tin, hei bakah hian Asian Development Bank kan dawrna kawngah pawh hian thil lawmawm tak tak a awm bawk a. Nikuma min pek dawn khan kan Chief Minister zahawm tak hi he *kan healthcare* hring chhuaktu a ni bawk a. 2007-08 vela ADB loan tho a healthcare kan lo kalpuina kha an hre reng a, chuta an minute hi ka han chhiar chhuak teh ang; a ngaihthlak kha a nuam ve a. India ram hmun tam takah hian loan vaibelchhe 1000 inpek hi har tak a ni. Mizoram-in vaibelchhe 1000 kan zu dil a, chuta Ministry of Finance in an ziahah chuan, “In view of the healthcare needs being critical at this point of time in Mizoram, as the pandemic is not yet over and also the fact that similar measure has been successful in the state of Mizoram earlier” an han ti kher hi hriat a nuam ve khawp mai a, ‘in ti tha’ an ti ve tlat mai a ni. Khatia kan han kalpuia ADB loan kan lak hmasak chungchang an rawn comment-na a ni a, “therefore, the request of the state govt. could be considered favourably” a ti kauh mai a ni. Kan CM pawh hian a hmu maithei; an ziak tha lutuk. Chuvang chuan, a lawmawm riau a.

DR. ZR. THIAMSANGA : Pu Speaker, *Point of clarification* - Congress sawrkar kum 10 chhung khan healthcare hnuiaia damlo bill kha engzatnge an pek? Tin, tun MNF sorkar chhung kum 5 chhung khan damlo bill pekchhuah zat kha min hrilh thei em?)

DR. R. LALTHANGLIANA, MINISTER: Tun maiah chuan han chhan thut kha a har deuh a. (**Dr. ZR. Thiamsanga:** Hei hi a dik em – ‘Damlo bill an pek zat kum 10 chhung khan cheng 82,82,443 a ni a, tuna MNF kum nga chhung hian 13,14,336,500 a ni’ tih hi?) A lawmawm e.

Tin, Pu Speaker, ka sawi duh chu - kan pek zah kha ka lo inring chiah lova, vaibelchhe 100 chuang zet chu kan lo pe a. Chutih lai mek chuan, kan healthcare hi a tha a ni tih ka sawi duh a. Chhungkaw pakhatin an damlohin kumkhat atan nuai 2 entitlement an nei dawn a. A sema sem ni lo, an damloh chauhin, damlo chhungkuain. Khami an han hria kha, enrolment kan han drive em em hma pawh khan thil tih kha a nuam em em a ni.

Vawiinah pawh Asian Development Bank kan zu bia a. Kan Chief Minister pawh hian a ngaipawimawh em em a, an country director office ah te pawh a kalin ka hria a. Tin, kei pawh vawikhat chu ka zuk kal zawk a. Tin, hmanni lawk khan ADB-a an mithiamte pahnih hetiang lampanga ngaihtuahna hmang bik, ‘consultant’ kan tih ang kha Mizoram-ah an lo kal a, Finance Department leh Health Department te nen pawh thil tam tak an sawiho a. Tunah hian transitional period-ah hian kan awm a ni. Doctor kan lak theih mai loh ah pawh nichina harsatna ka sawi healthcare-ah pawh tunlai tak pawh hi a thaw-i-pik-thlak hun lai takah hian kan awm a. Mahse kawla a eng dawn a ni. Tun atanga rei vak lovah hian kan lawm leh mai ang; a harsa ve ngang a ni. Tih theih hun a awm ang.

ADB te hi an strict em em mai a. Hetia minute fel taka an rawn tih hnu pawh hian thiltih neuh neuh tur a tam em em mai a. Chuvang chuan, khang zawng zawng kha kan hriatthiam hram hram a ngai a. ADB loan kan han tifel a nih chuan hahdam deuhin kan bate hi kan clear ka ring a. Tin, ADB loan kan ti thei chiah lo a nih pawhin, kan tih hma pawhin, State budget-ah felfai takin eng emaw chen dah a nih takah chuan kan in clear chho theih zel ka beisei a ni. A hunlai hian kan han inti vak thin na a, nakinah hei hi chu awmze nei takin kan insukiang thei turah ka beisei a ni.

Hei, infrastructure-ah hi chuan thil a tam khawp a. NABARD-24 hmang khan nuai 940 kan seng a, ‘PHC – 5 leh sub-Centre - 10 kan sa a’ tih te kha a awm a. NABARD-25 hmang hian nuai 2003 kan seng a, PHC - 7 kan sa a, sub-Centre eng emaw zat nen. Tichuan, NABARD-26-ah hian nuai 1957 kan seng a, PHC 4, sub-Centre 8. Tikhan chawl mang lovin kumtin hian hna kan thawk a.

Tin, Article 275 hmangin pawisa kan hmu bawka a. Chubakah chuan, tun Inrinni hian dam tea kan awm anih chuan Lunglei-ah RTPCR a lar lai khan a dahna mumal lova, Tourist Lodge ah kan chei a, kan han ti phawt a. Tunah erawh chuan RTPCR tam tak a dah theih tawh a. Kan Civil Hospital saw feet 70 a sei anih ka ring a, a sei khawp mai a, RTPCR khawl dah dawn ta ila a leng hnem e mem dawn a ni; a chungah chhawng thum a la awm lehngal a. SEDP atangin kan CM in ‘bul tan ang’ a ti a, min pe a. Chumi hnuah vanneihthlak takin NEC atangin pawisa kan han hmu leh teuh mai a, ‘a hnuai ber saw hawng phawt ila, tourist lodge a kan khawl te mikhual tir reng ai chuan’ kan ti a, hawng turin kan in buatsaih mek a ni. Eng pawh nisela, RTPCR kha covid-ah hman ngai tawh lo mahsela, nakinah RTPCR chauh ni lo te pawh. Kan building hminga pawh hi ‘Integrated Laboratory’ kan ti a, ‘Civil Hospital, Lunglei’ tiin kan dah daih a. Multipurpose deuhin chhim lampang Siaha, Lawngtlai, Chawngte, khang zawng zawng ina kan hman theih turin ruahmanna kan siam a. Tin, a chung chhawng thum vel bawra saw thildang tam tak atan kan hmang tel thei turah kan ngai a, a lawmawm khawp mai. Tichuan, CSR-ah hian kan tluang riau mai a. Hei, Power Finance Corporation Limited atangin Mamit District Hospital kan sa zo tep tawh a, nuai 1793 a ni. Hemi sawi hi chuan bialtu hi a nui deuh char char thinin ka hria, a lawmawm khawp mai. Aspirational

District-in a zar an zo a. Tin, Power Grid Corporation atang vek hian Serchhip tan cheng nuai 2100 tunah hian sum ruahmanna a awm tawh a, kha kha kan kalpui turah ngai ila. Tin, Indian Oil Corporation hian ICU 15-bedded siaman tur min pe a, Makeshift ICU te min pe bawk a. Mi thatna zar hi Health Deptt. hian kan zo nasa khawp mai a.

Tin, chu lo lelah chuan, NECIT hnuaiyah hian Kolasib District Hospital tunah khuan kan sa tan mek a, a kal thui viau tawhin ka ring a; Pu Rintea bialah nuai 2000 project lian tak hmangin Kolasib District Hospital tunah hian kan sa mek a ni. Tin, Civil Hospital, Aizawl Cardiology Department hi expansion tunah hian kan kalpui chho mek a. Tin, ‘HIV (Aids)’ tih aimah khan ‘State Resource Centre’ tiin office hming hi kan dah a, hmanni lawk khan a foundation kan va laid a, nuai 392 sengin MINECO-ah sak a ni. Tin, heng bakah hian ZMC-ah ICU, PICU - naupang ICU te, High Dependency Unit (HDU) te dinna tur a tan hian sum tam tak kan hmu bawk a ni.

Tin, hei, Ministry of Ayush hi an thilphal viau dawn emaw kan ti a, an thil phal tho a; keimahni khan inchinfel ve ngai kan nei thin a. Amaherawhchu, hei Kulikawn-ah sawn 50-bedded Ayush Hospital, nuai 1500 senna tur tunah hian phalna kan hmu tawhah ka ngai a. Hei, kan Power Minister hi a vannei riau dawn a, 10-bedded Ayush Hospital, Saitual-ah in nei dawnin a lang a; tunah hian a sanction kan nghak mek a nih chu. Saitual-a a awm nawlh dan hi; a hmun hma kha a lo remchang a ni ang a. Tin, thil lawmawm deuh chu - District thar pathumah hian kan Deputy CM hi a bial a ni a, Pu Zira a ni bawk a, kei ka ni bawk a. A thar denchhen hian a nih ka ring a, tunhnaiah District Hospital tak tak sakna tur vaibelchhe 17 theuh kha; thutak an sawi ka ring a, a sanction lehkha chu ni chiah lova. ‘Hmu tlukah inngai rawh u’ min tih avangin ka han sawi ve ngawt a nih chu. Kan hmu dawn a ang khawp mai. Kan la nei lo ve bawk si a, keini pathum khan.

Tin, CMO office hi district pathumah tunah hian 4 crore bawr vel theuhin an sa zo deuh vek tawh a, Khawzawl, Saitual leh Hnahthial ah te. Hei hi thil lawmawm ve tak niin kan hria a, Tin, ‘Mizoram Health System Strengthening Project’ kan tih mai World Bank project-ah hian sum kan hmang nasa khawp mai a. A tirah khan World Bank hi an strict khawp mai a, tunah erawh chuan, ‘Mizoram ah hi chuan strict lutuk teh suh u a, flexible deuh teh u; in pawt fan ve deuh teh u. Eng eng emaw chhunkhah nan pawisa kan mamawh em mai; state fund atang a tih theih siloh’ kan ti a, tunah hi chuan kan tha ta viau mai a; chumi hmanga vaibelchhe 280 kha tihlawhtling kan ni a. Hei, kan han hmang chho tan a; nikum atang khan hemi hmang hian - hna tamtak sub-center te, PHC te leh District Hospital thlengin kan thawk chho thei turah beisei ila.

Commerce & Industry hi tawi tein han sawi a tulin ka hria a. Geology & Mining hi Pu Lalrintluanga Sailo khan ‘department lam hlawh lo deuh, pawimawh deuh si’ a ti a, a dik khawp mai a. Pawisa pawh a la lut hnem khawp mai a, an titha khawp mai a. Covid karah pawh 2020-2021 khan nuai 497 lai an thawk chuak tho a. Tin, 2021-2022

khan nuai 632 zet an lalut baw k a. Kumin financial year a la tawp lova, ‘10 crore hi kan tlin mai awm mang e’ an ti a ni. Tlin an tum a ni. Chutaing avang chuan Cabinet meeting hnunung ber khan, ‘thawktu in awm si lo; a bik takin chhim lampang Lunglei-ah zonal office pek in ngai a ni’ an ti hmiah mai a, tumah khan objection kan nei lo. Post 13 keng tel kha kan hlawhtling ta a, a lawmawm khawp mai a. Sawlam panga kan hawng thei anih chuan revenue tam fe alo lut in ka ring a. Vaibelchhe 5 vel lo lut thina kha, 15 hi kan tawng thuai ka ring a. Chuvang chuan, ‘*revenue earning department*’ a nihna hi a hlu em em mai a, kan hotute pawhin an duhsak a. Tin, a department hna pangngai bakah hian heng Super Speciality cancer hospital, nichina ka sawi soil testing leh khang geo-tech survey zawng zawng kha an tih a ngai a. Mimal in lian deuh sa te leh leh sorkar in sa te khan an ko phar a, an buai em emna karah ‘revenue lalut tamtak anni’ tih hi kha House ka han hrilh duh hrim hrim a. Tin chu bakah chuan, Mizoram-a Oil and Gas exploration chungchang te pawh hi an hma tel a. Tunhnaiah company te pawh kan ko chho a, kan sawpui baw k a. Engpawh nise, he Geology & Mining hi a hlu a ni.

Tin, post ruak tamtak hnawhkhah loh te pawh a awm a, kan finance leh DP&AR te pawhin an dinhmun hrethiamin tunah chuan a zualpui te min han pe ve ta a, nakumah chuan kan zia kawkin ka ring a. Nikum September thla khan Hyderabad-ah Mining Ministers’ Meeting kan nei a, Orissa han tihthat zia chu, India ramah hian a filawr lak a, an state mining atanga an pawisa lakluh vaibelchhe 50000 a tling a ni. An Principal Secretary kha a chapo deuh ar ar in ka hria a, ‘keini chu central sorkar kan mamawh vak lo’ te kha a ti kher a; Union Minister awm lai khan; an mamawh lohna chhan chu, ‘kan intodelh khawp mai’ a tihna a ni a. Mining ah chauh khan vaibelchhe 50 an lalut a ni. Mizoram pawh hi kan tih fuh chuan helam hi kan revenue lak luhna tur atan hian a thain ka ring a. Chuvang chuan vawiin niah hian sorkar pawhin a ngai pawimawh hle a ni.

Aizawl City Market-a *foreign lane* kan sak mek te kha chu question-ah khan ka chhang vek tawh a, kan Deputy CM portfolio zawk kha a ni a. A bulah Smart City hnuaiah in lian lutuk nuai 4200 senga sak tur bul an han tan chho te, hmalak a ko hle mai a.

Tin, Lunglei hi an vannei hi ka ti a. Tun Inrinni khan kan va kal a, a foundation kan va laid a. ‘Sobji bazar’ kan tih mai thina kha a hlauhawm lutuk tawh a, thiaha sak that a ngai a. ‘Sum engtin nge kan tih ang’ kan tih laiin vanneihthlak takin NEC atangin nuai 1403.4 min rawn sanction ta a. Lunglei khawpuiah chuan Super Market tha tak kan nei thei dawn a, kan lawm khawp mai. Hei hi Lunglei tana thil tangkai tak a nih kan beisei.

Tin, kan border haat te, kan border trade te hi chu kan kal tluang khawp a. Amaherawh chu Bangladesh Minister hial pawh nikumah a lo kal a, Silsuri-ah helicopter-in kan zuk hruai a. Kawrpuichhuah-ah te kan va kalpui a, ‘thil tih zungzung

a ni dawn e' tia kan beisei mek lai khan Bangladesh (Myanmar ang chu nilo mahsela, harsatna kan hre vek a) chhim lamah buaina a lo awm ve leh a, tlemin a boruakin a zir lo leh hlauh mai a. Tin, Zokhawthar hi tunah hian nuai 1500, 'Special central Assistance to State under Capital Expenditure' tih atang khan hmuh a ni a; Land Custom Station sakna tur te leh infrastructure pawimawh tak tak tihna tur kha a ni dawn a. Hei hian Immigration check post te, animal quarantine station te, plant quarantine station laboratory te, food testing laboratory te kha a huam dawn a.

Dr. Thiamsanga kha a tang khawp mai a, 'khilam pang kha engtin nge ni ang?' a ti a. Chak takin hei chu kan kalpui thei a. Amaherawhchu, Myanmar sorkar mumal loh, 'sipai rorelnaah hi chuan a buaithlak deuh anih hi maw le' tih hi chu a awm a. Engpawhnise, hei hi chu kan chawl lo a, kan kalpui zel e. Tin, border haat - khita Indo-Myanmar border haat pawh a la kal reng a ni. Engpawh nisela, 'khilam pang ralmuang lo karah thil tih zung zung a harsa deuh a ni' tih kha kan sawi ni mai se.

Tin, Pu Speaker, kan integrated check post, ACP-Kawrpuiichhuah, Lunglei District hi kan lawm khawp tawh mai a. Land Port Authority of India hian DPR a siam a, a tirah khan vaibelchhe 200 vel a siam a. Prime Minister atangin Kawrpuiichhuah border trade hi an ngaipawimawh anih ka ring a, an han revised a, an han siam leh ta a. An siam tam khawp a, vaibelchhe 550 vel kha an siam ta a ni; a tam khawp mai a. Chu chu Home Ministry-ah an thehlut tawh a, Home Ministry-in tuna a nghah ber nia lang ta chu - Bangladesh sorkar atanga *official clearance* kha tunah hian a nghak mek niin ka hria a. Bangladesh hi rin ai hian an che muang ve deuh hlek a, keini lam kan chet chak aiin. Amaherawhchu Land Port Authority of India hian tunah hian Kawrpuiichhuah fencing te chu min zawhpui tawh a. Tin, DPR an siam approval kan hmu anih chuan, hna chu a kal tha turah ngai ta ila. Engpawhnise, Kawrpuiichhuah - Integrated Check Post chungchangah hian Thekamugh, Bangladesh side leh Mizoram lam inkalpawhna tur lei thui tak mai dawhna tur erawh chu a hautak hle dawn a. Chung chu tihloh theihloh turah khan an ngai ve tho a, an hre lawk vek tho a, kaltluang turah ngai ta ila.

Pu Speaker, Zorinpui, Lawngtlai District chungchang pawh thil kal reng a. Delhi a kan zu kal pawh khan an chawhlsan bik miah lova. Amaherawhchu, political boruak - Myanmar te, Bangladesh te an thlir tel lo thei lova. Tin, heng border haat - Hnahlan, Zote, Champhai, Vaphai, Pangkhua, Thingsai, Cherhlun bakah khilai phei Pangkhua te pawh hi khulama kal hi chuan ngaihtuahna an la seng reng a. Tin, khawthlang lam pang - Marpara, Silsuri, Tuipuibari, Nunsuri te pawh kha a la kal reng a ni. Amaherawhchu, thil thlir an nei lo thei lova, sorkar ralmuang mang lova han indawr hian a la fuh theih chiah lova, principle chuan 'tha' an ti tlang a, lawmawm khawp e.

Hei, Industry Deptt. bikah hian thil danglam deuh hlek, thil thar a awm a. 'Industry Growth Centre, Luangmual' leh 'Export Promotion Park, Lengte' kan tih maiah hian industry unit te mamawh tui supply-na tur nikum hmasa khan NSE meet

atangin sum kan hmu a, nuai 900 ve ve kan hmu a. Hei tunah hian tui dahna tha tak mai crore 10 deuhthaw ve ve kan nei thei a, kan lawm khawp mai. Tin, Industrial unit awlsam taka an inbun theihna turin Aizawl, Lunglei, Champhai leh Kolasib-ah te Flatted Factory building sa turin tunah hian ruahmanna siam a ni tawh a, DPR hi MSME ministry hian min pawm sak tawh ang a ni a. Amaherawhchu, State sorkar atanga hei hi kan tifel ang a, IGC Luangmual, IIC Luangmual, IIDC Lunglei, IIDC Zote Champhai leh Kolasib atan te min rawn ruahman sak a, kan lawm khawp mai. Tin, hei bakah hian ‘Special Assistance to State for capital investment part-II’ an tih hi PM-Ghati Shakti - kan Industrial Growth Centre hnuai ah Lengte tihchangtlun nan vaibelchhe 20 kan hmu dawn a, amaherawhchu vaibelchhe 5 hi power supply lamah a kal thung ang.

Tin, SEDP hnuai ah Industry trade hrang hrangte tan chhungkua 3266 hnenah 1st instalment pek tawh a ni a, 2nd instalment pe leh thei thuai turah kan inngai a. Tin, Handloom-ah hian hlawhtlinna kan neih ve chu – puan tahtute dawmkanna turin hmun hrang hrang 12-ah *cluster development project* kalpui a ni a, hemi atan hian Ministry of Textile atangin sum hmuhtawh a ni a, heng kan cluster - Khawlzawl, Buanhmun, Tuipui, Tuirial, Lunglei East, Sailam East, Kawnpui, Lungrang, East Lungdar, Sesawng te, khatiang khan sum kan hmu nual a, a lawmawm khawp mai. Tin, Industrial Policy phei chu hmanni a zawhnaah khan ka rawn chhang tawh a, hei pawh hi kuminah chuan peih hman kan inbeisei a.

Sawi dawn chuan sawi tur tam tak a awm awm a, hun ka hmangrei ta khawp mai. Nizan kha dar 10 a ni a, a lawmawm e. Pu Speaker min hrethiam thin a ka lawm khawp mai.

Heng ka department chante demand hi House-a min pass pui turin ka rawn dil e-

Demand No.	Purpose	Amount (in ₹)
21	Higher & Technical Education	2,71,49,16,000.00
24	Health & Family Welfare	7,51,06,54,000.00
40	Commerce & Industries	62,00,66,000.00
TOTAL		10,84,56,36,000.00

Ka lawm e.

SPEAKER : Awle, tunah chuan Minister zahawmtak Dr. R. Lalthangliana'n a Demand te -

Demand No.	Purpose	Amount (in ₹)
21	Higher & Technical Education	2,71,49,16,000.00
24	Health & Family Welfare	7,51,06,54,000.00
40	Commerce & Industries	62,00,66,000.00
TOTAL		10,84,56,36,000.00

House-ah pass a rawn dil a. Remtiin, “Remti” ti rawh ule. (**Memberte:** Remti) Remti lo kan awm em? Remti lo kan awm chuan “Remti lo”, ti ula.
(*Remti lo an awm lova*)

Awle, Minister zahawmtak Dr. R. Lalthangliana Demand chu House--in lungrual takin a pass ta a ni. (**Dr. R. Lalthangliana, Minister:** Pu Speaker, ka lawm e.)

SPEAKER : Awle, vawiina kan business chu kan zo leh ta a, naktuk Ni 24 February, 2023, (Zirtawpni) chawhma dar 10:30 ah kan thukhawm leh dawn nia.

The Sitting is adjourned. (**9:21 PM**)

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR THIRTEENTH SITTING ON FRIDAY, THE 24th FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * **Resolutions**

LALHMAHRUAIA ZOTE
Commissioner & Secretary

* Please see Bulletin Part-II No. 290, dated the 22nd February 2023 for relative precedence of Private Members' Resolutions to be moved.

SPEAKER : *Chutichuan, nang chuan I Pathian hnen lam hawi la; Khawngaihna leh rorelna hmang la, I Pathianah chuan innghat fo rawh.*

- Hosea 12:6

QUESTIONS & ANSWERS

Zawhna & Chhanna kan la nghal ang a. *Starred Question* No. 201 - Zawt turin Member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, ka lawm e. *Starred Question* No. 201 - School Education Department changtu Minister zahawm tak hnena ka zawhna chu – “Lunglei North huam chhunga school building sak that tur lists min hrilh thei em?” tih a ni e. Ka lawm e.

SPEAKER : Chhang turin, a changtu Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak Lunglei North bialtu Dr. Vanlaltanpuia zawhna chhanna chu –

“Lunglei North huam chhunga school building sak that tura tuna ruahmanna kal lai chu - Govt. MS, Bualpui ‘V’ leh Govt. PS, Mausen additional classroom siamna turte a ni e. Hei hi NABARD-27 atan rawt a ni.

SPEAKER : *Zawhbelhna* - Zawhna neitu, member zahawm tak Dr. Vanlaltanpuia.

DR. VANLALTANPUIA : Pu Speaker, ka zawhbelhna chu –

Tun thla ni 8-a notification chhuakah khan Zotlang High School Headmaster kan nei loh reng hi min dah sak a, kan lawm hle a. Amaherawhchu, Govt. High School Mualthuam North-a Headmaster hi min transfer sak a, Govt. High School Haulawng-a Headmaster min transfer sak bawk a. A bik takin Haulawng High School hi exam centre a ni a, Headmaster neih loh hi a rem lo tlat mai a, min transfer sak ho hi min dah leh sak thuai thei ang em?

SPEAKER : *Zawhbelhna* - Member zahawm tak Pu Lalduhoma.

PU LALDUHOMA : Pu Speaker, ka lawm e.

Ka hriat sual loh chuan kum 2019 vel kha niin ka hria a, sorkarin MR tih tlem tial tial a tum laiin, MR teacher thahnem tak lak a ni a, an hlawh hi ni 1-ah ₹520/- a ni a. Thingtlang kilkhawrah deuh vek an awm a, a thente chuan headmaster charge te an la hlawm a. Headmaster charge an lak lai khan an hnuaiah khan an aia hlawh tam ten an

thawk a, discipline pawhin a tuar a. Heng ho hi provisional employees-ah tal hlankai theih a ni em? Ruahmanna a awm em? tih ka zawt a ni e.

SPEAKER : *Zawhbelhna* - Congress lam kan sawm ve ang e. Member zahawm tak Pu C. Ngunlianchunga.

PU C. NGUNLIANCHUNGA: Pu Speaker, ka lawm e. Budget session demand sawiho lai khan ka sawi a, mahse min react-na ka hre lo tlat mai a, ka han zawt nawn leh duh a ni -

i) Kan bial Lawngtlai West lamah hian Higher Secondary School kan la nei ve miah lo mai a, Bungtlang South leh Diltlang-ah khuan private ang reng deuhin an din a, Samagra atang te hian min dah sak ve thei ang em?

ii) Lawngtlai district-ah khian High School Headmaster post ruak hnawh khah tumna a awm em? Tun MNF sorkar chhung hian seniority hi vawihnih lai tih a ni tawh a, Lawngtlai leh Siaha lam hian kan chang lo ve khawp mai a, hengte hi min tih sak thei ang em?

iii) Kan Minister nen pawh hian kan sawi thin a. Vawiin hian House-ah min hrilhfhah se ka duh chu - District Council-ah sawn provincialization avangin State sorkar hian school enkawl a nei a, school pakhatat zirtirtu 2, Mizoram staff leh Council staff an awm kawp tlat mai a, hei hi sorkar hmasa atang pawha kan buaipui a ni a, vawiin thlengin a la kal a, administration a buaithlak khawp mai a. Chuvang chuan, provincialization staff zirtirtute hi district council-ah an dah luh theih mai lo em ni, Elementary chu district council chan a ni si a?

iv) Pu Speaker, lump-sum grant high school kan bialah 2 a awm ve a, a buaithlak khawp mai a, ₹2,50,000/-in kum 1 an inenkawl a ni. Hengte hi ad hoc-a hlan chhoh theih a ni ang em?

SPEAKER : Chhang turin Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak tak te zawhna chhanna atan -

Zawhna neitu Dr. Vanlatanpuia sawi ang khan, tunhnaiah High School Headmaster LDE-a tling te leh promotion-a kal chho te kan han nei a; chutih rual chuan pension-a chhuak eng emaw zat kan neih reng bawk avangin, han siksawi kual te kan nei a. Member zahawm tak Pu C. Ngunlianchunga zawhna pakhat Headmaster chungchang nen khan a chhan kawp theihin ka hria a. A then kan pelut a, a then kan lachhuak bawk a, hetiang hian indaihlohna kan neih ve avangin a theih ang angin kan sem rual a. Lunglei North, Zotlang lamah pawh khan an neih ngai reng reng loh headmaster thar kan han pe a. Chutih rual chuan a sawi ang khan, Haulawng leh Mualthuam North an school dinhmun te kan han thlir a, zirtirtute dinhmun enin.

Headmaster hi tun tumah hian hmundangah kan dah pawhin senior teacher, headmaster charge la thei awmte an awm tho bawk a, distrcet capital-a headmaster neih lohna school lian taka dah ngai te a awm bawk si a, anmahni khua te pawh a lo ni bawk nen, ‘helai hi la chhuak teh ang’ tiin kan han la chhuak a, a thenah kan pek belh thung a.

Chutiang chiahin, Lawngtlai West bialtu zawhna, “Siaha leh Lawngtlai lamte headmaster kan va khat deuh ve?” tih pawh kha, tun tumah headmaster han pek thar tlemte kan neihah Sangau - Blue Mount High School-ah headmaster thar kan pe a, a hnukung berah khan. Tin, Tipah-ah headmaster kan pe bawk a; a hmasa khan Siaha High School-ah kan pe a, saw lai ‘Zero Point’ kan tih thin, a hming thar berah khan kan pe bawk a ni. Siaha District-ah pawh 3 kan pe a, sawlai district-a school dangah pawh pek kan nei a ni. Lawngtlai bik tak saw Regional High School, Lawngtlai sawn headmaster a nei lova, pek pawh kan duh a. Amaherawhchu, hun rei tawh tak atangin headmaster charge kum 10 zet lo la tawh, khawtlang pawhin headmaster anga an ngaih saw, promotion file a kal mek a. Chu chu, sawi dawt ila, saw tianga thahnem ngai taka lo awm tawh a nih avangin, reiloteah hian pek theih mai tur kan nei dawnin kan hria. Chulai te chu headmaster bikah chuan ni sela.

Member zahawm tak, Serchhip bialtu Pu Lalduhoma rawn zawhna – “MR teacher 2019 September thla a kan lak mi 881 te kha ₹15,000/- kan pe a, an lawmman tihpun hret te leh service awm ze nei zawk PE-ah te dah theih an ni em?” tih kha, sorkar pawhin a en chho mek a, theih ang angin DP & AR-ah te pawh “provisional employee-a an luh ve dan a awm em? MR tihboa, PE-a dah vek tawh an nih avangin” tiin department pawhin rawtna kan siam a, a kal mek a, examination stage-ah a awm a. Member dangte pawhin, “₹15,000/- a han inchhawr reng mai hi, lawmman tihpun theih a ni lo maw” ti te pawh an awm a. Hei hi, kan lak lai khan MR skilled-II rate kha kan pe a ni; ₹520/day hisapin. Tunah hian ka department chan tho Labour, Employment lam atang hian kan minimum wages te ennawn turin rawtna kan siam a, cabinet agenda-ah reiloteah hian tih luh a ni ang a. Chuti hunah chuan eng le khaw le, PE-ah an awm lo a nih pawhin, skilled-II hlauh tihsan turin Finance Deptt. nen pawh en ho tawh a ni a, reiloteah hian anmahni pawh a rawn nghawng chho turah kan ngai a ni.

Lawngtlai West bilatu khan zawhna chhawng kha a ngah a, han chhang dawn ta ila. ‘Higher Secondary School hi west lamah hian kan nei lo khawp mai a, SAMAGRA atangin min pe thei ang em le?’ a ti a. Nikum PAB-ah pawh khan rawtna kan thlen thla a, a bulah pawh ka sawi tawh angin, Delhi lamin an rawn pawm zingah khan a tel lo hlauh mai a, kumin April-ah hian PAB Delhi-ah neih leh tur a ni dawn a, chutah pawh chuan rawtnaah kan lo telh leh ngei ang a, a hlawhtlin ngei pawh beisei ila. A pek lek pek loh lai tak hi chu Delhi lamin a final thin a, lo telh kan tum dawn nia.

School upgradation chungchang hi nimin lamah pawh kan MLA zawng zawng ten in sawi a, thahnemngai takin mahni bial chung zirna te, private-lumpsum ah,

lumpsum ni lai adhoc-ah, adhoc ni lai te ‘provincialize theih dan a awm lo em ni’ tih kha, chutiang tur chuan keini department lam pawh theih tawpin kan inbuatsaih a, theih tawpin kan zir a. Tum khatah kan tih vek theih loh pawhin a tahtawl tal a, kan sum dinhmun nen en milin, ‘tih theih dan a awm ang em’ tiin Council of Minister-ah pawh kan thlen a. Kan Finance Minister, Chief Minister ni bawk nen pawh sawiin, a ni pawhin min veipui em em a. “Rawtna han siam leh chhin ula, financial enin, a minimum deuh pawhin han rawt chhin teh u,” min ti a. Finance Deptt-ah tunah hian sum leh pai mamawh neih tura kan rin te a thawh-khatnaah hetiang hian kal theih ni dawn ta se, tiin rawtna pawh kan thlen a. Chu chu tunah hian ngaihtuahnaah a awm mek a ni.

PU K.T. ROKHAW : Pu Speaker, khawngaihin. Ban ka phar thin a, tun tum chu ka chang tlat lova. Ka zawhna chu –

- i) SEDP teacher hi lakbelh a ni dawn em? Lak belh ni ta se, thingtlangah chuan a khaw neitu ngei lak ni se.
- ii) Tin, ka biala Adhoc Grant-in-Aid school - TC High School leh Siata High School building te hi a chhe tawh lutuk a, NABARD fund atangin min sak sak thei ang em?

PU LALCHHANDAMA RALTE, MINISTER: Pu Speaker, Palak bialtu hi education-ah chuan min tawiawm tha thei khawp mai a, thahnem a ngai thei khawp mai a. Tuna a sawi pawh kha kan lo chhinchhiah thlap ang.

Tin, I veilama thuten SEDP teacher min lawmpui em em leh, anmahni bialah stop-gap arrangement-a kan kalpui dan min appreciate hi lawmawm ka ti a. Chu ngei chu tuna kan kalpui lai, zirtirtu 701 SEDP-hnuaiia kan kalpui pawh hi, tun financial year kal lai hi March Ni 15 velah a tawp dawn a, academic session thar hi April atang hian a dang kalpui leh tur, a ngai a ni emaw, a dang a ni emaw pawh, kalpui leh tur a ni dawn a, chu pawh chu kan Chief Minister nen sawiho tawhin, rawtna te pawh sum tam zawk, pension-an lo awm zel a, mamawhna lian zawk a awm zel avangin, ‘a khawi mi ngei ni ang’ tiin, rawtna ang khan ‘lak chhunzawm zel a nih theihna turin sum leh pai pawh min siamsak leh thei lo em ni’ tiin niminah pawh kan sawi dun a. ‘Lehkha pawh a tharrawn siam leh rawh’ a ti a, niminah vek khan DO pawh ka submit leh tawh a. Tin, school sak tur hi ‘NABARD-ah hian min cover thei em?’ tih zawhna pawh kha kan lo chhinchhiah phawt dawn nia.

Ka sawi laklawh lai kha chhunzawm leh ila. Lawngtlai West bialtuin a sawi, “Autonomous Council Lawngtlai leh Siaha District lam hi Sixth Schedule hnuaiia awm an ni a, elementary hi dan angin Sixth Schedule kuta awm a ni. Amaherawhchu, tunah hian dual administration-a awm a, kan buai khawp mai” a tih kha, CADC hi chu hun hmasa lamah an lo tifel then tawh a, a vaiin an kutah a awm tawh a. Lawngtlai leh Siaha lamah hian Middle School thenkhatah hian district council school leh state sorkar school te an awm kawp a, administration-ah pawh a buai a, a area-a zirnaah pawhin a tuar a ni. Chu chu ‘engtin nge kan siamthat ang’ tiin council hotute nen kan sawiho a, Council

EM Education leh CEM-te nen pawh kan sawi a, ruahmanna te kan siam a. ‘A theih a nih chuan a pahnih hian aw khatin kal sela, cabinet agenda-ah i buatsaih teh ang’ kan ti a. Mahse, a modalities turah khan council hrang an nih avangin, an duh dan leh ngaihdan a lo hrang a. Chuvang chuan, kan duh angin a kal chak thei lova.

Tun hun bikah hi chuan LADC lam hi chu anmahniin felfai takin, Mizoram sorkar hnuaiia thawk zawng zawng pawh coucil hnuaiia luh vek an duhna pawh association ang pawhin an rawn thlen a. Council pawhin ‘anmahni council-ah absorb vek theih dan awm thei se’ tih duh tawna a lo thleng tawh a. Chu chu process-in, keimahni pawhin theih ang tawkin kan office lamah pawh kan buaipui a ni.

MADC kha sorkar a inthlak leh hret avangin sorkar kal hmasa te nen kha chuan aw-khat kan nei hman a, tuna sorkar thara education changtu te nen kan la inhmu lova, tlem kan han nghak a; a theih a nih chuan aw-khatin, cabinet agenda-ah dah chhoha ruahmanna tha siam kan duh a ni. Chuta a theih ngang lo a nih chuan, LADC tal hi chu kalpui hram, hi mimal ang tak pawhin ka duh a. Tuna zawttu member zahawm tak pawh khan a ngaihdan a nih avangin, chutiang chuan kan council nen pawh hma kan la a, kan kalpui mek a ni e.

SPEAKER : *Starred* Question No. 202 - zawt turin member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, vawiina tana zawhna ballot a nih lai hian ka zawhna hi a chhuak hmasaah atang hlauh mai a, a vanneihthlak ka ti a. *Starred* Question No. 202 - Minister zahawm tak Environment, Forests & Climate Change Deptt. changtu hnena ka pek duh chu -

- a) Tuihna humhalhna scheme sorkarin engnge a kalpui mek?
- b) Tlawng hnar (hei hi ‘Lunglei’ tihna a ni a) humhalhna sorkarin a kalpui em?

SPEAKER : Chhang turin a changtu Minister zahawm tak Pu TJ Lalnuntluanga ka sawm e.

PU TJ. LALNUNTLUANGA, MINISTER: Pu Speaker, MLA zahawm tak Dr. Vanlaltanpuia zawhna chhanna chu-

- a) Soil & Moisture Conservation works-te kalpui thin a ni. Venhimna lamah pawh hmalak tel niin, Forest (Conversation) Act, 1980-ah chuan, ‘central sorkar phalna la hmasa lo chuan (forest clearance nei hmasa lo chuan) Reserved Forest, Notified Forest leh ramngaw dang reng reng huamchhungah ramngaw tih changtlun hna (thing phun/soil & moisture conservation works) tih chauh lo chu, eng hna mah kalpui phal a ni lo.
- b) Tlawng hnar humhalh hi sorkarin a kalpui e.

SPEAKER : *Zawhbelhna* - Dr. Vanlaltanpuia.

DR. VANLALTANPUIA : Pu Speaker, ka lawm e. Ka zawhbelhna chu –

Lunglei khawpui tui tlan hi Tlawng-Pialthleng hmun atanga pump a ni a. Kan hriat angin Zobawk-ah sawn Tlawng hian hnar a nei a, chumi atanga Pukpui ram tui lakna thleng saw a thui lo em em mai a, chuvang chuan tui hian source tha a neih theihna turin, sawlai catchment area humhalhna saw a pawimawh em em a. Kan Minister zahawm tak hian uluk leh zualin forest tunhnaia tlahniam zel, a bik takin sawlai area saw uluk takin min enpui leh thei eng em?

Uar deuh hleka ka sawi duh chu - thal a lo ni a, tunhnaiah tui pump tur a awm chhe ta em em mai a, chuvang chuan a vel ramngaw humhalh hi tuihna humhalhna atan pawimawhin ka hria a. Chu chu ‘uluk deuhin, kumina hma kan lakna turah hian min kalpui se’ tiin ka chah duh a. Chutiang chuan min kalpui thei ang em?

Pahnihnaah chuan - Demand pharh lai khan ka zawt a, min hrilh ta chiah lo a. Tunlai hian silai *precihole* tih vel ho, kap dik em em mai, kah thelh theih mang loh khawpa dik ang ho chi hi a tam ta riau mai a. Savate hi an kap thla nasa thei em mai a. Rah tlan hmun deuha han chan pheih chuan a hlawm hian an kap thla nasa thei em em a; heng silai khapna siam hi a pawimawh hle mai. Heng khapna dan hi sorkar hian a nei em? Ka lawm e.

SPEAKER : *Zawhbelhna* - Pu Lawmawma Tochwawng ka sawm e.

PU LAWMAWMA TOCHHAWNG: Pu Speaker, ka lawm e. Ka zawh belhna hi VC changtu LAD lamah khan ka zawt tawh a. Amaherawhchu, a concerned Department-ah zawh belh leh a ngai a, department leh department inkar a nih avangin ka han zawt leh dawn a ni.

Lungpuizawl VC chungchang kha, 1980 atangin Lungpuizawl-ah hian mihring an cheng tan a, sorkar phalna thlapin 1997-ah khan VC an nei tan a. Tunah sawn mi 1004 chengin, in 170 an awm a; sikul pahnih, middle school leh primary school te a awm bawk a ni. Biak In saw pathum a awm a, community hall tha tak leh VC house tak tun hnaiah pawh kan sa a ni.

Chutih lai karah chuan, Pu Speaker, an VC area hi buaina leh harsatna awm lovin lungmuang takin an khawsa ve thin a. LSC te pawh neiin, chung an siam lai chuan department lam atang hian objection pawh a awm ngai bawk hek lova. Amaherawhchu, chutia lungmuang taka an awm lai chuan, Ni 8.2.2022 atang khan an eizawna ber,

lung-lak leh an LSC te pawh chu renew zel khap sakin an awm ta a. Tunah sawn lungngai mangangin, meialh en hmabakin an awm ta a ni.

Pu Speaker, Zawlnei Jeremia ang mai khan chu thu chuan kei pawh, “Ka mi, ka fanute natnaah chuan ka na ve si a”, tih dinhmunah min dintir a ni. Chumi avang chuan an hrehawm tawrhna leh an manganna sut kian sak tur sawn khawngaih takin kan Minister hian a hma thei angin hma min lak sak thei ang em?

SPEAKER : Aw le; a theih ang ang chhang turin a changtu Minister zahawm tak Pu TJ Lalnuntluanga ka sawm e.

PU TJ. LALNUNTLUANGA, MIMISTER: Pu Speaker, kan MLA zahawm tak, Pu Tanpuia zawhna, Lunglei khawpui tui lakna chungchangah khan, saw lai Tlawng hnar leh Tlawng dungah pawh hian theih ang tawkin Forest Department hian hma a la thin a, soil moisture conservation hnuaiah hian hma lak a ni a. Tin, dan hnuaiah a humhalh theih theih te kan han humhalh bawk a. Chutah chuan tun hnuaiah pawh contour trenching kan ti a, tlang chara tui khur laih te, he mi lei chung hnawng leh lei tha te a kal liam zel lohna tura tan, khatia chambang thei tur khan check-dam te kan kalpui mek a. Thla hmasa lawkah te pawh khan la thawh mek a ni a. Khatiang khan catchment area te tunah hian venhima, khatiang leitha leh tuihna te humhalhna tur khan CAMPA leh fund dang atangin hma lak a ni a.

Tin, tunah hian JICA Project kan beisei mekah pawh a component lian ber pakhatat kan dah bawk a. Hei hi a hlawhtlin hun chuan saw lai Catchment Area zawng zawng saw kan SMC work te nen tang hovin, awmze nei zawkin leh tuihna te pawh kan humhalh thar leh turah kan ngai a. Tuihna te pawh kan siam thar leh turah kan ngai a ni.

Tin, silai chungchangah ‘a khapna awm em’ tih kha, Home Department te nen hma lak tlan a ni a. Silai license pek te pawh hi, he mi ‘*a kap dik deuh chi*’ ti khan a mawl zawngin sawi mai i la, khang license pawh kha pekchhuah phal a ni lova. Sava kah nan phei chuan *Wildlife Protection Act, 1972* hnuaiah hian khap a ni a. Chutiang chuan tunah hian hma lak a ni a.

Amaherawhchu, mihring indaih loh deuh bawk nen, awareness la chak tawh loh deuh vang te pawha la awm a niang a. Hengah hian duh angin hma a lak kim theih loh a. Chutih rual erawh chuan a mipuiah chuan he mi sava nungchate humhalhna leh nungchate kahhlum a tihlum ang chi hi kan fimkhur tlang a, kan in zirtir chho ta viau mai a. Naupangah phei chuan tunah hian heng savate leh nungchate hmangaihna a lian chho hle tawh a ni.

Tin, Pu Speaker, member zahawm tak Pu Lawmawma Tochwawngin zawhna - Lungpuizawl khua te harsatna tawh chungchangah khan, saw lai dinhmun saw Tlawng

protection chungchangah 1965 notification hnuiaah humhalh kha a lo ni a. Chuvang chuan harsatna tam tak saw laia mipuite tawh pawh a lo ni a, tin, High Court-ah *PIL 7 of 2021* thlengin lo thehluh tawh a ni a. Chumi avang chuan saw laiah sawn dan lova thil chet-lakna tur reng rengte khap lailawk rih a ni a, hengte hi case kal lai mek a ni a. Chuvang chuan, eng pawh ni se la, saw laia Lungpuizawl bialtute harsatna leh, an hmuh phaka an inkhawngaihna chungchang hriatpuuin, theihtawpa hma lo lakpui, a *Dan* hnuiaia tih theih ang chin china lo puiah kan tum dawn nia tih kha ka chhanna ni se a tha ang e.

SPEAKER : *Starred* Question No. 203 - zawt turin member zahawm tak Pu Lalduhoma ka sawm e.

PU LALDUHOMA : Pu Speaker, GAD changtu Minister zahawm tak chhana tan, kan zawhna-

- a) Ainawn Veng-ah sorkar quarters repair emaw, sak that leh ngai emaw engzat nge awm?
- b) Repair emaw, sa tha leh turin emaw hmalak a ni em?

SPEAKER : Chhang turin GAD changtu Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, kan member zahawm tak Pu Duha zawhna Chhanna chu -

- a) Ainawn Veng hi a hmaa ‘Govt Complex’ tih kha a ni a. Ainawn Veng-ah hian sorkar building 47 a awm a, chung building-ah te chuan quarters 184 a awm a. Sorkar quarters te hi upa tawh tak an nih hlawm avangin thiah vek tura hmalak mek a ni a. Chuvang chuan, sak that emaw, repair emaw pawh hi tihzui a ni tawh rih lo a ni.
- b) Inspection te, verification report hrang hrangte thlir hona leh zir hona GAD kaihhruaina hnuiaah Ni 11.7.2022-a Secretariat Conference Hall-a neih chuan, Ainawn Veng-a sorkar building leh quarters te hi a upat hlawm tawh em avangin, a chhunga chengte mai bakah, a chheh vela chengte tan him tawh lovah ngaiin, ‘thiah vek ni se’ tiin rawtna a siam a. He rawtna hi Council of Ministers ngaihtuah tura chhawp-chhuah atan buatsaiha, kalpui mek a ni. Hetianga hmalakna kal mek a nih avang hian, repair emaw, sak that tumna emaw hian hma lak a ni lova. Sorkar atanga renovation emaw, repair emaw kalpui thin pawh tih tawp a ni tawh nghe nghe a ni.

SPEAKER : *Zawhbelhna* - Pu Lalduhoma ka sawm e.

PU LALDUHOMA : Pu Speaker, kha, hma lak mek chungchang kan han ngaithla a, a lawmawm ka ti khawp mai a. Amaherawhchu, kan Aizawl New Market anga thiat siin, kan sa leh si lo ang a, rei deuh mai buai deuhin mi kan siam leh ang tih ka hlau deuh a. Chuvang chuan, a la luah theih tawng tawng chhung chuan thiah rih loh ni se, sorkar in a thiat a, a sa nghal thei dawn a nih chuan a lawm awm khawp ang a. Khalai kha rawn fimkhur sela, ngun takin kha kha ngaihtuah ni se ka duh a.

Pahnihnaah chuan - Brig. T. Sailo hun lai khan khulai khu sorkar hmunpui atana zuah a ni a, amaherawhchu, a hnuah a thil tithei thei khan LSC an nei ta a, kan ram tichhetu atana ram hruaitute'n hma kan tawng thin hi a pawl khawp mai a. Tichuan, ram an nei ta sup sup a, tunah khuan mimal ram nei sorkar hriatpui eng emaw zat an awm a, chumi hrulah chuan mi eng emaw zat thlai te pawh lo chinga, in lo sa ve ta mai an lo awm ta a; kha kha endik vek tawh a ni a. A thil titheia te chauhin ram an neih theiha, heng ho - in leh lo te lo din ve tawh, huan thlai pawh lo nei tawh nana na, sorkarin a hman tangkai si loh ram awla lo awm te hi chu, 'pass i pe teh ang u' tih hi inthlan lai apiang hian kan tiam thinin ka hria. Khalaihan khan, In lo ding tawh chin tal kha pass siam sak tum a ni ta em?

SPEAKER : *Zawhbelhna* - Dr. Vanlalhlana ka sawm e.

DR. VANLALTHLANA : Pu Speaker, ka lawm e. Kan Minister zahawm tak, GAD changtuin a chhan atan –

Nimin piah *Unstarred* zawhna No. 243 ah khan, DP&AR Minister zahawm takin re-employed te DDO atan hman theih an nih loh thu a rawn tarlang a. Amaherawhchu, tunah hian Principal Consultant, Aviation hi re-employed a ni a, DDO in kan hmang a ni. Hetah hian eng *Dan* nge hman a nih? *Delegation of Power Rules* te a awm a, *GFR, 2017* te a awm a, Finance Department ten pawhin *Dan* te an nei ang a. Hetah hina eng *Dan* nge hman a nih? April Ni 10, 2019 ah khan HoD ah kan dah a, chuvang mai chuan DDO a ni ta mai em ni? Tunah hian a *Dan* hman a hi lo dik lo ta se, engtia hma lak tur nge ni ang?

SPEAKER : Ruling lam sawm ve a ngai ta. Member zahawm tak Pu Zothantluanga *zawhbelhna* zawt turin ka sawm e.

PU ZOTHANTLUANGA : Pu Speaker, ka lawm e.

Session hmasa lamah khan nangmah pawh khan Chair atang khan i ngaihpaawimawh zia leh, Ainawn Veng chungchang chinfel i duh thu kha i rawn sawi a, a lawmawm khawp mai a.

Ainawn Veng hi a hma chuan ‘Govt. Complex’ tih a ni a, LSC pek te hi ‘a hming hian a tihar a ni ang a?’ tih ngaihtuahna te pawh a ni ang e, tunah hian an veng hming an thlak a, ‘Ainawn Veng’ tiin. Sorkar hmun, ‘Govt. Complex’ tih a nih khan LSC pek te hi a lo har em ni? Mi rethei leh harsa te te ten tunah khuan In an nei a, nimahsela, an in leh lo theih tawpa an lo din hmang khuan loan han lak ve an tum pawhin an la thei lova, LSC an neih tlat loh avangin.

Campaign laiin ka intiam ve miah lo nain, tunah hian Mizoram hmangaihtu tak sorkar a awm lai hian, Revenue Department-in survey an ti vek tawh tho si a. Tunah hian GAD kutah hian a awm mek a. Helai ram hi, thil tithei tam tak an awm lain, tam tak khu chuan thil hi an la ti thei lo tho mai a; thil tithei tam tak khuan hmun leh hma lo nei bawk mahsela, thil tithei ve deuh deuh, lal ve deuh deuh te pawhin an nei thova. Chutih lai chuan mirethei te te te an ni a, chuvang chuan tun kan sorkarah ngei hian permanent settlement an neih theihna turin hma min lak sak theih ang em? Tin, khami sorkar rama kha chu kan Chief Minister-in a rawn chhan ang khan, identify vek a ni tawh a, sorkar ram ni lova in hmun LSC han peka hi a harsa viauin a lang lova. Tin, survey hi 90% emaw ni hi chu zawh tawh a ni a, chuvang chuan thil har lutuk awm awmin a lang lova.

Tin, Pu Speaker, kan pekloh hian hnawhchhuah ngaihna an awm tawh chuang lovin, an nunna thap pawhin an chenna khu humhalh an tum tho tho tawh ang tih a rinawm a. Chuvng chuan, ‘chinfel a ngai hrim hrim a ni’ tih hi chu kan sorkar chak tak hian min hriat sak sela, ‘tun sorkar chung ngei hian min chinfel sak sela’ tih hi ka ngenna a ni e. Ka lawm e.

SPEAKER : Awle; zawhna te a inpersan khawp mai a, ‘Ainawn Veng’ tih atanga ‘re-employ’ tih te a ni a. A theih ang ang chhang turin Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, re-employ kha chu tunhma khan fimkhur vak lo khan DDO-ah te han hman mai te kha a awm thin a. Chuvangin tunah chuan, ‘hman loh ni sela’ kan ti a. ‘Principal Consultant pawh kha lo ti tawh lo rawh u’ kan ti a, DDO-ah kha chuan hman tawh loh a ni e.

Tin, *Zawhna* neitu Pu Duhoma zawhna – “fimkhurin, thiat mai rih lovin kal ni sela, chuti lo chu kan thiah sak ang a, kan sak leh mai theih loh takin” tih kha, a dik khawp mai a. Hei hi kan ngaihtuahnaah pawh a awm a –

Sorkar tan pawh rilru insuala chu - A inte a chhe tawh si a, a zuk en tute’n, “tumah awm tawh lo sela, thiat vek ni rawh se; chuti lo chu, engemaw palh, lirnging fahranah pawh lo chim ta sela, engatinge in chhuah tir loh?” ti sela, mi nunna chungchang thuah khan mawh kan phurh kan hlau ang reng si a.

Tin, lehlamah, “Chhuak vek rawh u; kan thiat dawn” ti ila, an luhna tura kha kan siam theih siloh chuan, lehlamah chuan problem a awm bawk si a. Engpawh nise, tunah chuan Expert Committee DC hova thute pawhin “Awm ngamna chi a ni tawh lo; anmahni, a chengte mai pawh ni lovin, a bula awmte tan pawh a hlauhawm tawh a nia” an rawn ti a. Chumi avang chuan thiat turin an rawn recommend a, sorkar pawhin kan en mek a. Engpawh nisela, khang a *humanitarian point* te kha ngaihtuah chungin, a intahtawl deuh hleka tihdan te a awm em? ‘Hei hi chu a la ziaawm deuh hlek a, heta inruk tuak deuhvin hei hi chu a awm ngam tawh ngang lova, thiat ila, hetah hian quarter pawh han sa ila’ tih lam te pawh kan en ang a.

Engpawh nisela, tunah hi chuan khang kan hotute rawtna kha keini pawh kan rilrua awm a ni a. Quarter-a mi awm tha lai, “chhuak rawh u, helai hmunah hian a dang kan sa dawn” tih pawh a hreawm khawp ang a. Chuvangin, a inruak tuak theih dan kawng ngaihtuahin, tunah pawh DIET ramah sawn quarter kan sa a, khata tanga a dang thiah tura te inruak tuak tawn turin kan ti mek a, khatiang deuh khan tihdan pawh kan lo en ang a. *Entirnan* - A chhe zualah a ruak a tam thova, khang kha thiatin tunah chuan sorkarin SASCI atangin emaw, a pawisa a awm ang anga, a ruak tuak tura te kha an tam vak lo a nih pheih chuan, a tihtheih kan ring a. Khati zawng khan member zahawm takte zawhna kha sorkar lam pawhin kan ngaihtuahna a awm tho a ni a. Ina mi harsatna siam lutuk lo tur khan tihdan kan lo zawng ang a.

Tin, a lo awm fel tawh sate, member zahawm tak Pu Zothantluanga rawn sawi ang khan sorkar hmasa lamah pawh an ngaihtuahna a lo ni tawh tho bawk a, “tuna mi chin hi chu inpek fel law law mai ni sela; LSC hi, lehlama sorkara an chawi ve tur leh pek ve tur ang chi awm tur a nih leh tifel law law mai sela, LSC te inpek fel law law kha a tha mai lawm ni” tiin sorkar hmasa lamah pawh khan ngaihtuahna a lo awm tawh a, keini pawhin kha kha kan ngaihtuahna a ni. Chuvangin, tunah hian ‘GAD-in cabinet memorandum han siam rawh u’ kan ti a, kan ngaihtuah mek a ni a. Tun sorkar chhung hian tihfel ngei, LSC nghet la nei tur ten an neih theih nan tih kan tum e.

Tin, chu chang a ni lova, hemi connect-ah hian Bawngkawn Brigade ram pawh sawn a ni bawk a, sawlai pawh saw enfel rual a ngai dawn a. Kan lo enfel ang a, a bik takin Ainawn Veng chu enfel zual tur a nih avangin zawhna pawh lo chhuak a ni a. A connect thil dangah pawh chin fel thei ang chin chin sorkarin a hma lama ching fel turin GAD pawh ‘cabinet paper rawn siam rawh u’ kan ti a, an siam a. ‘Rei vak lovah chin fel kan tum e,’ tih kha tuna kan chhanna chu a ni e.

SPEAKER : *Starred* Question No. 104 - zawt turin member zahawm tak Pu Lawmawma Tochhawng ka sawm e.

PU LAWMAWMA TOCHHAWNG: Pu Speaker, ka lawm e. Hon. Minister, Disaster Management & Rehabilitation Department chhan atan, ka zawhna chu :-

“Chhiatna chi hrang hrang tawkte hnenah kum 2022 chhungin tanpuina engzat nge pek a nih tawh?” tih a ni e.

SPEAKER : Chhang turin a changtu Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, member zahawm tak Pu Lawmawma Tochwawng zawhna chhanna chu –

“Chhiatna chi hrang hrang tawkte hnenah kum 2022 chhungin tanpuina ₹4,24,63,580/- pek a ni tawh” tih a ni e.

SPEAKER : *Zawhbelhna* - Dr. ZR Thiamsanga, Member zahawm tak ka sawm e.

DR. ZR. THIAM SANGA : Pu Speaker, kan kawr rawng te vawiin chu a inang deuh a ni a; min rawn hmuh hma a, ka lawm khawp mai. Ka zawhna chu –

Ka bial chhung khaw pawimawh tak mai, Neihdawn, Khawzawl atanga inkalpawhna Tuimuk Lei hman deuh lawk khan a chim rup mai a. Neihdawn Lei khi PMGSY kawng a ni a, amaherawhchu, provision a awm loh avangin khi lei khi dawhchawp mai mai a ni a. Hmanni khan Dy. Chief Minister leh keimah tang hoin MLA fund-in kan dawh a, amaherawhchu, khi a chim ta rup mai si a. Fur a nih chuan Neihdawn khua khi kal ngaihna a awm dawn lova, tunah khian tui a tlem avangin kan la kal tawk tawk a; tiau lungte kan han tikhawm a. Kan Minister zahawm hnenah pawh ka thlen tawh a, min ngaih pawimawh sak viau a; department-ah pawh kan thlen tawh a. Khi khi fur a thlen hma ngeiin min dawh sak thei ang em, khawngaih takin?

SPEAKER : *Zawhbelhna* - Pu C. Lalsawivunga ka sawm e

PU C. LALSAWIVUNGA: Pu Speaker, ka lawm e. Disaster Management and Rehabilitation Department changtu Minister zahawm tak chhan atana ka zawhbelhna chu –

Nikumah khan Republic Veng-ah lei che avangin harsatna kan tawk a, amah pawhin a hmunah min rawn enpui a, kan lawm hle a. Step a thar hlak siam a ngai a, drain pawh awmze nei taka siam ngai a ni bawk a. Tin, electric hrui connection line pawh kha hlih a ni bawk a, khita chengte khian harsatna an tawk nasa em em mai a. Chuvang chuan, step thar siamna tur atana leh drain siamna tura estimate proposal awm tawh te leh electric hrui han thlunzawmna tura ruahmanna awm hi chak takin hma min laksak thei ang em? Mipui manganna a nih avangin theihtawp min rawn chhuahpui thei ang em?

SPEAKER : Chhang turin Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, member zahawm tak Dr. ZR. Thiamsanga khan, Tuimuk Lei siam kha a ngai pawimawh khawp mai a. Amaherawhchu, mi thenkhatin an sawi ang deuh hian DM & R hi lei siamtu kan ni lova, a buaithlak khawp mai a. Emergency thil tak takah chuan, thingzai te, thingtuai te hmang hian kan ti ve naw naw thin a ni. ‘Emergency thil a nih loh chuan, kan khawih loh lam deuh a ni’ tih kha ka chhanna ni mai sela.

Tin, member zahawm tak Pu Lalsawivunga’n a sawi kha a dik khawp mai a. Nikum February thla khan ‘NDMA’ an tih, Union Home Ministry hnuai awm khuan State mitigation fund hman dan te, State disaster reponse fund hman dan tur guidelines thar a rawn siam pek a, chu chuan min phuar ta a. Ka sawi thiam dan chuan, Central-a project lianpui pui crore tela crore 10, crore 100 tel te an tih dan ang khan, hnathawh tur awm reng reng kha DM & AR hnuai a hna pawh kha, nuai 2 emaw, nuai 3 lek emaw pawh ni sela, ‘Appraisal committee-in a endik phawt tur a ni; chumi zawhah chuan, SDMA hnuai a State Executive Committee, Chief Secretary hoin, chu committee chuan a approve leh tur a ni; chumi hnuah chuan sanction a theih chauh ang’ tih guideline a rawn siam pek a. Kan Director te, kan Secretary te leh a changtu Minister te pawh a ni ang chu, an kut a phuar ta a ni. Kha Appraisal Committee-ah khan ‘SDMA Member-Chairman a ni ang’ a ti a. Tichuan, technical department – PWD te, P&E te atang khan member lakkhawm kha a lo ngai ta a, chu chuan DM & AR hnuai a hna hi a timuang ta em em mai a ni. A bikin khatiang chhياتna lo thlenga chhawmdawlna tur ‘mitigation fund’ kan tih bikah hian, Republic Veng-ah chhيات-tawhna pawh kha, a bialtuin a sawi ang khan, engkim estimate chu siam vek tawh a ni. Ka hriat sual loh chuan, Appraisal Committee pawhin a pawm tawh a, SEC pawhin a pawm tawh a, sanction tunah hian siam mek a ni. Reiloteah hian hna tan theih kan beisei a ni.

SPEAKER : *Starred Question* No. 205 zawt turin Member zahawm tak Pu Lalduhoma ka sawm e.

PU LALDUHOMA : Pu Speaker, GAD Minister zahawm tak chhan atan, ka zawhna *Starred Question* No. 205 chu -

- a) Ni. 14.8.2019-a spiritual sub-committee din kha ala ding em?
- b) He sub-committee hian eng te nge a tih tawh?
- c) Chaplain Office sakna tur atana Ni 6.2.2020-a SEDP sum sanction cheng nuai 29.05 kha hman a ni ta em?
- d) A nih loh chuan, eng vang nge? A sum kha eng atana hman nge anih tak?

SPEAKER : Chhang turin GAD changtu Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Duha zawhna chhanna chu –

- a) A la ding e.
- b) Spiritual sub-committee hmalaknain gospel camping wawi 6 neih a ni tawh.
- c) Ni 6.2.2020-ah SEDP sum atangin Chaplain Office sakna tur sanction a ni lo.
- d) A chungah chhanna ang khian, sanction a ni lo.

SPEAKER : *Zawhbelhna* zawt turin a zawhna neitu, Member zahawm tak Pu Lalduhoma ka sawm e.

PU LALDUHOMA : Pu Speaker, ka zawhna chhanna hmasa leh tuna chhanna ka hmuh kha a inkalh tlat mai a. Ka *starred* Question No. 120, Ni 28.2.2020-a ka zawh a chhannaah chuan, ‘SEDP hnuaiia chaplain office sakna tur cheng nuai 29.05 kha Mizoram sorkar hnuaiia Finance Deptt. in Ni 6.2.2020 khan sanction a tichhuak a, hman a la ni lo’ tih a ni a. ‘Sanction tawh si, hman a la nilo’ tih kha, tunah hian hman a ni ta em? Mahse, khatiang kha awmlo ang khan min chhang leh ta si a; a eng ber kha nge thudik?

Tin, he spiritual - sub-committee hi kan lo hriatthiam dan chuan, sorkar khalh ngiltu tur, sorkar hmasa congress huna ‘ethics committee’ an tih ang deuh turah khan kan lo ngai a. Tuna kan sorkar dinglai tawngtaipuitu tur leh khalh ngiltu tur bakah keini legislator-ho te pawh a tul anga tawngtainate min neihpuia, helaia office te pawh nei ve, a building pawh sak vea, khatiang thlarau lampanga kan innghahna tur deuhah khan kan lo ngai a. Khawi emaw lai hmun danga camping va neih lampang a ni taa kha. Hei, a building pawh kan sa leh dawn tawh chuang lo anih kha chuan, hetiang hi chu ti tawh lo law law ila a tha mai lawm ni?

SPEAKER : Awle; a theih ang anga chhang turin Chief Minister zahawm tak GAD changtu, Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Spiritual sub-Committee hi Social Rehabilitation Board an thutkhawmin sub-committee chi hrang hrang an siam a, chutah chuan a *thlarau-lam nun* deuh, a bik takin khatih laia an target kha chu Jordan Centre-a awmte enkawlina kha a ni a, Spiritual sub-Committee an tih pawh khan, kha kha an target zual a ni. A dang pawh tul anga tih a ni a, rampum huapa khatia lianpuia kalpui vak pawh kha a ni lova. Chuta tan chuan Ni 14 August khan siam a ni a, Spiritual sub-Committee hi. Social Welfare-in order pawh a siam a ni a, Mizoram Kohhran Hruaitu kha committee chairman ni sela, Secretary-Member ah Upa K. Lalthawmmawia - Tuikual North te, Member ah - Rev. Vanlalbela - Bawngkawn te, Upa Dengthmingthanga - Kulikawn te, Pu C. Vanlalmawia Chhakchhuak, Asst. Director, Social Welfare te kha member anni a, a hnu ah Lt. Col. Vanlalthanga leh Rev. JC

Vanlalluaia te dah belh leh anni a. Amaherawhchu, an han target deuh, Jordan Centre-a hmalak an han tih khan, camping te buatsaihin an han ti tan a, khata an target a pui ber kha covid a lo thleng a, a luah theih ta lova, covid-care centre atan an lan leh ta si a. A hnu ah te pawh khan an ti thova, camping pawh vawi eng emaw zat an han neihpui a ni.

Amaherawhchu, ram pumpui thila committee lianpui leh thiltih tuma a tirah pawh din a nilo, Social Welfare-a board awmin khami bik atana kohhrante nen ruihhlo ngaite kan enkawlnaah hian, hmakhai rual zawka kan kal theih nan 'heti hian i ti ang u' tia din kha a ni a. Amaherawhchu, ka sawi ang khan covid avangin khami a pui bera pawh a luah leh theih tak si loh avang khan an tum angin hna an thawk thei ta lova. Kha kha chaplain office lampang nen khan connection a nei lo hrim hrim a.

Camping erawh chu, kan hriat ang khan vawi 6 lai an han nei nghe nghe a ni. Tin, 'chaplain office tur' tih kha, chaplain office hi airport-ah a hma khan a awm thin a, 'a hranpa in sak ni sela' tiin sanction pawh cheng nuai 29 siam a ni a. Amaherawhchu kha ringawt kha chuan, a hranpaa airport kan siamthatna tur nen khan, a kawta cheng nuai 29 vel leka building han tih kha tih theih a ni ta lova. Chuvangin a tam zawk (a amount chiah kan hre ta lova) nuai 100 chuang fe sanction-in, mithi an lo thlena mipuiin kan lo receive-na tur, pawnlam mite tana kan chawlh hahdamna tur leh, canteen anga hman theih tur, 'a lian tha law law hi i sa teh ang; hetah hian a tul angin a dah theih tho a lawm' an ti a, chutah chuan a chidang zawkin an kalpui ta a. Sak a ni a, an la zo lo deuh hlek a. Khu khu tha takin a sanction ang chaplain tan bik ni lovin, canteen leh mitthite kan lo receive-na tur atan sum tam zawk, a crore chuang fea sak a ni. Kan la zo lo deuh hlek a, 'zawh thuai kan tum e' ti kha ka chhanna a ni e.

SPEAKER : *Starred Question* No. 206 - Zawt turin Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka lawm e. School Education Department changtu Minister zahawm tak chhan atan ka zawhna chu -

- a) Mizoram sorkarin school building/MDM kitchen building chhe zualpuite sak that tumna a nei em?
- b) Nei ni se, engtikah nge hna tan a nih theih ang?

SPEAKER : Chhang turin School Education Department Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak Dampa bialtu, Pu Rintluanga Sailo zawhna *chhanna* chu -

- a) MDM kitchen building hi central scheme PM-POSHAN hnuiaia sak a ni a, a chhia leh sak ngai te central sorkarah rawtna kan thlen mek e.
- b) Central sorkarin sum min pek hun hunah sak tura ruahman a ni.

SPEAKER : *Zawhbelhna* - Zawhna neitu Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka bial chhung khaw tam taka MDM kitchen building te a chhe em em hlawm a, a bikin Khawrihnim, Lungphung leh Silsuri te hi min ngaihtuah sak theih dan, eng emaw kawng zawng talin a awm thei em aw?

SPEAKER : *Zawhbelhna* - Member zahawm tak Pu Ramthanmawia.

PU RAMTHANMAWIA : Pu Speaker, ka lawm e. Ka zawh hmain - hei Khuangleng High School hi matric exam centre a ni a, hun rei tak headmaster nei lovin kan awm a, tunhnaiah headmaster tha tak mai kan Education Minister-in min pek a vangin lawmthu ka sawi a.

Ka *Zawhbelhna* chu - Vaphai Higher Secondary School din a ni a, kan Minister zahawm takin a hawn sak nghe nghe a. He school ah hian result tha em em kan nei thin a, 100% te an passed a ni. Hei hi, ‘he sorkar kumtharah hian lumpsum tala min hlankai sak ve dan te a awm em?’ tih ka zawt e.

SPEAKER : *Zawhbelhna* - Pu C. Lalsawivunga hmanhmawh deuh in ka sawm e.

PU C. LALSAWIVUNGA: Demand-ah khan ka sawi tawh tho a, mahse kan Minister zawhna ka pe duh a. (Speaker: Ngawi rawh aw. *Zawhna & Chhanna* hun a tawp a, zawt zo se, chhang zo law law se kan remti em? (*House-in a remti a*))

Pu Speaker, ka lawm e. I kaihhruaina hnuaia rorel chu a nuam khawp mai; kan zalen halh mai a.

Ka *Zawhbelhna* pakhatna - Govt. Bethlehem Vengthlang High School, Govt. Central High School, Govt. Republic Primary School-I te hi sak that ngai a ni a. A building te a hlui em em tawh a, kum 30 an chuang deuh vek tawh a ni. Hei hi, ‘a tharin min sak thei ang em?’ tih a ni a.

Tin, Pahnihna chu - Repair & maintenance ngai, Govt. Middle School Bethlehem Veng, Govt. Bible School Venghlui, Govt. Aizawl High School Republic Veng te hi a chhuate a tlahniam a, Zun-in te, Ek-in te a lei bei-bui tawh a; a bangte, a tukverhte a tlabal tawh bawk a, repair a maintenance tih ngai a ni a. Chu chu kan Minister hi min khawihsak thei ang em?

SPEAKER : Awle; chhang turin Pu Lalchhandama Ralte, a changtu Minister zahawm tak ka sawm e.

PU LALCHHANDAMA RALTE, MINISTER: Pu Speaker, zawhna neitu Pu Lalrintluanga Sailo khan, 'kan MDM kitchen te a chhe tawh hle mai a,' tia a bial chhunga mi a sawi kha, khatiang tho kha Zoram hmun tam takah kan kitchen set, midday meal (chhun chaw) kan pek te a chhumna hmun a ni tlangpui a; a chhe tawh hlawm khawp mai a. Tuna ruahmanna kan neih mekah chuan, kum 10 china upa tawh ho zawng zawng a repairna tur ₹10,000/- Zoram pumah pek kan tum a. 'Kum 10 china upa repair kan tum' tih kha tuna a zawhna, a school han mention bakah kan member tam tak, zawh chak tak takte pawh kha ka chhan kep nghal a nih chu.

A dawt lehah chuan, East Tuipui bialtu Pu Ramthanmawia zawhna kha, lawmthu nen - Khuangleng High School 'headmaster rei tak neilo kan pe' a tih ang deuh khan, headmaster kan han sawn thenkhat hi kan han bun tuak vel thin a ni; tiang te kha a nih zia a rawn nemnghet a.

Vaphai Higher Secondary School (private) hi 'Lumpsum Grant-in-Aid ah min dahsak thei ang em?' tih kha, ni e, kan sawi tawh ang khan Lumpsum Grant-in-Aid a dah turte, Adhoc a dah turte, provincialized tur te, chumi a tana sum leh pai mamawh te sorkarah kan thlen mek a. Hengte hi kan hotute nen kan lo thlir ang a, tih theih hmasak hunah kan lo hre dawn nia.

Tin, Aizawl South-I bialtu Pu C. Lalsawivunga zawhna kha - School hming kha han lam diat diat emaw, a school mal ang khan kan chhang tawh lo mai ang a, hun a tawi a.

Kha kha kan lo record zel a; heng School-te hi hmanna kan sawi ang khan khawpui chhung bikah hian harsatna tam tak kan nei a, *minor head* atang hi chuan eng eng emaw han ti zeuh zeuh kan nei a, a bial chhung Bethlehem Veng-ah leh hmun dang dangah pawh tih kan nei tho a. Major work deuh hi NABARD scheme hnuaia school siamthatna kan neih hi thingtlang tan chauh a nih a vangin, khawpuia mi tur hi kan dap mek tih a ni. Ka beisei dan chuan, Samagra PAB-II a crore 30 kan neih hi school hrang hrang, a chhe zual, a thar sak ai mahin major repair turte leh minor repair tihna tur hi kan dil a, tunah hian beiseiawm deuh chuan kan hmu a. Amaherawhchu, a taka release leh kan account-a a rawn luh hma hi chu, kan puin a sawi ang deuh hlek khan, thlang lampang han sawi hi a tak a thlen hma hi chuan 'kan ti dawn e' han tih dawt kan la ngam lo deuh a, mahse, beiseina sangtak kan nei a ni.

Khang kan han sawi ho - khawpui chhunga school hrang hrang member dang sawi thingtlang school te pawh a theih ang ang, major repair te, minor repair ngai te pawh tih theih tumin department kan inbuatsaih mek e.

PRIVATE MEMBERS RESOLUTION

SPEAKER : Awle, kan tih leh turah kan kal ang a. Vawiinah hian kan hriat tlan angin kan *dan 27(1)* in a sawi angin Private Members Resolutions kan tih ni/kan lak ni a ni a. Vawiin, Ni 24 a kan sawiho tur hi Ni 21 (Thawhlehi) khan ballot a ni a. Chutah chuan Resolutions 16 lai thlanchhuah a ni a. Tin, bulletin-ah kan rawn pek tawh che u kha.

Resolutions No.1 kan la ang a - “*Kawngpui tha leh building tha kan neih theih nan tun aia ulukin hna thawh ni rawh se.*” tih a ni a. Tunah Resolutions neitu member zahawm tak Pu Lalchhuangthanga, move turin ka sawm e.

PU LALCHHUANTHANGA: Pu Speaker, ka resolution - “*Kawngpui tha leh building tha kan neih theih nan tun aia ulukin hna thawh ni rawh se*” tih ka move thei hi ka lawm hle mai.

Kawng tha neih chungchangah hian resolution hi he House zahawm takah hian sawiho a lo ni tawh thin a. Ni 21 November, 2014 ah khan Dr. K. Beichhua resolution putluh a ni a, Ni 16 October, 2015 ah khan Pu Vanlalzawma resolution sawiho a ni bawk a. Ni 16 March, 2018 ah khan Pu K. Sangthuama resolution putluha sawiho a ni tawh bawk a ni.

Tun kan sorkar thar lo piangah khan member zahawm tak Pu Zothantluanga resolution, “*MNF ministry in hunreilote chhunga Zoram dung leh vanga kawng chhe tak a siamtha mai thei hi lawmawm kan ti hle,*” tih kan ngaihtuah a, kan sawiho tawh a nih kha. Tun tuma ka resolution hian a tum chu - *kawngpui tha, building tha zawk leh tlo zawk* a kan neih theih nana rawn pulut ka ni. Kawng, building tha leh tlo hi kan hnam tan a pawimawh em em a, ‘hmasawna a tana thil pawimawh ber a ni’ tih te pawhin kan sawi thei awm e. Member zahawm tak takte pawhina kan buaipuia, kan vei em em chu - kan bial chhunga *kawngpui tha neih* a ni a. Chuvangin, kan kawngte hi a lo that a, a lo tlo zawkna turin he resolution hi ngaituah ila ka ti a. He resolution hi department hnathawk emaw, a changtu Minister emaw sawisel tum ngawr ngawrna a ni lova, kan zavaia kawng tha leh tlo kan neih theih nan ‘ngaihtuahna te hmang tlang ila’ tih kha ka rawn put luh chhan chu a ni.

Kan kawng thatloh chhan hi chu ‘kan lung hman chan tawh loh vang’ kan ti a, phai lam atangin lung chang tha zawkte kan chaw lut a, mahse a tlo chuang lem lova. ‘Kan ramah ruahtui a tla tam’ te kan ti a, keini aia ruahtui tla tam kan state thenawmah Meghalaya te an awm tho a. Tin, ‘motor lian rah vang a ni’ te kan han ti a, kan state thenawmah te chuan kan rama motor lian lo kal thin aia lian leh rit zawk phurte an tam em em zawk a ni. State thlaler bera awm kan ni a, kan thenawmte aiin motor te pawh a tlan tlem em em a, chuti chung chuan kan kawng siamte hian fur khat em pawh a daih

lo thin a, hei hi eng nge a chhan ni ang? ‘a kaikuang hi a awm tur a ni’ tih kha tun tuma kan sawihona point a tana ka duh ber chu a ni.

Tin, ka lo hmuh ve dan chuan, kawng chhiat chhan ber chu -*corruption* hi a ni. ‘A hmu tur hre saa tender chhuah’ an tih mai, *restricted tender* hmanga hna inpek te, mi hminga hna kan thawh tirtle leh hna kan hralh chhawng thinte hi kan kawngpui chhiat chhan chu niin ka hria a. Chuvang chuan, heng kawng tha leh building rotling sak kawngah hian ngaihtuahna thui tak kan sen hi a tul tawh tak meuh meuhin ka hria.

Kawng siam nan kumtin sorkar hian sum tam tak a seng thin a, tun kum kal lai meka kan sum sen dan chu – 2022-2023 (RE) ah state fund - SEDP te, PMGSY te, central road fund te, NABARD loan te, EAP loan leh PM-DeVINE te atanga kan hmuh, Mizoram sorkarin kawng siamna atana kan sum hman zawng zawng hi cheng nuai hlir nuai 1,10,265/- a ni a. A vaibelchhe zawng chuan cheng vaibelchhe 1,102.65 a ni. Heng bakah hian NESIDS te, NEA te leh central scheme dangte atanga kawngpui siamna atana sum kan hmuh a awm nual bawk a ni. Chutiang anih si chuan, engatinge kan kawngpui hi a that theih loh ni?

Tin, building chungchangah hian han sawi leh ila - tunlaih hmasawmna in a nawr chhuah sorkar building tha tak takte a lo piang chho zel a, heng kan in sakte pawh hi kan fimkhur hle a ngai tawh a, kan fimkhur tawh loh zia chu a lang mai a; kan sak mek lai laite pawh a lo chim thin a ni. Chuvangin, in sak kawngah hian engineer thiam tak takte an lo chhuak zel a, qualified engineer te hian min enpui tha deuh ta se la, hmanraw tha hman chungchangah hian building sak enkawltute hian nasa lehzuala tan an lak a ngaiin ka hria. Khawpui chhungah chuan AMC ten theihtawpin tan an la a, amaherawhchu, AMC area nilo, hmun dang dangah te building lian pui pui, rotling tur kan sakah hian fimkhur lehzual ngaiin ka hria.

Tin, kawng kha han sawi leh ila. Kan ramah hian kawng hi chi hrang hrang - national highway te, state highway te, major district road te, other district road te, village road te leh city road tih tea then ni a, heng kan kawng neih zawng zawng belhkhawm hi km 5,716.93 a ni. Tin, ‘kawng tha lo’ kan han tih hian, kan kawng zawng zawng hi a chhia tihna a ni lova, hmun tlemte kawr bul te, hmun dam lai deuh te ang te hi a chhe ngun lai a ni thin a ni. Kum tina kan buaipui thin ang hi a ngai deuh vek a, heng hmunahte hi chuan RCC flooring te pawh hi han ti ila tha mai tura ngaih a ni a, kum tina a chhe thawm-that ngai reng tho hi kan buaipui thin a ni. *Entirnan*: Km 10 vela sei kawng ni ta se la, kan buaipui thin kawng thalo te hi chu a dik tak chuan km chanve pawh a tling lo a ni. Chu km chanve chuan kha kawng tluan mai atan khan harsatna a siam thin a, hengte pawh hi kan engineer thiam tak takte pawh hian lo ngaihtuah se la; tlem in a man to deuh a nih pawhin, a man chu to mai rawh se kawng tha kan neihna tur a nih chuan. Kan engineer te pawh ‘khatiang lam zawngte khan a hawi theih lawm ni?’ te ka ti a ni.=

Tichuan, Pu Speaker, he kan sawi – kawng tha leh tlo, building rotling kan neih chhoh mek turah te pawh hian kan member ten thahnem ngai taka min sawipuia, min pass pui turin ka sawm a. Ka resolution hi a nihna ang taka min sawipui hi tuna kan zoram dinhmunah hian tul ka ti a, pawimawh ka ti a. A nihna ang taka min pass-pui turin ka sawmin, ka ngen a ni e. Ka lawm e.

SPEAKER : Awle, resolution neituin a rawn move ta a, kan sawiho zui nghal ang a. Member pakhat tan minute engzah nge kan inpek ang le? (**Member:** Minute 10; minute 5..) *Minute 10* tih a ri a, *minute 5* tih a ri baw a, khawi zawk nge kan pawm ang? Minute Minute 10 ti mai ang aw? Awle, minute 10 inpe i la. Tunge sawi ang le? Member zahawm tak Pu KTRokhaw i sawm ang.

PU K.T. ROKHAW : Pu Speaker, ka lawm e. He resolution hi, resolution tha tak a ni a, “*kawngpui tha leh building tha kan neih theih nan tun aia ulukin hna thawh ni rawh se*” tih a ni a. Dik tak chuan sorkar kal tawh leh kal lai mek pawhin theih tawp an chhuah a, khua ten a zirloh avangin duhthusama hna an thawh theihlohna chen pawh a awm a. Chuvang chuan, ‘*tun aia ulukin hna thawh ni rawh se*’ tih hi chu a tha thlawtin ka hria a. ‘Engah nge sawi tam lova kan pass mai loh?’ tih hi ka ngaihda a ni e.

SPEAKER : ‘A tha e’ tia pass mai rawtna a awm a, kan thlawp mai em? Aw le, Member zahawm tak Pu Lalrintluanga Sailo i sawm ang.

PU LALRINTLUANGA SAILO: Pu Speaker, ka lawm e. Member zahawm tak Aizawl South-II bialtu resolution – “*Kawngpui tha leh building tha kan neih theih nan tun aia ulukin hna thawh ni rawh se*” tih hi resolution tha tak niin ka hria a. Thil tha duh theuh, he ram mipuite aiawha thlan kan ni a. Member zahawm tak Pu Rokhaw sawi ang khan, sorkar hmasa leh tuna sorkar mekte pawhin kawngpui tha kan duh a, building tha kan duh a. Mahse, ruahtui a tam lutuk avang leh kan leilung a ngheh tawh loh avang te hian kan engineer ten tha taka an plan pawhin duh angin a tlo hlei thei lova.

Kan House Leader, kan Chief Minister zahawm tak phei chuan kawngpui hi a vei em em a, hmar-chhawng lam hawi phei chu bitumen hmang lova concrete-a tih hram dan te min ngaihtuahpui a ni a. Chuvangin, Member zahawm tak Pu Lalchhuanthanga resolution, “*Kawngpui tha leh building tha kan neih theih nan tun aia ulukin hna thawh ni rawh se*” tih hi ka thlawp a. Chuvang chuan, uluk zawka hna thawh a nih zel theih nan he resolution hi ka thlawp a ni e. Ka lawm e.

SPEAKER : In va thlawp tha ve; kan wind-up tir mai dawn a mi. Sawi duh in la awm em?

DR. ZR. THIAMSANGA : Pu Speaker, kei pawh he resolution hi tha ka ti a, ka thlawp e. Sorkar hmasa leh tun sorkar hi chuan kawng hi an ngaipawimawh khawp mai a. Amaherawh chu, fur te a lo ni a; nikum phei kha chu fur a daihrei si a, duh angin a tha tawk lova. Ni e; sawiho lova pawm mai hi kei pawhin ka rawt e.

SPEAKER : Member zahawm tak Dr. Vanlalhlana i sawm ang.

DR. VANLALTHLANA : Pu Speaker, vawiina kan resolution sawiho hi a pawimawh ka ti a Kkhatia sawiho lova pass mai kha a uihawm ka ti a, kan kawng han enin, sawiho tha ka ti a.

Hmanni lawkah chhiat tawhna thilah Lunglei-ah kan kal a, keimah ngeiin motor ka khalh a ngai a. In lampangah programme kan nei avangin lehlengin kan va kal a, December tha tawpah khan. A tukah chuan programme lama kal ngaihna a awm lova, ka mu nileng thak a ni. Chu chu, kan kawng dinhmun avang hi a ni a. Kan ram en hi chuan sum chu a lut hnem khawp mai, a tir kha chuan kawng siamnaah pawh kan che tha viau a Aa lawmawm ka ti. Sorkar hmasa-ah chhuanlam te a lo awm a, ‘ruahtui a tla tam’ tih te a ni a. Sorkar thar a lo awm a, theih tawp an han chhuah a, kawng kan lai chum chum a. Amaherawh chu, kawng chauh a lo ni lova, building te a lo ni a. He thil kan tihna turah hian a bulthut atangin, ‘engtin nge hma kan lak anga, hnathawktu turte engtin nge kan buaipuia, engtin nge kan kalpui?’ tih hi kan entel a ngaiin ka hria a. Hna thawk tur chuan hnathawktu tur contractor kan mamawh a, consultancy an indin te, Pu Speaker, mamawh hrang hrang kan nei a ni. Tuna kan empanel firms leh kan contractor thenkhat te hi chu, ‘a lem deuh lo maw?’ tih rilru ka nei a ni.

Hei, hmana session-ah – ‘empanel firms hote engnge an work experience?’ tih kan zawt a. Kum hmasa lawka dinte khan vaibelchhe chuang experience te an nei a; firm leh mihring hi danah chuan a danglam; mi hrang daih an ni. A then chuan partnership firm te an lo din a, a then chuan LLP private limited te an din a. A neitute khan a hmaa an hnathawh kha, kha firm experience-ah khan an claim thei miah lo. Mahse, tun sorkarah erawh chuan kan claim ringawt mai a ni. Hma kan la a, kan inpawm chawp a, an hnathawhna lampangah pawh DPR an siam dawna ka hriat chian ngei, Grade A consultancy in a ziak thei lova, midang an ziah tir a chungte chuan hna an thawk a, experience tha pawh nei lovin hna an thawk a ni. Hetiang chuan engtin nge hna tha kan neih theih ang?

Hei, sole-proprietorship te erawh hi chuan an lo thawh tawhnaa consultancy hi *sole-proprietorship* anih chuan, anmahni kha a neitu an nih nghal avangin, an experience chu an hmang thei the meuh mai. KR proprietor te pawh sole-proprietorship (a neitu) nihna nein, non-tribal a lo ni a. RTI-a ka zawhnaah chuan - *Income Tax Act* hnuaiyah hian a lo inziak lut a, permanent account te a nei thlap a. ‘Chhiah a pe em?’ tih ka zawhna, khu lamin min chhannaah chuan, “*income from other sources* atang hian

chhiah a pe e” tiin min rawn chhang a. Chung chu kan consultancy neih te an ni. Khulam khuan an rawn ngaihven tan a, RTI in zawhna ka zawt a, tunah pawh hian *due* panga a la awm a ni. “Chhiah a chawi lohah hian hma lak a ni em; investigation lak a ni em”? tih ka zawhna chu, “lak a la ni love”, tiin min chhang a; chung chu kan thawhpuite an ni. ‘Income from other sources’ tih hi, Income Tax Act hnuaiah chuan, lucky ticket atanga pawisa lak te, tuten emaw an lo pek thut ang chi te, sakawr intlansiakna pawisa inchawia sum lakluh te an ni a. Sole-proprietorship nei, khatianga sum lalut chuan *income from business* atanga income tax pe tur a ni. Tunah hian crore engzat man nge a thawh tawh? income tax a pek tur hi a tam ve ngawtin ka ring. Chung chu kan thawhpui a ni. Income tax pek loh hlauhawm zia chu - jail tan theihna bakah, an chhiah pekloh an rawn umzui ang a, chung chu interest a la awm; chungte chu tunah hian a lar ber berah kan hmang a. Kan ram, keimahni, kan mipuite kalna tur leh kan building te pawh a enkawl tupa a ni. Chungte chu kan thawhpui duh a ni a. Helaia kan hnathawh chu engpawh ni rawh se, a inkhaidiat chho ah hian kan tan a ngai khawp mai.

Pu Speaker, PMGSY te pawh hi, kan tuina lamte hian a lo hril deuh te pawh a ni ang a. PWD ah internal audit an neihin, a audit tute indaihloh karah, ‘min lo pui teh’ an ti a, ka kal ve tawh a. Bank guarantee an pek te pawh a lem hlawm lutuk; a then chu a dik, a then erawh chu a lo expire a, an lo dahbelh leh lova; a then chuan mi hmingte an rawn dah daih. Chu chu kan PMGSY hnathawh dan te a ni. Chunggho, a tak pawha thil ti duhlo chuan engtingge hna pawh an thawh that theih ang le? Kan tan a ngai takzet a ni.

Sawi tur tam tak a awm. Airport lam bikah te luh a chakawm khawp mai. Chumi ka luh hma chuan, tunah sorkar hnathawk tam tak an awm a, kan contractor ten an luah tur in te an sa a. Tunhnai lawkah Turkey, Syria lirnghing kan hria a, sorkar hnathawk thenkhat hi chu an ngaih a ngam lo a ni. Hna an thawh dan, contractor-te hma lak dan han en hian hreawm an ti ve a ni.

Tum khat chu two-wheeler-in ka tlan a, ruah a sur avangin department building pakhat, MINECO ah khuan hmelhriatte an awm bawk a, ka tei lut a. A chung ber a ni lova, a chhawng, a lai bawr vel a ni a. Amaherawh chu, a ceiling atang khan tui a rawn put a, an buai hle a; bucket te an dawh a, anmahni pawhin hreawm an ti. Chu chu tuna i dinglama thute, chu mite sorkar hmaa an lo thawh tawh a ni; tun sorkar awm hmaa company-in an thawh te, chutiang building te chu a ni. Tunah hian sorkarna kan chang leh a, engnge kan an dawn erawh chu a hriat lova. ‘Kan sorkar hnathawkte an hmakhua pawh hi kan ngaih tel a ngai’ tih kha ka sawi tel duh a.

Hma kan lak dan ka sawi tawh a, Airport chungchang hi sawi tur awmin ka hria. Khulaiah khuan Mizoram pawn atanga lo kal; kawng ni lovin, thlawhnaa rawn kalte chuan an hmuh hmasak ber chu, kan Airport khu a ni. Kan Airport sak dan a that tawklloh avangin, a chim a; a piahah, ‘a la chim leh mai ang e’ tiin midang awmlah laiin zanah a

rukin an lo tichim leh a, a tukah kan zuk hmu leh tho si a. Khulai duty te chuan a chim khan, ‘zan ka mu lo’ ti a min hrilhtu mi pathum-pali an awm. Chhunah te khan kan kal si a, kan kal lai khan chim ta se la, ‘a hreawm awm’ an ti. Nunna chan theihnaah vanneihthlak takin duty te him damin an awm a ni. Chu chu kan *workmanship* a ni leh si a. Kan hman lar ber, *kan hman lawr* a ni leh bawk si a, a thawktu ngei pawh.

Airport chungchangah hian November Ni 26, 2020 khan SE atangin nawrna a lo awm a; SE nawrtu an awm a, ‘hma la teh u’ tih a ni a. CE ah a kal a, CE atangin E-in-C ah a kal leh a, chutiang chuan hma lak a ni a. An ziahnaah pawh a awm vek; ‘kan chief minister phal angin; kan chief minster rawn tih angin, restricted tender-a hma lak ni rawh se’ tiin, Ni 18.12.2020 khan phalna an dawng a. Restricted tender thilah hian kan ngaihtuah ngai chu, Competition Commission hian ‘bid-rigging’ ah hian a thin a tichhe hle mai. Tuna kan sorkar hian restricted tender-ah hian ‘bid-rigging kan ti em?’ tih hi kan ngaihtuah a ngai. Contractor tam tak hian buaina an tawk a, an inziahlul lehna turah hian sorkar hian open tender hi an tichhuak tam tawk lova, ‘restricted tender-a tih a tam lutuk avangin registration tihna tur khawp hna pawh an hmu lo’ tih hi kan hriat a ngai. Chu chu kan kal dan a ni.

Khu laia Airport siamthatna tur hna a rawn kal ta cheng a; work order hi Ni 21.9.2021, September thlaah a chhuak a, amaherawh chu a hma April Ni 21 ah KR Construction hian lo khawih daih mai; thla tam a vei hnuah work order a chhuak chauh; chu chu kan hna kalphung a ni. Hetiang em ema *Dan* pawh ngaipawimawh lo (Pu Speaker, ka zo dawn...).. mipuite an rawn auchhuah pawha kal ngut ngut mai; mipuite tana ram siam tur, kawng siam tur, building siam tur hian hetia hma kan la hi chu pawika ti takzet a.

General Financial Rules, 2017-in a tarlan dan chuan, hetiang, *limited ‘tender emaw, restricted tender emaw* ah hian mi pathum aia tam tih tur’ tih te a rawn dah a, Supreme Court pawhin thuchhuah a siam a, ‘competition commission hian bid-rigging chungchangah hian hma a la ang’ tih a ni. Contractor tu emaw rilruna deuh ten lehkhahan thehluh ang tih hi ka hlau khawp mai.

Chuvang chuan, “kawng kan siamnaah leh building kan saknaah te hian, tun aia nasa zawk hian hma kan lak a ngai a ni” tih kha ka rawn tarlang ve duh a; ‘he resolution hi pass ngei ni se’ tiin ka rawn thlawp a ni e. Ka lawm e.

SPEAKER : Dar 4 pelh loh tum ila. Tunge sawi leh ang? Dr. BD Chakma, Member zahawm tak ka sawm e.

PU B.D. CHAKMA : Pu Speaker, ka lawm e. Vawiina Private Member Resolution, “Kawngpui tha leh building tha kan neih theih nan tun aia uluk zawkin hna thawh ni rawh se” tih MLA zahawm tak Pu Lachhuanthanga rawn putluh hi tha ka ti a.

Hetah hian thingtlang lam huam ve dan hi a awm thei se ka ti a. Tin, ‘tun aia uluk zawkin..’ tih ni lovin, ‘nasa takin..’ tih ni zawk sela a that ka ring a.

‘Seeing is believing’ tih a ni a, saptawngin. Lunglei lamah motor-a kal dawn chuan, Aizawl-Thenzawl-Lunglei Road kha chiang taka hmuh theih a ni a, kawng tha meter 1 pawh hmuh tur a awm lova, *pot-hole* mai ni lo, pot-hole ai pawha lian *trap-hole* ang lian tak tak a awm a ni. PWD labour-te pawh hmuh tur an tlem khawp mai, hmun thenkhatah pakhat emaw, pahnih emaw an awm tawk a ni. A pawh khawp mai.

Aizawl-Lunglei Road hi a pawimawh a, kawng dang chu ka hre lova, southern lam, a bikin Aizawl-Lunglei Road hi a chhe nasa khawp mai a. Chubakah chuan ka bial headquarter Kamalanagar internal road 80% hi state PWD hnuai a awm a ni a. CADC hnuai a chuan kawng te tak te te chauh a awm a, a bak state hnuai a ni a.

Pu Speaker, golden jubilee inauguration programme-ah nangmah ngei pawh i kal tawh a, Khuallian-in kan sawm che a. Internal Road, town road hi enchian chuan a chhe em em mai a. Nikum hmasa Covid lai khan ka MLA fund hmangin pot-hole repairing (PCC) leh patch repairing ka tih tir a. Patch repairing ka tih lai pawh khan MNF Executive Committee ten nasa takin min do a, tha taka siam pawh an phal lova, chutiang dinhmunah chuan kan awm a ni. MLA fund chu *limited fund* a ni a, crore eng emaw zat nen lo chuan hetiang internal road repairing hi a tihtheih loh a ni. Chuvangin, Kamalanagar khawpui chhunga internal road repairing hi a ranglamin hma min lak sak thei se ka duh khawp mai.

Chumi rual chuan hei, kan session-ah pawh kan sawi fo thin a. Saski hnuai a central sorkar atangin soft-loan, engmah interest pawh awm lovin kum 50 tal a hman theih tih a ni a, khami fund atang khan ka bial, Kamalanagar town area tal chu min siam sak thei se ka lawm hle ang, Pu Speaker. Tin, sorkar building - Chawngte police station hi, a hmuna hmuhloh chuan hriatthiam a har a, kei chuan ka tlawh ve thin a, chutiangin police quarter pawh chhe tak a ni. Assam type pawh ni lo in pangngai a ni a. OC quarter phei chu vawikhat mah repair loh a ni a, tye bang a ni a. A luahtu OC a ni a, security a tan pawh a tha lova, hei hi hi Assam type tala sak dan hi a awm lo em ni, Pu Speaker. Chu mai ni lo, constable te awmna tur quarter tha pakhatmah a awm lo bawk a. Hei, nikum lawkah MLA fund hmangin, BDO pawhin minrawn ve thin a, ‘khawngaih takin Pu BD, i MLA fund atangin BDO office inchung hi min thlak sak rawh’ a ti a, ka thlak sak a ni. Tin, tunah hian SDO conference room a chhe leh tawh a, sak that an dil mek a. Tin, SDO leh BDO nei kawpin kan awm a, full-time SDO kan neihlohna pawh a rei tawh a. Chuvangin, sorkar office leh quarter te tal hi chu uluk takin enin, repair dan min ngaihtuah sak thei se ka ti khawp mai.

Chu bakah kan lifeline kawngpui Lunglei-Tlabung road, tin, kan MLA zahawm tak Pu Nihara bial pawh hi a ni tho a, MLA bial pali emaw, panga emaw laiin kan chhawr

a. Hemi Phairuankai Bridge hi thlatin deuhthaw a chhia a, repair a ngai a ni. Hei, social media ah pawh kan hmu fo ang a. He bridge hi permanent a siam dan hi a awm lo em ni ka ti a. Tunah hian motor lian (ke 12 nei) hi a kal thei lova, a hreawm hle a ni. Hei, Lunglei South bialtu zahawm tak Pu K. Pachhunga hi, Chawngte ‘L’ thleng hi a bial a ni a, Phairuankai bridge kal tlang lo khan khawiah mah kalna kan nei lo a ni. Khawngaihni, he bridge hi uluk takin min en sak thei se, major repairing tihdan awm thei se ka ti khawp mai.

He Private Member Resolution Pu Lachhuanthanga, Member zahawm takrawn putluh hi ka thlawp e. Pu Speaker, ka lawm e.

SPEAKER : Tunge sawi leh ang le? Kan kal dan tur chu – Memberte’n in sawi duhloh chuan CM, PWD changtu ka sawm ang a, chumi zawhah a mover kan wind-up tir ang.

Awle, Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Speaker, ka lawm e. Vawinah Private Member Resolution kan sawiho mek a. Member zahawm tak Pu Lalchhuanthanga resolution hi, “Kawngpui tha leh building tha kan neih theih nan tun aia ulukin hna thawh ni raw se” tih a ni a. Pu Speaker, hei hi tha ka ti khawp mai a, ka support bawka, lehlam atang pawhin an duh vek a, kei pawhin ka duh a ni.

Pu Speaker, khawvelah hian communication hi a pawimawh a, communication awm lovin ramim hma a sawm thei lova, kan hre vek a. member zahawm tak ka hmaa miin a sawi ang khan, mover pawhin tha takin a move a, a thil sawi zawng zawng pawh a dik a ni. Pu Speaker, ka sawi duh chu, National Highway-302 hi kan lifeline a ni a, Tlabung-Lunglei a ni a. Tunah an siam mek a, hei hi uluk takin kan venpui a ngai a ni. Chuti rualin World Bank funded road Chhumkhum – Chawngte zawh tawh a ni a, a lawmawm hle a, hetah hian sum pawh tam tak sen a ni. Amaherawh chu reiloteah a chhetan a, hmun hrang hrangah khuar a awm a. Hei hi engnge ni a chhan, engvang nge Mizoram kawngte hi a tlo loh em em? A chhan hi zawngchhuah a ngai a ni. Hei, Annual Report of Mizoram Road-fund Board, 202-2022 hi kan hmu vek a, hmun hrang hrangah kawng laih a ni a, a lawmawm hle a ni. Village road te a awm bawka, PMGSY, National Highway, District road, project hrang hrang a awm a. Hei hi a lawmawm rualin, hei hi engvang nge a tlo loh em em tih hi.

Vawina private resolution puluttu Hon’ble Member chungah pawh lawmthu ka sawi a ni. Tunah en ta i la, Aizawl-Lunglei Road hi a chhe em em a, a bikin Lunglei leh Tlawng Bridge inkarkhi. Vawing emaw zah siam tawh a ni a, mahse tun thlengin a la tha chuang lova. Tumah ka dem lova, amaherawh chu kawng tha kan mamawh a ni. Chuvangin tunah pawh kan lifeline, Tlabung-Lunglei road, NH-302 hi laih mek a ni a,

an hnathawh hi tha taka venpui a ngai ka ti a ni. Keini chu technical mi pawh kan ni lova, engnge a awmzia, engnge a chhiatna chhan, an lung hman thatloh vang a ni em nge kan venpui tha lo. Engnge a chhan? Uluk takin an hnathawh hi venpui ni se tih hi ka duh khawp mai.

Kha zawng kha he resolution ka support pahin tawi te ka han sawi ve a ni e. Ka lawm e.

SPEAKER : Sawi tur kan la awm em? Awle, Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, tawitein sawi ve duh ka nei a.

Hei, kan Member zahawm tak resolution, “Kawngpui tha leh building tha kan neih theih nan tun aia ulukin hna thawh ni rawh se” tih hi a pawimawh hlein ka hria a. Kan ramah hian building sak hna te, kawng laih hna te, black-top hna te leh lei dawh hna te kum eng emaw zat chhung kan lo kalpuiin kan lo thawk tawh a, kan ramin a chhawr em em a. Ei leh bar, sum leh pai zawinna kawngah te vawin ni thlenga kan chhawr, kan hman tangkai te an la ni hlawm a, a lawmawm em em a.

Hemi inkalpawhna hi a pawimawh a. Inkalpawhna (communication) hian, thlawhna kawng te, lawng kawng te, rail kawng te, motor kawng te hi a huam vek a. Amaherawhchu, vawiin nia kan sawi tura hi chu ‘road construction’, kawngpui, ‘motor kawng’ kan tih hi a ni deuh a. Central lam pawh hian an ngaipawimawh em em a, Govt. of India pawhin ‘hmasawinna rahbi pawimawh a ni’ tih hi an hria a. Chuvang chuan nikum maiah pawh khan Ministry of Road Transport & Highway atangin India hmarchhak tan sanction pawh kan hmu a. Mizoram bikin kan hmuh kha km 204 kms road construction siamna atan crore 6,664 min rawn pe a, keini aia dawng tlem hi Nagaland leh Sikkim chauh an awm nghe nghe a ni. Chutiang chuan Govt. Of India hian keini India ram state-ah pawh a kilkhawr bera awm, tlang rama awmte hma kan sawn theihna turin min duhsakna hetiang hian kan dil pawh ni em em loin kan dawng a ni a, a lawmawm tak zet a.

Chutah chuan, Pu Speaker, ka han sawi duh chu - kan kawng siam chhe hma lutuk hi a chhan a awm ang tih hi ka ring tlat mai a. Ka bial chhungah kawng an rawn siamtha a, kar khat chhung velah a khawk kha awm leh ta mai a ni. ‘Eng nge a chhan ni ang aw?’ ka ti a. Tuk khat chu, ka han hai a, lungno tihte kha kan chhuanlam thin avangin ka han en a, a lung no vang pawh a niin ka hre lova Ka hmuh ve thiam danah chuan, balu, rawra, boulder emaw pawh ni se bitumen nen kan chawhpawlh danah hian a inman nghet tawh lo hi a ni ber hian ka hre ta tlat a. Chuvang chuan, alkatra hi kan hmang ren lutuk a, alkatra hian heng balu te, boulder te, rawra te hi a man hlawm nghet

thei lo niin ka hria a ni. Chuvang chuan, chungte pawh chu kan inenletna atan pawh hian a tul khawpin ka hria.

Tin, kan kawng siam a chhiat hma em emna chhan lian tak pakhat nia ka hriat chu - *Rinawmlohna* hi a ni pakhatin ka hria; eirukna avang te pawh hi a niin ka hria a. Pawisa hi a hmanna tur dik takah ruahman a nih anga hman nisela chuan, nichina ka sawi tak ang chite kha kan pumpelh thei dawn a ni. Chumi piah lamah chuan, pawisa hi a thawktute tan hian duh ang thala hman tur a awm thin lo ni te pawhin ka hre thin bawk a. Chung thil chi hrang hrang avang te chuan kan kawng siam te pawh hi a tlo thei lo, a tha rei thei lo ni maiin ka hria a.

India ram atangin company ten Road Transport & Highway hnuaiha kawng min rawn sial sak a, henge pawh hi a ram neitute hian lo enpui ve a, lo vilpui ve te pawh hi kan mawhphurhna niawm taka a lan lain, sawrkar hian henge pawh hi a enpui ngai lo niin a lang a. Chu chu Assembly-a ka zawhnaah pawh min chhanna a ni a, henge pawh hi amak ka ti a. Central atanga min rawn thawh sak, (min rawn pek leh kan thawh pawh ni lo mah sela) kan ram chhungah hna an rawn thawk a, kan ram chhungah kan ta tura hna an rawn thawhnaah hian a ram neitute hian lo enpui te, lo vilpui te hi 'kan mawhphurhna a ni ve dawn lawm ni aw?' tih hi kei chu ka ngaihtuahnaah hian a awm lian em em a ni. Chung te chu, 'heng company rawn lutte an ngampat em emna leh min pawisak miah lohna chhan te pawh hi a ni thei ang em?' tih te hi ka ngaihtuahnaah hian a awm rum rum a ni. Chuvang chuan, kan in enlet a, tan kan lak pawh hi a tul hle a ni.

Kum tinin kawngpui siamna atan pawisa tam tak kan dah a, mahse, rei a daih thin lo hi a pawisa a. Kan bial chhungah te pawh kawng siam hmabak, kan internal road-te, kan main road chhe deuh deuh mai te tunah hian kan ngah a ni; an rawn siamna kha la rei lutuk chu a ni lo vek. Amaherawhchu, kan hmanraw hmante hi a dik tawk lo nge, a tha tawk lo nge? 'Hmanrua kan neih ang angte hi a nihna tur ang takin kan hmang lo em ni?' tih te hi ngaihtuahnaah hian a awm a. Chungte chu Pu Speaker, wawiin niah hian ka sawi lang lo thei lova.

Tin, Building kan sak dan hmang te pawh hi, kan contractor kan nih pawhin, department lam kan nih pawhin, mimal kan nih pawhin kan inenlet vek hi chu a tulin ka hria. A chhan chu kan building sak dan kalhmang atang pawh hian thil fel lo hi chu a awm thin a ni. Chutah chuan, work order te a lo chhuak a, hnathawhna tur pawisa atangin 'kawngpui tha, building tha, sum awm ang ang hian kan siam ang' tih ngaihtuah ai chuan, kha building sak tur emaw, kawng siam tur emawa pawisa lo kal atang khan 'engzat nge ka hlawh theih ang, engzat nge ka hlep ang' tih ngaihtuahna avang hian kawng tha kan nei thei lova, building tha pawh kan nei thei lo a ni. (**Speaker:** Minute 2 i la nei e.)

Chuvang chuan, Pu Speaker, helai hi a ngaih pawimawhawmin ka hria a. titinaah ‘mi state chuan pawisain kawngpui an siam a, building tha an sa a. Keini Mizoram chuan kawngpui leh building-in pawisa kan siam’ tih te hi a awm thin a ni. Heng ngaihthlak te hi a hrehawm em em a, a nuam lo lutuk a ni. Chuvang chuan, wawiinniah hian inenlet ila a thain ka hria a.

Tun hnaihah ka bial chhunga awm MICE School building sak a ni a, ka zuk en a, a building sakte khu a chhe em em a ni. A slab te a puar a, a room hnuai ber laboratory pawh pawisa contractor hnenah pek a ni a, mahse sak a ni lem hlei lova, lungrem 5 awm turah 4 rem a ni a, mahse a building sak hnuai lam do tura pawh kha pakhatmahin a do lova, chutiang te chu a ni a. Septic tank a awm mumal lova, ... (Pu Speaker, a hmawr ka rawn bawk ang e) toilet pawh hmeichhia thlatin bi nei tan a hranpaa siam a awm miah lova. Chuvang chuan, building tha neih kan mamawh a nih rual hian, kan zavai hian wawiinniah hian in enlet ila, sorkara a mawhphurtu, he hmuna roreltute hian hma i hruai ang u. Keiniin hma kan hruai chuan, hnathawktu mithiam rual, engineer rual kan neihte hian englai pawhin kan hnung zui a, kan ram tan theihtawp chhuah hi an hnial lo ang tih hi ka ring a ni. Chuvangin he Resolution hi Pu Speaker, ka thlawp a pass ngei turin ka ngenpui a ni e. Ka lawm e.

SPEAKER : Tunge sawi leh ang? ‘A resolution hi a tluangtlan si a, a tha e’ tihpui mai intum em ni? Aw le, Member zahawm tak Pu VL Zaithanzama han sawm hmasa teh ang, a senior zawk a hnungah.

PU VL. ZAITHANZAMA: Pu Speaker, ka lawm e. Kan MLA zahawm tak Pu Lalchhuanthanga resolution - ‘*Kawngpui leh building sak reng reng tha leh tlo tura hmalak ni rawh se*’ tih sawina hun tha tak wawinah kan han nei hi a lawmawm ka ti hle a. Ka hmaa ka MLA pui zahawm tak takte khan a support zawng hlerin an rawn sawi a, keipawhin he resolution hi kan pass ngei theihna turin tha ka tih thu rawn sawi ka tum a ni.

Kan ramin a mamawh a kawngpui leh building tha hi, kan House Leader, tuna kan PWD changtu ngei pawh hi kawng vei a ni a, *rulngan pa ang zara* kawng siam duh kha a ni. Keini pawh chutiang duh tho chu kan ni a. Amaherawhchu, kan kawngpuite a tlo lo em em thin a, kumkhat daihin kawngpui kan siam lova, kumkhatah kan kawngpuite kan siam zo hman bawk si lova. Chuvangin, kan siam zawh hmain kan kawngpui siam hmasak te a lo chhe leh hman thin a, kawngpui tha kan nei hman lova. Mizoram kawngpui leh building te hi chu ‘a tha taw lo’ tih hi chu kan pawm tlang niin a lang a. A chhan kan inrinsiak a, kawngpuiin a that phah chuang hlei lova. Tunah hian, ‘chulai bik chu’ tih sawi ka tum lova, kan ram dung leh vanga kawngpuite hi duhthu a sam lo em em a ni.

Kumin kum tir lamah khawthlang lam Phuldungsei tlangdung te ka kal a, Champhai lam te, Siaha lam te pawh; khawilai mah duhthusama tha a awm lova, a veiawm hle a ni. Kan kawngchhiat chhan hi kan inrinsiak a, ‘kan ram leilung ngheh tawk loh vang te; kan lung chan tawk loh vang te; alkatra kawng siamnaah kan telh tlem vang te; kan kawngsiam chhah tawk loh vang te a ni’ te kan ti a, chutiang chuan ngaihndan chi hrang hrang kan nei a ni. “Engvangin nge Meghalaya kawngsiam a chhah that em ema, Mizoramah kawng metal a pan bik em em?” tiin engineer pakhat ka zawt a, chuta mi chhanna chu hei hi a ni - ‘Kawngpui pawimawh te uluk taka endik a ni thin a, nikhatah truck engzatnge kal, bus engzatnge kal, car engzatnge kal tih te uluk taka endikin, chumi mil chuan kawngchhah zawng tur kha India Road Congress in a recommend thin a ni’ a ti a. Chuti a nih chuan, Mizoram kawng pan bik kha a tur rengah ka han ngai a. Mahse uluk takin ka han ngaihtuah a, truck full-load kal tamnaah chuan kawng chhah chu a ngai teh meuh mai a. Meghalaya te ai chuan Mizoram-ah motor chu a tlem a, full-load kal pawh a tlem a, kan kawng metal chhah zawng pawh a pan ta a ni. Amaherawhchu, chutianga kan chhut a nih si chuan, a chhah leh a pan kha a tlo dan a inang tur a ni. Truck kal ngai lohna ah chuan pan deuh pawhin lo ti ta ila a tlo mai a. Chutiang chuan, motor kal dan uluk taka ena, chumi mila kawng chhah zawng leh pan zawng siam anih si chuan, kan state thenawmte aiin Mizoram kawng pan deuh mahse, a tlo lohna tur awmin ka hre lova. Chuvangin, a mi chhanna hi thil dik ngei ni pawhin a lang a. Amaherawhchu, hemi vanga kan kawng hi tlo lo niin a lang lova, *kan thawh thatloh vang* ni berin a lang a ni.

Tichuan, hemi kan ngaihtuah laia ka rilrua thil pakhat awm chu - kan thawhnaah hian department hrang hrangte thawhhona a tha tawk lo a ni. A bikin khawpui chhungah PWD-in kawng a siam a, a hnu reiloteah PHE lamin an rawn lai chhe leh a. Theih chu ni se khawi lai kawng bik emaw hi department hrang hrangte thawhhona fel tak hnuaiyah han siam chhin ila; uluk taka tui pipe te phumin, a chungah chuan black top ni ta sela, chu chuan kan kawngte hi a tih tlo sawt ka ring a ni. A chhan chu, kan tui pipe te a hlui tawh a, a leak a nih chuan kawng hian a haw em em a ni. Kan tui pipe te hi kan phum thuk bawk si lova. Chutiang tho chu telecom te pawh a ni a. Tichuan, department hrang hrang kha laia hna neite kha inlungrua takin thawk ho ta ila chu, kan kawng hian a tlo phah sawt ang tih hi ka ring tlat a, chu chu ka ngaihtuahnaah a awm a ni.

Pu Speaker, tunlai khawvelah hmasawna a thang zel a, technology tharte pawh a lo chhuak a. Mizoram-ah hian kan la hmang velo niin a lang a; ‘FDR’ kan tih, youtube-ah te kan hmu a, pathum, pali kawngsiamtu a inzui duah duah a, a thenin alkatra an rawn thlauh a, a hnungah an lo chil mam leh zel a. Chutiang chu hmannah Nagaland-ah pawh an hmang tawh an ti a, ‘engtikah nge kan hman ve ang?’ tih chu ka ngaihtuah thiam pha lova, hun rei vak lo ah chuan kan hman ve ka ring a. Hetiang anga tih hian kawngsiam chhung a rei lova, ‘a tlo bawk’ an ti a, ka awih khawp mai. Department lamin uluk takin kawng an han siam a, a zanah a thenin motor-in an lo dai leh a, chu chu kan kawngte a nih tur ang a nihlohna chhan te pawh a ni awm e.

Tichuan, contractor-te an pawimawh hle mai a. Hmun tamtakah chuan contractor te an zawhloh hna pek an awm a ni. Hna an ngah lutuk a, an thawk tha hman thin lova, an pending vak vak thin a; chu chuan kawng a ti thalo a ni. Chuvangin, mi pakhat hnena hna pek tam lutuk hian kawng a titha lova. Tin, a then chuan hralh kan ching a ni. Hna hralh kual leh commission ei kual hian nasa takin kawng a titha lo a ni.

Kan kawng thatlohna chhan chu - a maintenance hi kan ti tha tawk lo; chu chuan kan kawng hi a titlo lo a ni. Kutphah tiat leka pawp a awm pawhin thuamtha nghal zel ila chu, kan kawngte hi tun ai chuan eng emaw chen chu a tlo dawn a ni. A vaia a chhiat a, a bula tanga sum tam tak senga tih leh ngai lo hian a maintenance hi uluk thei ila chu kan kawng hian a that phah zual ngei ang tih hi ka ring tlat a ni.

A tawp berah chuan, ‘kawngtha neih hi kan tlin em aw?’ tih hi vawiinah hian ka rilruah a lo awm tel a ni. Kawng a that chuan, kan speed te a sang a, accident te a tam a ni. Tunhnaiah Champhai leh Lunglei lamah te pawh kawng tlemin kan han siamtha a, accident-in a zui a. Chuvang chuan, kawngtha nei turin sorkarin theihtawpin hma la ila, chutih lai chuan mipui lam pawh inzirtir kan ngai takzet a ni. Tin, kan kawngtha te enkawl turin mipui lam pawh tun aia nasa lehzuala kan inzirtira, tan kan lak a ngai awm e.

Chuvang chuan, Pu Speaker, he resolution hi pass turin ka rawn thlawp a ni e. Ka lawm e.

SPEAKER : Member zahawm tak Pu Lalduhoma ka sawm e.

PU LALDUHOMA : Pu Speaker, Parliament-ah te, State Legislature-ah te hun reilo te experience kan lo nei ve ta a. Hetih chhung hian private resolution, chu pawh opposition member ta lehngal, sawiho pawh ngai lova pass mai rawtna opposition leh ruling atanga a lo awm hi ka hriat vawikhatna a ni a; ‘a lawmawm hle mai’ han tih mai pawh a awm hle a. Amaherawhchu, kan tihchhan ni awma lang hi a lawmawm lovin ka hria a.

Hei, Congress unaute pawh sawiho lova pass mai rawttu ah an han tang a. Hmanni lawka an sorkar laia kan kawng chhiat zia kan hria a, khangte kha kan sawichhuah an hlau ni hian a lang a. Chuvang chuan, pass mai an rawt dan hi a lawmawm lo lampang a ni a, paw ka ti a. Tin, ruling lam te pawh opposition resolution an han thlawp duak mai hi, sawi loha, sawi tam loha pass thuai thuai an chak vang a ni tih hi a langin ka hria a. Chuvang chuan, kan inthlawp dan hi chuan ‘lung a tiawi chiah lo mang e’ ka ti a ni.

Tin, kan ramah hmasawna ruangam a thlen belh zel a. President rule-ah pawh awm ila, heng a kal tur hi chu a rawn kal zel dawn a ni. Chu chuan kan ram leilungah

chhiatna tam tak a keng tel zel si a. Chung a nih avang chuan, mi tam takin kan ram a chhiat zel hlauin pawl te a lo ding a. Vawiinah hian, Pu Speaker, ‘*Centre for Environment Protection*’ tih te, ‘*Centre for Environment & Social Justice*’ tih te, ‘*Save Mizoram Rivers*’ tih te, ‘*Mizoram First*’ tih te, hengte ina hmasawna ruangam kan neih ruala kan ram chhe tur thahnemngai taka veng tura an auchhuahpui hi a ropui ka ti a. A ram enkawltute, thuneihna leh mawhphurhna kengtute ai mah mah hian thahnem an rawn ngai thin a, an kutah thuneihna a awm ve bawk si lova, an khawngaihthlak ka tiin, an chungah lawmthu ka sawi duh a.

Tin, Central YMA pawhin sorkar nen thawhhona thuthlung te siamin, kawng tha kan neihna turin hmata an la a, a lawmawm ka ti a. Heng kan ram hmasawna ruhrel a nih tur ang a nih theihlohna chhan hi chu - hlemhletna vang; corruption vang; rorelna dik lovin an hria a ni tih hriain, chhungril lama siamthat kan nih leh theihna turin, rorelna dik duhtu pawl te pawh an lo piang ta a, hmanni lawkah an kalkhawm tih thawm te kan hria a. Vawiinah hian Pu Speaker, kan Zoram mipuite hian *rorelna tha*, *rorelna dik* an duh a, an ril a tam a, an tui a hal a, an auchhuak mek a ni.

Tichuan hei, State kan nih hnuah hian PWD hi chief minister ten an la chang deuh char char a. Kan ram kawngte hi a tha a nih chuan, kan chief minister te kan fak a ngai ang a; kan ram kawngte hi a thalo a nih chuan, ‘kan chief minister ten mawh an phur dawn’ tihna a ni. Sorkarna te hi kan chelh rei avanga inchhuan ngawt chi a ni lova. Sorkar rei viau si, hnathawk chhe deuh si kan nih pheih chuan, a chhe zawnga hriat reng kan hlauh dawn tihna chauh a ni. Chuvangin, sorkar tha leh chhia kan tehna te hi sorkar rei lam ni lovin, kan achievement atangin a ni turah ka ngai a.

Tichuan, Chief Minister portfolio a nih reng tlat avangin, vawiinah hian kan ram kawng chhiatna chungchanga mawhphurtu ber chu, ‘kan Chief Minister hi a ni’ kan ti lo thei lo a ni. Tichuan, heng project lian ten chhiatna an thlen kawngah hian kan hotuten hma an hruai ka ti lo thei lova. Thil sawi hrehawm tak chu a ni nain, thudik a ni a; *thudik* hi chu huai takin kan sawi tur niin ka hria. Kan duhsak zawngte restricted tender hmangin hna kan pe a, *Dan* ding lai kalhin. Hei, ka *Zawhna* chhanna a lo chhuak a - PWD-ah ringawt pawh hian restricted tender 121 pek a lo ni hman tawh a. Hengte hian kan dan leh hrai a palzut a; restricted tender ni tura danin a phut te a awm reng reng lo; mahse, *Dan* lo zawk kha *Dan* angin tunah chuan kan kalpui ta a. A then te pheih chu restricted tender mai pawh a ni tawh lo; chu aia tha leh zual eng tender mah nilo, eng work order mah pawh ni lo, verbal-a inhrilha hna inthawh tir tawp te a awm a ni. Lengpui airport te pawh tu emaw chuan verbal-in a thawk tawp a, April thlaah; September thlaah work order pawh nilo, ‘*notice to proceed*’ tih a dawng mai a ni. Work order pangngai pawh a ni lo. Khati mai mai khan dan leh hrai hi kan palzut nasa lutuk a; heng hi sum siam nana kan hman avangin kan ram hi kan tichhe mek a, kan sum kan khawhral mek a ni.

Tichuan, a bill la thei theiah an tang a; mi pakhat bill lak zat kan hria a, social media-ah a darh chuai chuai a. A ni la lain a bill a lehlan thin a; mi tam takte bill a tan thep thuap lai leh, miten an GPF te, an pension te an lak theihloh laiin chung hote bill chu a tang ve ngai lova. Treasury atanga bill an lak tawh han chhut phei chuan - thla tin hian vaibelchhe khat chuang hna thawk zel anga hisapin, average-in a chhut theih a. Chuti khawpa contractor tha chuan engineer engzat nge a neih ang le? Equipment eng zat nge a neih ang le? Chuti khawpa hnathawk chak chu Mizoram hian kan lo nei a ni maw? An bill lak zat atanga teh chuan, chu chu a ni tlat si a ni.

Tichuan, hna chhia complain a lo ni a, YMA te, khawtlang te, NGO te an kalkhawm a, a hmunah an endik a. Tichuan, officer-te pawhin an rawn complain ve a, SE te, EE, SDO leh JE ten. Khangho khan hnathawk thalo an han pal ve dawn deuh a, chungho chu transfer anni mai a ni. Engtin nge hna a thawh that theih ang? A lu ber atanga thil hi a kal dik tawh loh chuan, a hnar atanga lui hi a nut tlat tawh chuan, a hnuai lamah a fim thei lo.

Vawiinah hian Pu Speaker, sawi hrehawm ka tih em em chu - kan ruling party te hi khaw tina mipuite kawng dik min kawhhmuhtu ni se, kan ram hi a dam ang. Amaherawhchu, hna pawh a thawk chhia chhiaa an tan zel avang hian, kan ram hi a na a ni; hei hi paw ka ti tak zet a ni. Chuvang chuan, tu party emaw tal kan ram maichama inhlan ngam, inhalral ngam a awm a ngai tawh. Officer te pawhin hotute duhsak zawng contractor chu an nek ngam lova, an han nek deuh chuan, *transfer* anni mai; tun term-ah pawh chutiang sawi tur eng emaw zat kan hria a ni. Building te, retaining wall te a chim a, ‘tute nge khang ti chimtu kha?’ kan tih chuan, kan hotu lawk ber berte nena inngheng hnai tak an lo ni zel thin si a ni.

Tunhnaiah pawh Lunglei South bialtu MLA zahawm tak, a pa in Muallthuum South-Mat Lei SEDP atanga cheng nuai 35-a a dawh, a chhiat zia video a viral nasa em em a ni. Pu Speaker, a hotute zawkin kan hnam hi kan tichhia a ni. Khawtlang an lungawi lova, an mangang an auchhuak a nih kha. Lei dawh thar ni siin, accident tawh theihna mai tur a ni a. MLA te hi kan bial chhunga hnathawh that loh vengtu tura ngaih kan ni a; mahse, hetiang hi kan ti duh a nih si chuan, kan ram hi engtin nge maw a dam ang le? A paw ka ti a ni; hei hi a lungchhiat thlak ka ti.

Tin, kan hotu apiang tena thubuai an nei ziah mai te, vawiina kan House Leader ngei pawhin PWD hnathawh chungchanga case a nei chho leh ta te hi a hrehawm ka ti a, rilru hi a na; zahthlak ka ti a ni. Tin, enga tinge kan ramah forest clearance leh environment impact assessment nei lo hian NHIDCL te hian heti teh chiama hna an thawh theih bik le? Helaiyah hian office memorandum ka nei a. Hei hi *Roads & Infrastructure Development Board* dinna thu a ni a, a endik tur chu - NHI, NHIDCL, NRRDA, BRO, NABARD leh a dang, kawng laiho leh khatiang building leh infrastructure lian khawih zawng zawngte endiktu tur anni a. A hna tur chu, “All such

development and construction-works pertaining to roads and highway shall henceforth be inspected, monitored and evaluate at regular intervals by Roads and Infrastructure Development Board,” a ti a ni. Kan Chief Minister hi *Chairman* a ni; heng hnathawh ho endik tu tur; regular taka monitor-a, evaluation pawh siamtu tura din a ni a, mahse hei hi kan thatpui lo a nih hi maw le; kan that pui hauh lo mai.

Heti chung hianin, hei NHIDCL-in kan ram a tihchhiat zia hi kan hria a ni. Mi ramah te chuan a ram lei tak chin kha kawng zau zawngah an hmang thin a, kan ramah chuan kawng thlangah an dawh a, leivung nen kawng zau zawng min siam sak a, engtia rei nge a daih ang heng te hian? Kan lui an hnawh ping mek a, kan sangha dil, ka leilet, kan luidung tam tak an tichhe mek a, tunah hian mi huan an tichhia a. Khawzawl-ah te khian han kal teh u, Tuisen Lui te khi a tichhe vek dawn; fur a lo ni ang a, Leivung management te pawh hi ngaihtuah ila, mimal tan pawha chhawr theih, mipui leh sorkar tan pawha chhawr theihin leivung te hi kan hmang thei reng a, mahse, kan ti lova. Heng zawng zawngah hian kan *Zawhna* min chhanna chu:- Aizawl - Champhai, Lunglei - Tlabung leh Thenzawl forest division chhungah hian NHIDCL-in phalna la lovin hna an thawk' tih a ni. Heng forest division zawng zawngte hi kawngpui lainhain a hrut area te anni a, chungah chuan clearance la miah lovin engati nge hna kan thawh tir theih? He board hian engnge a tih? An tang tlang a, an lungruah zawk em ni? Engatinge kan hotute'n heng laka min hum tura board din hian min hum leh si loh? Engatinge kan NGO te zawk an auchhuah? Chu chu wawiina kan buaina chu a ni ta ni. Village level atanga state level thlengin monitoring committee a awm a, mahse kha khan hna an thawk chuang lova, a paw em em a ni.

Tin, an tihdik loh te hremna tak tak pawh kan nei lova, DFO te hian an area theuhah stay order an pe thei a ni, an duh phawt chuan. Mahse, khatiang kan tih kan hre lova, ka bial ngei ah pawh feh kawng te, motor-a kan feh theih thinna te kha an leivungin min chhilh sak tlat a. Tin, kea kalna kawng - ram vah kawng te, huan kalna kawng te, lo feh kawng te min tihchhiat sak bawk a, chutiang chu a tam em em a ni. Chhantu neilo ang mai hian kan awm a. Tin, kan lui dungah balu leh lungte phalna la hlei lovin JCB tein duh tawkin an la a, kan luidung an suasam a, an tichhe mek a ni.

Tin, a huna zawh loh contract hi a tam em em a, PMGSY ah ringawt pawh hian a hun a zawh loh 72 a awm a ni. Chung chu a ni a, (ka sawi zo tep, Pu Speaker) World Bank hian ‘a hna supervise tu leh a hna thawktute hi DPR siamtu anni thiang lo’ a ti a. Amaherawhchu, kan ramah chuan DPR siamtute hi a hna thawktute leh supervise tute nena chaw thleng pakhat inzen tawm te kan awm a ni. Kan tih dan hi a diklo lutuk, kan rorel dan hi. Chuvangin, hetiang zela kan awm a nih chuan, ni khatah kan duh zawng mite chuan work order pathum te an hmu thei a ni a, a diklo reng reng mai a. Tin, *defect liabilities certificate* te pawh hi a hun, a period tawpah pek chauh tur a ni. An maintain tur a ni a, an maintain leh chuang si lova, survey te pawh google atangin an survey mai mai a, contractor survey that leh te a ngai a. Hetiang hrim hrima kan kal avang hian,

uluk takin, hei aia nasa hian kan ram building-te leh kawngpuite hi ‘kan sorkarin nasa zawka enngunin leh, uluk zawkin ti rawh se’ tih hi he resolution hian a tum a nih avangin, hei hi inlungual taka pass ka han rawt e. Ka lawm e.

SPEAKER : Awle, PWD changtu ni bawk, Chief Minister zahawmtakin sawi duh te a nei em?

PU ZORAMTHANGA, CHIEF MINISTER: Pu Speaker, ka lawm e. Vawiinah hian Member zahawm tak Pu Lalchhuanthanga’n, “*Kawngpui tha leh building tha kan neih theih nan tun aia ulukin hna thawh ni rawh se*” tih resolution a rawn pulut a, kan vaiin tha kan ti tlang a. Chuvangin, a sawi tawh phawt chuan, ‘hei hi kan pass tlan a tha e’ tiin, kan vaiin tha kan ti tlang a, kan tan tlan a tul zia hei hian a lantir a, a lawmawm hlein ka hria a. A bik takin PWD minister anga hna kan han thawhah a mawh pawh kan la zual a. Member zahawm tak tak ten kan building a ni emaw, kan kawng siam a ni emaw a tha tawh lo laite in han sawi kha a dik a, a aia nasa pawh kha ala awm teuh ang tih pawh ka ring a. Chuvangin, kan vaia tan tlan a tul zia he House-ina kan resolve-a, hma kan lak a tul tak tak a ni.

Amaherawhchu, thil pakhat kan hriatsa tawh, kan hriat tlan tho mah ni se han sawi nawn ka duh chu - kawngpui tha hi hetia a han a pian chhoh hian, ram thar, state thar, UT thar a ni emaw, a ram a rawn upat ang zel hian kawng tha te, building tha te, khang kha finnain an rawn hmu a, mipui ten thil tha an duhna nen a lo kal kawp a, a rawn evolve (a lo her chhuak) ve thin a, chu chu a kalphung a ni tih kan hria a. Keini pawhin kan ramah ngei pawh kan hmuh chu, district council lai te chuan hna te han thawk ila, kei pawh Pu Speaker, lung chher leh lung rem tein district council hunlai khan ka inhlawhfa tam ve khawp a. Lung kan han rema kan tih dan chu, mortar cement a char ang taka lantir tur khan mud mortar (chirhdiak) khan kan han rem hnan ta a, a inkar kha cement-in kan zut a, a bel that nan krandi pawh chauh a lo tawh lova, kawi te hian kan han hrut rual a, cement mortar anga bill a nih theih nan. Harsatna karah lungrem te pawh kha UT period hma, district council hma te pawh khan ka lo thawk ve vak tawh a; khata tanga tun inkara develop chhoa kha, a rahbi pawh sawi tur a tam ang a. District council period atangin UT period ah a lo chho a, ‘UT building a nih kha; UT kawng a nih kha’ han tih chuan, a dik chiah mai a; ‘second class’ ti khan sawi ngai lovin kan hmu vek mai a ni.

Kan kawng laih pakhatnaa kawng grading kha a tha lo thin a, tin, a kawng a zim bawk a. Chuti loah chuan a kawng, black-topping kan tih pawh a chhe bawk a, rei a daih lova. Amaherawhchu, state kan ni a, tlem chuan a rawn improve ve zel a, vawiin ni thleng hian kha kha zawi zawiin a improve chho a. Kan tun hun, he electronic period kan lo thlen takah chuan development zuang pawh a chak a, atha lam turah pawh a chak a, mahsela kan duhthu samin a la tha lo em em a ni. Tunah pawh hian theih tawpa kan han tih pawh a hretu ka ni a. Chief Minister In rangva chih lai pawh khan kan buai

khawp a; fur lai chuan chawhtawlh leh baltina dawh ngai hmun 3-4 ah a awm a. Siam kan han tum thin a, a buaithlak em em mai a. Khatiang kha CM bungalow rangva chih ngai te pawh a ni a. 'Hei hi chu concrete-a tih ngei a ngai' an tih pawh a tam khawp mai. Engpawhnise, kha kha kan pha thei lova, kan tawn lai mek a ni a. Kan hotute'n an han sawi bak pawh kha a la tam mai a; kha kha kan tun dinhmun chu a ni.

Amaerawhchu, zawi zawiin India sorkar development nen, ram pumpui hmalakna nen, State-in hma a lakna nen a rawn inchhawp chho ta a, thil danga thatlohna kha chu sawi thu a cheng lova, a tha lo lai period chu ka sawi tawh lo ang a. Tuna hna inchhawpah hian, 'national highway India sorkarin tam thei ang ber siam ila, chu chu sorkar laipui atangin kan rawn en ang; kan rawn monitor ang; kan rawn maintain ang' an ti a. Kan ramah pawh chu chu vanneithlak takin a hma aiin national highway pawh kha tha leh zual, two-lane-a siam turin hma an han la ta a. Silchar phai, Vairengte lam atangin Aizawl thlengin 'four lane-in a kal tur a ni; State capital chu four lane-in a thleng ngei tur a ni' tih a ni a. Keini ngaihah chuan two-lane hian hmun 2-ah te kal se a ziaawm zawk ang a; four-lane a thil tihtur hi a turu lutuk a, kan kawng laih leh kan rama tlang awm dan nen hian 'kan ti khawlo zawk ang' te kan han ti rum rum zawk a, a dang chu an sawi chuang lova; 'State capital tal chu four-lane a thleng tur a ni' an ti a. Chuvangin, Tlawng kam kawng hlui zawka four-lane laih an tum pawh khan, "two-lane pawh tling lo han tih pawh hi kan tlin lova; a thlang lawkah lui a ni a, tawlh hlekin a chhuk a, a inkhuap a; four-lane han lai teh reng ula chuan..." kan ti a. chuvangin, "hei hi chu kan awi lo, a chhak green area-ah duh tawka four-lane-a laih theihna, lui tana hlauhawm lutuk lo a awm e" tiin kan zuk nawr a, tichuan an remti a. Tlawng kam kawng hluia lai lovin four-lane tur pawh kan nawr chhuak thei ta a ni a. Aizawl thlengin four-lane kawng a lo kal ang a, chu national highway chuan Aizawl atanga hmun dang kalnaah - Aizawl atanga Lunglei, a chhak zawkah....

SPEAKER : Kan hun a tawp a; kan CM zahawm tak hian han sawi zo law law sela the kan ti em? (*House-in tha a ti a.*) Awle, sawi zawm leh mai rawh le.

PU ZORAMTHANGA, CHIEF MINISTER: Awle, a tawi thei anga Pu Speaker, han tih pawh ka han tum ang a.

Tichuan, Lunglei – Seling tlangdunga kawngpui pangngaiyah two-lane-in Tuipang thlengin national highway an tlang pheipup dawn a, tunah chuan a kal ta a. Tin, Seling atangin Champhai lam chhunin two-lane national highway pawh an lai mup mup a, a kal mek bawka; Seling atangin Tipaimukh chhunin a kaltlang dawn bawka; khawthlang lamah Kanhmun lam thlenga chhuk thlain a kal dawn bawka; chhak lam atanga khawthlang tawp lam chhunin, chhim tawp atanga hmar tawp chhunin national highway a kal tlang pup dawn a ni.

A rawn enkawltu chu Govt. of India - MoRT thin, NHIDCL kutah a rawn dah a. Anni khan tender te, hna tur zawng zawng nen an rawn ti a, a State neitu chuan tha kan tih leh thalo kan tih chu theihtawpin kan lo sawipui a. Ka sawi ang khan, NHIDCL-in ‘Tlawng kamah four-lane a kal tur a ni’ an tih pawhin theih tawpa kan lo tan chuan, ‘a nih leh, a chhak lamah ni rawh se’ an ti ve ta a. Khatiang khan, a tha lo lai pawh State sorkar hian beihpuiin kan lo bei a, nasa takin, a tan pawh kan lo tang reng a ni. Amaherawhchu, khami piah lamah khan kawng hlawm khat a la awm a, chu chu ‘PMGSY’ a ni a, PMGSY chu thingtlang khawtin te chhun vek tura central sorkarin RD hnuaia a rawn dah a ni ve thung a, anmahniin an guidelines neih angin an rawn siam vek a, open tender-in kan han kal a. Kan hmuh ang khan, PMGSY chu a kal ta a, a buaithlak lai chu - open tender-in kan han ti a, lowest bidder (a hniam ber) kha pek a ngai a, pek loh chuan Court-ah an kal a, a tihngaihna a awm si lova. Kan han inchhan hniam siak tak tak a, scheduled of rates hnuaiah 10% below, 15% below, tunah pawh 25% below a awm a, a then chu 50% below-a chhang te pawh zuk awm a maw le! A buaithlak lutuk a. Han pekloh dawnin, Court-ah an kal dawn baw si a; pekin, a tlawlh dawn tih a chiang sa baw si; eng emaw ti ti khan ‘5% below aia hniama chhan theihloh’ an han ti a. ‘Dan’ chiah pawh chu a ni lova, kan siam chawp ve deuh a ni a, khata tang pawh khan a hniama lo chhang lui an awm pawh khan, an security deposit-ah ‘chumi percentage chuan an dah sang tur a ni’ tih nen theihtawpin monitor turin PWD kha a kengtuh an rawn hmang baw si a, kan tang a ni.

Chuvangin, PMGSY tender-a, kan kalkawng pawh en ila, a then chu bansan (blacklist) tak, thawh mumal tak loh, chhanna open tender percentage hniam si, ngawl tang a tam em em a ni. Chuvangin, open tender-a tih hi a then chuan, “khaw nge a department, a sorkar ho hi? Ka han tibuai ve reng reng teh ang” ti ang maia, thawh theih miah loh tur hniam lutuka chhang kan tam thin a, chu chu kan ngamlohna leh kan buaina ber, kan ram kawng chhiatna pangngai a ni. Scheduled of rates pangngai PWD-in an tih ang hian thawk char char sela chuan a ziaawm ang a, mahse a thawh theih si lova, an inchhanhniam siak ta thin a. Tu pawh sorkar ila, kha chiah kha kan buaina a ni ta a ni. Chuvangin, restricted tender-a a pawimawh zual tih kha chuan rate hniam lutuka kal lovin, scheduled of rates pangngai ang a awmze neiin a thawh tir theih a. Sorkar kal tawh te pawhin, “engah nge in restrict leh thin?” an tih pawhin, ‘ngawi rawh u, hna tha kan duh chuan kawng dang a awm mang lo; kan open tender chuan hei hi a ni a, an intihsiakna karah kan buai thin a ni” an ti a. Kha kha restrict tender tamna chhan pawh a ni a, a theih hram chuan open tender-a tih hram hram pawh kan duh a ni.

Eng pawh nise, kan duh chu ‘kawngtha’ a ni, sanction lo kal aia sanga thawh tir theih a ni lo; sanction lo kal ang tal kha chuan thawk se la, khami aia hniam fe a thawh tuma hna duh vanga han intlansiakna hian kan ram a tichhe nasa lutuk a, chu chu kan luhaina ber pawh a ni. Eng pawh nise, tunah chuan kan control theihna piahlamah NHIDC-in National Highway an han ti a, kan environment an tichhiatna hi a nasa ngawt mai; kan phek tan a ngai a ni. Forest Deptt, PWD, khawtlang hruaitute, sorkar leh NGO-

te nen tih tak taka kan environment an tihchhiatna hi chu hma kan lak a ngai a, kan tan zel pawh a ngai a ni. Chuti loa, an hna pangngaiyah chuan a vengtu (monitor) tur pawh anrawn insiam bawka, a ziaawm deuh tawh a. Tun hmaa kan kawngsiam ai chuan a ziaawm a. Mahse, duhthusam lo lai a la tam khawp mai a, hetah erawh hi chuan sorkar pawh, PWD leh kan NGO-te pawh ‘thawhho dan i ngaihtuah ang u’ tiin inremna te neiin hma kan la hial a ni. A tul zia leh kan duh zia chu a takin a lang a ni. Chuvangin, ti ho zel ila, VC, NGO-te leh khawtlang hruaitute nen pawh, nitina an hnathawh hmu khanrawn report vat se la, ‘engatinge?’ kan tih tlan theih nan kan vai tan a ngai tak tak a.

Chuvangin, helaia resolution, “kawngpui tha leh building thate kan neih theihna turin theih tawpin tan nasa lehzual leh, uluk lehzuala hnathawh hi a tha a ni” tih hi kan pawm tlang a. Tin, a dik bawka, pawm ngei ngei tur pawh a ni a; keini pawhin he resolution hi pass tha kan ti a. Kan in sakte ‘10% below’ tea an chhan chuan, a hlep tur chuan cement leh eng emaw kha, a cement proportion lama tihhniam te leh thil dangah te an tlak a, kan in sakte pawhin a chhiat phah thin a ni. Mahse tunah hi chuan, a tlangpuiin kan in sak hi a viltute’n an vil bawka, a ziaawm ta khawp mai a, tunhma ai kha chuan; that lam pan zel tur leh quality thaa kal tur pawhin sorkar lam leh department lam pawhin hma kan la a, lak zel pawh kan tum a. Kan NGO-te leh midang pawh thawhpui turin nasa takin kan sawm bawka ni.

Tin, kan working period chu kan hria a, kum khatah thla 6 pawh a ni mang lova. Ruahtui a lo tla leh zung zung a, a black top chinah pheichuan a buaithlak khawp mai a. Chuvangin, ‘concrete (PCC) mai hi a tha zawk e, kan ram dinhmunah chuan’ kan ti fo a. Eng emaw tawi deuhah pheichuan kan ti zung zung mai a. Veng chhung kawngah pawh a tha kan ti a, mahse kawngpui tak tak a han tih dawn hian PWD tan a buaithlakna chu, khawilai khawkar kawng emaw kan PCC-a, eng emaw chhung chu motor tlan tir loh a ngai si, a contractor leh a khuate ‘motor tlan an mamawh tawh’ tia in tlantir chuan a rap chhe vek dawn si; thubuai kha a buaithlak lutuk a, kan duh ang pawhin kan ti hleitheilo a ni.

Amaherawchu, thil pakhat tunhnaia ka hriat chu, cement-ah khan ‘damdawi zuk telha rang taka char thei a awm e’ an ti a; “rawn la teh u, i test ang” ka ti a; nikhatah pawh a char tha maithei e. Chu chu a that theih chuan, PCC-a kawng han tih hi kan ram ruahtui tam lutukah chuan han black top thin bawka mah ila, a buaithlak em em a ni. Tui a tling a, kawng chhak a lo min a, chung chuan drain a hnawh a, tui a tling reng mai a, motor lianin a rap a; a chhiat laklawh tawh chuan thal leh nghah loh chuan a repair tak tak theih si loh a. Chuvangin, helai hi a buaithlak a. Tunah pawh PWD-in a kan enkawlah chuan kan kawngpui - Lunglei World Bank kawng hi a pui ber a ni a, a dang PMGSY leh kawng dang hi chu a thawktuin an enkawl tur period kha a la ni hlawm a; a zo tawh, keimahni enkawl ngai chin te pawh a awm a. Engpawh nise, motor lian tlanna tur ber chu central lam kutah tunah hian a awm a, theih tawpin lo puih kan tum ang a, kan vaia kan puih an ngai em em a ni.

Tuna thalah hi chuan motor lian rah chhiat loh turin a tir atanga design a ngai a, Lunglei road-ah te pawh chu chu kan kalpui a. A dangah hian tuna kan tih theih chin – patching emaw tal resurfacing theih ang chin chin kan thawk tan a, kan ti char char dawn a ni. A thawktute’n an tih dik loh lai kha chu inhrilh tlang zel ila, ‘hei hi a dik lo e’ tia kan vai tan a ngai a ni. Pu Speaker, insawi mawi ka tum pawh a ni lova, hma chu kan sawn chho ve zel a, hmasawn lehzual turin tan lak kan tum a ni.

Tichuan, he Resolution - “*Kawngpui tha leh building tha kan neih theih nan uluk takin hna thawh ni rawh se*” tih hi tha kan ti tlang em em a, kan support thlap a. Group tinin tha kan tih tlan a nih avangin lungrual takin pass tha ka tih thu ka rawn sawi a ni e. Ka lawm e.

SPEAKER : Vawiin hian member zahawm tak Pu Vanlalhlana chu chhungte thihna avangin a lo kal thei lo a ni.

Tunah kan chawl ang a; a dar pangngai hi chu kan bawhchhe thei lova, 2:00 PM ah kan tan leh dawn nia.

2:00 PM

SPEAKER : Quorum kan tling maw? Aw le, tunah chuan a bill neitu member zahawm tak Pu Lalchhuanthanga kan sawm ang a, kan sawi hona te rawn wind up-in, pass rawn dil nghal bawk se.

PU LALCHHUANTHANGA: Pu Speaker, ka lawm e.

Hei, ka Resolution - “*Kawngpui tha leh building tha kan neih theih nan tuna aia ulukin hna thawh ni rawh se*” tih chu kan han sawi khawm a, member pasarih laiin min sawipui a, ka lawm tak meuh meuh a. A bik takin, PWD changtu kan CM zahawm takin a ngai pawimawh a. Kawng that theihna tur te, hma lak dan tur te leh an lo kal tawh dan te pawh a sawi a, beiseina sang tak a hnenah kan nei a.

Han wind up tur vak pawh ka hre lova. Ka resolution, group hrang hrangin lungrual taka kan han pawm thei hi, kan han sawi tak ang khan thil vang tak pawh niin ka hria a, a puluttu nih pawh a lawmawm khawp mai.

Tichuan, ka Resolution - “*Kawngpui tha leh building tha kan neih theih nan tuna aia ulukin hna thawh ni rawh se*”, tih hi member te min pass-pui turin ka sawm e.

SPEAKER : Aw le; resolution neituin a resolution adopt a rawn dil ta a, kan buk ang a.

“*Kawngpui tha leh building tha kan neih theih nan tuna aia ulukin hna thawh ni rawh se*” tih hi, adopt rem ti apiangin ‘rem ti’ ti rawh u le. (**Memberte:** Rem ti) Rem ti lo kan awm em? Kan awm chuan ‘rem ti lo’ ti u la.

Aw le, member zahawm tak Pu Lalchhuanthanga Resolution - “*Kawngpui tha leh building tha kan neih theih nan tuna aia ulukin hna thawh ni rawh se*” tih chu House-in lungrual takin a adopt ta ni. (**Pu Lalchhuanthanga:** Pu Speaker, ka lawm e.)

Hun kan la nei a, dar 4 thleng turin. Resolution No. 2-ah kan kal ang a. “*Kan ram thenawmte sa-himna zawnga rawn ral tlan te hi kan sorkar hian an awmna tur siam sakin, duat takin enkawl se; awm khawmna tur bik ngaihtuhsak rawh se*”, tih a ni a. Resolution neitu, Member zahawm tak Pu Lalrindika Ralte, move turin ka sawm e.

PU LALRINDIKA RALTE: Pu Speaker, ka lawm e.

A hmasaa lawmthu ka sawi duh chu - kan House boruak a nuam hle mai a. Tunah khan kan pass zo chiah a, member zahawm tak resolution pawh kha. A lawmawm hle in ka hria a, kei pawhin beiseina sang tak ka nei a. He ka resolution hi lungrual taka min pass pui ve beisei chungin rawn move ka duh a.

Thuhma a tan tlem ka sawi duh chu - Pu Speaker, kan hriat angin Myanmar leh Bangladesh atangin kan unaute an rawn raltlan a, NGO hrang hrangte leh sorkar ang pawhin kan lo buaipui nasa a. Mimal te pawh a ni ang, kohhran te pawh a ni a; kan lo buaipui nasa a, lawmthu ka sawi a.

Harsatna hi tumahin kan duh lova. Amaherawhchu, harsatna hi kan hringnuna bet ve tlat a nihna chin te pawh a awm a. Tin, harsatna ruamah hian nun inngahna a dik leh dik loh te hi a lang fiah ve thin a. He kan hnamin harsatna kan tawh ve chungchangah pawh hian, ‘eng ang tluka hnam inlaint leh inhmangaih nge kan lo nih’ tih hi a lang Chiang Chho zel dawn niin a hriat a; a harsatna kha chu duh lo mah i la. Amaherawhchu, kan tawna, kan tlanhhiat san theih si lohah chuan, he harsatna hi rawng inbawl sak nan te, kan inhmangaihna leh kan inlaintna lantir nan he hnam hian kan hman chhoh pawh ka duh bawka a ni.

Tin, hei, ‘refugee’ kan ti lo thei lova. Bangladesh atang hian chhungkua 458 leh Myanmar atangin chhungkua 31,050 te lo luta hriat a ni a. He document hi a dik vek kher lo maithei a, lo danglam hlek te pawh a lo awm ang a. A document kha chu eng a pawh lo ni se, harsatna tawktute lo chhawmdawl hi kan tih tur leh wawiina kan Resolution kan put luh chhan pawh a ni a.

Tichuan, Pu Speaker, wawiina ka Private Resolution - “*Kan ram thenawmte sa himna zawnga rawn ral tlan te hi kan sorkar hian an awmna tur siam sakin duat takin*

enkawl se; awm khawmna tur bik ngaihtuahsak rawh se”, tih, kan ram rorelna sang bera sawiho ngaia a lo awm hi a lungchhiatthlak ka ti a. Amaherawhchu, a tul bawk si a ni.

Kum zabi 21-na kan chuang kai tawh a. Kum zabi 21-naah pawh mahni mihringpui pawhin tuar dawn mahse, pawilo leh mahni khua leh tuite pawhin tuar dawn mahse pawilo khawpa thuneihna thlahlel an la awm hi a vanduaithlak ka ti a. Tin, chu mi tuartute kan unaute an ni hi a pawilo takzetin ka hria a, an thlavang kan hauh ngei pawh a pawimawhin ka hre bawk a ni.

Tin, wawiinnia ka resolution rawn putluhna chhan hi, ‘Sorkarin a tih tur a ti tawkl lo’ tih lam a ni lova, amaherawhchu, kan sorkar hian a mawh la se kan ram leh hnam tan a that ber ka ring a. Chuvanga he Resolution hi rawn pulut ka ni.

Pu Speaker, a tawp berah chuan, khang ka rawn sawi takte hre chung leh kan unaute harsatna tawkl mekte ngaihtuah chungin, ka resolution hi kan member zahawm tak ten thinlung taka min sawipua, min pawmpui ngei turin ka ngen bawkl a ni e. Ka lawm e.

SPEAKER : Awle, resolution neituin a rawn move ta a, kan sawiho nghal ang a. Minute engzatnge kan inpek leh ang? Minute 10 hi kan kal dan a ni ber a, minute 10 i ti mai ang aw? (*House-in a remti a..*) Tunge han sawi hmasa ang le? A resolution neitu lam party te pawh kha kan han phut che u a nia. Awle, member zahawm tak Dr. B.D. Chakma ka sawm e.

PU B.D. CHAKMA : Pu Speaker, ka lawm e. He *Private Member Resolution* hi a pawimawh ka ti a, chutih lain sawi tura banphar an awm vak lova.

Member zahawm tak Pu Lalrindika Ralte Resolution – “*Kan ram thenawmte atanga sahimna zawnga rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih a ni a.

He resolution hi a tha ka ti em em a. Keini Mizoram hi international boundary hnaivaia awm kan ni a, East lam hi China leh Myanmar a ni a, tin, west lam hi Bangladesh niin, a tri-junction-ah tak kan awm a ni a. Tunlai khawvelah ‘materialistic’ kan ti a, khawvela developing leh under-developing country aiin developed country te hian development an khelh nasat lutuk avangin buaina a chhuak ta thin a. Chutianga ram buaina avangin raltlan awmna state te zingah keini hi kan vulnerable ber a ni tih kha ka sawi duh a ni. Chuvangin, Myanmar leh Bangladesh te hi development lama kan thlir chuan India nena an relationship hi a chhe lo ang tih kha ka sawi duh a. Tin, India mipuite hi Myanmar leh Bangladesh mipuite nena tehkhinin kan hnam leh sakhua lamah pawh kan inzul em em a. Myanmar-ah pawh Buddhist sakhua zawm tam tak an awm a, chutiingin Mizo unau kristiante pawh Myanmar-ah tamtak an awm a. Tin,

Bangladesh-a Chakma, Bawm leh Pang te zingah pawh Buddhist sakhaw zawm kan unaute tamtak an awm a ni. Tin, Bangladesh buaina hi kan Mizo leh Chakma unaute chauh ni lovin, kan tribal-puite hian an tuar nasa bik a. Khawvel awm chhung chuan heng thil hi a awm ve lo thei lova, North East State te zingah .. (*Hon. Dy. Speaker-in Chair a la a..*)

DEPUTY SPEAKER : Sawi chhonzawm rawh le.

PU B.D. CHAKMA : Pu Dy. Speaker, ka lawm e. Chuvangin, hetiang thil, rambuaina avanga raltlan ho kha hmelma nilovin, duat taka kan mikhual a, kan lo enkawl ve hi kan tih tur a ni.

Hei, Buddhist religious-bu ah pawh OTT Dev Bava chuan chiang takin a sawi a - “Kan mikhualte chu Pathian angin mimalin kan duat ve tur a ni” tiin. Eng emaw buaina avanga raltlan te an awm a nih chuan, ei tur lo pek kha kan mawhphurhna a ni a, ‘duat takin kan lo enkawl tur a ni’ tih kha min hrilh a ni. Chuvangin, he thilah hian keimahni Kristian unaute chauh ni lo, Lai Autonomous District Council area, (a hmun tak chu ka hre lova) ah pawh kan unau Buddhist sakhua biate Myanmar raltlan tlem an awmin ka hria a, kan puthiam te pawhin thla hmasa khan relief material an han sem a. Chuvangin, hetiang sakhua emaw, hnam emaw zawng ni lova, rambuaina avanga rawn raltlante duat taka lo enkawl kha kan moral responsibility a ni a. Chuvangin, kei pawh hi he session zawhah hian a ranglamin Parva lamah kal nghal ka duh a. Chutah chuan Bawm leh Pang raltlan chhungkua eng emaw zat an awm a, ka MLA fund atangin *most urgent* angin tlem reserve ka dah a, chu chu an awmna hmun ngei tlawha, ‘engnge an mamawh ber’ tih te hriata sem ka duh a. Chutiangin Pu C. Ngunlianchnunga Bialah pawh an awm a; bial inhnaivai kan ni a, kan induat hle tur a ni.

Chu mai bakah thil pakhat ka sawi duh chu - Covid-19 lai khan central lama NGO pakhatin oxygen concentrator sem tur tlem min rawn present a, sawta ka zin huna semah pakhat chu ka reserve bawk a ni. Chutiang chuan theih ang anga tanpui turin ka rilru pawh ka siam a ni e. Pu Deputy Speaker, ka lawm e.

DEPUTY SPEAKER : Tunge sawi leh ang? Aw, Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Dy. Speaker, ka lawm e. Hei, vawiih kan tih dan lo takin ni khatah Private Resolution pahnih sawi a lo ngai ta a, lawmawm lamah ngai ta ila. Pu Lalrindika Ralte Hachhek bialtu zahawm takin “*Kan ram thenawmte atanga sahimna zawnga rawn raltlante hi kan sawrkar hian duat takin enkawl se; awmkhawmna tur hmun bik ngaihtuah sak rawh se*” tih hi, keini chuan tha kan ti tlangin ka ring a, kei pawhin mimal takin tha ka ti hle a. Amaherawhchu, a wording hi Pu Dy. Speaker, ‘awmkhawmna tur hmun bik’ han tih lai tak hi tlema kan modify a thain ka

ring a. A chhan chu, central subject deuh hlek a ni a, awm khawmna tak hi. Induhsak viau mah ila, a remlohna te pawh a awm thei a. Tin, ‘hmun bik’ han tih lai te pawh hi, ‘an awmna tur’ ti ang zawng deuh tein nakinah a thu thiam deuh ten han ti sela a thain ka ring a.

Tin, a resolution hrim hrim hi, Zofate insuihkhawm lehna atan pawh boruak tha siamtu atan ka beisei a. Keini MNF party phei chuan Zofate awmna zawng zawng rorelna pakhat hnuai dah turin kum tam tak kan lo bei tawh a ni a. Vawiinah heng ‘raltlan’ kan han tih bik te hi kan hriat angin khawchhak lamah Myanmar ramah kan Zofa unaute an ni deuh vek mai a. Chutihrualin Bangladesh lama Zofate hi, kan unaute an ni a. Keini ngat phei chu kan House Leader ho hian kum 20 zen zawn sawng laia min lo mikhual a, an ei ai te pawh min lo buatsaih saktute, kan lum loh hlaua an sin lai min sin tir thin tute kha an ni a. Chuvang chuan, he resolution a lo luh rual hian kan sentiment a khawih hle a ni. Chuvang chuan, he resolution tha tak mai hi thinlung leh titak zetin ka thlawp a ni.

Heng kan unaute ho hrehawm taka an awm hi a hmu thei lotute zingah kan tel theuh turah ka ngai a. Chuvang chuan, kan sorkar hian a resolution ang deuh hian, tha tak leh duat taka an sahimna zawn sak hi kan mawhphurhna a ni dawn lawm ni? India sorkar pawh hetiang zawng hian kan au dawn lawm ni? Hetiang zawnga anmahni tanpui hi ka ngaihtuahnaah a lian hle a ni. Chuvang chuan hei hi, *a-mizo* a, kan inhmangaihtawna te, international boundary-in min kham hnan mah sela, ‘kan rilru leh kan ngaihtuahna hi heng international boundary hian a dang zo lo a ni’ tiin, tun hunah hian lungruah taka kan za a, he House-a member zawng zawng te kan ngaihtuahna zawng zawngah awm sela ka duh a ni. Chuvang chuan, *a-thu* mai ni lova, a taka kan hmangaihna te, kan khawngaihna te, kan lainatna te, kan duhsakna te kan lantir a pawimawh hlein ka hria.

Resolution hmasa, Pu Lalchhuanthanga private resolution kan han thlawp hlek tawh te kha, hnam anga kan tanhonaah te thil tha kan duhzia tihlanna atan kan House Leader thlengin tha takin kan thlawp a, lawmawm ka ti a. Chutihruah erawh chuan Pu Dy. Speaker, a resolution neitu hotupa ber kha a lawmawm lutuk lo lai kha han tarlan ka duh a. Kan Bible-ah chuan ‘hmangaihna’ a uar em em a. *“Hmangaihna a dawhthei a, ngil a nei bawk thin; a uang lova, a che mawilo lova, mahni hma a sial lova, a thinur duh lova”* a ti a. A khaikhawmnaah khan, *“Sual lam a ngaihtuah lova”* a ti a ni. Keini member zawng zawngin ‘kan thlawp a ni’ tih, Pu Lalchhuanthanga, a resolution neituin min ngen ngawih ngawihna kha kan zain kan thlawp a ni. Chutih laiin sual lam a ngaihtuah tlat a, a lawm lova, a auchhuahpui a; ‘kha kha a puitling ber em aw’ tih min ngaihtuah tir a ni. Naupangchhia, lungawi lova kan thlem, ama duh zawng kan tih saka bang ta ang kha niin ka hre deuh a. Tin, a pass-puitute zingah ani a lo tel lo zel lai hi, a lawmlahna kha tawngkam mai ni lovin, physically-in a tilang niin ka hria a, a vanduaithlak hle a ni. Ama tihdan takah, *rilru a na hle a ni; thinlung a tap takzet a ni.*

Chuvang chuan, amah pawh hi lo lut sela, Pu Lalrindika Ralte resolution tha tak mai hi hnam inpumkhat nan te, Kristian kan nihhona kan inhmangaihna tihlanna atan te han sawi tlangin, lungrual takin han pass tlang ila ka duh a ni. Chuvang chuan, kan resolution, chawhma lama kan pass tak leh Pu Lalrindika Ralte han putluh te hi a thlawpawm takzet zet a.

Amaherawhchu, sawi ang khan a wording tlem han correct kha a awm thei dawnin ka hria a. A chhan chu, a tha duhna avangin technically hian kan *foul* ve thei thin a. Helai erawh hi chu thu-thiam deuh ten nakinah Pu Dy. Speaker, kan ngaihdan leh kan resolution pawmtlan dan atangin rawn sawilang sela a thain ka hria. Hei hi thinlung leh ti tak zetin ka thlawp a, pass sak ngei tur pawhin ka support a. Hun lo kal leh zelah pawh tawngka mai ni lo, thinlung leh titak zeta thiltih nen heng kan inunauna kan lanchhoh tir zel hi *a-mizo* a, *a-kristian* a; tin, *a-ram hmangaihzia* bawka ni. Vawiih hian mahni pumpui chauh hampuar kan nih loh zia hi kan Zofa khawvel hmun hrang hranga awmte pawhin min hriat sak sela. He Pu Zoramthanga kaihhruai MNF sorkar hian kum tam tak kan lo fight tawhna hi ‘a taka lantirna remchang a ni bawka ni’ tih, he resolution hian a lantir a, “ka support a ni” tih ka han tarlang a ni e. Ka lawm e.

DEPUTY SPEAKER : Tunge sawi leh ang? Member zahawm tak Pu KT Rokhaw ka sawm e.

PU K.T. ROKHAW : Pu Dy. Speaker, ka lawm e. Vawiih hi opposition MLA-te - Pu Lalchhuanthanga leh Pu Lalrindika Ralte resolution kan sawiho a ni a, memberte pawh hi kan lungrual viauin a lang a, hei hi chhinchiah tlak niin ka hria. Opposition member-te resolution pahnih lai mai lungrual taka pass theih tur a ni hi lawmawm ka ti takzet a ni.

Pu Dy. Speaker, Pu Lalrindika Ralte resolution - “*Kan ram thenawmte atanga sahimna zawng a rawn ralhlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih hi a tha ka ti a, ka thlawp a.

Kan hriat angin Myanmar ram buai avangin Burma lam atangin kan unaute tam tak an lo lut a, chu bakah Bangladesh lam atangin kan unaute ralhlante kan nei bawka ni. Keini bialah phei chuan Pu Dy. Speaker, camp 27 kan nei a, camp 27-ah awmte hi an vaiin mi 4,586 an ni. Tin, Siaha khawpuia inluaha awmte leh hmun remchang danga awmte hi hetah hian chhiar tel anni lova; a awmzia chu, tuna ka sawi ai hian an tam zawka dawn a ni. Chuvang chuan tuna an awmna te khi ka ngaihtuah a, Myanmar sorkar khi a ziaawm mai a rinawmluh avangin, heng ralhlante hi kan sokar hian an awmna tur hmun a rang lama kan ngaihtuah a ngaiin ka hria a. Keini Siaha District-ah phei chuan an camp awmna tur te khawngtlang hruaitu VC te leh NGO ten an ruahman sak a,

temporary in camp te an siamsak a. A thenah phei chuan *Ni-100 inhlawhna* te an hmang-tangkai a, chutiang chuan kan inchnawmdawl a ni. Tin, ei leh in, silh leh fen te pawh min tawm ve bawk a ni tih te ka han sawi duh bawk a.

Chuvang chuan, sorkar hian an awmna tur camp hi a rang lama a ruahman a ngai khawpin ka hria a. Ka rilrua lian em em chu, Siaha leh a chhel vela raltlante hi Lobo khuaah an camp siamsak ni sela, Lobo hi police out-post leh sipai awmna a ni bawk a, a remchang khawpin ka hria a. Tin, camp pahnhna Chakhei leh Siasi khaw inkarah emaw dah leh ni ta sela; tin, a pathumnaah Zyhno khaw bulah dah ni leh sela; a palinaah chuan Lopu lamah dah nib awk se a that ka ring a. Chuvang chuan, ‘he resolution hi ka lo thlawp a ni’ tih karawn sawi ve a ni e. Ka lawm e.

DEPUTY SPEAKER : Hun in hmang reilo thei hle mai a; minute 5 in sawi thei mang lo tlat mai a. Tunge sawi leh ang le? Member zahawm tak Pu Ramthanmawia ka sawm e.

PU RAMTHANMAWIA : Pu Dy. Speaker, ka lawm e. Member zahawm tak tak tena hun an hman bang kha chu ka hauh teh ang; sawi tur ka ngah deuh maithei a.

Vawiinah Private Resolution pahnih kan han sawiho ta a. Kan ngaihthlak tak ang khan, lungrual taka kan pass tak “*Kawngpui tha leh building tha kan neih theih nan tun aia ulukin hna thawh ni rawh se*” tih te kha a lawmawm ka ti a; ka sawi ve lo naa, kan thlawp em em a. A chhan chu, kawngpui tha neih a hlutzia hretu vek kan ni a. Kan bial East Tuipui phei chu kawngpui tha kan nei har hle a, tunah hian kan han nei ve a, bial chhungah na na na chuan harsa lo tak leh rang takin kan tum ram kan thleng zung zung thei a; chungah te chuan MLA zahawm takina a rawn putluh hi a dik zia hretu leh chhawrtu kan nih avangin, lungrual taka kan han pass thei kha ropui ka ti a ni. A chang chuan kan han inisial bap bap thin tak na a, a tak takah chuan kan ram thatna turah hi chuan kan inlungrual a ni. Kan ram leh hnam dinchhuahna tur leh kan that zawkna turah hi chuan ‘kan inlungrual hle a ni’ tih hi vawiinah hian a lo lang Chiang a, a lawmawm ka ti a ni.

Pu Dy. Speaker, MLA zahawm tak Pu Lalrindika Ralte resolution rawn putluh, “*Kan ram thenawmte atanga sahimna zawng a rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih hi, a tum hi a tha hlein ka hria a. Amaherawhchu, kan ngaihthlak tak ang khan ‘*awmkhawmna tur hmun bik*’ tih hi, ‘*remchang*’ tia han siamrem hi remti se chuan a that ka ring a, chungte chu kan sawi hmasa duh a.

Kan hriat angin Ni 1.2.2021 khan kan thenawm ram Myanmar chu General Min Aung Hlaing in a sipai chakna hmangin mipui sorkar, Aung San Suu kyai kaihhruai chu

paihthlain, sipai sorkar a din a; chu sipai sorkarna chu duh loin mipuiin nasa takin an dodal a, silai hial tipuakin an buai chho ta em em a, rambuayah a chang chho ta a ni.

Chu buaina chu darhzau zelin, Zo-hnahthlakte chenna ‘Chin Hills’ kan tih, kan unaute chenna thlengin buaina chuan a rawn chim chho ta a. Mipui leh Myanmar sipaite chu vawi tam tak an inkap a, Zo-hnahthlakte chenna khaw thenkhat phei chu Myanmar sipai ten an hal sak a, thlawhna hmanga bomb te thlakin an bei a ni. Hetia buaina a lo thlen takah chuan, Myanmar lama kan unaute chu an in leh lo te tihchhiatin an awm a, thla bar mangangin an awm a, an sahimna zawngin ‘kan unaute’ tiin Mizoram lamah loh theih loh in an lo lut ta a ni.

Pu Dy. Speaker, he ram buaina avanga an raltlan tirh kha kum 2021, helaia budget session kan neih mek lai kha a ni a. Ka bial Farkawn atangin VC ten min rawn bia a, “Myanmar rambuai a vangin kan unaute raltlanin an rawn lut tan a, harsatna kan tawk tlat mai” an rawn ti a. An harsatna chu, khi laia ramri veng Assam Rifles ten an lo dang kir a, luh an phalloh avang khan ramhnuayah te an lo awm a ni. Chu thu chu kan House Leader zahawm tak hnenah kan thlen ta vat a, chuta tang chuan kan hotupa ber, kan CM zahawm tak khan khami tlai la la khan he House ah ngei hian, he sorkar, MNF sorkarin Myanmar unau raltlante chung a rilru puthmang, a ngaihda kha ‘khawvel hriatah a puang ta a ni’ tih kan hria a.

Tin, tunhnaiah Chittagong Hills Tracts-a Kuki National Army ten thuneihna sang zawk an ngiat avanga buaina thlengah Bangladesh ram a kan unaute pawhin sahimna zawngin Mizoram-ah an lo lut ve leh tih kan hria kha.

Kan sawi tak ang khan, Myanmar ram atanga kan bial chhunga raltlan hmasaber chu Thasiama a ni a, Tamu khua niin, February Ni 3, 2021 ah Thekte khuaah a mah chauh in a lo tlanlut a ni. Ka bial, East Tuipui-ah khian raltlan mi 2,500 vel an awm mek a, Ni 27 January, 2023 thleng khan Mizoram-a raltlan lo lut hi, mi 31,508 an tling tawh a ni. Myanmar atanga lo lut hi mi 31,050 niin, Bangladesh a tanga lo lut hi mi 458 an ni. Kan ngaihthlak tak ang khan, an lo luh phat atangin sorkarin a tihtheih theih te a ti nghal a, chu mai ni lovin, a khaw thenawm, khalai ramria awm kan NGO te, kan VC te, khawtlang leh kohhran ten thahnemngaiin leh tlawmngai takin an lo tuamhlawm a. Chutiang chuan, a thenin mi in an bel a, a thenin mi in te luahin leh bukte sak sak in, chutiang chuan a tir atangin Zoram mipuiin heng harsatna tawkte chungah hian ngilnei leh duhsak takin an lo enkawl nghal a ni.

Vawiina kan resolution hi pass ta lo pawh ni ila, kan sorkar leh kan mipuite’n a an enkawl mek, ‘an tih mek a ni’ ti zawng te pawhin sawi ta ila, a dik thei tho a. Amaherawhchu, House-ah meuh sawichhuaha pass tluk chu a awm lo a ni. Chuvangin, vawiina private resolution putluh hi a lawmawm em em a, hei hian rah thatak a chhuah ngei pawh ka ring a ni.

Kan hriat theuh angin Mizoram chuan kum 1966 khan zalenna sualin kan rammu a nih kha. Kan ram chu rambuayah puan a lo ni ta a, he kan buaina avangin Mizoram-ah mi tam tak ram hran hranah raltlanin, sahimna zawngin kan chhuak a ni. Chungah chuan, Myanmar ramah te pawh sahimna zawngin kan lut chho a. Khatih hunlai khan Myanmar ram chu sipai sorkar a ni a, an khirh em em mai a, kan raltlan te pawh duh angin Myanmar lam unaute khan an ngaihsak thei lo zawk a. Amaherawhchu, hlau leh khur chung pawhin min lo tuam hlawm a, Mizoram atanga raltlan tam takte ei tur bakah silh leh fen te pawh min lo pe a ni. Chumai ni lovin, he zalenna suala kan ram leh hnam tana nunna chan pawh Myanmar ramah khian mi thahnem tak an awm a ni. Bangladesh ram pawh khu hnam sipai ten hmunpuiah zuk neiin, Bangladesh-a awm kan u leh naute khan kan hnam sipaite kha theih ang angin an lo tuamhlawm bawk a ni.

Tunah hian Myanmar leh Bangladesh rambuaina avangin kan unaute'n Mizoram an rawn bel ve ta thung a, Zoram mipui, NGO, sorkar leh Kohhran ten theih ang anga lo dawngsawngin kan tuamhlawm mek a ni. Tichuan, central sorkar a tangin raltlante lo dawngsawng tura remtihna kan hmulo chung pawhin kan House Leader, Chief Minister zahawm tak ni bawk Pu Zoramthanga chuan kan unaute sahimna zawnga Mizoram lo lutte, theih ang anga kan tuamhlawm tur thu leh, thlamuang taka Mizoram-a awm tir a duhthu a sawi pawh kan hre cham chi a nih kha.

Tichuan, Mizoram sorkar chuan '*High Level Committee on Myanmar Refugees*' dinin, mumal zawka raltlante lo dawngsawng tura ruahmanna siamin hmalak chhoh mek zel a ni a. DC te kaihhruaina hnuayah District leh Village Level Committee on Myanmar Refugees te din chhoin, mumal taka raltlante chhinchhiaha lo enkawl annih theihnan ID te siam a ni a. Bangladesh atanga raltlante chungchangah pawh sorkarin a theih ang angin hma a la nghal a, Lawngtlai DC hova meeting te neiin, mumal taka lo dawn sawn dan turte an rel a ni tih kan hria. Pu Dy. Speaker, Mizoram sorkarin Myanmar raltlante chhawmdawl nan pawh hian ₹3,84,66, 000/- leh, Bangladesh raltlante chhawmdawl nan ₹30,00,000/- a lo pechhuak tawh bawk a ni. Mizoram sorkarin raltlante chhawmdawl na sum a pek tawh zawng zawng chu ₹414,66,000/- niin, buhfai pawh raltlante pualin quintal 950 zet a lo pechhuak tawh bawk a ni.

Kan hriat theuh angin, kan MP te pawhin India ram rorelna sang berah an auchhuahpui a, Minister te MLA rualte pawhin he House-ah ngei kan auchhuahpui bawk anih kha. AMC Councillor te, Autonomous District Council hotute, Development Council hotute thlengin, tumah a bo a bang awm lovin, thu khat vuanin kan tang ho a ni. Central YMA, sub-headquarter, YMA Group, YMA Branch hrang hrangte, Mara thalai pawl MTP te, Young Lai Association te a tir atanga sulsutute an ni a, theihtawp an chhuah a, a lawmawm em em a ni. Kohhran hrang hrang - MUP, MHIP, MZP, MSU leh pawl hrang hrang, an zavaiin kan lam seng lova; Mizoram-a political party hrang hrangte, mimal mi-inphalte leh tlawmngai tak tak ten Mizoram pawn lam atangin mimal leh pawl hrang hrangte kan thawh ho leh tanrualna hi a ropui tak zet zet a ni. Chutichuan,

zoram mipui, kohhran leh NGO hrang hrang, sorkar leh zohnahthlak ram pawn lama awmte thlengin kan theihna zawn zawnah theihtawp chhuahin kan lo tuamhlawm a, kan lo dawngsawng a. An mamawh tur nia kan hriat - thawmhnaw, mutmu, silpauline, ei leh in tur, sum leh pai thlengin kan neih ang angte ui hauh lovin .. (**Dy. Speaker:** I zo thei dawn tawh em?) kan thehchhuak a, duat takin kan lo enkawl mek a ni.

Hetianga kan unaute mahni in leh lo pawh luah lum thei lova, mangang taka chenna mumal pawh nei lova an awm mek lain, chenna tur leh an khawsakna turte lo ngaihtuah sakin kan lo tuam hlawm a; relief camp te sain khaw hrang hrangah *runthlak-hnatlang* te kova kan unaute tan kan han che suau suau mai te hi a ropui tak zet zet a ni.

Kan bial chhung bikah pawh raltlante chungchangah Tuipuiral Group YMA ten, mimal, pawl leh sorkar hnen atangin tanpuina awm thei ang angte an hnenah lut zelin, ei leh intur te, mutbu leh thawmhnaw te, silpauline thlengin pek khawm a ni a, an niin an lo buaipui a. Tichuan, MNF thalai headquarters te pawhin thawmhnaw leh mutbu thahnem tak, heng Tuipuiral Group YMA te kutah an han pe nghe nghe a ni. Chu mai nilovin, kan Minister zahawm tak Er. Rinawma ngei pawh hian thalai president anih lai khan, sum fai thahnem tak an han pe tawh nghe nghe a ni. Chutiang chuan bialtute pthenkhat, ramria bial nei - Pu Nguna te, Pu Rokhaw te leh midang dangte pawh hian kan bial chhunga rawn lutte chu kan lo tuamhlawm a, kan fund atang tein kan theih ang angin kan lo tuam hlawm ve a. Hemi chungchangah hian kan hnam inpumkhatna leh inlungualna, hei hian a siam nasa hle a. Pu Dy. Speaker, relief camp te pawh kan bial hmun 4 laiah kan siam nghe nghe a ni.

Chuvang chuan, he thil pawimawh tak, kan u leh naute thlavang hauhna leh thlamuang taka an awm theihna tura resolution pawimawh tak hi, pass ngei turin kei pawhin ka rawn support a ni e. Ka lawm e.

DEPUTY SPEAKER : Member zahawm tak kha, a bial lamah raltlan an luh hnem em avangin leh a buaipuitu tak te zinga mi a ni a; hun kha midangin in hmang tlem si a, ka han pek belh deuh hlek a nih kha.

Awle, kan Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Deputy Speaker, ka lawm e.

Member zahawm tak Pu Lalrindika Ralte ina “*Kan ram thenawmte atanga sahimna zawnga rawn raltlante hi kan sawrkar hian an awmna tur hmun bik siamsak rawh se*” tih resolution thehluhna chang a rawn hria hi lawmawm ka ti khawp mai a. Vawiin chawhma lamah khan kan ram tana pawimawh tak mai, Pu Lalchhuanthanga resolution pawh lungual takin kan passed tawh a. Ka rilrua ka lo lawm em em chu – “Resolution No. 2 hi he ram rorelna sangah hian lut ngei se la, kan unaute harsatnate hi

resolution-ah lungruah taka han pass a, khawvel hriatah kan inunauna te puang chhuak ila” tih hi a ni a; chumi hunah chuan sawi ve ngei pawh tumin kei pawhin rilru ka lo insiam a ni.

Kan hriat angin, tun dinhmunah hian Myanmar lam atanga kan unau raltlan mek te hi official lam ten record an neih hnunung berah hian mi 31,129 an ni a, camp hmun hrang hrang 160 velah an awm darh a ni. Bangladesh atanga lo kal kan unaute hi mi 646 an ni a, anni hi hmun 3-4 velah dah anni a. Bangladesh Atanga lo lute camp awmna tak hi kei ka va la thleng phei lova; hemi kan unaute chhawmdawlina lamah hian. Chutiang chuan kan unauten an inpui-ah, an sa himna zawngin an lo haw a, inpua awm mek ten lungruah taka sorkar, kohhran, NGO zawng zawngte party thinlung, hnam bil thinlung, kohhran bil thinlung dah thaa, kan unaute kan lo tuamhlawm hi a mawi a ni. A bik takin MNF te chuan zohnahthlak zawng zawngte rorelna pakhatat engtik niah emaw chuan kan awm kan beisei a, kan buaipui thin a, chumi avang chuan kan ute, kan nu leh pate pawh an lo rammu a. Amaherawhchu, vawiinah, tun dinhmunah hetiang hi kan ni; beiseinain ‘engtik niah emaw chuan’ tiin chu chu kan la thlir a, chutiang tur chuan beiseina kan nei a. Amaherawhchu kan unau ram danga awmte an inpui laka rilru na hian an lo awm tawh thin a. Vawiinah unau hmel pawh kan inhai tawh lain; a leh lam zawng tak chuan he harsatna hi a runthlak a, a pawh em em lain, ‘mawsawmna’ hi a ni ve tlat a ni. He harsatna hi ‘mawsawmna’ a ni ve tlat. ‘Eng vang maw?’ kan tih chuan, unau inhmangaih tharna, unau intuamhlawmna tur atana theih ang tawka kan luan zana a nih avangin; Pathian hian thil engkim a chhe ber hi min pe lo; “a phenah a mawsawmna kan chhar thiam chuan, min dah sak a ni” tih hi ka hmuh avangin lawmawm ka ti tak zet zet a ni.

Tin, tuna mi kan unaute harsatna chungchang hi zoram chhung piah lam, khawvel hmun hrang hranga zohnahthlak awmte pawh hian vawiina kan hmalakna kal mek hi, sorkar leh khawtlang kan hmalakna kal mek hi min lo thlir reng a, he “Mizoram sorkar, Mizoram mipuite lakah hian beiseina sang tak an nei a, an lawm hle a ni” tih hi a takin ka hmu a ni.

Nikum September thla khan kan Chief Minister hi Chin Community of USA (kan Chin unau America rama awmte) Khawmpui neiin kan pu, (kan Chief Minister) hi *Khuallian* atan an sawm a ni. An sawmna chhan pawh kan sorkarin nu leh pa chan changa kan unaute kan chhawmdawlinaah an lawm a, kan pu chawimawi an duh a ni. Ani a remchan loh avangin, ‘nang zuk kal ta che,’ min ti a; ka beisei ai daihin an lawm zia a takin ka zuk hmu a ni. America-ah kan Chin unauten min lo dawngsawng tha em em a, programme hrang hrang kan neihnaah Mizoram mipuite chungah lawmthu an sawi mawlh mawlh a ni. America-ah pawh Mizo hnanthlak unau tamtak awmte kha, zep nak a awm lo, India ram atanga kal te, Myanmar atang kalte pawh kha, unau hmel pawh an lo inhai tan tawn a ni. Mahse, Myanmar unaute harsatna avang hian an vaiin pumkhatin an lo awm a; an zaithiam rual ten concert an lo siam a; sum an thawh khawm

a, mihausa awm, mi hrang hrang ten; chumi hmang chuan tanpuina tur an lakhawm a, in-unauna boruak tha a siam a ni tih a takin ka zuk hmu a ni. An tangrual em em a, hmuntin kalna apiangah Mizoram ai awha kal ka nih avangin, lawmthu hlir an sawi a.

Chumi piah lamah chuan, remchang kan la a, khulaia awm Chin Community of USA te nen, kan kal tak rau rauah chuan ‘America sorkar-laipui, a remchan danin dawr tum tawp teh ang’ kan ti a, Indian Embassy phalna pawh la lovin. America sorkar Washington DC-ah, an State Department (Foreign Ministry) ah an MP te kalatlangin appointment kan dil a, min lo pe ve mai a. “Mizoram Minister India ram atangin a lo kal a, Myanmar harsatna avanga lo kal kan unaute chungchangah kan hmu duh a ni” tih kan zuk sawi a, America sorkar aiawh ten min lo dawngsawng tha em em mai a, kan indawr a. Chuta kan sawitam em em chu, kan unaute a bik taka kan dawnawm dan a ni a. School Education Minister ka nih avangin, kan department atanga kan hma lakna te an lo hre em em a. Naupang 6,000 chuang zirlai kan zirtir a, midday meal kan pe a, lehkhabu leh uniform kan pek te America sorkar chuan an lo hre vek mai a ni. Kha kha ‘engatinge?’ kan tih chuan, anni chu an inzarpharh tha tih kan hria a ni.

Kan zu kal a, officer panga vel an ni a, a lo kal te kha; an Director - East Asia incharge te, Myanmar sorkara an palaite an lo tel a ni. Chungho nen chuan kan sawikhawm a, an mutan ber chu – “engatinge India hian refugee-ah a pawm theih lo?” tih hi a ni a. Chu chu keimahni ngei pawhin “America sorkar-a *Democracy-inpui* hian India sorkar hi, kan unaute refugee-a pawm turin in nawr tur a ni; in ti tur a ni” kan ti a. Anni chu khawvela refugee hrang hrangte tanpui thintu an nih avangin, “dollar maktaduai tel Myanmar refugee te tan hian kan pe thei reng; mahse, tunge dawng ang?” an ti a ni. India sorkar kaltlanga refugee tanpuina chu pek a ngai si a, Mizoram sorkar minrawn pe ngawt thei si lova.

Chutiang chuan indawrna tam tak kan nei a, “kawng dangin tih dan i zawng ang hmiang” kan ti a. Kar leh lawkah pawh hian America-a awm kan unau aiawhte pawh an lo chho leh dawn a ni. Chutianga indawrna pawh thui tak kal lai anih avangin, a hnu lawkah kan central YMA te, CYLA hruaitute an kal a, nasa em emin an lo chawimawi a; kan in-unauna piahah an duh chu - kan unaute harsatna heti taka a hnam anga kan lungrualna leh inpui chan kan chang hi an lawm a, ‘Mizo mipuite chungah lawmthu an sawi mawlh mawlh a ni’ tih ka sawi nawn duh a ni.

A dawt leha ka sawi duh chu, kan sorkarin theih tawka kan lo chhawmdawlina hi sorkar anga kan tih pawh a ni bik lo; mipute kan zavaia kan tanrualna a ni a, sorkarin a hming that kan la a ni mai. Sum leh pai tam tak kan thawh piah lamah hian chhungtin atangin kan che a ni. ‘Eng chen nge kan tih la ngai dawn’ tih hi kan ngaihtuah tel a tulin ka hria a.

Kan sawi tak ang khan, Bangladesh atangin kan unaute mi 646 an lo chho ve leh ta bawk a. Anni pawh hi nimin lawka House-a ka sawi ang khan, kan department atanga tanpuina awm thei tur ang, naupang zirna pawh hi April thla session tan hunah zirna kan pe ang a, Mizo naupang ten an dawn ang chiah dawn tir kan tum a ni. ‘Zo-hnanthlak Inpui nih hi kan tum’ tih hi ka sawi duh a ni.

Kan thnlung tina em em tu, kan unau raltlanten India ramah sa-himna an rawn zawng a, Manipur-ah te, Mizoram-ah te an remchan dan angin an rawn tlan a. Manipur sorkar chuan India thu awihin, ‘dan lova ramri cross’ an ti a, an man a; kan unaute jail-ah an khung hi a va na em! Mizoram sorkar pawh hi nasa takin an rawn nawr ve tho; mahse kan Chief Minister, hnam tana ding tlat, pa-nih tling hian, ‘kan ti dawn lo’ a ti a ni. India sorkarin eng ang pawhin nawrlui mahse, “kan unaute chhan tur chuan a tawp thlengin kan tang ang, kan ei chhung chuan an ei ve ang” tih hi kan pu thusawi a ni. Chumi avang chuan, a thlamuan thlak a, India hian min nawr lui lovang tih ka ring a ni. ‘Kan unaute tan hian kan ding tlat tur a ni’ tih hi ka sawi nawn duh a ni. Myanmar emaw, Bangladesh emaw atanga lo kal an nih pawhin, ‘India sorkar hian min nawr nat poh leh kan thnlunga inunauna leh inpumkhatna hi a thar dawn’ tih hi an hmuin ka ring a. Vawiinnia he House-in lungrua taka he resolution kan pass hian India sorkar-laipui hi thleng rawh se. Mizoram sorkar hian kan unaute hi ‘refugee status pek kan phut a ni’ tih hi hria se. chumi anih chuan khawvel ramdang atang te, India sorkar atanga tanpuina mumal zawk an neih a tul a ni.

Ramri hrulah kal ila, kan unau, chhungkaw pangngai tak takte kaihkul hnuaiyah an nupui fanaute nen an awm a. Eng pawh tha tawk lo, temporary-in society-in kan lo buatsaih a. Kan rin aiin a rei tawh si; an khawngaih thlak a ni. Aizawl khaw chhungah pawh an MP te, an chief minister hluite an lo kal a, mi-pawimawh, an VIP thinte kha; an va khawngaih thlak em! Ram leh hnam politics avangin an lo tlan thla a, khawngaih thlak takin an awm a, an nupui fanaute pawh hmu hlei thei lovin an awm a ni. Kan MP thenkhat phe chu, unau kan awmna a lo tlang hrang tawh a, kan tawng hman ‘Mizo tawng’ kan tih te pawh thiam mang lo te an awm avangin, Mizo tawng zirtirtu turte pawh kan department hian kan dah a ni. Chuvang chuan, tawng hi kan unaute zirtir kan duh a, kan theih ang angin kan inunauna atan kan thawk a ni. He harsatna hi kan duh vanga thleng ni lo mahse, Mizo mipuite hian ‘Inpui’ kan nihna hi tilang ila, India sorkar a ni emaw, khawvel hriatah emaw pawh, he hnam, zo-hnanthlak tan hian kan ding a ni; kan lungrua a ni. Political ideology-ah chuan danglam awm thin mahse, hnam thil, ram thilah chuan, ‘we are one’ kan tih hi lang se. Zohnanthlak hmun hrang hranga mite tan pawh, an ‘inpui’ kan nihna hi an hmuh chhunzawm zel theihna turin, hawh u, I tangrua ang u.

Vawiin niah kan resolution bik tak hi, a thu erawh hi chu resolution neitu hian ‘tlem tihdanglam hi a phal em aw’ ka ti a; a phal a nih chuan, a wording pawh hi tha zawkin heti hian a siam danglam theih ang em? -

‘Kan ram thenawmte atanga sahimna zawnga rawn raltlante Zoram mipuiten tha taka kan lo dawngsawng hi a lawmawm hle a, a tul ang zela lo mikhual chhonzawmin, an awmna tur ngaihtuah zel nise kan ti’ tih tein emaw. Chu ai mah chuan ka rilrua awm chu, ‘kan ram thenawm atanga lo kal’ tih pawh hi, ‘kan ram thenawmte atanga kan unau sahimna zawnga rawn raltlante’ tih deuh kher hi ka duh a ni. ‘Kan unau’ tih tel hian thinlung a fan dawnin ka hria. Tute emaw, hnam dang pawh an lo tlan ang tih ka hlau a. Chuvangin ‘kan unau’ tih hi la telh ila, lung a la kuai deuh zawkin ka hria. ‘Zoram mipuite’n tha taka kan lo dawngsawng hi lawmawm kan ti e’ tiin House hian sawi tel ila, ‘A tul ang zela an awmna tur ngaihtuah zel ni se kan ti’ tih hian resolve thei ila, lungrual thei ila a va tha awm em, Pu Dy. Speaker. Tichuan, a wording pawh tlema tidanglam turin rawtna ka han siam a ni e. Ka lawm e.

DEPUTY SPEAKER : Member zahawm tak Pu C. Lalsawivunga ka sawm e.

PU C. LALSAWIVUNGA: Pu Dy. Speaker, ka lawm e. Member zahawm tak Pu Lalrindika Ralte Resolution - ‘*Kan ram thenawmte atanga sahimna zawng a rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*’ tih hi a tha ka ti em em a, ‘ka support tak zet a ni’ tih kha ka sawi hmasa duh a.

Nichinah khan Aizawl South-II bialtu, MLA zahawm tak Pu Lalchhuanthanga Resolution kha lungrual takin kan zavaiin kan pass zo chiah a, lawmthu ka sawi a. Tunah hian resolution tha tak mai kan han sawiho a, lungrual taka kan han pass leh thei tur hi (ti tawh mai ila) kan inlungrualin ka hria a, a lawmawm hle a ni.

Tichuan, Zofate hi indopui II-na thleng khan British awpna hnuaiiah, British rorelna hnuaiiah kan awm a. Amaherawhchu indopui II-na a lo thleng a, a lo tawp leh tak hnuah khan India, Bangladesh, Pakistan leh Burma-te kha ‘independent countries’ an lo ni a. India pawh ‘sovereign country’ a lo ni chho ta a, ‘Independent State’ niin mahniin ro kan inrel a. British awpna hnuaiia kan awm lai kha chuan sawrkar pakhat enkawlina leh awpna hnuaiiah kan awm a. Amaherawhchu India, Burma leh Pakistan te independent an lo nih tak hnuah khan, Zofate hi kan duh vang reng pawh ni lovin, sawrkar hrang hrang, ram hrang hrang awpna hnuaiiah thendarhin kan lo awm ta a; a then Burma ramah, Burma sawrkar awpna hnuaiiah kan awm a, a then India ramah, India sawrkar awpna hnuaiiah kan awm a, a then Pakistan (tuna Bangladesh ni ta) sawrkar awpna hnuaiiah kan awm bawk a. Hei hi kan duh vang a ni lova, kan duh thlanna pawh a ni lova; ni. chuti chung chung chuan thendarhin kan awm a, ram hrangah, rorelna hrang hnuaiiah kan awm a lo ngai ta a ni. Amaherawhchu, heti pawh hi nimahse, Zofate hi Burma a awm kan ni emaw, India ram chhunga awm kan ni emaw, Bangladesh ram chhunga awm kan ni emaw kan thinlung chhungah unau kan nihna hi a bo lo a, a awm reng a; vawiin ni thleng hian a nung reng a ni. Unau kan nihna hi, khawvel sawrkar

dang dangah ram hmasawna avangin awm mah ila, lakhran theih a ni lova. Tunah phei chuan sawrkar hrang hrang hnuaiyah kan lo awm chho ta a, hmasawnnain a ken tel pawh a ni ang. Chuvang chuan, Mizo kan nihna hi, khawi ramah pawh awm mah ila, khawi sawrkar awpna hnuaiyah pawh awm mah ila, ‘kan thinlungah hian a reh tawh lo ang’ tih hi ka ring a.

Vawiin niah hian he kan resolution atang ringawt pawh hian kan inpumkhatna leh kan in-unauna hi a hma lam zawng ai hian tihngheh leh suihngheha a awm hi ka beisei em em a, keima mimalah pawh hian chu thinlung chu nasa takin a lo awm thar a ni. Chutiang taka kan unau, kan thisen zawmpui, nupui pasalaw pawh innei tawn, engkim titlang, tiho, khawsaho vek, mahse sawrkar inawpna thalo Burma leh Bangladesh-ah kan unaute an awm a. Chu mite chuan harsatna nasa tak an tawk a, tihduhdah leh nghaisakin an awm a ni. Kan rilru a na a, kan lainat a, kan khawngaih a. Tichuan, nichina kan ngaihtlak tak ang khan, Zofa, Mizo kan nih anga kan ram neih chhun Mizoram chhungah, an inpuiah an lo hawng a, lawm takin vawiinah hian kan lo dawngsawng a ni. Chuvangin, kan theih ang angin an tan thlamuantu, tanpuitu kan nih pawh hi he inpuia awm Zofate hian kan mawhphurhna leh kan tihtur pawimawh tak a niin a lang a ni.

Chuvang chuan, Pu Dy. Speaker, vawiinah hian he resolution hi lungruah taka kan pass-a, Zoram chhung mai nilo, Burma sawrkar te, Bangladesh sawrkar te, India sawrkar leh khawvel ramdang sawrkarte kan auh-eihna, kan koh-eihna hmanrua atan he resolution hi lo awm se tih hi ka duh em em a ni. Chuvang chuan, kan zavaiin inlungruah taka, kan ram leh hnam tan, Zofate tan he resolution hi pass ka rawn ngen a, ka support thu ka rawn sawi ve a ni. Ka lawm e.

DEPUTY SPEAKER : Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Dy. Speaker, ka lawm e.

Hei Pathian leh mipui zarah he House-ah hian kum 20 ka awmna kum a lo ni ve der mai a. Tin, vawiin hi ka tan chuan thil chhinchhiahtlak tak a niin ka hria a. Opposition MLA-te resolution pahnih he House-ah ngaihtuah a han ni hi thil dangdai tak a ni a. Pu Lalchhuanthanga resolution chawhma lamah kan ngaihtla a. Ruling lam pawh vawiinah hian an chungah lawmthu ka sawi a. Opposition a nih avanga kan han paih ringawt thin kha kan han paih ta hi a lawmawm ka ti a. Pu Lalchhuanthanga resolution he House-a member zawng zawng ina lungruah taka kan pass hi a lawmawm ka ti a.

Tunah pawh Pu Lalrindika resolution - *“Kan ram thenawmte atanga sahimna zawng a rawn ralhlante hi kan sawrkar hian an awmna tur siamsakin, duat takin enkawl*

se; awmkhawmna tur hmun bik ngaihtuah sak rawh se” tih hi ruling lam, treasury bench atanga an sawiah pawh khan an rawn support a. Hetiang ang hi he House ka awm chhunga thil thleng zen zen lo, ka hriat vawikhatna, opposition MLA-te resolution pahnih nikhata kan pass thei tur hi lawmthu ka rawn sawi lawk a ni.

‘Engatinge hetiang resolution hi rawn putluh a ngaih tak ni?’ tih hi ka ngaihtuah a. Politics hi a lo pawimawh khawp mai a. Pu Dy. Speaker, keini helai House chhunga member-te pawh hi kan pawimawh lehzuai a ni. Politics hi a kal suai chuan, a tuartute chu nunau, naupang leh pawisawilo te an ni. ‘Democracy ramah kan awm’ tiin ngaihtha takin awm mah ila, democracy ramchhungah pawh rorelna a thatloh chuan, kan ram a ralmuang lova, kan ramah ngei pawh thinthiin kan mu ngam lo thin a ni. Kan thenawm state-te pawh kan hria a, helpawlte an awm a, hartsatna hrang hrang rorelna thatloh vangin an tawka a ni.

Vawiinah pawh hian kan fimkhur a ngai khawp mai. A bik takin vawiina roreltute leh helai House-a awmte pawh hian kan ram kan enkawlnaah te, ro kan relna te lai sela, mipui huapzo sela, mipuite hi him sela, mipuite rilru hi dam sela tih hi ka duhdan a ni a. Vawiina kan resolution putluh a ngaihna chhan pawh hi, rorelna diklo leh lalna leh thuneihna duh luat avanga hetiang harsatna hi tawka kan ni. Kan hria a, kan thenawm State-ah chuan democracy palzut a ni a; a tuartu dik takte chu mirethei te te an ni; an khawngaihthlak khawp mai. Politics hi a kal suai chuan, politics ngaihven ngai reng reng lo - sawrkar hnathawkte, zirtirtute, sumdawngte, kohhran hruaitute pawh ami nghawng dan a inang vek mai a ni. Vawiinah chuan politics kalsuai avangin resolution a rawn luh a ngai ta a.

Keimah ngeiin, ka mithmuh ngeiin Mara ramah ka va kal ve a, an khawngaihthlak em em a ni. An neih zawng zawng an rawn tlanhhiat san a, mi ramah awmhmun pawh khuar lovin mi thlamah an awm a, ei leh in tur an nei lo a ni. Mahse chutih lai chuan Mizoram-a kan sawrkarin a theih ang tawkin a lo support a, NGO zawng zawng, kohhran zawng zawngin kan lo support thei te hi a lawmawm ka ti.

Nitin news kan ngaithla a; politics kalsualna Europe-a Ukraine ram nawm zia te chu, Youtube lamah an in advertise-naah pawh tourist hmun ropui tak, ram nuam tak a ni. Mahse an khawpui hmun nuam tak chu vawiinah chuan building pawh awm tawh lohna khawpa bomb chhiat, chhut chhiat; mitthi ruang, ‘a dotu ruang nge tam zawk, tu ruang nge’ tia, uih vut vut khua deuh vek a ni tawh a ni. Hetiang hi kan ramah pawh la thleng ve thei reng a nih avangin, keini helai a hminga ram rorelnaa awmte hi kan fimkhura, kan mi leh kan sa, kan ram rorelnaah hian tluang taka mipuite ngaihtuaha ro kan rel hi a pawimawh ka ti tak zet a ni.

Vawiinnia an harsatna avanga kan rama raltlan rawn lutte hi kan duat an ngai khawp mai. An dinhmun han ngaihtuah Chiang ila, an rilru tur te han ngaihtuah hian an

khawngaihthlak a ni. Chutiang anih avang chuan, vawiinniah hmun hrang hrangah an awm darh a, sorkar tan pawh enkawl a harsa em em mai a ni. Chutianga anmahniin a an lo thatpui theih zawkna atan Pu Dy. Speaker, an awmkhawmna tur bik, hmun hrang hrangah darh taka awm lova, sorkar tan pawha enkawl awlsamna zawk tur leh, anmahni tan pawha an inbenbelna tur, an nun te a lo nawmsakna tur atan hian an awmkhawm theihna tur hi kan ngaihtuah sak a ngaiin ka hria a. Chuvang chuan, Pu Lalrindika Ralte resolution “*Kan ram thenawmte atanga sahimna zawng a rawn ralhlante hi kan sorkar hian an awmna tur siam sakin, duat takin enkawl se; awmkhawmna tur hmun bik ngaihtuah sak rawh se*” tih hi ka rawn support ve a ni e. Ka lawm e.

DEPUTY SPEAKER : Member zahawm tak Dr. Vanlalhlana ka sawm e.

DR. VANLALTHLANA : Pu Dy. Speaker, ka lawm e.

Pu Lalrindika Ralte, MLA zahawm tak resolution “*Kan ram thenawmte atanga sahimna zawng a rawn ralhlante hi kan sorkar hian an awmna tur siamsak in duat takin enkawl se, awmkhawmna tur hmun bik ngaihtuah sak rawh se*” tih hi tha ka ti hle mai a. He thilah hian kan sorkar hi a fakawm ka ti a. Kan sorkar hmalaknain camp te an lo buatsaih sak a. Tin, *Ni-100 inhlawhna* tein, tikhan an lo kep ve a. Tin, school-ah te zirna an lo buapui sak a, mid-day meal leh uniform te nena kan lo pe thei hi a ropui ka ti a. Nikum budget session-ah pawh khan nuai 380 vel kha hman a nih tawh thu te kan han hria a, tunah phei chuan tam tak sen belh te pawh a ni tawhin ka ring. Hman lai kan pi leh pute atanga kan in-unau tawhna te, thlahtu in ang kan nihna tunah hian a rawn langchhuak a. Hemi chungchangah he hmun ngeia thusawi ve theia ka awm hian min tilawm lehzual a. Ram danga kan unaute nen hian engtikah emaw chuan kan la luangho ngei turah ka ngai bawka a ni.

Hei, kan in-unauna lama min khaikhawmtu ZORO – ‘Zomi Reunification Organization’ kan tih mai hi an che tha thin khawp mai a. Website - *Zogam.org*. an nei a, hei hi thalaite pawh hian kan hriat tam te pawh a ngai hle in ka hria a, remchang te pawh ka han la duh a. *Zogam.org* ah hian kan hun hmasa, hmanlai atanga Calcutta Convention neih atang te, August Ni 14, 1947-ah te khatianga Mizoram luh leh loh tur ngaihtuah dan document hrang hrang tangkai tak tak hmuh tur a awm a. Hei hi thalaite hian kan ngaihven pawh a ngaiin ka hria a. Chu chu hun remchangah ka han sawi tel ve zawk duh a ni.

Veng khata awmkhawm thin te hi Kohhran a lo dang a, NGO lam - YMA, YLA tih te emaw, VC te emaw a lo dan tawh chuan kan han in-mihran deuh nghal ringawt zel a. Amaherawhchu, harsatna a han awm a, kan tangho leh thap thin thung a ni. Veng hrang ni mai lo, ram hranah kan han awm a, kan kal dan, kan ngaihtuah dan, thil eng emaw te chu a lo danglam ve ngei ang; amaherawhchu, chuti chung pawhin tunah hian, hei kan sorkar te, NGO te, Kohhran te, political party te leh pawl hrang hrang mai leh

mimal te .. (Pu Zothanthluanga, Chariman in Chair a la a..) kan tan hona, kan luan hona hi a ropui ka ti hle a. Hetah hian kan Chief Minister zahawm tak leh kan Home Minister zahawm tak te hi a hrana tarlan te pawh tha in ka hria a. ‘Mizoram hi kan unaute tlan luhna tlak a ni’ tih tar chhuak a, an lo lantir a, kan lo kuangkuaah thei hi a lawmawm ka ti a. Silh leh fen tur nei lo, mahni fate ngei han tuamhlawmna tur neilo te, mahni nu leh pate hrehawm tuar pawh tanpui hlei thei lova an awm laia kein ina theihtawp kan lo chhuah hi a ropui ka ti a, Zoram mipuite hi kan tuiral hlawm niin ka hria a ni.

He resolution in an awmna tur bik siam a rawn rawt hi a tha ka ti a. Tanpuina a khawma a kal theih nan te, medical check-up te, school te pawh awmze nei zawka a kalpui theih nan te, khatiang khan ruahmanna hrang hrang felfai zawka a kal theih nan he resolution hi a tangkai ka ti a. Chuvangin, he resolution hi ka support a, pass ngei pawh tha ka ti e. Ka lawm e.

CHAIRMAN : Awle, Dr. Vanlaltanpuia, Member zahawm tak ilo sawm ang.

DR. VANLALTANPUIA : Pu Chairman, kha thutna seat kha i inhme hle mai ka ti.

Vawiinah hian Hachhek bialtu, MLA zahawm tak Pu Lalrindika Ralte in resolution a rawn put luh hi han thlawp ve ka duh a. Tin, vawiin hi ni chhinchhiah tlak tak a ni a, Pu Chairman. Treasury Bench te leh Opposition te lungrual taka ro kan rel ni a ni a. Hnam issue kan rel ho avangin a nuam hlein ka hria a, hemi ni a han din ve pawh hi a thain ka hria a ni.

Kan hriat angin kan thenawm ramah hian politics-a buaina namen lo an tawk a, Myanmar leh Bangladesh-ten. Bangladesh hi ethnic group -hnam chi hrang hrangte helna avangin sorkarin a thenfaina hna a thawh avangin Mizoram-ah te an rawn tlan chhia a, tunah hian mi 510 vel lai an rawn tlan lut a. Chutiingin Myanmar atangin sorkar record-ah chuan mi 31050 a ni a, hemi hnu hian eng emaw zat chu am awm leh tawh mai thei bawk a; heng lo tuamhlawm hna kan han thawk ve te hi a ropui hle a.

Mi tam takin an sawi thin angin, ‘kan hnamin ramri a nei lo’ tih a ni a. India leh Bangladesh partition/then hran a nih laiin khung Sylhet Valley vela chengte chuan hrehawm an ti thei em em a. Luiral lehlamah an u leh naute an awm a, lehlamah an awm bawk a. An hla phuah hrang hrangah te pawh hian, khung Bengali poetry-ah te kluan an lunglen zia hi an ziak nasa em em thin a. Keini pawh chutiang tho chu kan ni. Thlahtu hmun khat kan ni a. Mizote hi khawchhak lam atanga rawn tlathla kan ni a, kan pi leh pute awmna hmun a ni a, kan lunglenna hmun leh mumang ramah te pawh kan la hmuh tam tak kan neihna hmun a ni. Tin, kan ziarang a inang vek a, kan ei leh in, tui kan tih zawng te a inang vek a, pi leh pu kan intawm a, silh leh fen inang kan feng a, sakhaw

hmun khat kan bia a, chutiang zelin in-unauna thuk tak keimahniah a awm a ni. Chuvang chuan, tun anga hun khirh an tawh laia lo tuamhlawmtu kan ni hi a ropui hlein ka hria.

Kan Chief Minister zahawm tak pawhin wawi tam tak a sawi thin a, kan unaute hrehawm tawrhna kan tawrhpuia zia thute a sawi thin a. Tin, tanpuina state sorkar-in kan phak tawka kan pek ve te hi a hlu hlein ka hria a ni. He House zahawm takah hian kan Home Minister zahawm tak khan vaibelchhe 3.8 vel bawr hi Myanmar unaute tan kan sen tawh thu report a pe tawh a; Bangladesh unaute tan nuaih 30 emaw lai kan seng tawh a ni tih a awm bawk a, hengte hi a chhinchhiah tlak hlein ka hria.

Myanmar bik hi han en ila, independent ram an nihna hi, British empire atangin 1948-ah an nei a. A maherawchu rei a nih hmain 1958-ah khan General Ne Win khan wawi leh khatah sorkarna a la rup mai a, sipai sorkar an siam ta a, *one-party rules* an lo ni ta a, chu chu nghet takin 1962 atangin 2011 thleng a kal a. Chumi hnu chuan mipui rorelna (nominal administrative system) an han tungding a, mahse 2021 atang khan sipai sorkarna kha a lo ni leh ta a. He an sipai rules hi ka han enchiang a, kum 50 chuang a lo ni daih tawh a, an khawngaihthlak em em a ni.

Chu political hun khirh karah chuan Chin lama kan unaute an rawn tlanche ta a, Mizoram-ah shelter zawngin an lo kal a. Kan bialah hian tunah hian Zotuitlang, Mualthum North, Haulawng leh Pangzawl-ah te hian chungkaw thanhnem tak kan lo dawng ve a. Chungte chu kohhranten an hall-te leh an hmunte lo hawh tirin buk an lo sak sak a, a lawmawm ka ti em em a. Kei pawh bialtu ka nihna angin, an ei leh in tur, buhfai leh chawhmehte kengin ka va kan kual ve tawh a, ka rilru a tina em em a ni. Ka tlawh tum phei kha chu krismas dawn a ni a, khua a vawt em em a, silpauline zar hnuaiah khaw vawt tak leh thli na tak hnuaiah an awm a, ka rilruin ka hre vang vang thin a ni. Krismas lai vel te khan ka ngaihtuah thin a, ‘a va vawt dawn ve aw’ ka ti thin a, naupang leh nausente nen an awm a ni a, a hrehawm hle a ni.

(Hon. Dy. Speaker in Chair a la a):

DEPUTY SPEAKER : Awle, sawi chhonzawm rawh le.

DR. VANLALTANPUIA : Kan unaute tawrhnaa kan ramin kan lo buaipui thei hi thil lawmawm tak leh chhinchhiah tlak tak a niin ka hria.

May Ni 10, 2022 khan ka office-ah Pi Lalrinmuani, Chin Affairs Minister leh Pi R. Khawtinsiami, an MP te an lo kal a, education chungchang sorkar sawipui turin thu an rawn thlen ve a. Higher & Technical Deptt. puitu ka nihna angin kan Minister te pawh ka hrilh a. Chutiangin Education Minister, Pu Lalchhandama Ralte ka titipui bawk a. An u leh naute ho education chhonzawmna tur an rawn buaipui a ni a, an sorkar hruaitute pawh an fakawm hlein ka hria. Pi Lalrinmuani leh Pi Khawtinsiami te ram buai karah pawh, mi ramah an u leh naute an ngaihsak hlein ka hria a, an fakawm ka ti.

Chutiang chuan kan theih ang tawkin kan intuamhlawm tawn a ni a, ‘engtia rei nge an la awm dawn’ tih a hriat loh a, theih ang zela tangho turin ka han inchah duh a ni. Vawiinah hian lungruat takin treasury bench te leh opposition te kan han sawi khawm thei hi lawmawm ka ti em em bawk a ni.

Pu Dy. Speaker, kan resolution rawn puluttu ina a rawn putlulh dan erawh hi chu, a forwarding hi tlema thlak ngaiin ka hria a. A rawn putlulh danah hian, ‘*Kan ram thenawmte atanga sahimna zawng a rawn ralhlante hi kan sorkar hian an awmna tur siam sakin, duat takin enkawl se; awmkhawmna tur hmun bik ngaihtuah sak rawh se*’ tih hi, heti hian thlak ka duh a –

“*Kan ram thenawmte atanga sahimna zawng a rawn ralhlante Mizoram mipuiten tha taka kan lo dawng sawng hi a lawmawm hle a; a tul ang zela lo mikhual chhonzawmin, an awmna tur ngaihtuah zel ni se kan ti*” tiin. A chhan chu ‘awmkhawmna’ han tih hian, awmkhawmna bika hi a buaithlak deuh ka rin avangin leh, an rawn tlak thlakna hmun te, an belhna hmun te kha hmun hran hran a nih hlawm avangin, ‘*an awmna tur ngaihtuah zel ni se kan ti*’ tia thlak hi a tha ka ti a. Chutianga kan pass theih chuan a lawmawm hlein ka ring. Pu Deputy Speaker, ka lawm e.

DEPUTY SPEAKER : Prof. F. Lalnunmawia, Member zahawm tak ka sawm e.

DR. F. LALNUNMAWIA : Pu Dy. Speaker, vawiinah private resolution kan member zahawm tak Pu Lalrindika Ralte in a rawn putlulh, pawimawh em em mai kan sawiho theih avang hian a lawmawm hlein ka hria a ni.

A resolution kan hmuh ang hian, ‘*Kan ram thenawmte atanga sahimna zawng a rawn ralhlante hi kan sorkar hian an awmna tur siam sakin, duat takin enkawl se; awmkhawmna tur hmun bik ngaihtuah sak rawh se*’ tih hi, a rawn puluttu ngaihtuahna kha ka va tawmpuiin ka hria a, ka rilru chuan. Resolution tha leh pawimawh tak mai a ni a, a bik takin hetiang a rawn pulut hi kan thlawp tlangin ka hria a, ralhlant kan unau te tan pawh a thlamuan thlak hlein ka hria a ni.

Myanmar leh Bangladesh atanga ralhlant kan sorkarin a chhinchhiah danin mi 3,01,508 nia tarlan a ni a. Tun session-a Member zahawm tak Pu Vanlalhlana zawhna, kan Home Minister zahawm takin a chhannaah khan, an vaiin mi 3,01,508 an ni a, Myanmar atanga rawn tlan te hi mi 3,01,050 niin, Bangladesh atanga lo kal te hi mi 458 chhinchhiah an ni a. An thahnem viau mai a, an tan pawh a manganthlak hle ang tih ka ring a ni. A bik takin Myanmar atanga rawn tlan te, an lo tlan tirh lam pheih kha chuan Covid-19 hri len vanglai te kha a ni a, an lainatawm hle mai a. Kei pawh Serchhip-ah han kalin, ka han hmu a. Bungbawr nunau nen chhangehhe takin an rawn tlan thla a, an kalna kawngah an naute ke te kha an titilak leh nghal a, mangang takin school ruakah

an rawn dah ngawt mai a; chungte chu kan ha tlawh ve a, an lainatawm tak zet a ni. Chutiang chuan kan raltlanhote dinhmun harsa takah an ding a ni.

Pu Speaker, a bik takin Myanmar khi ka han tlawh ve tawh a, kar khat chamin ka han kal ve a. Tahan phai te, Kawlpui te leh Miawhlah ah te kan kal ve a; mi an thain, Mizote leh Zo-hnahthlakte an felin, kan chungah an tha em em a, mizo nun leh tlawngaihna pawh an la vawng tha em em a, an ngainatawm hle a; hlim takin hun te kan han hmang ve a. Chutiang hun tha zawk leh beiseina nena hmalam hun an thlir lain, an sorkar, an ram a lo buai a, tualchhung induna te lo chhuakin, lo theih lohin an tlan a lo ngai ta a. Ka han zin ve tuma kan chaw eina ngei te pawh kha an lo tlan thla ve a ni, Mizoram-ah hian. An lainatawm khawpin ka hria a, an in leh lo tlansanin, an eizawna laklawh tak mai te kha tlansan a ngai ta si a, an dinhmun hi an lainatawm em em a ni.

Chutih mek laiin Bangladesh, Chittagong Hill Tracts-a zohnahthlak unauten harsatna namenlo tawkin, mi eng emaw zat an rawn lut bawk a. Pu Speaker, kan hriat angin, January Ni 4, 2023 khan chung zingah chuan Pastor Chhawnkhupa kha a boral a nih kha. Mizoram mipuiten kan lainatin, khangte avang khan zohnahthlakte thlavang hauhna te pawh Central YMA kaihhruainain kan nei nghe nghe a nih kha. Heng kan unau te hi sorkarin theihtawpin chhawmdawl hna a thawk a, sorkar mai bakah NGO te, kohhran te leh mimal ang pawhin theih ang angin chhawmdawl an ni.

Chutih rual chuan, a resolution-ah hian duat taka enkawl kha a rawn rawt a, theih ang tawk chu sorkar chuan an chhuahin ka hria a. Kan CM, House Leader te ngei pawhin theihtawp chhuahin, central sorkarah te pawh an thlavang te pawh a hausak ve a ni tih kha kan hriat kha. Sorkar hian theihtawpin a enkawl a, a resolution-ah hian, ‘*an awmna tur a bika ngaihtuah sak rawh se*’ tih kha a ni a, mi 30,000 chuang an ni a. A bika hmun khata dah emaw han tih bik kha chu a har ang a, ‘a buaithlak awm mang e aw’ ka ti a. Chuvang chuan, a remchan dan ang anga dah an nih loh kha chuan, ‘khawi hmun bikah nge kan dah ang, heng ral tlan te hi’ tih kha ngaihtuahnaah a lo awm a ni. Chuvang chuan, hei hi khatiang chiah lo deuh pawh khan a resolution neitu khan, ka hmaa mite rawt ang kha a rem tih chuan tlem han siksawia, han tihdanglam deuh hlek kha thain ka hria a.

Tin, nichina kan memberte leh kan Minister zahawm tak Pu Lalchhandama Ralte khan, ‘*kan unau*’ tih belh kha kei pawhin ka thlawp a. “*Kan ram thenawmte atanga kan unau*”, tih han belh kha a thain ka hre ve a ni.

Chutiang chuan, sa-himna zawnga rawn tlan te Zoram mipui te’n tha taka kan lo dawngsawng hi a lawmawm hle a. ‘*A tul ang zela lo mikhual chhunzawmin, an awmna tur ngaihtuah zel ni se kan ti*’ tia thlak kha ka rawn rawt ve a ni. A resolution neituin a rem tih chuan, ka rawn thlawp ve a ni e. Ka lawm e.

SPEAKER : Ngawi rawh u. Phar in la awm nual a, hunin a daih tawh lova; Dar 4 hi pelh a ni ngai lo a ni. Chuvangin, Pu Duha, i sawi dawn em? Awle, Pu Duha'n a sawi ang a. Tin, Home Minister-in a wind-up dawn, 'wind up' ti mai i la, a tih a ngai bawk si a, House Leader in a sawi a ngai dawn bawk si a; tin, Pu Rinsanga Ralte a phar bawk a. Midang kha chu insum theihna nei mai rawh u. Pu Ngunlianchunga kha saw lam bialtu a nih avangin tawi te a sawi theih ka ring a.

Aw le, Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Speaker, ka lawm e. Hei, hun a tlem a, tawi te a sawi ka duh a. Tun Resolution hi a ropui ka ti a. Han sawi ve loh tawp hi dikin ka hre lo va. Chuvang chuan han din ka'n duh hram a ni.

Pu Speaker, Pathianin Mizote hnamah min siam a. Chu hnam chu kan ral mai lohna tur leh, kan awmkhawmna tur ram min siamsak a; *Mizoram* kan nei a ni. Chutah chuan Mizo hnahthlakte hi hmun hrang hrangah awmkhawmin, kan awm darh nasa ta hle mai a. Chung zingah chuan tun hunah hian Bangladesh leh Myanmar-a awm zo-hnahthlak unau te'n harsatna an tawh a. He harsatna, kan zo hnahthlak unau te'n an tawh takah hian an inpui, an *Jerusalem* - Mizoram-ah hian an rawn tlan lut ta a ni. Ramin ri a nei a, hnamin ri a nei lova. Chuvangin, Pu Speaker, heng ral tlan, kan unau rawn lutte hi duat taka kan lo enkawl chhonzawm zel hi a tul hlein ka hria a. Tin, a bik takin Lawngtlai District te, Mamit District te, Siaha te, Champhai District tea a bialtu MLA te in fakawmin ka hria a. Heng kan raltlan unaute duat taka, an harsatna theih ang anga in lo buaipui hian Mizo hnam kan nihna ropuizia hi a tilang chhuakin ka hria a. He House zahawm takah hian ka member-pui, heng district-a kan MLA te lakah pawh hian lawmthu ka sawi duh a ni. Tin, kan NGO hrang hrangte, kohhran hrang hrangte hmalakna leh tanpuina an pekte hi a lawmawmin, ropui ka ti tak zet a ni.

Chutichuan, Pu Speaker, sorkar pawhin hma nasa taka lak sakin, Myanmar rama kan unau raltlante tan nuai 300 chuang lai mai sen an ni te; tin, an zirna chungchangah te sorkarin tha takin enkawl na a pek te hi ropui ka ti a. Chutiangan, Bangladesh lama kan unaute raltlan lo lutte pawh harsatna chi hrang hrang an nei a sorkarin a theih ang angin pawisa pawh eng emaw zah, nuai 30 chuang daih mai, kan han sen sak te hi ropui ka ti tak zet a ni. Wawiinah hei hi a la beitham hlein ka ring a, harsatna namenlo tawkin hmun tinah hian an la awm a ni a. Heng te hi nasa lehzuala kan sorkar pawhin kan en zuia, an mamawh leh an harsatnaah te pawh kan puiah zel thain ka hria a. Hei hi 'kan Mizo hnam ropuina lanna niin ka hria' tih kha ka han sawi ve duh a ni e.

Pu Speaker, he Resolution hi tha ka ti a, ka rawn thlawp e.

SPEAKER : Awle, Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka lawm e. Resolution kha chu ka chhiarchhuak tawh lo mai ang a. Helaia rawtna te te an siam pawh kha tha ka ti a, ‘kan unaute’ tih han belh ngei pawh kha a duhthusamawm mang e ka ti a ni.

Tichuan, Pu Speaker, vawiinah hian vawiina kan Mizoram sorkara kan hotupa ber, kan Chief Minister leh a thawhpui Mizoram sorkar chungah lawmthu sawi tur a tam hlein ka hria a. Tin, chu mai chu ni lovin, LADC (Lai Autonomous District Council) sorkar te, MADC (Mara Autonomous District Council) te, MADC (Chakma Autonomous District Council) sorkar te ang pawhin, he kan unaute sahimna zawnga an rawn tlannaah hian theih ang tawpin an lo buaipui a, a lawmawm ka ti a.

Pu Speaker, chu mai chu ni lovin, Mizoram-ah NGO hrang hrang, pawl hrang hrang te’n, ‘unaute’ tiin tha takin an lo dawngsawng a. Chu mai chu ni lovin, kohhran hrang hrangte, eng kohhran pawhin, ‘kan kohhran a ni lo ve’ ti lam reng reng awm lovin, an lo dawngsawng tha em em mai a. Tin, hei, Aizawl khawpui chungah AMC te pawhin an area theuhah an lo dawngsawng nasa a. Tin, political party ang pawhin, tu party mah awl bik pawh awm lovin he kan unaute, a bik takin, Myanmar rama kan unaute, an rama lalna leh thuneihna duh avanga mipuite’n an tuarnaah sa-himna, za-himna zawnga lo tlante, Bangladesh atanga lo raltlan te, helaia kan hotute’n an lo sawi thin ‘Zofate tan he Zoram hi ‘kan Jerusalem a ni’ an tih, an rawn pannaah hian, Pu Speaker, Laifa ka nihna angin vawiinah hian he House zahawm takah hian kan unaute lo buaipuitute, lo hmangaihute zawng zawng chungah thinlung takin lawmthu ka sawi a ni.

Tichuan, Pu Speaker, vawiinah hetiang resolution kan han pawtchhuak nawlh mai te hi, ‘Pathian remruat a va ni em’ ka ti a. Helaiah hian sorkar angin theihtawpin hmalak a ni a. Tin, chutiang chuan MLA te leh hmun hrang hranga mite, a tute mahin thlahthlam lovin hma kan la a ni. Vawiinah Mizoram rorelna khawl sang bera he resolution sawiho a niha, lungrual taka kan han sawiho thei mai te hi, ‘a va han ropui em’ ka ti a ni. He hun min siamsaktu hi kan Pathian a ni; Pathian chungah pawh lawmthu ka sawi tak zet a ni.

Kan unaute dinhmun hi sawi dawn i la, sawi tur tam tak a awm; an khawngaihthlak em em a ni. A bik takin Myanmar-a kan unaute, Thantlang khua phei chu a ram deuh thak a ni. In leh lo tha tak tak, anmahni phak ang tawk tawka an sak ve te, an in leh lo that tak te chhuahsanin min khaw daiah, khaw femah, silpaulin hnuaiyah an nupui fanau te nen an awm a, an lainatawm em em a ni.

Pu Speaker, vawiinah hian kan unaute dinhmun ngaihtuah hian, lung pawh a chhia a ni. Amaherawhchu, Pathianin kan chungah a rorelna a ni miao si a. Chutih mek laia helaia Zoram mipui ten tumah enhranna nei reng reng lova, a te ber atanga a lian ber thleng, ‘kan unaute an ni e’ tia kan lo dawng sawng hi a ropui ka ti tak zet a a ni, Pu Speaker.

Chutih rual chuan, he kan unaute harsatna an tawhnaah mimal ang te, sorkar ang te, kohhran ang te, khawtlang ang te, khawtlangah pawh Village council hrang hranga an luhna apiangah, “E, kan unaute an lo kal e” tiin an lo dawngsawng a, ei tur an lo pe a, sin tur an lo pe a, chutiang chuan an lo buaipui a ni. Vawiinah hian kan unau raltlan te sahimna zawnga lo kal te avanga insengso, sum leh pai, tha leh zam lo seng zawng zawngte pawh ‘Pathianin a let tam takin rul se’, tih hi kan tawngtaina a ni.

Tichuan, wawiina resolution kan han ngaihtuah hi Pu Speaker, kan ngaihtlak tak ang khan, hmun khata awmkhawm vek ngaihna a awm lova. Amaherawhchu, wawiinniah hian kan unauten an chan tawk chu Bible-ah pawh kan hmu a, Mizo thawnthuah pawh kan hmu a. Pharte hian khawchhung an chang ve ngai lo; daipawnah an awm thin. Vawiinniah kan unau raltlante a tam zawk hian daipawnah hmun an luah a ni. An khawngaihtlak em em. Thenkhat chu dinhmun inang lo em em, helai Aizawl tlangah pawh singhnih-singthum man in luaha fate lo chawm te pawh an ni a, thenkhat erawh chu mei eng en tak zet an ni, Pu Speaker.

Chutih lai chuan, kan sorkar hian wawiina kan resolution ang hian an awmna tur te, hmun khata dahkhawm vek te phei chu a rem hauh lo ang a, community hrang hrangte an lo ni hlawm a, tin, khaw hrang hrangte an ni. Amaherawhchu, sorkar ang leh anmahni tan pawha an zirna turah te, ei leh in zawna turah te, khawsak khawmna tur hmun siam sak nise. Chutah chuan, *entirnan*: Khawthar ang te pawh han siamsak ta ila, chutah chuan veng hrang hrang ang te pawhin awm ve ta se, sorkarin tui in tur pe se, mei eng pe se, School in te pe se, chutiang chuan ruahman sak thei ila chuan, an nun pawh a lo zangkhai deuh ang a, an nun pawh lo zalen deuh ang a. Tun hunah chuan daipawnah, ka sawi tak ang khan an awm a, a chung rangva tur takngial pawh an nei lo a ni. Silpaulin hnuaiah an awm a. Sorkar hian a lo hmangaih a, hei, kan Chief Minister zahawm tak, he thilah hi chuan a office-a ka len tum pawhin ka fak a ni; lawmthu ka sawi a ni. Vawiinah pawh hian he House kaltlang pawh hian kan unau raltlante a lo dawnsawna leh, a lo enkiawlnaah hian lawmawm ka ti a.

Hei ram pawn atangin kan unau ten Pu Speaker, nangmah ngei pawh zoom meeting-a lawmthu lo sawi an duh te, kan Home Minsiter te, kan Chief Minister te ‘appointment min lo dil sak the, nangin’ an ti a, appointment te kan han dil sak ve a. Kan Chief Minister te, kan Home Minister te, kan Speaker zahawmtak te, buai tehlul nen hun thawl tha tak pea, an duhzawng in hnena an sawi theihna hun in lo pe te kha a ropui ka ti a. Chuvang chuan, wawiinah hian Pu Speaker, he resolution hi kan unaute enkawl that an nih vea, anmahnia zalen deuha he Zoram-ah hian an lo nun khaw chhoh theihna tur atan sorkar anga mawhphurhna kan lak a, sorkar anga kan lo enkawl hi, wawiina kan resolution-ah hian ‘sorkar hian a ngaihsak lo e’ tihna lam a ni lova; ‘sorkar hian a ngaihsak lova, a bikin enkawl rawh se’ tih lam a ni reng reng lova. A enkawl tawhnaah kan lawm, mahse, wawiinniah he House, Zoram rorelna sang ber ina lungrual taka hetiang a kan ti a nih chuan, sorkar tan pawh hmalak a nuam chho in ka ring a. Tin,

central sorkarah pawh, kan Education Minister-in a sawi ang khan *refugee status* te pawh hi an hmuh ve theih nan vawiin niah he House-a kan sawi tel te pawh hi a tha em? A that ka ring a, kan unaute an khawngaihthlak a. Pu Speaker, sawi tur a tam, mahse dar 4 ah tawp tur a ni si a, he resolution-a kan lungrual te pawh hi a lawmawm ka ti. He resolution hian Zofate inpumkhatna nasa takin min siamsak a ni.

Pu Speaker, kum 2013 ah khan US ah CEM ka nih laiin khuallian turin min sawm a, keini chu 'Lai' kan ni a, Lai tawngin kan inbe thei mai a; Mizo tawng hrelo an tam lutuk; Direct-a USA lut anni. Vawiinah chuan kan Education Minister ten theih tawpin hma an la a, Zohnahthlakte tawngah chuan kan in-communicate thei tawh ang; kan inpawh thei tawh ang. Lunglei an bomb tuma Thingsai khuaa lo raltlante kha tawng leh sak an ngai a ni. Mahse, tunah erawh chuan, hman zan lawka *Chin National Day*, kan Chief Minister zahawm tak Khualliannaah kei pawh ka va tel ve a, khati hun lai, sorkar an neih laia Chin Hills Chief Minister Pu Lianluaia, minister kan nih lai khan Saisihchhuah leihlawn dawhna tur kha kan en dun a. Chulai chuan Mizo tawng a thiam vak lova, tunah chuan Mizo tawngin thu te a lo sawi thei tawh a. He hnam kan inpumkhatna atan, leh lamah chuan, '*Keini'n vanduinana kan ruat, a hmangaihna lan tirtu*' tih lam hawi zawng pawhin a kalna chin, Zofate inpumkhatnaah hian tamtak a awm a ni.

Chutih rualin, helaia Inpui nghak ten hmangaih takin leh duhsak takin, 'kan unaute an ni' tia, enhranna tel miah lova an lo dawngsawng thei hi lawmthu ka sawi a, he Resolution hi Pu Speaker, 'ka support a ni' tih ka rawn sawi e. Ka lawm e.

SPEAKER : Member zahawm tak Pu Lalduhoma ka sawm e.

PU LALDUHOMA : Pu Speaker, hun lo kal zel turah kan hnam hian eng engte nge kan la tawh dawn kan hre lova. Tichuan, politics te pawh tun aia nasaa kan ngaihven a la ngai zel dawnin ka hria a. Vawiina kan Resolution hi kan thlawp tlang vek turah ka ngai a, hnam thil a ni a. Amaherawhchu, member thenkhat ten an han sawi ang khan kei pawhin her rem kha tha zawk turah ka ngai a. 'Dahkhawm' han tih te pawh hi nakin zelah a that zawk lohna lai te pawh a awm ve thei a; her rem rawtna pahnih lo kal kha tha ka ti ve ve a. Khati zawnga kan resolution neituin a remtih theih chuan, tha zawk turah ka ngai a ni.

Tin, kan sorkar chungah, a bikin kan House Leader leh kan Home Minister chungah lawmthu ka sawi duh a. An theih tawkin an ti niin kan hria. Theih nise, hei aia thaa lo dawn sawn an duh ve tho ang. Amaherawhchu, kan ram sorkar sum dinhmun te kan hria a, theitawp tak tak an chhuah niin kan hria a; kan theih ang angin kan sorkar pawh kan thlawp zel dawn a ni tih ka sawi duh a.

Tin, kan Central YMA te pawh khan nuai 55 lai kha an han pein ka hria a. Tin, party hrang hrangte, kohhran te, keini party te pawhin kan theihna tlem hle mahse kan han thawh khawm a, kan han pe ve a. Tichuan, kan zavai maiin, mimalte pawhin buhfaite, sum leh pai leh damdawi te, mutbu te thlengin kan Mara leh Lai unau leh kan thalai rualte thlengin an fakawm vekin ka hria a.

Tin, central sorkar pawh hian fund te pawh min pe ve tih kha kan hria a, ‘engzat nge min pek tawh’ tih kha a inzawh chi loh maithei a. Amaherawhchu, a ruk tak chuan an ni pawh an ngawi thei bik lo tih chu a hriat a. Amaherawhchu le, *refugee status* min pe thei lo erawh hi chu kan duh thu a sam lova, kan la nawr zui tlang zel turah ngai ta ila. Hei, India sawrkar hi Security Council Member nih a tum mek lai a ni a, chutih laia a ram chhunga refugee lo kal te, refugee status tak ngial pawh min pek theih loh chuan, security council member ni tlakah khawvel hian India hi a ngai thei bik dawn em maw ni le, tih thleng hian ka rilru a kal a ni.

Tin, kan Chin unaute pawh an lawm a, hman deuh lawk khan appreciation dinner an rawn buatsaih a, chutah chuan min rawn sawm ve nghe nghe a. He laia a kan sorkar leh mipuite’n kan lo dawnaw dan zawng zawngah khan lawmthu an sawi a, dinner a hranpain, a pualin an siam a ni.

Pu Speaker, kan hnam chungchang hi a hmasa bera ngaihtuah a nih tum kha Chin Lushai Conference, Fort William, Calcutta ah khan a ni a, kum 131 lai a lo liam ta a, kum 1892 ah khan a ni. Khatah khan vaiho zinga awm chi ah min ngai lova, kawl ho zinga awm chi ah min ngai lova, ‘Zo-hnahtlak’ kan tih zawng zawng hi rorelna pakhata dah tura thu tlukna kha siam a ni a, kha kha lo kal tlang selang tha mai tur hi a ni a. Amaherawhchu, kha kha implement a nih tak loh avangin sokar pathumah tunah chuan thendarhin kan awm a, a pawl ta em em a. *Unau hmel hai* te pawh alo thleng a, kan unaute ngei pawh ‘foreigner’ tiin tum hnih ngawt hnawhchhuah te a thleng a nih kha. Amaherawhchu, heng buaina leh vanduaina lo thleng hi kan tan malsawmna inthup a lo ni a. 1966 ram buaiah kan unaute belin Burma lamah kan chho a, min lo mikhual a. Tin, 2015-ah khan Burma-ah tuilian nasa takin an tuar a, kan theih ang tawkin kan han pui ve leh a. Zophai ramri ah kan han intibuai a, (2018 em ni ta kha) tah chuan Zohnahtlak zawng zawng khawvel pumpuia awm hi an nghing a ni. Theihtawpin an che a, kan in lungualna thlentulo alo ni zel. Tun thil pawh hi kan hnam kal zelah a tuartu atan, hrehawm hle mahse, ‘hnam inpumkhatna min petu, malsawmna thlentulo ah chang se’ tih hi kei ka duh dan a ni a. Tin, anmahni pawh hian mikhual rilru pu lo se, an awmna a piangah - kohhran ah, NGO ah, chhianthatni ah, tualchhung mi, khua leh tui dik tak angin awm thei se ka duh a. Kei ka duh dan phei chuan ration card-ah te hian thun ve nghal zung zung ila. Tin, chu mai a nilo, Hailakandi vela foreigners 98% vel khu dan loa lo lut an ni; vote an pe zel; voting right an pe teuh tawh. Tunah khuan MLA te pawh an ni tawh. India ramah a ruka rawn lut vote nei an tam lutuk tawh. Chuvang chuan, kei chuan voting right an neih loh chhung chu mikhual rilru an put ka ring tlat. Hei hi an

ram a ni ve a, nei ve mai rawh se. Tualchhungah kan lo ti ve ang a, tunge hria ang? Chuvang chuan, khatiang khan khua leh tui chanvo zawng zawng hi dawng ve sela, an awm hlen duh leh awm hlen sela; chutiang a kan tih chu a tha ka ti a.

Tin, special development scheme hi ruahhman sak tha ka ti a, khawimaw laiah development programme hmangin an awmna hmun tur kan lo siam khan, refugee hmingin nilo sela; khami hmunah khan tui, school engkim facility kha pe ila, eizawna bul tanna tur harsa lovin dah tai la. Amaherawhchu, khua leh tui kan pek duh dawn avang khan, refugee hming hi chuan engmah tih loh hi a fing zawk ang tih te ka ring a ni.

First World Zomi Convention kha kum 1988-ah Champhai-ah khan a awm a, in-unauna atana hmalakna hmasa a ni a. Tichuan, ZORO hi a lo piang a, tunah hian Brig. T. Sailo thilungah a awm reng lo thei lo a ni. Tichuan, kan hnam hming, kan nomenclature hi Pu Speaker, pakhat mahin kan generic name a awm lo; *Lushai* min ti a, *Chin* min ti a, *Kuki* min ti a. Heng hi hnam dangin hming min phuahchawp sak, kan pianpui generic name ni lo vek a ni. Kan zavaia kan hming tur nomenclature hi a la piang ang tih ka ring a, common language impose tur niin ka hre lo a *own process* rawn la sela, a *natural cause* rawn la sela common language kan nei mai ang.

A tawp bera ka sawi duh chu – ‘*UN Declaration on the Right of Indigeneous People*’ kan tih 2007 kha khawvela keini ho ‘indigeneous’ an tih te, ‘tualto hnam’ an tih te, kan ram hlui, kan pi leh puten an lo luah ram lak let leh theihna thuthlung a ni. Pathian leh mipuite zarah sorkarna lo la ve ta ila, Prime Minister hi sawipui ka duh a ni; hetah hian India hi a signatory a ni. Mi ramah chuan committee an din a, a theih theih an implement tawh a, keini chuan hma kan la lo reng reng a. Hengte pawh hi kan hnam kal zel tura kan inpumkhatna leh rorelna pakhat hnuaia kan awm theihna tura UN in kawng min sah kuak sak a ni; kan ngai hlu ang a, hman tangkai pawh kan tum ang a, kan bawhzui tur niin ka hria a.

Tichuan, he resolution hian tuna kan harsatna sutkianna mai bakah, kan hnam kal zel tura inpumkhatna leh rorelna pakhat hnuaia kan awm theihna thlenga min hruaitu step pakhat lo ni nghal thei se ka duh a, ka support a ni. Ka lawm e.

SPEAKER : Tunah chuan Home Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, ka lawm e. Vawinah Hachhek bialtu member zahawm tak Pu Lalrindika Ralte in private Member resolution pawimawh tak a rawn pulut hi a lawmawm hlein ka hria. A hrim hrimah, chhan eng pawh ni sela, mahni in leh lo tlansana ngai, hetiang miho hi ‘an khawngaih thlak em em a ni’ tih kan hre theuh a.

Refugee (raltlan) problem hi tunlai khawvelah, Europe-ah te pawh a la awm reng a. Tin, District Council hun lai (kan la te khawp mai), East Pakistan an ni laia Kaptai tuikhuahin a chim dawn avanga Chakma raltlan, Arunachal Pradesh-a an dah tak te pawh vawiinah hian ka rilruah a lo lang a. Vawiinni thleng hian Arunachal-ah sawn *second class citizen* anga treat an ni a, an khawngaih thlak hle. Tin, Burma sipai ten an tihduhdah avanga Burmese-Muslim ‘Rohingya’ an tih te, Bangladesh-a raltlan dinhmun te pawh khu a chhe em em a, *refugee* anga pawm an ni a. UN atanga tanpuina an dawng chung pawh khuan an dinhmun an khawngaih thlak hle a ni. Burma ram sipai sorkarna laklaih niin, a duhlotute nen an indo a, mipui eng emaw zat kan ramah raltlanin an lo kal a ni. He thu kan hriat tantirh atang hian kan sorkar, Pu Zoramthanga kaihruai chuan he House-ah ngei hian amah ngeiin a sawi a, “Kan unaute an ni a, theipatawp chhuahin kan lo enkawl ang”, tiin a lo welcome a, a lawmawm hle a ni.

Amaherawhchu, sorkarin tih theih a nei tam lo khawp a. Kan hriat angin, sorkar pachhia kan ni a, nasa taka India sorkara inngat kan ni. Chuvang chuan sorkar anga kan tih chhun hi chhuan tur a tam lo khawp a. Kan ngaihthlak tawh angin, Mizo mipui rilruah hna a thawk a, Kohhran te, NGO te, Zirlai Pawl te leh mi chi hrang hrangin tanpuina rilru an lo nei a, vawiinni thleng hian harsa tak chungin nuamsa lo tak chungin an la eiin an la in ve a. An chenna te pawh duhthusam ni lo mah sela, ruah a surin an in te a hula, zanah eng chhe te an lo neih theih hi a lawmawm hlein ka hria.

Kan Chief Minister thahnemngaihnhain State Level Committee a siam a, a hnuaiah chuan committee te zawk official hoin din a ni leh a, chumite hnuaiah chuan District Level te, Village Level Committee te kan unau raltlante buaipui tur hian hmalak a ni ta a. Tunah hian kan unau raltlante hi District 11-ah hian an awm kim vek a ni; a thenah an awm tam deuh a, a thenah an awm tlem deuh a. An vai hian, sorkar record dan chuan Bruma lam atanga lo lut hi mi 31,050 an ni a, Relief Camp 162 siam a ni. Amaherawhchu, relief camp-a awm ai hian relief camp loa awm hi an tam zawk a, in luaah te leh chhungte bel hi. Relief Camp-a awm te hi mi 13,540 an nih laiin Relief Camp-a awm lo te hi mi 17,508 an ni. Uluk takin, ‘engzat nge an nih’ tih leh, ‘tute nge an nih’ tih te hi hriat a tul avangin an zavai hian ‘Identity Card siam sak ila’ tiin sorkarin a rel a. Tunah hian mi sawmhnih-khat tih lo hi chu Identity Card pek vek tawh an ni.

Tin, Relief camp-ah te hian a theih chin chinah solar lighting te, tui dahkhawlina te, ek in (a khur laih chi) te, tin roof tlem a zawng leh silpouline te, mutbu te, thosilen te pek an ni a. Tin, kan ngaihthlak tawh angin, ‘naupangte zirna nei ve sela, school ah kal se’ tiin....(**Speaker:** Kan hun pangngai hi a tawp ta a, kan zo lawk dawn em? Awle, chhunzawm rawh le) kan ngaihthlak tawh angin school an kalna turte, an zir tur zirlaibu thlengin ngaihtuah sak an ni a. Chutiang chuan sorkar hian hma a la a. Amaherawhchu, ka sawi tawh ang khan kan duhthusam a ni lova, a bei tham em em a ni. Myanmar lam unau Mizoram lo lutte hi, kan member thenkhat ten an sawi tawh ang khan cheng nuai 384 velin kan tanpui ve tawh a. Tin, Bangladesh atangin tun hnuaiah lolut an awm a,

krismas bawr leh a hnu deuh hleka figure lak kha a inang thei lova; kan sorkar figure chu 458 a ni a. Burma ram atanga rawn raltlante hi hmana he House-a Pu Rualchhina, Forest Minister anih laia ‘Ngengpui Sanctuary-ah Sava engzatnge awm?’ tih an zawhna ang deuh kha a ni a, Pu Rualchhina chhanna kha ka la hre reng a, “A chiah chiah hriat a har khawp mai; a then an thlawk lut a, a then an thlawk chhuak a,” a ti a. Chutiang deuh chuan khaw chhaklamah khi chuan buh te sengin an han haw lawk a, khatianga kha a ni a. A figure chiah chiah hi chu 31,000 bawr velah dah ta ila a thain ka ring a ni.

Ka lawmna pakhat chu - thu an awih viau mai, kan raltlan unaute hi. Sorkarin an awmdan turah ‘nangmahni duh thuin hmun dangah zin chhuak suh u, hmun dangah insawn ngawt suh u’ an tih te pawh an zawm tha viauin ka hria. Tin, kan hriat theuh angin Mizoram hi drugs tawlhna kalkawng a ni a, Excise leh Police force bakah khawtlang ten an man reng a. Nimin lawkah te pawh an man thawm te pawh kan hria a ni. Kan police hotute hnenah, “heng refugee kan tihte hi hetiang thilah hian an inhnawmah em, a bik takin lo chik teh u” tite pawhin advise ka pe a, mahse tun thleng hian “raltlanhote zinga mi anni” tia man fak pakhatmah kan la nei lova, hei pawh hi a lawmawm ka ti. Chuvang chuan, anni ho pawh hian khawtlang tana thil thalo tihna lakah hian sorkarin kaihhraina a siam te zawm tha se la, thil sual ti lo turin insum thei se tih hi ka duhdan a ni.

Tin, tlang beng atanga kan hriat danin, USA te, New Zealand te, Australia lam te atang pawhin kan unauten an theih chin chinah an tanpui thin a ni tihte pawh kan hria a, a lawmawm hle a ni. Tichuan, nuam lo takin, mi ang pawh phak lovin, amah Pu Nguna’n mittui tla lek leka a sawi ang deuh khan khawngaih thlak tak tak dinhmunah hian an ding a, hemi atan hian mizo mipuite hi kan tanrual a ngai a. Kan ngaihtlak angin, Mizoram sorkar hi sorkar pachhe tak anih avangin, duh angin thil a ti thei lova. Ka ngaihtuahnaah phei chuan MLA te pawh hi han tang leh hret ila, nuai 10 theuh emaw te kan fund atang hian han sik chhuak ila, crore 4 chu a ni mai dawn a tih tein ka ngaihtuahnaah chuan a awm rum rum a. Amaherawhchu hei hi chu kan zavaia kan ngaihtuah tlan tur a niin ka hria.

Nichina figure ka sawi ang khan, tam tak hi chu relief camp-ah an awm duh lova, chhungte bel an ni a, chhungte an belh khan emaw, in an luah hran emaw khan khawilaiah emaw inhlawhna remchang te a lo awm ve a; dawrte siam erawh chu sorkar leh khawtlang, an awmna ten rem an ti thin lova, a remchang lova, manual work engah emaw te hian an inhlawh ve a. Khatianga khan mi khawngaihna ringawta innghat lova an awm theihna turte pawh hi a awm ni awm tak a ni.

Chungho chungchangah Member zahawm takin resolution a rawn siam kha tha ka ti a. Mahse, member thenkhatten an sawi ang khan, *tin loh nghawngkawlin bah tir* te pawh hi a awm thei a. Chuvang chuan, “*Kan ram thenawmte atanga sahimna zawnga rawn raltlante hi kan sawrkar hian an awmna tur siamsakin duat takin enkawl se;*

awmkhawmna tur hmun bik ngaihtuah sak rawh se” han tih chiah hi chu sorkar kha mawhphurhna kan pe lian lutuk a, zawh loh nghawngkawl kan bah tir a hlauhawm a. “Khatieng khan kan pass si a, engahnge sorkar hian a tih leh loh,” tih hun te pawh kha thleng ve thei tho a ni. Chuvang chuan, ZPM group leader sawi ang deuh khan, tlema han tihdanglam deuh kha a tha lawm ni ka ti a, chu chu sorkar tan pawh pawm a nuamin ka ring a, a tum tak tidanglam lutuk si lovin. Member zahawm tak takten an rawt ang deuh khan “*Kan ram thenawm Myanmar leh Bangladesh atanga sahimna zawnga kan unau raltnan lokalte, Mizoram sorkar leh mizo mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhonzawmin, an awmna tur leh an mamawhte ngaihtuah zel nise kan ti*” tih hi a him tawk viau lawm ni tiin ka ngaihtuahnaah a awm a, hetiang hian rawtna ka rawn thlawp anih chu, Pu Speaker. Ka lawm e.

SPEAKER : Awle, kan House Leader, kan Chief Minister zahawm takin sawi duhte a neih chuan sawm ila.

PU ZORAMTHANGA, CHIEF MINISTER: Pu Speaker, ka lawm e. Vawiina kan resolution hi a lawmawmna chu nidanga kan tih zen zen lohin vawikhatah, ni khatah private member resolution pahnih tha takin kan tlangpui a, lungruual takin kan pass ve ve dawn niin a lang a. Tichuan, chawhma lama mi pawh awlsam taka kan pass khan, tuna chawhnu lama kan unaute tana resolution pawimawh deuh tur tan hmun a rawn hawng a, chumi a tan hei hi kan han pass pah theih dawn niin a lang a. Kan unau Bangladesh leh Myanmar atanga lo kal te pawhin news-a puan a nih hunah, ‘hei, zanina an rorel’ tiin, hetiang kan pass tlan theih phei chuan a lawmin, kan tih ngailoh zinga mi, kan tihfuh tak turah a tang dawn a, a lawmawm tak tak a.

Chuvangin, kan Home Minister leh member dangten an rawt ang khan, tlema han siamrem deuha ngaihthlak hahtdam deuh zawk tura a kal theih phei chuan, a resolution puluttu-in a remtih phei chuan, kha kha a tha lehzual turah pawh kan ngai bawk a ni.

Kan hriat theuh angin, keini ho hi lehlamah chuan tlawmngai tak, mi tana thahnemngai taka titu kan ni a, tunah pawh hian tumah kan intur lui lova, sorkar political party zawng zawng, NGO zawng zawng, kohhran zawng zawng, pawl zawng zawngin thahnemngai tak leh inlungruual takin kan han ti thap mai hi, entawntlak tak chu a ni a. Chuvangin, lawmawm ka ti a, lawmthu ka han sawi hmasa a ni.

Tin, a dawt lehah chuan, kan hriat sa mah nise han sawinawn ka duh chu, Bangladesh lam hi han sawi hmasa ila. Bangladesh ah chuan kan unau - Bawm te, Pang te, Khumi te, Khiang te leh a dang neuh neuh te pawh a awm a. Amaherawhchu, a pui ber chu tuna refugees lo kalah chuan Bawm unaute an ni a, Pang unaute pawh an tel tho a. Kan Bawm unaute hi, kan awm lai khan ‘singhnih vel kan ni ang’ an ti thin a, mahse

tun hnua kan han zawh hian, ‘singnga kan ni tawh’ an ti a; ‘in lo va tam ta ve’ kan ti a, ‘E, kum 30 zet a kal tawh a lawm’ an ti a, a ni lah bawk tak a. Chuvangin khulamah khuan singnga chuang chu an awm ve a ni, kan unaute hi. Chu chu kan information a ni a.

Tin, kan hnamah pawh kan thuhmun tlang em em a, kei pawh ka nu hi Bawihlung a ni a, Bawm chuan ‘Bawihlung’ an ti lova, ‘B’ aiah khan ‘D’ an hmang a, ‘Dawihlung’ an ti a. Chuvang chuan, ‘kei hi Bawm-chanve ka ni’ ka ti thin a, an hnenah, anni pawh an lawm phian a. Bangladesh-a kan awm lai khan Bangladesh sorkar, Chittagong-a an Commander lian ber General Manzura nen khan vawi tam tak Ruma - an sipai hmunah kan inkawm thin a. Chutah chuan, ‘nang hi helai Hill Tracts ami *Bawm* te nen hian engnge in in-unauna’ tiin remchang takin min zawt a. ‘Ka pa hi chu Mizoram lama mi a ni a, ka nu hi a hnamah chuan *Bawm* a ni; half-Bawm ka ni e’ ka ti a, a nuhi a za angreng a; a dik ve tlat si a, a hnamah chuan. Khatiang khan, anni lam pawhin min pawm dana kha, khatia a hotupa ber pawh *Bawm-chanve* han nih kha chuan, min en dan kha a dang khawp mai a, relation pawh tha deuh maiin kan nei a. Amaherawhchu, vanduaithlak deuh maiin Chittagong Commander ber khan a pu, Zia Ur Rehmana a coup a, that ta si a, kan camp-a a lo tlan luh kan hlau khawp a, an rawn um dawn si a. Amaherawhchu, lehlamah a tlan a, lehlamah khan an va man a, an nangching ta zawk a; a pawh khawp mai a.

Tichuan, khulamah kan unaute kha, kan hriat angin kan inpumkhatna kha chu sawi vak pawh a ngai lova, hetia han sawi mai tur chuan Prime Minister hnena ka sawiah pawh, Bangladesh kan awm chhung khan mi 40 chuang zet kan nei a. Inremna kan neih khan ‘kan daughter-in-law, kan mo te 40 zet kan rawn hawn a nia’ ka ti a, Modi hnenah pawh ka sawi ngat a ni. Chuvangin, kan inpumkhat a. Kan naute thenkhat chuan silai dah kim lovin, ‘helamah kan puzawnte in lamah kan awm ang a, in mamawh hunah hman leh turin eng emaw zat hi chu kan awm nghal ang e’ an ti a, mahse kan awih lova, kan vaiin, kim takin kan lo hawng a nia. ‘An makpa te pawh kan ni hlawm a ni’ tih te ka sawi a, anni pawhin an hriat ngai reng reng loh a ni a, an lawm khawp mai a, tunthlengin.

Kan Bawm unaute chu keini ho hnenah an lo kal hi chuan, Mizotawng thiam pangngai ngat pawh hi Bawm tawngin an tilui ve tlat thin a, kan relation pawh a thatphah viau a ni.

Awle, khulamah chuan khatiang inpumkhat kha kan ni a. Kum 1968-69, East Pakistan a nih laia kan tlakthlak pawha, kan Bawm unaute, kan Pang unaute nen hmun khatah engkim harsatna in-share tlang kan ni a. Dhaka Falls pawha harsatna tinreng su tlang kha kan ni. Chuvangin, tunah pawh kan harsat laia min lo mikhualtu an ni a, an harsata mikhual kha kan bat ve tlat a ni. Chuvangin, Bible-a Pathian-in Israel fate hnenah ‘mikhualte chung a thatchhuah tur’ a tih rual khan, ‘nangni pawh mi ramah

mikhual in nih thin kha' a tih ang kha. A mikhual hmasa zawk zawk kha kan ni si a, khulam thlanglamah pawh, a chhaklamah pawh a ni tho a. Kum 1966 kan ram buaia khatia kan awm khan, tam tak hemi Burma ramri depa awm kha chu Burma sorkar khan min hrethiam a, Burma ah khan kan awm a, kan tawm tam em em a ni. Amaherawhchu, kan tisual palh a, tawngkam mawilo ni suh se; kan at kan so a leh; kan han kap leh ta rih a Burma kha. Heng kan Home Minister Pu Chama teho pawh, buai deuh mai khan an han che ta si a. Kha kha kan tihsual a ni a. Pu Denga thinrimin kan zuk chhuk thla kha, "engatinge a thenin lo kan vah laiin a mawng atangin in rawn hal" a ti a, khatiang deuh khan kan tisual ta a, kha kan kah thinrim kan tihsual kha, Pu Rualchhina te nen Bawm ram, Arakan-a kan awm khan theihtawpin tihdam tumin kan han bei ngial thin na a, kan tidam hlei thei lo a ni; a buaithlak khawp mai.

A enga pawh ni se, tikhan political thli chu kawng chi hrang hrangin a lo kal zel a. Tichuan, keini pawh Burma rama kan han mikhualna ramah leh min lo tanpui thinna ramah khan harsatna lo thlengin, ti hian an lo tlan thlak a tul ve leh ta a, keiniin kan lo mikhual ve leh a, kan inmikhual tawn zak zak a, a-chhak, a-thlengin. Chuvangin, theihtawpin kan lo welcome a ni a.

Nichina kan ngaihthlak ang khan, Union Home Ministry tih danah chuan, 'an ni hi India ramah rawn luh tir tur a ni lo e; lo nawr kir zel rawh u' tia order lehkha nen an rawn tih thlap kha a ni a. Manipur-ah chuan le, thu an lo awih bawk a, an lo phal lova, lo tan tir te pawh neiin harsatna tinreng an nei a. Amaherawhchu keini chuan kan hriat ve leh, a ruka thil sawi emaw, public meeting-a sawi naran emaw nilovin, hetah House-ah ngei 'kan unaute an ni a, kan nawr kir dawn lo; hetah hian kan lo welcome ang a, *humanitarian treatment* kan lo pek a ngai a ni' tih khan kan puang a, kha kha khawvelin a hre nghal a ni a.

Tichuan, Delhi ka zina Prime Minister hnenah pawh ka zu kal khan, Manipur lam hotute ang chu ni ve ila chuan, 'kan lo nawr kir ta lova, min hriatthiam kan ngai a ni' tia ngaihdam zuk dil kha tul awm tak pawh a ni a. Amaherawhchu ngaihdam dil a hnehin, an tanpuina tur pawisa lampang kha ka zuk dil thung a. 'Engnge Burma nen in inhnaihna' a ti a, a hnena ka sawi chu, 'ka nute unau hi 4 an ni a, hmeichhe 2 leh mipa 2, hmeichhe 2 - ka nu leh a nau chu India ramah an awm a, hetah hian an cheng a, an thi a, an fate pawh India ramah kan awm a; an nutate 2 erawh chu Burma ah an cheng a, an thi a an fate zawng zawng nen Burma ah an awm a; chuti vela inhna chu kan ni' ka ti a; 'a nih tak chu maw le' a ti a, a nui ve mai mai a. Kei chuan, 'tuna lo kal te hi chu Burma mi mai an nilo; ka uncle fate, ka cousin te an ni a, engtin nge kan lo nawr kir theih ang? Chuvangin min puhih a ngai a ni' ka ti a, pawisa kha ka zuk thing tlut tlut mai a, kawng chitin rengin. Chuvangin, hreh chung chung a eng emaw tia indirect tanpui theihna tur te pawh kha theihtawpin hma an la ve a ni. Amaherawhchu veng thawng ve ta reng reng hi an ni. Keimahnin kan beisei ang te phei chuan an tithei lova.

Engpawh nise la, tunah chuan kan zuk nawr nasat ber kha chu, tanpuina leh thildang chu thuhran ni sela, “Burma ram hetia a awm chuan kumkhua chuan India ram luhaina tur a ni a, Burma buaina a awm chuan, North East pumpui a buai a ni mai; Burma ralthuam a tam chuan, North East pumpuiah ralthuam a lo lut a ni mai; Burma insurgency a awm reng chuan, poppy an ching a, tichuan drug heroin leh thil dang a lo lut thla chur chur a ni. Chuvangin, Burma ah hian remna awm sela, north-east ah remna a awm a ni mai a. Chuvangin, India sorkar hian a hmaa hma in lak ang khan in lak leh a ngai a ni” ka ti a.

A hma khan Burma sorkarin India sorkar an rawn sawm a, remna siampui turin, tichuan National Security Adviser Pu Dovala nen kan pahnihin India sorkarin min tir a. Tichuan theihtawpin Naypyidaw ah te, Rangoon ah te, Bangkok ah te underground hruaitute nen inremna siam turin hma kan la a. Kan sawmna anga India ramah exposure nei tura a lo chhukna tur travel document vel kan buaipui lain an inthlang a, Aung San Su Kyi a tling ta a. Tichuan a buai ta vek a, a dawt leh kum nga chhung kha rem thu reng reng sawi awm lovin, Aung San Su Kyi sorkarah khan kum 5 a liam a, tun hi a thleng ta a. Tunah erawh chuan an vaiin Min Aung Hlaing sorkar pawhin, Aung San Su Kyi sorkar pawhin, an ramhnuai underground pawhin ‘inremna kan mamawh a ni’ tihah khan an lungrual ta thap a, ‘inremna min siampui turin India sorkar lo chu beisei reng kan nei lo’ an ti a, chu chu tuna an au hla a ni a.

India hi tunah chuan a la ngawi ta deuh rih a, eng pawh nise, remna kan siam theih chuan tuna an duh ber a ni a. Ram tha tak, ram hausa tak nei an ni a, khami hmuna kir leha, chumi hmuna an in leh lo tea kir leh theihna tur remna kha an mamawh a ni a, chumi tur chuan kan tawngtaina bawk a ni. Theihtawpin mizo mipui hian chu chu kan duhpui a, India sorkar Pathian-in an thinlungte tihawngin, Burma rama remna siamtuah India sorkar hi a la awm ngei ka ring a, chumi tur atan chuan Mizoram pawh remna entawntlak nei, rawn zir tura lo kal an chak ngawih ngawih, ‘engtin nge inremna in neih kan hre duh a ni’ tia India rama lo kala, Mizoramah ngei pawh lo kala, ‘in inremna neih dan hi kan duh a ni’ tia an hmachhawp mek, amaherawhchu inthlan avanga sukuk ta kha a ni a. Tiang khan a ngai rengin inremna neih pawh an la duh a ni.

Engpawh nise, heng thilah hian Pathianin remchang a la ruat ang a, tuna Burma ram atanga raltlante theihtawpa kan lo tanpui a lawmawmna chu thukhat, rahbi khat ni se, a rahbi pawimawhna chu - remna neia Burma leh India ram, Burma leh Mizoram, north east pum puite inrem taka kan awm tlang a, hetia insum dawn tawmna te pawh buai lova, silai leh drug, smuggling thil leh ralthuamte awm lova tha taka kan awm tlan theihna tur hi Pathianin rem a la ruat ang tih ring ila. Chu chu vawiina kan ngaihtuahna a ni a.

Chuvangin, vawiinah pawh hian Pu Rindika resolution hi a lawmawm ka ti a, vawiina sawiho theihna hun, *Private Members’ Resolution* kan han nei tlat te hi ‘Pathian

remruat a ni' tih hi kei pawh ka ngaihndan a ni a. Kan resolution hi pass ila, kan pass rualin Mizoram news-ah a khat vek ang a, Burma ram news-ah a khat vek ang a, India rama a hre tur awm chinin an hre vek ang a, khawvel, America rama kan unau awmte hian an hre vek bawk ang a; 'A va lawmawm tak em!' an ti vek dawn a ni. Pu Rindika resolution hi nichina kan Home Minister-in a rawn rawt ang khan, '*kan unaute*' tih te pawh telha siamrem kha, rem a tih theih pheih chuan a tha leh zual ang a. Khami ang khan pass ila, kan resolution pass hi, 'khawvel pumpui' tih em em chu a ni lo ang a, mahse, khawvel hmun dang dang atanga lo ngaithla tuten an lo hriat turin; India hian a lo hriat hunah, 'E khai! Leh ta deuh deuh e le' an ti maiin ka ring a. 'I thawnkir em?' an ti ang a; 'E khai, thawnkir chu sawiloh, tanpuina pawisa kan pe' kan han tih pheih chuan, 'ta deuh deuh em e' min ti maiin ka ring a.

Khatieng deuh kha ka ni a. keini legislature hian pass hnan ve reng reng ila, India sorkar pawhin heta tang hian a ngaihtuahna pawh a seng ang a. 'Security Council member nih i duh bawk a, hengte hian a tanpui ang che' a ti tawh kan awm ang a; kan parliament-ah pawh an autir ve ang a, kan hotute pawhin 'ram buai te hmangaihna nei Security Council member ni tlak ngei tan chance a awm e,' tia zuk auchhuah nan pawh a tha turah ngai ila. Vawiina kan resolution lungrual taka pass hi kei pawhin ka rawtna a ni e. Pu Speaker, ka lawm e.

SPEAKER : Awle, kan sawihona a ngaihnawm hle mai, *Chair* atang pawhin. A resolution neitu kan sawm hmain, amendment ang chi a rawtna kha a awm a.

Kan hriat angin, Dan te kan nei ve a, tuna private members' resolution hi, kan dan pheik 21-na, 27-na (1) in a ziah angin, kartir kan session a, a kar tawp Zirtawpni apiangin member ten free takin, zalen takin ram tana tha an tih te House-a sawiho turin chhawp theihna *Right* hmangin a rawn chhawpchuak a. Member zahawm tak Pu Lalrindika Ralte-in Dan ang thlapin a rawn submit a, kan lo pawm a.

Tichuan, kan sawiho a, amaherawh chu, kan sawiho ah khan, a thu hi a original ah chuan – "Kan ram thenawmte atanga sahimna zawng a rawn ralhlante hi kan sorkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se" tih a ni a. Kan sorkara Home Minister zahawm tak leh Chief Minister hnen atang pawha kan ngaihlak ang khan, hmun bik siam kha anmahni tan pawh a lo rem lo deuh thei a, chuwangin, 'amend ni se' tia rawtna lo kal kha, kan dan pheik 73-na leh 129-na khan a rawn ziak a – "Member tupawhin amendment a duh chuan, a resolution neitu hnenah a copy a pe ang a, a rawn move tur a ni" tih a ni a. Chu chu kan Home Minister zahawm tak khan, nangma rawn move turin nge a kal ang a, tunge kan tih dawn? 'Any member' a ti a, modified form khan. Tunge ni dawn? (**Pu Lalchamlia, Home Minister:** Pu L. Thangmawia, Secretary kha a tha ang)

Awle, kan resolution neituin a rawn win-dup hunah rem a ti thei a, a rem tilo thei bawk a. Khami hma khan amend an duhdan te rawn thlen turin, Member zahawm tak Dr. L. Thangmawia ka sawm e.

PU L. THANGMAWIA : Pu Speaker, ka lawm e.

Hachhek bialtu MLA zahawm tak Pu Lalrindika Ralte Resolution “*Kan ram thenawmte atanga sahimna zawnga rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih chu, Pu Speaker, tuna thil awm tawh dan te han enin leh, Member zahawm tak tak ten vawiina an sawiho dan atangte, sorkar chauh ni lovin, a khawtlang - NGO te, kohhran te, Zoram mipui ina kan lo dawnsawn zawk a nihna lai tam tak te a awm avangin, Pu Speaker, resolution puluttu in min remtih sak pawh kan dil a, heti hian amendment, i remtih nain he House zahawm takah hian ka rawn move e –

“Kan ram thenawm Myanmar leh Bangladesh atanga sahimna zawnga kan unau raltlana lo kal te Mizoram sorkar leh Zoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin, an awmna tur leh an mamawhte ngaihtuah zel ni se kan ti” tiin ka rawn move e, Pu Speaker.

SPEAKER : Awle. Hei, kan lungruual khawp a, a copy hi min rawn pe sa a; tlang deuha sawi a tha a. Tin, Member zahawm tak, a resolution neitu hnenah a copy pek a ni tawh em? (*Pek tawh a ni a*) Awle, a lawmawm e.

Tunah chuan, a resolution neitu, Member zahawm tak Pu Lalrindika Ralte kan sawm ang a, sawihona te rawn wind up in, adopt han dil nghal turin ka sawm e.

PU LALRINDIKA RALTE: Pu Speaker, ka lawm e.

Vawiinah hian lawmthu sawi ka duh a. Kan inlungruualna hi a fakawm ka ti a, resolution neitu ka nihna ang pawhin lawmthu ka sawi duh bawk a ni.

Ziaktu pakhat chuan, ‘*Ni naran (ordinary day) hian nun a thup a, harsatna hian nun a tlangzarh thin*’ a ti a. Vawiinah hian harsatna karah hian kan in-unauna leh kan inhmangaihna chu tlangzarhin a lo awm ta a. Tin, kan unau raltlante pawhin lo hria se ka duh chu – “kan ram rorelna sang berah in chungchang kan sawi a, a tawp thlengin in tan kan ding dawn a ni” tih hi a ni. *Mizo hnam hi vul zel rawh se.*

Pu Speaker, ka Private Resolution chu - “*Kan ram thenawm Myanmar leh Bangladesh atanga sahimna zawng a kan unau raltlan lo kalte Mizoram sorkar leh Mizoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin, an awmna tur leh an mamawhte ngaihtuah zel ni rawh*

se” tih a ni a. Hei hi member-ten min pawmpuia, he House-ah hian lungruah taka kan pass tlan turin ka rawn rawt a; chutiang tur chuan member-te pawh ka sawm a ni e. Ka lawm e.

SPEAKER : Awle, hei hi dan dik takah chuan, ‘ni khat tal Secretary hnenah ziaka thlen tur’ tih a ni a. Amaherawhchu, kan dan hian *Speaker* hi a dah lal em mai a, a tawpah, ‘Speaker-in a tidanglam thei ang, a duh chuan’ tih hian a veng zel a, chumi hmang chuan vawiina amendment lo lut hi ka lo pawm a ni.

Kan resolution neitu member zahawm tak Pu Lalrindika Ralte in amendment an rawn dilna te pawmin, a resolution chu adopt a rawn dil ta a, “*Kan ram thenawm Myanmar leh Bangladesh atanga sahimna zawng a kan unau raltlana lo kalte Mizoram sorkar leh Mizoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin an awmna tur leh an mamawhte ngaihtuah zel ni rawh se kan ti*” tih hi adopt remti apiangin ‘Remti’ ti rawh u le. (**Member:** Remti) Awle. Remti lo kan awm em? Kan awm chuan ‘Remti lo’ ti ula. (*Member remti lo an awm lo a.*)

Awle. Member zahawm tak Pu Lalrindika Ralte Resolution “*Kan ram thenawm Myanmar leh Bangladesh atanga sahimna zawng a kan unau raltlan lo kalte, Mizoram sorkar leh Mizoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin, an awmna tur leh an mamawhte ngaihtuah zel ni se kan ti*” tih chu House-in lungruah takin adopt ta a ni. (**Pu Lalrindika Ralte:** Pu Speaker, ka lawm e)

Vawiin hi a lawmawm hle mai; ka hriat ve chinah opposition member-te resolution pahnih ni khata passed awm chhun niin ka hria a. Ram tana kan thawhonaah, rilru hmunkhat pua kan awmkhawmnaah a lawmawm ka tiin, lawmthu ka sawi nawn leh a ni.

Tunah chuan kan chawl leh tawh ang a, Ni 27 February, 2023 (Thawhtanni) 10:30 AM ah kan thukhawm leh dawn a nia.

Sitting is adjourned. (4:35 PM)

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR FOURTEENTH SITTING ON MONDAY, THE 27th FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **PU TAWNLUIA**, hon. Deputy Chief Minister to lay on the Table of the House a copy each of the following :
 - i) A statement of correction on the reply given on 9.2.2023 to Unstarred Question No. 129 ballot No. 65 asked by Pu Lalduhoma regarding “Mizoram Subordinate Services Selection Board”.
 - ii) A statement of correction on the reply given on 10.2.2023 to Unstarred Question No. 204 ballot No. 75 asked by Pu Lalduhoma regarding “Restricted Tender leh Departmental Works”.
3. **PU LALCHAMLIANA**, Minister to lay on the Table of the House a copy of “The Mizoram Scheduled Tribes and Scheduled Castes (Regulation of Issuance and Verification of) Community Certificates Rules, 2023”.
4. **ER. LALRINAWMA**, Minister to lay on the Table of the House a statement of correction on the reply given on 8.2.2023 to Unstarred Question No. 8 ballot No. 13 asked by Pu Lalduhoma regarding “African Swine Fever”.

FINANCIAL BUSINESS

DISCUSSION AND VOTING ON DEMANDS

5. **PU LALRUATKIMA**, Minister to submit to the vote of the House various Demands under his charge.
6. **PU LALCHAMLIANA**, Minister to submit to the vote of the House various Demands under his charge.
7. **PU TAWNLUIA**, hon. Deputy Chief Minister to submit to the vote of the House various Demands under his charge.

LALHMAHRUAIA ZOTE
Commissioner & Secretary

* Please see Bulletin Part-II No. 288, dated the 15th February 2023 for Demands to be moved by Ministers.

SPEAKER : *Felna leh rorelna fel hi a ngaina thin a, Leilung hi Lalpa ngilneihna in a khat a.* - Sam 33:5

QUESTIONS & ANSWERS

Vawiinah hian Dr. K. Beichhua, chhungkaw thil avangin House-ah a lo kal theilo a ni.

Zawhna & Chhanna kan la ang a, *Starred Question* No. 221 - Zawt turin Member zahawm tak Pu KT Rokhaw ka sawm e.

PU K.T. ROKHAW : Pu Speaker, *Starred Question* No. 221, Agriculture Minister zahawm tak chhan atan –

“Siaha District huamchhunga leilet laihna hmunte leh an laih zat hectare min hrilh thei em? Leilet hi laih belh tumna a awm em?” tih a ni e.

SPEAKER : A chhang turin a changtu Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Speaker, Member zahawm tak Pu KT Rokhaw zawhna - *Starred Question* No. 221 chhanna chu:

Siaha distric huamchhunga leilet an laihna hmun leh an laih zat chu – Siasi Village –

(a) Zaupa Zau - hectare 15;

(b) Chauthizau - hectare 5;

Pala (Lawngban) Village - Pawkhi Chava Zau - hectare 20

Lopu Village –

(a) Leisai Zau - hectare 5

(b) Tawlia Zau - hectare 5

A vaiin - hectare 50 a ni.

Tun dinhmunah chuan leilet lai belh tumna a awm rih lo.

SPEAKER : *Zawhbelhna* - Pu KT Rokhaw.

PU K.T. ROKHAW : Pu Speaker, ka zawhbelhna chu - Siaha district ah hian leilet hi department lam pawhin theihtawp an chhuah a. Tin, Siaha District - Food Security Consultative Committee hnuai ah leilet hectare zau tak mai kan lai ve bawk a, mahsela, tuikawng kan neih that loh avangin leilet kan laih sa te anih tur ang a ni thei lova, Chuvang chuan, kan Minister khan leilet kan laithar te tuikawng hi min siamsak thei em?

Tin, kan laih tawh tui thatnaah pawh hian a lei lehna tur tractor kan tlachham em em mai a, heta hman tur tractor min pe thei ang em?

Tin, zawhbelhna hun dang ka neih tawh dawn loh avangin, pakhat leh chu - Financial year kal mek 2022-23 ah hian Tipa RD Block ah NEC sum vaibelchhia 5 hmangin trade hrang hrang tan development hnathawh a niin ka hria a. Tin, Land Development sum pawh leilet laihna atan hman a niin ka lo hria a. Hei hi Agriculture Department hian a hria em? An hriatpui anih chuan - hectare engzah nge laih anih tawha, sum engzah nge an hman tawh?

SPEAKER : *Zawhbelhna* - Member zahawm tak Pu Zodintluanga Ralte a phar hmasa ber e.

PU ZODINTLUANGA RALTE: Pu Speaker, ka lawm e. Ka zawhbelhna chu –
 i) Champhai leilet zawla kudam an sak, Champhai DC-in thiat tura order a pek kha, thiah a ni ta em?
 ii) Lungsen Agriculture office-a staff te hi engtikah nge Lungsen-ah hnathawk thei tura dah an nih theih ang?

SPEAKER : *Zawhbelhna* - Pu C. Lalsawivunga.

PU C. LALSAWIVUNGA : Pu Speaker, ka lawm e. Ka zawhbelhna te chu –
 i) Kum 2021-22 leh 2022-23 chhung hian lo, *thali* chingtute tana tanky siamna tur sum engzat nge dah anih?
 ii) Chung atang chuan tanky siam a awm em? Awm ni se, khawi hmunah te nge? Engzat nge?

SPEAKER : Chhang turin a changtu Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Speaker ka lawm e. Zawhna neitu kan MLA zahawm tak zawhbelhna chhanna chu - Irrigation & Water Resources Department ah hian, tuna Land Development kan tihthar ho hi kan chhui deuh zel a, a hlui kan cheithat rual hian. Hei pawh hi tihmakmawh a ni a, kan lo enzui turah ngai ila.

Tin, tractor chungchang kha - Siaha lam hi, Pu Speaker, tractor kan pe nual tawh a, amah pawhin a hriai ka ring a; a tul ang zelin kha pawh kha kan lo enzui ang e.

Tin, RD Block hmanga Land Development tih erawh kha chu, keini department lam hian kan hre mang flat lo mai a, ka chhang mai thei lo ni se.

Thorang bialtu MLA zahawm tak Pu Zodintluanga Ralte zawhbelhna kha - Khilai khi kan chai reng a, leilet hmuna hmunhma dang han invalh a hi kan remti chiah lova, Agri thlirna zawn atang chuan, hei kan CM pawh hian min ngaihpaawimawhpui thin a.

Tin, a bialtu pawhin a ngaipawimawh a, hemi chungchang ngaihtuah hian kan thu thin a. Action an lak zui dan hi chuti mai chuan ka chhang thei lova, kan lo enzui ang e.

Tin hei Lungsen BAO chungchang hi Pu Speaker hei re-structure kan han ti a, block-manner in kan kal chho a. Rin aiin tun sorkar kum 2-3 chhung pawh hian pension an tam em em mai a, kan Agriculture officer te indaihlohna a nasa khawp mai a. Lungsen BAO pawh hi Tlabung lam nena kaihkawp kal zel anih chen a awm a; khulai khu a pawimawhna lai pawh a awm a, potential kan neihthatna hmun te a ni a. Tun dinhmunah hian indaihlohna avangin dah belh theih dan tur leh, changtlung taka han tih zel theih dan tura kha chu ka sawi mai thei lova. Amaherawhchu, thawktute lak belh theih dan a awm chho a nih chuan, chung chu kan lo enzui ang e.

Tin, kan Member zahawm tak Pu Sawivunga zawhbelhna kha a relevant lutuk lova, engpawh nisela, zawhbelhna emaw, zawhna han siama hi a thiang vek a. Tanky siamna chungchang a ni a, tun maiah chuan information ka pe thei lova. Kan lo enzui ang a, atul angin a chhanna te pawh kan inpe leh turah ngai ila a tha ang e.

SPEAKER : *Starred Question* No. 222 - Zawt turin member zahawm tak Pu Lalduhoma ka sawm e.

PU LALDUHOMA : Agriculture Department Changtu Minister zahawm tak chhan atan ka zawhna chu –

- a) SEDP hnuaia vaimin chi qtl 3000 chin tir atang khan engzat nge an thar?
- b) Vaimin tharte chu sorkar-in a leisak em? A leisak chuan -
 - i) Qtl. engzatnge a leisak?
 - ii) Engzat rate-in nge a leisak?
 - iii) A leite chu engtingnge an tih tak zel?

SPEAKER : Chhanga turin a changtu Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Speaker, Member zahawm tak, kan Opposition Group Leader Pu Lalduhoma zawhna chhanna chu –

- a) SEDP hnuaia vaimin chintir atangin mt 19,085 tharchhuah a ni.
- b) Vaimim tharte hi sorkarin a theih ang ang a lei sak.
 - i) Qtl 1094.61;
 - ii) Qtl 533.19 hi 20/kg in Serchhip leh qtl 541.42 hi 24/kg in Tanhril hmunah leisak a ni.
 - iii) Sorkarin vaimin a leisakte hi ranchaw siamna atan hman a ni.

SPEAKER : *Zawhbelhna* - Pu Lalduhoma.

PU LALDUHOMA : Pu Speaker, vaimim chi man te a to a, tharchhuah a tam vak lova, thil hlawk lutuk lo niin a lang a. A pawimawh ber chu a market hi a ni a.

Hei vawkvulh te pawh hian State pawn atang hian man man deuhin vaimin hi an chah thleng thei reng mai a ni. Chuvang chuan, kan inchintir dawn anih chuan, support price te nena tan loh chuan, a chingtute tan a hlawk tak tak lova. Tunhnu zelah heti hi chuan open market pawh kan compete pha tak tak chuang lo a ni a. Chuvang chuan, support price te nena tanga, a chingtute hlawk theihna tura hmalak tum a ni em?

Tin, *bird-eye chili* hi Thingsai-ah te an ching nasa a, a video te kan lo hmu a. Khaw engzatah nge hei hi chin anih? Chhungkaw engzat velin nge chinga, engzat vel nge a tlangpuiin kan tharchhuah ve tawh? Mizo-hmarchate dik tak kha a ni a; hei hi patent theih a ni em? Patent tura hma lak a ni em? Tunah hi chuan a thartute hi vai-sumdawngah an innghat a, vai-sumdawnga innghat lo hian sorkar hian lo leisakin, thla 2-3 vel lek han nghahpuia, a rate sang zawka hralh theih pawh a ni a. Vai-sumdawnga innghat ringawt lova ruahmanpui dan a neih thei ang em?

Tin, *bird-eye chili* rau rau ah pawh hian organic leh organic lo te a awm a, heng hi a hralh lehna lamah hian a rate hi a inthlau tak tak em? Organic hi a buaithlak a, a rate nena han ngaihtuah hian buaipui tlak a ni chiah em? Nge ni, organic lem lova kan tih hian kan farmer te an hlawk zawk mah em? Heti lai hi chiang deuh hlekin min hrilhfiah thei se ka lawm hle ang.

SPEAKER : Zawh belh nan minute 4 a hmang a ni. Tunah chhang turin a changtu Minister Pu C. Lalrinsanga i lo sawm ang.

PU C. LALRINSANGA, MINISTER: Pu Speaker, kan Opposition Group Leader Pu Duhoma zawhbelhna kha – Nia e, kan vaimin chin chungchangah hian thar tlem kan inti deuh te pawh a ni mai thei a. Amaherawhchu, department thlirna zawnah chuan, kan hlawk hlein kan hria a. Helaia kan rawn tharchhuah hi a Qtl/MT zawng chuan, thingtlangah kan hman tangkai dan hi - SEDP atangin a herna khawl te kan han pe a, a nuaitlakna khawl te. Chunga tangkai zawka an hman dan kan han hmuh hian, chhunzawm zel tlak ni ah pawh kan ngai a. Tin hralh-sum han ti ila, a leisak theitu Tanhril lamah te an awm a, englai pawhin an lei sak thei a.

Ni e, phai lam atang pawhin a tlawm deuh zawk pawha lei theih chu a ni teh meuh a. Amaherawhchu, helaia kan tharchhuah ngei leh khulama Animal Feeds atana vaimin an lakchhoh te nena han khaikhin chuan, kan ram tharchhuah ngei hi chu a ngeih pawh a ngeih a ni tih kan chiang a. A bial Serchhip-ah khian vaimin herna khawl kan nei a, khilaila kan Animal Feed Plants-ah khian vaimin leh bekang bakah, a ingredient atan chengkawl-dip kan hmang a, thil dang pawh kan telh hlek ni chuan ka hria a. Kha kha phai lam atanga feed lo chho nen an pe dun ta a. Vawk-note khan kan Animal Feeds

Plants atanga kan siamchhuah kha a letin a ngeih tlat mai a ni; a than pawh a thang tha. Chu chuan a entira chu - Animal Feeds phai atanga kan lakchhoh te pawh hi 'a chakna a tlem tawh ang a, chungte chu a thatlohpui a ni ang a' tih te pawh kan ngaihtuahnaah chuan a awm a ni.

Engpawh nisela, price-support chungchanga kan hmalaknaa bul kan han tan khan, central-ah pawh kan han thlen a, khulama price-support pek theih an inbeisei thu te pawh min han hrilh nawk nawk a. Amaherawhchu, a procedure kha a buaithlak deuhna lai a awm a. Helaia kan tharchhuah te nena han entawna, khatia han chawhkual ngai em tur kha kan tharchhuak lova. Tunah pawh hian Tanhril-ah a thleng hleitheih lova, kan tharchhuah reng reng hi thingtlangah a inpawt-ral ve a, ranchaw atan an hman deuh vek avangin a hralhna hmun pawh a rawn thleng pha lo kha a ni a. Engpawhnisela, a thar te hi han tam deuh hlek sela, price-support te pawh mumal taka kan kalpui theih te pawh kan ring a ni.

Tin, bird-eye chili kha hi kan patent tawhin ka hria, tunah hian. Hei Mizo-Puanchei kan tih hi kan GI tawh a, bird-eye chili pawh hi 'patent' ni lovin, kan GI tawh a. 'GI-Geographical Indication' tih zawngin kan lam tawh a, tunah chuan. Chuti rual chuan, tunah hian a hralhna chungchangah hian thil pakhat House ka han hrilh duha chu -USA atangin he MOVCDNER hnuaiyah kan hmarcha tharte lei an duh a, amaherawhchu, US hi rin aiin a duh khirh a. MOVCD hnuaiyah Siaha, Lawngtlai, Lunglei tea kan tharchhuah mt 8 kha USA in lei a duh a. Amaherawhchu, an lei dawn chuan, organic anih leh nihloh kha chian a ngai a, chumi tichiang tur chuan a sample kan la thla a, Bangalore-ah. Kan han test a; a nihna takah chuan Pu Speaker, vawikhat an test a tlang tawh chuan, a leh pek zelah test nawn ngai chiah lo khan an la zel ni tur a ni. Chuvang chuan, an test kha a hlawhtlin ngei theihna turin kei pawh ka tawngtai a ni.

Chutiang chuan kar hmasa khan an test result a rawn chhuak a, 'organic a tling' tih hmuh a ni a. Chu chu reilo teah saw lamah kan khawl sa mt 8 kha kan sorting hnuah tlahniam leh hlekin mt 7.5 chu tun Session zawhah hian kan vailiam thei turah kan ngai a. Hei hi thil lawmawm tak a ni a, kan hma hun kal zel turah hmun danga hmarcha chingte tan pawh, ram lian leh hausa USA-a thawn tura ruahmanna kan han peihfel mai hi, kan tih mai pawh ni lovin, Pathian hnathawh niin ka hria a, ka lawm khawp mai.

Tin, sorkarin ruahmanpuina a neih chungchanga a zawh belhna kha - Sorkar hian a rate leh thil dangah a inrawlhna anih chuan kawng lehlamah buaina chhuak ve thei tho mai a. Chutih rual chuan MOVCD hnuaiyah hian service provider te kaltlangin FPC (Farmer Producer Company) tuna kan han sawi mek ang chi pawh hi an thar chhuah a ni a, heng ho hian link tha tak mai an neih theih zelna tur kawng a inhawng dawn niin kan hria a; sorkar ina kan zuk puih chian ngai lo turin. Heng FPC-te hian outsource tur hi chu an hmuh zel theih te pawh ka beisei a. Chuvang chuan, kan hmalam pawh a eng

ang reng viauin ka hria, hmarcha bikah pheh hi chuan. Khangte kha ka chhan theih ni mai teh se.

SPEAKER : *Starred Question* No. 223 zawt turin Member zahawm tak Dr. ZR Thiamsanga ka sawm e.

DR. Z.R. THIAM SANGA: Pu Speaker, ka lawm e. Agriculture Minister zahawm tak chhan atana, ka zawhna chu - *Starred Question* No. 223. Ka lawm e.

SPEAKER : A chhang turin a changtu Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Speaker, Member zahawm tak Dr. ZR Thiamsanga zawhna chhana chu –

- a) Khawlailung-a modern jaggery siamna tur Jaggery Shed sak zawh tawh a ni a. Kan Home Minister bial chhunga mi niin, a khawl pawh bun fel tawh a ni a. Tunah hian trial run nei tura hmalak mek a ni a, tun financial year chhung ngeia commission tum a ni. Kar hamsa pawh khan, Pu Speaker, khi laia kan tihchhuah VDVK-ho ina an tharchhuah kan inpek den den tawh kha.
- b) Tlangram lo neih tih hmasawn nan hian Agriculture Department chuan Externally-Aided Project (EAP) hnuaiah “Fostering Climate Resilient Upland Farming System in the North East (FOCUS) chu district paruk (6)-ah a kalpui mek a ni.
- c) Focus project hian component hlawm lian deuh deuh pathum neiin, heng zingah pakhat chu - tlangram lo-neih tih hmasawna tur (Improvement of Jhum Cultivation) a ni. Hemi hnuaiah hian tlangram lo neih tih hmasawn nan FOCUS, district hnuaia khaw sawm hnih (20)-ah Integrated Farming System (IFS) kalpui a ni dawn a ni. Tunhnaiah Senram Zau, Hualtu-a kan laih tawh pawh media-ah a lar angreng khawp mai a. Heihi IFS kan kalpui dan tur model-a ni tih kha kan sawi lang ni se la.
- d) Edible oil (ei-tel) tharchhuah kawnga hmasawna kan neih theih nan Agriculture Department chuan Centrally-Sponsored Scheme pahnih a kalpui mek a, chungte chu - National Food Security Mission Oilseeds (NFSM-Oilseeds) leh, National Mission on Edible Oil-Oil Palm (NMEO-OP) te an ni. Heng scheme pahnih bakah hian Edible Oil lama kan intodelh theih nan hian RKVY atang pawhin hmalak mek a ni bawk. Tunah hian, Pu Speaker, Falkawn ah sawn Bekang hriak herna khawl kan sak tir mek a, chu chu kar loah khawl nena inbuna her mai theih tura buatsaih mek a ni. Ka lawm e.

SPEAKER : *Zawhbelhna* - Dr. ZR Thiamsanga.

DR. ZR. THIAM SANGA : Pu Speaker, ka lawm e.

Kan Agriculture Minister hi agriculture lamah hian a tui hle mai a. A thawhpui department-te nen hian national huap pawhin Mizoram min ti hmingtha hle a ni. Kum 2021 khan Good Governance Index – Agriculture and Allied Sector in Hill State category-ah lawmman pakhatna Mizoram-in kan lo dawng tawh bawk a. September 14, 2022-ah Indian Agriculture Minister C. Narendra Singh Tomar-a'n Outlook AgriTech & Summit Award, 2022-ah Best Performing North East State in the field of Agriculture hlan a lo ni tawh bawk a ni. An chhuanawm hle a ni.

Nichinah khan a rawn sawibelh nual tawh nain, ka zawhbelhna chu - “Intergrated Farming System (IFS) hi engtik atangin nge Mizoram-ah kalpui tum a nih” tih a ni. Ka lawm e.

SPEAKER : *Zawhbelhna* - Pu Zodintluanga Ralte.

PU ZODINTLUANGA RALTE: Pu Speaker, ka lawm e.

Kum 2022-a raw-nal tam avanga sazu in buh leh bal a tihchhiat kha, a bik takin Dengsur khaah chuan Agriculture Department-in report pe turin a ti a. Agriculture Department-ah report thlap a ni naa, tunthlengin a chanchin hriat a la ni lova. A khua a mite hi tanpuina pek tur nge; engtin nge sorkarin hma lak a tum?

SPEAKER : Chhang turin a changtu Minister ka sawm e.

PU C. LALRINSANGA, MINISTER: Pu Speaker, zawhna neitu Member zahawm tak Dr. ZR Thiamsanga'n IFS chungchang a zawhbelhna kha - tunah hian kan tan mek e.

Tin, he thila ka han sawi zau duha chu - IFS kan tih hi ‘Integrated Farming System’ a ni a. FOCUS lam hotute, tuna kan kal dan phung hi duhthu a sam tawk loa kan hriat avangin, a funding titute hnenah ‘pattern dang, model dang deuha kalpui ni se’ tiin kan thlen a. Chutah chuan chuan 3 tier system - chherchhuan thum ni se, a chherchhuan hnuai ber kha terrace a ni ang a, a dawtah cash crop leh thil dang dang chinna hmun kan invalh ang a, a chung ber erawh kha chu a ngaw ngei ngei tur a ni. Chumi ngaw siamtu atan pawh chuan productive plants, (sum chang) thei leh thlaiin kan tingaw ang a. Chutiang chuan kha three tier kha productive deuhin a kal thei dawn a ni. Chu chu IFS-in a tum a ni a. Tunah hian cluster based-a kalpui tum mek a ni a, hmun rem leh hmun zawl, tui tamna hmunah khatiang khan kan inkhungkhawm ang a, a lo berah mi 50 atanga a tam lam kha rawt dan chu a ni a. Amaherawhchu, kei tak hi chuan a tlem lam kha la ni thei se ka duh deuh a. Chutiang chuan, hlawhtling takin cluster manner-a kan kal theih dawn chuan kan hlawhtling thei turah kan ngai a ni.

Member zahawm tak Pu Zodintluanga Ralte zawh belhna – raw-nal tam avanga Dengsur khua ten harsatna an tawh chungchangah hian, hei rodent vanga harsatna kan neihte hi eng emaw chen chu report te kan han lakhawm ve thin a. Tin, ruahtui leh tui lian ina a tihchhiat te pawh a hranpa taka keimahni fund position atanga han meet theih ngaihna a awm mai lova, central lamah te pawh kan thlen a. **(Pu Zodintluanga Ralte:** Pu Speaker, Agriculture hi ‘mipuite intodelhna atana pawisa engmah nei lo, deptt. ah pawh thawktu nei lo’ an ti a, a thenin, ‘SEDP atangin mi sangkhat chuang sorkar hnathawk kan ruai thei’ an ti bawk a. Kan financial system thalo, Chief Minister tlawn ve theilo tan chuan a lak ve theihloh a, a buaithlak a nih hi.) Ngawi rawh, khalam chu thuhra a ni a. **(Pu Zodintluanga Ralte:** ‘Pawisa a awmlo’ i ti zel si a.) Pawisa a awm leh awmloh chu, Ni e, a dik tho a. Amaherawhchu, heng harsatna kan tawh hian State-ah khatiang fund provision kha a awm mai loh avangin leh, a nawlpui deuh leh a tam tham te a lo nih bawk si avangin, central lamah a tawlh theihna a awm tho avangin ...**(Pu Zodintluanga Ralte:** Pu Speaker, SEDP atang te khan helaiah mi harsa te chu min pe ve mai rawh se, SEDP te kha dil ve mai rawh. Midang pawn an dil a, an hmu a; thlai tihchhiat te kha chu min pe ve mai teh se). Engpawhnisela, Dengsur maiah hian harsatna an tawh lova, hmundangah pawh an tawh tho a; rodent in min beih lai pawh khan kan han ti a, central lamah te pawh kan han theh thla a. Amaherawhchu, hetiang hi kan nawr zui tho chung pawhin kan hmu leh mai thin lo a ni. Engpawhnisela, Member zahawmtak ina harsatna tawhna, ka bial thenawm a ni bawk a, tih dan kawng a awm thei te pawh kan lo en ang chu.

SPEAKER : *Starred Question* No. 224 zawt turin Member zahawmtak Pu Lalrintluanga Sailo kan sawm e.

PU LALRINTLUANGA SAILO: Pu Speaker, ka lawm e. I vei lama mite hi i ding lama mite aiamah hian SEDP-ah an lo tuiin ka hria a, a lawmawm hle a ni. Agriculture Minister zahawmtak chhanna atana ka zawhna te chu: -

- a) Mizoram khaw lian zual deuh deuha fertilizer retailer sorkarin dah a tum kha engtikah nge sorkarin a tihpuitlin theih ang?
- b) Agriculture Department hian Agriculture link-road siam/laih tumna a nei em? Nei nise, engtikah nge hna tan a nih theih ang?

SPEAKER : A chhang turin Agriculture Minister zahawmtak Pu C. Lalrinsanga ka sawm e.

PU C. LALRINSANGA, MINISTER: Pu Speaker, ka lawm e. **(Speaker:** Vawiin chu ding chhen mai teh). Member zahawmtak, Pu Lalrintluanga Sailo, Dampa bialtu zawhna *Chhanna* chu: -

- a) Mizoram khawlian zual deuh deuh a fertilizer retailer sorkarin dah a tumna hi theihtawpa hmalak mek a ni a, a rang thei ang bera peih fel tum a ni.

- b) Agriculture link road laihna atan fund hi tun dinhmunah a awm loh avangin, laih tumna a awm rih lo a ni.

Ka lawm e.

SPEAKER : *Zawhbelhna* - Member zahawmtak Pu Lalrintluanga Sailo.

PU LALRINTLUANGA SAILO: Pu Speaker, Agriculture Department ina fertilizer retailer kan ram khaw lian deuh deuha pek min tum kha a lawmawm hle a. Hei hi thil la awm ngailo a ni a; keini thingtlang khaw tan phei chuan a lawmawm lehzualin ka hria a. Chuvangin, hun delay lo deuh hlek hian hma chak takin min laksak se ka ti a ni. Ka zawh belh duh chu –

Agriculture link road hi sorkar sum harsatna avanga tih a lo harsa deuh a nih pawhin, ka bial West Lungdar lamah hian tlawhpawh loh Tuphai ram tha zau tak mai, chhungkaw 100 chuang zet mai leileta eizawna hmun tha tak, potential area kan nei a. A tlawhpawhna tur kawng hi km 15 vel angin kan survey tawh a, hei tala hi tun sorkar kum tawp lamah hian hma min laksak thei ang em?

SPEAKER : *Zawhbelhna* - Dr. Vanlalhlana.

DR. VANLALHLANA : Pu Speaker, ka lawm e. Agriculture Department Minister zahawmtak changtu chhan atan ka zawhbelhna, fertilizer chungchang –

i) Urea Fertilizer hi bag khat ₹4,000/- bawr velin sorkarin a siam a, subsidize rate ah hianin ₹265/- bawr velin Bairabi point ah hralh leh a ni a, hmun danga an hralhnaah hian transport subsidy an dawng vek bawk a ni. Kan dealer te hian a man inanglo furin an hralh a, hemi chungchangah hian MRP inangin Mizoram chhungah a kal man sorkarin a tumsak leh vek si chuan, MRP inang hi hman tumna a awm em?

ii) Central atangin allotment kan dawng tha khawp mai a, lo neitute erawh chuan an dawng tlem thin si hi ngaihtuah ngai tak a ni a. An hralh chhuah hian POS ration kan laka kan nem kai ang deuh hian, Aadhar base, Lok Sabha zawhna chhannaah pawh ‘Aadhar-based Buyers Account’ tih a awm a ni. Chu chu kan Minister zahawm tak hi naktukah a demand sawi a ni dawn a, POS record - Serchhip leh Lunglei emaw tal hi chu thla khat chhungin inpek dan a awm ang em? ‘An lo hralh tak tak em; an dawng tak tak em?’ tih hi mipui ten kan hriat angaiin ka hria a. Chu chu kan Minister zahawmtak hian Memberte min pe thei ang em?

iii) Farmer te kutah a kal tlem lutuk a. Kan hre theuh awm ang a; Khawchhak lamah a tlan chho chur chur a, a farmer zawk ten harsatna kan tawk leh si a, hei hi kan Minister hian, ‘titawp turin, hma kan la ang e’ tiin assurance min pe thei em?

SPEAKER : *Zawhbelhna* - Pu Nihar Kanti Chakma.

PU NIHAR KANTI CHAKMA: Pu Speaker, Indo-Bangladesh Border fencing avangin ka bialah leilet tamtak a chhia a, Agriculture Department atangin kan verify tir a. A lan danah chuan hectare 384.9 a tichhia a ni. Verified zingah hian Tiperaghat, Khojoysuri, Tablabagh leh Kalapani te chauh an tel a, Silgur leh khaw dang eng emaw zat a tihchhiat zingah hian an la awm a. Pu Speaker, ka zawhbelhna chu –

“Heng lui tuite hi Agriculture Deptt. hian a tifaí thei ang em?” tih a ni.

SPEAKER : Chhang turin Agriculture Minister zahawm tak Pu C. Lalrinsanga i lo sawm ang.

PU C. LALRINSANGA, MINISTER: Pu Speaker, ka lawm e.

Zawhna neituina a rawn zawh belhna kha, a link road taka kha a sawi lo na a, kei chuan ka hre mai a, ‘Artetuidam’ tih niin ka hria. A ngaipawimawh a, hei hi vawi tam a rawn thlen tawh a.

Ni e, link road dilna hi a lo kal chum chum mai a, Directorate lamah te kan han vawm thla a, a then sum kan neih theih ang ang NABARD funding leh thil dang remchang RKVY atang te pawh hian kan han bel a, eng emaw chen hi chu kan han accommodate thei a. Amaherawhchu, link road mamawh em em lai hi a buaithlakna lai a ni a. Engpawhnisela, a zawhna neitu ina a ngaihpaawimawh hi, ‘kan lo enzui ang; tih theih dan te a awm em?’ tiha kha ka chhanna ni sela.

Tin, Member zahawmtak Pu Mathlana zawhna kha a pawimawh khawp mai a. Fertilizer MRP a sawi kha a dik chiah lo deuh em aw ka ti a. Tuna a rate ah hi chuan 500/- leh tih vel kha a niin ka hria a, a chiah kha ka sawisual ang tih chu ka hlau a. Eng pawh ni sela, fertilizer movement hi he House-a ka sawi duh chu, buaithlak deuh lai hi a awm a. MOVCD (Mission Organic Value Chain Development Programme) hi kan Prime Minister-in North-East bik tana a ngaihpaawimawh avangin tihian mission/hna kan kalpui mek a. Nichina kan ngaihthlak ang khan, kan thlathar te ‘organic’ nia ngaih anih lai khan, ‘inorganic’ kha sem ngaih a ni tho mai a. Amaherawhchu, a cover area, hmunhma a inan lohna laia kha a danglam theihna chu a ni mai a. MOVCD hnuaia kan FPC te hi chuan kan FIG te hi hmun benbel bik an nei a, khalai kha an humhalh reng a. Thil dang, chemical fertilizer te lalut lo tura vengchunga hma lak te pawh a ni tho a. Engpawh ni sela, fertilizer rate chungchang hi chu kan lo en anga.

Tin, allotment hi sorkar hian kan dawn tawh loh lai hi chu beng chuan kan han hria a, ziaik ni chiah lovin. Tin, a movement hrim hrim hi kan hre chuang bawh lova, amaherawhchu thu kan hriat te pawh a awm bawh a, zep thu a cheng lova. Hetiang anih avang hian tunah pawh fertilizer retailer, vawiina zawhna rawn siamtu Pu Rintluanga Sailo pawh ina a vei em em hi tluantling taka, tuna Pu Mathlantea’n duhthusam a rawn

neih ang kan hlen theihna tur atana ruahmanna a ni a. A awmzia chu, tunah hian BVFCL hnuaiah fertilizer wholesale dealer mi 24 an awm a, hengte hian retailer an nei theuh a. Amaherawhchu kan ngaihthlak tak ang khan, ‘kan farmer te a thlenglo’ tih boruak te pawh kan lo hre feih feih a. Chuvang chuan, wholesale dealer-te pawh koh khawmin, tichuan retailer thar mi 62 lai mai ruahmanna tunah hian kan kalpui a. Heng ho hi *form O* kan siam sak ang a, form O chhungah hian form A1 leh A2 tihfel ngaite a awm a, chumi hnuah chuan POS (Point of Sale) machine company atangin retailerte hman turin ruahmanna kan kalpui ang a. Tin, IFMS-a register anih hnuah retailer te hian POS hmangin an khaw chan theuh kan siam, khang mi 62 te an khaw chan theuhah khan sem kan tum a ni. Chutiang zawng chuan, zawhbelhnaa duhthu in sams anga kha tuna kalpui mek kan tum dan a ni a. Tum dan pheih chuan he hmalakna hi thil dang eng emaw neuh neuh tih ngai a awm avang khan, duh angin kan che chak thei lova, naktip maiah hian heng hmalakna pawh hi kalpui kan tum a ni.

Tin, member zahawm tak Pu Nihar-a zawhna kha, hei hi kan inzawt tam angreng khawp mai a, Pu BD Chama pawhin a rawn zawt tawh a. Hei hi a veiawm a, nikum hmasa khan kan DAO te pawh kan zu survey tir a, eng chen chiah nge a submerge, he Indo-Bangladesh fencing in a dila kha, khulaiah leilet tam tak tihchhiat a nei a. Tuna bialtu zahawm takin a rawn sawi ang khan, harsatna an tawh a ni. Hei hi kan ngaihtuah a, tunah pawh hian a ngaihtuahtu pawl bik, central lama zu thlen thei tur ang zawnga hma la te pawh an awm a khang ho kutah khan eng emaw chin hi chu han dah pawh ka nei a. Helai keimahnia kan tih theih ang chin chin chu department pawhin kan ti kal tho a. Amaherawhchu, helaia construction work neitute, helaia hmalatu tena anmahni avanga hetiang harsatna thlen anihnaah, eng emaw provision central ah (hei hi law court a ni mah zawk a) hma la te pawh an awm a. Engpawhni se la, helaia harsatna kan tawh hi chu kan lo enzui zel ang a, ‘engtianga action lak tur nge’ tih te kha kan lo ennawn leh dawn nia. Pu Speaker, ka lawm e.

SPEAKER : *Starred Question* No. 225 zawt turin, Member zahawm tak Dr. ZR Thiamsanga ka sawm e.

DR. ZR. THIAMSANGA : Pu Speaker, ka lawm e. Kan Home Minister zahawm tak chhan atan ka zawhna chu –

- a) Champhai DIG (Eastern Range) hi a quarter luaha office kal ngei tura hmalakna a awm em?
- b) Hnahlan Police Station hi engtikah nge bul tan anih theih ang?

SPEAKER : A chhang turin Home Minister zahawm tak Pu Lalchamliaana ka sawm e.

PU LALCHAMLIANA, MINISTER: Pu Speaker, ka lawm e.

Tun tum session hi kan vannei nge kan vanduai ka hre lova, Thawhtanni ah Home Department zawhna hi chhan tur a ni a. Ni 13 ah budget present a ni a, Ni 20 kha *State Day*, sorkar chawlh a ni leh bawk si a, vawiin chauh hi Home Department zawhna lo lan ni a ni a. Kan member zahawm tak zawhna ang deuh chiah hi member zahawm tak Lawngtlai West bialtu pawh khan a zawt bawk a. A chhanna chu –

- a) A awm rih lo.
- b) Sorkarin hma a la mek a, bul tan a nih hun tur sawi theih a ni rih lo.

SPEAKER : *Zawhbelhna* - Dr. ZR Thiamsanga.

DR. ZR. THIAM SANGA : Pu Speaker, ka lawm e.

Hei, kan hriat angin Mizoram hian ruihhlo hi kan buaipui ber a ni ta a, a hluar ta hle mai a. A bik takin Indo-Myanmar border lamah Hnahlan khi damdawi lam tawlh rukna hmun pawimawh tak a ni a. Chuvang chuan, Hnahlan-a Police Station awmlo hi, ‘awm ngei se’ tiin session tin hian ka lo auchhuahpui tawh a, a pawimawh si a. Tunlai kan ram hmasawn zelna tur leh thangthar zel te tan pawha nakina la pawl tur chu ‘ruihhlo’ hi a ni a, hei hi kan dan chah a ngai khawp mai.

Theihtawpin Champhai Police Station atang tein an han bei thin a, amaherawhchu a va hla a, border a ni a, a kalpawhna khi a tam em em mai a ni. Chuvang chuan, tunah khan kan ngaithla a, hma min laksak tawh a. Ka zawhbelhna chu –

- i) Police Station hi min dah sak theilo anih pawhin, Police Outpost tal hi chu kan Home Minister zahawm tak hian min dahsak ngei se; Tin, hei hi min react ngei se ka duh khawp mai a, a pawimawh em avangin.
- ii) Tin, Champhai Police Station hi tihhmasawn tumna a awm em? tih zawt tel bawk a ni e.

SPEAKER : *Zawhbelhna* - Pu Lalduhoma.

PU LALDUHOMA : Pu Speaker, ka lawm e. Ka zawhbelh duh chu –

- i) Hei, Mizoram Home Guard te tan *special leave* ni 30 pek a lo ni ta a a, lawmawm khawp mai a. Hei hi ‘khawl theih’ tih leh ‘khawl theihloh’ tih a inziak lova, kum 3 dana lak thar thin an ni a, Home Guard te hi. Kum 3 chhung kha anmahniin an khawl duh chuan, *earned leave* ang hian khawl theih turin min tihsak thei ang em? Order min siam sak the ang em?
- ii) Tin, Home Guard ah hian bel kai chin hian *rank pay* an nei a, bel kai lo hi chu vawiina lak thar leh kum 30 lo service te pawh kha an hlawh a inang reng mai a, hei hian discipline a khawih tlat mai a. Chuvangin, a junior ten, a senior zawkte an zah theih nan eng *allowance* emaw tal pek dan awm se a thain ka ring a. Tin, kan Police te *allowance* hrang hrang tihpun pawh helaiah kan sawi fo thin a, hmalakna hi a chaklo hle mai a. Heng zingah hian allowance a eng emaw tal tih pun tumna hi a awm em?

iii) Chutih laia tun Inrinni khan 5th IR Battalion-a kan Police 50 zet mai te Airport phiat fai tura an tir ringawt mai kha, kan Police Force te zah-lohna niin ka hria a. Heng hi Mizoram-ah pawh kan la hre ngai lova, State dangah pawh kan hre ngai lova. Airport hi a tawp lutuk avangin hman ni lawk khan a tifa turin Salvation ho an hnatlang tawh bawk a. A tibawlhhlawhtute kha thentir mai tur a ni a, a nih loh pawhin, hlawhfate pawh rawih mai tur a ni a. Chuvangin, ‘Police te hetia chhawr hi thil dik a ni dawn em ni?’ tih kha ka han zawt tel bawk a ni.

SPEAKER : *Zawhbelhna* - Er. H. Lalzirliana.

ER. H. LALZIRLIANA : Pu Speaker, ka lawm e. Ka zawhbelhna te chhan awl tak tak tur a nih hmel a, chungte chu –

i) Lengpui Police Outpost sorkarin min han pek kha engtikah nge a function theih ang?

ii) 4th IR Mamit Headquarters khu tih zauh belh, ram lei belh tura ruahmanna awm niin ka hria a. Kha kha engtikah nge lei belha, tih zauh a nih ang?

iii) Mamit DEF hian motor an nei tha lo khawp mai a an area khu a zau si a, hetah Tripura border leh Assam border zawng zawng a ni a. Tin VIP a lo kal pawhin pilot motor tur pawh an nei tha mumal lo a ni. Anni hi ngaihtuah an ngai khawp mai a, motor thar te an mamawh ang hian min pe thei ang em?

SPEAKER : Aw le, zawhnate a karakik hlawm hle mai. A theih ang anga chhang turin Home Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, Member zahawm tak Dr. ZR Thiamsanga han sawilan, “ruihhlo kan ramah hian a ngaihawh; dan chah a ngai a ni” a tih lai kha ka tawmpui khawp mai a.

Tunah hian sorkara thawktu Excise emaw, Police emaw mai ni lovin Central YMA te pawh hian an ngaimawh a, CAD te siamin theihtawp chhuahin hma an la a. Chungte pawh chu ‘a sawt hle a ni’ tih kha ka han sawi duh a.

Tin, chutih rual chuan, kan ram awmna hi - thlang lamah Bangladesh, chhak lamah Burma kan ri a. Myammar lamah chuan a chhak lawkah ‘Golden Triangle’ a awm a. Tin, drugs hi India ramah hian demand a sang em em a. Kan hriat angin, chungte tawlh-rukna kalkawng hi kan ni lo thei si lova. Khap ni chung hian theipatawp chhuahin, lu-chhum, bam-chhum huamin a khawhtute hian an khawih reng a. Hei hi, zawhna neitu member zahawm takin a sawi ang khan, theipatawp i chhuah tlang zel ang u. Sorkar lam chauh nilo, NGO leh kohhran lam te pawhin he kan ram hmelma lian hi ‘theihtawp chhuahin i bei tlang ang u’ tih kha ka han sawi duh a.

Tin, Hnahlan hi a pawimawh kan ti a, sorkar pawhin kan han ti thin a. Amaherawhchu, Police Home Department hian mahni duhthuin Outpost te kan lo hawng thei hauh lo mai a. Police Station chu sawiloh, Beat Post pawh a temporary hi kan hawn theih tawh a lo ni a. Ka thu chu ni se, Hnahlan-ah hian nikum hmasa khan kan hawng daih tawh ang a. Amaherawhchu, GAD phalna a lo ngai a; Finance phalna a lo ngai a; DP&AR phalna a lo ngai a. Chuvang chuan, Outpost hawn chungchangah hian kan thu lo khawp mai a. Tun dinhmunah hian Hnahlanah Police Station hawng turin PHQ atangin Home-ah, tichuan, hetah a concern-ah a file a kal mek a, Ni 22, November khan. A hlawhtlin chuan, Hnahlan-ah khian Police Station hawn ngei kan duh a ni.

Tin, Champhai Police Station chang ni lo, kan Police Station tam ber hi tih changtlun ngai an ni a. Heti lai thil hi sawi chuan a rei dawn lutuk a, ka sawi thui lo mai ang a. Theihtawp chhuahin Police Station tin te tihchangtlun tumna kan nei a ni.

Tin sorkar kumtharah hian SASCI-V atangin Urban Police Housing, Urban bika police housing tihchangtlunna tur scheme hi a lo awm a. Chu chu he mi SASCI - general bakah hian, a bik takin police housing atan theihpatawp chhuah chuh kan tum a. PHQ lam officer te pawhin sawihona te an nei tawh a ni.

Tin, Group Leader zahawm tak Pu Duhoma sawi, Home Guard te ni 30 leave pek khawl khawm chungchang kha - tun dinhmunah chuan khawl khawm theih loh a ni. Kum khat chhungin leave ni 30, Home Guard ho hian an nei ve thei tawh dawn a, an lawmpuiawm khawp a. Khawl khawm theih dan erawh chu, a ke pen a la muangchang deuhin ka ring.

Tin, 'Home Guard te hlawh inang vek; rank nei lo; an service tam pawhin an pay a ngai reng' a tih kha, hei hi tun dinhmuna kan kalpui theih chin tawh a ni a. Home Guard te hlawh hi tun dinhmunah hian a tha ve fu tawh a, an luh tirh phat hian ₹26,000/- vel an la ve tawh a ni. Tichuan, a regular hote leh a rank nei hote hlawh kha tlemin a tha ve deuh a. Tin, an hlawh zahve hi central sorkar tum a ni. Chuvang chuan, 'Home Guard te hi dinhmun tha takah, tun dinhmunah chuan an ding ve tawh' tih kha ka sawi duh a ni.

Tin, Police allowance chungchangah Uniform Allowance - ₹1000/-; Rifle Allowance ₹40/-; thla khatah pek an ni a. Hei hi tihpun kan duh viau rualin, kan ti pung thei lo a ni.

Tin, '5th IR police mi 50 lai Lengpui Airport tifaiin hman an ni' tih hi a dikin ka hria a. Kan hriat theuh angin G20, G20-ah pawh B20 thleng turin India sorkarin minrawn ruat a, keimahni duhthua kan sawm reng pawh a ni lova, minrawn ruat a ni. Tichuan, kawng engkimah inpeih that a ngai a, lan mawi te kan duh ve bawh si a.

Airport-ah khuan Salvation hote thahmemngaiin an hnatlang tawh a, a thawktute pawhin an phak tawkah tihfai hna te an thawk bawk a. Mahse duhthu a la sam loh avangin, Airport tifai tur khan kan sipaite zinga mi 50 sorkarin kaichhan a la a ni. Hei hi Minister ang chuan kan hriatpui chiah lova, G20 Committee-in ‘i sawm ang’ an tih anga an lo sawm niin ka hria.

Er. Zira, Mamit bialtu zahawm tak zawhbehlna kha - Lengpui PS hi sorkar atangin hawn phalna kan nei tawh a, kum 2019 lamah khan. Mahse ‘Covid hi sawi fo tawh teh suh u; chhuanlam a tling lo’ tih kha a ni na a; Covid avang khan sum, Finance Deptt. khan min pe hleithe i lova. Chuvang chuan, vawiin thlengin kan duh angin kan la hawng thei lo a ni.

Tin, 4th IR hian an Headquarters, Mamit, Luangpawl ami khu ‘kan leng lo deuh e; hetah hian ram nuai 50 velin lei belh ila chu kan thawl deuh hak ang’ an ti a, an thehlut a. Hei pawh hi kan la lei thei lo a ni.

PU LALRINDIKA RALTE: A sawi laia ka han sawi tel duh chu, 4th IR Batallion Headquarters hi Mamit, Luangpawl-ah a ni lovin ka hria a. Ni 3.8.2013 khan Rengdil-ah a lung pawh phum tawh a ni a, 4th IR Batallion Headquarters hi. Chu chu, ‘a khawi nge dik zawk?’ tih hi min sawifiahsak turin ka ngen a ni e.

PU LALCHAMLIANA, MINISTER: Pu Speaker, a dik zawk chu ka hre hauh lova, Mamit bialtu leh Hachhek bialtu hian 4th IR Headquarters hi an inchuh a. Tuna a awmna chu, ‘Mamit - Luangpawl a ni e’ tih kha ka chhan thiam dan a ni e.

Tin, Mamit DEF-ah ‘motor tha an nei lo’ tih hi a diklutuk a. Tunhma kha chuan police modernization scheme ah hian motor te lei phal a ni thin a, quarter barrack sak te phal a ni thin a. Mahse kum 6 kal ta vel atang khan an rawn phal ta lova. Kan motor neih te hi a chhe em em vek a, police station tin deuhthawhah hian han kal ila, ‘motor tha deuh hi a awm lawm ni?’ tih te min lo hrih thin a ni a. Hei hi tun dinhmunah chuan kan solve hleithe i lo a ni a, ‘a pawl khawp mai’ tih kha Pu Speaker, ka chhanna a ni e.

SPEAKER : Awle, *Zawhna & Chhanna* hun a tawp a, Pu Nguna kha, a lehpek hawn hram kan tum a nia. Mahse vawiinniah khan ruling ho kha zawhbelhna ah khan ka la lo reng reng a, in phar hmasa si a; pakhat kha kan dah ve hram a. Nakinah demand ah te hun kan pek belh mai ang che aw.

LAYING OF PAPERS

Awle, tunah chuan, *Laying of Papers*-ah kan kal ang a. Kan Dy. Chief Minister zahawm tak Pu Tawnluia, heng-

1. A statement of correction on the reply given on 9.2.23 to unstarred Question No.129, Ballot No. 65, asked by Pu Lalduhoma regarding Mizoram Subordinate Services Selection Board;
2. A statement of correction on the reply given on 10.2.23 to unstarred Question No. 204, Ballot No. 75, asked by Pu Lalduhoma regarding Restricted Tender and Departmental Works

tih te hi House ah rawn lay turin ka sawm e.

PU TAWNLUIA, DEPUTY CHIEF MINISTER: Pu Speaker, i phalna leh House remtihna in heng paper pahnih –

1. A statement of correction on the reply given on 9.2.23 to unstarred Question No.129, Ballot No. 65, asked by Pu Lalduhoma regarding Mizoram Subordinate Services Selection Board;
2. A statement of correction on the reply given on 10.2.23 to unstarred Question No. 204, Ballot No. 75, asked by Pu Lalduhoma regarding Restricted Tender and Departmental Works

tih te hi House dawhkan ah ka rawn lay e.

SPEAKER : A copy kha han sem ula. A copy sem chhung hi a rei thei riau mai a, mi pakhat hi detail leh teh u, a lehpek ah chuan aw; hun a la tam riau mai. Kan chang kim em? Awle.

Tunah Minister zahawm tak Pu Lalchamliaana'n - A copy of '*The Mizoram Scheduled Tribes and Scheduled Castes (Regulation of Issuance and Verification of) Community Certificates Rules, 2023*' hi House dawhkan ah rawn lay turin ka sawm e.

PU LALCHAMLIANA, MINISTER: Pu Speaker, i phalna leh he House remtihna in, '*The Mizoram Scheduled Tribes and Scheduled Castes (Regulation of Issuance and Verification of) Community Certificates Rules, 2023*' hi he House zahawm takah hian ka rawn pharh e.

SPEAKER : A copy kha han sem leh ula. Kan chang kim em? Awle, kan chan kim chuan a dawt lehah kan kal leh ang a.

Minister zahawm tak Er. Lalrinawma'n 'A statement of correction on the reply given on 8.2.2023 to unstarred Question No. 8, Ballot No. 13, asked by Pu Lalduhoma regarding African Swine Fever' hi House dawhkanah rawn lay se.

ER. LALRINAWMA, MINISTER: Pu Speaker, i phalna leh he House remtihna in 'A statement of correction on the reply given on 8.2.2023 to unstarred Question No.

8, Ballot No. 13, asked by Pu Lalduhoma regarding 'African Swine Fever' hi he House zahawm takah hian ka rawn lay e.

SPEAKER : A copy kha han sem ula. Tun tum kan session hi kan tang a ni; *Zawhna & Chhanna* pawh a tam ber record a la ni a, department pawh hi kan tibuai hlawm a nia; tihfel loh palh te pawh a lo awm zeuh thei a ni. Kan chang kim em? Awle, Kan chang kim chuan, financial business ah kan kal ang a.

FINANCIAL BUSINESS:

Vawiin hian Minister zahawm tak tak Pu Lalruatkima te, Pu Lalchamliaana leh kan Dy. Chief Minister, Pu Tawnluia te Demand kan sawiho dawn a, tin, vawiin hian pass nghal kan tum dawn a ni. Nidanga kan tih thin ang khan, a rualin kan lakawp leh ang a, an pathum hian.

Tunah, Minister zahawm tak Pu Lalruatkima kan sawm ang a, House dawhkanah a Demand te -

Demand No. 6 - Land Revenue & Settlement Department

Demand No. 26 - Information & Public Relations Department;

Demand No. 38 - Rural Development Department

te, House-a rawn submit turin ka sawm e.

PU LALRUATKIMA, MINISTER: Governor of Mizoram duh dan leh I remtihain, kum 2023-2024 chhunga heng ka department-te hman tura ruahman ₹3,54,45,56,000.00 chu he House zahawm takah hian ka rawn move a, chungte chu –

Demand No.	Purpose	Amount (in ₹)
6	Land Revenue & Settlement	33,72,12,000.00
26	Information & Public Relations	12,21,57,000.00
38	Rural Development	3,08,51,87,000.00
TOTAL		3,54,45,56,000.00

Ka lawm e.

SPEAKER : A dawt lehah chuan kan Minister zahawm tak Pu Lalchamliaana kan sawm ang a, a demand te –

Demand No. 8 - Taxation Department;

Demand No. 16 - Home Department;

Demand No. 30 - Disaster Management & Rehabilitation

Department te, House-ah rawn submit se.

PU LALCHAMLIANA, MINISTER: Pu Speaker, on the recommendation of the Governor of Mizoram and, with your permission, Sir, I move the Demand 8, 16 & 30

for ₹8,89,24,58,000.00 only for meeting expenses during 2023-2024 in respect of the following departments –

Demand No.	Purpose	Amount (in ₹)
8	Taxation	21,71,35,000.00
18	Home	8,00,26,44,000.00
30	Disaster Management & Rehabilitation	67,26,79,000.00
TOTAL		8,89,24,58,000.00

Hei hi House-in min ngaihtuhsak a, min pass sak ka rawn ngen e.

SPEAKER : Tuna chuan kan, Dy. Chief Minister zahawm tak Pu Tawnlulia, House dawhkanah a demand te –

Demand No.13 - Personnel & Administrative Reforms,

Demand No. 25 - Public Health Engineering Department,

Demand No. 46 - Urban Development & Poverty Alleviation

te, House-ah rawn submit turin kan sawm e.

PU TAWNLUIA, DEPUTY CHIEF MINISTER: Pu Speaker, I phalna leh I remtihain, ka department chan 3 te demand –

Demand No.	Purpose	Amount (in ₹)
13	Personnel & Administrative Reforms	5,06,95,000.00
25	Public Health Engineering	4,80,98,40,000.00
46	Urban Development & Poverty Alleviation	5,91,85,16,000.00
TOTAL		10,77,90,51,000.00

House-in min ngaihtuah sak turin ka rawn pharh e.

SPEAKER : Awle, kan Dy. Chief Minister zahawm tak leh kan Minister-te demand chu House-ah an rawn submit ta a. Sawiho kan tan leh ang a, minute engzatnge kan inpek leh ang le? Minute 10 kha kan tih dan tlangpui a ni a, kan pawm leh mai em? (*House-in minute 10 a pawm a.*) Awle, tunge sawi hmasa ber ang le? Hmanlai kan nih hmasak ve lai kha chuan a ding hmasaah kan han tang ve tak tak a ni a.

Awle, Dr. L. Thangmawia, Member zahawm tak sawi hmasa turin ka sawm e.

PU L. THANGMAWIA : Pu Speaker, ka lawm e. Naktuk hi tun Assembly term chhunga budget session kan neih hun ni hnunung ber a lo ni ta reng mai a. Kawng leh lama ngaihtuah chuan Pathian hruaina a lawmawm a, a lunglen thlakna chen a bawkawm a. Vawiinah hian demand pawimawh tak tak kan minister zahawm tak takte pahnih

leh kan Dy. Chief Minister demand-te kan sawi dawn a. A hmasain heng demand zawng zawngte hi ka thlawp a ni tih ka sawi duh a.

Pu Speaker, kan Dy. Chief Minister Demand No. 13, 25 leh 46 te hi a remchan dan angin ka han sawi hmasa ang a. Demand No. 25 – PHE-ah hian ka bial chhungah hmalakna nasa tak a awm a. Ka MLA tirha kan buaina chu Hliappui Changzawl leh Vanchengpui tui chawi sak ngai an awm a, heng khuaah te hian kum 1 mai nilo MLA fund hmangin department-in theihtawp a chhuah bakah tuite chawi ngaiin a awm thin a. Hliappui chu sorkar tan tirh lamah hlawhtling takin tui pump chhuah a ni tawh a. Tunah hian Teikhang, Kawlbem, Ngopa, Changzawl, Kawlkulh, Chhawrtui leh Vanchengpui-te tui pump tur hnathawh mek a ni a, a lawmawm khawp mai a. Department pawhin theihtawpa chakin a han vil chho a, kumin kum tawpah te chuan MLA fund tea tui chawi ngai tawh lovin kan awm thei dawn niin kan hria a, lawmthu, a changtu Dy. Chief Minister leh department-te chhungah pawh he House zahawm tak kaltlang hian kan sawi a ni.

A dawt leha Demand 46 – UD & PA ah kal ta ila. Ngopa hi December Ni 22, 2022-a Council of Ministers meeting khan (kan Dy. Chief Minister hmalakna ni ngeiin ka ring a) *Town*-ah min pawmsak a, a rual hian Kawrthah leh West Phaileng-te pawh a ni baw a, kan la hre theuh ang a. Tichuan, UD & PA in Council of Ministers thutlukna bawhzuiin December Ni 28, 2020 ah *Town*-a puanna Order & Notification a tichhuak ta a, kan lawm hle a, kut te pawh kan beng a ni.

Tichuan, *Town* kan nih kan nih hma, town kan nihna tur an ngaihtuah vel lai mek kha Covid rawn len chhoh lai a ni a, kan rilru mitthlaah chuan UD & PA atangin eng eng emaw khawpui cheina turte a awm ang a, signboard leh step-te nen thil tul dang tam tak te khawpui nih mana awm ve ang chu kan laiin, kan tel ve theihna chu ‘Mizoram Cleanliness Competition’ kha ni deuh ta mai a ni. Hei hi kan vui hauh lova, covid vang a ni a. Amaherawhchu, hei hi Pathian remruat anih pawh ka ring a, kan tel vena hmasak ber *Mizoram Cleanliness Competition, 2021*-ah khan 2-naah, town awmsa tam tak zingah kan invawrh chho dawrh a ni. Tin, W. Phaileng town-a puan tho kha 3-na a ni baw a. Helaiah hian Ngopa khawtlang mipuite inpekna te, Ngopa-a official-a awm te inpekna te, tin a mipui hrim hrimin he competition vang chauh ni lova, fai ngaina an nihna te a takin kan hmu a, ropui ka tikhawp mai a. Tin, hemi kum hian district hawn thar, kan bial kaihhnawihthu district pakhat zawk Saitual chu district headquarter fai ber *pakhatna* a ni baw a ni. A thar lamin lawmman kan la tha khawp mai 2021 hian.

Tichuan, kum 2022 a rawn inher chhuak a, a ngai ang bawkin UD & PA-in *Mizoram Cleanliness Competition, 2022* a buatsaih leh a, hetah pheii chuan khaw fai bera kan hriat thin Biate ten min hlahthlemin, Ngopa *pakhatna* kan han ni ta a. Hmanni lawkah a lawmna pawh pui tak leh phak tawka tih ve kan duh a, organizing committee te an rawn chhuk a, UD & PA Minister-te pawh an rawn sawm fel tawhin ka hria a.

March 31, 2022 hi Pathianin rem a tih chuan tinzawn a ni a. Vawiin nia House-a ka memberpuite pawh Ngopa khawtlang ai awhin kan sawm duh che u a. Hei hi chu kan phuloh Pathian malsawmnaa kan ngaih ve avang hian chapo thil ni lovin, lawm tur niin kan hria a, min rawn telpui turin kan sawm che u a.

Tin, hemi tum bawh hian keimah min kaihnawihitu zel 2022 inelnaah hian Khawzawl chu *district headquarters fai ber* a ni bawh a ni. Heng zawng zawng en hian a lawmawm khawpin ka hria a. Ngopa hi KTP General Conference nakum kum tira thleng tur kan nih avangin, *pakhatna* ni khawpa tha leh zung, sum leh pai kan sennaah hian kan UD & PA Minister zahawm tak pawhin (midangin min lo thik lo mai sela) General Conference-a kan mamawh thil tul zual hi chu a *special case*-a min tihsak pawh kha he House zahawmtak kaltlang hian kan ngen duh bawh a ni.

A dawt lehah kan Home Minister zahawmtak Pu Lalchamliaana Demand No. 8, 16 leh 30 ah han kal ta ila. Kan remchan dan ang angin Taxation hi chanchinthar vela invawrh lar si lo, kan hmalakna tur tam tak lo khawn khawmtu a ni a. Kum 2021-2022 khan vaibelchhe 894 an hmu a, thla hmasa January pawh khan vaibelchhe 110 chuang an lo collect tawh bawh a. Hetah hian Kawlkuhl hi police outpost awmna atan department pawhin tha an ti a. Under Secretary, Home department hnenah hian Ni 10.11.2022 khan Pu Zosangliana, Asst. Inspector, General of Police hian Kawlkuhl Police Outpost awm rawtna a rawn thlen a. Kan House Leader kan ngenna pawh - GAD approval a ngai a. Hei hi a kal phei zel ang a, GAD in min approve saka, he outpost hi tun sorkar ral hma ngeia min dahsak turin kan Home Minister leh kan House Leader ka ngen a.

A tawp berah chuan, Pu Lalruatkima, kan Minister zahawm tak Demand No. 6, 26 leh 38 te hi han sawi thuk thuk ta ila. RD-ah hian Mizorama a hmasa ber atan, ‘biomass’ kan bawlhhlawh leh thlai hnimhnah vel atanga leitha siamna leh meihawl siamna kha kan han tan a, cheng nuai 30 in. Nuai 30-ah hian nuai 28 hi RD department in min tumsak a, MLA fund atngin nuai 2 a ni bawh a. Kan Minister hi thil ti mai mai lo chi a ni a. Ni 21.7.2022-ah khan a that dan leh thatloh dan tur presentation kha mumal takin a office-ah an nei a. Chumi ni pawn ka va phone nghe nghe a. “Hei chu theihtawp kan lo chhuah ang a, a that phei chuan khawpui danga hman theih tur a ni dawn a,” kan ti a, min tih fel sak a. Kan buaipui mek a, khawl te pawh chah a ni a, ‘Biomass briquette making machine’ kan ti a. Hei hi a hlawhtlin theih chuan nasa takin kan bawlhhlawh atangin thil a piang thei dawn a ni.

A tawp berah chuan, hei, Information & Public Relations hi a pawimawh em em a. A tlangpui thuin nitin hian sorkar leh mipuite inkarah sorkar palai hnathawkin mipuite hriat tur an lo puang thin a. A tlangkawm nana ka han sawi duh a chu - social media atang tea thu lak a pawizia chu tun House-ah ngei pawh kan hria a. India ram politician larte pawhin social media an hman dan research paper-te ka han en a, mipui hnena thu

puanchhuah duh puan nan an lo hmang tlangpui a, tweeter ngei pawh kan Prime Minister te pawhin a hmang a. Amaherawh chu, thu belhchian hmasak phawt loh chuan thulak nan an lo hmang vak lo a ni. Mizoram-ah pawh hei hi kan tih chhoh ve a ngaiin ka hria a. Social media hi a tangkai a, thil dik emaw, a dik lo emaw a post-tu in a duh duh a post thei tawh si a. Internet awm tirh khan, Pu Speaker, kan Professor pakhat ka zawt a, ka hriatchian hmain, “internet hi mitin te ta a ni a, a neitute an rinawm leh rinawm loh dan a zirin internet atanga thil kalchhuak hi a innghat a ni,” a ti a ni. Chutiang chiah chuan mizo mipuite ka ngenna pawh, heng social media te hi rintlak a nih theih nan, thil rintlak tak kan post theuh kha chuan, a rintlak a ni mai dawn a, a nih loh erawh chuan thulak nana hmang thin te kan lo awm si a, ‘a hman dan hi kan zir zel a ngai a ni’ tih kha ka sawi theih tawk ni rawh se. Pu Speaker, ka lawm e.

SPEAKER : Hei, kan NeVA hi, (kan time khilaih khian a inziak a) kan record dan nen a inmil lo thei lutuk a. A inmil zawkna turin, microphone *on* atang chiahin chhiar ang che u. Kan record nen a inmil lo lutuk a, a nalh lo tlat; a dik lo. Operator te khan lo hre rawh u aw. Microphone an *on* atang chiahin an time kha chhiar ang che u.

Tunge sawi leh ang le? Member zahawm tak Pu C. Lalmuanpuia ka sawm e.

PU C. LALMUANPUIA : Pu Speaker, ka lawm e. Vawinah hian kan Minister zahawm tak tak pathumte demand sawina hun kan nei thei hi lawmawm ka ti a, hetiang min hruai thlengtu Pathian hnenah lawmthu ka sawi a ni. Demand pawimawh tak tak mai a ni a, a zavai erawh chuan kan luhchilh hman dawn lova, a tlangpui chauh ka han sawi zawr zawr dawn a ni.

A hmasa berah chuan Demand No. 6 - Land Revenue & Settlement Department hi; kan Revenue Department te an thawkrim em em a, kawng engkimah hma an la a, mipuite tan huan lo ram a ni emaw, in leh lo ram tur a ni emaw, agricultural land tur a ni emaw kawng engkima an hmalakna te hi a lawmawm ka ti a. Ka han sawi duh chu - thawktute hi an indaih lutuk lo hian ka hria a. A then an lo pension a, a then eng emaw dam-mawh-hritlan avanga harsatna neite an ni a, chungah te chuan kan surveyor te pawh an indaih lo em em ni te pawhin kan hmu a. An chhuanawm em em rual hian, henge pawh hi a changtu Minister zahawm tak hian min lo chhinchhiah sak se la, ‘hmalakna thar thawktuah te pawh a awm thei em?’ tih te ka han ngenpui a ni.

Tin, he department hnuaiah hian kan bial chhung lam te pawh han sawi ve kan duh deuh a. Ka bial chhunga veng pakhat Chandmari West ten Maumual ramah khuan thlanmual kan dil a, kan ti fel tawh a, pillar te pawh phun vek tawh a ni a. Mahse, eng emaw harsatna chhe-te avanga la tihchhuah loh a awm a. Chu chu kan Minister zahawm tak hian min ngaihtuah em em a, min tih fel sak pawh a tum niin ka hria a. Min tih fel sak thuai turin ka han ngen nghal bawk a ni.

Tax te pawh Revenue Deptt. atang hian cheng nuai 524 chuang, registration fee te, stamp duty-ah te, LSC leh House pass-ah te pawh an lo la a. Tam tak mai an lo collect te hi an chhuanawm hlein ka hria a ni.

Tichuan, Demand No. 38 - RD Department hi thang duang tak niin ka hria a. District thar 3 - Hnahthial, khawzawl leh Saitual-ah te District Rural Development Office hawn a ni a, hmasawna tur sum pawh vaibelchhe 5 chuang dah a ni a, , a lawmawm hlein ka hria a.

Tin, RD Block thar, Kawrtethawveng RD Block leh Tlabung RD Block te hawn thar a ni a, hmalakna a awm te hi lawmawm ka ti a, an chhuanawm kawp mai. *Ni-100 inhlawhna* kan tihah te pawh hma an la nasa a, ni 100% an inhlawh tir thei te hi a lawmawmin, an chhuanawm khawp mai.

Tin, kan ram hi leimin ram te a ni a, silpouline leh rangva te pawh min han thehchhuah thin a, hengte pawh hi a lawmawm a. Hei, fur kan hmachhawn leh mai dawn a, kan minister zahawm tak khan min lo chhinchhiah sak se la, hengah te hian min thehchhuah sak tur kha a nei leh chuan, ka han ngen leh nghal bawk a ni.

Tin, Information & Public Relations te an thawk tha em em a. Information dik min pe turin theihtawp an chhuah a, an hmalakna lawmawm ka ti a. Kuminah phei chuan calendar hi a lar em em a, calendar tha tak an siam a, copy te pawh min rawn pe tam khawp mai a, diary te pawh kan han dawng leh nual a. He department chungah pawh hian lawmthu kan sawi duh a ni.

Demand No. 16 - Home Deptt. hi; he department staff-te hi an chhuanawm khawp mai a. Ramriah buaina te kan han nei a, an tangkai em em a, fimkhur takin ral rel an thiam a Aa changtu minister ho hian an chungah lawmthu ka sawi a, an thlamuan thlak hle a ni. Amaherawh chu, hetih lai hian he department-ah pawh hian indaihlohna a nasa hle tih kan hria a, he indaih lohna pawh hi kan sorkar hian min lo chhinchhiah sak se la, puhruksak ni se la, chutiang tur chuan hmalak theih ni se a lawmawm hle ang.

Tin, Aizawl-ah kan awm a, kan khawpui te hi traffic a tawt em em a, traffic police te pawh hi an indaih lo khawpin ka hria a. Sum leh pai tunah kan la harsa deuh a nih pawhin, kan neih theih velah kan indaihlohna te pawh hi puhhruk sak ni se la tih kha ka han ngen bawk a.

Tin, Thenzawl Police Training School-ah training lai mi 286 lai kan nei thei hi a lawmawm a, hmalakna alo lang a. Hengte hian kan indaihlohna te pawh a rawn puhru turah ka ngai a ni.

Tin, Disaster lam hi; Disaster Deptt. hian kan bial chhungah kawng hrang hrangin hma a la a; SDRMF hnuaiah vaibelchhe 52 dah a ni hi a lawmawm ka ti a. *Chhiat-rupna* laka invenna tur 20% niin, 80% hi a lo thleng tawh invenna tur te a ni. Heng sum kan han nei tur te hi a thlamuan thlak hlein ka hria a. Tin, Hunthar Veng lei-tlahniam ah te hma lakna a awm a, heng hmalakna zawng zawngah hian lawmthu ka sawi bawk a ni. Disaster Deptt. atanga kan hmalakna pawimawh tak mai, kan lifeline kan kawngpui pawimawh tak Hunthar Veng lei-tlahniam kan hmalakna te tunah chuan zawh fel a ni ta a. A dam tak tak hi chu Pathian thu thu a ni a, engpawh ni se furpui kan hmachhawn leh dawn a, hengah te pawh hian a chet loh ka beisei a, kan hmalakna a chhuanawm ka ti hle a ni.

Tin, Pu Speaker, Demand No. 25 - PHE Department hi, an hmalakna a chhuanawm hlein ka hria a. Hmun hrang hrangah JJM hnuaia an hmalakna te, tin, solar pumping atanga an hmalakna te, thingtlang khuaah tui connection neilo ten tui connection tam tak an pe thei te. Tin, solar pumping hmangin thal-va-ek-char lai pawhin tui tamtak an pump haw zur zur thei te hi a lawmawm ka ti a, an hmalaknaah hian fak an phu hle a ni. Tin, kan bial chhungah ‘Chhawnzinga Tuikhuah’ kan ti a, hei hi lei minin a hnawh vek te minrawn siam sak a, tunah pump theia an awm leh te hi a lawmawm hle a, an chungah lawmthu ka sawi bawk a ni.

Tin, UD & PA hi department pawimawh tak a ni a, a bik takin khawpui bialtute phei hi chu kan inngahna a ni a. Kawng hrang hrangin Mizoram khawpuite min han chei sak a, an hmalakna a lawmawm ka ti a. Tin, kan bial chhungah ngei pawh UD & PA - *Smart City* project hnuaiah Mizo high school field buaipuiin tunah hian kan lai mup mup a, khingte khi a chhawng tur a ni a. Basement I & II parking awma phullem phah tur a ni a, Khingah te pawh khian an chungah lawmthu kan sawi a. Tin, Edenthur Veng field pawh phullem phah turin hma kan la mup mup a, khung te pawh khu Smart City, UD & PA hnuaiah hma minrawn lak saknaah lawmthu kan sawi mawlh mawlh bawk a ni.

Tin, kan sawi leh duh chu, Chanmari West-ah hian ‘ram lai ruak’ kan ti a, Chanmari leh Chanmari West inrina laiah sawn kawng kan nei a, chu chu building pakhat hian a dal tlat mai a, UD & PA hmalaknain *direct purses* hmangin chu building chu min lei sak a, tunah hian kawngpui siam turin hma kan la mek bawk a. Heng kan bial chhunga hma min lak saknate ah hian lawmthu kan sawi a.

Tin, thil thar, Lunglei Municipal Council dinna turin sum an han dah a, tunah hian inthlang mai thei tura hmalaknaa thil thar a awm te hi a lawmawm ka ti a, Lunglei khawpui pawh kan lawmpui a ni e.

Pu Speaker, hun a tawi khawp mai a, kan duh ang pawhin kan sawi hman lova. Engpawh nise kan Minister pathumte demand ka rawn sawi te kha ka rawn thlawp a; an demand-te 'pass sak ngei ni se' tiin ka rawn thlawp a ni e. Ka lawm e.

SPEAKER : Tunge sawi leh ang? Awle, member zahawm tak Pu VL Zaithanzama ka sawm e.

PU VL. ZAITHANZAMA: Pu Speaker, ka lawm e. Demand No.16 - Home department ah hian ka han lut ang a. A hma lawkah khan ka thil sawi tum outpost chungchang kha a rawn sawi tawh viau a, kan sawi lang tho ang a.

Ka biala Reiek kawng, Maubawk ramah sawn police outpost dah a tul hle mai; a theih loh pawhin beat post tal chu kan mamawh hle a ni. A chhan chu - Reiek Tlang hi tourist hovin an tlawh nasa em em a, zahawm taka enkawl a phu a ni. A kalkawngah sawn futsal ground te, picnic spot te a awm thluah mai a, Anthurium festival te kan han hmang bawk a, sawlai kawng saw a lun tan ta hle mai a. Tunah sawn ka bial chhunga YMA branch hrang hrangte mangang intelkhawmin duty te an han insiam ngial thin a, amaherawhchu ven hneh a har hle a ni. Tun ang renga kan ngaihsak loh chuan, nakin lawkah chuan RV-thar a piang mai dawn niin kan hria a. Hei hi control theih a nih lai hian kan Home Minister zahawm tak hian min lo chhinchhiah sak turin ka ngen duh a ni.

Tin, Myanmar leh ramdang atanga kuhva lo lut danna hi tichak turin February thla chhung khan district hrang hrang atanga dan lova kuhva lo lut chhek khawlnaa 'stock awm zat khawn khawm ni se' tih hi a tha ka ti hle mai a. Amaherawhchu, nidanga ka sawi ang bawkin, 'engvangin nge sorkar hian dan lova kuhva lakluh awm mek te a man khawm mai loh?' tih hi ka chiang lova. 'Dan lova kuhva lo lut te hi kudam-a dah phal, phurh kual awih loh' tih dan a awm em ni? An phurh chhuah chauh mana, an phurh chhuah hmaa lova man mai dan kha a awm em?' tih kha ka zawt duh a ni. Kum 2019 daih tawhah khan sorkar kudam-ah te meuh pawh dan lova kuhva lo lut hi dah a ni a. Vairengte supply kudamah te pawh ₹19,000/- thlakhatah luah tir anih laia, mimal dah hawh tirin hetiang atan hian hman alo ni tawh a. Chuvang chuan, 'an phurh kual hma hian man mai dan a awm lawm ni?' tih kha kan sawi duh a ni.

Demand No. 8 - Taxation hi kan sawi leh hram ang a. Taxation hi an fakawm hle mai a, thla 9 lek chhungin an target an pha der mai a, revise thla 3 chhung ngai khawpin an thawk chhuak tha a ni. Amaherawhchu, an an budget hi 3.7 zetin a minus a, plus tura ka lo beisei tehlul nen, kum 2020 atang khan an minus chho fo mai lehngal a. District thar pathum Saitual, Khawzawl leh Hnathial-ah te hian office an la nei lova. Hengah te hian office han nei pheise chuan, tun aia nasa hian chhiah hi a lo luh kan ring a. Tin, thuam that hi an ngai em em mai a, hmanrua an nei tha lova, motor an nei tlema, an neihchhun te a chhe hlawm em em mai a. Aizawl hi Zone 4 ah then a ni a, Zone khat

chauhin motor an kawl a, an hnathawhna tur hmanrua leh mihring pawh an mamawh a. Tin, department dang a ang lova, he department-a sum kan dah hi chu expenditure ni lovin, investment a ni a, motor te hi pe ila chu kum 1-2 lek chhungin an motor man lek hi chu an thawh pangngai bakah hian an thawhchhuah mai ka ring a ni. Chuvangin, motor tha bakah district thar pathuma office hawn sak dan hi ngaihtuah ni se tih kha ka sawi duh a ni.

Pu Speaker, Demand No. 25 - PHE ah ka han lut leh ang e. Hei, Aizawl-Greater Water Supply Scheme hnuai pipe maintenance chungchang kha *Zawhna & Chhanna-* ah khan chiangkhang vak lova sawi rik kha a ni a, mumal deuhin han sawi ka tum ang a. He pipe lianpui mai hian ka bial chhung Aizawl West III a paltlang ruah mai a. Ngaihthat loh chang a bula in nei ten an nei fo a. Kum 2021 kumtir lam atang khan complaint a awm tan a, Khatla - Chawnga Road leh Bungkawn tuikhur vengah te hian complaint a nasa zual a, Khatla - Chawng Road chhungkaw 50 leh, Bungkawn - Tuikhur Veng chhungkaw 45 zet, an vaiin chhungkaw 95 zet ten ngaihthatlohna an nei a ni. October ni 20, 2022 khan Chief Engineer-ah complaint thehluh a ni a. Hmalak zel niin, May ni 8, 2022 khan uluk takin valve dahna hmun te hawnga enfiah a ni a, return valve a tha lo tih hmuhchhuah a ni. Return valve a hlui tawh a, a thawh tur ang a thawk tawh lo nia sawi a ni. May, 2022 a a thatlohna hriat ni tawh, vawiinni thlengin, thla 8 chuang zet a ni ta a, a valve thalo hi khawngaihni a rang lama min thlak sak turin vawiinah hian he House-ah hian kan ngen a ni. Electric current a tawp thut a, tui rawn let lo dangtu valve hi hlui tawh a, thlak a ngai a. Hna a thawh that oh khan a bul vela in te tan lirngching tenau a siam a ni mai zel a. Eng emaw chang phei chuan inchunga buhfai bag khat vel paih chawrh anga thawm nasa te a awm a ni. Heng a tuartu chhungkua 95 zette dinhmun hi ngaihtuah a ngai hle a. Amaherawhchu, Aizawl tui kan mamawhna a sang a, ni khat lek tui pump loh pawh kan zo lo tih chu kan hre reng. Amaherawhchu, heng chhungkaw 95 zet te dinhmun hi ngaihthah mai theih a ni lo a ni. An dinhmuna ding lo tan chuan hriatthiam a har ang a. Pipe lianpui mai mahni kawtkaiha a kal ruah a, tui rawn invaw letina thawm lianpui a neiha nghawr dut thin saw a bul hnaia in leh lo neitute tan chuan tawrh a hrehawm tawh tak zet a ni tih kha uar takin ka han sawi duh a ni e.

Demand No. 46 – UD & PA-ah hi ka sawi tawh a, ka han sawi nawn leh ang a. Kan bial chhungah community hall-te sak mek a ni hlawm a. Bungkawn-ah mumal takin sak chhunzawm zel a ni a, Maubawk leh Khatla saw kan minister zahawm tak pawhin hun hmasa lamah khan hma min lakpui zel kha a intiam a Mmahse vawiin thlengin hmalak a awm ta lova. Saw saw hma min lak sak se ka ti tak zet zet a ni. Tin, *Aizawl-Smart City* project hi Central leh State share - Central share hmuh tawh niin, State-matching share pawh tha taka pek niin ka lo hria a, mahse, ‘eng vangin nge hna hi a muan em em aw?’ tih ka ngaihtuah a ni. ‘Construction of Smart Street at Upper Khatla’ kha hmalakna hnuhma engmah vawiin thlengin hmuh tur a la awm lova. Heng te hi min tih ran sak turin ka ngen bawh ni se la.

A tawp berah chuan - Demand No. 26, I & PR hi tawi te ka han tiri leh hram ang a. Journalist ho pension hi ka zawt a, a chhannaah pawh ruahmanna kalpui mek a nih thu 2020 khan kan ngaithla a, 2019 March thla khan uluk taka ngaihtuah mek a nih thu kan ngaithla a; 2022 February ah khan ruahmanna kalpui mek anih thu kan ngaihtla leh bawk a. Kha kha, ‘ruahman zawh a ni tawh em?’ tih kan zawt nghal a.

Demand No. 6 - Land Revenue & Settlement hi tun sorkarah hian a board din chungchangah hmalakna langsar a awm ka la hre lova. Eizawn nana ram nei lote ram pek dan te ngaihtuah tura din niin, an thawk muang hlein ka hria. Hetah hian land survey leh digital land record fel tak nei tura budget provision awm mumal lo hi pawl ka ti hle a. A tawp berah chuan, Digital India Land Record Modernization Programme Central sum hmanga hnathawh kum 10 chuang ni tawh, *online land record system* peih la ni thei lo te, department-in software a siam pawh hmantlak la ni lo te hi pawl ka ti tak zet a ni. Pu Speaker, ka lawm e.

SPEAKER : Awle, Member zahawm tak Pu Zothantluanga ka sawm e.

PU ZOTHANTLUANGA : Pu Speaker, ka lawm e. Vawiinah hian kan Minister zahawm takte pahnih leh kan Dy. CM zahawm tak demand te sawiho tur a ni hi a phurawm hlein ka hria a. Ka han sawi chho map map ang a, a tam si a.

Demand No. 6 - Land, Revenue & Settlement Department chungchang hi; kar hmasaah zawhnaah khan kan GAD Minister-in ka bial Ainawn Veng-a mipui tam tak chhungkaw 500 chuangin in hmun settlement an neih theih loh chungchangah ‘hma min lak sak dawn a, LSC min tih sak dawn a ni’ tih kan hriat hian, a lawmawm hlein ka hria a. A bik takin a bialtu ka nih angin leh Ainawn Veng mipui aiawh pawhin lawmthu ka sawi a. Tin, hei hi a lawmawm hrim hrim bakah hian sorkarin LSC pekchhuahnaah hian revenue tak tak a hmu thei dawn tho a ni tih pawh he House hian a hriat a thain ka hria a. Chuvang chuan, sorkarin a hun takah hetiang ruahmanna min siam sak hi kan lawm hle a. Tin, Demand No. 30 - Disaster Department nen hian a inchawhpawlh deuh hlek a. Eng emaw lai khan kan GAD Minister, kan Chief Minister zahawm takin kan Revenue Minister zahawm tak Pu Ruatkima hoa khulaia building hlauhawm tawhte (*Dy. Speaker-in Chair a la a..*) kan zuk en a, department hotute leh khawtlang hruaitute nen. Khulaia sorkar building a tam zawk khu a rinawm tawh lo em em a, a sakna a rei tawh a. A building construction khu disaster thlen ngai khawpin a chhia a ni. Tin, sorkar hnathawk tam takin an luah duh tawh lova, an luah ngam lova. Chuvang chuan, khu khu dismantle rang taka tih ngai tam tak a awm a. An luah si loh chuan, mirethei leh harsa in luah tur nei lote an lo lut leh mai thin bawk si a. Hetianga a kal zel chuan, engtikah emaw chuan khu mangkhawng building awm teuh atang khuan chhiatna nasa zawk thihna te pawh thleng thei dinhmunah kan ding a ni tih hriaa, Disaster Management Department pawhin min ngaihtuahpui a pawimawh hlein ka hria a.

Tin, hei chhiat tawh chungchangah hian kan sawi fo a, disaster management chungchang kan han sawi takah chuan. Sairang-ah khuan chhiat tawh chungchanga harsatna mipuiin kan tawh thin solve-na tur Shelter House min sak sak bawk a, hei pawh hi a lawmawm viau a. Tin, kan Chief Minister leh kan Disaster Management changtu minister zahawm tak Pu Chama te remhriatna leh hmalakna a zarah Central YMA-in an mamawh em em lawng lian pahnih engine tunah hian leisak a ni te hi a lawmawm ka ti a. Mizoram hmun hrang hrangah chhiatna a thlenin Central YMA te a mawhphurtu an ni lo thei lova. Tunah chuan an mamawh em em hmanrua an han nei ta hi an lawmpui awm ka ti a. Tin, Sairang-ah khuan tuitla te kan han zawn chang hian hmanrua kan nei lo em em a ni. Chumi atan pawh chuan equipments eng emaw zat leina tur department-in sum min ruahman sak a ni tih han hriat pawh hi a lawmawm ka ti a.

Tichuan, Demand No. 38 - Rural Development chungchangah hian, RD hi department pawimawh tak, a bik takin thingtlang lam tan pheii chuan 'Nu-department' tih tur khawpin a pawimawh a ni. Kan hmasawwna tam ber te hi RD tanga kan hmuh a ni a. Tin, VC tha leh veng hmangaihte chuan an veng an siam nuam a, an veng hmasawwna tha takin an siam pah a, chu chuan Zoram hmasawwna a thlen a. Chutiang bawk chuan keini pawh Sairang-a village council pathum khu RD hian min cover ve a. Tichuan, kan sawi fo thin ang khan, chhiatna, harsatna kan tawh chanin mi tlawmngaite kan intuk thei si lova, kan tlan thla hum hum a, kan tam thei khawp mai a. Fur lai te a lo ni bawk thin nen, shelter han tawmhulna tur kan neih loh zia te min hriat puin, hall pahnih min sak sak mek a, Sairang ah leh Sairang-Sihmui ah, tunah hian Sairang-Dinthar ah hall sakna tur min ngaituah sak leh mek a ni tih te kan han hria hi kan lawm em em a ni. Community hall hi, ni e, public meeting neih nan kum khatah kan hmang tam viau lo a ni maithei a, amaherawhchu kan mamawh chang erawh hi chuan kan mamawhna hi a nasa em em a ni; heng hun hi a lo thleng ve thin bawk si a, a lo thleng zing ang reng bawk si a. Chuvang chuan, RD department-ah hian keini bial chuan lawmthu sawi mawlh mawlh tur kan nei a ni.

Tin, Demand No. 25 - Public Health Engineering Department-ah hian han sawi duh ka neih chu, Sairang hi rail-head awmna tur a ni a, rail station hun reilo te ah, kumin kum tawpah emaw, nakumah emaw hi chuan rail hi a lo thleng dawn niin a lang a. Tichuan, tui ah hian harsatna kan nei a, railway lam pawhin a department angin khulaia water supply a awm theihna turin sum te thawhin tunah hian hma an la mek a. Amaherawhchu department ta tur a nih avangin a mipuite khuan harsatna kan tawk a. Tunah hian gravity hmangin lui a mi kan pipe a, fur a lo nih hian tui a nu a, a treatment kha a tih hleihtheih si lova, chuvang chuan tui lenna hmunah tamchhawlin, tui nei lovin kan awm thin a, chu chu hriain, hei JJM-ah chuan thingtlanga khaw tam tak ten solar leh electric power hmang tein water pump hmangin tui an la a, mipui ten an tangkai pui em em a ni. Keini ah khuan a theih ve loh a. Amaherawhchu Dy. CM, kan PHE minister zahawm tak hian min ngaituah a, a pawimawh zia te, a tul zia te hriain tunah hian

AMRUT-II atangin khumi khaw thum mipuite supply zo zan tur min buatsaih sak dawn a, kan lawm em em bawk a ni.

Tichuan, PHE hrim hrimah hi chuan tuia hi chu kan basic needs zinga mi a ni a. Aizawl pawh tui thatna hmunte chu veng nuam a ni a, chutiingin thingtlangah pawh tui a that chuan, kan khua a nuam thin a, tui a harsat erawh chuan, khaw tin hian hrehawm kan ti thin. Tunah hian Aizawl hi, keini bial te pawh a ni a, tui supply enkawltu hi an indaih lo khawp mai a Chuvang chuan, hetah pawh hian sum kan nei a nih chuan MR eng emaw zat han lak belh a, kan tuia hi he aia tha lehzuala hmuh dan a awmin a hriat a. Kan Dy. CM chan a ni bawk a; mipui mamawh em em tui ah hian, SEDP-ah te pawh MR teacher kan lak theih chuan ‘hetah pawh hian a tul ve tho a ni’ tih kha kan sawi duh a.

Tin, Demand No. 46 - Urban Development & Poverty Alleviation Department hi keini khawpui chung bialtute tan hi chuan a pawimawh khawp mai a. Kan internal road te, kan step te, kan biakin kawng te leh kawng hrang hranga hmasawna, kan mamawh min thawhsak thintu a ni a. Chuvang chuan, Pu Dy. Speaker, in rawn inthlak chhung tawi te kha min hrethiam la aw; hei hi ka han zo lawk ang e.

Tichuan, kum 2020 atang khan kan bial hmasawna UD & PA atanga sum leh pai lo kal hleithei ta lo hi a mangangthlak khawp mai a. Khawpui zawng zawng leh thingtlang khaw liante pawh, a hma latu tur a nih ang hian kan sorkar hian finance lam atang emaw, SASCI atang te emaw tal induhsakna han awm ve ta sela, kan veng theuhah tan kan mamawh em em a ni.

Tin, he department kaltlanga lawmthu han sawi ka duh em em chu – *Aizawl-Smart City* sum atangin Tuivamit-football stadium phullem phahna tur min buatsaih sak mek hi kan lawm khawp mai a. Tunlaih hian thalai ten infiamna hmun tha kan mamawh a ni tih kan hria a, chuvang chuan, keini biala awm ve miah lo, a pakhatna tur tha tak mai min han buatsaih sak hi kan lawm a.

Tin, tunah hian an peih dawn tawh em ka hre lova; kan officer tena min han hriat sak tur chu, hun rei tak tawh atang khan ‘IGC hmunah music city kan din dawn a ni’ tih kha, rang taka tih ni sela. Ni e, inkhelh chauh nilo, rimawi lamah te pawh hian ‘kan thalai ten hma sawn ve se’ tih hi Zoram thalai tam tak ina an duh, an nghahlelh em em a ni a. Chuvang chuan, hetah hian chak zawka hma min laksaka, bul min tansak thuai theih chuan a lawmawm hle ang.

Pu Dy. Speaker, wawiina kan Minister zahawm tak tak - Pu Lalruatkima te, Pu Lalchamliaha leh kan Dy. Chief Minister zahawm tak Pu Tawnluia Demand te hi ka rawn thlawp a, ‘I pass ngei ang u’ tiin ka rawn sawi ve a ni e. Ka lawm e.

DEPUTY SPEAKER : Dr. K. Pachhunga, member zahawm tak ka sawm e.

DR. K. PACHHUNGA : Pu Dy. Speaker, ka lawm e. Hei, vawiinah kan senior minister Pu Tawnluia demand te, Pu Lalchamlia leh Pu Ruatkima demand te kan sawi a. Hei, sawi chakawm deuh deuh te a awm a. Hun khirh, covid-in kum hnih leh tih min han khar khip a, kan inkhawm thei lo a, office pawh kan kal hleithei lo a, chuti chungin heng demand-ah te kan ram pum hmasawna hmuhnawm tak tak a awm a, chungte chu sawi hmasak ka duh a. Home Department-ah hian lut ata ila.

Mizoram khawvela min timawitu chu Aizawl traffic police te an ni a, tin, ‘hornless city’ tih anih avangin khawiah pawh Europe-ah pawh miin Mizoram an hmu chak a, lawmthu ka sawi duh a, Home Department chungah, traffic police te an tha a. Tin, Lunglei traffic police te pawh hma an rawn sawn a, mahni hna tha takah thawh hi ram changkang mipuitling zia a ni a. Kan tih tur dik tak kan hna kan tih hian keimahni leh keimahni kan inchawimawi a ni tih pawh hi Mizo mipuiin hre nawn leh ila kan duh a. Tin, mahni hna thawk tha peihlo, hlawh lak erawh chu duh em em si, heng te hi kalsan ngam a hun tawh a. Tin, hei ‘Ph. D’ kan tih lai te ka sawi duh lem lova, mahse Pu Dy. Speaker, khawngaih takin chapona ni lovin sawi duh ka nei a. Ph. D (research) kan tih hian project kan zia a, international journal-a publication kan tih dawn hian ngaihdan a ziah theih loh a ni. A teha teh, a buka buk chhuah, engkim thlap thlap lovin a tih theih loh a, vawiin niah kan ramah wrong information a tam lutuk a, video reporters diklo te. Chuvang chuan, ka lo ngaihsan thin em em ramhruitute vawiinah chuan an feed dik lo a, ka ngainep a ni; sorkar tlakah pawh ka hmu lo a ni. Wrong information helai House-a auhpui te hi a chi tawh lo a ni. Kan mipuite an khawngaihthlak lutuk, thudik hrilh ang u; party te pawhin tan la leh ila. Kristian ram kan nih angin mipuite thudik hrilh hi ‘kan tih makmawh a ni’ tih kha Home chanpual a ni. Tin, kan police ten ramriah min timawi lutuk a. Tin, drugs a rawn lut nasa a kan hria a, theihtawpin an tang a, mahse duhthusam chu an thleng lo. YMA pawh an fakawm a ni tih kha ka han sawi tel leh duh a.

Tin, ka bialah 2nd Battalion MAP an awm a, *transfer & promotion* sawi te a tam a, keini pawhin kan sawi thin a. Mahse police hi chu force an nihna angin dik takin kalpui thin ila. Hard post a awmte, an nupui fanaute avangin ‘transfer turin min sawisak rawh’ min ti nasa a, mahse chutiang pawh chu kan hotute’n tha takin an kalpui thin ka ring a, ‘min lo theihngihlh lo ula’ tih kha ka han sawi duh a. Tin, misual man kawngah pawh kan police-te in fakawm ka ti a ni.

Pu Dy. Speaker, Pu Tawnluia demand - UD&PA-ah han lut ta ila. Central Scheme JJM hmangin thingtlang khua zawng zawng tui hnianghnar taka pek tumna a kal mup mup a Kka bial pawh kan lawm a. Solar pump khaw 11 ah ngawt min han pe te hi ka lawm lutuk a, mipui pawh kan lawm a. Mahse lawm ve thei hauh lo pawl hi an awm ve hrim hrim a, hei hi chu thuhranah dah ta ila.

Tin, Lunglei PHE te performance hi sawichhuah ka duh a, an tha a. Lunglei PHE Department hi eng anga problem a awm pawhin, Sunday ah pawh ni se an thawk zel hi chawimawi tlak an niin ka hria a. Mahni hna tha taka tih hi 'Pathian rawngbawlina ropui tak a ni' tih kha ka sawi tel duh bawka. Tin, JJM chungchangah request duh ka nei a, min chhinchhiah sak se ka duh chu - approach road kawng laih hi a hlawk lo lutuk a, JCB pawhin an lai tha duh lova. Hei hi 'engtia tih chi nge maw ni?' tih kha ka sawi tel duh a ni.

Minister dang pawh ka han mix deuh nuai ang a. Taxation hi awareness tel lova pawisa va khawn tawp tawp hi rin aiin a buaithlak a, *awareness* hi kan mamawh hle mai. Mizoram sum dinhmun pawh kan hria a. Finance Commission-in min pe zuih tial tial a, chingal thlawr bur angin funding a zuih tan a, kan thawhchhuah ve a ngai a ni. Engkim mai sorkar tih tir vek kan tum hi a dik lo a ni. Tax pe lo chu kan ni lo, mahse kan pek danah duhthusam a ni lova; 'i tang ang u' tih kha ka sawi tel duh a. Tax-ah hi chuan a thawktute pawh kan che tha viauin ka hria a. Mahse, kan tax pek dan te pawh tih tam dan kan ngaihtuah zel chu a tha a.

Rural Development, Pu Ruatkima demand ah hian lut ta ila. Theihtawpin kan Minister a tang a, a fakawm ka ti a. Miretheite ei bar, job card ni 100-ah ni 100 kan pe te hi a chhinchhiah tlak takzet a, 'a hlu a ni' tih kha ka sawi tel duh a.

Tin, Revenue Department a chanah pawh he House zahawm takah member zahawm tak Mathlantearawn putlulh 'Progressive Tax' te pawh hi tihlawhtling chho ila. Hei hi kan ram tan hian a tha takzet a, land ceiling neihna te pawh a ni a.

Tin, RD Department-ah inpuhmawhna eng emaw zat he House-ah pawh a awm a. Material component NREGS te hi ka bialah chuan dan lovin kan thawh ka hre lo a ni. Kan party mite pawh an vui a, party mi kan inpe lem lo a ni. Salem YMA House nuai 8 min pe a, ka lawm lutuk a; a sum pawh 'cent percent kan dawng thlap a ni' tih hi salem mipui pawhin an hria a. He sorkar hi hetia wrong information atanga au vak vak te hi mipui kan tichiai a, a dik lo a ni.

Eye-witness ka bialah ngei ka nei a, RD Department pawh an che tha hlein ka hria a. Thingtlang te pawh ruah a sur a, kan tiseng ngang lo a ni. MLA fund te pawhin kan han thianfai nawk nawk a, phun dawn chuan sawisel tur hlir a ni. Mahse natural disaster avang te, hmanrua thatloh avang tein harsatna he khawvelah chuan kan tawka, inhriatthiam a ngai a. Wrong information thehdarh zawng zawngte avang hian kan mite an khawngaihthlak em em a ni.

Tin, LMC, UD & PA hnuaiiah Pu Tawnluia department-ah lut ila. Lunglei mahnia rorel ve theihna tunhma atanga kan mithiamte leh rualawhna, NGO te zawng zawngin kan awh chu Aizawl-ah development fund a awm a, chutiang bawkin District Council-

in development budget hran an nei a, ‘Lunglei min rep lutuk’ tiin kan lo nawr thin a. Chu kan rualawh em emna MNF sorkarin min han pe hi a lawmawm ka ti a, Municipal tan te pawh fund min pe zel a. Election pawh kan nei dawn a, Lunglei mipuite pawh kan lawmin ka hria. Mahse politics-ah lo sawi nawi pawlin, ‘job card te pawh chuti, khati’ tia thiltha pawh lo sawisel pawl hi chu an awm reng a. Mahse khang avang khan thiltha tih hi chu i sim lovang u.

Pu Dy. Speaker, Home Department-ah letleh lawk ila. Kan police ten theihtawpin drugs man kawngah mutmu pawh tuah lovin an bei a, YMA te pawhin. Hei hi chu khawvel awmchhung hi chuan a awm hmel a, kan geography location a dik loh avangin. He House-ah pawh ka sawi tawh thin, politics-ah inchirhthehna atana kan hman dawn chuan a rem a ni. Mahse, America meuh pawhin a la dangchat thei lova, keini ai pawha sum leh sophisticated weapons ngah an ni a. Politics a inchirhtheh nana kan hman lutuk hi chu, kan zavai hian tan a ngai a ni.

Uar deuha ka sawi duh chu - wrong information kan pek hian kan hotute mawng kan hlim a, kan nu leh pate kan timualpho a, mipui kan ti chia i a, hei hi mitin hian i sim teh ang u. Chu chu kan ram timawitu a ni ang a, ‘Mizote’n dawt an sawi ngailo’ tih hi miin min hriatdan ni sela. Tin, Aizawl ‘hornless-city’ tih hi a mawi a, a fai a ni Aizawl pawh; chutiang chuan khaw hrang hrang pawh a fai baw k a ni. Mizote kan chhe vek lova, a chhe thei ang bera chhuahtute hi mi tha an nilo. ‘Kan thatna lai hi i sawi ang u’ tih kha ka sawi duh a.

He House-ah hian wawiinah uar deuha ka sawi duh chu - wrong information avangin mipui ti chia i lovang u; kan hotute ti mualpho lovang u; he House-ah pawh thudik sawi ang u; kan mipuite pawh an khawngaihthlak tawh lutuk tih kha ka sawi duh a ni. Mahni hna theuhah rinawm ila, chu aia hnam ropui chu an awm lo a ni. ‘Retheih leh hausak a ni lo’ tih kha uar deuhin ka sawi duh a. Kan police deptt, taxation deptt. leh PHE-a thawktute theihtawp in chhuah a, a lawmawm a; ‘tang zel ang u’ tih kha Pu Dy. Speaker, ka sawi duh a ni a.

Tichuan, kan Minister zahawm tak Pu Tawnluia demand te, Pu Lalchamliaana demand te leh Pu Lalruatkima demand te hi Zoram hmasawn nan ‘pass ngei ni se’ tih kha karawn support a ni e. Ka lawm e.

DEPUTY SPEAKER : Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Dy. Speaker, ka lawm e. Wawiinah Minister zahawm tak te pathum demand kan sawiho mek a. Pu Dy. Speaker, a hmasa berah chuan Demand No.16 - Home Department hi ka sawi duh a.

Nichina zawhna chhannaah Agriculture Department Minister zahawm tak khan leilet tihchhiat chungchang kha a sawi nual tawh a. Amaherawhchu, Pu Dy. Speaker, Indo-Bangla border fencing hi a nodal department chu Home Department a ni a. Hemi Indo-Bangladesh border fencing avangi hian hmun hrang hrangah water-logged a nasa a, harsatna hrang hrang kan tawh a ni. Mi eizawna a tichhe nasa khawp mai a, nichinah pawh kan sawi chhuak tawh a.

Pu Dy. Speaker, i phalnain - *First Report relating to Home Department presented to the House* hi Ni 15 November, 2017-a an thehluh a ni a, Indo-Bangladesh border fencing siam anih avangin harsatna hrang hrang mipuiten kan tawh chungchang a ni a. Ka bial pumpui hi lui kama awmte an ni a. Luikamah chuan kan hre vek a, ram a fertile a, mahse eizawna chi hrang hrangte tihchhiatin a awm a ni. Indo-Bangladesh border fencing hi 2015 a tan a ni a, khati lai khan hetiang harsatna hi kan tawh dawn tih kan hre miah lova. Indo-Bangladesh Border fencing-ah hian tumah dodal kan tum lova, amaherawhchu, kan harsatna tal hi chu min facilitate se kan duh a ni. Hei hi project lian a ni a, vawi tam tak sorkarah pawh, 'engvangin nge hetiang project lian thamah social impact assessment hi tun thlengin tih a la nih loh; ti turin sorkar hian eng harsatna nge a neih? tiin sorkarah pawh kan thlen a. Mahse, hetiang fund hi an neih loh avangin tihthei a la ni rih loh thuin min chhang a ni. Khawngaihni hei hi a wind-up hunah min hrilhfiah thei se ka duh a. Tin, hemi chungchang hi Mizoram University-ah pawh application ziakin kan thehlut a, khawngaih takin min evaluate sak theih chuan ka lawm hle ang a.

Pu Dy. Speaker, i phalna angin Report-a ka sawi lan duh chu, Nos. of villages (in district-wise) falling outside the Indo-Bangladesh border fencing are - Mamit District - 10 Nos; Lunglei District - 18 Nos; Lawngtlai District - 29 Nos. Heti chung hian sorkarin tun thleng hian engmah rel a la nei lova, fencing pawn lama awm a phal em; an phal o em tih engmah sawi a la nei lo a ni. Chuvangin, Home Department hian social impact assessment tal hi chu nei thei se chu kan duh khawp mai a. thindanga harsatna hrang hrangte chu awm tho mahse. Tin, mi eizawna a tichhiat bakah tuna kan harstana chu - company khan an duh duhna hmunah leivung an paih a, khami leivung kha luih a luang a. Tunah hian Khawthlang Tuipui ah siltation avangin harsatna tam tak kan tawh a ni.

Kan Home Minister zahawm tak hi *gentleman* a ni a, a hriatna pawh a tha a, a fakawm a. Tuna kan harsatna ka han sawite pawh hi min hriatsak se ka duh khawp mai a. Pu Dy. Speaker, chu zawng chu Home Department chungchanga ka sawi theih ni se.

Tichuan, Demand No. 38 - Rural Development Department chungchangah a hmasain RD Minister chungah lawmthu ka sawi a. Tlabung-ah RD block min dahsak a, kan lawm tak zet a. Tlabung, Mizoram-a Sub-Division awmna hmasa ber hian RD Block neih pawh hi kan phuinn ka hria. Pu Dy. Speaker, MLA ka nih tirh atangin

theihtawp ka chhuah a, 1988-ah he House-ah ka han lut ve a, Khang Hunlai atang tawh Khan Tlabung RD Block neih hi theihtawpin kan nawr ve a ni. Hei, vawiinniah chuan tihhlawhtlin anih thu kan dawng a, ka lawm tak meuh a. Tin, chumi rual chuan, a stakeholders zawng zawng - official-te, min buaipuitu kan minister chungah pawh lawmthu nasa takin ka sawi a ni.

Tichuan, RD Block hmang hian problem hrang hrang kan neihte pawh kan solve theih kan inbeisei a. Session apiangin hian RD Block kan neih loh avanga harsatna kan tawh te kan sawi thin kha a ni a; tunah erawh chuan kan nei tawh a, kan lawm em em a ni. Tin, kan bial chhungah hian BADP hna thawh a awm ve nual a, helaia ka sawi duh chu, an hnathawh hi tha taka ven a ngai a ni. Black-topping of road from Khojoisuri - Chawilung South hi cheng nuai 160 senga thawh a ni a, hmannah chu ka va tlawh ve a. An thawh zawhna a la rei loh nen rin aiin a tlo lo khawp mai a, kan minister zahawm tak hian hei hi lo chhinchhiah se ka duh khawp mai a.

Tin, Lungsan RD Block hnuaiah construction of Tlabung Govt. School Complex tih mek a nib awk a, a lawmawm ka ti khawp mai a, cheng nuai 75 dah a ni a, a hna hi 'uluk taka an thawh kan duh tak meuh a ni' tih kha ka sawi duh bawk a ni.

Land Revenue & Settlement Department-ah hian tawitea sawilan ka duh chu, he department pawimawh zia ngaihtuahin a thawktute an indaih lo nasa khawp mai a, zawhna pawh siam a ni a. Revenue Department hnuaiah hian surveyor post ruak 71 lai a awm a, a pawh hle mai a; Surveyor tel lo chuan hna a thawh theih loh a ni. Department ah pawh surveyor indaih lohna avangin hna a chak thei lova. Chumi ruala kan minister hnena ka ngen duh chu - National Highway-302 lai mek a ni a, company pawhin land acquisition chungchangah harsatna an thlen ve bawk a. Chuvangin, compensation hi dik takin leh a hma thei ang bera pechhuak turin ka ngen a ni.

Pu Dy. Speaker, chu zawng chu ka sawi theih ni se. Ka lawm e.

DEPUTY SPEAKER : Member zahawm tak Pu K. Laldawngliana ka sawm e.

PU K. LALDAWNGLIANA: Pu Dy. Speaker, ka lawm e. Kan Dy. Chief Minister leh kan Minister zahawm tak pahnihte demand sawina hun tha, boruak tha tak karah kan nei hi ka lawm hle mai. Demand No. 38 - Rural Development hi ka han sawi hmasa ang a.

Rural Development kaltlang hian zokhua leh rampum hian hmalakna tam tak a awm a, hmasawna tam tak kan hmu hi a ropui ka ti a. Kumkhat laeh thlahnih chhungin ka bial chhungah pawh hmasawna tam tak kan hmu a, hengte avang hian department

thawktute zawng zawng leh Minister concerned te chungah lawmthu kan sawi duh bawka.

Hei, Khamrang hmunah tuitla te leh chhiat tawka kawnga harsatna tawka te tan Mualkhang-ah hall tha tak mai min sak sak mek avang pawhin lawmthu kan sawi duh bawka ni. Kan hriat angin sorkar tharah district thar pathum, DO office te hawn chhoha hmalak mek ani te hi lawmawm kati a, ropui ka ti hle a ni. Tin, RD Block thar pahnih kan han hawng thar ringawt pawh hi; Kawrtethawveng-ah khan ka zuk kal ve a, kum 20 chuang an lo buaipui tawh a, tun sorkarah hian thliar bik awm miah lovin, an lawmthu sawi kha ka han sawichhuak ve duh a ni. RD block thar pahnih - Tlabung leh Kawrtethawveng-a hawn te hi a ropui hle a ni.

Ni-100 inhlawhna hi a sawi lohtheih loh a; sorkar hmasaah khan ni 50 vel an inhlawh theih thin a, tun sorkarah chuan ni 100-ah ni 100 inhlawhna a han awm te hi a ropui ka ti a, hmasawna tam tak kan hmu a ni. Keini bial chhungah pheih chuan sawi ang khan khawtin mai, han sawichhuak ve hrim hrim ila thain ka hria - Thingdawl, Bualpui, Kawnpui, Hortoki, Khamrang, Mualkhang, Zanlawn, Bukpui, Nisapui, North Chaltlang, Lungmuat, Serkhan, Lungdai-ah te hian hmasawna kan hmu nasa a, kan lawm takzet a.

A dawta chuan, Demand 26 - Information & Public Relation-ah hian sawi leh ka duh a. Kan rorelna inkhawmah hian felfai takin thawktu ten hma an la a, live telecast-in engkim mai tihlan vek a ni a. Hei hi DDK te, Local TV ah te pekchhuah leh vek a ni a, hengah te hmalakna ropui tak kan hmu te hi a ropui ka ti a. Chutihruah erawh chuan, social media te hian kan tawngsual leh sawisual tichhawn te a ni thin a. Hmanhmawh deuhin tunah pawh kan sawi ta a, kan tawngsual lai tak kha an han pechhuak a, sawifiahna leh ngaihdam han dilna te sawichhuah a ni leh lo thin te hi a pawka ti a. He ram rorelna information kan peknaah hian ram mipuite sukthlek, thalai rual, a nuai tam tak lo en te hian, kan ram, helaia ro kan relnaa kan thusawite a diklo lai chauh information kan pe thin te hi a pawka ti a. Chuvang chuan, theih ang tawkin mahni bial theuhah hma kan la a, ke kan pen theuh bawka. Rinawm tak leh taima takin hma kan lakna theuhah hian information felfai thazawka hi awm zel sela, hei hi chhunzawm zel sela, kan thalairual pawhin thudik hi i ngaipawimawh ang u; rinawm takin kan mawphurhna theuh hi thawka tlang ang u.

Demand No. 6 - Land Revenue & Settlement-ah, hei 'kan rohlu' ka ti mai a; LSC enkawltu an ni a, thawktute an indaih lo hle a, amaherawhchu an theihna zawng zawngin an thawka, staff-te chungah lawmthu ka han sawi a. Fel-famkim lo leh eng emaw chu a awm ve tho ang a, amaherawh chu, an theihna zawng zawnga LSC chungchanga harsatna kan tawhnaah pawh theihtawpa an hmalaknaah lawmthu ka rawn sawi bawka ni.

Demand No. 16 - Home Department chungchang hi kan sawilang tel duh a. MNF-hnam pasaltha leh martyr te chhungte tana sorkarin hna a lo pek tawh hi 437 a ni tawh a, tin, chhawmdawlina - Ex-gratia payment te, Housing Assistant te leh inhmun tamtak an lo pek tawh te hi ropui ka ti a. Tunhnaiah kan sipai boral ta te compassionate ground-a hna 300 chuang pek a ni te hi a ropui ka ti hle a ni. Chung zingah chuan kan bial chhunga chhungkaw 9 lai an awm ve a, ‘kan lawm hle a ni’ tih kha kan sawi duh bawk a ni. Chutihruual erawh chuan, Mualvum-a battalion quarter te a chhe si a, hengte hi hmalak theih a ni em?

Demand No. 30 - Disaster Management & Rehabilitation-ah hian, kan bial chhungah pawh leimin te, lei tawlh te, fur huna han min chhonzawm leh mai tur hi Kawnpui te, Thingdawl te, Lungdai-ah te a awm a, proposal pawh felfai takin kan siam a, khang te kha ruahsur hma ngei hian a hlawhtlinna han hmuh theih a va han chakawm em!

Kan Dy. Chief Minister chan Demand No. 25 hi a sawiloh theihloh a. PHE Department hi kan hriat angin, kan rampum hian tui tha kan neihna tura hmalakna hi a nasa a, kan sawi nasa tawh bawk a. Keini bialchhungah pawh JJM kaltlang hian hma kan la nasa em em mai a, hotute chungah leh hnathawktute chungah lawmthu kan sawi a. Hei, Thingdawl te, Bualpui te, Zanlawn te, Dilzau te, Bukpui te; tunah hian Kawnpui leh Hortoki-ah a ai nasa in min han tihsak leh dawn bawk a, heng te avang hian lawmthu kan sawi duh bawk a ni. Hei, tun hnaiah a-thal deuh hlek a, ka bial chhung Zanlawn leh North Chaltlang-ah khawl a chhe hlauh mai a, amaherawh chu MLA fund te leh kan hlauh tein a thlawnin tuite kan han sem a, kawng thalote pawh kan han siam a. Tichuan, a khawl te pawh an rawn siam tha leh tawh a, department thahnemngaihnaah lawmthu ka sawi bawk a ni. Keini bialchhung atana chhinchhiah tlak em em mai, sorkar hmasa pawhina a tihtheih loh - Ni 22 April, 2022 khan Kawnpui PHE Sub-Division kan han hawng thei te kha thinlung takin Tuirial bial aiawhin lawmthu kan sawi bawk a ni.

Demand No. 46 - UD & PA-ah hian hmalakna sawilan tur tam tak kan nei a. Keini bial hi kan vannei a, Kawnpui, Thingdawl leh Bualpui khu an tel ve hlauh mai a, hemi kawngah hian project te kan han siam a, kan Dy. Chief Minister-in lehkha te min han ziah sak a, Director te pawhin hma an la mek a. Hengte hi kan project, tul mamawh kan rawn siam ve te kha, ‘kan lo thlir reng e; min lo hre ve reng rawh u’ ka rawn ti bawk a ni.

Demand No. 13 - Personal & Administrative Reform hi ka han sawi ve leh duh a. Lawmawm em em mai chu - ‘MR’ kan tih thina kha, ‘Provision & Employees’ tia thlak a ni a; malsawmna dawnga MR hlankai zawng zawngte aiawhin lawmthu sorkar chungah hian kan sawi ve duh hrim hrim a ni. A lawmawm ka ti; tunhmaa an tih theih loh, kumtin January Ni 1-a an hlauh 4% han chan te, TA/DA pawh official-a an kal

chuan an han dawn ve theih tawh - medical allowance te, maternity leave te, paternity leave te, casual leave te an han nei ta te hi a ropui ka ti a, a lawmawm tak zet zet a ni.

Awle, heng, kan Dy. Chief Minister zahawm tak leh kan Minister zahawm tak pahnihte demand hi ka rawn thlawp a, pass ngei turin ka rawn support a ni e. Ka lawm e.

DEPUTY SPEAKER : Tunge sawi leh ang le? Hun a la tawp lova, sawi duh kan awm tawh lo em ni? (*Member thusawi duh an awm rih lova..*) Awle, kan chawl ang a, chawhnu dar 2-ah sitting kan chhunzawm leh dawn nia.

(Recess till 2:00 PM.)

2:00 PM

DEPUTY SPEAKER : Veilam chu an nil tlat mai a! Engtiziange ni, quorum kan tling dawn lo tlat mai. Aw, tikhan quorum kan tling a; sawihona kan chhunzawm leh ang a, tunge sawi hmasa ang le? Member zahawm tak Dr. ZR Thiamsanga ka sawm e

DR. ZR. THIAM SANGA : Pu Dy. Speaker, ka lawm e. Nia e, hei sawi duh vak kha an awm si lova, hun te pawh hi hmang tam deuh ila a tha ang, tiraw?

Awle, vawiin niah hian kan Minister pahniht - Pu Ruatkima leh Pu Lalchamlia bakah kan Dy. Chief Minister Pu Tawnluia demand te kan han sawiho a ni a. A hmasain PHE, Demand No. 25 hi han sawi ila.

Hei, Mizoram mipuite ina kan mamawh em em, thingtlang leh khawpuia kan mamawh - tui chung changah kan harsatna nasa takin he sorkar hian hma a la a. Tunah Mizoram puma in 98,461 lai maiah tui connection pek a ni te hi a lawmawm hlein ka hria a. Tunah hmabak in 34,599 la awmte hriat hian, he sorkar hnathawh hi a ropui hlein ka hria a. Thingtlang mite tui harsatna tam tak pawh tunah chuan sutkian a ni ta a, a lawmawm hle a ni. Tin, ka bial chhunga khaw 17 lai maiah JJM hnuaiah tui hnianghnar taka kan neih theihna turin hmalak a ni a, a then chu an zo tawh a, a then chu hmalak mekte a la ni a, a lawmawm ka ti hle a ni.

Amaherawhchu, hei ka bial chhung JJM ina a huam loh Zote, khaw pawimawh tak mai hi, an tuizem a lian lova, hei hi chu min ngaihtuah sak ngei ka beisei a. Tin, Zote reservoir bakah hian ka bial chhung JJM hnuaia tui lak tawhnaah khan, Tualcheng hian reservoir an nei khawp lo deuh hlek a, hei hi min ngaihtuah sak se ka duh khawp mai. Tin, thil lawmawm tak mai, Champhai District mai tan pawh ni lo, Mizoram pum tan pawha thil hlu tak mai – Champhai-Keilunglah khuah ah construction of dump

reservoir and development of recreation centre siam hna 98% zawh a ni ta te hi a lawmawm khawp mai a. Hei hi commission mai theih tawh tura buatsaih a ni a, a lawmawm hlein ka hria a ni.

Tin, Unban Development & Poverty Alleviation Department-ah hian, hei, kan bialah pawh hna tam tak min thawhsak tawh a, a lawmawm kan ti a. Tunah hian Champhai Vengthlang-ah khian PAHOSS - Multi Level Car Parking siamna tura hma lak mek a ni a, khi khi a ranglama min tihhlawhtlin sak ngei kan beisei bawk a ni.

Demand No. 6, Pu Lalruatkima, Minister demand - Land Revenue & Settlement Department hi, staff-te hi an indaih lova, Surveyor te pawh an indaih lo hlena chungin kum 2023 chhung khan House Pass - 2875, Periodic Patta - 274, Land Lease - 477 an han tichhuak thei te hi a lawmawm khawp mai a. Tin, kum 2020 - 2023 chhunga House Pass, LSC-a convert kha 7,799 a ni bawk a. Heng staff indaihlo chung chung a hetiang khawpa hna an han thawk thei hi a lawmawm hlein ka hria.

Tin, Information & Public Relation Department hi ka sawi lo thei lo a, wawiinah hian. Covid-19 kan vei, hripuiin a min tuam laia kan mangan zia leh kan rilru hah zia te kha kan hria a; khatiang chung a I&PR Minister leh a thawhpuite inpekna kha sawi hmaih chi a ni lova, a ropui takzet a ni. Mizoram mipui hnenah information an pek ran thin zia leh hripui dona kawngah pawh an tangkai zia te kha, wawiin niah hian sawilan leh ka duh a ni.

Tin, Mizoram Journalists Association te tana hamthatna hrang hrang siam a ni te hi a lawmawm ka tihpui khawp mai a. Kan journalist-te hi kan Zoram-ah hian an pawimawh a; hei, tunah hian pension scheme te pawh an buaipui mek niin ka hria a, heng te pawh hi a tihhlawhtlin dan te awm thei se a lawmawm hle ang a.

Tin, Rural Development - *Ni-100 inhlawhna* hi, dik tak chuan thingtlang miretheite tana kan inngahna ber a ni a, RD hi. Tunah hian Mizoram-ah active-job card holders hi mi 2,14,163 kan nei mek a. Hei hi thingtlang mi tan chuan a ropui hlein ka hria a, ni 100-ah ni 100 an thawk thei te hi a lawmawm hle a ni.

Tichuan, mahni bialchhungah kal i la. Ka bial chhung khaw pahnih hi ka lo sawi fo tawh thin a, kan minister pawhin min hriatpui a. Community Hall hi kan hmang tam lo nain, khawtinah hian neih hi a tul ve a. Ka bialchhung Aiduzawl-ah pawh bul min tan sak tawh a, min puitlin sak ngei ka duh a, ka rawn zawt nghal bawk a. Tin ka bial chhung Murlen hian an la nei ve thei lo a, khaw-te reuh-te nimahsela, a pawimawh vet tho mai a. Hmanah pawh khan ka sawi tawh a, khawngaihmin min tih sak ve ngei se ka duh khawp mai a. Chubaka ka han ngen leh duh chu - Ngaizawl Community Hall hi a hlui tawh a, a tha vak lo bawk a, khi khi a thara min sak saka, ruahmanna min siam bawk turin kan ngen a ni.

Hei, RD Block hi a pawimawh khawp mai a, ka bialchhungah hian RD Block ka nei ve lova. Chuvangin, RD Block ruahmanna te hi Hnahlan-ah hian min siam sak ve tawh se ka duh khawp mai a, thingtlang mi tan a pawimawh si a. Chu chu kan minister hnenah ngenngawl takin ka ngen bawk a ni e.

Tin, Demand No. 16 - Home Department hi, kan ramri (border) chungchang vela kan buainaah Home Department, kan minister leh a department chetna a ropui ka ti a. Ramri issue hi a sensitive a, sorkar hmasa pawhin theihtawp a lo chhuah tawh thin a, amaherawhchu, inter-state a han chinfel theih pawh a ni lova, central sorkar nen mumal taka inbiak-remna te a ngai zel a. Chuvangin, he kan sorkar pawh hian ramri hi a ngaipawimawh a, theihtawp a chhuah a, kan NGOs - YMA te, kan zirlai hruaitute pawhin an ngaipawhmawh a, mut-mawh hnar-mawh ah an nei thin a ni. Chumai bakah Kohhrante pawh hian kan ngaipawimawh a ni, kan ramri chungchang hi. Hemi chungchangah hianin Pu Dy. Speaker, tumah hi indem theih niin ka hre lova, theihtawpin i thawk tlang zel ang u; indemna tur zawng mai lovin, mi thil tihthatah te infak ve ang u. Ramri chungchang hi thil serious a ni a, tupawhin kan vei vek a ni. Chuvang chuan, July Ni 26, 2021-a Assam nen kan ramri buaia thil thlengte kha kan la hre reng a ni. Khami tuma kan police force te, kan police te luchhum-banchhum huama huaisen taka he ram leh hnam, kan ramri donaa an inpekna te kha ka chhuang a, wawiin niah hian Pu Dy. Speaker, ka *salute* a, ka zah a ni.

Khalai hmunah khan kan Home Minister te, kan Chief Minister leh a thawktute zawng zawng rorel dan thiamzia kha kan hria a, an chhuanawm hlein ka hria a ni. Engpawh nise, kan police-te hi kan thuam that a tul hle a. staff quarter, lirthei leh thil dang chungchangah te pawh kan thuam that chhunzawm zel an ngai a ni.

Tichuan, ka sawichhuah fo thin, Hnahlan Police Station chungchang kha nichinah pawh uar takin ka sawi a. Hnahlan khi kan hriat angin kan international boundary area pawimawh tak a ni a, damdawi tawlhruk te kaltlangna khaw pawimawh tak a nih avangin, khilai hmun khi kan police-te pawhin min ngaih pawimawh sak a, kan Home Minister ngei pawhin a ngaih pawimawh berte zinga mi a ni hi ka lawm khawp mai a, lawmthu ka rawn sawi a. Engkim ruahmanna felfai tak an siam tawh hi kan GAD leh Finance Department lam pawhin hei hi min rawn tih hlawhtlinsak a, a kaltlang ngei hi wawiinah hian ka beisei tlat a ni. **(Dy. Speaker: I zo thei dawn tawh em?)** Ka zo thei tep e, Pu Dy. Speaker.

A bikin kan Police leh kan Excise-te ruihhlo dona kawnga an thahnemngaih zia leh an thawhhlawk zia te hi a ropui ka ti a. Tin, NGO-te nen theihtawpin tan kan la ho bawk a, ruihhlo tam tak kan man a; man lo phei ila chuan hei hian eng angin nge kan thalaite min tihchhiat ang? Kan ram hmelma lian ber chu, 'ruihhlo' hi a ni tawh a ni. Hetiang khawpa kan thawk chung pawh hian a harsa a ni a, a do harsat zia kha kan hre tawh a ni. Chuvangin, i thawk tlang ang u; opposition, NGO leh kohhran ho nen, kan

zavaia tang tlangin, he ruihhlo dona kawngah hian theihtawpa kan tan ho a ngai a ni. *Mizoram* hi kan ram a ni a, ram dang kan nei tawh lo. Chuvangin, kan ram kan hmangaih theuha, ruihhlo kan dona kawngah pawh hian tangruala, kan Police leh kan Excise force-te theihtawp i chhuahpui ang u.

Pu Dy. Speaker, kan minister-te leh kan Dy. CM demand-te hi ka thlawp a, he House-ah hian a pass ngei turin ka rawn thlawp a ni e. Ka lawm e.

DEPUTY SPEAKER : Member zahawm tak Pu C. Lalsawivunga ka sawm e.

PU C. LALSAWIVUNGA: Pu Dy. Speaker, ka lawm e. Demand No. 6 - Land Revenue & Settlement-ah hian lut nghal tawp mai ila, hun a chep si a, sawi kan duham thin bawk si a.

A hmasa bera chuan kan minister zahawm tak hnen atanga thu hriat duh ka nei a, chu chu - Chekbawk house-site plan revised hi zawhfel a ni tawh em tih hriat ka duh a. Tin, hemi plan huamchhungah hian plot engzat nge awm tih te; surrender engzat nge awm tih te; Tin, sorkarin hemi atang hian land bank-ah plot engzat nge a daha, engzat nge awm tih te; chumi land bank chu eng atana hman tur nge tih te hriat ka duh a, kan minister zahawm takin rawn react se la.

Tin, kum 2018 MNF party - election manifesto-ah khan, 'khawpui chhunga cheng inhmun la nei lote inhmun pek vek an ni ang' tih a ni a; kha kha an manifesto a ni a. Heng Chekbawk hmuna house-site plan-te hi heng atan te hian pekchhuah tum a ni em tih kha, Revenue chungchangah chuan ka han sawi theih ni mai ta se. Surveyor indaihlohna te a nasa a, Hualngohmun-a kan ram neihah pawh kut kan la thlak lova, henge pawh hi hmalakna tur pawimawh tak a ni a.

Tin, Demand No. 35 - Rural Development-ah hian RD hnuaiiah DRO office-cum-Panchayat Bhavan, District tharteah khan sak mek a ni a. Tichuan, RD Department hnuaiia convergence sum hmanga sak a nih thu ka *unstarred* Question-ah khan min chhang a. Chulaiah chuan hriat duh ka neih avangin han zawh leh ka duh a – 'Eng scheme te nge converge an nih?' tih kha zawhna chhanna ah khan tarlan a ni lova, chu chu min hrih theih ka beisei a. Tin, 'heng office sakna atana scheme converge-te leh, chung scheme atang chuan engzat percentage nge sum hman a nih?' tih te kha ka hre duh bawk a ni. Tin, Ministry of Rural Development-in MGRNEGA hnuaiia thawkte EPF hman tir turin kum 2018-ah khan state sorkar min hriattir tawh a, thawktute hian an nghakhlel em em mai a. Hetih laia ka zawhnaah bawk hian, zirchian mek anih thu kha min chhanna a ni a. Vawiin thlenga 'zirchian mek' la tih hi ka ngaihtuah vang vang a, kan sorkar hian tih tak taka hmalak hi a tum lo nge tih zawhna a awm lo thei lo a.

Tin, Ministry of RD-in an rawn tih ang hian ‘MGRNEGA hnuaiia thawk te’n EPF an enjoy ngei theihna turin kan minister hian chak takin hma a lakpui thei ang em?’ tihte kha ka sawi zawt bawk a. Tin, ka zawhnaah tho - MGRNEGA material component leh administrative fund hi first trench leh second trench chiah lak tur a ni a. First trench leh second trench heng kum - 2021-2022, 2023-2023 ah te hian dawn a nih laiin, second trench hi dawn a la ni lova. Pawisa kan dawn ang ang hi hman chak tawk loh vang nge, 60% tal hman tura tih kan hman loh vang nge, second trench tun thlenga kan la hmu lo te hi a chhan ka hre duh a. Chuvang chuan, ‘second trench hi engtikah nge dawn beisei a nih?’ tih te kha ka han tarlang duh a ni.

Tin, Demand No. 16 - Home Department-ah hian, MR bill ba 30.8.2022 ang chuan ₹6,93,99,509/- a awm a, TA/DA ba hi cheng 15,58,45,746/- a mek bawk a. Tin, Assam-a awm 3rd IR Batallion te GNRC Hospital-a an medical treatment bill ba hi ₹21,91,953/- a awm bawk a ni. Chutih lai chuan kan budget pumpui hi Home bikah hian ₹8,00,26,44,000 a ni a. Chung kan leiba te chu heng atangte hian kan rul thei ang em; rulh tum a ni em? Hetiang zat leiba neiin tunah hian kan awm mek a ni a. Chumi bakah chuan Police Constable post ruak hi 2,990 a awm mek bawk a, ‘hengte hi engtin nge hnawhkhah tum a nih’ tih te ka hre chak bawk a. Tin, chubakah chuan Home Department hnuaiia hian ramria kan police duty-te hi an fakawm em em a. Chutah chuan, a bik taka ngaihsak leh duhsakna pek pawh hi an phu hlein ka hria a ni.

Tin, Taxation Department hi kan ram inngahna, kan sum hnar ber a ni a. Amaherawhchu, kumin budget-ah 84.78 lakh lai maia an han tlem hi a pawl ka ti a; ka sum bawm an nih avangin thuan chak an ngai a; helai hi chu kan sorkar hian SEDP cheng vaibelchhe 595 a dawn atang te khan duhsaka, pek belh dan awm se ka ti a ni.

Tin, Demand 46 - UD & PA ah hian, Aizawl-Smart City hnuaiia *Roadside Drinking Water leh Reverse Vending Machine Pilot Project* te hi ‘engtikah nge paih/hman theih a nih ang?’ tih te ka han tarlang duh a. Khami bakah khan Sewage Treatment, Bethlehem Vengthlang hi Ni 20 January thla khan hawn a ni a, mahse, he SIPMIU project hi commission a la ni lova. Commission la ni lo mahse, hawn a ni a; hawn anih hma pawh khan hmun 5 velah Bethlehem Vengthlang-ah chuan ek a put a, a tenawm em em a ni. A department thawktute (**Dy. Speaker:** I zo thei tawh dawn em le?)

Ngawi rawh lawk, Pu Dy. Speaker; min lo hrethiam teh. Tichuan, Bethlehem Vengthlang Local Council te pawh an fakawmin ka hria a; an thawhrimnaah vawiin niah hian ka fak duh a. Tichuan, *Smart City* hnuaiia hian engatinge Aizawl khawpui chhungah luikawr tawp pui-pui leh rimchhe pui-pui kan neih ho tan hian kan project hi a kalpui thei zawk lo em ni? Thil dangah kan hmang peng a, hei hi ngaihtuahna thar hman pawh a tha khawpin ka hria a ni. Pu Dy. Speaker, ava han buaithlak em! PHE Department pawh ka sawi hman lova; leiba tamtak nen PHE pawh hian bul a tan chho

a ni. Contract bill leh supply bill a crore tel hman a ni a. Tin, company leh farm te hnenah pawh a crore tel kan ba bawk a ni.

Tikhan ka duhtawk mai ang e. Ka lawm e.

DEPUTY SPEAKER : Member zahawmtak Dr. BD Chakma ka sawm e.

DR. B.D. CHAKMA : Pu Dy. Speaker, ka lawm e. Hei, vawiinah minister pathumte tan demand kan sawi ho a ni a. A hmasain, Demand No. 38 - Rural Development Department-ah ka lut ang a.

Kan Minister zahawmtak Pu Lalruatkima chungah lawmthu ka sawi a. Hei, nimin piah nge, kar hmasa khan rangva, bial tina mi 6 tan bundle 4 zel an dawng thei tur kha lawmawm ka ti a. Mahse hetah hian ka biala harsatna awm thei chu - kuminah hian mi 6 tan pek a ni a, chutih laiin nikuma sem pawh phur thlen a la ni lova. Kumhnih tana rangva sem hi 407 truck hian a phur zo dawn si lova, khatiang khan kan awm a ni a. Chuvangin, 407 truck min hire sak theih dan te a awm sela, tin silpaulin hi bundle 1 min pek nghal theih chuan kan phur thei mai ka ring a ni. Aizawl atanga Chawngte thlenga rangva ringawt phurh nan hian a lo berah dawn ₹25,000/- bawr vel sen a ngaih ka ring a. Pu Dy. Speaker. envelope chhunga silpaulin leh card dawnna tur lehkha ka beisei laiin rangva dawnna tur chauh ka hmu a. Chuvangin, khawngaih silpaulin hi bial tinah min pe thei se kan lawm ngawt ang.

Chutihrualin, PMAY chungchangah, bial dang ka hre lova, ka biala thil kal dan ka demna pawh ni chiah lova, mahse, a mak ka ti khawp mai. Beneficiary list-a awm ngei hminga, mihran daih pawisa dawng te an awm a ni. Tin, hming inang si, pa hming inang lo pawisa dawng te an awm bawk a. hi Pu Dy. Speaker, hei hi hming dik lo account ah an thun lut thin tihna a ni a. Chuvangin, khawngaihtakin kha kha min lo react sela.

Hei, Village Council-a VCP te ‘in tisial em?’ tiin ka zawt vel chhin a, mahse ‘kan tisial lo e’, an ti a. Chutiang chuan BDO office staff-te ka han zawt a, ‘In hria em, hetiang thil diklo hi?’ ka ti a, an hriatloh thuin min chhang hlawm a. Thil “tisual lo” leh “hre lo” an awm laiin, khatiang beneficiary list a awm kha a pawi em em a ni. Chuvangin, Pu Dy. Speaker, khawngaih takin kan Minister zahawmtakin hei hi min lo chhinchhiah sak se ka duh bawk a ni.

Tichuan, Home chungchang sawi hi chuan rilru a na thin a. Ka bial chhunga police staff-quarter te a chhe khawp mai a, Pu Dy, Speaker. Kan OC hi mi zahawm an ni a, a awmna quarter hi Grade-IV ho quarter ang vel a ni a. Hei hi a tharin min sak sak thei em? Chu mai bakah hei, Chawngte Police Station-ah hian hmeichhe tan lock-up kan nei lova, mipa tan chauh a awm a. Chawngte hi khawpui a ni ve tawh a; hmeichhe

thubuai neite pawh an awm ve thin a. Chuvangin, hmeichhe lock-up bik awmlah avanga an buai zia kan police ten an sawi thin a ni.

Tin, Vaseikai - Police Station ah hian Women Constable an a awm lova, Chawngte leh Borapansury-ah pawh a ni tho a, Pu Dy. Speaker. Chuvangin, heng police station pathumah te hian hmeichhe police pakhat theuh min dah sak theih chuan a lawmawm ngawt ang. Normal fund atanga a theihloh pawhin SEDP-Police lak theih dan tal awm se. Pu Deputy Speaker, SEDP-zirtirtu pawh an awm chuan, SEDP-Police pawh awm ve thei tho turah ka ngai a. Achhan chu, SEDP hnuai nuai 3 sem tih kha beiseiawm tawh lova, Govt. Police tal hi chu BJP-MLA ka nihna angin hmeichhe hamthatna tur atan ka han auchhuak a ni, Pu Dy. Speaker. Chuvangin, Women Police hi normal fund atanga a theihloh pawhin SEDP-Women Police siamin, thla khat chung training pek hnuah Thana ah te hian post dan awm se a that ka ring a, Pu Dy. Speaker. Chuvangin, hei hi min ngaih pawimawh sak se.

Tin, Public Health Engineering Department hi a tawpna atan, hun k an hmang rei lo ang a, minute 5 leh a chanve chauh a ni tawh a. Public Health Engineering-ah hian ka bial bikah, Indo-Bangla border fencing pawnlamah hian khaw eng emaw zat a awm a, electric leh tui supply pawh engmah awm lovin an awm tawp a ni, Pu Dy. Speaker. Hetah hian central-state ngaih dan ka la hre lova; electric eng leh tui connection tihna tur Jal Jeevan Mission hnuai pawisa tam tak Delhi tlang atangin State sorkar-ah a lo kal thin a. Chuvangin, border fencing outline-a khaw awmte tan hian tui connection min pe thei ang em?

Pu Dy. Speaker, ka lawm e. Kha, hun chu ka hmang rei lo khawp mai; minute 6 leh a chanve chauh a ni a. Spare time kha chu ka hnua sawitu tur Pu Ngunlianchnaga, MLA zahawmtak hnenah pek belh mai turin ka lo recommend e. Pu Dy. Speaker, ka lawm e.

DEPUTY SPEAKER : E, hun i hmang tha khawp mai. Tunge sawi leh ang le? Awle, Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Deputy Speaker, ka lawm e. Demand No. 6 - Revenue Department hi han sawi hmasak ber ka duh a.

Revenue hi department pawimawh tak ni si, a pawimawhna anga thawk chhuak zo lo tur khawp hian a thawktute an indaihlo hle mai a, hei hi a pawika ti a. Hun rei tak tak nghah an ngai thin hi a ziaawm theihna turin surveyor te lak belh a tul hlein ka hria.

Revenue Department hi a bik takin ramri leh a chheh velah hian an pawimawh zual hlein ka hria a. Hmanni lawkah ka bial chung Vairengte ramri ah harsatna kan tawka. Khung lai ramria huan-lo-ram nei te hian pass nghet, *periodic patta* an neih vat

a tulin ka hria a; Assam lam hian pass an inpe rang si a. Chuvang chuan, kan *VC-pass* ringawta hi chu nakin zelah document-a tlinglo palh a awm takin, kan Revenue Minister hian min hriatsak se. Heng a pawimawh zual bik hi chu ram leh hnam tan a ni tih hriaa priority kan peka, a special deuh hleka kan en hi a tul hlein ka hria. Tin, Assam nen kan intihbuaia silai puahna hmunah khan Vairengte VC-I ten ram chhungkaw 70 hnenah ram theh a. Chumi hmunah chuan in sak niin, eng emaw zah luah luh tawh a ni a; khulai khu a sensitive-in, a pawimawh khawp mai a. A bik takin khu khu *House-pass* kan pek vat a tul hlein ka hria a, kan minister-in min chhinchhiah sak bawk se a lawmawm ngawt ang.

Tin, Vairengte thlang lama NHIDCL ina compensation an pek package-II an nih avanga pawisa an la pek ve loh pawh kha department-in kan enzui viau a ngai ang a. He thil hi a kal fuh lo palh a, Assam lama thil a kal anih chuan ho tea boruak sang tak awm theihna tur a ni a, tin, ‘kan ram kan chan dawn’ tihna a ni ang a, a pawitakzet ang. Chuvangin, department-in kan en ulukpui viau a tulin ka hria.

Tin, zawhna pawha ka zawh tawh - Bilkhawthlir town extension chungchang kha a fel hnai dawn niin ka hria a, ka lawm khawp mai a. Hma chak leh zuala kan lak theihna turin kan Minister-in min chhinchhiah sak se a lawmawm ngawt ang.

Demand No. 38 - Rural Development hi sawi ve ka duh a. Ka hmaa sawitu ang khan, Pu Dy. Speaker, I dinglam leh veilam te rangva kan han dawng teuh mai a, a lawmawm hlein ka hria; thil lawmawm tak a ni. Hei hi bial chhunga mamawh - in kang te, chhiat tawh thilah kan inpuih ve theihna a ni a, ‘a lawmawm takzet a ni’ tih kha kan sawi duh a. Tin, DRDA central lamin min tihtawp sak a, enkawl zui theih loh avangin State sorkarin thingtlang mipuite hmasawna a kal that theihna turin DRDO a siam thar leh a. Tin, ‘DRDA’ kan tiha staff te dah ngheh an ni chho te a lawmawm hlein ka hria. Tin, BDO Office hmun hniah hawn thar an ni a, hei hi thil chhinchhiah tlak tak a ni a. A area-mipuite ka lawmpui a, hmasawna nasa tak an hmuh theihna turin duhsakna pawh kan hlan a ni.

Tin, ‘*Ni-100 inhlawhna*’ kan tih hi tun sorkarah kan minister a chak tha a, central lam a bawhzui peih bawk a, *Ni-100 inhlawhna* kan hmu tha hle mai. Ni 100-ah ni 100 inhlawhna te kan han hmu chho thei hi a lawmawm tak zetin ka hria a. Hetianga a kal chhoh zel theihna turin tan la zel ila a thain kan hria.

Tin, PMAY-Grammin hi keini thingtlang mi harsa tak takte, mahnia inkual theilo te tan ‘in sak tanpuina’ kan tih mai hi kan nghakhlel hle tawh mai a. Hengte hi engnge kan boruak kal zel hi kan minister-in a wind-up hunah han react se a lawmawm hle ang.

Hei, lawmthu sawina tur a tam khawp mai a, RD-ah hian. Kan bial chhung hall eng emaw zat RD sum kaltlangin sak an ni tawh a, kan lawm tak zet a. Tunah hian

Saihapui 'K' leh Saiphai-ah te sak mek a ni a, hengte hi kan zawh vat theihna turin 'ruahmanna min siam sak zel se' tiin ka ngen duh a. Tin, North Thinglian leh Saihapui 'V' ramri depa awmte hian hall an la nei lova, henge hi ruahmanna min neih sak turin ka han ngen bawk a ni.

Demand No. 16 - Home Department hi sawi leh ka duh a. Ramri kawng laih leh ramria harsatna kan tawhna hrang hrangah duty post tha tak mai kan han nei ta hi a lawmawm hlein a. Ramriah harsatna a awma ramri venhimna turin developed a ngai a, ramria hma kan sawn theihna tur chuan ramri khuate kha hmasawmna kan pek loha luah a nih si loh chuan, awmzia a awm thin lova. Luah theih turin kan Home Department ten hma an han sela, kawng te laia duty post tha tak tak an siamte hi a lawmawm hlein ka hria. Tunah khuan siam loh pakhat kan neih, hmanna kan Home Minister pawh ka han zawh kha, hei tunah hian a fel leh ta a, Sabual mualah duty post siam a ni dawn a, a work order pawh lak chhuah a ni tawh a, kan lawm takzet a.

Tin, chutih rual chuan, Police Department hnuaiah hmanni lawkah compassionate ground-in mi eng emaw zat police-a lak a nite kha a lawmawmin ka hria. Police Department-ah indaihlohna nasa tak a awm rualin, tunah lak theih a nih si loh avangin, compassionate ground-a lakte khan eng emaw zat min chhawk zangkhai ang tih kan ring a, a lawmawm hlein ka hria a. Amaherawhchu kan Home Department te hi ngaihsak an ngai hlein ka hria a, Zoram hmun tinah hian Home Department an hmunhma te hi a tlabal khawp mai, chei that viau a ngai a. Chuvang chuan, Home Department-ah hian nasa leh zuala kan rilru kan pek a tulin ka hria a. A lova kan awm theih loh *Law & Order* kengkawhtu te an ni a. Ka bialah pawh Bilkhawthlir highway hmun pawimawh tak, Bilkhawthlir Police Outpost chu hmuh tlak mang loh khawpin tunah hian a tlabal a ni. Hengte hi kan hotute, kan Finance Minister te pawhin min hriatpuia, a kawngte min zawnpuia, Home Department tan hian heng tlabal lutuk leh lirthei chungchangah te tlema hma an sawn theihna tur hian sum ruahmanna neih sak thei ta ila a tha awm e.

Tin, ka sawi leh duh chu, Vairengtea - IR Company Hqrs. tur kha a hmun hma te leh a building te zawh thawkhat a ni ta a. Kan Home Minister-in min lo chhinchhiah sak se, kan official te pawhin a hmun hma te enfein, hei hi a nihna tur anga function tir vata, hawn vat kha kan duh tak zet a ni. Hun a han kal chho ang a, eng emaw harsatna te a thleng lovang tih kha a sawi theih lova. Chuvangin, 'lo inruahman lawk hi a tul tak zet a ni' tih kan sawi duh bawk a ni.

Demand No. 8 - Taxation Department hi tawi tea han sawi ka duh a. He Department hi Department pawimawh tak, Mizoram sorkar tana thawh hlawk tak, tin, Mizoram sorkar ina revenue kan dawmna pawimawh taka buaipuitu te an ni a. Tunah hian Taxation Department hi chak lehzuala an kala, Mizoram tana hna nasa lehzuala a thawh theih nan puih an ngaihna laia kan puih hi a tul hlein ka hria a. Tunah district

hawn thar 3 ah te pawh hian department dangte hi chuan district office an hawng sap sap tawhin ka hria a, taxation office pawh an hawn ve ngei hi a tulin ka hria a. Kan ram tana department pawimawh tak, a pawimawhna anga kan hmang chhuak zo lo hi kan inenlet deuh a tulin ka hria. Heng district 3 ah te hian taxation te hian office an neih vat theihna tura ruahmanna siam sak a tul hlein ka hria.

Tin, Demand No. 25 - PHE Department hnuai ah hian thingtlang hmun hrang hrangah JJM hnuai tui lak a ni a, a lawmawm hlein ka hria a. Thingtlang tui harsa tak takah te tui hnianghnarin kan han nei chho ve ta a, hma nasa takin lak a ni a, Mizoram pumah, lawmawm ka ti a. Keini bialah pawh hma kan la a, lawmawm ka ti tak zet a.

Tin, PHE Department-a han sawi tel hram ka duh chu, Vairengte hi sub-division hmun a ni a. Kan sawi fo angin, sub-division (midang an pawimawh lo e tihna ni lovin), a awmna hmun Vairengte hi khaw lian taka ni a, sub-division hmun anih ang ngeiin SDO, PHE hi mamawh kan inti a, hei hi dah hram anih theihna turin ruahmanna min siam sak thei se. Tun rum rumah SDO hi dah theih a nih loh pawhin JE hi Kolasib atang zuk bial tawh lovin, a hmunah thutchilh ve se tih hi khawtlang duh dan a ni bawk a ni. Tin, Vairengte leh Bilkhawthlir-ah ‘tui lakna thar tha kan mamawh tak zet’ tih ka sawi duh bawk a ni.

Demand No. 46, UD & PA hi sawi leh ka duh a. *Smart City* project kaltlanga hma an lakna te a ropui ka ti a, fakawm ka ti tak zet a. Thil ropui leh tha tak tak te kan khawpui chhungah hma thar lakna tam tak a han awm hi a ropui a, khawpui a changkang a, hma a sawm phah hle a ni. Chutih rual chuan UD & PA enkawl thingtlang lama town kan neihte hi nasa zawkin rilruah awm thar se a tul hlein ka hria. Kan bialah pawh tlema han sawi zau ka duh chu, Kolasib town area ah hian - Rengtekawn, New Builum leh Goshen te an awm a, MLA constituency ah Serlui constituency chhungah an awm a. Hei hi ka han sawi duhna chhan chu, district capital Kolasib kan va demna ni lovin, kan district capital-a officer leh hruaitute, a khawtlang hruaitute pawh development kan inchuh a ni a. Chuvang chuan, Kolasib town area chhunga awm sia, MLA bial danga a awm tak si avang hian ‘notified town’ kan tih hi, town area mah ni se hmasawmna hi an hmu tha lo hle mai a. Chuvang chuan, kha aia rual deuh zawka Rengtekawn, Goshen leh New Builum ten an dawn theihna tur hian kan hotuten min lo hriatsak se. DUDO lamah pawh hian ngaihtuahna zau deuh lo seng se tha in ka hria a ni.

Tin, bawlhhlawh paihna hi Vairtengte-ah khuan kan mamawh khawp mai a. Kan sorkar tirh khan sorkar hmasain an lo ruahmanna te kal chhohpuiin, tun sorkarin sum eng emaw zat dah belhin kan han siam a. Amaherawhchu, kum hnih thum a han ni a, khu khu a aia zau leh lian tha zawk kan mamawh tak zet a ni.

Tichuan, Pu Dy. Speaker, vawiina kan minister pahnih leh kan Dy. CM demand te hi tha ka ti a, ka rawn support a ni e. Ka lawm e.

DEPUTY SPEAKER : Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Dy. Speaker, ka lawm e. Vawiinah hian hmaa mi te sawi ang khan, kan Dy. CM leh kan minister pahnih te demand kan han sawi ho a ni a. Ka ngaih pawimawh em em mai chu - Demand No.16 - Home chungchang hi a ni a.

Pu Dy. Speaker, Ni 23.2.2023 (Friday) a private resolution kan sawihonaah khan kan Opposition group leader, Serchhip bialtu zahawm tak Pu Lalduhoma khan kan chief minister kha case thubuai nei ni khan a rawn sawi a. Hei hi vawiinah hian *Calling Attention Motion* a rawn put luh hial ka duh a. Amaherawhchu, pawn lamah programme ka neih zawk avangin ka ti hman ta lova, a pawu ka ti hle a. Ani hi IPS Officer niin, kum ruk zen zawn police hna lo thawk tawh a ni a, case nei leh nei lo chu a chiang turah ka ngai a. Hei hi ‘ka ngaih pawimawh takzet a ni’ tih vawiin demand sawina niah hian ka han sawi duh a. Khawngaihkan kan Home Minister hian nakinah a wind up hunah min rawn tarlan sak se la ka duh khawp mai. Hei hi a pawu ka ti tak zet a ni. (**Pu Lalduhoma:** Hei hi Mizoram First Movement ten April 11, 2022-ah khan Lokayukta-ah Chief Minister lakah hian case an file a ni.)

Case an file hma hian eng emaw hekna a lut mai kha a ni lo maw? ‘Case’ han tih teh pui tur a ni em? Ani IPS Officer kum ruk lai lo thawk tawh a ni a; chiang turah ka ngai a. A ni lo a nih chuan, he House-ah hian ngaihdam a dil ka phut a ni. Hei hi kan House Leader leh ram puma mimal intihhmingchhiatna a nih avangin ka ngaih pawimawh tak zet a ni tih ka sawi duh a. Chuvang chuan, hei hi ngaih serious loh theih a ni lova. Kan membera dangte khan khami private resolution kan sawiho tuma a thusawi khan an chik lo deuh em aw; ka hre sual em maw ni chu aw ka ti hial a. ‘Mi a surprise hle a ni’ tih ka sawi duh a ni.

Khawngaihkan kan Home Minister in a nihna tak, a wind-up hunah ‘min tarlan sak ngei se la ka duh a ni’ tih Demand sawi hunah hian ka sawi duh a. Chuvang chuan, hei hi thil dang zawng zawng aia ‘ka thil ngaih serious tak a ni’ tih ka sawi duh a.

Kan Chief Minister zahawm tak hi a mizia kan hria a, a nihphung kan hria a. Chuvang chuan, hetiang case nei ni sela vawiinah hian newspaper te pawhin nasa takin an tarlan ka ring a. Chumi ni lova inhekna emaw mai mai, case pawh la tling lo te a nih pheih chuan, a sawitu hian he House zahawm takah hian ngaihdam dil leh se la ka duh a ni.

A dawta ka sawi duh chu, Demand No. 16 - Home hi, ramri buai chungchanga an hmalakna te vawiinah hian fakawm ka ti a. Ram mipuite nu leh pa, kan ram him leh him loha a mawhphurtu an ni tih hriaa a minister leh department te hmalakna hi ropui

ka ti tak zet a. Thi leh damna kar takzeta hna thawk an ni a. Chuvang chuan, vawiinah hian an hmalakna avangin kan ram ri depa khua awm zawng zawng, ka bial telin, he sorkarah hian himna an hmu niin ka hria a, lawmawm ka ti tak zet a. Vawiinah hian tih tak zetin ‘ka salute a ni’ tih ka sawi duh a ni.

A dawt lehah chuan, kan bialah harsatna neuh neuh kan nei a. A bikin kan Home Minister zahawm takin *Question Hour*-ah a sawi tawh a. Keini bial pawh kan bang chuang lova, ramria awm kan ni a. Bangladesh-ah khuan *Shanti Bahini* pahnih inkap reng an awm a. Chumi avang chuan bial fan pawh a inthlahrunawm thin a ni. Phaileng kan tlang thla a, police vehicles te a lo tha lova. Kei pawhin an petrol pawh vawi tam tak kan thunsak mai ni lovin, an motor kal chhun Gypsy te a chhe em em a. Hmanni lawkah an battery te pawh ₹5,000 zen zawnin ka leisak a ni a. Heng ram ri bik hi chu, ‘min ngai pawimawh sak thei lo em ni’ ka ti a.

Tin, battery leh motor ke te an neih that loh avangin *running start* te a ngai thin a ni a. A bik takin, West Phaileng leh Marpara ah, Marpara-ah phei chuan hman tlak an nei lova. Kan OC-in mahni-thahnemngaihna, mahni-inpekna takzetin ama private motor te a hmang thin a. Hei hi buaithlak vena lai a awm a ni tih kha vawiinah hian ka tarlang duh a ni. Chuvang chuan, hengah hian a bik taka min enpui ka duh a. Khulaiyah ramri ah kan buai kan buai a, tunah pawh refugee eng emaw zat an lo lut a. Khangah khan kan him leh him lohna te pawh a awm ve bawh thin a ni tih lai kha ka ngai pawimawh a.

A dawt lehah chuan, Rural Development Department hi keini thingtlang bialtute tan chuan ‘kan department’ a ni a; ‘thingtlang-ho department’ a ni a. Hetah hian in leh lo nei tha lote, tuna Chawngte bialtu zahawm takin a sawi ang khan, minister hian rangva te min han pe thin a, sum harsa tak karah. Tin, inhlawhna kan neihchhun, *Ni-100 inhlawhna* te hi sorkar hmasa nena teh phei chuan, nasa takin hma an la chak a ni tih ka sawi duh a. Hei hi a lawmawm tak zetin ka hria a. Mipui, thingtlang mi rethei zawkte inngah ngamna tlak, he sorkara Rural Development Department lo lang ta hi lawmawm ka ti tak zet a. Keini pawh bial harsa tak te kan ni a. in kang te a lo awm a, chak takin hma min laksak thin a. Heng chhiatna tawkte pawh hian, ‘an nu leh pa department a ni’ tih pawmin, hetah hian an thlamuan phah hle a ni.

Chutih rual chuan, Ni e, an sawi ang khan ka bialah hian khaw 33 a awm a, hall la nei miah lo Rulpuihlim leh Lianbuang kan nei a. Tin, ka fund-a sak mek - Bawngthah, Bawlte leh Chungtlang kan nei a. Bawngthah leh Bawlte chu tunah hian department lamin sum awm ang angin min take up sak a, kan lawm hle a. Chungtlang bik hi tunah fund a sak mek niin, luah theih tep a ni a; kan minister-in min lo chhinchhahsak se ka duh a.

Tin, sorkar hmasaa hall an lo sak tawh Khawrihnim te, a bul lo tan uai tawh, a bante phun kim vem tawh, hma lak chhunzawm loh a awm a. Tin, West Lungdar leh Sabual te pawh la complete loh niin, Ailawng hall phei chu a chung zawng zawng thlak a ngai tawh a; MNF ministry hmasa a sak kha a ni a. Chuvang chuan, hengte hi min chhinchhiah sak theih chuan a lawmawm hle ang.

A dawt lehah chuan, Demand No. 25 - Public Health hi a changtu-pa, kan Dy. CM hian tihtak zetin a enkawl niin ka hria a. Covid harsatna karah kan Chief Minister zahawm tak, kan House Leader ni bawkin Covid kaia a thusawi te tih hlawhtlinna turin, ‘tui in tur thianghlim leh ei turah, Covid karah pawh harsatna tawh lo turin hma kan la a ni’ a tih kha a takin a lang niin ka hria a.

Hei, tlang rama awm kan ni a, tui kan harsat zia hretu vek kan ni a. Chutih rual chuan, heng central scheme lo kal, amaherawhchu, lo do let ngai chi, matching-share ngai chi a ni a. Hengah a changtu, kan Dy. Chief Minister zahawm takin chak takin ram pumah hma a la mai ni lovin, a bikin, ka bialah khaw 33, khaw tinah min operate sak vek a ni tih he House zahawm takah hian Pu Dy. Speaker, ka sawi duh a. Kan lawmna hi a percent a sang hlein ka ring a ni. Chutih rual chuan, kan Chief Minister zahawm takin matching share, sum harsatna karah pawh mipui harsatna hriaa henga a lo match zel avang pawhin a chungah pawh lawmthu ka sawi tel a ni.

A dawt lehah chuan, Demand No. 6 - Land Revenue & Settlement chungchangah, nichin khan i vei lama mite khan ngai pawimawha an sawi, *returnee*-te in hmun pek chungchang kha, kan minister zahawm takin *returnee*-te, a bikin MURA-te tan Luangmual ramah tunah hian ‘kan minister zahawm takin in hmun eng emaw zat a tifel a ni’ tih ka hria a lawmawm ka ti a. A hminga ramhnuai kum tam tak an hrehawm tawrhpuite chuan heng duhsakna an han hmu tur te mittui nen kan lo thlir sak a, thinlung takin lawmthu kan sawi a. A-enkawlna zelna kawngah, a-approach te pawh khu min buatsaih sak zel turin kan minister zahawm tak kan ngen tel duh a ni.

Tin, Information & Public Relations Deptt. hi an fakawm thlawtin ka hria a. Ramin harsatna namen lo kan tawh lain covid chungchangah information rampumah chak takin min pe mai nilovin, a bikin legislators te hnenah phei chuan zing dar 7-ah hian kan latest position whatsapps kaltlangin in minrawn pe ziah a ni. Kha khan kan bial kan enkawl na kawngah te, chhungkua leh khawtlang kan nunhona kawngah te nasa takin min tisawt a. Tin, covid hrik kan pai leh pailoh chungchangah pawh information min pek sak thin avang hian, keimahniah pawh invenna te nasa takin min pe a, lawmthu ka sawi duh a.

Tin, Urban Development & Poverty Alleviation Deptt-ah hian tawitea tarlan ka duh chu - kan khawpui hrang hrangte ka han han en a, a smart sawt khawp mai a, a lawmawm takzetin ka hria. Amaherawhchu session hmasaa ka sawi tawh ang khan, Pu

Dy. Speaker, khawpui chhung bik hi ka han thlir thin a, lungawilohna deuh ka la nei a. Private-cable tv enkawltute cable hian khawpui a titawp hlein ka hria a, hengah hian ‘dan fel zawk neih theih a ni em?’ tih a changtu hian nakinah a khaikhawm hunah min rawn tarlan sak se ka duh hle a ni. Veng tin a tawp em em mai a, heng hrui avang hian; chuvang chuan harsatna kan tawk thei a ni tih ka sawi duh a.

Chutihrualin ka bialah te pawh tun sorkarah hei kan Dy. CM enkawlina hnuaiiah *modified-town* neih ngai lohna W. Phaileng-ah kan lawmna a sang hle mai a. Khang hmalaknate pawh kha puan a ni dawnin kan hria a, a lawmawm ka ti a; ‘*Thumtea thlira kan lo thlir a ni*’ tih ka han sawi duh a.

A tawp bera ka sawi duh chu, kan Home Minister bawkw nichina ka sawi kha a lo theihngihl palh ang tih ka hlau khawp mai; kan CM casenei anga an rawn tarlan chungchang kha ‘ka ngai thutak takzet a ni’ tih Pu Dy. Speaker, ka sawi duh a ni. Ka lawm e.

PU LALDUHOMA : Anih leh, case lo nei ta sela Dampa Bial MLA zahawm tak hi, helaiah hian thudik lo a sawi avangin, thupha a chawi ve ngam ang em? Ngaihdam a dil ve ngam ang em?

PU LALRINTLUANGA SAILO: Pu Dy. Speaker, case a lo nei anih chuan, ngaihdam dil mai nilovin, ka bang ngam ang. (**Pu Lalduhoma:** A that chu. A case No. chu - No. 42 MLC No.42/2022 a ni e, Lok Ayukta ah. A ban chuan, kan va ngai awm ve maw le). Pu Dy. Speaker, case petu tur hi Lok Ayukta ani dawn em ni? Police-in a case an chhui hnuah an pe dawn a ni lawm ni? Member zahawm tak hian a hrechiang lo a nilo maw?

SPEAKER : Lo thu tawh rih la. *Subjudice* anih chuan, helaiah sawiho tur pawh a ni lova, danah chuan. Chuvangin, case a neih thu hi official-in khawiahmah hriatna a awmin ka hre lova; a awm anih chuan, a hma atang pawh khan tarlan tur a ni a. *Subjudice* anih chuan, House-a kan sawi theih pawh kha a ni lova. Hei hi chu nakinah fiah tur a ni ang a. Chuvangin ... (**Pu Lalduhoma:** Lok Ayukta hi ‘autonomous body’ a ni a, kan Home Department hnuaiia awm pawh a ni lova. Chutiang atana din chu a ni a. Miin chutah chuan complain an va thehlut a, enquiry, investigation a kal mek a ni a, chu chu ka sawi mai a ni a chu baka thubuai nei engnge awm chuang?)

Awle, enquiry..., ngawi rawh aw, ka lo sawi lawk ang e, thu rih teh. Enquiry kal hi *case* a tling lova, chuvangin, enquiry a kal ang a, case puitlinga an la dawn anih chuan, *case* an register thei ang a. Tunah chuan, case a neih dawn leh dawn loh kha enquiry an la mek chauh a ni a. Chuvang chuan, khami thuah kha chuan tuna kan sawi chin kha ni mai ta sela; a sawifiahna, nichina member zahawm takin a rawn ngen ang

khan Home Minister in nakinah a wind up hunah, a ngentu an awm avangin la sawifiah se a tha ang e.

Awle, sawihona kan chhonzawm leh ang. Tunge sawi leh ang le. Ka veilam a thute hi in sawi tlem deuhhleik a hei mi 12 in kan sawiho tawh a zinglam atang khan 4 chauhin in la sawi mai a, kan duhsak deuh teh ang cheu aw han sawi ve teh u, in sawi tlem deuh tlat. Tunge sawi ang, aw member zahawm tak Pu Lalrindika Ralte kan sawm e.

PU LALRINDIKA RALTE: Pu Dy. Speaker ka lawm e. Ka sawi hmasak duh chu, Demand No. 6 - Land Revenue & Settlement-ah hian, hmannah khan kan minister-in a sawi, a ram teh fel chungchangah ‘mimal emaw, company te emaw hi rawih mai a tha em’ tih chungchang zawhnaah khan, hma an lak tawh thu leh, chutiang chuan tunah tih mek anih thu te kha a sawi a. Kan bialah hma min laksak ve turin ka ngen duh a. Ram teh fel loh tam tak a awm a, kan buai ve a. Kan bialah khuan khilaia hma an lak ang khan min laksak ve ngei se tiin ka ngen duh a ni.

Pahnihnaah chuan, Demand No. 38 - Rural Development ah hian, kan hriat angin hmanni lawk khan Kawrtethawveng-ah RD Block thar hawn a ni a, kan lawm hle mai a, ‘rei fe chu kan lawm dawn a ni’ tih hi min lo hriatsak se. Inthlan thleng khan lawm turin min duh khawp mai a, mipui pawh kha an beisei a, mipui lawm chin tur chu ka hre lova, eng chen nge an lawm dawn ka hre lova. Engpawhnise, tun thleng hi chuan kan la lawm rih a ni tih kha ka sawi duh bawk a ni.

Tichuan, ka sawi leh duh chu, Demand No. 25 - Public Health Engineering ah hian hei, lo lang nghal chu, tui a lo lang nghal lo thei lova. Tui thianghlim in tur hi a pawimawh a, khawvel pawhin a ngaipawimawh a; hei hi kan ngaihpaawimawh a thain ka hria a. Aizawl-ah a ni emaw, Mizoram hmundangah a ni emaw kan tui tlan hi enchian a thain ka hria a; ‘a thianghlim tha em’ tih te kan enfiah ngei a thain ka hria a. Tin, hei, market-a tui kan zawrh te pawh hi enfiah a thain ka hria, kei chuan. Market-ah hian company hrang hrang ten an zuar a, hengte pawh hi kan taksa mamawh, kan ei leh in ber a nih bawk avang hian, tui thianghlim in hi a pawimawhin ka hria a. Heng market-a kan tui neihte pawh hi ‘a thianghlim tawh em’ tih te pawh hi endik ve hrim hrim hi a thain ka hria a, chu chu kan sawi tel duh bawk a ni.

Tin, Demand No. 13 - Personnel & Administrative Reforms ah hian, hei hi a pawimawh hlein ka hria a. Sorkar tha leh sorkar chak a ni emaw, kan sorkar performance zawng zawng hi ‘sorkar hnathawkte avang’ kan ti lo thei lova. Chuvang chuan, *administrative reforms* hi a ngaihpaawimawh awmin ka hria a. Tin, sorkar hnathawkte hi ‘engtinng phur takin hna an thawh theih ang; sorkar tan, mipui tan engtinng rinawm takin hna an thawh theih ang’ tih hi kan ngaihpaawimawh te pawh a thain ka hria a. Tin, hemi kawnga pawimawh em em ka tih chu - ram hruaitute rilru puthmang hi a

pawimawhin ka hria. Vawiina kan hmasawn lohna leh tun ang dinhmun mai kan nihna chhan te pawh hi, ‘kan rilru tet vang a ni’ tih hi a chiang hlein ka hria a, chu chu ramin a tuar niin ka hria a. Tin, sorkar hnathawkte pawh party worker ang vela hman duh mai leh hman tum mai ang chi te hi kan awm thin ni te hian a hriat thin a, hei hi a pawl ka ti a. Hetiang anih chuan, ‘kan ram leh hnam tan a tha lovang’ tih hi ka sawi duh a. Sorkar hnathawkte hi political party tan zawng emaw, tan lo zawng emaw an neih ve kher kan beisei tur a ni lova, an lak atang hian chutiang chu kan phut tur a ni lovin ka hria a.

Tin, hetiangah hian sorkar hnathawkte pawh, chutiang ngaihndan nei apiang chu mi thalo an ni tlangpui; chutianga phi ve cheng chu, ‘ram leh hnam tan an tha lo tlangpui’ tih hi ka sawi duh bawka ni. Ram hruaitu ten hemi rilru hi kan neih loh hi thain ka hria a, sorkar hnathawka hi chu an hmun tur dik takah, dahna tur dik taka dah hi sorkar tan, mipui tan a tha a ni tih hi kan hriat pawh a thain ka hria a; chu chu ka sawi duh bawka ni.

Tin, Demand No. 30 - Disaster Management & Rehabilitation-a ka ngaih pawimawh zawka chu - harsatna a lo thlen hnua chinfel ni lova, harsatna lo thlen hmaa hma kan lak theih dan tam hi a awmin ka hria. Hei hi kan ngaih pawimawh a thain ka hria a. Lirngching te pawh kan sawi thin a, lirngching awm tamna ramah chuan hmalak dan tur zawng zawng an nunah a bet tel a ni. Chuvang chuan, *awareness* hi kan ngaih pawimawh a thain ka hria a; hengah hian harsatna a lo thlen hma hian inven theih tam tak a awm a; kan siam chawp tam tak kan tawka bawka ni tih hi kan hriat a thain ka hria. Chuvang chuan, inven lam hi kan uar a pawimawh hlein ka hre bawka ni.

Demand No.16 - Home Deptt-a ka sawi duh chu, Home Department chu ram leh mipuite min thlamuantu tur an ni a, amaherawhchu, vawiinah hian, chung min thlamuantu turte chu mipuite hian thlamuan nan kan hmang tawka lo a, a thenah chuan kan thlamuanpui vak lo a ni. A chhan chu, hei, kuhva chungchangah kan hria a, kuhva khawchhak lam atangin a lo kal a, a mantu tam ber chu *mipui duty* hi a ni. Hei hi a pawiin ka hria a, hei hian *dan leh thupek* kenkawhnaah harsatna tam tak a thlen a, inpuh mawhna tam tak a thleng a, thuneihna tak tak nei lovin hetiangah dan an lo lek kawh ve hian harsatna tam tak - thinrimna te, inpuhmawhna te, dawt tam tak a leng thin a. Hemi chungchangah hian Home Deptt. hian an tih tur dik tak ti tawh se ka duh khawp mai a.

Tin, nichinah khan kan sawi a, Rengdil-ah 4th IR Battalion Headquarters hi kan beisei ve reng a, sorkarin eng emaw chen chu hma a la tawh a; hei hi ‘chak takin sorkar hian hma min lak sak se’ tiin ka ngen duh bawka. Hman deuhah khan Kawrtethawvengah khuan police outpost building luah tur zawn te kha a ni a, hei hi enge ni a chanchin vawiin niah kan hre lova, kha kha engtikah nge tihhlawhtlin a nih theih ang tih te; tin, khulaia In luah tur an zawn kha, an hmu ta em tih te kha kan minister hian minrawn sawifiah sak se ka duh khawp mai.

A tawp berah chuan, Demand No. 8 - Taxation hi a ni. Taxation hi kan sum thawk chhuaktu a ni a, tax tam tak an collect a. Hman deuha kan hriatah khan Burma lam atanga lo kal kuhva tax lak chungchang te kan sawi a, 'dan lova tax lak hi a pawl thei a ni' tih hi kan hriat a thain ka hria a. Covid lai a ni a, India ram ah pawh kum 2021 vela hausakna pung tam tak an awm a ni. India ramin kan buaipui, 'khawvelin a buaipui mek' pawh kan ti thei ang chu, Adani te pawh hi kum 2021-a an sum, an hausakna punna ringawt pawh USD tluk leh dingawn hi 42.7 a ni. Tin, Ambani te pawh USD 13.3, an hausakna punna ringawt kha a ni; kum 2021 chung lek te khan. Hei hi a chhan an sawiah chuan, chhiah an pek that loh vang a ni a; tin, a chhan pakhat leh ah chuan, 'dan dik lova chhiah an pek vang a ni' tih a awm a ni. Chuvang chuan, dan dik lova miin chhiah an pek ringawt hi a hlauhawm a ni tih hi kan hriat a thain ka hria a.

Tin, tax miin an pe tawh anih chuan, 'danlo' kan ti thei tawh lo a ni. chuvang chuan, hei hi a serious-in ka hria a. Sorkar pawhin Burma lam atanga kuhva lo kalah tax an lak thu an sawi a; chuvangin, tute emaw hi chuan dan lovin tax an pe a ni tih a chiang a. Chanchinbu ah khan vawikhat lai kha 'voluntary-a tax lo pe an awm chuan ...' tih te kha awm a, 'khatiang kha a awm thei dawn em ni' tih ngaihtuahna te ka nei a. A pawl em em chu - mi diklo leh sumdawnna diklo kalpuitu ten tax an lo pek ve ringawt hi 'a pawl a ni' tih hi kan hriat ka duh bawk a ni. Ka lawm e.

DEPUTY SPEAKER : Member zahawm tak Pu Lawmawma Tohhawng ka sawm e.

PU LAWMAWMA TOCHHAWNG: Pu Dy. Speaker, ka lawm e. Kan minister zahawm tak tak pathumte demand thlawp awm tak takte hi thlawpa support chungin, a hmahruai atan Demand No. 26 - Information & Public Relations-ah hian tan ila.

Thuthar thehdarh kawngah hian I & PR thuchhuah hi ngaihchan a ni tan a, a dik thawhkhata ngaiha, mipuiin chutiang ngaihdan ka neih hi hmasawna pakhat niin ka hria.

Tin, Mizoram Calendar kan han siam a, kan inchan lo viau mai te, kan inchuh laih laih te hi thil lawmawm tak a ni a; a hlut zia, I & PR hnathawhna rawngbawlina hlut zia kan hre tial tial niin ka hria. Hei, calendar hi hralh a niin ka hria a; hralh a nih rau rau chuan tam tham deuh taka tiha, a let leh awmin lo tih ni ta sela, sorkar sum lakluhna pakhat pawh a awm thei dawn lawm ni tih ngaihtuahna ka nei a ni.

Pu Dy. Speaker, thuthar leh thil thlengte finfiahna nei hmasa lova, khual thuthang leh leng velte thu tak bawla lo post mai te, lo auchhuahpui mai te hi kan fimkhur leh zual a tul hlein ka hria a; he house zahawm taka kan auchhuahpui tur ngat te phei chu thlan uluk leh zual a ngaiin ka hria. He House leh legislator te kan zahawmna a ti sangin a tihnam thei si a, fimkhur leh zual ila kan zavai atan kan thatpui awm mang e.

Demand No. 46 - UD & PA chungchangah hian a bik takin Lunglei Municipal kan han nei tur saw a lawmawm kan ti a, ruahmanna kal mek te saw hlimawm kan ti. Mipuitling, district puitling zawk niha, mahni kut-ke ngei maia ding tura ngaihna leh beiseina min han nei te pawh hi chona duhawm tak niin kan hria a. Hei hi MNF party chuan kan manifesto pawh 'thunehna insem-zai' tiin kan lo dah tawh a, 'a tak taka thil ti thin sorkar kan nei mek a ni' tih tichiangtu niin ka hria a. Covid hri kha leng lo phei sela chuan Lunglei Municipal sawn hna kan thawk mawlh mawlh tawh awm mai mang e aw kan ti a. Kan sorkar leh UD & PA Deptt. chungah lawmthu kan sawi a ni.

Lawmthu sawina tur kan nei nual mai. PMAY - *Urban Housing for All* ah hian 2nd DPR chu Lunglei lam chuan 1st instalment ₹60,000/- zel hi an dawng vek tawh a, a changtu minister leh department chungah lawmthu ka sawi a. Individual household - latrine hi 2nd instalment ₹6,000/- sem a ni tawh bawk a. Buaithlak ve deuh chu, *Housing for All*-ah hian 1st DPR awm si, 1st instalment pawh la dawng lo an awm leh lawi si a, helai hi chu ngun leh zuala min lo enpui dan awm thei se.

Lunglei khawpui bawlhhlawh sawngbawlna saw kan sawi tawh thin a, ka han sawi nawn leh hram duh a. Central funding atangin vaibelchhe 6 hmuh niin, (ka hre sual palh em aw) hmalak tawh a ni a, kan la zo thei lova. Khawngaih takin department leh kan minister ten min lo hriatsak leh thei se, 'kan mamawh thlawt' tih hi ka rawn sawi nawn a ni. Khawpui alo thang a, lirthei a lo pung a, mihring kan lo pung bawk a, Lunglei khawpui chhung kan chet velna lirthei avang pawhin kan tawt ta hle mai. Chuvang chuan, sawlam pang saw ngaihvena, PAHOSS te pawh Lunglei lamah sawn han kalpui ve theih dan awm hram se la. A za vai a nih loh pawhin 2-3 emaw tal chu han kal ila chuan, kan harsatna thui tak chu min sutkian sak ngei kan beisei a ni. Tun sorkar kum kal leh turah te hian engnge kan an ang aw? Min tih sak thei chuan kan thaw huaiin ka ring a ni.

Chubakah chuan, truck terminal leh parking house te pawh PMJVK hnuaiyah hian DPR te pawh rawn siamin dilna te pawh kha a lo lut niin ka hria a, Lunglei atang hian. Hengte pawh hi chak zawka min ngaihtuah sak theih chuan a lawmawm ngawt ang.

Demand No. 25 - Public Health Engineering-ah hian, Pu Dy. Speaker, a changtu kan Dy. CM zahawm tak leh PHE department hnuaiyah hian lawmthu sawi tur tam tak kan nei a ni. A tel lova kan awm theih loh, kan siam chhuah theih loh ni bawk siah hian, he sorkarin ram pumpui tana JJM hnuaiyah in tur tui thianghlim min pe hi kan lawm a. Lunglei bikah chuan kan pipe hluite thlakna turin cheng vaibelchhe 5 min pe a, kan lawm khawp mai a, tunah hian hna an thawk mawlh mawlh a ni. Chutih lai chuan Zobawk-Water Supply Scheme augmentation chungchangah cheng vaibelchhe 5 min pek hmanga hna kan thawh kal mek laiin department dangte nen harsatna neiin kan insu hlauh mai a. Khawngaih takin hei hi min enfiah saka min chinfel sak turin kan ngen

bawk a. Zobawk mipuite'n tui hnianghnar takin kan nei ve thei dawn emaw kan tih lainn he harsatna hian kan thin a tithawng hle a, hlauthawngin min awm tir a ni.

Pu Dy. Speaker, tah hian han pen lawk ka duh a. Ka lawmna ti zualtu leh tichiangtu ni bawk si. A chhan chu, hmannah pawh kan han tarlan lawk tawh ang khan Mizoram politician te eng party pawh ni sela, sorkarna siana budget lo pharh tawh zawng zawng te, District Council atangin UT hun, tuna State kan nih hnu thelng pawh hian mahni hunah theuh zel Mizoram leh a mipuite tana thil tha, hmasawna leh hamthatna ram ro tling tura min chhawp chhuah saktu leh min petute chu Mizoram Politician te an ni; tu dang an ni lo e. Chu chu chhawmning zel thei ila, politician te hlutna leh zahawmna pawh hi ram mipuite pawh hian hre thar zel ila ka duh khawp mai.

Pu Dy. Speaker, PHE changtu minister leh department hotute chungah kan lawm em emna dang a awm leh a, chu chu - Pialthleng kawng, Lunglei tui tlan panna chhe em em thin kha, he House-ah ngei kan CM zahawm tak leh kan Dy. CM ten assurance min pek angin tunah hian thawh mai theih turin thil a kal mek a; an tiam thlawn lo a ni. Kan CM pawh 'sum enkawl a thiam lo' tih mah sela, keini tan chuan sum enkawl a thiam a, a takin kan hmang a, kan dawng bawk a ni. MNF sorkar term-ah hian diesel pump lian pui pui 4 thlak a ni mek bawk a. 4 thlak turah 3 thlak tawh a ni tawh a, pakhat a kal mek bawk a ni. Kan va lawm em! Kan lawm tak meuh meuh a ni. Pu Dy. Speaker, Lunglei Greater Water Supply - Mat pump saw kan sawi tawp thei lo. Hmalak tawhna te a awm mek tih kan hria a, ka han sawi nawn leh hrim hrim a ni.

Pu Dy. Speaker, Home-ah hian ka lut leh lawk ang a. Rampum huapa kan police te hi a chhuanawm takzet a. Ramri venhim kawngah te, tualchhunga hnathawh kawngah te, tun krismas leh kumthar vuakveta Lunglei *thana* a han ruak hul mai te, 'kan police te chet that vang leh lo inhmakhua vang a ni' kan ti lo thei lo a ni. Chubakah chuan, nikuma *Mizoram Annual Ranking of Police, 2021*-ah khan *pakhatna* Lunglei Police Station-in kan dawng a, lawmthu sawi kan phu. Chutih rual chuan thawktu leh motor kan indaih lo nasa lutuk te ka han sawi lang ve hrim hrim teh ang.

Tin, Fire Department chungah lawmthu kan sawi lo thei lo bawk. Lunglei Fire Station saw tun hnaiah hian India ram puma pahnih chauh thlanhhuah zinga pakhatna a lo tel ve a ni. A lawmawm thlawt; kan chhuang a ni. *Subhas Chandra Bose - Apda Prabhadan Puraskar* hnuaiah cheng nuai 51 leh certificate kan dawng a ni. Hei hi kan lawm tak meuh meuh a, a chhuanawm pawh kan ti. Pu Dy. Speaker, chu bakah chuan Lunglei Fire Station chungchangah, tunah a dinhmun saw House hian min lo hriat nawn sak leh se la, a changtu minister pawhin - Lunglei Fire Station saw a awmna hmasa a building kha a hlauhawm a, chim palha chhiatrupna thleng thei a nih avangin thiah a ni a, sorkar phalnain. Tunah sawn Saikuti Hall hnuaiah an in-ek-beng a, hrehawm takin an awm mek a ni. Chuvang chuan, Lunglei Fire Station building sak thatna tur atan hian,

‘eng chen nge kan thlen tawh’ tih pawh khawngaih takin min hrilh thei se ka duh khawp mai.

A tawp ber atan, Pu Dy. Speaker, Rural Development-ah hian, thingtlang mite leh VC hrang hrang ten an mamawh phuhruktu he RD department hnuaiah hian an thawk tha hle mai. RD Block thar 2 te zingah Tlabung a tel te hi kan lawmna tizualtu a ni a, a function thuai pawh kan beisei tak meuh meuh a ni. *Ni-100 inhlawhna* zaa za kan han nei thei te hi, ‘tun hmian hetiang hi a thleng ngai em aw’ ka ti a. Mamawhtu leh ngai ngawih ngawih tute tan rangva leh silpouline min han theh chhuah thin te hi kan lawm a, theh chhuak zui zel tur pawhin kan beisei a ni. Pu Dy. Speaker, ka lawm e.

DEPUTY SPEAKER : Member zahawm tak Er. H. Lalzirliana ka sawm e.

ER. H. LALZIRLIANA : Pu Dy. Speaker, ka lawm e. Vawiin nia kan demand sawi tur te hi a changtu minister-te leh a department thawktu te, hun harsa tak karah India ram, Mizoram leh khawvelin harsatna namen lo kan tawhna karah hetiang taka min han enkawla, mipuite tana tha an han thawh hi lawmthu sawilo thei niin ka inhre lova.

Kan Demand hi ka han sawi ve nghal pawp pawp mai ang a. A tawp lam atang hian kan tan ang a.

UD & PA-ah waste-management chungchang hi a pawimawh khawp mai a. Ram changkang leh khawpui thianghlim ni tur chuan kan waste kan manage dan a hi a pawimawh em em a ni. In tin tana kan practice tuna systema rawn awm ta - tawih thei leh tawih thei lo thliarna kan han tih ngawta pawh hi thil tangkai tak a ni. A tira an introduce khan sawiselna neuh neuh a tam hle a, ‘a buaithlak, chutiang khatiang’ tih te pawh a awm a ni. Mahse, tunah chuan kha thil tha kha ngaiah kan nei tawh. A paihna tur kha kan nei thlap mai a, chu chuan thil a ti awlsam em em a, chu chu kan zavai atana a thatna leh ram hmasawanna a ni. Chutiang chuan, kan city te pawh hi hei aia smart zawka, ‘smart city’ a nihna ang ngei a kan kalpui zual te pawh hi a pawimawh.

Thil pakhat kan tih theih mai ka rilrua lo awm fo thina chu - kan traffic management system-a hi a ni a. Hei, vai ram khawpui lian Kolkota ah te chuan chawhma in heti zawngin kan kal ngar ngar a, chawhnu dar khat a han rik chuan heti zawnga kal leh thung a ngai thin a ni; a system kha hriat loh chuan kan buai kan buai mai a ni. Chuvang chuan, hetilaiah Aizawl-ah te pawh ‘kawng chhawng’ tih ang chi te leh thil hrang hrang te chu a tha e; chu mai piah lamah chuan kan traffic management-a hi hei ai hian mumal zawk ta sela, *entirnan*: oneway system ang chi te pawh hei aia tam hian introduce ta ila chuan kan policemen duty te pawh tam takin a indaih tir theih ang a. Heti lama duty te kha tlan ru an awm leh awm loh heti lamah chan ngai a awm leh

awmlah kha duty a ngai tawh dawn lo; chu chuan kan police force te pawh nasa takin manpower pawh a reduce dawn a ni.

Tin, district-a kan UD & PA office te hi hei aia nasa zawk hian ‘a hman tangkai theih em’ tih hi ka duhthawh angreng khawp mai a. Tun ang dinhmun-ah hi chuan district tinah hian beisei anih kan ring deuh a, kan pha chiah lo a ni. Thil engkimah Aizawl lam a ngaih vek tho avang hian district-a DUDO awm hi an tangkai tur ang hian an tangkai tawh lo ni tein kan hria a, chungte chu duhthawhna thilah ka han sawilang a.

Tin, PHE chungchangah hian, keini hi *aspirational-bial* kan ni a. Sorkar pawhin JJM hmalak hmasaknaah te min han nei a. Kan thingtlang khua te chuan JJM project-a hi an hmang tangkai deuh vek tawh a, kan lawm hle a. JJM scheme-in a khuh ve si loh, keini Mamit khawpui te, Lengpui te kan bial chhungah tui harsatna kan tawh chho ve nasa hle a. Mamit phei chu vawiin ni thlengin tui harsatna hi kan au-hla leh, la kiang hlei thei lo a ni. Tunah hian project chu a kal mek a, tuna kan project kan neihsa kan rin meka khu a line a chhe em em tawh a, AMRUT-II ah hian he km 2 pipeline thlakna tura hi kan dil ve a, chu chu engnge kan thlen tawh; kan hmu thei dawn em? Tuna kan project kal meka khu chu kum khat tha dang hi kan la ngai dawn a, tunah mamawhna a lian tawh si a. helai thil hi khawngaih takin kan minister-in min react theih chuan ka lawm hle ang.

Tin, Home department chungchang hi ka han sawi ve leh duh a. Kan hria a, ramri buai te, covid-19 te, lirnghing te kawng hrang hrangin harsatna kan nei a ni. Hemi chungchangah hian department thawktu zawng zawngte leh a changtu minister te an fakawm thlawt a ni. Mizo mipui Mizoram pawn lama awm zawng zawng an rawn haw a, an rawn haw dan ringawt pawh ngaihtuah tham a ni. Damlo nen, an transit camp tur nen, ei leh in tur nen, tangkhang ho hawn tir dan tur leh kawng hrang hrangin Home department-a thawktute nen pawh hian MLA ho chu kan inhmelhriat phah viau a ni.

Tin, ramri chungchangah ni se chutiang chu a ni a. Mamit-ah khuan 4th IR Bn Headquarter kan nei a. Khu khu an tawt angreng tawh viau mai a, a bul lawkah private ram remchang em em, department pawhin neih theih an duh hle a ni a. Hei hi khawngaih takin kan Chief Minister, kan Finance Minister te leh department ten a tih theih hram dan ngaihtuaha, khu 4th IR Batallion hmupui khu nasa zawk leh ngialnghet zawka set-up te an neih theihna turin ka han dilpui le a.

Tin, DM & R ah hian ka sawi duh chu, Mamit - Bazar Veng lei khu vawi hnih lai a tlahniam tawh a, hemi atan hian project te pawh kan thehltu a, vawi 2-3 department-ah te leh minister-ah te pawh kan han chhu zui a. Chutah chuan, vawiin ni thlengin a rah hmuh tur kan la nei chiah lova, khu khu engtikah nge a chet leh ang tih a sawi theih lova. Khawngaih takin hei hi min lo ngaihpawimawh sak leh turin kan ngen a. Tin,

Taxation office thar hi kan district-ah a function ve tawh a, kan minister chungah leh department chungah lawmthu kan sawi duh a ni.

Tin, Pu Ruatkima department hi tlem han sawi tel ka duh a. Ani hi thahnem a ngai hle a, a theih tawh hi a chhuah niin a hriat a, amah leh a thawhpuite zawng zawng chungah lawmthu kan han sawi ni sela. *Ni-100 inhlawhna* te hi keini thingtlang bial chuan kan thlir a ni a, kan lawm em em a ni. Tin, Assembly House-a ka thut ve tirh atanga ka sawi - Mamit 'aspirational district' kan ni a. Hei Mamit bial hi a buaithlak khawp mai a. RD office 5 ah min attach kual ta a, a hma khan 4 a ni a. Kawrtethawveng Block kan han hawn takah khan kan bial chhung hi RD bial 5 ah min then ta a ni. Lengpui hi Tlangnuam RD Block hnuai a ni a, Reiek Block hnuai hian Rawpuichhip leh a chhehvel te kan ni a. Tin, Phaileng hnuai hian Damparengpui leh Tuirum te a ni a. Tin, tuna Kawrtethawveng Block hi gazette notification a chhuah ka ring a; a copy ka la nei lova. Heti lai an tih thar hi department ten a rem chuan minlo pe sela; Zawlnuam hnuai hian kan han awm leh a, kan bial chhungah hian RD Block pakhat mah kan nei lova, mahse RD block 5-ah min thensawm thung a ni. Kan officer te pawh hi kan han inhmelhriat dawn chauh a, an lo transfer kual leh a. Tin, keimah MLA ngei pawh hian RD block ka la dawr loh hrim hrim te ka nei a ni. Bial chhungah an awm loh chuan a hranpa a han kal ve nal nal hi a buaithlak ve khawp mai a, ka bial chhung Phaizau te chuan Zawlnuam RD Block khu an la dawr miah lo a ni.

Dampui te, Chi Lui te, Tlangkhang te khu Finance Minister-in budget a present-ah khan aspirational district te, hetilai hrang hrang hi a rawn ngaipawimawh khawp mai a. Budget Speech No. 36 ah khan 'Aspirational district and Block programmes' tiha inziak ah hian, 'building on the success of the aspirational district programmes, the government has recently launched the aspirational block programmes covering 500 blocks for saturation of essential government services' a ti a ni. Hetah hian kan bial chhungah te khuan block thar te hi kan nei ve thei ang em?

Tin, 'PVTG (Particular Vulnerable Tribal Groups) - Development Mission' tihah Finance Minister thusawi point 37-na ah hian, he mission-ah hian crore ₹15,000 kum tin atan dah a ni a. Tin, PMAY hi keini bialah chuan a pawimawh khawp mai a, tunah hian 66% in a pung a, crore ₹79,000 hi he PMAY atan hian dah a ni. Heng hi nasa zawk leh chak zawkin kan department lam te hian han kalpui ta sela tih kha kan lo *tlumtea-thlir* a ni.

Heng, vawiin nia kan minister te demand kan sawiho hi a pawmawmin, ka thlawp a, lawmthu ka sawi e. Pu Dy. Speaker, ka lawm e.

DEPUTY SPEAKER : Member zahawm tak, Pu KT Rokhaw ka sawm e.

PU K.T. ROKHAW : Pu Speaker, ka lawm e. Demand No. 26 - Information & Public Relations hi ka han sawi phawt ang a.

Information & Public Relations Deptt. hi sorkar hmalakna - scheme leh policy chi hrang hrang a kalpui dan te leh thil pawimawh hriat nan kan hman ber a ni a. Information & Public Relations hi department pawimawh tak a ni a, Siaha khi tunah hian Staff kan nei tlem lutuk a, LDC pakhat kan nei a, AVPA hi pakhat kan nei bawk a. Tin, chowkidar pakhat cancer patient a ni a, chumi chiah chu kan nei a ni. Chuvang chuan, a office khi a defunct ti tih a. Khawngaih takin kan minister hian LDC pakhat kan nei bakah hian UDC pakhat emaw min pek belh hram turin ka ngen a.

Tin, chu chauh ni lovin, a office khi a chhe tawh khawp a kum 20 leh tih bawr vela sak tawh kha a ni a. Assam-type a ni a, a chhe tawh hle mai a. Chuvang chuan, district-ah chuan - Aizawl, Lunglei, Chhimituipui District anih laia Siaha chu capital kha a ni a. Chuvang chuan, khi khi khawngaih taka min ngaih pawimawh saka, a thara min sak sak turin ka ngen a ni.

Tin, Demand No. 38 - RD Department hi ka sawi leh duh a. He department hnuaiah hian thingtlang mite hi khawpui mite hmasawn ruala hma an sawn ve theih nan leh, ei leh bar zawna kawnga hma an sawn zel theihna tur scheme kalpui mek 'SPMRM' hi a lamsei chu '*Shyama Prasad Mukherji Rurban Mission*' tih a ni a. He mission-ah Mizoram a ti tha ber kan ni hi a ropui ka ti a, a changtu minister leh department inpumpekna a niin ka hria a, an chhuanawm hlein ka hria.

Tin, SPMRM scheme hi kalpui chhunzawm zel a nih chuan, border area-a awmte hi khawpui mite anga hmasawn ve kan duh avangin, a bik takin cluster thlan leh turah chuan kan minister hian Tipa RD Block hi khawngaiha min telh ve ngei turin ka ngen duh a. Tin, Burma border-ah ka bial a awm a, chumi avang chuan BADP scheme hi a tangkai thei ang bera hman a pawimawh a. BADP hi ka bial atan chuan a tangkhai khawp a, mahse, a department hmanna turah hian duhthu a sam lova, a bik takin Health, Education leh Agriculture-ah hian hman zel ni thei sela a lawmawm viau ang.

Tin, Tipa RD Block hi a hma pawhin ka sawi tawh thin a, a lian lutuk a, 'Phura hi RD Block hranah min siam sak hram rawh u' tiin ka ngen thin a. Hmanni khan RD Block pahnih puan a ni a, kan la tel leh ta lova, a pathumnaah hi chuan kan tel tawh ngei ka beisei a, 'beisei takin kan lo nghak e' tih kha kan minister ka hrilh duh a ni.

Pu Dy. Speaker, Demand No. 16 - Home Department ah hian, police outpost hi Chakhei-ah khawngaiha min dahsak turin a hma pawh khan ka ngen tawh thin a. Congress a sorkar lai pawh khan dah turin a hmun te pawh en vek a ni a. Chakhei khua khi Burma border-a khaw lian ber leh leh pawimawh ber a ni a. Tin, HSSLC matric exam center a ni bawk a. Chuvang chuan, khawngaihin police outpost min dah sak hram

turin ka ngen a ni. Tin, Tipa police station hi SDPO ah min upgrade sak turin ka ngen duh bawk a. Siaha SDPO a awm a, Tipa OC a awm a, SDPO hi awm ve leh ta sela chuan police-te tan pawh engkimah hma an sawn thei dawn a. Tin hei hi Lawngtlai-in an nei a, Chawngte-ah a awm bawk a. Chuvangin, Tipa-ah hian SDPO khawngaihin min dah sak ve turin ka ngen a. Tin, Tipa Outpost hi a zau em em a, Gypsy soft top chhe deuh mai pakhat an kawl a. Phura lama kal tur phei chuan a hla angreng khawp mai a, kawng te a chhe thin bawk nen. Chuvang chuan, an motor kawl lai hi police outpost motor kawl atan chuan a chhe lulai lutuk a, a thar min ngaihtuah sak turin ka ngen a ni.

Tin, Siaha District jail hi a chhe tawh khawp mai a, a hma pawh khan jail tang tlanhhuakte pawh an awm thin a ni kha; a chhiat em avangin. Hei hi vawiiin ni thleng hian sak a la ni lova. Chuvang chuan, Siaha jail building hi a thara min sak sak turin ka ngen duh bawk a ni.

Demand No. 30 - Disaster Management & Rehabilitation-ah hian sawi duh ka nei bawk a. Siaha khawpui laili taka New Colony veng hnuai lam zawng zawng khi hun rei tak atang tawh khan fur lai hian lei a tlahniam thin a, helai sinking area hi a thawmthatna leh a venna tur MADC lam atang leh DM & R Department atang tein project siam niin, chu chu central lamah thlen a ni tawhin ka hria a. 'He project hi pawm a ni tawh em; Engtin nge kalpui zel a nih?' tih te kha khawngaihin nakinah kan minister khan min hrilhfiah se a lawmawm khawp ang. He project hi Siaha khawpui tan chuan a pawimawh em em a ni tih ka sawi tel duh a.

Tin, nikum 2022 ruahsurah khan Chakhei PHC building thlanga lei a min vak mai a, tun fur hi chu a hlauhawm tawh lutuk a, a building tan hian. Hei hi khawngaihin a protection work min siam sak turin ka ngen bawk a ni.

Tin, Pu Dy. Speaker, Demand No. 25 - PHE hi, Siaha khawpuiah hian mihring cheng kan tam tawh khawp mai a. Chuvangin, Siaha - Extension of water distribution system hi min tihlen sak kan mamawh a. Tunah hian, a khur a len avangin connection line ina a phak tawh loh line tam tak a awm ahei hi khawngaiha min extend saka, min tihlen sak turin ka ngen a.

Tin, a pahnihaah chuan, kan district-ah hian refugee camp 27 a awm a, tunah hian nipui a tan dawn chauh a, tui a harsa nghal ringawt a ni. Chuvangin, refugee kan unau ralhlante awmnaah hian tui nipui laia an hman tur hi tun atanga remruatna fel tak siam a nih loh chuan kan buai viau dawn a niin a lang a ni. Chu chu kan minister zahawm takin min hirat sak se.

Tin, a pathumnaah chuan, Tipa, Zyhno leh Siatlai kuate hi Tisi Lui tui pump ring anni a. A khawl hian current a zawhloh chang chuan a pump hleitheih lova. Tin, khawl a chhiat avanga pump theihloh chan te a awm bawk a ni. Tunah hian Siatlai ah

water reservoir lian pakhat an dah a, chumi pakhat chuan khaw pathum a chawm a, indaihlohna a nasa em em mai a ni. Chuvang chuan, a theih hram chuan Siatlai ah hian water reservoir dang pahnih tal min dah belh sak thei se, khawkhat hian reservoir pakhat theuh nei thei sela chuan an harsatna a ziaawm dawn a ni tih kha kan minister ka hrilh duh a.

Tin, *Rain-water Harvesting Dam* hi Chakhei khuaah min siamsak hram rawh se, lian deuhin. A chhan chu, a khua hi tlanga awm a nih avangin heng, rainwater harvesting dam hi kan mamawh takzet a. MLA fund atanga cheng nuai 10-a ka siam tir hi a tet deuh avangin a an indaih lo hle a. Hei hi lian deuha min siamsak turin ka ngen bawk a ni. Tin, Tisi leh Theiri khaw tan hian solar water pumping hmangin Tisi Lui Atanga tui pump chhoh theihna min siamsak turin ka ngen duh bawk a.

A tawpna atan chuan, Pu Dy. Speaker, kan minister zahawm tak hnena ka sawi tawh ang khan, Saikao (Serkawr) khua, kan missionary te thuthmun ah hian solar pumping min siamsak ngei turin ka lo ngen bawk a ni e. Ka lawm e.

DEPUTY SPEAKER : Member zahawm tak Pu Ramthanmawia kan sawm e.

PU RAMTHANMAWIA : Pu Dy. Speaker, ka lawm e. Demand pathum kan Minister zahawm tak te - Pu Tawnluia, Pu Lalchamlia leh Pu Lalruatkima te demand hi tha ka ti a, ‘pass pui ngei turin ka rawn thlawp a ni’ tih ka sawi hmasa duh a ni.

Pu Dy. Speaker, kan Dy. Chief Minister Pu Tawnluia Demand No. 25 hi, kan hria a sik leh sa a lo danglam zel avangin, tuite a lo kang a. Tunhma kum 1980 chho velah kha chuan khaw hrang hrang ten tuikhur tha tak takte kan nei a, tuikhura tuite chawiin kan ring thin a ni. Hun a lo kal zel a, tuikhur tui ringawt kan kham ta lova. Kum 1990 chho ah phei kha chuan gravity hmanga tui lak kan uar ta a ni. Hun eng emaw chen chu gravity tui lak kha kan ring thei a. Amaherawhchu, khangte pawh kha a lo kang zo ta a, thalah phei chuan Mizoram khaw tam zawkte tui ah kan buai a ni chho ta mai a. Hei vang hian, tuihna humhalh kawngah te pawh hian tan kan lak thar a ngai hle a ni.

Chutiang taka Mizoram-in tui in tur thianghlim harsatna kan tawh mek laiin JJM scheme tha tak mai a lo chhuak a. Hei hian khawtin te tui hnianghnar taka kan hmuhtheihna turin hma an la chho hi a ropui ka ti a. He project chungchang kan lo hriatdan hi a lawmawm ka ti a. Kan Dy. Chief Minister leh a department te thahnemngaihna leh hmalakna a chak avangin central-in kum 2024-a zawh tura an tih kha, keini bikah chuan, ‘2023-ah in zo thei a ang’ tiin min rawn pawhtawi sak a, a lawmawm em em mai a. Extension ngailo mai ni lovin, a hun pawt tawi zawnga Mizoram sorkar hmalakna central-in tha a tih avanga kumina zawh hman tura an rawn

ti hi thil chhinchhiahtlak tak, department te, a changtu minister te hmalakna a ni tih kan hriain, an chungah kan lawm em em a ni.

Kan sawi thin a, JJM scheme in a cover loh Farkawn, khawlian tak, ka bialah chuan mihring tamna ber a ni a, gravity a lak a ni a. Amaherawhchu thal a lo ni a, tui kan kham khawp ta lova. Kan Minister zahawm takin rem min ruatsak a, NABARD atangin. Chutiang chuan solar pumping tihna tur hma min han lak sak a, kan lawm hle a, kan thla a muang hle a ni. Farkawn-ah chuan, kan hriat angin raltlan kan u leh naute an thahnem em em a. Khing te nen khian tuiah hian harsatna kan tawk nasa zual a. Hengte avang hian tuna min ruahman sak hi kan lawm takzet a. Tin, Khawbung-ah SDO office kan nei lova, a pawimawh si a. Hei hi kan Minister zahawm tak hian min hriatsak tawhin ka ring a. Sorkar kumtharah chuan khilailah khian min sak sak ve turin ka ngen duh bawk a ni.

Tin, Demand No. 46 - UD & PA-ah hian thil lawmawm deuh mai kan tawng a. Kum 2021-a *notified town* puanthar khaw 5 kha an awm a ni. Hei hi sorkar kumtharah a khaw enkawlna tura sum leh pai te min dah saka bul min tan sak turin ka ngen bawk a. Tin, ka bial Khawbung hi hmun pawimawh a ni a, office hrang hrang awmna te pawh a ni bawk a, mihring pawh an thahnem tawh khawp mai a. Hei pawh hi a remchang hmasaberah *notified town*-a min puansak turin kan minister zahawm tak hi ka ngen leh bawk a.

Demand No. 16 - Home Department, Minister zahawm tak Pu Lalchamliaana chan hi kan hria a. Kan Minister-in hma min lakpuina zarah leh thahnem min ngaihpuina zarah 2019 khan Dungtlang - Police Outpost kha police station puitlingah min han hlankai sak kha a ni a, kan lawm khawp a. Khilai khi ramri, thiltha leh thil tha lo luh leh chhuah theihna hmun a nih avangin, tihchak a ngai em em a. Tunah hian thuam chhoh mek a nih lain, duhthu a la sam lova. Hei hi sorkar kumtharah chuan a nih tur anga han tihphuisui chhoh kan inbeisei hle mai a, hei hi priority-a min neih sak turin ka ngen nawn leh duh a ni.

Tin, ramri hrula awm kan ni a, kan sawi tak ang khan. Farkawn-ah khian police beat post min pe a, khi khi police tam zawk an awm theihna turin police outpost-a upgrade theih dan te a awm em? Sawi leh sawi hnu khilailah harsatna kan tawk thin a, ramri hnaih a nih vangin, chu chu kan minister zahawmtak hnenah hian kan thlen duh bawk a. Kan MLA te leh kan hotute pawh khan an rawn sawi a, kan police te chungchangah, kan ram leh hnam tana an inpekna leh an thawhrimna an fakawm em em a. Min venghim tute, a tul pawha chhun zan pawh sawi lova tlaivara kan police force te inpekna hi vawiinah hian kan sawi duhna chhan chu, hei, Arm rank - police havildar, naik leh constable te hian an dawn thin *rifles allowance* hi tunah hian thla khatah ₹40/- a ni a, hei hi 7th pay revision-a thla khatah an dawn thin ₹25/- atangin ₹40/- a tihsan niin, Ni 1.9.2018 atanga hman tan a ni a. Silai leh a mu rit pui pui kg 4 atanga kg 14 te

ak reng mai an ni a; thla khatah allowance ₹40/- chauh hi Pu Dy. Speaker, tunlai thil manto leh sum leh pai hlutna tlakhniamna ah hi chuan a beitham tawh deuh lo maw? Chuvang chuan, rawtna kum 2020-a an siam zul zuia ₹150/- tala tihsan theih ni se an duhsak awm hle a ni.

Kan Minister zahawmtak Pu Lalruatkima Demand No. 38 - RD Department hi chu, keini thingtlang bialtu tan chuan kan inngahna a ni lo thei lova. Nichinah khan member zahawm tak takte khan an sawi tawh a, rangva te, silpauline te hi kan tangkai pui em em a, department atangin min han pe thin te hi kan lawm tak meuh meuh a. In kang te kan nei thin a, chungah te chuan a ba-thlau ten kan han la nawk nawk a, chutiang chuan harsatna kan tawh thin a. Chungah te chuan heng RD Department atanga chhawmdawlina kan han dawng thin te hi kan lawm em em a ni.

Tin, RD Block - Tlabung leh Kawrtethawveng puan an ni kha kan lawmpui em em a, function thuai se kan duhsak a. Keini bial hian RD Block pakhat kan nei a Khawbung-ah, helam North block lamah hian pakhat min pe leh thei se tih kha kan duh khawp mai a; *district* te chu kan sawi ve dawn lova, khawvel tawp thleng pawhin. Chuvang chuan, RD Block hi kan inngahna leh hmasawanna tura pawimawh a nih avangin, helam North Block-ah hian pakhat min pe leh ngei turin kan han ngen leh a ni.

Hei, Khawbung RD Block-ah hian Data-entry Operator Pi Biakthuami chu vanduaithlak takin January thla khan a boral a, tunah hian data entry operator kan nei lo a ni. Chutiang bawkin, VLA pakhat a boral a, a post pawh hnawhkhah lohin a la awm a; chutiang chuan Khawbung RD Block-a a thawktu tur hi hi kan chaurau khawp mai a, hei hi min ngaihtuahsak turin kan minister zahawm tak hi kan ngen a.

Tin, RD Department hian kan bial chhungah hall thahnem tak min sak sak tawh a, tuna sak mek Lianpui leh Dungtlang te a la awm a ni. Heng hi kan la complete lova, henge pawh hi min hriatsak sela. Lianpui phei chu tunah hian a ba thlauin kan sa mek a, Ni 30 March velah khian Tuipuiral Group YMA-Inkhawmpui-a hman tur a ni si a, kan rilru pawh a hah khawp mai a, sak zawh hmanloh kan hlau si a. Kan Minister zahawmtakin min ngaihtuah saka, hun tha kan hman theih ngei theihna turin hei hi kan ngen duh bawh a ni e. Pu Dy. Speaker, ka lawm e.

DEPUTY SPEAKER : Member zahawm tak Pu Lalchhuanthanga ka sawm e.

PU LALCHHUANTHANGA: Pu Dy. Speaker, ka lawm e. Kan demand-ah hian lut nghal mawp mawp i la. A hmasa berin, Land Revenue & Settlement Deptt. hi sawi ila.

Ka bial chhunga Mualpui - Salem Veng khu veng thang chak tak mai a ni a, tunah hian local council te pawh an dil chho ve a ni a. Chutih lai chuan public hmun engmah

an nei lova, lo indang dawn ta ni sela, local council building tur te, sub-centre hmun tur te an nei lova, community hall tur te pawh an nei lo a ni. Tin, tunah hian Primary School te pawh khu nei ve tur an ni a, mahse ... (*Hon. Speaker-in Chair a la a..*) Pu Speaker, hmun an nei lo tlat mai a. Chuvang chuan, khawtlang mipuiin hmun an dil a, an zawng nasa khawp mai a. Hei, kan member zahawm tak Pu Nguna te thenawmah te khuan neih an han tum ve a, an han bei ngial a, amaherawhchu, an la ti fel thei lova; hei hi a pawimawh khawp mai a. Chuvang chuan, kan Revenue Minister hian an thil dil lai mek an hmu thei lo a nih pawhin, eng emaw chu ngaituah a ngai a ni. Local council te pawh khu an nei ve lek lek tawh a ni a, an veng a thang a; chuvang chuan an ngaih-pawimawhawm khawp mai.

Tin, Revenue ah hian surveyor indaih lohna, a hma mite pawhin an sawi a, hei hi a buaithlak khawp mai a. Surveyor post te hi a create theih lo em ni; a recruit theih loh em ni? Mipuiin kan harsat phah khawp mai a, chuvang chuan, surveyor post te hi hnawhkah zung zung theih ni sela a tha awm e.

Demand No. 25 - PHE Department hi, hei hi kan veng Tlangnuam khi a han san deuh avang khian pump house hranpa pek ngai deuh a ni a. Tlangnuam hi inngahfakna tur tuikhur nei miah lo kan ni a. Tun hma a kan tuikhur neih ve thin kha field lungrem chimin a chhilh vek mai a, han haichhuah chi pawh a ni lo a. Chuvang chuan, PHE tuisem ngawr ngawr hi kan inngahna a nih avangin, a bik taka ngaihtuah kan ngai a. Tuna kan pump house pawh hian min zo meuh lo a ni, vengchhung mamawh hi. Chuvang chuan, Kulikawn chhak, 'Dam Veng' kan tia pump house khi min tih len sak turin ka rawn ngen a. PHE tui ring ringawt kan ni a, kan tan a harsa khawp mai. Hei hi kan Minister zahawm tak hian min hriatpui sela.

Tin, PHE-ah hian ngaih pawimawh em em ka neih thin chu - Tlawng tui pump-na fintu, 'Vai-Lui' kan tih khu a thianghlim lo em em mai a. Hei hi engtin nge, ngaihtuah deuh chu a ngai a ni. Kan hriselna atan te pawh hian a hlauhawm thei dawn in a lang a, chuvang chuan, Khatla leh Mission Vengthlang inrinaa Vai-Lui khu thianghlim deuh zawk leh felfai deuh zawka sawngbawl dan te a awm chuan a lawmawm khawp ang.

Demand No. 30 - DM & R hi a pawimawh khawp mai a. Nikum lamah te kha chuan kan minister zahawm tak khan silpaulin te pawh kha min pe ve niin ka hria; MLA ten kan fund hmanna tam tak hi silpaulin a ni tlat mai a. Hei hi mahni bial chhunga chhiat tawhna neuh neuh kan lo puhruk vena silpaulin te hi chenpakawm deuh hleka min sem ve tur hian kan duh a ni. Hei hi kan minister zahawm tak hian min lo hriatpui bawk se la a lawmawm khawp ang.

Tin, Demand No. 46 – UD & PA lam hi han sawi leh ta ila. Zodin Square-a *multi-level car parking* an sakna saw a rei ta hle mai a, sorkar hmasa hunlaia an sak tawh kha a ni a. 'Eng nge ni a awmzia; engtik hun chhunga zawh tur nge; tunge a contractor;

engzat nge estimate' tih te pawh hi puanzar a hun tawh lo maw? An sa rei tawh em mai. A dinhmun chiang taka memberte min hrilh theih chuan a lawmawm khawp ang.

Tun Assembly Session-ah hian ziaka zawhna ka nei a. Ka bial Aizawl South-II huam chhunga UD & PA hnathawh hrang hrangte ka zawt a, hna hi an lo thawk tam ang reng phian mai a. Hna 56 lai a lo awm a, a amount pawh cheng vaibelchhe 130 man lai a ni a. Amaherawhchu, hnate hi a langsar lo khawp mai a, zawn chawp deuh te a lo ngai a. Kan han zawng chawp ngial a, 'hei hi a nih dawn hi a' han tih turte kha a awm chauh a. A bik takin Kulikawn-a 'Construction of RCC pavement & side-drain near Upa C. Biaktluanga house at Kulikawn' tih hna hi kan hmu zo lo a ni. Helai kawng hi pawimawh tak a ni a. Tunhma MLA ka nih tirh atanga siam tura kan tih, mahse sum kan neih theih loh avanga la siam loh reng a ni a. Hei hi a hna kan han zawng thin a, 'kutthlakna pakhatmah a awm lo a ni' tih kha kan minister zahawm tak hian min lo hriatpui se a lawmawm khawp ang.

Tin, Demand No. 16 - Home Deptt. hi; ka bial chhungah hian 3rd MAP an awm a, ka tlawh lut ve thin a. An hotute leh staff te khuan an building, an quarter te tlakbal nasat zia te, thawm a tul zia te min lo hrilh thin a, an ngaih-pawimawhawm khawp mai a. Chu chang a ni lova, an veng chhung inkalpawhna - step leh pavement te pawh a tha lo khawp mai a, chhawmdawl an ngai khawp mai. Tin, kan Police Force hrim hrim hi duat an ngaiin ka hria a. Anmahni improvement lam ai mah mah hian pute in saknaa kan chhawr nasa thin lutuk te hi chu, 'a reh ve deuh tawh em aw' ka tih pawh hian, a lo la reh lo viau mai a. Heng kan police personnel te hi an khawngaihthlakawm ka ti a. Heng te pawh hi anmahni improvement tur, anmahni personal development ang chi te pawh hi kalpui tam ve deuh ta se la; 'sorkara an chanvo tur ang te pawh hi tun ai hian dawng tha ve deuh se la' tih kha ka sawisak duh bawk a ni e. Pu Speaker, ka lawm e.

SPEAKER : Hun i hman thiam hle mai. Dar 4 hi kan chawlh hun tur a ni a. Hman nia kan sawi kha kan ring tlang dawn em ni? Dar 5-ah kan chawl mai dawn em ni? House kan rawn e. (*House-in a remti a..*) Awle, a nih dar 5-ah i chawl ang aw, House remtihain.

Tunge sawi leh ang le? Dr. Vanlaltanpuia, Member zahawm tak ka sawm e.

DR. VANLALTANPUIA : Pu Speaker, ka lawm e. Chawlhkar tharah kan minister pathumte demand pharh a lo ni leh ta a, a lawmawm hlein ka hria a ni. Tichuan, Demand No. 25 - PHE-ah hian ka han lut nghal ang a.

Lunglei North bialtu ka nih angin, khaw 21 lai kan bialah a awm a, khaw 4 emaw chauh hi tui pump pangngai nei kan ni a. He kan sorkar hnu hian hmalakna hrang hrang a awm a, a lawmawm ka ti a, ka bial aiawhin lawmthu kan sawi a. Mualthuam North leh Chhipphir-ah hian tui min pump sak tawh a, kan lawm em em a ni. Tin, tui nei lo

khua zawng zawng ka bial chhunga mi hi tui pump tura min tender sak vek hi kan lawm em em a, kan minister hnenah hian lawmthu kan sawi duh a.

Ka sawi duh pakhat leh chu - Lunglei Greater Water Supply Scheme-a Phase-I hi kan rin lai a ni a. Siam a nih kha a lo rei ve deuh tawh a, kawngpui te kha a la te a ni mai thei a, kawngsirah pipeline a kal a. Amaherawhchu, khua lo thang zelah kawngpuite a lo zau ve leh ta a. Pipeline thenkhata a air-vent (boruak chhuahna tur) an siam hi khawlaiah hian a awm ta tlat mai a, pipeline realignment tih a ngai khawp mai a. Hei hi 'khawngaih takin kan minister hian min hriatpui se' tiin ka sawi duh a. Tin, Grater Water Supply Scheme - Phase-I hian min daih tawh loh avangin Phase-II hi Lunglei khawpui hian kan mamawh em em a ni.

Demand No. 46 - UD & PA ah ka han lut ang a. Lunglei khawpui tan LMC min puan sak a, kan lawm em em a, khawpui nisi village anga enkawl kha a inhmev lova, he sorkar ina khawpui inenkawl na pangngai tur status min han pe hi lawmawm kan ti a. Khawpui pawh a thang viau a, tunah hian lungrem mawihnai tak takte, tin, community leh individual toilet te min pe a, kan lawm em em a. Tin insakna, mi harsa zawkte tana insakna tur te min buatsaih sak bawk a, kan lawm a. Amaherawh chu - Lunglei khawpui a thang em em mai a, Aizawl atanga luh chhohna lam hi a rem vak lova. Tlawng atang hian a chho ngar ngar mai a, Pukpui atang sawn a zawl tan deuh ta a, hemi truck - heavy load ho ang hi Luangmual supply kudam-a an thil phurh dah turte chawlhna hmun a remchan vakloh avangin, Pukpui leh Zotlang inkar hmun awlah te hian truck full-load ho an ding nasa em em mai a, hei hi a mangan thlak a ni. Hetah hian chhiahna tam tak a thleng thin a; tlangval bike khalh ho te an insu a, thih phah tam tak an awm tawh a. Tlawng area velah hian 'truck terminal kan mamawh em em a ni' tih kan sawi duh a ni. Tin, hmundangah pawh khawthlang lama Lunglei rawn pawhna hmun angah te, chhim lam atanga rawn pawhnaah te pawh kan mamawhin ka ring a. Kan mamawh zual em emna chu, Aizawl lam atanga Lunglei panna velah, Lunglei outskirts ah hian truck terminal min dah sak thei sela kan lawm hle ang.

Demand No. 3 – Land Revenue & Settlement Deptt. ah hian ka kal leh ang a. Hei, minister tha tak mai kan nei a; *revenue-earning department* a ni a, hetah hian kan tan leh zual a ngaiin ka hria. Mipuite dawr *department* ber a ni a, LSC leh house pass te hi tun aia tam pek theih ni ta se, rural area ah te pawh hian; chu chuan nasa takin chhiah a lo tipungin ka ring a. hmanni ah khan Assembly Committee ah hian kan en a, LSC hi tun kumhnih thum liam ta vel hian pek a tam lo hlein ka hria a. Chuvang chuan, *revenue-earning department* anih angin LSC te hi pe chak thei deuh ila, house pass te, land lease te pawh a ni ang a, hemi tichak tur hian a department thuamchak a ngai ang a; chungah chuan surveyor leh equipment tha zawk te pawh a ni ang a. khawngaih takin hei hi kan minister pawn min chhinchhiah sak se.

Tin, Pu Speaker, he House-ah pawh hian vawi eng emaw zat ka sawi tawh a, Pukpui-a sipai ram chungchang hi kan mangang a ni. Hei hi khawngaih takin min enchian sak se kan duh a. 1986 ah MNF leh India sorkar inremnain sipai te an chhuak a, khami hun atang khan luah dan mumal nei lovin an la awm a, tun thlengin; a hmunhma hi enfel a ngai em em a. Tin, Kawmzawl - Helipad vel hi hi *protected area* atana puan a niin ka hria a, hei pawh hi min enfel sak se kan duh em em a ni.

Tin, chu bakah, *land rent* overdues a tam em em tawh mai a, kum rei tak atang khan sipaite hian land rent an pe tawh lova, mipuiin re-settlement an ti thei bawkw chuang si lova. Tin, sorkarin LSC te pea ti turin restriction a tam si a. Khawngaih takin hei hi min enfel sak kan ngai a, tin kan land rent issue te pawh.

Tin, Demand No. 38 - RD Department-ah hian lut ila. RD Department te an tangkai em em a, keini, a bik takin thingtlang bialte tan phei chuan kan inngahna ber department a ni a, ei kan hmuhna te pawh a ni a *material component* atangin hna min thawh sak nasa em em tawh bawkw a, kan lawm a ni, a department chungah. Nichina ka member-pui ten an sawi ang khan, rangva leh silpoulin te thingtlang a hman tur tha tak tak te min pe thin a, a thawktute chungah pawh lawmthu kan sawi a ni.

Tin, kan biala Pangzawl ah hian Tourism Department hnuai ah Tourist Lodge hi a awm ve thin a, amaherawh chu, tuna National Highway-54 widening project ah hian a hmun kha tihchhiat tur a lo ni ta a. House-ah hian ka han sawi leh ang a - khilalah khian chawlhna/riahna MLA-teh Sorkar mipawimawh te tan pawh a awm miah lo mai a. Khawngaih takin hei hi minister hian min ngaihpaawimawh sak se, *material component* atangin emaw provision an nei thei chuan, department in hei hi min hriat sak se ka duh a ni.

Tin, Demand No. 16 - Home Department ah hian ka han kal daih ang a. Home Department hi 'mipuite himna department' a ni a. Tun hnaiah ramri buaina te kan tawkw a, economic blockade te pawh kan nei a, chungah te pawh chuan min chhanchhuak zel a. Hei, ka dinglamah hian bialtu MLA, ramri bialtu MLA pawh a awm a, a ni pawh a fakawm hlein ka hria a, kan minister pawh a fakawm a; mipuite harsatna min sutkian sak thinah lawmthu kan sawi a ni.

Direct funding chungchang kha Pu Speaker, House-ah hian kan inhnial chiam mai a; khawngaih takin kan minister hian a wind up-naah khan direct funding chungchang hi chiang leh zuala mipui tena kan hriat theih nan min han hrilh se a lawmawm hle ang a.

Hun tlem a la awm a; Haulawng-ah hian Police outpost din tura report niin ka hria a, hun hmasa lamah khan. Khawngaih takin 'hei hi din tura hmalakna a la kal zel

em' tih te hi min react thei se. Sawi tur tam tak ka la nei a, mahse hunin min daih ta si lova. Pu Speaker, he kan minister te demand rawn chhawp hi ka rawn thlawp a ni e.

SPEAKER : Member zahawm tak Dr. Vanlalhlana.

DR. VANLALHLANA : Pu Speaker, ka lawm e.

Vawiina hei kan Minister zahawm takte demand kan sawiho turah hian sawi tur a tam khawp mai a. A PHE ang zawng phei chuan Laipuitlang bialtu kan ni a, bial chhung sawi luh pawh a chakawm viau a, amaherawhchu, zoram tana kan mamawh thila department hmalaknate ah luh ka han chak deuh a. Pu Lalruatkima, Minister zahawm tak department-ah hian lut hmasa ila. Ani nen hian journalist hlui kan ni a, sawi loh kha ka han hreh deuh a, chanchinbu pahnih-ah hian cartoon ka lo ziak tawh thin a ni.

Hei, *wrong information* chungchang kan sawi a; kan minister zahawm tak hian Covid-19 avanga kan harsat lai khan tlin tak maiin information a rawn pechhuak thin a, zoram pumin kan lo ngaichang thin a ni. A hmalakna a ropui ka ti a, a lawmawm ka ti a ni. Tin, kan journalist hote'n chanchinbu bakah website te an han nei a, chubakah chuan social media ah te 'breaking news' kan tih mai thuthar ang chi, tv vela la hmuh hman loh te kha a lem nen, a thu nen te an rawn tichhuak thin a. I & PR pawhin an website ah te thute an rawn chhuah a, chu chu thulakna berah kan lo hman thin a ni. Hei, whatapps vela kan thu tihchhuah te hi, ni e, document leh a link nena tichhuah te kha kan vei tlang niin ka hria a, a ngai khwpin ka hria a. Tin, journalist-te tan pension buaipui mek anih thute hi a lawmawm ka ti hle mai.

Land Revenue & Settlement lamah han lut leh nghal ila. Hei. employment data kan hmuhah khan sawi sual palh chu a hlauhawm viau a; land records lam buaipuitu tur Surveyor post kha mi 15 an chuang phawt a, Land Reforms lamah post 28-ah 4 hnawhkhah a ni a, post 24 an ruak a. 'Survey' tih bikah khan 36 phei kha chu, tumah an awm lo a ni. Tin, a directorate lampah hian post 14 awmah 2 chauh hnawhkhah a ni a, pakhat kha a nghet lova lak niin ka hria; directorate lamah hian Surveyor post 12 ruak a ni.

Hei, 'commission' kan tih, ram hralh chhawn ang chi te, hengho hian surveyor hi an um chak khawp mai a, an rate pawh kan hre ve thelthual a, a-sing bi chho a ni a, chu chu kan harsatna a ni. An niin, 'an dawhkanah eitur dah kan duh a lawm' an ti ve a, an theih angin an lo che ve a. Hei hi a chhan ber chu, surveyor kan indaih loh vang a ni a. tunah directorate-ah khuan, ka hriatsual loh chuan ram teh tur/en tur 1700 chuang vel a awm a; 'thla engzah nge nghah ngai ang' tih chuan, 'thla 3 vel nghah a ngai ang a' ti tein an sawi a. Chuvang chuan, Land Reforms te kan ti chho dawn a nih chuan, Surveyor

lak belh hi tihmakmawh niin ka hria a, kan Finance Minister hnenah khan a changtu minister pawh ka han ngensak nghal ni sela, Surveyor kan mamawh hle mai.

Tin, Ainawn Veng chungchangah kan Chief Minister zahawm takin ‘LSC kan pe ang’ tih te a han sawi a. A lawmawm viau rualin, ram tam tak khu court hnuaia la inchiiah niin ka hria a. ‘Hei hi engtin nge hmalak ala nih zel dawn; LSC pek chu a la hla mai ang em aw’ tihte rilruah a lo lang a. Tikhan duhtawh mai ilang

Pu Lalchamlia, kan Home Minister zahawm tak (Taxation te pawh a ni ang) demand-ah hian ka han lut ve leh ang a. A hmasain Taxation Taxation-ah hian - kan minister hmalakna a lawmawm thin; chhiah, budget-a kan dah aia tam hi kan lo dawng hnem em em mai a. Ni e, Covid lai khan, *devolution of taxes* ah khan kan dawng tlem teh meuh mai. Amaherawhchu, khata kan dawn loha kha a hnu 2021-22, 2022-23 tih vela kan dawn belh nen khan han teh ta ila - vaibelchhia 267.74 kha kan dawnglo teh meuh mai. Amaherawhchu, chhiaha kan dawn tur ‘*State’s own tax revenue*-ah heti zat hi kan dawn kan in beisei e’ ta budget-a kan indah ai khan, 2019-20 atanga 2022-23 thleng khan kan dawna kha han chhut chuan - vaibelchhia 448-in kan dawng tam a ni; vaibelchhe 267 kan dawnglo kan tih lam ai khan kan dawn kha a lo tam daih mai; a inthlahna pawh vaibelchhia 180 lai a ni. Covid laiin kan harsa tih chu a hriat reng; harsatna kan tawh; mipui kan thlabar; hman turah pawh kan buai a ni.

Amaherawhchu, helam panga kan dawnloh lam ringawt kan sawi hian, ‘mipui hmaah hian kan insawi dik zo dawn em’ tih hi kan rilruah awm sela. Leh lam atangin kan dawng teuh a ni; kan minister-in chak takin hma a la a, kum 4 chhungin vaibelchhe 448 chuang pawisa dawn belh kan nei a. Kha kha ‘a hmanna lamah hian kan fimkhur lo zawk a nilo maw’ tih kha kan rawn tanna chu a ni. ‘Chhuanlam a tlinglo’ kan tihna chhana pawh kha, ‘kan harsa lo e; kan hrehawm lo e’ kan tihna a ni lova, ‘pawisa dawn a tlem’ tiha kha chu chhuanlam a tling dawn em ni? Kan Minister hmalakna a zahawm khawp mai. Chuti chungah Covid-19 hripui len avanga mipui kan thlabar laia heti khawp hian department min chhanhimtu hi an indaihlo em em a; chuti anih chuan, hnathawktu pek belh pawh hi an phu takzetin ka hria a tih kha kan sawi lang ve leh duh a ni.

Home Department-ah han lut ila. Police Department-te an kal zung zung a ngai a; an tei zung zung a ngai a. Eng emaw hlekah rikrum thilah a thleng hma ber an nih a ngai a, mipuiin kanlo nghakthup thin a ni. Motor an neihte a chhe hle. Nikum hmasa lam atangin ka zawt tawh a, nikumah te, nikumah phei kha chuan motor 100-a 60 chuang motor khawih theih loh, hman theih loh a awm a ni. Tin, tun hnuaia ka zawhna-chhanna ah pawh khan motor hman theih loh, hman tlakloh kha tam tak a awm a ni. Chuvang chuan, an ni ho an thlen zung zung a hna ber an thawh theih nan hian motor te kan pek a ngai. Cheng vaibelchhe 2000 chuang hi SEDP-ah dah a lo ni tawh a, an motor leina tur hi chu a leng ve turah ka ngai a. Chuvang chuan, ka han sawichhuah sak duh a. Staff-quarters erawh chu kan sawi hnem tawh a, khatah chuan lut tawh lo ila.

Tin, Economic Offences Wing, CID hnuaiia mi hi mipui ten sum an dahna, an peipunnaah hian harsatna an tawhah, ‘engtia hma lakpui tur nge; tunge man tur’ tih te lo buaipuitu an ni a. Heta ka sawi duh chu – hetiang sum dahnaah hian ‘a pung a san poh leh, a risk a sang a ni’ tih hi, MLA te hian kan thusawinaah pawh hian kan tel tam a ngaiin ka hria; harsatna tawh an tam em mai. Khati khan duh tawh chho leh mai ila.

Kan Minister zahawm tak Pu Tawnluia Department a thenah han lut ve leh ila. UD & PA hnuaiia PAHOSS kan han ti a, sum kan han sem a, a thenin 1st instalment an dawng tawh a, a thenin 3rd instalment thlengin an dawng tawh a. PAHOSS chungchang hi ka sawi fo thin; beneficiary-te an intiamnaa an lehkha ziahah te khan, ‘LSC dah kham anih loh chuan, Bank Guarantee dah tur a ni; kum 10 chhung dah tur a ni; tih te a ni a; kha kha an dah tak tak em; quarantine te kha an dah tak tak em? A then chuan LSC tel lovin an dah a, chutah chuan anni tana risk awm ve chu *Parking Policy* tello hi a ni. An din ve tawpa, a bul hnaiaah parking, kawngsirah an dah teuh theih chuan, tunge rawn dah duh ang? An in kha kum 10 chhung tawp mai parking atan an hman a ngai; engmah an hmuh let loha khatia awm awl mai maia kha chu, anni tan chuan a hrehawm ve ngawtin ka ring; parking policy nena kan umzui ve a ngai a. Kan Local Council te emaw, Aizawl-ah chuan AMC-te an lo ni a, ‘khatiangah khan traffic police te nen emawa tanho deuh chu a ngai mai ang em’ tih rilruah a lo awm a. ‘CCTV an dah reng em; a nghaktu tur an dah reng em’ tih te kan en a ngaiin ka hria a. Tuna kan pek danah hi chuan, Pu Speaker, i dinglama mi thenkhat te chuan ‘an duh duh an pe deuh em aw’ tih kha rilruah a awm a. A then chuan an lak ngam loh phah a; *parking policy* ni lovin, *garage policy*-ah kan chhuah a ni. Mahni motor kawh lai hi park-na turah khan chhiar tel phal a ni lova. Tuna kan bial chhungah ngei ngei pawh anmahni motor pahnih an dah a, chumi chu park angin an chhiar tel a; chutiang chuan kan kalpui a ni. An motor kha chhiar tel tur a ni reng reng hlei nem. A policy chu a chhe lem lo, mahse a implementation-ah hian kan tan a ngai takzet. Mipui sum kan hmang a, a thlawnin kan pe bawh si a. Chuvang chuan, mipui sum kan hmannaah hian tan kan laka, mipuite kan zah pawh a ngai a ni.

Solid-waste Management Centre te pawh kan sawi thin a, a tlawh zing ber niin ka inhria a, Pu Speaker. Khu project khu a tir atang khan a diklo niin ka hria; sorkar hmasa lama an lo buaipui te pawh a ni ang. Mipuiin kan bawlhhlawh pah tur hi an chhut dik lo niin ka hria a. Chuvang chuan, tunah pawh khuan a enkawltute tan a manganthlak a ni. Khu thil khu chu kan ngaihven thata, kan buaipui that a ngai takzet a. Nakinah chuan environmental disaster-a la ni thei; harsatna a la thlen thei a ni. A sirah khuan an nawr liam a, kan zuk hmu vek a. Nakinah chuan tuiah, khutah a zuk lut leh ang a, kha kha kan tui tlan te a la ni leh dawn a ni, nakinah phei chuan; mi tamtak innghahna a la ni leh ang. Chuvang chuan, khu thil khu kan buaipui a ngai.

Pu Speaker, ka zo tep e. *Aizawl Smart City* chungchangah hian ka lut leh lawk duh a. G-20 kan thleng dawn a, artificial grass phah lam kha kan sawi leh ta reng reng lo, Smart City atan hian. Hruin zamhnaawh te kan ngaihven a, school leh kawr pawl te

a ni kan ngaihven ni. Chu chu *Smart City* nihna a ni. Ka sawi fo tawh thin a, a tirah tender 14 awma kha tunah chuana a awmbelh tawh a, a tira 14 awmah khan 7 ngawt mai Sports-a a kala kha ‘a dik lo’ ti kha ka rawn auchhan a ni. Helaiia Common Centre - ICT-a kan din te chu kan sawi reng reng lo; minister pakhat hnuaiah chuan a ni tho. Kan kalphungah hian a a pawimawh hmasa kan en a ngai. ‘Smart City’ ni tur chuan smart taka mipuite, kan awmna tura hi kan ngaihtuah tel a ngai a ni. Ka lawm e.

SPEAKER : Tunge ni leh dawn? Member zahawm tak Dr. F. Lalnunmawia ka sawm e.

DR. F. LALNUNMAWIA : Pu Speaker, ka lawm e. A hmasain kan Deputy Chief Minister zahawm tak Pu Tawnluia demand hi ka han sawi hmasa ang a; Demand No. 25 - PHE hi.

A hmasain JJM scheme atangin thingtlang hmun hrang hrangah hmasawinna kan hmu a. Thingtlang mite tui in tur household water connection pekte tam tak kan hmu a. Thingtlang mipui, tui connection la hmu ngailo te’n tui connection an hmuha an hlimzia te kan lo hmu a. Ka bial ngeiah hmun hrang hrangah tui hnianghnar zawkin kan lo hmu thei ta hi ka lawm hle a ni. Tin, budget-a kan hmuh ang hian kum thar lo awm turah pawh JJM hmanga hemi project chhunzawm zelna tur pawh kan lo hmu a, a thlamuanthlak ka ti a. Bial chhungah pawh, a bikin han ti leh ila, water reservoir thahnem tak, tui tam tak khawl theihna eng emaw zat min siamsak a, kan department chungah nasa takin lawmthu kan sawi a ni. Tin, chumi bakah chuan tunah hian AMRUT scheme atangin project base kan han neih leh a; khang JJM-in a cover ve loh AMRUT scheme atanga thawh tur te kan nghakhlel hle a ni.

Tin, UD & PA-ah hian ka han kai ang a. Hei hi department pawimawh tak mai, khawpui hmasawinna thawktu a ni a. Hmun hrang hrangah hmasawinna kan hmuh rualin Covid-19 hrileng kha UD & PA hian an tuar nasa hlein ka hria a. Kum kal ta 2021 – 2022 leh 2022 – 2023 ah beisei angin sum kan hmu thei lo a, chungte avang chuan UD & PA pawh hian beisei angin hna a thawk chak thei lova. Budget-a kan hmuh ang hian kum tharah erawh hi chuan major work-ah pawh nuai 10,000 chuang kan hmu ta a. Heng bakah pawh a tul angin kan la hmuhbelh ngei te pawh kan beisei a, district khawpui leh sub-town te bakah AMC leh Local Council-te pawhin hmasawinna hna thawkin hmel thar kan hmuh chhoh ngei ka beisei a ni. Budget-a kan hmuh ang hian Household & Community toilet siamna tur kan hmu hi a lawmawm hle a. Hemi chungchangah hian Pu Speaker, han sawi ka duh chu - Mizote hi inthiarna hmunhma lamah hian hmasawn kan tul hle a. Thawmhnaw leh incheina lamah chuan hma kan sawn a, hnam changkang zawkte ang maiin kan nalh a ni. Amaherawhchu, khawpui leh thingtlang hmun tam takah kan kalin an inthiarna hmunhmain duhthu a sam lo a. Inthiarna toilet chu nitin zantina kan mamawh a ni. Chuvang chuan, hetianga

tihchangtlun hi a tul hle a. Hemi lama UD & PA department-in hma a la tur hi a lawmawm takzetin ka hria a ni.

Tin, kan bial chhung khaw thenkhat han sawi ila. AMC – urban area Saikhamakawn, Hlimen leh Melthum te hi LAD leh RD department te'n min cover ve si lova, hmasawna kan mamawh ve khawp mai a. Chuvang chuan, kumin kal chho turah hian UD & PA atang hian hmasawna tur min thawh sak ve ngei kan beisei a ni.

Kan Minister zahawm tak Pu Lalruatkima department chanah hian ka han lut ang a; Demand No. 6 - Land Revenue & Settlement hi. He department hi sorkar department pawimawh tak mai, sorkar ram pass leh LSC petu niin Revenue Department hi a thawkchhuaktu pawimawh tak a ni bawh a ni. Hemi kawngah hian minister hoa fimkhur zawka hma an la hi a lawmawm hlein ka hria a. LSC leh ram inpek thua a tam hle a, chungte siamtha tura minister hoa hma an la tur hi a lawmawm ka ti a. Chutih rual chuan a thawktu an indaih loh zia te sawi nasat a ni. Chuvang chuan, sorkarin a thawktu a lak belh se hi a tul hlein ka hria a Sorkar pawhin a tul ang zelin a ngaihtuah ang tih ka ring. Tin, Central scheme SWAMITVA atanga an hmalakna kha engnge an an tawh ka hre lova, ka bial khaw thenkhatah hemi hmang hian survey-te neih tawh a ni a. Hma an sawn zel turah ka ngai a, zawhfel hun a nghahhlelawm hle a ni.

Tin, I & PR-ah hian ka han kai ang a. He department hi mipuite hnena thu thar leh thu pawimawh puangzartu an ni. Pu Speaker, tunlai khawvelah social media hmanga inbeihna leh thu thehdarh a tam hle a. Mipui tan pawha thudik ber pawh hriat hleitheih loh in kan awm fo a ni. Thenkhatah chuan a ziaktu hming tak pawh tarlang ngam loin hming lem hmangin sorkar beihna, party inchirthehna lekh mimal inbeihna a tam hle a ni. Chutiang karah chuan I & PR hi thudik min hrilhtu a ni a. Kan journalist hote nen tangruala thudik min hluitu an ni a; chutiang khawpa department pawimawh chu an ni a. Heng a thawktu kan media mite pawh hi ngaih pawimawh leh duat an tul hlein ka hria a. Minister duhsaknain Journalist Welfare Society-ah member ka ni a, anni hamthatna tur ngaihtuah tur hian kan thu ve thin a ni. An damloh nikhuaa an inenkawlna tur MR bill chungchante sawiin, pek thin an ni. Chutihrual chuan, journalist pension scheme te pawh hi ngaihtuaha entitlement tha zawk, an zinvah nikhuaah te pawh hian pek an tul hlein ka hre bawh a ni.

Tin, Damand No. 38 - RD-ah hian ka han kal leh ang a. RD hi a pawimawh em em a, kan bial, a bik takin thingtlangah kan chhawr hle a. NERGS chungchangah hian Ni 100/100 hi kum 3 chhung kan inhlawh tawhin ka hria a, a lawmawm hlein ka hria, Pu Speaker. India ram hmun average a lakin 100/50 tling mang lo te an inhlawh a, chutih lain Mizoram-ah 100/100 kan inhlawh thei hi a lawmawm ka ti a. Sorkar sum hmanna a lo tam anih pawhin ni 100/100 inhlawhna tur sum kan han inpe thei hi chu a lawmawm thlawtin ka hria a. Hei hi miretheite inngahna tak tak a ni a, miretheite hmangaihtu sorkar kan nei hi a lawmawm takzetin ka hria. Sorkarin helamah sum a lo seng hnem

anah pawhin keichuan a awm hle ah ka ngai a ni. Chuvangchuan, he financial year kal mek zelah pawh hian ni 100 kan inhlawh leh theih ngei ka beisei a ni.

Tin, SPMRM hi kan chhawr khawp mai a; Aibawk RD cluster kan ni a, hmasawna hna chi hrang hrang kan hmu a ni. Tin, NLCPR atangin Pu Speaker, Aibawk mini-sport complex kan sa a, zawhfel a nih hun tur kan nghakhleh hle a ni.

Home Department-ah hian ka han lut ang a, kan minister zahawm tak Pu Lalchamlia chana hian. Sorkar kalta ah khan kan hriat theuh angin, Pu Speaker, zu avanga police nunna tam tak kan chan anih kha. Tunah erawh chuan kan sorkar, a changtu minister zahawm tak enkawlna hnuaiyah police tha leh fit, hrisel zawk kan lo nei ta a, phur tak leh tha takin an hna pawh an thawk mek niin ka hria a, ka lawm hle a ni.

Chutihruah chuan kan police station thenkhat thumthat ngai, a bikin ka biala Sialsuk - Police Station saw thumthat a ngai hle a. Tin, an motor kawl leh staff-quarter te saw a tawng tawh hle a, ruahsur lai phei chuan a buaithlak hle a, chei that kan nghakhleh hle a ni. Tin, Sialsuk Police Station-ah hian police pawh kan indaih lo hle mai a, siamrem a tul hlein ka hria a ni.

Pu Speaker, a tawpna atana ka zawhna ka neih hi kan Home Minister zahawmtakin a a rawn sawichian theih chuan –

Vawiiinah khan thu inchuh kan nei a, kan member zahawm tak te khan kan CM lama complain lodge anih thu te kha an lo tarlang a. Pu Speaker, ka hriat duha chu - hemi case nei anga complain lodge lai taka hi case nei anga sawi mai chi a ni em; nge, a hnu leh zelah thil a awm? Home Minister zahawm tak khan ‘case nei ang maia sawi theih tur chi a ni em’ tih kha min sawifiah sak se ka duh a, a chhan chu Zoram mipuiin kan ngaichang thup dawn a, kan Home Minister khan thil awmdan dik tak kha mipui te min rawn hrih se ka duh a ni. A ban lampang thu kha chu keichuan tul ka ti lova; mahse, mipuiin thudik hriat kan duh a ni.

Tin, zawhna ka han zawh leh duh chu, Thursday khan kan ZPM group leader khan a sawi zawk a, ADC - direct funding chungchangah khan AMC te, Local Council leh VC te kha 15th Finance Commission hnuaiyah khan direct funding pek anga sawi kha niin ka hria a; khami chungchang pawh kha ka hrechiang chak deuh a, kan Home Minister anih loh pawhin, kan Dy. Chief Minister zahawm tak chan min rawn sawichian sak turin ngen duh bawk a ni e.

Vawiiinah kan Dy. Chief Minister leh kan Minister zahawmtak te demand hi lawm takin ka rawn thlawp a ni e. Ka lawm e.

SPEAKER : Member zahawmtak Pu Vanlalhlana ka sawm e.

PU VANLALHLANA : Pu Speaker, i dinglama mite hian zawhna an ngah viau mai a, han chhan ve ka chak a, mahse chhang tur ka ni si lova. Minister zahawm tak tak pathumte demand kan han sawiho a ni a, a hmasain Pu Tawnluia demand-ah han lut ila. Keini zingah chuan a upa ber niin ka hria a; term tir lamah khan damlohna ten a tlakbuak a, Pathian hnenah te kan tawngtai a, dam takin a mawhphurhna te a hlen chhuak a, he House ti zahawmtu ni te pawhin ka hria a, a lawmawm ka ti tak meuh a ni.

Demand No. 13 – DP & AR chungchangah hian, NIELIT (National Institute of Electronic & Information Technology) Zuangtui-ah sawn central sorkarin min rawn din sak a, 2001-ah khan; 2013-ah hian Pukpui, Lunglei District-ah Extension Centre an din a ni. Tunah hian Study Centre 34 Mizoram pumpuiah an nei bawk a, certificate course hrang hrang an zirtirin, an pechhuak a, Mizo thalai sang rual hianin a zar kan zo a ni. Computer zir man a awm lova, a free vek a ni. Anni hi NSQF (National Scheme Qualification Framework) zulzui an ni a, an skill kha *international standard* ti ila a sual lo awm e. Chutiang chuan, Mizo nula leh tlangval tamtak ten certificate course te an zir zo a, computer thiamna an nei a ni. Tunhma zawngin ministerial staff - Group A, B leh C te an lak dawn khan ‘computer an thiam a ni’ tih lantir nan certificate NIELIT leh MSCTE (Mizoram State Council of Technical Education) pekchhuah thin te kha a pawm ve ve a. Tunhnaiah khan recruitment rules tidanglamin LDC dil tura qualification ngaia chu – Higher Secondary School Leaving Certificate leh Computer Proficiency Certificate MSCTE chauh ina a pek kha pawm a ni ta a, NEILIT-ina an pek kha pawm a ni ta lo a ni. Tunah hian Mizo nula leh tlangval tamtak te chumi chungchangah harsatna an nei a ni. LDC hna a ruaha an apply khan, an application kha reject nghal a ni; MSCTE Certificate chauh pawm a nih avangin. Hei hi kan minister zahawmtak khan en leh se, ‘siamthat leh a tha em’ tih laia kha he House-a ka han tarlang hmasa duh a ni.

Tichuan, PHE hi an fakawm thlawt a, an thawk nasain an thawk tha a. Mizoram-a khaw sang ber pawl Durtlang-ah pawh hian tui min pump thlen sak a, kan lawm a ni. Amaherawhchu, khawiah mah hian tui duhtawk hi kan hmu lova, amaherawhchu hma a sawn zel ang a, kan minister-in hma a la ang a tui hnianghnar te pawh kan la nei ve turah kan beisei tlat a ni. PHE hian fak an phu a n.

Thil pakhat, he House-ah pawh hian kan sawi fo a; thir pipe ni lo, plastic pipe kha central pawhin hman a phal nia sawi a awm a. Ka han hriatchian duh chu – ‘plastic pipe’ han tih maiah hian - astral pipe te, HDPE te, PVC pipe te a awm a, ‘eng ang pipe chiah hi nge’ tih kha; private te pawhin kan duh ve ang a. Leia phum tur te pawh a ni ang a, ‘khatiang atana tlak tur quality kha eng ang pipe nge?’ tih kha han hriatchian ka duh khawp mai.

Demand No. 46 – UD & PA chungchangah hi. Kan sorkarah eng angin nge nghawng a neih hi ka hrethiam chiah lova. Housing-For-All Scheme hnuaiah hianin kan vengah dil an awm ve a ni; thlan pawh an ni. Tin, office atangin official ten an rawn verify ta a, a rawn verify tu chuan applicant hnen atangin ₹1,000/- a la a ni. Thla tira hlawnh lak loh avanga pawisa indaihloh kal chhoah khan khang application form man la te pawh kha anni thei a, engnge a chhan ka hre lova. Engpawh nise, sorkar hnathawk ten khatianga min lo dawrtute hnenah khan sum an dil turah ka ngai lova, hetiang *vai-culture* chhe zet mai hi kan chhawmning ang tih hi ka hlau takzet a, he House-ah hian ka han tarlang duh a ni.

Pu Speaker, tun tum session chu session danga kan ngaihpawimawh em em thin - Governor Speech-ah te, Chief Minister Budget Speech-ah te pawh lang thin ‘PAHOSS’ a lang lova, a khawhar thlak viau mai a. An ngaihsak ta lo deuh nge ni; a hma chuan ‘kan flagship programme’ tia kan sawi uar viau kha a ni a; khua a tihar deuh a ni, he thil lo lang ve lo hian.

A dawt lehah chuan Pu Lalchamliana, Minister chan, Demand No. 8 - Taxation Deptt. chungchang hi; he department hi an tha thlawt; fak an phu; an target an khum ziah thei a. Sorkar khaidingtu, kan harsat pawha khai chhuaktu a ni ringawtin ka hria a. Engkimah duat te pawh an tha, an mamawh tih sak zung zung te pawh kan bat niin ka hria. Department pawimawh tak a ni a, Mizoram sorkarah hian ‘a thawh hlawk ber pawl an ni’ tih kan hai awm lo e.

Pu Chama chan tho, Demand No. 16 - Home Department hi ka sawi duh a. independent ram ni ta ila, ‘kan defense ministry’ kan ti ve awm e; chuvang chuan, ngaihpawimawh em em turah ka ngai a. Mizoram-ah hian MAP batallion *pathum* kan nei a, IR Batallion *panga* kan nei bawk a, a vaiin batallion *riat* kan nei tihna a ni. Amaherawhchu, batallion khat strength tur hi 1000 a ni ta a. Ka hresual mai thei a, tunah hian police department-ah hian hnaruaik sangthum vel a awmin ka hria a. Police force *sang-riat*, batallion *riat* atanga kan paih chuan *sang-nga* police force an awm tihna a ni ta a. IR batallion khat hi Assam-ah an awm reng a, tichuan, a lo hniam leh ta deuh a, tin, company eng emaw zat hi State pawnah election duty tein an kal reng a. Tichuan, Mizoram venghimtu leh *law & order* maintain tur force hi an tlem ta em em mai a ni. Department dang angin casual employee te, temporary worker ang te tih ve a rem si lova. Chuvang chuan, police hi eng thil pawh thleng thei - ramri buai te kan nei a, chhak lamah Burma an awm a, Bangladesh an awm a, hel pawl kil tinah an awm tuau tuau reng a, a chhe ber pawh tawh thei reng kan ni. Chuvangin, hemi chungchangah hian Mizo *khua-leh-tui* te leh kan ram himna tur atan hian kan force hi a beitham deuhin ka hria a, hei hi sorkar hian ngaihpawimawh se ka ti tak meuh a.

Assam nen kan han buai a, kan hre vek a, Assam Chief Minister chuan, ‘police batallion 10 kan din ang; commando batallion kan din ang’ te an ti kuk kuk mai a; khang

han ngaihtuah kha chuan kan police te hi an beitham deuh a, tihpun leh tihchak an ngai viauin ka hria. India hian defense budget-ah budget pum atangin 13.18% a dah a, Mizoram kan police department hian kan total budget atangin 5.5% vel hi a chang ve tawk a ni. Chuvangin, kan ngaihpawimawh hi a tha a.

Tin, Prison Department hi Home hnuai tho niin ka hria a. Mizoram-ah jail 10 kan nei a, chung a 5-te ah chuan a capacity aia tam an awm a ni. Central jail-ah total capacity chu 438 nos. a nih laiin tang hi 800 nos. an awm a; Womens jail ah 96 nos. capacity anih laiin, 215 nos. an awm a; District Jail, Aizawl ah 90 nos. tur capacity anih laiin 130 nos. an awm a. Lunglei District Jail ah 109 nos. capacity a nih laiin 141 nos. an awm a; Champhai District Jail ah 105 nos. capacity a nih laiin 144 nos. mitang an awm a. Kan jail te hi a tawt viau a, hengte hi ngaihpawimawh a thain ka hria a. Jail hi 'inhremna hmun a ni lovin, insiamthatna hmun a ni' tih kha ka han tarlang duh bawk a ni.

Tichuan, Pu Lalruatkima, Minister zahawm tak demand hi tawi tein ka han sawi ang a. Hna chak taka thawk turin kan beisei thin a, amaherawhchu, revenue-a hna chak taka thawk tur chuan surveyor an ngah a ngai a ni; Surveyor te tel lo chuan Revenue hi a kal thei lo a ni. Chuvangin, surveyor an nei tlem tih kan hria a, kum tina sawi a ni thin a, hei hi an mamawh tawk ang ngaihtuah a tha khawpin ka hria.

A dawt lehah chuan District Land Revenue Office, MPSC Office thlanga awm saw, tukina ka inleng pakhatin a sawi chu - 'Saw office saw dawra, officer-te hmu tur chuan pawisa a ngai a ni,' a ti tlat mai a. 'Engnge a awmzia?' ka ti a. 'A hnuai atanga an hruaichhoh che chuan, ₹200/- i chawi ang a, nangmaha i kal chuan, ₹300/- i chawi ang' a ti a. I chawi em ni tiin ka zawt a, 'chawi e,' a ti a; 'receipt i dil em' ka ti leh a, 'receipt chu blank-paper ah ziakin a an pe thei a, amaherawhchu, *mutation* emaw, revenue-a lut tur pangngai ah chuan receipt pangngai an pe a, tih lohah chuan receipt an pe lo,' a ti leh zel a. Chu chu tawngka pawha han sawi theih mai a ni a. Amaherawhchu, demand sawi te a ni bawk a, a remchangah House-ah ka han sawi a ni. Ka hun a tawp em ni Pu Speaker? (**Speaker:** Aw, a tawp chu a ni a.)

A nih leh aw; ka duh tawk ang e. Ka lawm e.

SPEAKER : Member zahawm tak Pu C. Ngunlianchnunga ka sawm e.

PU C. NGUNLIANCHUNGA: Pu Speaker, vawiinah kan Minister zahawm tak tak te leh kan Dy. Chief Minister demand kan sawiho a ni a. Department 9 a ni a, minute 10 chu a tlem khawp mai a. Engpawh nise, a hmasa berah Demand No. 13 – DP & AR ah hian ka han lut nghal mai ang a. Ho in ti mai thei a mahse keini Aizawl khaw pawn bialtute tan chuan a ho lo a ni.

Kan district-a ATI hian hostel a nei a, AT - training autonomous district council atanga lo kal staff te leh officer te bakah Siaha district atang te, Lunglei atang te, Champhai, Kolasib, Mamit atang tein. Chungcho thlenna tur atan chuan hostel building tha tak a awm a, mahse furnish a nilo tlat mai khu; cheng tam lutuk pawh a ngaiin a rinawm loh a. Kan Minister zahawm tak khan min chhinchhiah sak se la, helai hi thenkhat tan chuan thlenna awlsam tak anih laiin thenkhat tan harsa tak a ni a. Chuvangin khulai ATI hostel building tha tak hi furnish dan kawng zawn hram nise tih kha ka sawi hmasa duh a.

A pahnihaah chuan, Demand No. 25 - Public Health Engineering Department hi zawhnaah pawh khan kan sawi tam tawh khawp mai a. Kan minister khan JJM hnuaia tui connection pekna plastic pipe (ama tawng takin 'rubber pipe' ti mai ila), kha kha 'a tha tawh a ni' a ti tlat lai a kha, mipuite hian tha an ti lo a ni. Hei, keini pawh a hminga member kan nih ve takah chuan, 'Ka pu, House-ah min lo sawi sak rawh; thing te kan lum a, eng emaw lung ten a delh hlek a, a chhe nghal zel mai a, kan tan siam a har em mai a; chuvang chuan he connection pipe hi rubber pipe ni lovin *thir*, GI pipe ngei hi min dah sak thei se la kan duh a ni' tih kha question kan han sawihonaah khan kan minister tlangkawmna chu a ni nain, vawiin demand sawi niah hian ka han sawi leh hram a nih chu. Tihdan kawng a awm hram chuan ngaihtuah sak a va tha em.

Keini lam hi town kan ni ve naa chu UD & PA lam project hian min thleng ve ngai lova; sawi lo mai ang aw. Sawiloh hi a him zawkin ka hria.

Tichuan, Information Department changtu Pu Laruatkima demand No. 26 hi a fakawm ka ti a. Covid lai khan zingah kan tho a, 'engnge chanchinthar awm' kan ti a, whatsapp kan en vat a, thawh rual rualin. Kha laiah khan an hnathawh a tha ka ti a, an fakawm ka ti. Tin, calendar te, diary bu te min han pe a, thenkhat tan a ropui viau lo mai thei, mahse a ropui ka ti a; an hnathawhna chinah an fakawm khawp mai.

Tin, Demand No. 38 - Rural Development-ah hian keini hi BADP cover area kan ni a. Central sorkarin BADP a siam chhan a hi tun sorkarah hi chuan a hlawhchhamin ka hria. A area mi ten a infrastructure lam chauh an chang a, mi harsate hian thawh tur leh chan an nei lo a ni. Ruling MLA atang ngei pawh hian 20% vel kan chang a, chu pawh chu a te te, a lian ho hi chu 'direct-in minister lamah a kal deuh vek a ni' a ti a. Keini chu opposition kan ni a, engmah khalamah beisei ve tur kan nei chuang lova. Amaherawhchu, border area ami te hian chang se la. Pu Speaker, border area developna tur anih ang tak hian, an khawtlang leh a mihring develop kha a va han pawimawh em.

Kum tawpah kan inthlang mai dawn a, 'RD minister a ni leh ang nge, ni leh lo ang' ka hre lova. An sorkar leh anih pawhin, an sorkar lo ve thei tho bawh a. Vawinna ka sawi duh chu - 'department lam pawh hi an inenchian ve a tha em' ka ti a ni. Kan

hunlai khan, ‘additional fund BADP-ah eng nge pawimawh in tih, proposal siam rawh u le’ an rawn ti a, MLA te kan nih angin. Ka bialah chuan tunah tui harsatna tak tak, tuna JJM a chhuah hma hian Hmawngbu khua te, Tuisentlang te, Mautlang te tui a harsa em em a. Chu chu ‘solar pumping hi tih tur’ an ti a, vanneihthlak takin a lo hlawhtling a. Hmawngbu-ah pheih chuan nuai 250 ngawt tui pumpna tur additional fund kan hmu a ni.

Chutih mek lai chuan a kalkawng ‘Construction of Medium Truck Road from Hmawngbu, Thlankawn to Mangkhawng Lui’ tiin cheng nuai 20 BADP atang bawkin kan han dah leh a. A kawng heng nuai 250 man kha chu a contractor te khan thawh ve mai awm tak a nih laiin, BADP atangin an han dah sak leh a; nuai 270 tihna a nih chu, Pu Speaker.

Chutiang chuan Hmawngbu khuaah hian ‘Construction of PCC pavement with side-drain between Pu Chozah House to Pu Zakapa House’ tih a ni a. Hei hi PMGSY Road hnuai a PCC pavement hna hi thawh a ni a. An khua ami te pawh ka va zawt a, ‘hei hi chu contractor-te thawh a ni; block lama tanga thawh niin kan hre lo’ tih te an lo sawi a.

Tin, solar pumping-ah bawkh khan, ‘solar pumping pump house water pipeline at Tuisentlang’ tih a ni a, hetah hian cheng nuai 60 an dah a, km 1 vela mi zuk pump tur a ni. A kawng kha contractor-ten an lai mai a. Tichuan, tui kha ‘a pump bak hi kan tih tur a ni lo e’ an ti a, public distribution te reservoir te pawh engmah siam a awm lova, daipawnah an pump chhuak tawp mai a, tichuan, an kalsan mai a. A pump chhuah ber kha chuan, anni chuan, ‘a pump bak kan tih tur a ni lo e’ an ti a. Chutih mek lai chuan, nuai 60 kan dah hnuah khan contractor MST & V, Eastern Engineer, Hunthar Veng kha a contractor a ni. Chumi hnuah chuan ‘Solar Pump and Supplying of Pipeline at Tuisentlang’, cheng nuai 30 a awm leh a, chu chu 2019-2020 BADP scheme a ni. Kan Minister hian a detail-in a hre vek kherin ka ring lova, a chhan chu a bial lam a ni lova.

Amaherawhchu, ka sawi duh lai tak chu, nuai 60 senga tui pump tur a nih laiin engati nge nuai 30 kha an dah leh a; public distribution an ti bawkh si lova, reservoir an siam bawkh si lova; 2019 – 20 daih tawh kha a ni. Khatiang khan thil a kal chho kha enpui leh ngaihvenpui deuh chu a va tha em.

Hei, Mautlang-ah hian tui pump-na tur solar pumping-ah hian nuai 69 dah a ni a, a thawktute chu ‘M&S, P & V Eastern Engineer, Hunthar Veng’ tih te kha a ni. Khamite khan nuai 69 sengin an pump mai a, anni pawhin an pump chhuak a, an kalsan mai a. Amaherawhchu, tui, tunhma chuan khutah zu chawi thin, tuikang te inchuh thin kha khawdaia pump chhuah a ni hrim hrim pawh kha a lawmawm hrim hrim a. Chutihruah chuan, deptt kan kal dan tur; lu kan met a, pangkhat kan met a, lehlam met

lova kalsan ang deuh a nihna chen a awm tlat mai a, chuvang chuan, enzui a pawimawh hlein ka hria.

Keini saw thingtlang khaw te tak te te kan ni a. Tin, Deptt pakhat chhungah si item inang reng, a man, a amount inang lo a awm nual mai a ni. *Entirnan*: Conception of health worker building at Tuithumhnar hi nuai 10 a ni a, Pu Speaker, chawhma lamah ‘hun ka pekbelh ang che’ i tih kha; Pu BD an min kian lehngal a. Tichuan, ‘contstruction of primary school at Mautlang’ah hian cheng nuai 15 a ni leh a, primary school building sakna tur ve ve si kha, a plan leh estimate pawh a dang chuanguin ka ring lo. Lawngtlai Block-in cheng nuai 15, Bungtlang Block-in nuai 10 a ni a. Deptt pakhat hnuaiyah si inang lo nuai maiin a kal hi helaiah hian kan enpui ngun deuh hi a tha khawp mai ka ti a ni.

Tin, Construction of community centre at Zochachhuah’ tih a ni a. Pu Speaker, Zochachhuah chu i hriat em kha, i minister lai pawh khan. Khatah khan nikum 2019-20 ah khan cheng nuai 20 in Community Hall sak sak an ni tawh a, khaw te reuh te an ni. 2022-23 ah hian nuai 30 dah a ni leh a, khatiang anga an mamawh ni lo, sum siamna tur ang zawng nge ni ka hrethiam chiaah lova, hetah tak hian kan efficient loh zia a tilangin ka hria. Zochachhuah khuaah khan nuai 20 leh nuai 30 man kha mamawh a ni lo; kan mamawh hi inpe ila a pawimawh khawpin ka hria. Pu Speaker, hei hi a deptt. lam pawh kan tan deuh a tul a ni. Lawngtlai Block-in a lo siam ringawt kha Bungtlang Block nen engtin nge a lo siam dan; block hrang hrang a nih avanga inang lova kal nuai kha a fel lo khawpin ka hria, khalai kha ka sawi duh a.

Pu Speaker, zing lamah khan zawhna kha ka zawt ve a, Home Deptt-ah khan; kha kan Minister zahawm tak pawhin a sawi a. Ka zawh duh chu - hetah hian min rawn react ngei se ka duh bawk a.

Lungtlai-ah hian kum 2013 nge 2012 ka hrechiang chiaah lova, sawlai CEM ka nih ve lai khan lung te pawh kan phum a. 3rd IR Battalion hmun tur sak a ni a. Hei, kum 10 chhungin an sa zo hlei thei lo chu a ni a, a contractor hi NECS a ni a. Kei pawh hi ka bial a nih angin ka kal zing khawp mai a, ka va tlawh thin a, a hnate a thalo khawp mai a, a that loh zia chu, Covid lai khan CCC-ah an hmang a, tui a far chuah chuah mai a ni. Tin, ‘an balu hman te pawh a tha tawh lo a ni’ tih ka mit ngei hian ka hmu a; a thla te pawh ka la a. Kan sorkar laia minister te ka nih ve lai pawh , minister ang te pawhin kan bial te a ni a kan va kal ve a, kan va en thin a. ‘E, hei hi chu a tha lo a ni’ kan han tih pawh khan khatih hunlaia kan hotu lian te khan ‘i va kal a, i sawisel mai a’ min ti a; amaherawhchu, thil thalo chu kan sawisel ngam tur a ni. He ram rorelnaah hian thil thalo, Zoram siamtha tura Pathian leh mipuite zara rawn ding chhuak ve ka ni. Mahni sahmim puarna tur emaw, inhampuarna tur emawa politics khel ka ni lo. Kan ramah thil tha a din a, he ramah hian rorelna dik leh rorelna tha a din hi ka duh a, chuvang chuan ka sawi zel a, ka sawi zel bawk dawn a. Tin, Kan minister zahawmtakin min react se ka

duh chu – ‘engtikah nge 3rd IR Battalion, Thingkah hmun khi luah theih a nih ang?’ Kum 2013 vel ami kha tun thleng hian siam zawh lohin a la awm a, a zatve an siam a, a zatve phei chu a chhe tawh a ni. Tichuan, he an hnathawh hi ‘depts-in tha tawk kan ti em; kan lung a awi em; kan hah a dam em; a workmanship a tha tawk em’ tih lai te pawh hi min react se ka duh khawp mai tih lai kha ka sawi duh a.

Tin, chutih rual chuan Pu Speaker, Zochachhuah-ah khan tun kan sorkar hian Police Outpost awm ve tur ang deuha sawina te pawh kha a awm a, mahse, chawhma lamah Police - Home Ministry lam kha an lo thu lo viau niin ka hria a. Engpawh nise, khulalah khuan a pawimawh a ni. Tunah kawngpui laihtlang a ni tawh a, a thlang lawkah Zorinpui a awm a, boarder a ni tawh a, khulalah khuan thil engkim lo kalna atan, Police Outpost Bungtlang South-ah daih an awm avangin. An lirthei ni se, chawhma lama an lo sawi tawh ang khan kan Minister nih ve lai pawh khan min zui a, escort-tu ber motor kha kalsan te a ngai a, kan sawi thin a, an ti hleithei lova. Ka bialah hian Outpost pahnih Bungtlang South leh Longpuighat ah a awm a, khungte pawh khu thuam that a ngai khawp mai. Tin, Zochachhuah-ah pawh khuan Outpost min dahsak ngei sela tih kha. Pu Speaker, hun min pek belh a ka lawm hle mai.

SPEAKER : Ngawiteh u; dar 5 a ri dawn a, minute 5 chu a la awm nain; House thu thu a ni a. Awle, Member zahawmtak Pu Zodintluanga ka sawm e.

PU ZODINTLUANGA RALTE: Pu Speaker, ka lawm e. Demand No. 16 - Home Deptt. atangin ka han tan ang a.

Hei, kan Chief Minister berin ramri chinfel dan thuruk kha a hria a, ‘thuruk a ni miau a’ a ti a, kan Home Minister hian, vawiin thlengin a la hre lova, a la hrilh bawk si lova; kan chief minister hi ramri ah a la buai chu a ni a. Pu Speaker, Zoram mipui hi District Council, a nimin lama kan minister ten an sawi ang khan, ‘lem ang min der san’ hi a ni ringawt mai a. Kan sorkar hian *healthcare* ah lem ang min der san a, *kawng chhawng* ah lem ang min der san a, *market buaipui* ah lem ang min der san a, *AR sawnchhuah*-ah lem ang min der san a, *Zo-buh hlir ei* ah lem ang min der san leh a, *nuai 3 sem* ah lem ang min der san a; *intodelhna* ah lem ang min der san a ni a. Chuvang chuan, *ramri chinfel dan thuruk* pawh hi lem ang derah kan ngai tawh mai a niang chu, Pu Speaker.

Vairengte-ah khuan CRP duty Pu Speaker, an awm a, gate an siam a; ‘Mizofate hi min va hmusit em ve aw’ ka ti a ni. Mizoram atanga kan chhuah dawnin kan in register a ngai a, check gate an siam a, kan rawn luh dawnin kan in register leh a ngai a, ram buai lai ang mai a ni. Engatinge hetiang em em a kan Mizo-mipuite hetiang a CRP ina min ngaihnep mai hi le? Hei hi chu sorkar chak loh vang a ni tlat mai a ni. Kan sorkar hian heng hi chu mipuite thlavang hauhin a titawp thei a ni; vawiinniah hian an titawp thei lo a nih chuan, kum tawpah kan sorkar mai dawn a, hei hi chu kan titawp mai dawn

a ni. Tin, chumi piah lamah chuan Assam Chief Minister-in Mizoram atangin acre 1800 chuang chapo takin ‘kan la let leh’ tih a sawi a, kan sorkar chu kan ngawi tlat mai a ni. Vawiina Zawhna - Starred Question chhannaah chuan - Assam Chief Minister-in ‘kan la let leh’ a tih lai khan, ‘keini hian kan gain zawk a ni’ tih Home Department chhanna a awm tlat mai a ni. Pu Speaker, Zoram mipuite hian an ngaihndan hi an la rawn sawi ve ang. Hmunphiah chingtute’n an hmunphiah an lak dawnin Assam Police te hmuh turin ID an siam a ngai a, Saihapui ‘V’ ah te kan ram kan chan nasa a ni. Tin, Home Deptt-ah point *palina*, chawhma lam pawh khan sawi an awm tawh a.. (**Speaker:** Ngawi rawh aw. Dar 5:00 a chawlh kan ti kha a nia, a hun neih hi hmang zo law law se kan ti em? (*House-in a remti a..*) Awle, hmang zo rawh le).

Pu Speaker, Lengpui Airport-ah Kamrula te hnathawk tawp lutuk tihfai ngaia kan police rual kan han tir kha a pawl ka ti khawp mai. A enkawltu GAD an awm a, a hnathawktu PWD an awm a, contractor Zoramchhana te Kamrula te an awm a, engatinge an tih tir mai loh le? Eng vanga police hi chhawr nge kan nih? Contractor te hi kan va ngam lo ve. Vawiinniah hian Pu Speaker, en teh, kan police rualte, kan ram min venghim tura awm te hi hmunphiat faitu ah kan sorkar hian a hmang mai mai a ni a *..... ka ti khawp mai hei hi chu, a pawl ka ti. Hetiang hi chu awm tawh lo se ka ti khawp mai tih kha ka rawn sawi duh leh a.

(*Expunged as order by the Chair.)

Tin, Demand No. 30 - Disaster Management & Rehabilitation Department ah hian (**Speaker:** Ngawi rawh aw, khawngaih takin. *Unparliamentarians language* kan tih kha hei, ‘zahthlak’ han tih te, ‘chapo’ tih te kha a ri a ri mai a. I hun hi ka laksak dawn lo che a nia. Kan senior member atang pawhin a ri fo mai a, khang zawng zawng kha kan *expunge* ang; kan nawtreh ang; kha kha ka han sawi lawk duh a ni).

Pu Speaker, Demand No. 30 - Disaster Management & Rehabilitation Deptt. ah hian, a hmasain kan minister zahawm tak chungah hian lawmthu ka sawi duh a. Nikum lamah te khan House-ah a bulah kan sawi a. Kum 2018 tuilian ina in a tihchhiatte, nunna chante leh chung ho ina harsatna an tawh te helai House-ah kan sawi a, vawiinniah chuan tanpuina an dawng vek tawh a, ka bial mipui aiawhin kan minister chungah hian lawmthu ka rawn sawi duh bawka a ni.

Demand No. 46 - Urban Development & Poverty Alleviation Department hi Pu Speaker, tawite ka rawn sawi duh a. Tun kan sorkarah hian Dy. CM in a chang a; ka beisei aiin sorkar atang hian duhsakna hi a dawng lovin ka hria a. Congress sorkar laia Planning atang te, Finance atang tea sum tam tak an dah thin ang kha vawiinniah hian hmuh tur a vang em em mai a ni. Tun sorkar kum tawpah hian tlema zawng chu an hmu ve dawnin kan hria a, ka lawmpui a. Chutihruah chuan, vawiinniah pawh project lian tham reng reng hi NEDP pawisa, sorkar hmasain a lo hmalak tawh ang vek mai kha a

ni a. Hei *Smart City* project a rawn chhuak hlauh mai a, hetah hian project tam tak a rawn kal a. Chutih rual chuan kan state budget atang hian Pu Speaker, an hmu tlem hi a pawl ka ti takzet a, *K-deposit* bu te Assembly House ah zawhna te kan han zawt a, chungah chuanin UD & PA hi *K-deposit*-a tang tam pawl a ni ziah mai a; ‘kan Dy. CM hian han bawh chak ve deuh sela, a department tan pawh hian’ tih kha kan rawn ngen ve a ni.

Tin, hei hmanni lawkah Congress sorkar hmalakna tawh Sewerage kha kan Dy. CM zahawm takin a hawng a. Ka rawn zawh duh chu - SIPMIU atanga Aizawl khawpui chawm tur, kan tui lak let rawn pump chhuak thei tur te kha engnge a dinhmun tih te; multi-level car parking Mizoram-ah chuan ti ila, (north east ah pawh a ni ang chu) Zodin Hall ni thina siam mek State Convention Centre te kha kan ‘zo thei hnai dawn tawh em?’ tih kha ka rawn hre duh bawk a; khangte kha min chhan theih chuan ka lawm hle ang.

Tin, Demand No. 25 - Public Health Engineering Department-ah hian tawite sawi ve ka duh a. Chumi ka sawi hma chuan, hei, DM & R Minister, kan Home Minister hi a zawt ve thei si lova, ka han zawh sak ang a -

Covid - lockdown lai khan E. Lungdar tui an harsa a, tui an pump theih loh avangin motor neite hmangin tui supply a ni a; a bill hi a tam lo bawk a, ₹5,30,000/- chauh a ni a; tun thleng hian pek loh a ni a. Hei hi kan Home Minister zawt turin chance a nei ve si lova, ka rawn zawh sak a. Heng tui phurhna man hi a rang thei ang bera pe turin House hi min tiam thei sela ka ti a. Tin, Congress sorkar laia Tawi Tlang atanga gravity hmanga tui lakna tur ruahmanna awm kha hei, kan zin pah te hian tui pipe phum te kan hmu a. ‘Hei hi engtikah nge an zawh theih ang’ tih kha min rawn react theih chuan ka lawm hle ang.

Tin, Pu Speaker Demand No. 38 - Rural Development Department-ah hian ka han lut ang a. Hei, tunlaih hian an buai khawp mai a, Mualthum South leh Thualthu inkar Mat Lei hi tunlai ti ti titam em emtu a ni a, wawiinniah pheih chuan Mualthum South Village Council te, MHIP leh YMA te an mangang hle mai a. Kan RD Minister zahawm tak hian hetiang mipuite harsatna leh mipuite inhniaalna nasa tak awm hi ‘inquiry committee min din sak thei ang em’ tih kha nakinah min rawn sawi sak turin ka ngen bawk a ni.

Tin, BADP chungchang kha an sawi tawh a, heng laiah pawh kan sawi zing a, Pu Speaker. BADP hna hi hei Assembly House-ah te RTI zawhna/chhanna ah te hian, a thawktu hi ‘BDO’ tih vek a ni a, hei hi nikum lampang pawh khan ka sawi tawh a. A thawktu ‘BDO’ tia kan dah vek hian, nichina hnathawk tha lo, member zahawm tak Pu Ngunlianchunga’n a rawn sawichhuah te kha, case rawn kal sela a tuartu tur chu kan officer te an ni tlat mai a ni. A nihna takah chuan BDO te hian hna an thawk si lova,

Congress sorkar lai khan BDO kaltlangin BDO in hnathawktu supervisor an siam a, ‘hengte hian hna an thawk e’ ti khan House ah pawh an chhang mai thin a ni. Mahse wawiinniah chuan BDO te kha mawh kan phurh tir a, kum 4-5 hnuah te case a rawn kal khan an service thlengin a chhe thei tlat mai a ni. Chuvang chuan, hei hi siam thata, ‘a thawktu dik takte hi tarlan ni zawk sela’ tih kha Pu Speaker, ka rawn ngenpui a. Pu R. Lalzirliana hi RD minister niin kum 10 lai a lo enkawl a, khatianga a kal avang khan hmingchhiatna a nei ve miah lo a ni.

Tin, Demand No. 26 - Information & Public Relation hi. Kan minister hi heti lamah hian a viak a tha a, wawiinniah pawh kan sawi tawh angin calendar te, diary te a hun takah rawn semchhuakin kan tangkaipui em em mai a ni. Heta ka rawn sawi tel duh chu - kan chanchinbu mi, kan MJA te hian hman atanga an nawr tawh an pension scheme hi kan sorkar hian a sawipui zeuh zeuh tawh thin a, ‘hengte hi tih theih hnai a ni dawn em’ tih kha ka rawn sawi duh a.

Tin, Demand No. 6 - Land Revenue & Settlement Department hi tawitein Pu Speaker, rawn sawi ka duh a. Kan minister pawh hi a indaih lo a ni; amah pawhin a sawi a, “Surveyor te an indaihloh avangin mipui veng tinah, ram tinah huan lo ram teh te a lo ngai a, Surveyor te an indaihloh avangin kan innghak thup mai a” a ti a, hengah hianin kan sorkarah hian a tlatlum ve lo nge ni; SEDP Surveyor te hi i pe ve teh ang u. SEDP teacher te pawh a sang tel kan la a, SEDP Surveyor te hi nei ve sela, a hna hi tun ai hian a chak ka ring a ni. Tunah pawh hian kan ram buaina ber chu - miin ram an inchuh a, tehfeltu tur an neih loh avang hian rambuai hi a inbun khawm ve nasa a, hengte hi chinfel zung zung a duhin ka hria a. Amaherawh chu, mihring a neih tlat loh chuan tihngaihna a awm lova, budget han en ila, hnathawhna tur ang department-ah pek a ni bawk si lova. Chuvang chuan, Pu Speaker, kan minister hi hnathawh tir kan tum anih si chuan, SEDP Surveyor hi i pe ve teh ang u. Ka lawm e.

SPEAKER : Awle, kan chawl ang a; hriselna te a inang lova. Chaw kha a hmun ngaiyah i ei leh ang u aw. Tichuan, dar 4:45 ah kan lut leh dawn nia. Chawl lawk ang u.

SPEAKER : *Quorum* kan la form lova, kan la tan thei lo e. Kan lo ti hma deuh a ni. Naktukah chuan kan ti tlai tawh ang; opposition leh MLA ho in nuiho rei lo em mai; *Chair* hi chu a hun takah kan thu chu a ni mai a. Awle, tunge sawi ang le? Member zahawmtak Pu Lalduhoma ka sawm e.

PU LALDUHOMA : Pu Speaker, ka lawm e. Demand 6 - Revenue atang hian han tan ila.

Chhim lamah sawn - Chapui te, Mawhre te, Laki te, Khopai-ah te BRO-in kawng an lai a, compensate-ah hian cheng nuai 7 leh a chung lam hlir an pe a. Chutih lai chuan

National Highway 54 Kawlchaw leh Tipa inkarah hian NHDC ten an lai a, a tira an compensation dawn tur chu cheng nuai 3 - nuai 7 te niin, an hming pawh an sign tir hlawm a, tunah hian a lo chhuak ta a, cheng sing 5 atangin a tam berin cheng nuai 2.8 chauh an dawng dawn ta a, an lungawi lo khawp mai a. Arbitrator hnenahrawn sawi an tum a, arbitrator office lah chu tala-in a lo inkalh tlat mai si a, han pan theih pawh a ni lova. Tunah hian an in te thiat turin an hrilh tawh a. Court-a kal te pawh a ngai mai awm mang e te an ti a ni. Khatiang a nih chuan kawng laih kha a delay leh ang a, a tha dawn lova. Chuvang chuan, kan minister hian lo enfiah sak se la tih kan ngen sak a.

Tin, surveyor kan indaih loh zia kan sawi deuh theuh a, amaherawhchu, hmannah khan ‘out-source theih a ni’ tih kha kan han hria a, out-source turte kan neih hi chuan kan ziaawm deuh turah ngai ta ila, a lawmawm ka ti a.

Khulai Maumual rama returnee-te inhmun sorkarin a pekna ah khuan Farmer’s Union te an din a, chhungkua 83 an awm a. Tichuan, tunah khuan plan thar sorkarin a siam a; kawng, thlur eng emaw zatin a lai a, an kawng laih khuan an thlam te, an khanghu te, an balhla leh thil dang tam tak a tihchhiat sak ta a; ‘kan khanghu tal hi chu kan lo zo ang e; May thla thleng hian min nghak hram hram rawh u, kan tih pawhin min nghak thei lova’ an ti a, an rilru a na ve khawp mai a. Hetiang te hi chu warning han in pek deuh a, an insasengna tur hun pawh pek ve awm hi a ni a. Eng emaw tia zangna dawmna te pawh ngaihtuah sak theih a nih chuan a tha hle turah ka ngai a, ka han sawi sak a ni.

Tin, Home department-ah hian ka han lut tawh mai ang a. Nichinah khan Dampa bialtu MLA zahawmtak khan, ‘CM hian case a nei lo e’ a ti a. Hei hi Lokayukta website a mi a ni a, a thupuih – ‘*List of corruption cases in Lokayukta Mizoram*’, tih a ni. ‘Cases’ a ti a ni, corruption cases. Tichuan, “cases registered” tih ah pawh hian 47 a inziak a, 42-na hi kan Chief Minister chhui tura an ngenna kha a ni a. Pu Speaker, case awm lovin inquiry a awm thei lova, chhui tur a awm lohin chhui theih a ni lova, case-a awm phawt ang a, inquiry a awm tur a ni. Chuvang chuan, hei hi official tak pawhin ‘case’ tih hi an hman avangin, kan Chief Minister hian case a awrh a ni; ‘an chhui mek a ni’ tih loh theih a niin ka hre lova. Civil case a awm a, criminal case a awm a, hei hi *criminal case* a ni. Chuvang chuan, ka sawi hi kei chuan a dikah ka ngai a.

Tin, Dampa MLA zahawmtak kha, a ban dawn leh ngaihdam a dil dawn leh dawn loh kha chu ka sawi phakah ka ngai lova. Engpawh ni se, helaiah hian eng ang pawhin ro lo rel ila, pawn lamah keini ai thiam tam takin dan leh hrai te an hria a, an la rawn comment leh dawn a. Vawiinah hian social media kan helh hle hlawmin ka hria a, i dinglam a mi te hian sawisel ngam chiah si lo, helh deuh bawk si, lai deuhin an awm niin ka hria a. Social media thu darh zingah hian a englai tak hi nge dik lo an tih chu a awm a nih chuan, sawichian tak te pawh a thain ka hria a, khin te pawh a theih vek a, helaia general taka sawi ngawt hi a tha ka ti lova. Tin, Dampa Bial MLA zahawmtak hi

lawmthu ka hrilh duh a, mi hi a ngaisang ngang ni hian ka hria a, ka lawm ve hranpa ve reng reng a; mite a vawrh lar a, a chungah hian lawmthu kan sawi duh bawk a ni. Tin, ruling emaw te pawh hi min ti deuhin ka hria. Ni e, kei chuan a ban kher kha ka phut lo a nia, kan hun kan hmang tlang ral tep tawh a, kan ti ho dial dial ang chu.

Tin, ramri chungchangah hian kan hriat angin hmanni lawk, Ni 17 November-ah meeting a awm a, chutah chuan tih tur kan nei a. ‘Hei hi kan ram chin a ni’ kan tih chhunga khaw awm zat te, a area zau zawngte, ‘a mihring cheng engang mi nge an nih’ tih te leh information tul apiang lakkhawm nan thla 3 pek kan ni a; Pu Speaker, tun thla ni 17 khan thla 3 chu a ral tawh a ni. Kan hun hlu tak kan khawhral a, hemi bawhzui tura team siam khan ‘engchen nge hna a thawh tak le’ tih hi vawiinah hian hriat a chakawm a. Tin, hun te kha a dil belh theih turah ka han ngai a, dil belh reng kha chu a mawi te pawh a mawi loh chin a awm ang a; hna hi chak takin thawk ila a thain ka hria a; chuti ni lova, a hnu leha sorkar tur kuta dah tum ninawm fahrana tih khawtlai tum anga puh theih tura kan sorkar a awm hi a pawi ka ti a. Han hmanhmawh se, an thlen chin te min hrilh thei se ka duh a.

Tin, kan police-te TA/DA leh bill tang hi zawhna-chhanna ah khan crore 4.40 ngawt mai a la awm a. Tin, company ten police an mamawh a kan pe a, an duty a. Company te hian an bill an pe tha lo nia sawi te pawh a awm a. Hengte pawh hi, ‘bill an pek that loh chuan kan sawi sak thei mai lawm ni’ tih te ka zawt duh bawk a. Tin, kan Home department atang hian central lama bawhzui tur pawimawh tak a awmin ka hria a, chungte chu –

1. Mizo hlang Battalion Pu Amit Shah-an min tiam kha kan member zahawmtak Pu Sawia’n a zawt a, ‘in bawhzui em; hma in la em’ tih kha, “hmalakna a awm lo,” tia chhan a ni a. Mizo hlang Battalion min tiam na na na engatinge kan sorkar hian a bawhzui loh le? ka ti a ni. Chuvang chuan, hengte chu a va uiawm ve, bawhzui ngei tur a ni dawn lawm ni?
2. Tin, UNDRIP 2007, ‘Indigenous Rights’ kan tih, UN in resolution a pass tak kha, “Hemi bawhzui hian May Ni 3, 2019 khan Home Ministry-ah lehkha kan thehlut,” tih a ni a, zawhna chhanna ah khan. Khawngaih takin a copy hi min pe thei se ka ngen a, hei hi kan bawhzui ta lo reng reng em ni le; he thil hi a va reh ve? Nge, lehkha thehluh kha kan duh tawk ta mai em ni? A copy ka han duh kherna pawh Pu Speaker, kan lo vannei ve hlauh te a nih chuan, bawhzui kan duh a ni, keini hian. Chuvang chuan, a copy te kha lo neih ve sa thlip thlep kha kan duh a ni a. Tin, he ‘indigeneous issue’ hi boundary kan inchuhna atan pawh hian hmanruaa kan hman theih tur a ni ve tel tho tho a ni.

3. Tin, *scheduled tribe list siam that* - hei hi party tinin kan sawi theuh thin a. Ka zawhna chhannaah khan, “Hmalak mek a ni,” tih a ni a. Kum 2020-a ka zawhna kha a ni. Hma chu eng tin nge kan lak mek; eng nge kan thlen tawh tih kha min han hrilh thei se la ka duh baw k a.

Tichuan, PHE ah hian ka lut ang a. Pu Speaker, a changtu minister hi kan zingah a upa ber a, damlohna tein a han tlakbuak na chungin, vawiinah kan zingah taksa la fit takin leh rilru pawh la chak tha takin a awm a. Midangte’n ka tawng lo ngaithiam se la, ‘ani hian a chan department a hneh ber a ni lawm ni’ ka ti, keia lo ngaih ve ah chuan; zawhna reng reng pawh a chhang tha em em vek mai a. Chuvang chuan, a zahawm ka ti a, lawmthu kan sawi a. A department official te nen pawh an thawk tha tlang a ni tih a hriat a, department official te chungah pawh lawmthu kan sawi a.

Pu Speaker, kan Session apiang hian *Serchhip - Greater Water Supply Scheme* hi ka sawi ve ziah mai a. Kan water supply scheme awm lai khi kum 26-a upa a ni tawh a, a expire tawh a ni. Kan ti tawk taw k a, ‘a tharin; a scheme lian zawk min tihsak teh u’ tiin kan inngen thin a, kan Minister zahawm tak, kan Dy. CM hian *special assistance* hnuiaia tih turin proposal pawh a siam a, Planning lamah a tlang ta lo niin kan lo hria a, a pawh kan ti khawp mai a ni. Amaherawh chu, tunah hian khawl thar min tih sak mek a, chu kan khawl thar tur chu Ni 23 zan khan Pune atangin an rawn despatch a, tunah hian ‘khawi lai nge an thlen’ tih hriat kan tum a, ka hre mai thei rih lova; chu chu ni 12 vel kalkawngah rawn thang tura ngaih a ni a. Nileng zankhuain fit ta char char se la, ni 2-3 ah chuan fit zo thei tura ngaih a ni a, March chawlhkar hnihnaah khi chuan hawn theih tura ngaih a ni a. An fit chhunga Serchhip khawpuiin tui kan nghei lohna turin diesel-a operate theih turin tunah khian diesel stock sa tam taw k kan nei tawh baw k a, kan lawm khawp a ni. Kan Minister zahawm tak ho ngei hian hei hi han commission theih ni se a lawmawm leh zualin ka ring a ni.

Tin, Mara area-a NHIDCL kawng laih, saw mi Maubaw k tlangdungah sawn pipe tam tak tichhiat a ni a. NHIDCL hian PHE hnenah hian an tichhiat man an pe tawh niin an sawi a. Amaherawh chu, tun thleng hian repair a la ni lova, mipui an mangang hle mai a. Hei hi min lo ensak hma se ka duh a. Tin, Saikhawthlir-ah khuan a intake contractor tuin emaw a siam a, an khua lut lovin Mamit atangin a kal theih a, an lo siam zo a, a video te min lo thawn a, a chhe em em mai a; a contractor hming an sawi duh baw k si lova. Hei hi min lo ensak se la; action te pawh lak a thain ka hria. An VC leh WATSAN te pawhin an hre lo reng reng a ni. Chutianga an zuk tih chu anih avangin a tha lo hle a ni.

Tin, Personnel & Administrative Reforms-ah hian lut ta ila. Wind up na lama min rawn chhan atana ka duh chu – Hei, ‘hna nghet lo’ kan tih MR leh contract te, ‘provisional employees’ kan han tih hote hi an rawih hun chhung a lo tawp hian tam tak hi chu rawih nawn an ni thin a; rawih nawn an nih khan appointment thar kha an pe

tawh chuang si lova, *seniority* kha khawi atangin nge an chhiar tak ang? An rawih tan tirh atang khan an chhiar sak ang em? Tin, *Regularisation Scheme* hian khang ho kha a huap ve ang em? tih te kha min rawn sawifiah sak se la ka duh a. Rawih nawn an nih hian appointment letter an dawng nawn tawh si lova, chu laiah chuan ngaihthat lohna a awm a ni.

CSS employees dinhmun pawh hi a zirchiangtu tur *study group* kha 16.8.202-a din kha a ni tawh a. Ka hriat sual loh chuan, report pawh an thelut tawh a, Cabinet a thleng tawh mai thei a ni. Heng CSS employees te dinhmun hi study group recommendation ang hian hma lak tum a ni em? tih kha ka zawt duh bawk a ni.

A tawpna berah chuan, UD&PA ah hian ka han lut ang a. Aizawl City Centre saw ‘New market’ kan tih kha a ni a, hetah hian association 19 an awm a, member hi 1103, a vela eizawngte nen hian mi 2000 vel an ni a; chawhmeh zuar ringawt pawh chhungkaw 200 chuang an ni a. Thiah tur anih avangin 2019 krismas thleng khan awm phalsak an ni a. Tichuan, July, 2020-ah thiahna order a chhuak a, April, 2021-ah thiah zawh a ni ta a. Thiah hnuah engmah hna thawh a ni leh si lova, a sirah bukthe an sa a, an in zuar leh a. An in thut chhawk a, karkhatah vawikhat chauh te an thu thei a, fee te pawh khawn leh tho kha a ni a; chutiang chuan an awm a. Tunah chuan sak tan a lo ni ta a, ‘engtikah nge tender hi chhuah a nih’ tih ka hre duh a. A chhan chu - nikum December thla te pawh khan NMSJA association hotute pawhin tender chhuah thuai turin minister hnenah an ngen tih te kan hria a. Chuvang chuan, thiah ni tawh bawk si, hnawh bo ni tawh bawk si, tender chhuah leh si lova rei deuh mai a awm hi eng nge ni aw kan ti a. Tin, Covid lai a ni a, khumi annexe ah te pawh leivung paih a ngai dawn a, engkim kha DPR ah khan chhut tel awm a ni a. Amaherawh chu, ‘chutiang khatiang chu a ni a, a delay chhan’ tih te kha hmalama Commerce & Industry minister in min chhanna kha a ni a. Heng zawng zawng hi chu DPR-ah khan an bilh tel thin a ni lawm ni ka ti a ni.

Tin, PMAY-Urban ah hian, ka bialah khian in sakna dawng miah si lovin central atanga lawmpuina lehkha an nei thluah mai a. Hetiang hi an dawng ringawt mai a, hei hi eng nge a awmzia? ‘PMAY Awards, 2019’ tih te a ni hlawm a, hei hi min han hrilhfiyah se ka duh a.

A tawpna berah chuan *Aizawl Master Plan, 2030* kha a awm a. Sum tam tak sengin he master plan hi siam a ni a. Hei hi kan hlamchhiah ta em ni? Tuna Aizawl City plan thar kan siam ah hian hei hi kan ring ta lo nge, hei hi kan base chho zel a, kan kal zel JNNURM hnuai ah tih kha a ni a. Kha kha a tawp ta si a, tunah chuan funding source dang atanga kalpui a ni a. A hmasaa sum tam tak lo sen tawhna kha ‘kan hlamchhiah ta mai nge, khami kha kan update chho ta zel?’ tih te kha kan zawt tel duh bawk a ni e. Ka lawm e.

SPEAKER : Tunah chuan kan Minister zahawm tak Pu Lalruatkima kan sawiho na te rawn wine-up turin i lo sawm anga, sawifiah ngai a tih te rawn sawifiah in a demand te House-ah pass rawn dil nghal se, ka sawm e.

PU LALRUATKIMA, MINISTER: Pu Speaker, ka lawm e.

Hei, vawiinah member zahawm tak ten ka demand - Nos. 6, 26 leh 38 te zau takin kan han sawiho a, ‘insiamthatna tur tam tak kan nei’ tih te pawh kan hria a. Chutih lai chuan, fakna aw te hi a ngaihnaawm em em a, a ngaihnaawm em em laiin mihringte famkimlohna khawvela cheng kan ni a, insiamthat ngai kan ni a. Thahnemngai takin member ten ka department enkawl kan kalzelna turah te thurawn tha tak tak min pe a, a lawmawm ka ti takzet a. Ni e, kan han ngaihthlak atang khan Demand No. 6 - Land Revenue & Settlement Department atang hian a khaikhawmna bul han tan dawn ila.

Pu Speaker, Revenue Department hi kum 1972 khan lo ding tannin, 1994 khan *major department* a ni a, September ni 13, 2013 kuma *Direct Trade on Stamps and Registration* hawn anih hnu khan he department ah hian department pahnih - Directorate of Land Revenue & Settlement leh Directorate of Stamps & Registration te a lo awm ta a. Kan hriat angin Revenue Department hmalakna pawimawh ber chu - sorkar leh mipuite tana revenue khawn khawm leh inhmun lo ram chinfel te a ni a. Kum kal lai 2022-2023 January 2023 thleng khan sorkar sum - land revenue chhiah chi hrang hrang kan lakkhawm hi ₹6,11,85,544 a ni a. Tunah hian chhiah khawn runpui neih mek a ni a. Chhiah khawn hna hi kal pui mek zel niin, chhiah petute’n awlsam zawka chhiah kan pek theihna turin tun sorkar kumthar 2023-2024 chhung hian *online payment system* kalpui tuma hmalak mek a ni bawk a. Chutiang chuan State’s Own Tax Revenue te, State Own Non-Tax revenue te, thahnemngai takin thawktute’n an han bei char char a, chutiang karah chuan induhthawhna a na khawp mai a, duhthusam ram kan thleng phak lo tih chu kan hria a.

Land Revenue & Settlement Department hmalakna pawimawh dang leh chu – inhmun, huan leh thil dang tam tak ram pass pek a ni a. Chutah chuan LSC, kum kal mekah hian 3740 leh Agriculture LSC hi 67 zet pekchhuah a ni bawk a. ‘Temporary pass’ kan han tih - house pass te, periodic pass te, land lease te, stall pass, stock pass te, khang zawng zawng kha, 279 kan pechhuak a ni. Ram pass thar kan pekchhuah hian, revenue ina hna dang kan thawh leha chu - pass hming thlak te, pass thendarh te, pass siamthat leh zauhbelh te, pass renew leh pass re-issue te leh rambuai chinfel te a ni a, a har em em mai a. Ram thar va teh ngawt kha a ni lova, khang zawng zawng kha a huap avangin member zahawm tak te rawn sawi surveyor indaihlohna pawh kha, a awm viau a ni. Chutah chuan, pass hming thlak ringawt pawh hi tun kum kal mekah hian 6433 a awm a, chutiang chuan - periodic patta renew te, LSC siamthat te, extend te nen 6,194 zet mai kan khawih hman a ni.

Revenue department in pass a pekchhuah hian, tute'n emaw an ram an enkawl that tawk loh avangin vawiin niah surveyor kan indaihlo kan tihna bul chu a ni ta a. Boundary pillar kan nei tha lova; kan hung lova; kan neih that loh avangin, rambuai tamtak a lo chhuak a ni. Chuvang chuan, mipuite pawh hian pawh hian ram kan hlut em em, feet khat lek pawh tawlh kan hreh em em hi uluk takin hung ila, enkawl tha ila chu, vawiin nia kan harsatna hi kan su-kiang awm e. Chutiang anih avang chuan, High Court case ringawt pawh 19 leh Court dang case 96 zet kan nei bawk a ni. Chutiang chuan, kan hmalakna hi a buaithlak em em mai a.

Kan hriat angin Department of Land Resource, Ministry of RD hnuaiah *Digital India Land Record Modernization Programme*, (DILRMP) kalpui mek a ni a. Huan ram leh Inhmun teh tawh kha, tunlai thiamna hmangin survey GPS leh Total Station hmanga teh that leh vek a ni a. Chutiang chuan *Digitalized Land Record* fel tak siam thar a lo ni a. Hei hi mipuite hnenah online hmanga chhawp chhuah theih tura kalpui chu he scheme ina a tum ber a ni a. Chutah chuan pass hrang hrang leh a connected papers-a kha 78,765 kan scan tawh a, cadastral map pawh hi 100% kan digitalized tawh a ni. Chutiang chuan a theih ang angin kan han ti a, pass hi 1,71,403 kan update tawh a, ram teh thar leh renew reng reng hi tunlai thiamna hmang, GIS ah update vek tawh a ni a. Pass awmsa thuaha ram dil kha GIS atang hian Pu Speaker, a hriat theih tawh a ni. Chutiang chuan project hrang hrangte kan han nei a, kan record te felfai zawka kan neih theihna turin NEC hnuaiah *Development of Comprehensive & Integarated GIS based system for Maintenance and Management of Land Record in Mizoram* project 640 lakhs hi tunah hian kan kalpui mek a. Hei hi zawh fel anih hun chuan land record felfai zawk, langtlang zawk te pawh kan beisei a ni.

Pu Speaker, hei, budget session hnuhnung ber tur a ni tawh a. Land Revenue & Settlement ina dan a hman ber, '*The Mizoram Land Revenue Act and Rules*' chu mipuite tana remchang zawk a nih beiseiin he sorkar chhung hianin vawi 3 lai amend tawh a ni a, *Mizoram Land Revenue Rules* hi vawi 2 siamthat a ni tawh bawk. Heng dan kan siamthat zinga mipuite kan hriat nawn atana duh tlem kan neih chu - *dan* lova ram lo petu hrem theihna tur dah belh a ni a. Section 16(a) ah khan, pass engmah nei lova ram lo hauh/luah ve ringawt ten an ram lo hauh chu mi tu emaw hnenah an lo hralh anih chuan, a hralh tu chu a ram hralh market value aia tlem lo chawi theihna *provision* kha 16(a)-ah khan kan dah a ni. Tin, *dan* lova ram lo luah tuten an ram lo luah hi dan anga regularize an duh chuan, regularize theihna *provision* kha kan dah bawk a, 17(a) section-ah khan.

Chutiang chuan, pass awm sa LSC emaw, periodic patta emaw kha a ram hman duh dana zirin land lease ah leh a ngaih hun a lo awm fo thin a. Chutih rualin *land lease* hi hmanna turah hman mamawh a nih tawh loh chuan, sorkarah surrender-in, a pe let tur a ni a. *Dan* siamthatah hian pass awmsa kha land lease-a leh a nihin, land lease anga hman mamawh anih tawh loh chuan, LSC emaw kha land lease a lo chhuahna pass, a

previous pass-ah khan dah leh theih turin dan kan siamtha bawk a ni. House pass hi LSC-a leh anih dawnin ‘in sak phawt tur’ tunhma khan tih a ni a, he provision avang hian mipui tamtakin harsatna kan tawk thin a. Chuvang chuan, House pass neitu khan a ramah khan in sak a duh a, insakna atan loan lak a duhin, house pass kha temporary pass chauh a lo nih avangin harsatna a tawk thin a, chutiang chu dahkham atan a hman theih bawk siloh avangin, LSC han siam tur hian in sak phawt a ngai si a; dan siamthat anih hnuah house pass hi LSC-a siam anih dawn chuan in sak hmasak kher ngai lovin, ‘hung that emaw, enkawl that emaw ni se’ kan ti ta a nih kha. Pu Speaker, LSC hi mimal hnena pek a nih reng rengin kum 10 chhungin hming thlak phal a ni thin lova, mipui tam takin harsatna an tawk a; ‘kum 5 ni tawh se’ kan ti a. Chutih lai chuan chhungkaw member hnena inpek emaw, inrochun ah pheih chuan restriction siam a ni lo thung a ni.

Tin, kan hriat angin property card thingtlang mite hnena pekchhuah theihna tur dan kan siam tha bawk a. *The Indian Stamp Amendment Act, 2023* pawh he House zahawm takah hian tun sessionah hian pass a ni a, notify a theih thuai kan beisei bawk a ni. Kan department hmalakna *Svavitva* chungchangah hian thingtlang mi ten in-lo-ram an lo neih te dan ang tak an neih theihna turin sawrkar laipui chuan dan a siam a, chutah chuan property pek dan chung changah hian awareness nasa takin kan kalpui a, khaw 319 teh-chhuah vek tur a ni a. Tunah hian drone hmangin khaw 123 kan survey tawh a, drone hmanga survey hi Survey of India te hmalakna a ni a, a *ground-truthing* hi Land Revenue & Settlement hmalakna tur a ni a. Chutiang chuan khaw 10 ah ground truthing kalpui mek niin, khaw 10-ah chuan zawh fel a ni tawh a. Tunah hian Champhai district-ah drone survey hi kalpui mek a ni bawk a ni.

Nichina member zahawm tak Prof. Lalnunmawia sawi ang khan, a bial Phulpui leh Tachhip-ah te hian final ground verification zawh vek tawh a ni a, hun rei lo teah hian property card kan issue thei tawh dawn a. Survey of India atanga final map dawn a nih veleh a hmasa ber atan kan pe chhuak dawn a ni. Property card hi *permanent pass* a ni dawn a, property card holder hian loan an lak duh emaw, financial assistant dang emawa dahkham an mamawh hunah an dahkham ve thei tawh dawn a. Project eng emaw atana an ram acquire a lo nih pawhin land value pawh an la thei tawh dawn a nih chu. An ram lo enkawl, an luah mek lai kha dan angin a neitu dik tak nihna kha an nei ve thei tawh dawn a ni.

Pu Speaker, kan hriat angin house-site plan hi Aizawl khawpui chhungah kan han kalpui a. Member zahawm tak Pu C. Lalsawivunga khan, ‘Chekbawk house-site plan kalpui mek kha engnge a dinhmun?’ a ti a. Chekbawk house-site plan-ah hian plot 1319 a awm a, plan kha vawihnih - 1997 leh 2002-ah te siam a ni a. Tunah hian revision kalpui mek a ni a, hma kan sawn hle mai a. Tun hma kha chuan propose road kan dah ringawt a, tunah chuan Chekbawk-a in zawng zawngin kawng a an tawh dawn a ni. Kawng chung pakhatin a an ang a, pakhatin kawng hnuai a an ang a, khatiang lane fel tak terracing-in kan ruahman tawh a ni. Chutah chuan pass nei loa lo enkawl ve ringawt

tute kha plot fel mek a ni a, revision chu kan zo tawh a, kan inen fel mek a. Plot an hauh zat a zirin an chungchang tunah hian kan ngaihtuah tawh a ni. Pass nei loa lo enkawl tute chungchang ngaihtuah fel a nih hunah plot surrender zat kha a hriat dawn chauh a, chuvang chuan, dan ang thlapa pass nei an awm a. LSC pass tun hma 1997 leh 2002-a lo issue te erawh chu pass thar kan issue ang a, mahse, kawng a lo kal tak avangin, an ram kha tawlh hret emaw, siksawi hret erawh chu a ngai thung dawn a ni.

Chutiang chuan tunah hian Maumual house-site plan pawh revision kalpui mek a ni a. Kan hriat angin Maumual-ah khuan kum 1987-ah khan revenue revision kalpui a ni a, chutah chuan in hmun 658 tehchhuah a ni a. Chung zawng zawng chu teh that veka, plot fel taka tih anih loh chuan miin a duh lai laiah kawng leh step a lo siam ve ringawt se, chu chuan harsatna, rikrum chhiat tawhah te kang thelh motor te tan harsatna a lo thlen thin a kan ti a. Tunah khuan an plot tha mek a, chutiang chuan hmun eng emaw zat kan han neih belh thei turah kan han ngai bawk a.

Maumual-ah hian Member zahawm takte khan an rawn sawi lang a, nichin khan returnee mi 653 tan in-hmun khulaiiah khuan pek a ni a, vantlang ram tur enge maw zat dah a ni bawk a Khatiang karah tunah hian Farmers' Union member-te valid pass an nei a nih loh chuan helai house pass chhungah hian a hranin compensation provision kha kan neih loh avangin harsatna kan tawh a. Valid pass neite erawh chu plot thar kan neih hunah a tul angin an rama kha kan siam rem dawn a ni. Chutiang chuan, khang zawng zawngah khan MNF party ina election manifesto kan neihah khan, 'khawpuia cheng in hmun neilo ten in hmun an neih theih nan hmalak a ni ang' tih kan dah a. In hmun eng emaw zat kan pe tawh a, tunah hian in-hmun nei lo eng emaw zat kan pe tawh a. A bik takin Serchhip-ah pawh PAMRA tan tunhnai lawkah khan mi 32 ta tur ka han han pe a. MURA ho tan Tuivamit-ah in-hmun 45 vel kan pe bawk a ni.

Chulaiiah chuan Pu Speaker, ka han sawi duh chu - hmathlir thui tak neiin Maumual-ah a ni emaw, Chekbawh-ah a ni emaw house-site plan ah hian power department in transformer dahna te, social department in Anganwadi te, chutiingin bazar te, community hall te, bus stand leh green area tur thlengin kan ruahman a ni. He house-site plan kaltlang hian mipuite hnenah kan puanzar tha nia ka hriata chu - public tana kan zuah hi vawiina mite hian kan pe emaw, kan lo enkawl tha lo emaw, kan phalrai emaw anih chuan thangthar khawvela lo la awm zel tur ten min dem ka hlau a. Chuvang chuan, a thei-fa an lo awm anih pawhin, he sorkar hi chuan public tana reserve hi pek kan tum lo a ni. Khatiang kha a nih vangin, hun lo kal zel tur thlirin public tana hmun-hma tha green area te kan lo nei lo zo ta a. Heng zawng zawngte hi kan Aizawl khawpui tinuamlotu a nih theih avangin, hmathlir thui tak neiin sorkar chuan hma a la mek a ni.

Kan hriat angin, *Out-sourcing of Land Survey* tunah hian kalpui mek a ni a. Surveyor indaihlohna a nasa kan ti a, surveyor sanction post 139 kan neihah hian 68 fill up a ni a; post 71 lai mai fill up loh, vacant post kan nei a. Tunah hian kan Chief Minister

zahaawm takin min phalsak angin MSSSB-in surveyor post 15 la turin ruahmanna min siam sak bawka ni. Tunah hian reilo teah kan neih thuai kan beisei a. Kan indaihloh em em karah ‘SEDP atang pawhin surveyor hi neih dan a awm lo em ni?’ tih te pawh kha a awm a, *Survey Farm & Empanelment* buaipui mek a ni a, empanelment tih zawh anih chuan outsourcing a tih theih tawh turah kan ngai a. Tun hma khan railways lamin rel kawng tur a rawn laknaah khan, empanelment farm kha kan nei lo chungin an outsource a, midangin hma an rawn la a. Tunah hian SEDP kal tlangin Saitual, Khawzawl leh Hnahthial-ah ruahmanna kan kalpui a, Saitual chu an zo tep a. Tin, Khawzawl leh Hnahthial District khawpui te hi Survey Firm Empanelment kan tihfel hnuah outsourcing turin kan inchinfel theih kan ring a ni.

Tin, kan hriat angin court case leh land dispute hi kan ngah em em mai a. Civil case hi 1067, acquisition case 530 leh rental case 82 kan nei a. Heng court case kan neihah te hian thawktuten theihtawp an chhuah a. Court-in bituk chhungin comments leh documents an rawn mamawh thin a, chungte chu pek hram hram kan tum thin a. Court case tam takah hian tunah chuan thiam kan lo chang ta a ni. Tin, land dispute case hi ram inthuah leh innek case eng emaw zat, law court lut si lo, department chhunga dispute awm si chinfel hna kha kan thawka a. Tunah hian dispute case hi 1826 niin, verification hi 640 kan nei tawh a. Case chinfel tawh 266 kan nei bawka ni.

Pu Speaker, chutiang chu kan dinhmun a ni a. Vawiinah hian he House zahawm tak kaltlang hian hmachhawp tam tak kan neihte han inpuanzar ve te pawh hi a chakawm a amaherawhchu, kan sawi vek seng lo ang a. Chutah chuan, kan hriat angin, ‘Govt. Complex’ kan tih thin tuna ‘Ainawn Veng’ ni taah hian 2019 leh 2020 khan MIRSAP nen tang tlangin cadastral survey kan nei a. Chutah chuan LSC nei 33, pass nei lo in-ding 403, pass nei in-ding lo 30, land lease 2 leh house pass 6, a vaiin pass 474 awm niin kan hria a. Amaherawhchu, la enfel ngai eng emaw zat a la awm ang a. Chutah chuan kan Chief Minister zahawm tak, kan House Leader ni bawkin khu laia ram tangte chhanchhuahna - *jubilee dar* a vuak sak niin ka hria a, a lawmawm hle mai a. Tun sorkar chhung hian kan pek theih ngei pawh ka beisei a, department lam pawhin he lamah hi chuan kan tihur ang te kan ti mawlh mawlh a. GAD lam hmalakna pawh a ni a, anni pawhin theihtawp an chhuah mek a ni.

Chu mai a la ni lova, Pu Speaker, kan hriat angin Bawngkawn Brigade ram saw a buaithlak em em mai a. Tunhma atangin community project atan puan niin, restrict area a ni a; AMC-in building regulation a hmang thei bawka si lova, a buaithlak em em mai a. Phase-I leh phase-II ah kan then a, brigade field lam saw phase-II a ni a, kan release fel tawh a. Phase-I lamah hian release loh ram tam tak a la awm a, mi tam takin an lo inbengbel teuh tawh mai a. Heng lo cheng tawhte hi chhuahtir ringawt ila, an tan harsatna tam tak kan siam thei a. Kan P & E minister hian.. (a muthlu nge ni) a ngaihven em em mai a, vawi tam tak ka bulah hian a sawi a, ‘hei hi chu chinfel a ngai a ni’ a ti a. Engnge a vei chhan pawh ka hre lova, ‘hei hi chu, ka lo leng ang’ a ti a. Department te

pawhin theihtawp kan han chhuah a. Chutah chuan, heng mipuite harsatna hre chungin ‘pass pek dan a awm lawm ni’ kan ti a, hun rei tak atanga restriction an lo pek tawh chu tunah hian cabinet memorandum te siama, hliha, a theih chin a piang, a fel chin chin chu pek chhuaha, land revenue tax te pawh an pek ve theih dan tur hi tunah chuan kawng kan zawng a. Kan sorkar chhung hian a theih chin chin chu kan tifel thei turah kan ngai a ni.

Tin, kan hriat angin land acquisition chungchangah hian national highway hi NHIDCL-in a enkawl a ni deuh vek a. Chutah chuan, *National Highway Act, 1956* hmangin acquire a ni a. Chung chu a nih avangin, railways-in ram a acquire chuan, *Railways Act, 1989* hmangin a rawn ti ve ta thung a.

Member zahawm tak Pu Lalduhoma khan, ‘Laki lamah ram lakah khan compensation nuai 7 dawn te an la a, NHIDCL kawng lak ve in khatiang kha a ni a’ a ti a. Assessment hi tihdan tur kawng fel tak a awm a. A ram value *assessment* hna hi dan ang thlapin District Collector ten an kalpui a. Amaherawhchu, National Highway bikah chuan CALA (Competent Authority of Land Acquisition) Atanga ruatte khan ruahmanna an siam a, survey leh assessment an ti vek a. Chung mite assessment ang chuan District Collector ten an pawmpui a, chutiang chuan ruahmanna an rawn siam thin a. Khalaiiah khan an land value a inanloh dan kha kei chuan ka hre lova. Anmahniin uluk taka stamp registration an lo neih tawh dan te, ram hlutna - a hlu ber leh hlu lo ber te khaikhinin land value kha an siam thin a ni. Chutiang chu anih avangin, a dinhmun chiah kha ka sawi chiang thei lo a ni.

Land Acquisition hi sorkar pek emaw ti mai thin hi kan awm a. Land Acquisition reng reng hi District Collector te ruahmanna kalpui a ni a. Anmahni hian engkim an ti vek a, sorkarah chuan 2.5% admin cost an rawn chhunglut ve a, a bak chu anmahni buaipui vek a ni a. A bik takin National Highway-ah phei chuan CALA leh NHIDCL ten joint account an vawng a, a interest pawh MORTH lam hnuaia thawktu NHIDCL vek khan an chang a. Keini lam sorkar account emaw ah chuan cheng khat mah a rawn lut lo, kan kawl lo a ni.

Chutiang chuan railway project leh highway project te bakah ram acquire a ngaihin MLARR Act - The Mizoram Land Acquisition Rehabilitation & Resettlement Act, 2016’ kan nei a. Amaherawhchu, Court-in he dan hi a hnawl avang leh sorkar lamin kan appeal-naah vawiin thleng hian engmah thuthar kan la nei lova. He dan hmanga ram lak a nih chuan appeal order a zirin ‘*Right to Fair Compensation Transparency & Land Acquisition and Rehabilitation Act, 2013*’ hmanga compensation claim-na tur a dal lovang tiin an dah thung a ni.

Chu bakah chuan Aizawl chhunga AR ram luah hian sawi a hlawh em em a, Pu Speaker. Aizawl-ah Assam Rifles te ram luah huam chhunga pass lo neite chungchang

hi Council of Ministers thukhawm pawhin cancel tur a ti a. Amaherawhchu, Central YMA hian *13 of 2021 PIL* case chungchanga court order engmah chhuah a la nih si loh avangin harsatna kan tawk a. Amaherawhchu, cancel hi dan anga kalpui turin hma kan la chho zel a ni. A chhan chu, *dan* lo anga nei nia kan ngaih vang kha a ni a. Chutah chuan restriction, land use dan pawh kha kan nei sa vek a nih kha.

Tin, Pu Speaker, Stamp & Registration Directorate hmalakna hi tlem han sawi ila. Mipui ten hei hi kan la hmelhriat vak lova. September 27, 2013 khan *Directorate of Stamp & Registration* hi hawn a ni a. Directorate hi Revenue Department hnuaiawmin, Revenue Director hi *Stamp Registration Inspector General of Registration & Commissioner of Stamp* a ni nghal bawk a ni. Chutah chuan ram inlei te, inpek te, inhawh te, dahkham te, inremsiamna leh documents eng pawh *Registration Act, 1908* hnuai register ngai zawng zawngte register vek tur a ni a. Registration Act hi chhiah lakna ngawr ngawr a ni lova, kan lehkha pawimawh te sorkar vawn that tir a, kan thil neih dan kimchang sorkar hriata *dan* ang thlapa vawn that a ni a. Court lamah pawh chutiang chuan thiam an chang zel a, register loh erawh chuan thiam an chang lo fo ta mai a, chutiang chuan mipuite pawhin heti lama beng kan chhit tlana, kan ngaihawh hi a tul awm e.

Constitution of India - 7th Schedule, List-III (Entry No. 6) ah *Registration of lease and documents* chungchang tarlan a ni a, chutah chuan Article 246 (Section-II) in a sawi angin, Parliament leh State Legislature in registration chungchangah hian Dan siam theihna, thuneihna intawm ‘concurrent list’ kan tih ang kha a nei a. ‘Registration’ kan tih hian Constitution of India - 7th Schedule, List-III (Entry No. 44) hmanga stamp duty lakna kha a huam tel a. Central sorkarin Dan a siam, *The India Stamp Act, 1899* leh *Registration Act, 1908* hi Mizoram pawhin a nih ang angin kan lo hmang zui ve ta a ni. Hei hi revenue hnar pawimawh tak a ni. Chutiang chuan tunah hian heng - stamp registration te, registration te atang hian chhiah ₹6,53,17,773 zet mai waviin thleng hian kan hmu tawh bawk a ni. He *Registration Act* hnuaiawh hian inte, inhmunte, huan-lo-ram inpek te, inlei te, dahkham te, insiamremna te, in luah hawh leh hman hawh te leh chutiang document hrang hrang te, in hmun leh kan inte, huan--lo-ram neitu nihna leh chanvo an neih te tihdanglamna reng reng register vek tur a ni a. Fa lakna lehkha pawh hi thurochhiah hmanga tih a nih loh chuan register ngei ngei a ngai a ni. Tin, tuna registration software kan hman mek NGDRS (National Generic Documents Registration) software hi Aizawl, Lunglei, Serchhip leh Kolasib-ah te pawh hawngin, kan kalpui mek a, hun reilote chhung hian Mamit leh Champhai District-ah pawh hawng theih turin engkim kan inruahhman fel tawh a ni.

Member zahawm tak tak ten revenue lama an thahnemngaihna te an han sawi tliar tliar a, chuta tanga a tlangpuia khaikhawmnaah chuan, ‘thawktu indaih lo’ tih hi a ni. Pu Speaker, *thawktu indaih lo* kan ni satliah lova, kan in daih loh chhan chu - mipui mamawhtu kan tam lutuk vang a ni. Tun covid period-ah khan ‘office a dawr theih mang

lo e', kan tih lai khan, inleng register-ah khuan mi 400-500 inleng dawrtu kan nei a ni. Chutiang chu a nih avangin a harsa em em a. Vawikhata chin fel duak theih a nih thin loh avangin khang kha kan mutan, kan harsatna a ni a, mamawhtute kha pitar-putar upa lam te an lo ni baw si a, inhrilhfiah nan tea hun hman lo ngai baw a. Surveyor leh thawktu tam zawk pawh nei ta ila, mamawhtu kan tam zel avangin vawi leh khata han inchin fel duak theih a ni lova. Mahse, *online payment* kan han tih atang hi chuan hmasawwna pawh kan nei chho zel turah ngai la. Harsatna chi hrang hrang kan neihah te mipuiin hrethiam takin tun thlengin min la tawiawm zel a, kan lawm tak meuh meuh a ni. Kha kha ka react theih tlangpui chu ni sela.

Tichuan, Demand No. 26 - I & PR hi kan hriat angin department pawimawh tak, a tel lova kan awm theih si loh a ni a; amaherawh chu, department lian kan ni hauh lo mai a. Tun hnaiah district thar pathum - Khawzawl, Hnaathial leh Saitual-ah te office hawn phalna min pe fel tawh a, heng district pathumte atan hian a thawktu turte pawh tunah hian kan inruahhman mek a. Tin, hei bakah hian MIS (Junior Grade) PWD tan kan pali lak thar a ni baw a ni. Tichuan, Chanchinbu-mi (MJA) te nen kan inhne hnai em em a, Pu Speaker, chanchinbu mite nena kan thawh ho hian mipuite nen relation tha kan nei a, mipuite hnenah chanchin thar inhriatpawh zung zungna te kan ti a. Tichuan, 'journalist pension scheme te kan kalpui a ngai a ni' an ti a, kan han buaipui laih laih a. Amah erawh chu, thil a lo awl lo khawp mai a. Law Department-ah *vetting* kan han ti a, an niin an rawn thawn let leh a, khatiang khan a hnu khar tur finance department lamin hei hi a rem an tih chuan, kumin chhung hian kan inruahhman fel turah ka ngai a.

Tin, he sorkar hian February, 2020 khan advertisement rate, classified column khata ₹100/- ni thin kha, ₹130/- ah tih san a ni a, display full page ₹3,000/- atangin ₹4,000/- ah kan tisang baw a. Chutiang chuan theih ang angin chanchinbu mite tan tan kan la a, kan thawhhona pawh a tha em em a.

Tin, department chhungah hian films society te, photographers society leh Arts gallery lam te nena thawhhona tha tak mai kan han neite hi a lawmawm tak zet a. Tun hnaiah hian kan hriat angin, kan thenawm maiah '*Lianchhiari Run – Multi Facilities Centre*' kan ti a, chutah chuan conference hall te, mini-theatre te, editing room te, art gallery te, photo gallery leh lirthei tam tak dah theihna tur hmunte hawn theih turin kan buatsaih a, hun reilote ah kan inpeih fel theih kan ring a ni.

Tin, Pu Speaker, kan sorkarin theih tawp chhuahin chanchinbu-mite hamthatna turin hma a la a, chutah chuan an harsatna, an manganna, dam mawh hritlan an neihah pawh theitawp chhuahin an mahni tan hian, 'journalists welfare scheme' an ti a, chung te chu kan pe chhuak thin a, medical assistant, MJA member-te tan kan buatsaih a, sum fai tanpuina ₹1,00,000/- thleng pek a ni a, an chhungte damlo hnenah ₹80,000/- thleng pek theih a ni baw a. Tin, ex-gratia hi accredited journalist boral an awmin an chhungte

ral nan ₹1,50,000 kan pe thin a; accredited journalist ni lo MJA member dang boral an awmin an chhungte ₹1,00,000/- ral thin an ni bawk. Tun sorkar kal mekah hian MJA te hnenah medical bill kan pek chhuah hi ₹70,72,830/- a ni.

Tin, chanchinbu-mite tan *Press tour* te buatsaih niin, India ram chhung fanna tum-nga kan nei tawh a, Parliament House-ah vawi hnih training an zuk nei tawh bawk a ni. Khang zawng zawngah khan Finance Department lam te thahnemngaihna a lawmawm khawp mai a. Tin, publication bikah hian Mizoram State - Wall Calendar leh diary - a lian leh a te kan siam a. Member tam takte'n, 'kum dang ai chuan kumin chu a tih tam theih deuh ang a' an ti a; lawmthu an rawn sawi a, kan lawm khawp mai a. Tam leh zual pek che u pawh kan duh, amah erawh chu, kan dinhmun heti hi a ni a, kuminah hian calendar copy 80,000 kan chhu a, diary bu lian copy 4500 leh diary bu te copy 4000 nen, chutiang chuan India ram hmun hrang hrangah a tul angin kan thawhpui department te hnenah te kan sem ve thin a ni.

Covid-19 period-ah thawktute an inpe a, an taima em em a, mipui ten thudik tak an hriat theihna turin theihtawp an chhuah a. Social media-ah thil a viral chak em em a, thu tak nge dawt tih pawh hriat mang si loh kha. Khatiang karah khan mipuite an chi ai a. Chutah chuan, news tha tak, chanchinthar tha tak mai puanchhuah a lo ni ta a. Chutiang chuan, twitter te, whatsapp, instagram te, khatiang khan account hrang hrang kan neiha khan follower ngah berte zingah kan lo awm ta hial a. DIPR website hi tlawhtu ngah ber te zinga mi kan ni te pawh hi a lawmawm a. Chutah chuan thu thleng, thu thar dik tak mipuite kaihruaitu leh sorkar hmalakna awlsam zawka kan hriat theihna turin kan han tarlang thin a ni.

Pu Speaker, ka Demand No. 38 - RD hi an rawn sawilang lova. RD-ah hian thil pakhat rawn awma chu - kan budget hi AG lamin a report angin kan down-size a ni. A chhan chu, budget lianpui puiin kan siam a, kha kha a takah kan achieve leh thei si lova; 'A dik takin rawn ti ula, surrender pawh a awm lo deuh ang' an ti a, vawi tam tak min warning tawh a. "Tun tum chu a dik thei ang berin, hemi CSS kan hmuh turte hi kan hre tawh tlangpui bawk a, chutiang chuan ruahman siam ila; kan daihlo anih pawhin supplementary lamah a dil belh thei tho a lawm' kan ti a. Chuvang chuan, cheng vaibelchhe 127 zetin kan budget nikum lam aiin a tlem a. A tlem chhana kha member tam takin kan tarlan loh avangin kha kha kan hriat tlan a tan kan sawi duh a.

Ni e, RD Department hi kan hriat angin a hnuaiyah Agency pakhat DRDA a awm a. Ministry lamin 'DRDA hi tihtawp ni se' tiin, DRDO-ah an han dah ta a. Chutah chuan District 11-ah kan sorkarin rem a tih angin kan han dah a. Chung enkawl tur chuan JAG, (MCS officer) ten Project Director mawhpurhna lain an enkawl a, chutiang chuan hmalakna chi hrang hrang kan han nei a. DRDA officer leh staff mi 84 zet te chu State Govt. hnuaiyah absorb an ni nghe nghe a ni. Hei hi a lawmawm tak zet a, sorkar hnathawk

nghet kan han neih belh a. Chak zawkin, hmasawn zawkin RD hian hma a lak zel kan beisei bawka ni.

Chutihlain kan ngaihthlak tak ang khan, RD Block kan neih sa 26 bakah block thar 2 kan neih bel a; tichuan, a vaiin 28 kan nei dawn ta a. Tlabung RD Block kha remchang a nih chuan March 08-ah hian hawng turin kan han inruahman a; engnge kan dinhmun tur kan hre chiah lova. Kawrtethawveng kha kan Chief Minister zahawm tak hovin kan zuk hawng tawh a. Member zahawm tak ten RD Block mamawhna - Hnahlan te, Phura te, Mamit leh Khawbung bial lamah te, khatiang khan RD Block kan mamawh zia kan han aupui a, a lawmawm khawp mai a. Ni e; RD Block hian hmasawna tam tak a keng tel a ni. Chutiang a nih avang chuan sorkarin a sum neih dinhmun te thlira en zelin ruahmanna siam a ngai thin a, vawi leh khatah a tih zung zung theih lova. Kawrtethawveng leh Tlabung RD Block pheih chu kum 20 kal ta atanga an lo vei kha a ni a. Pu Speaker, i veilama member zahawm tak pheih kha chuan, ‘ka hmu hman tawh lovang a’ a ti hial a nih kha. Mahse, a hun lai ngeiin RD Block kan han pe thei a, a lawmnaah pawh lawmthu a sawi ngat a ni a, amah pawh kan lawm lut tel ve nghal tep a ni. Tin, mipui pawh an lawm. Ni e, Kawrtethawveng RD Block kan hawn pheih kha chuan an MLA zahawm tak khan, ‘kan lawmthu sawina hi tun hun bakah hian election thleng pawhin a dai lovang’ a tih kha a dik khawp mai. Lawmthu sawi an tum a ni. ‘Sorkar lakah lawmthu kan sawi ang e, hei hi chu min lo en rawh u’ an ti ngat a ni. Anmahni zinga Organizing Committee Chairman ngei khan a ti a ni. A lawmawm lah tak bawka a.

Tichuan, hei kan hriat angin CSS hmalakna MNREGS a ni a, ‘*Ni-100 inhlawhna*’ kan han tih hi a guideline fel tak a awm a. Chutah chuan, kan hmalakna NREGS hnuaiyah hian leilet siam WRC terrace te, link-road te, step te leh lungrem te, khatiang chi hrang hrang rotling asset kan siam thin a ni. Chung chu mipui duh dan angin vantlang inkhawm *Gram Sabha*-ah khan an sawi ho thin a, VEC in a kalpui thin a. Chung hnathawhte chu district-a Project Director leh block-a Programme Officer bakah a thawktu ten enpuiin an vil reng a ni. Tunah hian financial year thar a lo kai dawn ta a, Ministry of Rural Development hian State hrang hrangte tan empowered committee meeting a buatsaih thin a ni. Pathian leh mipui zarah he sorkar a din chhung kum 4-ah hian ni 100-ah ni 100 kan in hlawh tir thei hi kan vannei a, kan lawm tak zet a. Kan sorkar leh Ministry te, a thawktu kan officer, a lian ber atanga a te ber thlenga an inpekna te, VEC te, village level-a thawktu zawng zawngte an thahnemngaihna avangin lawmthu he House kaltlang hian ka sawi duh a. Chutiang chuan, covid hripui leng karah pawh ni 100-ah ni 100 kan in hlawh tir thei a ni. Chu empowered committee chuan kan labour budget kha kan labour projection mil khan a lo endik thin a, chutah chuan, ‘pek leh tlak in ni e’ an ti a. India ram pumah tunhnaiah khan hemi bikah hian 175 lakh/day min pe a. Chu chuan ni 75 chauh a daih a, keini aia inhlawhna pek tam kha an nei lova, ‘in rawn dil belh leh mai dawn nia’, an ti a. Tun hnaiah committee-ah kan han dil leh a, *10 lakh person day* kha min pe leh a, tichuan, ni 85 vela kha kan nei thei ta a. Tun

February thla chhung hian ni 87 inhlawh thei turah kan inbeisei a, ‘a bak hi inrawn dil leh thuai dawn nia’ an ti a. Chutiang chuan, kan labour projection han en hi chuan za-a za inhlawh tir leh theih kan inbeisei a ni. Tichuan, Mizoram pumah job card nei nuai 2,13,524 kan awm mek a. Heng zawng zawng hi *Aadhar ceding and payment* vek a ni a. Chutah chuan, 99.10% hi *aadhar cede* tawh a ni a, chuta tang chuan, worker nuai 1,55,490 te hi aadhar-base payment hmanga payment pek theih a ni tawh a ni. India ram pumpui inelnaah te pawh a ti tha ber zingah vawiin ni thlengin kan tel a, *timely-payment* ah te phei chuan a ti tha ber dinhmuna kan tel thei te pawh hi thawktute inpekna vang a ni.

Chuvang chuan, vawiinah hian hei hi kan economy, *Pathian-ram* thla tina kohhran mitena kan pek tur, mite ber, miharsa ber pawhina kan lo neih theih phahna hi *Ni-100 Inhlawhna* kan ti lo thei lo a ni. Chutiang chuan, work completion-ah pawh hian kan dinhmuna a tha viau a, 98.44% kum kal taah khan kan ni a, tunah hian 73.43 hi kan kalpui tawh a ni.

Tin, *mobile monitoring system* hi village level-a NEREGA hnuai hnthawkte an thawhna hmunah mobile application hmanga attendance lakna tura ruahman a ni a. Hei hi a harsa angreng khawp mai a, network connectivity thatlohna te a lo awm a. Amah erawh chu thawktute inpekna avangin May 16, 2020 khan khua zawng zawng hetah hian kan kalpui thei ta a ni. Tin, *geo-tagging* tih vek a ni a, thawhhmain khawng zawng zawng kha kan hnthawhte India ram pumah ti tha ber, Pu Speaker, geo-tagging of NEREGS ah hian kan ni.

Chutiang chuan, Area Officer map hrang ‘*Azadi Ka Mahotsav*’ te kan han kalpui a, dil te, tuihna humhalna chungchangah te theitawp chhuaha hma lak a ni. Tin, kan hmalakna dang, *Shyama Prashad Mukherjee Rurban Mission (SPMR)* kan tih kha India ram pumah cluster 400 a awm mek a, cluster 4 (pali) min pe a. Chutah chuan Aibawk cluster-ah khaw 11, Thingsulthliah cluster-ah khaw 15, E. Lungdar cluster-ah khaw 9 leh Khawzawl cluster-ah khaw 13 te a awm a. Tunah hian India ram chhungah *Rurban* a ti tha ber kan ni a. Tin, a hmasa bera tan India rama Rurban cluster zo fel hmasa ber chu Aibawk cluster kan ni bawh a, a lawmawm hle mai a. Hetah hian *critical gap-funding* hmangin nuai 1500 kan hmu a, a bak chu convergence, scheme dangte nen kan kalpui a ni.

A thawktute bakah kan MLA theuh ten SPMRM kan neihna hmunah min tawiawm tha a, min finchhuah a, thurawn tam tak min pe a, an chungah kan lawm takzet a. Tunah hian a kalpui leh theih dawn nge dawn loh kan hre lova, kalpui thei turah kan inngai a. Amaherawh chu finance ministry lam thuneihna a nih avangin, ‘lo inenchiang phawt rawh u; lo zawt phawt rawh u’ an ti a, zo fel turin. Tin, thla thar hi state dang zawng zawng an pek laiin keini erawh chu hun thawl tak min la pe a, kan lawm takzet a. ‘In hmabak tih tur awma hi zo ula, zawh felna tur sum te pawh kan la pe leh zel ang

che u' an la ti a, min duhsak takzet a ni. Tunah hian an tum dan chuan cluster 1000 pek leh an tum a, cluster 1000 pek turah khan, cluster 22 kan dil mek a, chuti anih chuan RD block thar tih lohah chuan kan nei kim thei turah kan ngai a, engnge kan an dawn erawh chu kan la hre lo a ni.

Kan hriat angin BADP chungchangah hian 'state-level implementing agency din rawh u' min ti a, Assembly committee ngeiah pawh wawi tam tak min ti a, tun hnaiha kan han din a. A pawisa lo kal hi 90:10 a ni a, Ministry of Home Affairs atanga RD ministry kaltlanga kan dawn a ni a. Hengah hian education te, agriculture te, water resources leh financial inclusion te, skill development leh basic infrastructure a tan te kan hmang thin a. Chutah chuan, hei kan hriat angin, BADP hi nikum khan a lo kal lova, nikum hmasaa kan dawn tur second installment kha kuminah a lo kal chauh a, chutianga harsatna chu ministry in kan tawk a ni a. Tihtawp te pawh an tum a, la thawk mek mi 4 kan nei bawk a ni.

Member ten an rawn sawiah khan a bika ka han sawi lan duh chu - Lawngtlai 'W' bialtu zahawm tak khan, 'Zochachhuah-ah community centre 2019-2020 ah khan sak zawh tawh a ni bawk si a; hei khaw tereute a tan hian community hall pahnih a ngai dawn em maw ni' a tih kha, ni e, a dik a. District-level screening committee in a rawn screen vek a, chutah chuan State-level screening committee CS hovin an nei leh a, chungah chuan geo-tagging tunah chuan tih a ngai tawh a, approve turin ministry ah kan thawn thla a, perspective plan te siamin chutiang chuan kan ruahman a.

Nichin khan MLA zahawm takin, 'BADP 2020-2021-a sanction, *Construction of community centre, Zochachhuah*' a tih kha a hresual anih ka ring a. A chhan chu, a hmaa mi kha 'hall' a ni a, tuna mi hi chu 'community centre' a ni. Hei hi '*accommodation for official and tourist for the short time visit to the place*' tih a ni a. Tourist leh official-te tana thlen in tur zawk a ni. Hetah hian *plan & estimate* a awm vek a. Khalaia kha hriatsual palh theih deuh mai a ni a, 'community centre' tih zawk a ni e.

Tin, tuilakna tur additional fund '*supply of water pipeline, Mautlang*' tih kha kan han hmu a, 'laying' kha a lo tel lova, a 'supply' chauh kha a ni a, kawtlaiah khan a awm hnur mai a, theih ang angin hmang tangkai mai rawh u kan inti a. Mautlang-ah khan solar pump nuai 69 man kha kan nei a, tui a haw tur tur a, an lawm khawp a. Hei hi a tihna tur pawisa in a daih si lova, a bak khaw chhunga rawn tihluh leh tanky siam kha a lo tel hauh lo mai a, helaiah hian. Tunah hian MGNREGS atangin siamfel tawh niin ka hria.

Kan hriat angin BADP hi guidelines fel tak nei a ni a. Chutah chuan mimal emaw a siam hna pek kha phal a ni lova. BADP fund te hi NGO leh private institution te tan thawh a phal a nih si loh avangin, BDO-te kha work supervisor-a hman an ni a. I vei lama mi ten pawhin Pu Speaker, a kal phung kha an hre tho a; a tak takah chuan party-

worker te khan an thawk a ni. Chung chu an hun lai pawha tihphunga vek kha kan ni a. MLA Fund te pawh a tak takah chuan Pu Speaker, tute pawl emaw, NGO emaw kan han hmang a, eng welfare phuahchawp deuh emaw hmangte pawh kan awm a ni. Khangah khan worker ho kha tlem chuan kan duhsak deuh a ni. Hre reng chungza zawt kha an ni tho a, khalai kha chu an hrethiam sa vek mai tih kha a chiang e.

PMAY hi a buaithlak khawp mai a, an target hi kumin a ni tawh a. Amaherawh chu, kan la achieve si lova, keimahni thiamloh ni lovin, Ministry lam thiam loh a ni. Ministry lamin pawisa an rawn release muang em em a, 1st instalment an rawn release a, a hnu daih kum dawnah 2nd instalment an rawn release leh thin a ni. Chungte chu a nih avangin kan harsat khawp mai a. Tunhnai February ni 7 khan cheng nuai 2171 a rawn lut a. Insak zawh tura hmalakna te zawhpui thuai hi kan nghakhlel a, a dang thlan leh te pawh kan nghakhlel a ni. Pu Speaker, I dinglama mi ten, ‘kan thlang ve miah lo; SECC data 2011 hmanga thlan a ni’ an ti a, kan sorkar ve term tirh dawn khan an lo thlang zo vek tawh bawk si a. Chutah chuan tlemin an chawthleng kha a lo lei deuh bawk si a, kan mite hian thlan nih ve hlan an nghakhlel tawh bawk nen. Mahse Regional Workshop, Aizawl-a an han neih pawhin kan han dil thin a, tihngaihna a awm si lova, helai hi chu kan mutan, kan harsatna a ni a. Cheng ₹13,000 chauh unit cost a ni a, chu chu instalment 4 in - 30:30:30 leh a tawpah 10% khan an pe a, a tlem em em mai a, a buaithlak khawp mai a. Theihtawp chhuahin thawk tuten kan buaipui a, helaiah hi chuan thawktute emaw, State sorkara Finance Department emaw sawiselna tur kan awm lova Aa hun takah kan pe a. SMS phei chu thawkkhat lai kha chuan central share kan dawn hmain min rawn pe nghe nghe a ni.

Tin, MZSRLM hi kan hriat angin block 28-ah kalpui mek a ni a, chutah chuan capacity building hmalakna hnuaiah self-help group hmun 1256 ah din niin, member 8,853 kan awm a, chutiang chuan, VO 58 kan awm bawk a ni. Heng thingtlang mi, a bik takin hmeichhia ten leirem an rawn rahna tur te, pawl anga an tan hoa sum leh pai khawl dan te leh eizawna kawng kawhhmuh te a ni ber a. Chutiang chuan theihtawp chhuahin tan a la a. Self-help group te chuan bank pawisa pukin, bank account te hawna, khang atangte khan mi-harsate an tanpui thin a ni. Sumdawng tam tak an awm a, chung sumdawna tea bul tanna tur kawng an kawhhmuh a, mi tam takin heng MZSRLM hmalakna atang hian eizawna an lo neih theih phah ta a ni. Kolasib District-ah te chuan Kuhva hnah hmanga plate siam te, chutiangang chuan chaw einaa hman theih plate tam tak an hralhchhuak a. Tun Covid period ah ringawt pawh khan mask te an thui a, khatiang khan eizawna chi hrang hrang ranvulh leh huan enkawl thlengin an ti a. East Lungdar Block-ah phei chuan thei sawngbawlina te, thali sawngbawlina tur te kha an din bawk a ni.

Tin, SUA, ‘Social Unit Audit’ kan ti a, hei hianin department hrang hrang, keimahni department chhung theuha kan hmalakna - NSAP te, PM- Poshan te kha a audit thin a, chutah chuan khaw 511 ah khan social audit a kalpui tawh a, fel takin, ‘miin

hna a nihdan turin a thawk em; a sanction nen a inmil em' tih ang te kha a enfel vek a. Khang zawng zawng kha sorkar pawhin kan tangkaipui em em a, department pawhin hna han thawk chhe dawn ila khan audit kha kan neih reng avang khan hna kha a thawhchhiat theih ta lo a ni. Chutiang chuan kum tluanin hnathawktu tur audit party kha an inruahman zel ani. Tun kum 2022 chhung hian khaw 867-ah audit neih chhuah vek tum a ni a, fund kan hmu dan tur erawh kan hre lova.

Hei bakah hian Pu Speaker, WDCPMKSY hian tunah hian PIA 18 a enkawl mek a. Chutah chuan land development te, soil & moisture conservation leh water harvesting structure te kalpui mek a ni. Tin, afforestation leh horticulture development ah te hmalak a ni bawk a, chuta an hmalakna langsar zualah chuan – ‘Entry Point Activities’ kan ti a, Mizoram chhungah Project 18 hnuaiah EP atan hian hna hrang hrang 60 zet thawh a ni bawk a. Tin *Mission Amrit Sarovar*, India ram zalenna kum 75-na kan lawmna kal zelah hian sorkar laipui ruahmanna siam angin bill siam a ni a. Tin, horticulture activities-ah te pawh thlai an chin theih turte ruahmanna siam sak a ni bawk a ni. Tin, NLCPR hmalakna chi hrang hrang – Mini-Sports Complex, Khawbung ah te, Multi-Shopping Centre, Saitual ah te, Mini-Sport Complex, East Lungdar ah te kan peihfel tawh a, tunah hian Saitual DC in, Saitual-a Multi-Shopping Centre phei chu a luah a, Mini-Sports Complex, Aibawk hi hawn theih turin peihfel a ni tawh a, session zawh hun remchangah hian kan hawng dawn a ni. A bialtu MLA in ‘grass erawh chu ka phah ang e’ a ti a, kha kha chu phah turin a inruahman niin ka hria.

Tin *‘Springset Development & Water Supply at Chalfilh Catchment Area Phase-I’* hi a lawmawm hlein ka hria a, hmanni lawk khan Pu Speaker, kan han hawng a. I bial a ni a, nangman hawng la ka duh a, mahse i awm si lova; i bial chhung - Khanpui, Hmunngahak leh Lailak khua ten tui in tur Zotuithiang, treatment tih ngai miah lo kha, an inah an herhhaw tur tur ta mai a, a lawmawm tak zet a. Hei hi NABARD, IRDF Fund ani a, a lawmawm tak zet a. A thawktu a department chungah lawmthu kan han sawi bawk a ni. Tin, NEC atang hian Rural Monitoring & Information System (RIMS) a awm a, nuai 249 hmangin project kalpui mek a ni a, tender hmangin a thawktu tur te pawh thlan fel an ni tawh a ni. Hei hian kan hnathawhna awlsam zawkin min khaikhawm ang a, technology thar hmangin kan monitor thei tawh dawn a ni.

Tin, kan hriat angin SEDD kaltlangin rangva kan han lei a, a inthlahrunawm duh khawp mai; member te'n kan han insem den den a. Rikrum chhiat tawh, kangmei a awma chhawndawlina tur MLA te'n kan dil theih turin department-in kan vawng tha khiau a ni. Hei bakah hian mitam tak inchung tur rangva neilo te an awm a, kan Chief Minister zahawm takin min ngaihtuahpui a. Silpoulin te pawh inrawn sawi a, a tul ang zelin kan House Leader zahawm takin min la ngaihtuah sak zel turah kan ngai a ni. Tin, SAGY - Sansad Adarsh Gram Yojana, PM scheme hi October Ni 11, 2014 atanga kalpui a ni a, chutah chuan district hrang hrangah kan MP te'n *model village* an nei thin a, chung te chu a khua anrawn thlanah te khan hmalakna chi hrang hrang kalpui zel a ni.

Pu Speaker, kan department hmalakna hi a zau em em a, member zahawm tak takte han react kim pawh a theih loh a. Helaiiah hian department lamin a chhanna, in note zawng zawng leh in thusawi zawng zawngte kha min rawn pe vek a. React tur hrang hrang bakah MGNREGS employee-te EPF zirchian chungchang leh an peklohna chhan chungchang te kha a awm a. Ni e, an duhdan kha a sang lutuk a, department danga contract-a thawkte nen hrut rual leh enrem kha a ngai phawt a. Amaherawhchu, kan sorkarah hian vawihnih an hlawh kan tisang tawh a, thawktute pawh an lawm ve khawp mai a, Covid period-ah pawh hlawh lak theih loh an nei lova. A hun aia hmian hlawh an la vek thei a, chutiang tur chuan thawktute an inpe takzet a. Tunah hian, ‘second entrance engvangin nge an la hmuh loh?’ an ti a. Tunah hian first instalment ₹59.7435 crore kan hmu a, second instalment ₹58.8511 crore kha tun thla lawkah khan kan dawng fel bawk a. A vaiin material component atan hian vaibelchhe ₹1,18,59,46,000 kan hmu a. Finance Department-in, ‘hei hi chu mipui chanvo a ni a; nangni RD department chuan inrawn dil kha khulamin an rawn release leh mai ang; inrin ang tak tak hian in lo hmu leh mai thin a’ min ti a. Kan thawktute inpekna bakah kan ministry min duhsakna leh Finance Department lam min duhsakna vang liau liau a ni a, keiniin tihtheih engmah kan nei lova. Amaherawhchu, chunglamin mite rilru leh thinlungah thu a rawn sawi vang a ni a, kan vannei takzet a ni.

Pu Speaker, SIRD hmalakna chungchangah khan VC atanga training te pein eizawna chi hrang hrang chu an pe a. Miin kawng dik an zawha, training an peka, midang va train leh tu turte pawhin an zirtir thin a. Hetah hian *State Institute of Rural Development & Panchayati Raj* kan nei a, tangkai takin mipui tan hna an thawk mek a. Hei bakah hian Aocial Impact Assesement (SIA) Revenue Department hnuaiia tih thin pawh hi anmahni hian an kalpui ta a ni.

Pu Speaker, Member zahawm tak tak te thahnem min ngaihpuina leh in mi duhsaknaah lawmthu ka sawi duh a. An sawi zawng zawng kha kan lo chhinchhiah vek a, hunte a tam loh avangin kan react vek seng si lova A a tul dan angin kan lo enzui ang a. Inhrilhhriat ngai chi a awm leh kan inhriattir zel turah ngai ila. Hmalam hunah thurawn min pea, min finchhuahpui turin member zahawm tak takte ka ngenin, ka sawm bawk che u a ni.

Pu Speaker, ka department enkawl Demand No. 6 - Land Revenue & Settlement Department ₹33,72,12,000.....

DR. K. PACHHUNGA : Pu Speaker, khawngaih takin. (**Speaker:** Demand-a rawn luhpui tawh a.) Member zahawm tak Pu Zodintluanga’n a sawi Mat chungchang kha min sawifiah sak theih chuan.... (**Speaker:** A office-ah leng mai rawh. Kan minister zahawm tak pawh khan i office-a rawn leng mai tur khan ti mai la.)

PU LALRUATKIMA, MINISTER: Pu Speaker, han sawifiah ka chak khawp mai a; mahse, i thu angin office-ah ka lo hrilhfiáh dawn nia.

Demand No.	Purpose	Amount (in ₹)
6	Land Revenue & Settlement	33,72,12,000.00
26	Information & Public Relations	12,21,57,000.00
38	Rural Development	3,08,51,87,000.00
TOTAL		3,54,45,56,000.00

Heng hi, he House zahawm takah hian min pass pui turin ka rawn ngen e.

SPEAKER : Tunah kan Minister zahawm takin heng a demand-te pass a rawn dil a: -

Demand No.	Purpose	Amount (in ₹)
6	Land Revenue & Settlement	33,72,12,000.00
26	Information & Public Relations	12,21,57,000.00
38	Rural Development	3,08,51,87,000.00
TOTAL		3,54,45,56,000.00

Pass remti apiangin, ‘remti ti’ rawh u le.. (**Memberte:** Remti). Remti lo kan awm em? Kan awm chuan, ‘remti lo’ ti u la. (*Remti lo an awm lova.*)

Awle, Minister zahawm tak Pu Lalruatkima’n heng demand-

Demand No.	Purpose	Amount (in ₹)
6	Land Revenue & Settlement	33,72,12,000.00
26	Information & Public Relations	12,21,57,000.00
38	Rural Development	3,08,51,87,000.00
TOTAL		3,54,45,56,000.00

rawn submit te hi House-in lungruál takin a passed ta a ni. (**Pu Lalruatkima, Minister:** Pu Speaker, ka lawm e.)

A dawt lehah chuan, Minister zahawm tak Pu Lalchamliana, kan sawihona te rawn wind-up turin kan sawm ang a. Tin, sawifiah ngai a tihte rawn sawifiaha, a demand-te House-ah pass rawn dil nghal se. Ka sawm e.

PU LALCHAMLIANA, MINISTER : Pu Speaker, ka lawm e.

Kan hriat theuh angin tun Budget Session hi tun term-a kan budget session hnukung ber tur a ni a. Budget Session leh chu term thara awm tur a ni tawh dawn a, churang chuan, a hmasain lawmthu ka sawi duh a ni.

Hei, vannei ka in ti a, thawhpui ka nei tha em em a; Home a ni emaw, DM & R emaw, Taxation a ni emaw thawpuite hi ka nei tha a, an chungah lawmthu ka sawi duh a. Tin, kan Police te hi an fakawm ka ti a, law & order maintain chungchangah te, ramri venhim chungchangah te an titha em em a. Law & Order maintain chungchangah chuan Police chauh ni lo, pressure group hrang hrang political party te, sorkar hnathawkte leh midang te pawh an ni ang a; kan hun chhungin law & order-ah harsatna lutuk kan tawk lo te, han insum theihnaah te, dan leh hrai an pawisaknaah te lawmthu ka sawi a ni. Keima mimal ngaihnanah chuan party emaw, pressure group emaw lungawilo a lo awm theih khawp a, chungte chuan an lungawilohna te pawh han lantir a, nawrh an huaihawt te hi awm ka ti a. Amaherawhchu, midang te tana harsatna ni 2-3 lai siam te hi chu a tha ka ti lo thin a; a lawmawm khawp mai.

Tin, kan police te hi traffic duty-ah an ni emaw, misual hnuchhuiah a ni emaw an ti tha em em a. Tun hnaiyah ATM mi pakhatin hmun 2 laiah a bei a, mahse ni 2 - 3 leka an han manchhuak thei te kha lawmawm ka ti a. Tin, hmanah khan Lunglei ah mi dawr nghaklai thattu darkar 48 chhunga an han man thei te kha a ropui ka ti a, an chungah lawmthu ka sawi a ni. Tin, traffic duty hna hi a hautak khawp mai a, Aizawl khawpui chu, heti chung hian kan police te hian thahnemngai takin hna an thawk a, an duty hi an ti tha hle a, dan pawisa lo mi tlemte te hi an han tawng leh thin a; chungte ah pawh chuan harsatna lian awm lova an han tifel thei te hi lawmawm ka ti takzet a ni. Tichuan, Home-ah hian ka han lut hmasa ang a, a lian ber a ni bawk a.

Kan hriat angin Home-ah hian Police chauh an awm lova, department dang 6 - Homeguards, Prisons, Fire Emergency Service, Forensic Science Laboratory leh Sainik Welfare Rehabilitation Board te an awm a ni. Tichuan Police bikah han kal hmasa ila.

Sum leh paiah kan sorkar a hausa tawk lova, kan duh angin hma kan la thei lo a ni. Chuti chung chuan, nikum leh nikum hmasa chhung khan ramri-venhimna kawng hi kan CM zahawmtak hian a ngaipawimawh a, pawisa ₹620 lakh chuang ramria kan police te awmna tur Barik hrang hrang te, Vairengte-ah Company headquarters dinna tur min pe a. Chu bakah an awmna hmun motor-a kal pawhna kawng laihna tur te kha kan hmu bawk a, kan lawm hle a ni. Tunah hian Thenzawl-ah drugs hmang sualte enkawlina tur hospital dinin, a hna pawh zawh tawh a ni a, ₹83 lakh man lai a ni. Tin, Aizawl - DIG Northern Range complex tur ₹320 lakh in sak mek a ni a, Thingkah – 3rd IR Batallion headquarters-a an tui in tur lakna tur hi ₹690 lakh in buaipui mek a ni bawk a, a hna 60% zawh tawh a ni a. Chutiang chuan harsa tak chungin hma kan la ve mek a ni.

Tichuan, kan police te hi kan sawi tawh ang khan Inter-State border ah an duty a, an awmna khawchhunga mipuite an himna turin patrolling duty te an ti reng a ni. Tin, crime prevention lamah hian an thawk tha em em a, investigation leh crime conviction rate-ah hian Mizoram Police hi India ramaa tha ber te zinga mi an ni tih ka sawi duh

bawk a ni. An theih ang tawkin a remchanna hmun apiangah training an nei reng bawk a, ‘ralthuam tha hi han nei sela an phur zual ang’ tih hi kan ngaihtuahna a ni a Chuvang chuan, theih anga tha ralthuam pek kan tum a - AK-47 tum 2 kan lei tawh a, tunhnaiah pistol tha - *Bharata Pistol 200* chuang kan lei bawk a ni. Tin, State Firearm Bureau atangin hel kut atang leh thildang atanga silai, police hman theih tur chi 49 lai an dawng bawk a ni. Tin, Assistant to State for Narcotic Control atangin hian ₹62 lakh leh a dang ₹14,00,049 kan dawng bawk a ni. Heng hi district tin Malkhana atan ka hmang bawk a, video recorder leh drone lei nan te pawh kan hmang bawk a ni. Tin, tun dinhmunah hian police station leh outpost zawng zawngah cctv Supreme Court thu angin dah a ni a, heta tan hian ₹5.93 crore dah a hman a ni.

Tin, ruih-hlo hi police te hian nasa takin an do ve a, kum 2022-2023 chhung khan Excise & Narcotics Deptt. nena tangkawpin ruih-hlo leh a kaihnawih chi a man te hi ₹9,22,95,86,522 a ni. Tin, tunlai hian mi kan changkang tawh a, sum leh paia inbumna a nasa em me mai a. Chumi venna atan chuan *Crime & Economic Offences* police station hawn a ni a. Hei hi CID Crime, CID Complex-ah dah a ni. Tin, a theih chin chinah VDP awmna khuaa mite chu kan theih ang tawkin kan ngaihven thin a, theih ang angin kan pui bawk a ni.

Police uniform hi ‘a tha thei ber ni se’ tih hi kan duhthusam a ni a. Amaherawhchu, sorkar hmasa pawha ₹5 crore an lo dah thin kha, kan han sorkar tak hnu 2021-22 khan ₹3 crore pawh kan nei thei ta lova. Hetah hian pawisa kan mamawh belh hle tih kan sawi rualin, kan neihin a tlin tawk chinah chuan a *quality* hi a tha khat hle ah kan ngai a ni. Tin, thil ho tak anga lang, mahse tul em em si - mi thil tisual an awmin police in an man a ngai a, lock-up ah an dah a ngai a ni. Khang an man hote kha chaw ngheia dah ngawt theih an ni si lova, ‘an chawmna tur pawisa pek belh kan ngai hle’ tih hi kan hotu lu ber leh finance lama thawkte pawhin min lo hriat sak kan duh em em a ni. Harsatna tam tak nei mah ila, theih ang tawkin hma kan la a, tunah pawh hian member zahawm tak tak ten ‘police quarter a chhia’ tih an sawi a. Hei hi kan dil a, kan CM zahawm takin ₹2 crore min pe a, chu chu police station hrang hrangah kan han sem darh ang a, tam tham phe chu a ni lo ang a, tlem chuan a ziaawm thei turah kan ngai a ni. Police bikah chuan kha kha duh tawk mai ila.

Fire & Emergency Service ah hian lo lut ta ila. Fire & Emergency Service ah hian thawktu an tam vak lova. Department staff mi 180 an awm a, tin police atanga attached mi 26 an awm a. An vaiin mi 206 niin hmun hrang hrangah an thawk mek a ni. Fire & Emergency Service tihchangtlunna tur hian 15th Finance Commission-in pawisa a dah a, nikum hmasa lam atang tawh khan project kan siam a. Kan siam hmasak kha MHA in a pawm lova, ‘rawn siamtha leh rawh u’ an ti a, kan siamtha leh a. Tunah hian (a nuai zawngin han sawi ila) - ₹4,725 lakh chu Fire & Emergency Service Station hrang hrang tihchangtlun nan project a awm mek a. Kan thu hriat dan chuan reiloteah hei hi an rawn sanction theih kan beisei a ni.

Kan duhthusam ang nei lo mah ila, member ten an tarlan tawh ang khan, 2021-a Lunglei khuaa kangmei nasa tak a chhuah khan kan thawktu te an thawk tha hle mai a. Chuvang chuan, Fire & Emergency Service Department hian Netaji *Subhash Chandra Bose - Aapda Prabandhan Puraskar Award* a dawng a, chu chu Lunglei fire station-ah pek a ni a, hei hian pawisa fai cheng nuai 51 a keng tel bawk a ni. Hemi kan sawi lai hian member zahawm tak ten an hriat ka duh chu - Lunglei chheh vela kangmei a chhuah vak khan kan hlauthawng tlang em em a, kan Chief Minister remhriatna leh thahnemngaihna Indian Air Force helicopter kha rawih a ni a, mahse a rawihna man kha a lo to khawp mai a. ‘Min ngaidam teh u, pawisa kan neilo’ kan ti a. Vawihnih lai kan zia a, min ngaidam thei lova, tunah hian hian cheng nuai 243, helicopter hman man kha pek turin kan buaipui mek a, DM & R pawisa atanga pek tur a ni.

Tin, Fire Service Deptt. hian fire audit te a nei thin a, hei hi a tangkai hle a ni. Tin, anni pawh hian police te ang bawkin a remchan dan ang zelin India ram hmun hrang hrangah training an nei thin a. Tunah hian phalna sorkar atanga kan hmuh angin provisional employee – fireman 8 leh driver 6 lak tumin hmalakna kalpui mek a ni a. Ka hriat chinah chuan driver 6 hi heavy vehicle license neih ngai a ni a, matric pass ngai a ni bawk a. Chuvang chuan, a diltute zingah pathum chauh an qualify a ni tih te kan hria a, a zia lo khawp mai.

Mizoram Home Guards & Civil Defense - hei hi tangkai taka hnathawktute an ni. An mamawh an sawi thin a, ‘ralthuam tha zawk te pawh kan mamawh ve a ni’ an ti a, tichuan police lam atan hian thehchhuah theih an neih leh neih loh kan han zawng a. Nikum khan INSAS Rifles-100 leh self-loading rifles 200 nos. Home Guards hnenah hian kan pe a. Tichuan heng silai tha chi hman dan hi nikum November thla khan an inzirtir a, hlawhtling takin an inzirtir chhuak tawh bawk a ni. Tin, Home Guards mi 37 leh Excise mi 51 te nikum khan training chhuah tir an ni bawk. Tin kan sawi tawh ang khan Home Guards te hi ‘*special leave* pek tlak an ni’ tiin an rawn dil a, sorkarin a remti a, chuvangin tunah hian kum khatah ni 30 special leave pek tur an lo ni ta a ni. Home Guards ho hi an tangkai khawp mai a. Bank hrang hrangah leh Central Govt. ah te hian an duty a. Chu chu 2023 chhung khan revenue an lak luh hi cheng nuai ₹18,33,167/- lai a ni.

Prison-ah let leh lawk ila. Prisons ah hian thawktu 353 lai an awm ve a. Central Jail ah khuan vawk, ar leh thlai thar hralhchhuahna atangin sorkarah ₹75,000/- chhunluh a ni a. Tin, jail industry, thiam thil siamte hralhna atangin cheng ₹23,000/- thehlut a ni bawk a ni. Hei hi jail tangte tan *Vocational & Skill Development* program kalpui mek atanga tih a ni. Tunah hian sorkar laipui Ministry of Home Affairs chuan *Modernization of Prisons Scheme* atangin ₹300 lakh min pe a, hei hi kan beisei dan chuan kum tin crore 3 hi min pe zel turah kan beisei a, tuna cheng 300 lakh min rawn pek atang hian, nichinah jail tawt lutuk te an sawi a, chuvang chuan, Central Jail-ah khuan ward sak belh ni sela nuai 100-in, Siaha Jail fencing nuai 100 siam ni bawk se kan ti a, hei hi

PWD in estimate an siam tawh a, an hnenah hlan a ni tawh bawh a ni. Tin, security leh a lightning system te pawh a lo that zawk theih nan nuai 78 lai hman tum a ni tih ka sawi duh bawh a. Tin, Jail Warder (PE) 5 lai sorkarin lak phalna min pe a, hei hi bawhzui mek a ni.

Tin, Sainik Welfare & Resettlement-ah hian kal leh ila. Anni hi kalkawng bik deuh nei an ni a, anmahni sipai bangte inenkawlna bik a ni. Tunah hian Indopui II-na *war-veteran* leh an thih san an nupuite thlatin ₹2,400/- theuh pek thin an ni a, tunah hian World War-II veteran la damte hi mi 20 an ni a, an nupui an thihsan te hi mi 302 an la dam a ni. Tin, rual u deuh chuan kan hria ang a, 1962 vel kha ni tain ka hria a. 2nd Battalion, Assam Regiment Mizo majority awmna kha bandh a ni a, khata pension nei lova ban te kha tanpuina pek thin an ni a, ₹2,400/- thla tin pek an ni a, tunah hian mi pathum an la dam a ni.

Tin, Arm Forces Flag Day-ah te pawisa khawn khawm theih ang ang khawn khawmin, chung chu sipai bang leh an nupui hmeithai harsate hnenah tanpuina an pe thin a ni. Tin, Sainik ho hian Computer Training Centre an din ve a, hei hi a bik takin sipai bang fate tana tih a ni a, mi tam takin an tangkaipui tawh a ni. Tin, Mizoram atanga India independence hmaa sipaia lo tang tawh zawng zawngte hming chuanna “Lest we forgot” tih chu nikum July tha khan tlangzarh a ni a, hei hi lehkhabu tha tak leh chhenfakawm tak a ni.

Pu Speaker, Forensic Science Laboratory - hei hi Deptt. lian lo tak mahse pawimawh tak a ni a, member zahawm tak takte tumah khan an sawi lova, an tih thin dan takah, ziaq loh lam kha sawi ve a ngai a ni; an sawiloh lam kha ka sawi ve dawn a ni. Forensic Laboratory hi tunlaiin a pawimawh em em tawh a, *justice delivery system* atana a ban pawimawh tak a ni. Thawktu officer 9 leh a dang 28, an vaiin 37 an awm a, an efficient em em mai a, fak an phu a ni. Tunah hian *zero-pending policy*, engmah pending lova case lo awm apiang kha tihfel zung zung turin hma an la a, India ramah case pending awm lova kal thei awm chhun vawiinah hian an ni. An thawh that em avang hian Nagaland FSL Director pawhin an hnathawh dan en turin nikum April thla khan a lo kal nghe nghe a ni. FSL hian 2022 chhung khan criminal case 1,172 leh sample 25,761 lai a endik a ni. Hei mai bakah hian nikum khan Cyber Forensic Laboratory hawn a lo ni a, India Cyber Laboratory nei thei 18-na kan ni. Tin, hnu-chhui pawlte’n entik lai pawhin an password hmangin FSLC website ah case exam lai online in an en thei vek a ni. An case exam lai kha engnge a thlen tawh; forensic atangin enge report awm thei tih kha heta tang hian a hriat theih zung zung a, he *online case tracking system* hi India ram FSL te zingah kalpui awmchhun kan ni.

Pu Speaker, sawihonaah khan member zahawm tak tak 26-in Home Deptt. chungchang an sawi a, ka sawi tawh ang khan Police bak sawi hi mi 3 chauh an awm a, a zialo khawp mai. Home chungchanga react ngai tam tak awm lemin ka hre lova, kan

sawi tlangpui chu – ‘motor an nei thalo; quarters an nei thalo’ tih te kha a ni a. Hei hi theihtawp kan chhuah chung pawhin kan duhlthusam kan la thleng lo a ni.

Member zahawmtak Pu Nihar khan ‘border fencing avanga social impact assessment tih a la ni lo’ a tih kha, Home hi a titu tur kan ni em/kan ni lo em tih pawh hi ka hrechiang chiah lova, Session zawhah hian lo leng thei sela Pu Speaker, sawi dun ila, chuta tang chuan tihdan te pawh a awm mahna.

Member thenkhatin *compassionate appointment* siamah lawmthute an sawi a, a lawmawm takzetin kei pawhin ka hria a. Hetah hian mi 290 zingah 90 vel chu hmeichhia an ni. Hmeichhia 90 vel an nih lain, Pu BD-a ten ‘ka bial chhungah hmeichhe police an awm lo’ an tih te pawh kha, an training zawh chuan thui tak a phuhru theiin ka ring a ni.

Tin, Pu Rindika, member zahawm tak khan ‘Home hi ram leh mipui min thlamuantu tur a ni’ a ti a. Kan lo hriat dan chuan, kan police te hi an tha viau a, ‘kan mipuite hi kan police te venhimna hnuaiyah hian an ralmuang khat a ni lawm maw’ ni tih hi kan lo thlir ve dan a ni. Tin, kuhva hi a mantu tam ber chu ‘mipui duty anni’ a ti a, kan hriatdan a inang lova. Police report atanga a lan dan chuan - police ina kuhva an man hi bag 10,550 a ni a, mipui duty ten an man hi bag 1344 a ni. A tunge man tam zawk tih kha chu khalai atang khan a hriat mai awm e.

Tin, Pu Lawmawma khan, ‘Fire station India rampum a hnathawk tha pahnih zingah Lunglei thlan a ni’ a tih kha, a dik a. Ka sawi tawh ang khan Fire Station tihchangtlunna tur atan hian hma kan la mek a, vaibelchhe 40 chuang project kan chiah mek a ni. Tin, member zahawm tak Pu Chhuanthanga khan, ‘police te hi duat an ngai a; pute in sak a chhawr hi tihtawp theih a ni lawm ni?’ ti zawng khan a rawn sawi a. Ni e, ‘police chhawr’ tih hi a lar khawp mai a, insakna atana chhawr mahse, a hminga Home chelhtu ka nih ve hnu hian complain pahnih chiah ka la dawng a. Chawnpui lamah khuan officer pakhatin a lo chhawr a, Durtlang lamah khian senior officer pakhatin a lo chhawr bawk a. Kan hriat ve leh hei hi kan titawp a. Tunhma ngaihtuah kha chuan a tlem tawh hle niin kan hria. Tin, Dr. Vanlaltanpuia khan, ‘Haulawng-ah Police Outpost din tura hmalakna a kal zel em’ a ti a. Kan theih chinah chuan a kal zel a, mahse hma kan sawn hleithei lo a ni tih kha kan sawi kai duh a ni.

Hei, *thu-inchuh* a awm leh ta a; member zahawm tak Pu Lalrintluanga Sailo khan group leader zahawm tak Pu Duha thusawi, ‘CM hian case a nei em ni? hei hi sawi chian ni teh se’ a ti kha ni a. Mizo thawnthuah - Duhmanga leh Dardini em ni, ‘*kehme a par hunah ka lo kal leh ang a, kan innei dawn nia aw*’ tih kha? An *kehme* tih kha a lo inang lova, an inneih loh phah ta tih kha a awm a ni. ‘Case’ tih hi ka hrechiang vak lova, hman nia Pu Duha’n an sawi atang khan, E heu, kan CM chuan case a lo nei em ni’ ka ti a; police ho ka han zawt a. Case chu nei se police hovin case an register tur niawm

tak a ni a, mahse min hrilh dan chuan, Lengpui Airport sak chungchangah MPYCC leh *Mizoram First* ten complain an thehlut a, complain kha FIR pawh a tih theih tho ang a; amaherawh chu, FIR hi keini police ngaihndan chuan case a la tling lova. Tichuan, kan hriatzui danin, Lok Ayukta khan ACB-ah preliminary inquiry ti turin thupek a chhuah a, kha kha keini police ngaihndan chuan case ala tling lova. Preliminary inquiry khan, ‘hei hi case nei tlak a ni e’ a ti mai thei a, ‘A, hei hi chu ngaihtuah zui tlak a ni lo e’ a ti maithei baw a. Chuvang chuan, keini Home Department lam ngaihndan chuan, ‘kan CM hian case a nei lo’ tih kha ka sawifiah dan ni mai teh se.

Tin, member zahawm tak Pu Ngunlianchunga, ani hi a hrata hrat ve ngang hi a ni a, ‘engtikah nge IR Thingkah luah theih anih ang’ tih kha a zawt a, Thingkah hi kan sawi thui hret ang a.

Tunah hian kan 3rd IR ho hi Assam hovin, ‘kan mamawh tawh lo’ an ti a, an mamawh tawh loh chuan kan ti a, keini pawhin Home Ministry-ah kan zia a. Reiloteah hian Assam atangin an lo chhuak ang a, tichuan a luah theih chin chin te pawh chu a awm tawh mahna. Tin, approach road chungchangah hian tun thlengin harsatna eng emaw a awm ka hre ve chiah lo naa tin, ‘a far’ tih kha chu ‘tuidawn eng emaw kha bawlhhlawhin a lo hnawh a, a far a ni e’ tiin report ka dawng a ni. ‘Zochhachhuah Police Outpost a awm ve thei ang em?’ tih kha, saw saw a function tak tak hunah chuan Police Outpost tel lo chuan a function thei lo ang a. Chuvang chuan, a hlawhtlin hunah kha kha chu a ken tel turah ngai ila a tha awm e.

Member zahawm tak Pu Zodintluanga’n Vairengte check-gate – ‘luh leh chhuah in register a ngai’ tih kha ka lo hre ngai lova; kan zawt a, a lo dik chiah mai a. Hei hi nikum hmasa lam kan buaina atanga Mizoram CRP leh Assam CRP (ti mai ang) 147 khu Assam lam control an ni a, 225 lam khu Mizoram lam an ni a. 225 khuan a chhuklam khu motor nos; driver licence nos. te an lo chhinchhiah thin a, a lo chho lam khu Assam lamah an lo chhinchhiah ve thung a. He thil hi tunhma ang kha chuan chuti lutuk chuan a hnawh tawh lo na a, thil tul lovah kei chuan ka ngai a, ‘tihtawp dan a awm em; kan lo enzui ang’ tih kha ka sawi duh a ni.

Tin, Assam CM-in, ‘acre 1800 Mizoram atangin kan la let a ti’ tih kha a sawi ve mai a ni ang Assam CM khan; keini chuan kan hriatpui lova, ‘kan ram kan chan hi kan hre lo’ tih kha kan sawi duh a. Tin, ‘hmunphiah chingtute’n Aitlang-ah hmunphiah an seng dawnin ID siam a ngai a, hei hi ava tha lo ve’ tih kha; hei hi ID siam avanga hmunphiah chingtute’n an hmunphiahte harsatna awm miah lova an seng thei hi a tha khawp mai kan ti ve thung a. A tirah an camp hnaih lutuka hmunphiah kektute kha an lo hau deuh em maw ni; chuvang chuan, Vairengte Civil SDO te an che vat a, inremna an siam a, tichuan tunah chuan harsatna a awm tawh lo a ni. Hei hi Aitlang-a hmunphiah chingtute aiawha ziaktu Pu Darthanzaua a ni a. Pu Speaker, i remtihain hei hi ka han sawi Chiang ang a –

“Aitlang ral huan neitu ten Assam police te atang harsatna kan tawh thin chungchangah SDO civil hnena kan harsatna kan thlen chu a theih chin china hma min lakpuina avangin harsatna awm lovin kan thlaite kan seng theiin, keini aitlang ral huan neitute chuan lawmawm kan ti hle a ni. He hmalaknaah hian keini huan neitu ten kan huan chhunga Assam police ten keini mizo huan te vai ten an rawn tihbuai loh nan kan huan, a neitu ngei kan nih zia hriat theih nan identity card kan SDC (C) hmalak sak tura kan ngenna chu SDC (C) amah kaltlangin identity card siam a ni hi keini huan neitu ten lawmlawm kan ti hle a ni” - Darthanzauva a ti a, Civil SDO ten hma an lo lakna hi thil tha tak niin a lang a ni.

Tin, ka han sawi leh duh chu - member zahawm tak Pu Lalduhoma khan, ‘ramri chinfel hi kan hmanhmawh lo riauin a lang a, a va tha lo ve maw le’ tih zawng deuh khan a sawi a. November Ni 17 Guwahati-a kan inbiana-ah pawh khan Pu Speaker, thla thum chhungin kan claim *1875-line* chhunga khuatea mi chengte hrilh turin thu kan dah a. Khalaiah khan kan thiam famkim bik lova; file kha kawilaiah emaw ni khan a kal rei deuh hlek chu a ni. Amaherawhchu, tun February Ni 14 khan kan claim khua chinte chu kan thlen thei a, ‘a mi-chengte eng ang nge an nih; eng sakhua nge an biak’ tihte chu kan hre mai thei lo a. Chu chu ‘March leh April thla chhunga en fel theih ni se’ tiin rawtna kan siam bawk a ni. Ramri hi party pakhatin a chin fel theih a ni lova, Mizoram sorkarin a ching fel mai thei lo a, Assam-in amahin a ching fel thei lo bawk a. ‘*inremna siama chinfel chi a ni*’ tih kha kan hre theuh a.

Tunah pheii chuan kan group leader rawtna niawm deuh tak - hman deuha chanchinbua ka chhiarah chuan, ‘mipuite inkarah *inrintawmna* siam ni se; cultural troop in exchange te pawh hi a tha ang’ tih te pawh kha ka lo chhiar a. Chu chu Ferbruary Ni 7 khan Hailakandi DC-in Kolasib DC leh cultural troop a rawn sawm a, an zuk kal a. Tin, March Ni 3 - Chapchar kut hmang tur hian hian Kolasib DC pawhin Hailakandi DC te, silchar DC te, Karimganj DC te pawh Kolasib-a rawn kal turin a zuk sawm a. Hei hi group leader zahawm tak idea ang deuh kha a ni a, a that pawh a tha phian turah ka ngai deuh a ni. *Inrintawmna* atanga tan loh chuan, ‘inngir-nghona hi tih fel har tak a ni’ tih kan hre theuh a ni. Chuvang chuan, a theih dan kawng kawnga inrintawmna kan siam hi a pawimawh a.

Tin, ka sawi tur a ni em ka hre lova – ‘July Ni 26, 2021 inkahnaa Assam lam paruk lai thi kha an rilru a la na hle’ tih kha kan hriatpui ve te pawh kha a tha a. Chuvang chuan, boruak kan siam te pawh hi a pawimawh khawp mai.

Tin, TA/DA bill tang chungchang kha kan sawi nual hlawm a. Mahse, heti hian sawi mai ila – ‘a tihngaihna kan hre rih lo a ni; kan fill rih lo a ni’ tih kha ka chhanna ni mai se la. A theih ang angin kan han ti a, ‘a total min pek theih loh pawhin, a zahve tal min pe rawh u’ kan ti a. Nikum pawh khan finance lamin eng emaw zat min pe a, kan

han tihnam deuh a. Amah erawh chu, police leh sorkar hnathawk reng reng transfer an lo ni fo mai a, khangah khan TA/DA hi a lo ngai a ni.

Tin, ‘mizo hlang’ tih Amit Shaha sawi kha ‘engatinge kan bawhzui loh?’ tih kha; a hma 2019 October thlaa Aizawl a lo kal khan boder guarding force thlang lam leh chhak lamah - a thlang lamah BSF puia, a chhak lamah Assam Rifles puia thei tura din kha kan CM hian a sawipui a. ‘Rawn ziaak rawh u, kan ngaihtuah ang’ a ti a, kan ziaak a, *thehmeh ang* deuhin, ‘*a-khuangchera bo*’ kan ti zawk dawn nge, ka hre lova, khatiang kha a ni a. Police housing atan pawh ‘cheng vaibelchhe 500-600 rawn siam ula, special project angin ka lo tih sak ang che u’ a tih kha, kan han bei tak tak mai a; crore 434 kan siam a, a tawpa lo chhuak chu, ‘ri det det’ tih kha a ni leh mai a. Chuvang chuan, han bawhzui leh chiam kha kan rilru-ah hian a awm the chiam lo a ni mai thei a ni.

Tin, UN resolution chungchang kha a dang daihin ka han sawi ang a – UN hian ‘*resolution*’ tih te, ‘*convention*’ tih te, ‘*declaration*’ tih te a nei tam mai a, *convention* leh *declaration* hi ‘a binding lo’ tih kan hriat ka duh a, UN chuan declaration emaw, convention emaw kha a puang tawp mai a, kha kha individual country khan an parliament-ah khan an lo accept ve leh a ngai a. UN system-a binding awmchhun chu – ‘UN Security Council Resolution’ hi a ni a, chumi enforce tur chuan force hial pawh hman theih a ni a. Chuvang chuan, helai UN chungchangah hian ‘resolution’ kan tih te, ‘convention’ kan tih te, ‘declaration’ kan tih te hi kan thliar thiam a pawimawh khawpin ka hria.

Tin, ‘*schedule tribe list siam that*’ tih chungchang kha, a rei deuh tawh pawh a ni mai thei a, tunah hian university mithiamte sorkarin a ruai a, chu chuan ‘ngawrh takin an zir chiang mek a ni’ tih kha ka sawi theih tawh a ni e.

Tichuan, Pu Speaker,.....

PU LALDUHOMA : Khami UN Declaration chungchanga hma la tura an theh luh lehkha copy kha ka dil a, nawr ngai a ni; hei hi kan tanfung tha tur a ni ve a ni. Khawvela indogenous zawng zawng kan lawm a, kan Governor pawhin min phurpui a, Vanapa Hall-ah program te kan siam a, khatiang kha a ni a. Engpawh ni se, ka duha chu - a copy min pe thei em?

Tin, kan thu inchuh chungchangah hian kan home minister hi ka zah em em a kan senior a ni a; a thil han sawi dan leh amah hi chu a inhmelem lo ka ti khawp mai. Lokayukta-in an register thlap a, case an register a ni. ‘case register - 47’ a inti chiah a ni. Chu na na na, ‘case a ni lo’ han tih tlat kha chu, pawn lamah mi thiam zawkte lo chhui zui atan dah tawh mai ilangin.

Tin, ramri chungchangah khan party thenkhat chu an inhnukdawk a, keini chu kan Home Minister hnenah ngei pawh hian, ‘a theih chhung chu kan thawhpui ang che u; thil tha hi kan duh a ni’ kan ti a, han in withdraw-na tur a awm pawhin kan hre rih lova. Amaherawhchu, muang chu kan ti deuh a ni. Tuna zawh hun tur pawh kha a hnai leh set sawt hle mai a, an thei dawn a ni chek ang a. He thilah hian a theih ang angin ‘keini chuan, *full co-operation* kan pe zel dawn a ni’ tih kha ka han sawi duh a ni. Pu Speaker.

PU LALCHAMLIANA, MINISTER: Pu Speaker, ka sawi tawh ang khan, ‘kehme’ kan tih hi a inang lova; Lokayukta lam chu ka hre miah lova. Mahse miin corruption case emaw, criminal case emaw a neih chuan police-in an register tur niawm tak a ni a, police lamah engmah register a awm lova, ‘case a nei lo’ tih kha ka rawn sawi mai a ni a. Tin, resolution bawhzui chungchang kha chu kan official ten lo buatsaih se la.

Tichuan, DM & R ah kal leh ila. Hei, Home Department hi 6-a then a ni a, minute 40 lai ka sawi ve ta. DM & R hi department lian lo tak a ni a, tunah hian thawktu officer 11 leh a dang mi 32 an awm a. Budget hi crore 50 chuang zet kan nei ve a, kan budget-a pawisa tam ber hi SDRMF – ‘State-Disaster Response & Management Fund’ tih a ni. Chu chu hmunnhiah - SDRF leh SDMF-ah then a ni. SDRF-ah hian 80% then a ni a, SDMF-ah hian 20% then a ni; SDMF 20% hi heng, ‘ka in bula min mai dawn; kan field bul a min dawn; kan Biak in bul a min dawn’ kan tih ang ho lo mitigate-na tur kha a ni a. Tin, SDRF erawh hi chu - khuarel chhiatna tuar te leh leim, thli leh ruah khang ho atan a ni a, heng hi central guideline angin tluang takin kan hmang zel a ni. Tin, Covid avanga thite kha Home Ministry-in, ‘mi pakhat zelah ₹50,000/- pek tur a ni’ a ti a, Mizoram-ah mi 726 tuar kan awm a, heng zinga mi 709 te hnenah hian ₹50,000/- theuh pek an ni. Tin, chubakah chuan, ‘frontline worker boral ta te hnenah ₹20 lakhs pek tur a ni’ a ti a, mi 10 te hnenah he ralna hi pek a ni bawk a ni. Tunah hian Mizoram State Control Room cum State Emergency Operation Centre din a ni a, a tirah chuan hei hi ATI-ah din a ni a, tunah erawh chuan DM & R Directorate-ah enkawl a ni. Hei hian data chi hrang hrang leh harsatna lo thleng report hrang hrangte kha lo chhinchhiahin, a lo enkawl a ni. Hun kal tawha mi kha chu sawi lo mai ila. Hman zan dar 10 ah kan bang a, zanin chu ban hma deuh tum ila a thain ka ring a, ka sawi kual thui vak lo ang e.

DM & R atang hian MNF Returnee-te 2021 – 2022 chhung khan mi 550 hnenah ₹5.50 crore (₹550 lakhs pek a ni a, tin, 22nd December khan ₹100 lakh pek an ni leh a, tunah hian nuai 200 pek tura buatsaih leh mek a ni. Tin, chhiat-rup thlenna lam pang hi Disaster chan a ni a, helam hi mipui hian kan ngaihtuah tawk lo thin a, awareness pawh hi kan la nei lova. Hei vang hian Disaster Management hnuaiah hian workshop leh thil chi hrang hrang buaipui a ni thin a. Tin, chhiat-rup lo thlen thilah emergency response vehicle hi directorate-ah motor 1, district disaster management authority-ah 1 theuh, hei hi tun hnuaiah khan pek a ni. Tin, chhiatna lo thlen hian a che hmasa awm thin a ni a, mizote zingah chuan kan YMA-te hi a che hmasa anni thin a; khami sira volunteer te

kha YMA member vek tho anni a. ‘Apthamitra Scheme’ an ti a, chungah chuan Aizawl bakah District 5 - Lunglei, Serchhip, Mamit, Kolasib leh Champhai-ah te hian district tinah mi 100 training pek an ni a, a tam zawk district 5 zinga 4 ah hian zawh tawh a ni.

Tin, ka sawi tawh ang khan, workshop chi hrang hrang NDMA (National Disaster Management Authority) atanga mithiam lokal te nen vawi tam tak workshop neih tawh a ni a. Tun hnaiah khan district tinah mock drill tih a ni a – ‘lirngching ritcher scale 7 ai sang lo kal tur ni ta se la, engtia awm tur nge’ tih te kha mock drill-a neih a ni a. Kan hriat angin tun hnaiah Turkey leh Syria inrina laiah lir a nghing a, mi 60,000 chuang an thi tih report te pawh a awm a ni. Keini ram hi zone 5 ni mah ila, Pathian khawngaihna zarah a la thleng lova, thleng lo hram se kan duh a; lo thleng palh pawh ni se, chumi lak atanga kan invenna, a tuartu kan tam lutuk lohna turin, helam kawngah hian mipuiten *awareness* kan neiha, training kan neih thin te hi ‘ngaih pawimawh a tha tak zet a ni tih kha ka sawi duh a ni.

Tin, Pu Speaker, project hrang hrang hi kian siam ve a. Member zahawm tak Pu Rokhaw’n, ‘Siaha lei min mai tur venna’ a tih te pawh kha project kan siam fel a. NDMA-ah kan thawn thla a, ‘kan nghak mek a ni’ tih kha min lo hriatsak sela. Tin, Pu Speaker, i bial Phullen-ah pawh lei chetna hmun, chhiatna lian zawk a thlen lohna turin project kan siam a, NDMA duh dan ang thlapin kan siam a, kan theh thla leh tawh a ni tih kha kan sawi duh a.

Tin, Pu Speaker, DM & R pawisa te hi a hman dan tur *guidelines* central-in a rawn siam thar a. Project lian pui pui, a crore tel ang maia ngaiin, ‘Appraisal Committee-in an endik ang a, chumi hnuah Chief Secretary hovin State Executive Committee-in a approve ang’ a tih tak hnu hian, minister te, director te, secretary te kut hi a phuar a, tun hma ang khan a hmanhmawh theih ta loh a ni.

Er. Lalzirliana khan Mamit lei-tlahniam a sawi a, hei hi a sawi zing tawh hle mai a. Siaha ka sawi ang bawh khan ‘NDMA-ah thehluh a ni’ tih kha a ni a. Tin, Pu Zothantluanga sawi – Central YMA te mamawh lawng-engine leh tuitla zawna hmanruate kha pek tum a ni a, a lawmawm khawp mai a. Tin, Central YMA chauh nilo, khaw dang YMA te pawh hian chhiat-rup tawhna thila an mamawh te rawn sawi se la, kan pawisa neih ang chin zelin ‘kan lo ngaihtuah sak zel ang’ tih kha kan sawi kai duh bawh a ni.

Pu Speaker, a tawp ber atan chuan - Taxation Department hi tunah hian staff 202 a nei mek a, post vacancy hi 70 lai a awm a ni. Taxation department hian kum kal ta chhung khan theihtawpin sorkar sum indaihlohna phuhruk turin hma a la a, revenue tax a khawna te hi GST, Mizoram VAT leh Profession tax te an ni. Tin, tax a hmuhna tam ber hi ‘GST a ni’ tih kan hre tlang awm e. Professional tax hi India Constitution in mi pakhatath ₹2500/- aia tam khawn a phal loh avangin a tam lo hle a. Hei hi tihsan tumin

GST Council meeting leh meeting ramchangah kan sawi fo thin a, mahse, Constitution amend ngai a nih avangin a tih tak tak theih loh a ni. Tun kum kal mekah hian chhiah lakhawm tura min tuk hi ₹730 crore a ni a, tunah hian ₹836 crore kan hmu tawh a. Tin, RE an rawn siam a, revised estimate ₹900 crore hmuchhuak tura tuk kan ni a. Hei hi Pathian khawngaihna azarah hlawhtling ngei turin kan inbuatsaih a, kan beisei a ni.

Tunah hian Siaha-ah Deputy Commissioner of Tax Office leh staff quareter, PWD enkawlina hnuaiyah sak mek a ni a, kuminah hian luah hman beisei a ni. Tin, Lunglei-ah hian officer leh staff-te quarter sak mek a ni bawk a, ngawrh taka sak chhonzawm mek a ni. Serchhip-ah hian staff quarter (Type-II) sak zawh tawh a ni a, tunah hian kan luah tawh a ni. Serchhip leh Lawngtlai-ah te hian department pualin office kan la nei lova, *plan & estimate* te siamin sorkarah thehluh tawh a ni a, hei hi a rang lama min tih hlawhtlin sak kan duh khawp mai.

GST hi online-a tih a ni a, current leh signal mumal tak neih reng a ngai a. Chuvangin, min inluah hi a remchang lo khawp mai a, ‘mahni puala building hi kan mamawh tak zet a ni’ tih hi ka han sawi duh bawk a ni. District thar 3 - Khawzawl, Hnahthial leh Saitual-ah Taxation office kan la nei lova, department dang taxation aia pawimawh loa kan ngaih ten an nei nawlh nawlh mai a, kan thik deuh a. Chuvangin, hei hi a ti theitu Finance lam te pawhin min lo ngaih pawimawh sak se la. District Headquarters tinah Taxation office kan dah a, ‘thawktu an awm chuan, pawisa pawh an haichhuak tam nge nge ang’ tih hi kan rin dan a ni a. Chuvang chuan, helam kawngah hian kan hotupa ber hi ka han han ngen duh a ni. ‘District tharah office min tih sak ve rawh u’ tiin ka rawn ngen a nih chu.

Tunah hian State-Taxation Officer post 59 awmah 24 hnawhkhah loh a ni a. An ni hi a kipui ber, department aiawha sumdawngte dawrtu an nih avangin an pawimawh hle a. Heng te hi tlema zawng han lak theih hi kan duh tak zet a ni.

Taxation chungchang hi member zahawm tak tak 9-in min sawipui a, a lawmawm khawp mai a. Pu Zama, member zahawm tak phei hi chuan session apiangin min sawipui a, “motor tha pawh an nei lo, pek ni se; district 3-ah office dah ni rawh se,” tih te pawh vawiinah min sawipui a, ka lawm hle a. A tha zawng vekin min sawipuitute hian taxation chungchang hi min sawipui a ni.

Ka sawilan duh chu – Taxation-a kan Commissioner of State Tax Pu Kailiana Ralte hi, naktuk hi a last-working day a ni a, kan ngai dawn khawp mai a. Department-ah thahnem ngai takin tangkai takin a thawk a. Amaherawh chu upa-in, “*Sa-huai chu, sa-huai vekin a thlak,*” an tih ang deuh khan, thlaktu tur tha tak te pawh kan nei tho turah kan inngai a ni.

Pu Speaker, han sawi hmaih leh han react hmaih te pawh a awm ang tih ka ring a, khangte kha, 'kan thawktu ten an lo chhinchhiah e; duh chuan la um zui zel theih a ni ang' tih kha ka sawi kai tel a ni.

Pu Speaker, tichuan ka Demand te-

Demand No.	Purpose	Amount (in ₹)
8	Taxation	21,71,35,000.00
18	Home	8,00,26,44,000.00
30	Disaster Management & Rehabilitation	67,26,79,000.00
TOTAL		8,89,24,58,000.00

House zahawm tak hian min pass sak ka dil e.

SPEAKER : Aw le, kan Minister zahawm tak Pu Lalchamliana'n a demand te hman tur –

Demand No.	Purpose	Amount (in ₹)
8	Taxation	21,71,35,000.00
18	Home	8,00,26,44,000.00
30	Disaster Management & Rehabilitation	67,26,79,000.00
TOTAL		8,89,24,58,000.00

te hi House-ah pass a rawn dil a. Remti apiangin, 'remti ti' rawh ule. (**Memberte:** Remti.) Remti lo kan awm em? Kan awm chuan 'remti lo' ti ula. (*Memberte remti lo an awm lova.*)

Awle, Minister zahawm tak Pu Lalchamliana demand te –

Demand No.	Purpose	Amount (in ₹)
8	Taxation	21,71,35,000.00
18	Home	8,00,26,44,000.00
30	Disaster Management & Rehabilitation	67,26,79,000.00
TOTAL		8,89,24,58,000.00

House-in lungrual takin a pass ta a ni. (**Pu Lalchamliana, Hon. Minister:** Pu Speaker, ka lawm e.)

SPEAKER : Tunah chuan kan Dy. Chief Minister zahawm tak, Pu Tawnluia, kan sawihona te rawn wine-up turin kan sawm ve leh ang a. Sawifiah ngai a tih te a rawn sawifiah ang a, a demand te House-ah pass rawn dil nghal turin ka sawm e.

PU TAWNLUIA, DEPUTY CHIEF MINISTER: Pu Speaker, ka lawm e. Hei, vawiin niah ka department pathumte demand member zahawm tak tak ten rawn ngaipawimawhin in rawn sawi deuh vek hlawm a. Amaherawhchu, vawiin niah hian hun te a tlai deuh tawh a, kan duh ang erawh chuan kan react hman lo ang a.

Awle, Pu Speaker, a hmasa berin Demand No. 13 - DP & AR hi han sawi ka duh a. He department hi a lar vak lova, kan hriat vak loh emaw tih tur, mahse a sorkar lai tak kha a ni ang reng lawi a. Chuvang chuan, tawite emaw ka sawi ka tih hian ka lo sawi leh vak thin a. Engpawh nisela, DP & AR ina kan record dan chuan Mizoram sorkar hnuai group A, B, C, D tea sanction post hi a vaiin 71,663 kan nei a, tin, tuna post luah lai, service lai hi post 48,245 a awm a. Tichuan, post ruak (vacant post) hi 23,418 a awm a, kha kha information atan pawh kan sawi duh a. Pu Speaker, member zahawm tak tena hemi chungchanga an rawn sawi lan kha a tam lo bawk a ka han sawifiah hmasa lawk ang a.

Pu Vanlalhlana, North-I bialtu khan computer certificate chungchangah ‘NIELIT pekchhuah chauh sorkar ina a pawm; a dang pawm a nih loh avanga harsatna kan tawn’ a tih chungchang kha, sorkar hian he dan hi 2013 atang khan alo hmang tawh a, kan hmang chho zel a. Amaherawhchu, hun alo kal zel a, tunah hian institution hrang hrang tha tak tak a lo tam takah chuan department pawhin rawtna hrang hrangte kan dawn hnuah hian sorkar, cabinet-a thlen turin ruahmanna kan siam a. Tunah hian cabinet memorandum kan siam a, chutiang chuan institution hrang hranga computer certificate nei, eng class pawh kha pawm theih turin rawtna kan siam a. Cabinet ina min pawm sak chuan, helai kan harsatna hi chu kan thalaite, zirlai hna zawngtute awlsam zawkin an kal theih kan beisei a ni.

Tin, Pu Ngunlianchunga, Lawngtlai bialtu MLA khan ‘ATI-a furniture vel saw a ningnel deuh e’, a ti a, sorkarin kha kha kan hria a, department levelah kan secretary ho pawhin an sawi thin a. Kumin financial year tharah pawh hian eng emaw chen chu en theih dan tur .. **(Pu Ngunlianchunga:** Pu Speaker, *clarification*, khawngaih takin. Ka pu, kha hostel building awm tawh furnish loh kha, ‘furnish ni sela training ho thlenna atan a tangkai dawn em mai’ tih kha ka sawina zawk a ni e.) Awle, kan lo chhinchhiah dawn nia. Kan institution a saw a tha khawp mai a, a building leh a layout hrim hrim a saw a zahpuiawm lova, state dang atangte pawhin Administrative Training an rawn nei thin a. Chutiang chu a ni a, a facility pawh saw a tha a. Hostel tuna kan member zahawm takin a han sawi pawh kha, a dik a, kan hria a. Chutiang tur chuan tuaihnum deuh pawh kan lo tum ang e.

Tin, Pu Lalduhoma, Serchhip bialtu zahawm tak khan ‘CSS zirchianna group-in an zirna kha, ‘engnge, a bawhzuina te a awm em?’ a ti a. CSS te hi kan committee study group hian ‘an service matters hi eng tia tih tur nge; department hrang hranga mi kha’ tih kha, cabinet ina zir tura a tih angin kha committee khan a zir chho a, an zirchianna

chu cabinet-ah pawh ngaihtuah a ni tawh a. Tichuan, cabinet khan study group ina an report kha a implementation, a kenkawh dan tur kha ‘finance department nen lo sawiho leh se la, chutiang chuan cabinet-ah ngaihtuahho turin lo bawhzui sela’ kan ti a ni.

Tin, Pu Lalduhoma khan, ‘PE/MR te an rawih hun chhung a tawp a, an rawih nawn lehna appointment letter pek leh an ni tawh em; an seniority kha engtingge’ a tih kha, hei hi kan hria a, sorkarah kan awm hlawm tawh thin a, kan hre vek a. Chutah chuan, tunhma chuan ‘MR - Master Roll’ kan ti a, tunah chuan ‘PE - Provisional Employee’ kan ti a; hengte service hi kumkhat dan zelah renew a ni a. Hei, DP & AR ah kan awm a, department hian financial year tawp dawn hian renew an rawn dil a, renew zel a ni a. An seniority kha tunah chuan register ve vek tawh a ni a, ‘harsatna a awm lo e’ tih kha ka chhanna a ni a.

Tin, wawiinah hian ka sawi duh leh pakhat chu - E-governance lamah hian centre point State te hian beiseina an nei sang a, keini pawhin theihtawp chuan tan kan la a. Amaherawhchu, tan lak chak a har zia kan hriat karah hian kum kal mek, tun financial year tawp turah hian Group-A officer chin chuan online-leave application bul an tan tawh a, hei hi zau zawka kenkawh tum a ni. He hmalaknaah hian awlsam zawkin leave dilna hi a kal chho zel tawh ang a. Tin, pilot project anga kan kalpui kha a tihtlak viauin, a zawngchhang tlak viauin kan hria a, chhunzawm zel kan tum a ni.

Tin, Digital File Tracking System (DFTS) hi hman tan a ni a. Heta DP & AR - Civil Service Wing-ah hian an hmang tawh a, kumkhat lai chu; wing dangah pawh hian ‘hmang zel teh ang u’ tiin kan kengkawh chho dawn a.

Tin, a dang lehah chuan e-PRAN (e-Performance Appraisal Report) sorkar hnathawkte ‘ACR’ kan tih thin hi online-in MCS officer te hian kumin chhung kha chu an ti chho a. Tunah pawh hian Financial Year, 2022-23 reporting chu online-a tih a ni tawh a, awlsamte in a kal chho a ni tih kha kan information-ah ka han sawi a.

Tichuan, nichina ka sawi ang khan, computer hi central order-ah phei chuan ‘Group D chin chutiang khatiang’ tih te a awm a. Amaherawhchu, kan tlin leh tlin lovah kha kha chu kan kal turah ngai ila.

Tin, kan hriat angin Covid-19 hripuiin kum hnih zet zawt min thutchilh a, office pawh kan kal hleithei lova. Chuvang chuan, competitive examination pawh MPSC-in a conduct thei lova, a hnuaia mite pawhin kan conduct thei lova. Chuvangin tunah hian DP & AR hian ngaihtuahin, ‘upper age kum hnih chin tal hi chu relax ni thei se’ tiin rawtna kan siam a. Chu chu ngaituah turin kan pulut bawk a ni.

Tichuan, kan sawi ang khan CSS ringawt pawh hi 10,654 kan awm a. Chutah chuan employees te chu department 16-ah kan awm a. Khanga staff-te regularization

emaw kha chu study group-in a zir chho a, chu chu Cabinet-in a ngaihtuah tawh hnuah Finance te nen a implementation hi 'rawn zirchiang leh rawh se' ti khan kan dah chho a, hmasawna pawh kan nei chho zel turah kan inngai a ni. Tikhan DP & AR chu ka duh tawk hrih mai ang.

Pu Speaker, DP & AR-ah khan thil thar dang pakhat sawi tura ka chhinchhiah a awm a. Chu chu 'Mizoram Right to Public Service Act, 2015' implementation hi department hian kan zir chiang a. 2015 a mi daih tawh kha a ni chungin, tihian hman tur ang chuan rules te pawh siam ve a ni a. Amaherawhchu, a implementation-ah kan kal chak thei lova. Tunlai hian DP & AR Secretary hovin committee te neiin kan thu chho a. Hei hi a tul angin sawrkarin ngaihtuah turin Cabinet-ah te pawh la chhawp chhoh a ni ang a. Secretary, DP & AR hnuaiah khan department hrang hrangte kha thun tur ang kha kan zawt mek a, thut mek a ni. Hei hi a pawimawh a tunlaih chuan. A awmzia takah chuan kan thil dil sorkarin mipui tana kan service, mipui tana kan tihur *entirnan*: license chi hrang hrang dilte emaw, permit dil te emaw pawh khatianga khan tikhawtlai lova, a hun tiam chhungah khan tha taka tihpuitlinna tur scheme chu a ni a. Hei hi hmasawna ropui tak tur a niin kan ring a. Khatiang khan DP & AR-ah hian hmasawna turin 'hma kan lo la ve mek e' tih kha House information ah ka sawi ve a ni e.

A dawt leha Pu Speaker, ka sawi leh duh chu - UD & PA chungchang hi a ni a. Khawpui changkanna leh tihhmasawn mai bakah khawpui chhunga cheng 'mi-hnuaihning zawkte' ti ilar, tawngkam mawi lo ni suh sela, chungte harsatna zuk sutkianna lampang chu hetah hian kan enkawl ve a. Department hian theitawp a chhuah chho a ni a. Tin, chumi hnuaiah chuan khawpui enkawl na leh tihchangkanna kawngah khan town planning te enkawlin bawhlawh lampang leh a sawngbawl na thlenga project hmangtein hma lak chhoh ve a ni a. Chuta ka han sawi duh a chu -kan *solid-waste management centre* chungchang hi a ni a. tunah hian Aizawl leh Kolasib ah hian solid-waste management centre hi a function tawh a, Lunglei leh Champhai-ah an sa mawlh mawlh bawh a. Amaherawhchu, environmental clearance neih te hi a lo har khawp mai a, churang chuanin duh angin kan kal chhak thei lova. Chubakah chuan khawpui 5, district headquarter - Khawzawl, Saitual, Hnahthial, Serchhip leh Mamit-ah te hian tunah hian land development hna chu nuai ₹60 bawr vel man tih zawh tawh a ni a. Tichuan, solid waste management hi *National Green Tribunal* te hian an ngaipawimawh a, chutiang chuan instruction leh duhdan te sawrkarah an rawn sawi chamchi a, keini pawhin kan ngai pawimawh a. Hei, kan hon. Chief Minister pawh hian a ngai pawimawh a, finance enkawltu a nihna angin tunah hianin kan budget-ah pawh hian crore ₹50 zet chu solid waste management lam atan hian min dahsak a, kan lawm em em a. Chutiang chu tuna solid waste management hi kan ken kawh lai leh, kan hmabaka kan kalpui dan tur a ni tih kha kan sawi duh a ni.

Tin, Pu Speaker, keini UD & PA atang hianin hna eng emaw zat, hmasawna ruhrel hi kan han thawk chho a. Tun kum kal mekah hian Khawzawl-ah Bawlvawm playground te kan sa zo tawh a, a pavilion kan sa zo tawh bawk a. Tin, Tuikhuahtlang-ah hian ‘retro-fitting’ kan ti a, Central YMA Office bulah sawn, chungte pawh chu kan zo tawh a. Khatiang khan Champhai - Zotlang leh Zote, Tlangsam kal tlanga kal kawng te kan siam a. Tin, Chanmari, Ramhlun North leh Chaltlang junction improvement te kan ti a, tun kum kal chhung khan covid karah pawh kha tiang khan hma kan la ve a ni.

Tin, Pu Speaker, ‘Housing for All’ kan ti a, hei hi chu RD pawh hian rural lamah an ti a, keini hian urban-ah kan ti a. Tichuan, tunah hian *Housing for All*-ah hian theih tawpin hma kan la mawlh mawlh a. Pu Speaker, a awmzia chu - keimahniin heta sum kan hman zawh dan a zirin central atangin a lo kal chho mai a, tuna kan kal zelnaah hian in 1000 zet zawt hi chu sak zawh a ni ve tawh a, in 3900 zet zawt la sak zawhloh a awm bawk a. A tah-tawl te te - 1st installment, 2nd installment, 3rd installment tea lo kal tur a ni a. Tuna kan hmabakah hi chuan in 34,476 a ni tih kha information atan kan sawi duh a. Tin, a kalphungah hian central-ah kan select tawh sa kha kan vawm thla a, tichuan kha kha a portal-ah an lo thun a, tihdanglam theih tawh pawh a ni lova, zuk thlak danglam theih pawh a ni tawh lova. Chuvangin, sorkar hmasa lama mite pawh kha khatiang khan tihdanglam lovin a awm a. Amaherawhchu, khata sum lo kal dan a zir khan a payment erawh kha chu a tah tawl te te khan a kal a ni.

Tin, tunah hian, ‘*Swachh Bharat Mission - Urban*’ kan ti a, hei hi nichina bawhlhawl kan sawi sanitation lam te pawh a kaw k vek ang a, khatiang khan UD & PA hian kan keng kawh chho ve a, chumi atan chuan *Faina competition* Zoram pumpuiah, district level-ah te khan kan siam thin a, chu chu tunah hian a tangkai hlein kan hria a. Tin, bawhlhawl paih, a tihfai leh a sawngbawl hi chu AMC hian Aizawl ah hi chuan a pumpuian kutah an la tawh a, chutiang chuan anni hian an kengkawh a ni. Tin, SEDP, ‘Socio-Economic Development Policy’ kan han tihah hian UD & PA hian trade chi li kan nei ve a; ‘home composing’ an ti a, chu chu leitha han siam - nuin an mahni in bula an siam te, ‘waste to wealth’ an ti a, paper chhia te, puan chhia te khang atanga sum chang thei thil han siam te kha a ni a Street sweeping leh street vending te pawh a ni a, chhungkua 828 hnenah ₹25,000/-, 1st installment kha UD & PA hnuaia ‘urban poor’ kan tih, khawpuia mi harsa zawkte dawmkannaah khatiang khan hma kan lo la ve a ni.

Tin, ‘PAHOSS’ kan ti a, hei hi kan hriat theuh angin Covid avang khan kan chhunzawm hrih lova, a sum hi chu nuai ₹4,000 chuang treasury ah K-deposit in a la awm a. Amaherawhchu K-deposit a awm rih anih avangin a tak takin hma kan la thei hrih lova Tunah hian parking house sak zawh tawh 11 kan nei tawh a, chutah chuan Aizawl-ah hian 4 dang hawn leh tur a awm a. A vai hian a tangkai em em a, ‘kan hman tangkai tawh a ni’ tih kha ka sawi duh a.

Nichin khan han sawichhuah te pawh kha a awm a; parking house tur a ni a, garage tur a ni lova. Nakinah chuan mumal takin a guideline kan siam te pawh kha a ngai dawn a ni. PAHOSS hi kal zel tur ni mah sela, ‘sum harsatna avangin tunah chuan ‘kan la payment rih lo’ tih laia khan a chiang mai awm e.

Tin, kan hriat ang khan, ‘Aizawl Sustainable Urban Transport Project’ kha, hei kan khing tawh a. ADB - Ministry of External affairs kaltlang khan sum te kan puk tawh a, hmanah hetah kan sawi tawh a; kha scheme kha a kal zel a. Tichuan DPR, a ruaitu tur leh tuna kan rawih kan konsultant te pawh khan comprehensive plan te, DPR siam te leh a building te an buaipui mek a, tunah hian an kal chak viau a, ‘engnge kan tih hmasak anga, eng tiang takin nge hma kan lak ang’ tih state sorkara department nen hian kan sawiho mek a. Rin aiin kan PMC te pawh hian hma an la chak a. Chu chu tuna kan dinhmun a ni.

Tin, UD & PA hnuaiyah hian hriat angin ‘SIPMIU’ kan ti a, he program hi a kal zel a. Tichuan, Sewerage Treatment Plant, Chite leh Dihmunzawl 132 kV sub-station leh ‘SPADA’ kan tih te hi tunah hi chuan mumal taka inaugurate niin, an function tawh a. Sewerage Treatment Plant Chite Lui a khawi emaw laiah khuan pipe lo pawp deuh te a awm a, khang kha kan la hman than loh avangin, zunram thiarna kha pipe-a a kal khan khawi emaw laiah khan pawnhhiate leh lehkha chhia emaw, thil fei deuh pipe hnawh thei te kha a lo awm a. Chuvangin, a main hose eng emaw laite kha rimchhe khawpin a lo awm hman a. Tunah chuan siamfel vek tawh a ni a, a hman dan te pawh kan zir chho ve zel a, tunah hian ‘tha takin a function ve e’ tih kha ka han sawi ni sela.

Tin, ‘*Smart City*’ hi, hei chen hi Aizawl-ah hian a han kal chhohpui ve ta a; keini hi kan tan tlai deuh hlek a. Tunah hian kan project tam takte chu zawh tawh a ni a, thawhlai mek a awm bawh a. Tin, la tender chiahloh, tender thei tep te pawh kan nei a. Tunah hian department, a kengkawhtu ten theih angin an bawhzui ve zel a ni.

Hmanniah kan resolution-ah pawh khan a awm a, Smart City project hnuaiyah hian kan thalaite infiamna lama an changkanna tur leh hmasawn theihna turin playground, a bikin indoor stadium te, khatiang zawng khan hmalakna eng emaw zat kan nei a. Chuvang chuan, hemi chungchangah hian thei tawp chhuahin hma kan la zel dawn a ni. Tunah hian a term dik takah chuan June thlaa tawp tur a ni a, ‘an extend zel ang em’ tih erawh chu kan hre lova, Extend turin kan CM hian a nawr char char a, khatiang khan a kal chho a.

Tin, ‘Laldenga Cultural Centre’ kan tih te pawh hi hma kan la nei thei lova, mahse kan beisei danin hun reiloteah kawng a awm mai kan beisei a ni. Tin, UD & PA ah hian kumthar atan bika kan program inngahna pakhat chu, ‘AMRUT-2’ an ti a, hetah hian allocation an rawn siam a, chutiang chuan tunah hian scheme tam tak kan thawn thla ta a, kha kha he laia committee leh kan CM hoa lo approved tawh anih avangin

khulamah chuan tlang turah kan ngai a. AMRUT-2 hnuaiiah hian nasa takin hma kan la dawn a, khawpui tihthianghlimna leh eng emaw scheme hrang hranga kha chu vawiin niah kan sawi seng lo ang a.

Tichuan, ‘Housing for All’ chungchanga thil pakhat han sawi ka duh chu - Serchhip bialtu niin ka hria a, completion certificate a thlalak nenarawn tiha kha, kha kha hriat sual palh a awm a, hmana sorkar hmasaarawn tih tawh niin a lang a. A chhan chu, ‘Housing for All’ a beneficiary te hnena Award an pek dawn khan, select tawh zawng zawng tel tura an sawmna ang kha a ni a. Anmahni ina an tih tawha lawmthu sawina information a tana beneficiary te lehkhaha kan thawn thlak tawhte tihlanna pawh ani ang chu, assurance atan te pawh a tha ang a, chutiang atan chuan an siam a. Eng emaw chenah hriatsual palh a awm deuh hlek kan hlau a, ka han sawilang a ni.

Tichuan, kan lawmna em em chu nichina kan sawi tawh ang khan, kan budget ah crore 650 zet zawta Solid Waste Management Centre atana kan dah kha a ni a, Finance Minister, kan CM nib awk hnenah pawh lawmthu kan sawi a. Tin, he *Smart City Project* hnuaiia hma kan lakna tam tak a awm bawka, abik takin sawlai *Aizawl New Market* sak saw a lar hle a, mi pawhin kan ngaihven a. A khirh hle a, Geological & Mining te nen engkim mai zirchian a ngai a, duh angin a kal chak lova. Chutiang karah tuna hian January tirtate ang khan contractor te pawhin hna an tan a, an thawk ve mawlh mawlh tawh a. Saw saw mi thenkhatin bazara lo thu thinte an kawm thin a ni ang a, report te pawh kan dawng a. Tichuan, keini pawhin an mahni leng vek turin seat kan siam a, chutiang chuan kan sa a, an lawm em em a, an nghakhlel a. Sawlaia lo thu thinte pawh, kan han tih puitlin hunah chuan ‘Aizawl timawitu a ni ve ang’ tih kan ring a. Chutiang chuan helai hi a lar deuh bik avangin ka han sawi bik a ni chu, Pu Speaker.

A dawt lehah chuan, PHE hi kan kan hriat theuh angin a hmalakna hi hmunhnihah a in then phawk a, Urban (khawpui lian deuh deuh ho) leh Rural (thingtlang khua) scheme tein a inthen phawk a. Vanneihthlak takin JJM - Jal Jeevan Mission hi central hian khaw tin huapin hma arawn la chho ta a, chu chu keimahniiin kan han kenkawh chho zelnaah hian, tunah hian khawper (hamlet) hi 51 lai a awm a, tin, khaw pangai 677-a awm bawka, a vaiin khaw 728, hemi thingtlangah hian tui anmahni kham khawp mai bakah an in chhunga connection pekna tur scheme a awm a, chu chu kenkawh lai mek a ni a, tunah hian connection pawh kan ti chho ve zel a. Tichuan, tunah hian kan project-ah hian hamlet zawng zawng nen kan han ti chho zel a, khaw thenkhat tui harsatna zualah chuan luipui tui solar pumping in kan dawt a, a thenah chuan gravitation, a sang atanga a hniam zawka pawh theihin a awm a, chu chu kan tih dan phung a ni.

Tunah hian connection hi a vaia 1,33,060 pek turah hian pek tawh hi chu 75%, in 1,00,726 vel pek tawh a ni a, a bak 32,330 hi December thla chhung hian central-in siam zawh tur a tih angin kan bei char char a, a tan pawh kan tang a, kan theih leh theih

loh chu a hunin rawn hril turah kan ngai a. Heta kan target chu - In tin, mimal tinin litre 55 nitin an dawn theih turin he scheme hi kalpui a ni a, chu chu thingtlang lama kan kalphung a ni a. Hetah hi chuan pawisa chu kan thawh a, UC kan pek atang hian a lo kal mai a, tichuan state share tur pawh kha kan CM-in min hriatthiampui a, a ngai pawimawh a, a matching share pawh kha kan pe ve mai ang a. Tunah hian kan hna hi chutiang chuan a kal chho a, kan lawm viau a ni.

Tichuan, ‘town’ kan tih District Headquarters-te bakah Aizawl leh Lunglei khawpuite kha Urban scheme hnuai hian a kal lo thei lova, JJM khan a cover ve thei lova, khaw lian annih vang khan. Vanneih thlak takin AMRUT-2 ah hian hma kan la thei dawn hlauh a, a lawmawm kan ti a, NABARD atang tein scheme kan nei ve thei thin a. Tin, *Special Assistance to Capital Expenditure* atang te pawhin kan hmu thin a, chutiang chuan khaw lian deuh deuh chu funding sourc te pawh a awm thin a ni. Tunah hian NABARD scheme 15, a hnuhung ber nen chuan a ni a, tunah hian a chanve kan zo tawh a, a chanve vel hi thawh mawlh mawlh a ni a. Hmanni lawkah khan NABARD atang hian scheme pahnih - Farkawn solar pumping leh Ngaizawl, Champhai North pawh te min rawn approve sak a, hei hi tun financial year 2022 – 2023 chhung a mi a ni a. Chutiang chuan, tunah hian scheme 15 lai NABARD hnuai hian kan nei a nih chu. Hei hi tunah special assistance kan hmuh atangte pawhin hma kan la chho dawn mek a. Nichina kan sawi khawpuia hmalakna tur kha chu AMRUT-2 hnuai hian kan inngat ta a, hei hi *Ministry of Urban & Housing Affairs* atangin a ni a. Hetah hian a pawisa allocation pawh kan siam tawh a. A vaiin cheng nuai 14503 lai AMRUT-2 atangin Mizoram-a pek tura ruahman a ni. ‘Hetah hian engnge in thawh dawn, rawn siam rawh u’ an ti a, scheme thawh tur kan zu vawm thla ta a, chu chu an rawn approve ngei turah pawh ka ngai a.

Pu Speaker, helai hian kan CM pawh a rilru a zauin Zoram mipuite tan hma a ngai em em mai a. *Augmentation & Extension of Greater Serchhip Water Supply Scheme*-ah pawh hian cheng nuai 580 deuhthaw kan dah a ni. Nichinah khan bialtupa khan a sawi a, a lo hre tawh zawk a ni awm e; Pune atangin a khawl pawh a lo kal tawh a ni. Chubakah chuan Biate khua tan pawh hmanni lawkah kan zo na a, a la famkim lo deuh a, cheng nuai 135 vel kan ruahman a ni. Tin, Thenzawl pawh hmanni lawkah kan tipuitling tawh a; an nei tha tawh viau naa, Thenzawl - *Augmentation & Extension* atan cheng nuai 280 zet kan dah a ni. Opposition bial a ni emaw, a nilo emaw kan sawi lova Aa tul kan tihah chuan kan sorkar hian hma a la zel a ni. Nichinah khan West I bialtu pawh khan Sairang chungchang kha a sawi a. Sairang-ah phei chuan cheng nuai 912 lai kan dah a ni. Tin, Vairengte - ₹312 lakhs, Kawnpui - ₹228 lakhs, Kolasib - ₹601 lakhs dah a ni baw. Chutiang chuan Bairabi tan kan dah baw a. Tin, Aizawl-ah pawh hian tuna kan existing scheme tihpuitlinna tur ₹900 lakhs zet kan dah a. Tin, Aizawl-a tuizem siam nan chutiang chuan kan dah chho baw a ni.

Tin, Lawngtlai lamah pawh *Exisiting Greater Water Supply Scheme* improvement atan ₹460 lakhs zet kan dah a, Mampui pawh kha khan a cover tawh maithei a ni. Tin, Champhai tan ₹700 lakhs chuang kan dah bawk a, tuna mi belhchhah nan khian; Tin, Khawzawl lamah tlem dah a ni bawk a; Lunglei - *Extension of Distribution System* hnuaiah tui pipe chhia repair nan ₹990 lakhs leh, Tlabung-ah ₹790 lakhs zet a awm dawn bawk a; tin, Saitual-ah pawh chutiingin. Aizawl-ah hian ‘Urinal Septate Treatment’ kan ti a, hetah pheh hi chuan ₹3,900 lakhs zet a awm a ni. Hei hi financial year thar atana kan ruahmanna a ni a. Kan thawh mawlh mawlh bakah hetiang hian hmachhawp kan nei a ni.

Tin, Pu Speaker, Champhai - Keilungliah Lui, a khaw mawngah khian a awm a. Kan CM te nena Champhai-ah High School leh Middle School kan kal lai chuan naupangin Keilungliah luidungah hi kan ramvahna a ni thin a. Department-in tunah hian Keilungliah Lui khuapin, ‘*Conception of Reservoir on Development of Re-creation Centre, Keilungliah*’ tih a ni a. Nikum April thlaah khan ka kal a, ‘kumin hian in zo hman ang emaw chu?’ ka ti a; “Kan tang em a, kan zo hman ang”, an ti a, an zo hman a ni. Kumin furah khan tui a tling hman a, tunah khian a liam zawih zawih tawh a, a tihpuitlin nan chuan pawisa kan mamawh belhna kha a la sang khawp mai a ni. Chuvang chuan, kan CM-in ₹3,897, lakhs *Keilungliah project* tihpuitlinna atan budget-ah sanction min pe tawh a, March thlaa hawn tumin kan inbuatsaih theih dawn a. Khi khi *Champhai timawitu* a ni dawn a ni. Chungte pawh chu Pu Speaker, kan hriat tlan atan ka han sawi duh a ni.

Tuna thawh lai mek kan neihah hian NECIT hnuaiah Tawitlang atanga kan tui dawta kha 75% vel te chu thawh tawh a ni a. Tin, Pu Chama bial North Vanlaiphai leh, Mamit pawh a bialtupa khan a ngaipawimawh a, kan thawh lai mek a ni bawk a, AMRUT-II ah khan a awm bawk si a; Mamit kha in vanneih khawp a ni.

Tichuan, Pu Speaker, tunhnai maiah khan JJM hnuaiah sanction thar kan nei a, chungte chu - Riangtlei Water Supply Scheme (Solar Pumping) te, Kanan Veng - Kawnpui (National Highway leh Durtlang Veng inpawhna kawngdung Mualvum atanga pek thlak tur) te, Keicham -Bilkhawthlir te, Zero Point - Saihapui VK (Kolasib atanga tui pump thlakna tur) te an ni.

Tin, tunhnai maiah ‘*JJM-Additional*’ kan ti a, kan beisei ngam meuh loh, mahse minrawn pe ta tlat mai a, kan lawm hle a ni. JJM hi a khua anga kan thawh zawh tawh chu khaw 263 a ni a, la pek hmabak kha khaw 465 a ni. Tui connection hi tunah hian 98,460 zawh tawh a ni a, ahma khan ‘1,00,000’ tia report a ni. Hei hi chu nitin a pung ve a, chhungkaw nuai khat chuangin connection an nei tawh a nih chu. Tichuan, kan la hmabak chhungkaw zawng chu 34,500 zet a ni. Khatiang khan thingtlanga kan hmalakna pawh vawiin thlengin hmalam panin ke kan pen thei a, Pu Speaker, kan lawm viau a ni.

Pu Speaker, zawhna neuh neuh kha chu a awm a, ka chhang tawh lo mai ang a. Engpawh nise, note kan nei nei a, heng hi naktukah kan pe tawh mai zawk ang che u aw; in lo hrethiam mai dawn nia.

Han sawi hi chuan kan tui ve a, kan insum theih thin lova, keini ho hi chu. Mahse a tul zualah information atan chuan kan react ang a. A then hi chu in awm lai ngeia han sawi te pawh ka chak nain, min hrethiam mai dawn nia.

Kan Home minister khan 'dar 9 ah te chuan kan zo thei ang chu maw' kha a ti a, khatiang khan tum ta ila a tha ang e.

Pu Speaker, ka demand-te –

Demand No.	Purpose	Amount (in ₹)
13	Personnel & Administrative Reforms	5,06,95,000.00
25	Public Health Engineering	4,80,98,40,000.00
46	Urban Development & Poverty Alleviation	5,91,85,16,000.00
TOTAL		10,77,90,51,000.00

House pass-pui atan ka rawn ngen e. Ka lawm e.

SPEAKER : Awle, Dy. Chief Minister zahawm tak Pu Tawnluia'n a department enkawl te –

Demand No.	Purpose	Amount (in ₹)
13	Personnel & Administrative Reforms	5,06,95,000.00
25	Public Health Engineering	4,80,98,40,000.00
46	Urban Development & Poverty Alleviation	5,91,85,16,000.00
TOTAL		10,77,90,51,000.00

House-ah pass a rawn dil ta a. Pass remti apiangin, 'Remti' ti rawh u le. (**Memberte:** Remti) Remti lo kan awm em? Remti lo kan awm chuan 'Remti lo' ti ula. (*Rem tilo an awm lova..*)

Awle, tunah chuan Dy. Chief Minister zahawm tak Pu Tawnluia hna chanpuala demand te:

Demand No.	Purpose	Amount (in ₹)
13	Personnel & Administrative Reforms	5,06,95,000.00
25	Public Health Engineering	4,80,98,40,000.00
46	Urban Development & Poverty Alleviation	5,91,85,16,000.00
TOTAL		10,77,90,51,000.00

te chu House-in lungrual takin a pass ta a ni. (**Pu Tawnluia, Dy. CM:** Pu Pu Speaker, ka lawm e.)

SPEAKER : Awle, vawiina kan tih tur kan business chu kan zo leh ta a, kan chawl leh rih ang a. Naktuk February Ni 28, 2023 (Thawhlejni) chawhma dar 10:30 ah kan thukhawm leh dawn nia.

Sitting is adjourned. (**8:59 PM**)

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR FIFTEENTH SITTING ON TUESDAY, THE 28th FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

FINANCIAL BUSINESS

DISCUSSION AND VOTING ON DEMANDS

2. **PU ROBERT ROMAWIA ROYTE**, Minister to submit to the vote of the House various Demands under his charge.
3. **PU C. LALRINSANGA**, Minister to submit to the vote of the House various Demands under his charge.
4. **PU ZORAMTHANGA**, hon. Chief Minister to submit to the vote of the House various Demands under his charge.

**DISCUSSION AND VOTING ON SUPPLEMENTARY
DEMANDS FOR THE YEAR 2022-2023.**

5. Discussion and Voting on Supplementary Demands for the year 2022-2023.

LEGISLATIVE BUSINESS

Bills for introduction, consideration and passing

6. **PU ZORAMTHANGA**, hon. Chief Minister to beg leave of the House to introduce "The Mizoram Appropriation (Supplementary Demand for Grants 2022-2023) Bill, 2023".

Also

to introduce the Bill

to move that the Bill be taken into consideration

AND

to move that the Bill be passed.

7. **PU ZORAMTHANGA**, hon. Chief Minister to beg leave of the House to introduce "The Mizoram Appropriation (Demand for Grants 2023-2024) Bill, 2023".

Also

to introduce the Bill

to move that the Bill be taken into consideration

AND

to move that the Bill be passed

LALHMAHRUAIA ZOTE
Commissioner & Secretary

* Please see Bulletin Part-II No. 288, dated the 15th February 2023 for Demands to be moved by Ministers.

SPEAKER : *In dawhtheih zia chu mi zawng zawng hriat ni rawh se, Lalpa chu a hnai e.* - Phillipi 4:5

Chapona chuan inhauna mai a tichhuak a, Thunun that mi hnenah erawh chuan finna a awm. - Thufingte 13:1

A tawp berah chuan Lalpa ah leh a chakna thahruiah chuan thiltihtheihna neiin lo awm rawh u. - Ephesi 6:10

QUESTIONS & ANSWERS

Tunah chuan *Zawhna & Chhanna* ah kan kal ang a. Tan hmain - Member zahawm tak Dr. K. Beichhua chu chhungkaw lam harsatna avangin vawiiinah House a kal thei lova, Pu Zira hi a bial atangin a lo chho mek baw k a, Mamit bialtu hi.

Starred Question No. 241 - zawt turin Member zahawm tak Pu Lawmawma Tochwawng ka sawm e.

PU LAWMAWMA TOCHHAWNG: Pu Speaker, ka lawm e.

Ka zawhna Hon. Minister, Health & Family Welfare Department chhan atan – “Mizoram State Cancer Super-Speciality Hospital dinna turin eng chen nge hmalak a nih tawh?” tih a ni e.

SPEAKER : A chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, Member zahawm tak Pu Lawmawma Tochwawng zawhna chhanna tuna kan pek luh bakah hian nimina thil thleng a awm avangin, han chhan belh hlek, zia k si, kan dah hman si loh a awm a.

Mizoram State Cancer Super Speciality Hospital & Research Centre, Zemabawk, Aizawl-a din turin Detailed Project Report thehluh a ni a, Ministry of Finance (Economic Affairs), Govt. of India leh Japan International Cooperation Agency ten sawihona tam tak an neih hnuin, nimin khan Japan International Cooperation Agency leh India sorkar aiawhte khan an sign fel ta a, a ropui khawp mai a. Hemi atan hian cheng cheng nuai 70,000 dah a ni. Loan agreement hi Ministry of Finance office North Block, New Delhi-ah ziah niin, India sorkar aiawh hian Pu Speaker, Rajath Kumar Mishra, Addl. Secretary, Deptt. of Economic Affairs, Ministry of Finance-in hming a zia k a, Japan sorkar aiawhin an Chief Representative, JICA-in hming a zia k hnan ve thung a. Inremna ziah lai hian Japanese Ambassador to India Pu Suzuki Horosi pawh a awm ve nghe nghe a ni. Mizoram sorkar aiawhin keini pawh kan intir thla a, a hriatpuitu tur, Director, Mizoram State Cancer Institute leh khu laia kan Project Coordinator, kan OSD-ten an hriatpui a, hei hi thil lawmawm tak, Mizoram-ah chuan

Health hnuaiia single project lian ber tur anga ngaih kan hlawhtling hi a lawmawm kan ti a, chu chu zawhna kan chhan laia awm si lo a ni a, Pu Speaker, min hrethiam dawn nia. “Eng chen nge hmalak a nih?” tihah khan definite deuhin a chhan theihin ka hria a, ka han belh a ni e.

SPEAKER : *Zawhbelhna* a rawn awm dawn hmel a nia; an phar nual mai.

Awle, *Zawhbelhna* zawt turin Member zahawm tak Pu Lawmawma Tochwawng, a zawhna neitu ka sawm e.

PU LAWMAWMA TOCHHAWNG: Pu Speaker, ka lawm e. Ram pum huap lo deuh Lunglei lam concern -

- i) Zobawk PHC saw tih changtluna, thum chak tumna a awm em?
- ii) Tun hnaiah Health Services kaihnawih lian tham deuh Lunglei-ah thawh a awm em? A awm chuan engte nge?

SPEAKER : *Zawhbelhna* - Pu Vanlalhlana ka sawm e.

PU VANLALHLANA : Pu Speaker, ka zawhbelhna hi tlemin a kal hrang deuh a, kan Minister pawh hi a kal kawi ve deuh thin a, a hrethiam tho ang chu maw? Ka *Zawhbelhna* –

“National Health Mission hnuaiiah hian advertisement tel lovin Dental Surgeon lak a ni em? Engzat nge lak a nih?” tih a ni e.

SPEAKER : *Zawhbelhna* - Pu C. Lalmuanpuia ka sawm e.

PU C. LALMUANPUIA : Pu Speaker, ka lawm e.

Ka *Zawhbelhna* hi tuna kan Minister zahawm tak chhanna nen khan a inmil deuh thovin ka hria a, mahse a dang hi a la awma ka hriat avangin -

- i) Japan nena thawh dunna tur Japan International Cooperation Agency (JICA) project kha kalpui tan a ni taw hem?
- ii) Engtikah nge tan beisei a nih?
- iii) A project amount engzatnge? Engnge a tum ber?

SPEAKER : Ngawi rawh, nichin khan a chhan nual tawh avangin Opposition lam ka la leh ang. Opposition kha nichin khan tunge phar kha? Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, ka lawm e. Ka *Zawhbelhna* hi NHM chungchang tho a ni a.

“NHM hnuaiia thawk mekte hi sorkarin an seniority ang zela dah ngheh tumna a nei em? Sorkar ruahmanna leh hmalakna min hrilh thei em? Tin, December 2022 atang hian NHM hnuaiia thawktute hian hlawh an la la lo nia hriat a ni a; pek thuai an ni dawn em?” tih a ni e.

SPEAKER : Awle, zawhna inkarkik tak tak te a ni a, a theih ang ang chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, opposition lampang hi duhsak hmasakah neih ta ila. Zawhbelhna hnunung ber, Member zahawm tak Pu C. Lalsawivunga zawhna chhanna chu -

Regularize te hi an tam tham khawp mai a, mi 2000 zet anni a, NHM hnuaiia hnathawk hi, category hrang hrang – Doctor, Nurse, Health Worker leh IV Grade te nen lam khan a ni a. Sum harsatna avangin han tih zung zung a harsa khawp mai a, sorkarin ngaihtuahna chu thui tak kan seng a ni.

Hlawh chungchang kha chu kan hre sual deuh maithei a, kar kal ta khan Pu Speaker, an hlawh zawng zawng – January thla thleng khan ‘an account-ah a lut vek tawh’ tih report ka dawng a. Chuvang chuan, hlawh lak loh a awm lova, February thla hlawh pawh hi tunah hian buatsaih leh mek a ni a, kan pe leh thuai turah beisei a ni. Chutih rual chuan hlawh la lo dang - Health Worker te, SEDP-teacher te pawh nimin khan an account-ah a lut fel vekin ka hria.

A dawt leha chuan – ‘NHM-dental’ tih lai bawr vel kha, NHM-ah hian category chi hrang hrang a awm a. Advertisement tih hleih theih loh - entirnan: dental bikah NHM tlem kan han lak, Pu Hlana zawhna kha chu tun March Ni 31-a tawp mai tur kha a ni a, han tih chiam dan kha a awm lova, chuvang chuan short duration atana han tih mai tur ang chi kha chu anmahni interview uluk taka neiha tih hi kan kal dan tlangpui a ni. Nghet tur ang chi, post rei tak chelh tur ang chi lo hi a awm teuh mai a, kha kha kan lak dan phung a ni.

A zawhna neitu *Zawhbelhna* hi ka han chhang lawk ang a. Pu Speaker, Zobawk, ama bial hi a vei khawp mai a Pu Lawma hian, PHC chungchang a ni a.

Tunah hian Lunglei nen a inhnaih avang hian doctor kan la dah thei lova, doctor regular pangngai emaw NHM atang tal pawha kan hmuh theih hun hunah PHC a function thei ang tih kha ka chhanna ni ta sela.

Lunglei-a hmalakna lian tham han sawi dawn chuan - Nimin piah lawk pawh khan Lunglei-ah Integrated Lab, Laboratory building lian tha tak kha hawn a ni a, tunhnaiah CMO office thar an nei tawh a. Chubakah PHC sak mek Lunglei District-ah

Lungsen leh Tawipui-ah te kan nei a. Hmalakna sawi dawn chuan - Civil Hospital tih changtlunna tur atan World Bank atangin nuaih 300 chuang kan dah chho leh mek a, a bak thil dang - Integrated Lab tih changtlunna tur te pawh a ni ang a, nuai 190 bawr vel Lunglei Civil Hospital tan kan dah a ni.

Pu Muanpuia zawhna kha – ‘Mizoram State Cancer Super-Speciality Hospital and Researched Centre’ kan tih kherna chhan hi, *cancer treatment* mai kha a ni lova, India ramah hian Super-Speciality Hospital chhuanawm ve ber te zinga thleng pha turin kan ngai a, tunah hian a funding system pawh hi 80:20 a ni a, a project cost pumpui hi nichina ka sawi ang khan vaibelchhe 70,07,00,000 a ni a, hetah hian vaibelchhe 560 hi JICA-in a tum dawn a, vaibelchhe 140 hi sorkar tum tur a ni. A project thawh hun chhung hi kum 6 tura ruahman a ni. Loan repayment period hi Pu Speaker, kum 40 chhung daih a ni. Chuvang chuan, rin aiin hahdam deuh hlekin kan kalpui theih kan beisei a ni.

Mizoram sorkarin sum a tum ve tur atana phalna pek vek tawh a ni a, commitment a awm tawh a. Kan Chief Minister hian a ngaipawimawh a, a ho hian JICA te nen kan sawiho a, chutiang chuan kan kalpui a ni. Kan tihhlawhtlin theih kan beisei a, bul pawh kan tan thuai turah kan ngai a ni.

Chutih mek lai chuan, tun sorkarin detail project report leh thil engkim kan tih hi, hmanni khan Lawngtlai West bialtu khan a rawn sawi ve tho a, ka awmlloh hlan niin ka hria a, ‘in hunlai’ ka han ti ang e aw; in hunlai pawh khan ngaihtuahna chu in nei ve tho mai thei e; mahse a tak takin tun tum ... (**Speaker:** ‘In hunlai’ rawn ti la, heti hian) sorkar ding mek hian ngaihtuahna kan seng a, a kaltlang hi Pu Speaker, a tam lutuk ringawt a, ‘a critical’ ti mai ila, ngaihtuahna rin aiin sen a ngai a ni.

A paltlang hi a buaithlak khawp a - Niti Aayog, Health Ministry, Home Ministry, External Affairs, DoNER, Finance Ministry zawng zawng a paltlang a ngai a. Chung chuan uluk takin an lo ngaihtuah a, chung zawng zawng paltlanga vawiinah hian kan han nei thei tur hi Pu Speaker, saptawngin ‘significant achievement’ a tling dawnin ka hria a. ‘Kum 2028-ah hian, tluang tea kan tih theih chuan’ an ti a, a satu tur Japan ho hian, ‘kan zo thei turah kan beisei e’ an ti a. Chu chu, hei, kan sorkar chhunzawm leh mai kan beisei ta viau bawk si nen, kan CM hian a hawng hman leh turah kan beisei khawp mai. Pathian thu thu phei zawng a ni e. Ka lawm e.

SPEAKER : *Starred Question* No. 242 - zawt turin Member zahawm tak Pu C. Ngunlianchunga.

PU C. NGUNLIANCHUNGA: Pu Speaker, ka lawm e. Kan Minister khan min han mention deuh kher avang khan khalai kha tlem ka han clarify lawk teh ang.

Kan hriat theuh angin nau piang tur pawh hian a pian hmain tih tur tam tak a awm a, chumi hnuah chuan nau a lo piang thin a ni. Vawiinah hian ‘Cancer Super-Speciality Hospital’ lo painna tur atan hian sorkar hmasa khan hma a lo la a, chu chu vawiinah hian a rah kan hmu ta a ni. Chu chu ka han sawifiah ve lawk a ni e. (**Speaker:** I zawhnaah lut rawh le.)

Pu Speaker, ka zawhna chu -

- a) Lawngtlai College Veng-a Lawngtlai Residential Sports School sak hnathawh mek hi, hnathawh zawh a nih hnuah tunge enkawl ang?
- b) Hnathawh zawh a nih hnuah enkawltu tur ruat fel a ni tawh em?
- c) Ni lo ta se, sum tam tak seng a hnathawh hi neitu/enkawltu awm lovin a awm mai dawn em ni?
- d) YLA College Veng Branch-te hnenah hian neitu nihna hlan theih a ni ang em?

SPEAKER : Chhang turin a chngtu Minister zahawm tak Pu Robert Romawia Royte ka sawm e.

PU ROBERT ROMAWIA ROYTE, MINISTER Pu Speaker, Pu Speaker, thuhma deuh te kha kan nei a. Kei pawh ka necktie awrh hi ila hmu lo maithei a, Pu Ngunlianbunga zawhna hi a pawimawh ka ti em a, uluk taka chhan ka duh a, churang chuan ka tih ngailoh vawiin chu necktie ka rawn awrh ve tlat a ni. A zawhna chhannate chu-

- a) Lawngtlai College Veng-a Lawngtlai Residential Sports School sak mek hi hnathawh zawh a nih hnuah Sports & Youth Services Department-in a enkawl ang.
- b) Ni tawh e.
- c) Enkawltu siam a ni ang.
- d) Sorkarin tangkai taka hman zui dan tur a ruahman ang.

SPEAKER : *Zawhbelhna* - Zawhna neitu Pu C. Ngunlianbunga ka sawm e.

PU C. NGUNLIANCHUNGA: Pu Speaker, ka lawm e.

Ka *Zawhbelhna* chu - tuna min chhannaah khan ‘tunge enkawl ang?’ tihah khan Sports Deptt-in an enkawl tur thu a sawi a. Tunah hian a building hi sak zawh tep a ni a, khimi atan khian coach, boys/girls warden leh principal, teacher and staff leh security-te lak tur a ni a, budget-ah hian khatiang lam hawi kha pakhatmah a awm si lova, engtikah nge khatiang enkawltu tur kha lak a nih ang? Kumina an budget hi nikum RE pawh cheng nuai 11,40,000 a pha lo a ni a; khalai kha mih han chhang leh se la ka duh a.

Tin, Pu Speaker, 29th March, 2022 (Friday)-a Lunglei Theiriatiat mual laihna kan Minister zahawm takin a va en tum khan, bialtu MLA leh Lunglei-a Sports & Youth officer-te leh Sports Council-a AE te tawiaawmin an kal a, ‘cheng nuai 30 ka lo dah ang e’ a tih kha, a dah ta em?

Tin, Pu Speaker, 2nd March, 2020 budget session-a, Thingkah YLA Information Office sakna tur (kan proceeding phrek 417) min assure kha vawiin thlengin pek a la ni lovin ka hria a. Khata pek tawh zat kha Sports Council atangin cheng nuai 4,60,000 leh tlem a ni a. Pu Speaker, helai proceedings-ah pawh hian a awm vek a ni. Kha kha, “min assure tawh angin, tun sorkar chung hian a pe thei ngei dawn em?” tih kha ka zawhbelhna a ni.

Tin, Pu Speaker, tunah sawn Mampui-ah Sports Complex tih leh mek a ni a, khua atang sawn min rawn phone ve reng a, bialtu kan nih ve naah, khawl pakhat hian a khawih leu leu a, nuai 5019 man lai kha a ni a, hengte hi chak deuh hleka thawh theih a ni ang em? He scheme hi PMJVK a ni a, guidelines ah khan a thawktu tur hi dah theih a ni lova. Sports & Youth Services atang hian post an create dawn em ni? Engtikah nge create siam a nih ang, tih ka zawh belh e.

SPEAKER : *Zawhbelhna* - Member zahawm tak Pu Lalchhuanthanga.

PU LALCHHUANTHANGA: Pu Speaker, ka lawm e.

Ka *Zawhbelhna* chu – “Tun term chung hian Hachhek Constituency huam chhungah hian Sport hmunhma engzat nge/engte nge siam a nih tawh? Sum engzat nge an sen? A vaiin sum engzat nge sen a nih tawh?” tih ka zawt e.

SPEAKER : *Zawhbelhna* - Pu Zodintluanga Ralte.

PUZODINTLUANGA RALTE: Pu Speaker, ka lawm e.

Kan Minister zahawm tak khan ‘Lawngtlai Veng-a Residential Sports School Sports & Youth Services in a enkawl’ tih kha rawn a sawi a. A lawmawm ka ti a. Amaherawhchu, hei hi District Council & Minority Affairs Department sum a ni a, Sports Council hi thawk tura detail mai kha a ni a, a hna an thawk a. “Heng hi sorkar level-ah District Council & Minority Affairs Department hian a enkawlna a hand-over tawh nge, kan Sports Minister hi a thu viau a, a sawi apiang hi a tlang nghal mai?” tih kha ka rawn zawh belh e.

SPEAKER : Aw le, zawhna a in karakik khawp mai a. Lawngtlai atanga Hachhek tih te a ni a. A theih ang ang chhang turin Sports Minister zahawm tak Pu Robert Romawi Royte ka sawm e.

PU ROBERT ROMAWIA ROYTE, MINISTER: Pu Speaker, ka lawm e.

Zawhna neitu Pu C. Ngunlianchunga, Lawngtlai West MLA zahawm tak zawhna leh ngaihtuahna hman dan kha ka appreciate khawp mai a. “Kumin budget han en hian hetiang establishment han *run* tur hian engmah a awm si lova; nikum budget RE aiin nuai 10 chuangin in budget a tlem” a rawn tih kha Pu Speaker, thu dik tak a nih ka ring a, ka lo en Chiang chiah lo nain. Khang ngaihtuahna kan MLA zahawm takin a hman kha lawmawm ka ti hle a ni.

Pakhatnaa ka sawi duh chu - Sports school hi infiam mite chuan kan nghahhlelhna a rei tawh mai a. Kei hi a mimal tak pawha sports school neih nghakhleltu ka ni. Tun hnaiah India ramah sports school neih an intihhmuh a. Sum te an lo nei bawka, State thenkhat chu. State dangte chuan anmahni State fund atang tein sports school an *run* a, an result pawh a rawn lang tan mek a. Keini hian hmanlaia kan tih dan thin ang zelin sport hi kan din a; Academy din thei Club thenkhatin an din a, chu pawh *professional* taka tih hleih theihloh te a lo ni a.

Sports Department hian Academy pahnih kan neih sorkar hmasa lam atanga an lo tan tawh football bikah chuan - Kolasib-Saidan a Academy leh Lunglei-a kan SYS Academy te chuan national level a tournament sang ber berah, ka minister ve hnuah pawh champion nihna an la ve ve tawh niin ka hria a; an result a tha thin a, national level-ah pawh hriat hlawh tak anni. Chutianga Academy-a school tel lo, a football zirna ringawt, school danga va kal si te pawh result tha kan neih chuan, a sports school tak tak, a school education, khami a academic education pawh an zir theihna tur leh ‘flexible routine’ an tih mai ang, exam te pawh suan lawp lawp theihna, chhuna exam lova zana han exam tir mai theihna school ang chi kha kan mamawh ve tak zet a. Chu chu kan tih chhan, kan rawt chhan leh sanction kan neih chhan a ni a, tunah kan nei ve tur hi a lawmawm khawp mai a; a sanction pawh hi a tlem lova. Pu Speaker, a infrastructure ringawt hi ‘school ringawt kha nuai 40-50 kha kan mitthlaah a lo lang maithei a, nuai 3400 leh tih a ni, a infrastructure man ringawt tur pawh hi. Chuvang chuan, ‘hei hi a thlawnin a awm lo vang’ tih hi vawiinah ka sawi duh a.

Tunah hian State dang atanga sports school *run* thin society leh company tha tak takte pawhin min rawn approach reng tawh a. Tin, Lunglei-Zobawk-a sports school kan sak mek te phei chu hmanniah Techno-Aryan, University pawh tam tak nei, sports school pawh tam tak nei, Kolkata-based Techo-Aryan pawh helicopter-a lo kalin an va en tawh a, an phur khawp a. *Letter of Interest* te pawh an rawn thawn tawh a. Chutiang chuan tunah hian decision la siam chiah lo mah ila, Lawngtlai sports school pawh hi

Mizoram sorkar sum hek lo zawngin keini aia thiam leh keini aia sum nei zawk, keini aia international leh national level-ah pawh exposure nei tha zawk te nena kan in tie-up theih kan beisei a. Chutiang tur chuan company liante hian min rawn dawr ve mek a. Mahse chu erawh chu ‘*a rana rana lo*’ tih chauh a la ni a. Chuvang chuan, kan *run* theih ngei nan kan Chief Minister zahawm tak Pu Zoramthanga kaihhruaina hnuaiah hian tha takin he school hi a kal theih ka ring a.

Tin, Kohhran te pawhin enkawl an chak niin ka hria a, chung te chu ka la inbe zel ang a. Tin, Sports Department ngei pawh hian ‘direct-in enkawl ang u, midangte pawh ruai lovin’, te pawh kan ti maithei a. Chutiangah chuan sponsor te, CSR funding te pawh kan hmu thei turah ka ngai a ni.

Tichuan, a building te pawh hi an sa tha khawp mai a, ka beisei aia chakin an sa a. Kuminah erawh chuan Pu Speaker, a bialtu zahawm tak Pu C. Ngunlianchunga’n a lo worry deuh lai kha a ni. Sak zawh hun hmaa an sak zawh dawn avangin kumin su sua function tur hian kan inpeih hman dawn lova. Nakuma sak zawh tura schedule a ni a, he building leh a infrastructure hrang hrang hi. Kuminah ka hmu hnai lova, mahse 80% zawh tawh niin kan hria a. Chutiang anih chuan nakum atang chuan tha takin kan *run* theih ka beisei a ni.

Tin, ‘YLA kutah hlan a ni ang em?’ tih kha, YLA hian kan kutah an hlan zawk a ni. LSC leh engkim kan hminga siam vek tawh a ni a, College Veng YLA te chungah pawh he House kaltlang hian lawmthu ka sawi nawn leh duh a. Anmahniin mamawh an neih thenkhat erawh chu ka tih sak dawn a. Chutiang tur chuan budget provision pawh kan nei a ni tih kha ka sawi duh bawk a.

Thingkah YLA chungchang kha - Ni e, ka lo hre chiah lova. A tih ngai kha chu kan ti; kan commit sa ang chu kan ti zel a, kan ti mai turah ngai ta ila. A sum pawh kan nei thei em em ang, khatiang lek kha chu.

Tin, Mampui chungchang kha chu - Ni e, Mampui-ah hi chuan ‘District Sports Complex’ a ni ve leh thung a. District tinah hian District Sports Complex din hi kan Sports Policy-in chiang takin a sawi a. Kan Sports Policy-in ‘District tinah District Sports Complex emaw, District Stadium emaw din tur’ a tih avangin, sum kan nei si lo chuan kha kha gap a ni ta a ni; a project tawngin. Gap kha kan lo nei ta a, kan Sports Policy zarah, PMJVK hi gap funding scheme a ni a, ‘gap filling scheme’ te pawh an ti a. Gap kha kan Sports Policy in min pek avangin, kha gap fill up tur khan PMJVK-ah gap funding scheme a nih angin kan dil a. Chutiang chuan min pe a. District Sports Complex hi min pek kim vek pawh, an tawngkamah chuan an tum a, an Secretary thar a rawn awm khan ka zuk chibai ve a. Chutah chuan, “Sir, District Sports Complex te hi a fisibility a sang a, PMJVK te hi tihlar kan duh a, chuvangin, District Sports Complex lian deuh deuh te rawn rawt rawh aw” a ti a. “Pathum lai min sanction tawh a sin”, ka

ti a. “District a kim tawh em ni?” a ti a, “kim lo ve”, ka ti a. Chutiang chuan beiseina sang tak, district dangah pawh PMJVK leh scheme dang a aia lian kan nei nghe nghe a, chung atang te chuan kan beisei a ni. Sorkar thar hlan hi a nghahhlelhawm tawh khawp mai, Pu Speaker.

Tin, Mampui chungchang kha – Mampui-ah hian post create chiam a ni dawn lova, a chhan chu – infrastructure project a ni a, Running Academy, school ang chi kha Mampui-ah hian a awm dawn lova, hetah hian caretaker erawh chu kan siam a ngai ang a, khang te kha chu a hunah chuan kan ti ve thei turah beisei ila.

Tin, ‘an va thawk chak lo ve’ tih lai kha - Ni e, an work order issue pawh hi a la rei lutuk lo niin ka hria a. Tin, complain lar deuh pakhat kha a awm a. labour camp tura an sak kha hostel building tur emaw an lo ti a, saw lai velah. Concrete vek khan an sa si a, an labour camp kha. “Hostel lian deuh deuh te awm tura sawi a ni si a, an sak hi a va te angreng ve” an ti a, kei pawh a lem te minrawn thawn a. Kan han zawh chian chuan, an labour camp kha building lian pui -puia sak tur emaw an lo ti kha a lo ni a. Chuvang chuan, an labour camp atang pawh hian sak that, chet that chu an tum hmeh khawp mai.

PU C. NGUNLIANCHUNGA: Khawngaih takin, *Point of Clarification*; hei hi min han sawifiah sak lawk ta che, khawngaih takin - Pu Speaker, Thingkah chungchang hi ka sawi tak ang khan (proceedings phok 417-naah khan) Pu Speaker, i phalnain ka han chhiar chhuak teh ang, helai tawi te hi. (**Pu Robert Romawia Royte, Minister:** Eng pawh ni se, nuai 5 an lo hmu a nih chuan a tha tho a, a bak pawh chu ngaihtuah sak ka lo tum dawn nia.)

“Chu erawh chu, assurance ka pe a che” ti ngatin, Ni 2.3.2022 khan min assure tawh a, House-ah. Mahse kan Minister zahawm tak hian wawiinni thlengin a pe si lova, engtikah nge a pek theih ang? Assure tawh, kum khat hnuah pawh la hriat theih loh thin kha a va fel lo ve.

PU ROBERT ROMAWIA ROYTE, MINISTER: Pu Speaker, a lawmawm e. He thu hi sawi thui pawh a ngai lovin ka hria. Sorkar sum chhuah hun hi financial year tawp dawn te, sum indaihlohna avangin kan ti a, Deposit-a awm te emaw, kan sanction emaw te pawh hi han nghah-khawm deuh te a ni a; minster hlui te a ni a, a hre vekin ka ring a. Hei, tunlai hian sum te a chhuak thar a, ‘tun tum chu’ ka han ti ang a.

Tin, kha laia tanga a harsatna, a history pawhin sawi ka chak ang reng khawp a, mahse ka sawi thui lo mai ang a, kha thil kha. Engpawh ni se, ‘kan pe ang’ tih kha ka chhanna ni sela. Tin, assurance dang ka lo ti a nih pawhin, kan ti vek ang. Pathian zarah leh kan Chief Minister zarah, ‘kan ti ang’ kan tih hi chu, kan la ti zel niin ka hria. “Lung a phum a, engmah an thawk leh si lova,” tih te hi tunah chuan a ding thluah tawh a.

“Lung phum ringawt an ti” tih hun a liam a, “A hawn ringawt an ti” tih hun hi a thleng chho tawh niin ka hria.

Tichuan, Hachhek bial kha ‘engzah nge?’ tih ka sawi mai thei lova. (**Pu C. Ngunlianchunga:** Theiriat in kal tuma MNF press released a ni a, kha pawh kha a ni vek.) Theiriat kan kal tuma nuai 30 kha kan tihsak dawn a, tun thal chhung hian nuai sawmthum hu; a field laih tur kha a ni mai a, a laitu turte pawh kan year-marked vek tawh e. Sum pawh kan nei e (**Speaker:** Necktie dum awr ve ve in ni a, tlai chawi einaah in thu dun ang aw.)

Tichuan, Aizawl South-II Member zahawm tak Pu Lalchhuanthanga zawhna – ‘Hachhek Constituency-ah engzah nge project awma, engzah nge sum awm’ tih kha, ka Chiang Chiah lo a, heti mai chuan. Assembly *Zawhna* list-ah khan a tam mai a, bialtu zahawm tak Pu Lalrindika Ralte pawh khan zawhna pawh kha a la zawtin ka hria a. A awm ve nual a, a chhan chu - *aspirational district* an nih mai piah lamah PMJVK-cover area a ni a. Chuvang chuan, hmanni lawk khan Tuidam-ah *Laldenga Football Ground* kan hawng tawh a, chu chu nuai 500 leh tih vel a ni a. Tin, a bul lawk Kawrthah-ah Residential Sport School ina a ken tel football ground kan hawng tawh a. Tin, Borai-ah te, Kanhmun-ah te, Zawlnuam Vengpui-ah te, Sihthiang-ah te, Chuhvel-ah te leh Kawrtethawveng (kan bialtu zahawm tak khua) ah te ngei pawh hian ngaih-fin rap rap tham kha a lo awm a. Kan sak hnahnun zawk atan chuan, ‘sum sen hi a va tlem ve’ tih te kha a lo awm a, helai bialah hian PMJVK-cover area dang ang thovin hmasawna pawh a tam khawp mai; lawm pawh an lawmin ka hria, a area te pawh. Tichuan, a list hi vawiin chhungin Pu Lalchhuanthanga, South-II MLA zahawm tak kha pek ka lo tum dawn nia.

Tin, Pu Zodintluanga, Thorang bialtu MLA zahawm tak zawhna kha - “DCMA sum atanga siam a ni si a, Sports-in enkawl daih te kha chu a” tih kha anin ka hria. DCMA hi PMJVK ah hian a nodal department a ni a, kan hre vek mai tirawh u, kha kha chu. PMJVK guideline-ah hian, “A subject department-in DPR te pawh hi siama, a subject neituin a enkawl zui zel tur a ni” tih a ni. Chuvang chuan, DCMA hian he sports school hi an *Allocation Rules*-ah an subject a nih loh avangin, enkawl a rem lo turah ka ngai a.

Tin, Pu Speaker, (**Pu Zodintluanga Ralte:** A hmasain *Order of Precedence* hi kan hriat chian a ngai a, Kan Minister zahawm tak, Sports Minister khan Central Secretary kha chu ‘Sir’ tawh lo hram se ka duh a ni.) A mah hian a ‘Sir’ zawk a, kan va luh pawh hian i hre vek a, *Conduct Rules* kan en chuan, kan luha an lo din loh hian suspend theih hial a niin ka hria a; chutiang chu *official* te hi an ni. Union Secretary te khu kan va luh chuan an lo ding ngei ngei a.. (**Pu Zodintluanga Ralte:** Ka hre sual palh a nih chu.) Aw, i hresual a nih chu.

PU ZODINTLUANGA RALTE: Tichuan, Pu Speaker, *Allocation Business*-ah hian, DCMA-ah pawisa a rawn kal a, hetiang hi chu *eng le, khaw le*, State sorkarah chuan hna an lo thawk a nih pawhin official takin an lo in hand- over thin a. Khalaia kha a ni a, ka rawn zawh zawk lai chu. Kan State sorkar hian a sak zawh hmian ‘heng hi Sports-in enkawl zui zawk rawh se’ an rawn ti nge ni a, ‘nakina la ngaihtuah zawk tur?’ tih kha a ni ka rawn zawhna chu.

PU ROBERT ROMAWIA ROYTE, MINISTER: Pu Speaker, Awle, a lawmawm e. Kan sorkar tirh lam khan PMJVK kha a la lar lova, Covid len vawihnih hnu lamah hian PMJVK hi tam tak hi chuan kan hre ve chauh a. Kan sorkar hlim tea a DPR kan siam lai khan a secretary pawh ka la hre reng a, a hming chu sawi lo ila. DC a mi a ni a, a secretary kha. Ngun takin kan ngaihtuah a, Social Welfare lam te nen an inhlan hlim kha niin ka hria a; a guidelines kha chhiar dun ngun khawp mai a. Chutah chuan, Sport-sector bik hoa kha Sport Department enkawl turin mumal takin order a siam a, Ministry pawh hrilh a ni a. Ministry pawhin an pawmna lehkha kha an rawn siam thlap a ni.

Tin, Planning Department hi NASIS te, NEC te leh scheme tam tak nodal department a ni a, mahse, a sum kha PWD atang tein an han la-chhuak a, PWD, nodal department ni tho si khan building te an sa a, kawng te an siam a, kha kha thil mak vak a ni lo. Chutiang deuh chuan DCMA hi a nodal department a ni a, anni through lo chuan a kal thei miah loh. Tin, State Level Committee hi Chief Secretary Chairman-na hnuaiah a awm a, Opposition MLA te, Ruling MLA te pawh kan telhin ka hria a. Hei hi process-base a engkim kal a ni tih kha ka han sawi tel duh bawk a ni e. Pu Speaker, ka lawm e.

SPEAKER : *Starred Question* No. 243 - Zawt turin Member zahawm tak Dr. Vanlalhlana ka sawm e.

DR. VANLALTHLANA : Pu Speaker, ka lawm e. Minister zahawm tak Finance changtu ina a chhan atan –

- a) Ni 8.2.2022 a SEDP Executive Board thutkhawm a nih hma khan mi (beneficiary) engzat hnenah nge SEDP hnuaiah tanpuina pek a nih tawh?
- b) Kum 2019 atanga tunthlengin kan GSDP to Debt percentage zat min hrilh thei em?
- c) Kum 2020 hnua Health & Family Welfare Department ni lo department dang hmanhmawh taka sum audit thut an awm em?

SPEAKER : Chhang turin Finance changtu kan Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak zawhna kha, a chhanna chu -

- a) Ni 8.2.2022-a SEDP Executive Board thutkhawm anih hma khan department hrang hranga SEDP pilot projects hnuaiah beneficiaries 7801 hnenah tanpuina pek a ni tawh a; chung te chu –
- i) Agriculture Department – 5563;
 - ii) AH & VETY Department – 1022;
 - iii) Commerce & Industries Department – 438;
 - iv) Horticulture Department – 413;
 - v) Land Resources, Soil & WC Department – 360;
 - vi) Sericulture Department - 4
 - vii) Science & Technology - 1.
- b) Kum 2018-2019 atanga 2022-2-23 thlengin Total Outstanding Debts and Liabilities (percentage to GSDP) theuh te chu –

Item	2018-19 (Actuals)	2019-20 (Actuals)	2020-21 (Actuals)	2021-22 (Actuals)	2022-23 (RE)
Total outstanding debts & liabilities (₹ in crore)	7,315.55	8,671.79	9,881.09	10,570.93	12,479.25
As percentage to GSDP (in %)	32.89	32.72	33.98	40.98	41.29

c) Nil.

SPEAKER : *Zawhbelhna* - Dr. Vanlalhlana.

DR. VANLALHLANA : Pu Speaker, ka lawm e. Kha, kan Minister khan *GSDP to Debt* percent kha *..... tih kha a lang a, a lawmawm khawp mai.
(*Expunged as order by the Chair.)

Ni e, audit thut kha a awm ta lova. Tun Session chhung hian ‘dekhenga’ tih te, a hma te pawhin sorkar chhung te pawhin ‘dekhenga’ tih a lang a. Minister sum pawt na bik riau te pawh an awm a, ‘*kuch kuch hota he*’ tih kha ka sawi ve duh a ni. Ka zawhna chu hei hi a ni e –

‘SEDP pilot project’ kan ti a, SEDP Board te hian zirchianna siam tura ngaih an ni a. Hetah hian SEDP Board kan neihte hian zirchianna an neiin report an thehltut em? Report thehltut a nih chuan, report copy min pe thei em?

Tin, SEDP kalpuinaah guidelines te pawh an siam turah ka ngai a, SEDP committee minutes kan en chuan, an thehltut lo nia hriat a ni a. An thehltut lo a nih erawh chuan, engnge a chhan? An thehltut chuan, a copy min pe thei em? An thehltut loh a nih chuan engnge a chhan?

Tin, Aizawl Municipal Corporation leh Lunglei Municipal Corporation hi LMC din tur a ni a, chutah chuan Urban Local Body Grant cheng vaibelchhe 37 kan dawn tur hi engtia sem tum nge a nih? Eng criteria (tehna) nge kan hman dawn tih kha ka zawt duh a ni e. Ka lawm e.

**(Expunged as ordered by the Chair.)*

SPEAKER : *Zawhbelhna* - Pu Zothantluanga.

PU ZOTHANTLUANGA: Pu Speaker, ka lawm e.

Ka zawh belhna chu - Sorkar hmasa, Congress sorkarah khan NLUP sem a ni a. Synod - Social Front Study Group report ah khan, ‘beneficiaries 93% te hi party mi thlan a ni’ tih a ni a. An hun tawp lamah phei kha chuan MLA pawh ni lo, a viltute kha a thlangtuh an tang a ni tih kha a lang a. “Tun SEDP hi eng anga beneficiaries te hi thlan an nih?” tih ka zawt belh a ni e.

SPEAKER : *Zawhbelhna* - Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka lawm e.

Pilot Project-a mi 7000 chuang cheng nuaih 3 pek tura kha pek zawh a ni tawh em? Nuai 3 kha an dawng kim tawh em? Hei hi min chah tam em avangin Pu Speaker, zawhna chance ka nei hlauh a.

“Min lo zawh sak teh; kan la zo thei lova, hei, kum a tawp dawn si a” tih kha a tam lutuk a. Kha kha in pe zo ta em? Pe zo lo se, tun sorkar chhungin in pe zo thei dawn em?

SPEAKER : Awle; a theih ang ang chhang turin Chief Minister zahawm tak, Finance Minister ni bawka ka sawm e.

PU ZORAMTHANGA, CHIEF MINISTER: Pu Speaker, “SEDP, pilot project anga kan hman, kum 2010 chho vela an han tih kha an zirna report te pek a ni em; report te submit a ni em?” tih kha, hei hi an submit leh submit loh ka hre chiah lova, a executive-ah ka zuk thut loh avangin. Amaherawhchu, ka hriat chu - a dawt lehah khan Covid 19 a lo ni a; lock down a ni ta vek mai a, 2020 chhoah khan; check tur kan awm ta lova, zirchian leh report eng emaw kha a awm lo niin ka hria a. Kha lai kha chu an ti lo a nih pawhin an tih lohna chhan chu, kan Covid - lock down kum hnih chhung kan kal tak avang khan a tih hleihtheih ta lo a ni.

Tin, UNB grant sem dan tur kha chu a pangngaiin guideline ang - population leh area base-in, AMC leh LMC-ah te pawh sum insem dan tur pawh chhut a ni a, a sem dan pangngai population-base te, period base te khatiang chhut khan sem a ni ang.

Tin, Pu Zothantluanga khan, “Engnge beneficiary an thlan dan”? a ti a. Executive Committee kha state level-ah a awm a, district level-ah committee a awm bawk a, village level-ah committee a awm bawk a, khami te khan an thlang a ni.

Tin, Pu C. Ngunlianchunga’n, “Pilot project-ah khan nuai 3 khan pek a ni em?” a tih kha, kan pe hman lo ang. A chhan chu Covid khan a dawtah khan min nang chho a; a dawt kan han tan leh dek dek chauh a ni a, pekna hman a awm ngang lo a ni e.

SPEAKER : *Starred Question* No. 244 – A zawttu tur hi Member zahawm tak Er. H. Lalzirliana a ni a, mahse, kawngah a rawn kal mek a, min rawn phone lawm-lawm a. A aiawh turin Dr. K. Pachhunga a authorized a, tunah Dr. K. Pachhunga zawt turin ka sawm e.

DR. K. PACHHUNGA : Pu Speaker, ka lawm e. Hon. Minister for Health & Family Welfare Department changtu chhan atan Er. H. Lalzirliana zawhna chu -
“Tuipuibari PHC building sak tawh hi engtikah nge function theih a nih ang?” tih a ni e.

Pu Speaker, ka lawm e.

SPEAKER : Chhang turin Health Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, a chhanna chu -
“Tuipuibari PHC function theih hun tur hi sawi theih a ni rih lo” tih a ni.

SPEAKER : *Zawhbelhna* zawt turin Dr. K. Pachhunga, a zawttu ka sawm e.

DR. K. PACHHUNGA : Pu Speaker, ka lawm e.

Lunglei-ah hmanni khan naupang ICU-Bed, a zavai chuan HDU nen 12 min hawn sak a. Ka kal a, a mawi em em a, kan lawm takzet a. Ka bial Sethlun-ah pawh Urban Health Awareness kan hawng a, kan lawm a, lawmthu sawi ka duh a.

Chutih ruala ka zawhna chu – “Lunglei Civil Hospital-ah hian ICU-Bed puitlingte tan ruahmanna te a awm em; tin, kan nei reng em?” tih a ni a. Tin, oxygen plant lian tha kan nei a, Velore Hospital type deuh a ni a, kan lawm takzet a. Mirethei

leh harsa ber pawhin kan mamawh em em he sorkarin min pek hi lawmthu ka sawi tel duh bawk a.

Ka zawhna chu – “Puitling ICU-Bed hi kan nei em; kan neih chuan, bed engzat nge; kan neilo a nih chuan, neih tumna a awm em?” tih kha a ni e, Pu Speaker, ka lawm e.

SPEAKER : *Zawhbelhna* zawt turin Member zahawm tak Pu K.T. Rokhaw ka sawm e.

PU K.T. ROKHAW : Pu Speaker, ka lawm e.

Hmannia ka sawi tawh ang khan, Tipa PHC doctor hi a chhuak tawh a; tunah refugee kan ngah khawp mai a, Tipa khuua an camp-ah hian. Sik leh sa inthlak hun lai a ni a, damlo hospital-ah kan ngah a, pawn lamah pawh damlo an tam a. Chuvang chuan, kan Minister zahawm tak hian Tipa-ah hian a rang lamin doctor min pe thei ang em?

Tin, Siaha District-ah hian PHC pali a awm a. Hman nia ka sawi tawh hnu khan, Chapi PHC a doctor an sawn kha cancel-in, min han dah sak leh a. Ka lawm khawp mai a. Tin, Tipa hi ka biala hmun laili ber leh ka bial khawpui ber a ni a. Hetah khian x-ray khawl min dah sak thei ang em?

SPEAKER : I zawhna ngai i zawt reng mai a, chuvangin opposition a mi tho ka la ang a. Dr. BD Chakma *zawhbelhna* zawt turin ka sawm e.

PU B.D. CHAKMA : Pu Speaker, ka lawm e.

Ka *zawhbelhna* - Borapansury PHC chungchang ka zawh hmain tlem sawifiah ka duh a. Ka CEM hun lai, 2013 khan CADC leh Mizoram sorkar expenditure kha 50:50 a kal tur a ni a. PPP mode hi CADC leh tuna state sorkar inkarah hian a la awm em?

Pahnihna chu - Borapansury Medical Officer hi Ayush (Ayurvedic) lam a ni a, kan thenawm lawkah a in pawh a awm a. Chawngte-ah hian hriatpuina engmah awm lovin a awm char char a; Borapansury AMO hi a awmlah lai a ni bawk a. Hei hi hon. Minster hian a hriatpui em? Tin, tunah hian kha mi expenditure tur - Borapansury hospital staff hlawh emaw, expenditure zawng zawng kha tuin nge tum thin? CADC nge Mizoram sorkarin?

SPEAKER : Awle; wawiin hi *Zawhna & Chhanna* hun hnunung ber tur a nih avangin, ruling lam atangin pakhat ka la leh ang a. Pu K. Laldawngliana, Member zahawm tak ka sawm e.

PU K. LALDAWNGLIANA: Pu Speaker, ka lawm e.

Ka zawh belhna chu - kan ram mamawh leh hmasawna tur Ayush Hospital thar turah hian hmalakna a awm em? A awm chuan, Hortoki Ayush Hospital tur hi engnge a thlen chin?

Pahnihna - Bukpui PHC building sak hi engtikah nge hawn a nih theih ang?

SPEAKER : A chhang turin, a changtu Minister zahawm tak Dr. R. Lalthangliana sawm ila; Siaha lam kha han ngaihsak deuh teh se a; a tul a nih kha.

DR. R. LALTHANGLIANA, MINISTER: Pu Speaker, ka sawi zing tawh khawp mai a; ka han chhang hmasa ber nghe nghe teh ang.

Pu Speaker, Tipa PHC hi ngaihtuah a ni a. Engpawh nisela, a rang thei ang bera tih kan tum ang a. Amaherawhchu hmanni khan chiang deuhin ka sawi tawh a. Kan doctor indaihlohna hi a nasa khawp mai a, 51 te hi pension, thi leh PG zirte belhkhawm a ni a. A lak leh ran dan hi MPC kaltlang ngai thil anih avangin a rang thei lova, kha nen khan a insu fuh thei lova. Hun harsa leh hun khirhah kan awm mek a. Chutih lai mek chuan Zoram Medical College-ah hian kum tawp lamah 100 dawn lai beisei anga an chhuak thei anih chuan ka zia kawkin ka ring a. Amaherawhchu, a la tih mai theih lova, kha kha kan harsatna a ni a.

Tin, doctor (MBBS) hi in hmu a nih phawt chuan, 6000-7000 bawr hlawh chuan kan la nghal thei. Vawinah a hming in pek chuan, naktukah kan lak theih ka ring. In hmu thei bik si lo; kei pawhin ka hmu thei bik si lo. Chu harsatna chu kan tawk a. Khang MBBS zirchhuakte kha private hospital-ah te min chuh zel a. (**Pu C. Ngunlianchunga** - Ngawi teh, Pu Speaker. MBBS specialist-te kha, sorkar hnathawk *terms & conditions* ang te chuan la u la; duh an tam lutuk. Khatianga kal paha, ‘chuti zat kan pe ang che u,’ tih mai mai te chuan, tuin nge maw duh ang le?) State sorkar ina kan guideline leh kan dan kha a hman theih loh a, chuvang chuan Mizoram sorkar guidelines leh rules nen khan a inmil thei lova; chulai chu hriat a thain ka hria a. Chu chu ka han sawi a nih chu; inhnial vak lovin. Tipa kha a pawimawh khawp mai a, khati zawng khan ka han chhang ang a.

Tin, Siaha District kan indaihlohna pawh hian tun session chu a luah khat khawp mai, kan hre viau a ni. PHC eng emaw zat ...

PU LALCHHUANTHANGA: Pu Speaker, *Points of Order* - Tuna kan MBBS zirlaite hi thla tharah an exam dawn a. Doctor practice tur chuan internship beih te a lo ngai a, chu chu kum khat a la ni a. Chuvang chuan, nakum lama doctor indaih tur chuan hun a la awm lo hrim hrim a.

Tin, kan sawi thin ang khan, Medical College saw recognised a la nih loh avangin khang zir chhuakte kha chutianga practice thei dinhmunah an la ding lo a ni.

DR. R. LALTHANGLIANA, MINISTER: Recognition chu nei mai turah kan inbeisei a. Helai hi Pu Chhuana te khan in zawh khalh thin a. Recognition hi a stage a awm a, kumin chawhma lamah chuan an rawn tih ka ring a; kum 4-5 a ngai a, medical college recognition tur chuan. Kha kha a tlan khalh theih miah loh. Chuvang chuan, NMC (National Medical Council of India) in a rawn endik dawn a, chu chu final inspection ni turah ka ngai a; rei lutuk tawh lo turah ngai ila.

Tin, ‘kuminah doctor kan nei teuh dawn’ tih kha ka sawi lova. Heng hi a tah tawla a lo kal theihna turin kawng erawh chu a inhawng chho zel dawn nia ka sawina a ni a. Ka chhang mai tiraw, Pu Rokhaw?

A dang leh ah chuan, x-ray kha chu ti thei turah inngai ang. Hman ni khan PHC kha kan sawi nual a, khatiang kan neihlohna leh thlak ngai kha chu ngaihpaawimawhah kan nei thei hram dawnin ka hria a

Tin, Dr. BD Chakma zawhna hi - an CEM hun laia Borapansury, CADC leh Mizoram sorkar inkar ‘50:50’ tih laia kha, a fak fak chuan chhan a har ve deuh hlek a, ziakin kan pe dawn che nia; hmanlai thil han sawi kha a har ve deuh hlek a, ziakin kan inpe thei turah ngai ila. Tin, khami chungchangah khan, ‘hlawh te kha tu tum nge?’ tih laia pawh kha nakinah kan la inchhang thei turah ngai ila a tha awm e. Session chhunga inchhan a that viau lain, a har deuh mai thei a. Vawiin hi session tawp ni a ni a, a hnu deuhah kan ti thei turah ngai ila a tha awm e.

Tin, ‘Borapansury-ah Ayush doctor chauh a awm’ tih kha, Borapansury chauh a ni lova. ‘Medical Doctor’ han tih hian MBBS hi kan han kawh deuh a, a dikna lai pawh a awm mai thei. Amah erawh chu, Ayush doctor-te enkawl PHC hi eng emaw zat kan nei a ni. Chutianga nih loh chuan indaihlohna hi a nasa khawp mai a; chutianga harsatna chu kan la tawh mek a. Engpawh nisela, hei hi kan hriatpui e. Amah erawh chu, ‘leave a la’ tih lai kil kel kha chu ka hre chiah lova; a lo la a nih pawhin, a zawm leh turah ngai ila a tha awm e.

Tichuan, Pu K. Laldawngliana zawhna kha - Ayush hi tun central sorkar hian a ngaipawimawh viau mai a, ‘medicinal plants’ te a ti a, a ngaipawimawh khawp mai. Mizoram hmun hrang hrangah pawh hian Ayush hospital - a lian chi tan hian cheng vaibelchhe 15 ruahman a ni a. Mahse a building ringawt ni lovin, recurring leh non-recurring expenditure tur zawng zawng kha a tha fu mai a. Tin, tlema a te leh deuh chi tan cheng nuai 750 a ni a, a tha fuin kan hria a. Chutah chuan lak kan tum nual mai a, project take-up hi; Saitual te pawh a ni ang a.

Tin, Pu Dawngtea han zawhna lai tak kha han chhang ta ila; hmanni khan ka lo sawi theihngihl vang a ni a. Hortoki chu a awm pawl tak kha ni dawnin ka hria, in hlawhtling dawnin ka hre deuh hlek a. Amaherawhchu, ministry lampang kan han dawr chho leh ang a, *earmarked* te zinga mi niin ka hria a. ‘Khawi khawiah nge?’ tih kha chu, final a la nih chiah loh avangin sawi a la har deuh a ni tih kha ka chhanna ni sela.

Bukpui PHC hawn hun tur hi chu ka sawi thei chiah lova, hna erawh chu a kal chak hle a. Hei, bialtu MLA viak tha tak hi a kal chak hle a, a vil tha hle bawk a, hawng thei thuai turah kan inbeiseina a ni.

Dr. K. Pachhunga, Lunglei South bialtu zawhna kha - Naupang ICU 12 Lunglei Civil Hospital-ah tunhnaiah kan hawng thar a, a tha khawp mai a. An khum te, ventilator te leh khang a support equipment kha a tunlai khawp mai a, India ram hospital tha ah pawh an hman niin ka hria a, ka lawm khawp mai. A hmain (a kum ka hre lova, nikum hmasa nge ni) Lunglei-ah hian ICU chi hrang hrang a belhkhawm 28 an nei tawh bawk a, chuti anih chuan, ICU tunhmaa nei ngailo khan tun sorkar chhung hian 40 bawr an nei niin ka hria a, dahbelh zel dan tur te pawh kan ngaihtuah zel turah ka ngai a.

Tin, Pu Speaker, Mizoram-a Trauma Centre hmasa ber an nei thar bawk a, hengah pawh hian thil tam tak kan dah tel thei turah ka ngai a ni. Oxygen plant kha chu Lunglei-ah a function vut vut tawh mai a, LPM pawh 1000 dawn niin ka hria a, a lawmawm khawp mai. Engpawh nise, Mizoram district zawng zawngah oxygen plant kan bun fel vek a, Aizawl- Kulikawn Hospital leh Mizoram State Cancer Institute ah pawh kan bul fel vek a ni. Tunah chuan ngaihtuahawm lovin kan hnianghnar a ni. Ka lawm e.

SPEAKER : Kan *Zawhna & Chhanna* hun a tawp tlat mai. A danga kan kal leh hmain, Minister zahawm tak Pu R. Lalzirliana’n *Statement* pek a rawn dil a, kan *Dan 7*-na, phok 42-na ang hian ka lo pawm a. Sawi tur a neih te leh Autonomous District Council chungchangah *Statement* pe turin ka sawm e.

STATEMENT

PU R. LALZIRLIANA, MINISTER: Pu Speaker, ka dilna tlawm tak min remtih sak avangin lawmthu ka hrilh a che.

Direct funding chungchang Autonomous District Council chhunga mi Ni 23.2.2023 ka demand sawi nia Parliamentary Standing Committee report kha han sawi lawk ang a, chumi zawhah chuan ka tih tur han tih ka duh a.

125th Constitution Amendment Bill hi kum 2019-ah Rajya Sabha-ah a lut a. Rajya Sabha hian Parliamentary Standing Committee 13th September, 2019 ah Annanth Sharma Chairman-na hnuaiah a din a, member-te hi Rajya Sabha member 10, Lok

Sabha member 21 te an ni. Standing Committee hian a report (No. 223) chu Rajya Sabha-ah March Ni 5, 2022 khan an present a. 125th Constitution Amendment Bill, 2015-ah hian thil dang bakah Article 280 amendment a tel a, chutah chuan Panchayat leh Municipal Council te fund pek dan chungchang constitution 73rd leh 74th Amendment dungzuiin ADC-te hi State Finance Commission kaltlanga sum ngaihtuah puina tur a tel a ni. Mizoram-a ADC te hian he provision hi duh khawp lovin Central Ministry-ah direct funding tak tak turin an zu nawr tha leh a. Home Ministry-in “hei hi constitution scheme kalh a nih bakah state leh ADC-te inkar boruak tichhe thei a nih avangin pek chi a ni lo” tiin comment a pe a. He Home Ministry thu hi standing committee hnenah recommendation siam turin pek chhawn leh a ni.

Mizoram ADC aiawh ten standing committee chu Shillong leh Guwahati-ah an zuk hmu leh a, hemi hnu hian standing committee hian an recommendation chu Rajya Sabha-ah March Ni 5, 2020 khan an thehltut ta a ni. He report-ah hian, “direct funding hi constitution scheme kalh anih bakah ADC leh state sorkar inkar boruak tichhe thei a nih avangin 125th Constitution Amendment Bill, 2019 in Article 280 amendment rawtna hi a tha tawh a, amendment siam belh a ngai lo” tiin report a pe ta a ni. Standing Committee report-ah hian Autonomous District Council hming ‘Territorial Council’ tia thlak tura Mizoram ADC ten an dilna pawh an recommend lo bawh a ni.

Helaiah hian a chiang zawka kan hriat duh takin, *Parliament Standing Committee on Home Affairs* in 223rd Report on the Constitution 125th Amendment Bill ina an thehltut recommendation/observation para 3, 1, 11 leh 3, 1, 12 hi ka han chhiar leh ang a; para 3, 1, 11 ah chuan a inziah dan takin –

“The committee feels that direct funding of ADCs by the central will not only be against the existing constitution unnecessarily effect the relations of ADC vis-a-vis state government adversely. The very amending Article 280 of the Constitution is to make uninstitutional provision through state Finance Commission, the said provision is on the lines of Article 243(1) and 243(y) means for Panchayat and Municipalities and 73rd and 74th Constitution Amendment Acts” tih a ni a. A mizotawng chuan, “ADC te central atanga direct funding pek chungchang hi Committee-in ngun taka a ngaihtuah hnu ah Constitution kan hman mek nen a inkalh mai bakah, tul lo taka State sorkar leh ADC te inkarah boruak tha lo zawk thlentut a ni thei a. Hei bakah hian, Constitution Articles 280 Amendment-in a tum ber chu - mumal taka State Finance Commission kaltlanga ADC te sum mamawh leh indaihlohna pek belh a ni a. He provision hi Panchayat leh Municipalities chungchanga Articles 243(1) leh 243(y) leh 73rd leh 74th Constitution Amendment Acts in a sawi zulzui a ni bawh a ni” tih a ni a.

A tawpnaah chuan, “The Committee therefore, agree to the proposed Amendment to the Articles 280 and does not suggest any amendment” tih a ni a. Hei hi DC & MA kan han sawi lai eng emaw tawngkam han inkawkalh deuh neuh neuhte a

awm avangin, kei pawhin ka tawngkam kha ka han ennawn leh hian, ka duhzawng a ni bik hauh lova. Pu Speaker, he ka tawngkam hian mimal pakhat rilru a tihnat pawh hi hrehawm ka ti a. Kan unaute, ‘chhim lam unaute rilru ka lo tina a ni’ tih vawinniah hian ka hria a. Chuvangin, Kristian kan ni a, Pathianni chawhnu hi ka hun a ni leh nghal a, a inhme hlein ka hria a. Chuvangin, vawiin nia ngaihdam dil hi, ka thusawi ah an rilru a lo na a nih chuan, ngaihdam ka dil a.

Tin, an rilru leh ka rilru pawh hi a in ang viauin ka hria a, chu ka hriat a chu - Autonomous District Council pathumte te hi sorkar hmasa lamah khan Pathian leh kan hotute duhsaknain kum 10 chung deuhthaw kha ka kutah a lo awm tawh a. A tawp dawn lamah kan Chief Minister zahawm tak, ka pu hnenah khan, (khatih laia ka sawidan dik takin ka han sawi mai ang a) “High Court hawn mai; inkhin mai te hi an awlsam si a, inhekna a tam thei si a, chuvangin, kei chuan ka tlin lo a ni; min chhawk teh” ka ti a; hrethiam takin min han chhawk a, reilote ah hun a lo tawp ta mai a.

Tichuan, he MNF ministry, Pu Zoramthanga kaihhruai sorkar thatak lo din leh hian ka kutah a lo awm leh ta a. A tirah leh a hnulamah pawh, “A... ka pu, kei hi kan kum te a uaiin kan chawhnu lam ve tawh a, hriselna te pawh a lo pan chho ve deuh tawh bawh a, chuvangin, a chak-vak zawk te hi lak tir teh” tiin vawi duailo a hnenah hian min thlak turin ka dil tawh a ni.

Hei, ka thiam lo khawp mai a. A changtu ka ni a, Autonomous District Council hi tun term-ah hian vawikhatmah ka la thleng pheii lo a ni. Chuvangin, he department enkawl tur hi chuan politics hlang deuhthaw hi a ngai a; helaia a file work hi chu a tih ve theih mai a. Chuvangin, michak zawk te an duh angin pek theih a nih chuan ka lawm ngawt ang a; dilna pawh ka han thehluh nghal nisela a thain ka ring. Kan tawnga mi rilru ka lo tina a nih chuan, nichina ka sawi ang khan, ngaihdam ka dil a ni. Ka lawm e.

FINANCIAL BUSINESS

SPEAKER : Awle, *Statement* siam hi sawiho ngai a ni lova. Ringtu kan ni a, tihsual palhah ngaihdam kan dil thlap thlap te hi a ropui a, a-mizo a, ringtu nihna a lang a ni.

Tunah chuan, *Financial Business*-ah kan kal ang a. Vawiin hian Minister zahawm tak tak leh kan Chief Minister te demand kan sawiho dawn a, kan Minister zahawm takte - Pu Robert Romawia Royte, Pu C. Lalrinsanga leh kan Chief Minister zahawm tak Pu Zoramthanga demand te kan sawiho dawn a ni. Tin, vawiin hian pass nghal kan tum ang a, kan lo tih thin angin a rualin kan la kawp leh mai ang a. Pu Robert Romawia Royte, Minister zahawm tak ka sawm ang a. House dawhkanah heng a department chan demand-te rawn submit turin ka sawm e –

Demand No. 22 - Sports & Youth Services Department;

Demand No. 43 - Tourism Department;

Demand No. 48 - Information & Communication Technology Department.

PU ROBERT ROMAWIA ROYTE, MINISTER: Pu Speaker, ka lawm e.

Pu Speaker, Governor of Mizoram recommendation leh i phalnain, ka Demand te - Demand No. 2, 43 leh 48 te, a vaiin Rs. 41,78,77,000.00 hi kum 2023 -2024 chhunga ka department enkawl pathumte hman a tan he House zahawm takah hian ka rawn pharh e.

Ka Department enkawlte chu –

Demand No.	Purpose	Amount (in ₹)
22	Sport & Youth Services	25,37,23,000.00
43	Tourism	11,34,16,000.00
48	Information & Communication Technology	5,07,38,000.00
TOTAL		41,78,77,000.00

Pu Speaker, he House zahawm takah hian ka Demand te hi min ngaihtuhsak turin ka ngen e.

SPEAKER : Awle, Kan Minister zahawm tak Pu C. Lalrinsanga kan sawm ang a, House dawhkanah hian a Demand te –

Demand No. 3 - Agriculture Department;

Demand No. 37 - Co-operation Department;

Demand No. 47 - Irrigation & Water Resources Department

te rawn submit turin ka sawm e.

PU C. LALRINSANGA, MINISTER: Pu Speaker, ka lawm e.

On the recommendation of the Governor of Mizoram, and with your permission sir, I move the Demand No. 31, 37 and 47 for ₹2,76,32,76,000.00 only for meeting expenses during 2023-2024 in respect of the following Departments –

Demand No.	Purpose	Amount (in ₹)
31	Agriculture	1,70,24,25,000.00
37	Cooperation Department	16,59,29,000.00
47	Irrigation & Water Resources	89,49,22,000.00
TOTAL		2,76,32,76,000.00

Heng Demand Pathumte hi he House zahawm tak hian min ngaihtuah sak a, min passed pui turin ka rawn thlen e. Ka lawm e.

SPEAKER : Tunah chuan Chief Minister zahawm tak Pu Zoramthanga kan sawm ang a. House dawhkanah hian a demand-te -

- Demand No. 1 - Legislative Assembly,
- Demand No. 2 - Governor,
- Demand No. 3 - Council of Ministers,
- Demand No. 5 - Vigilance,
- Demand No. 9 - Finance,
- Demand No. 11 - Secretariat Administration,
- Demand No. 14 - Planning & Programme Implementation,
- Demand No. 15 - General Administration,
- Demand No. 32 - Horticulture,
- Demand No. 45 - Public Works,

Heng department demand-te hi rawn submit turin ka sawm e.

PU ZORAMTHANGA, CHIEF MINISTER: Pu Speaker, Mizoram Governor recommendation leh i phalnain, he House-ah hian heng ka demand te hi ka rawn pharh a. Chungte chu –

Demand No.	Purpose	Amount (in ₹)
1	Legislative Assembly	42,39,97,000.00
2	Governor	30,60,000.00
3	Council of Minister	7,13,18,000.00
4	Vigilance	6,60,51,000.00
5	Finance	32,24,74,79,000.00
6	Secretariat Administration	1,25,49,29,000.00
7	Planning & Programme Implementation	93,17,21,000.00
8	General Administration	93,49,93,000.00
9	Horticulture	1,04,45,28,000.00
10	Public Works	5,91,17,92,000.00
TOTAL		43,88,98,68,000.000

Heng hi he House dawhkanah ka rawn pharh e. Ka lawm e.

SPEAKER : Aw le, kan Chief Minister zahawm tak leh kan Minister ten an demand House-ah an rawn pharh ta a. Kan sawiho ang a. Minute engzat nge kan in pek leh ang? Minute 10 ah i kal leh ang aw? (*House-in a remti a..*)

Awle, Tunge sawi hmasa ang le? Dr. BD Chakma, Member zahawm tak ka sawm e.

PU B.D. CHAKMA : Thank you, hon. Speaker, Sir.

Today, we have going to discuss about so many departments for three hon. Ministers. First of all, with your permission, let me talk about Demand No. 9 – Finance and, at the same time, Demand No. 15 - General Administration because, these two administration departments are just related to each other.

Hon. Speaker Sir, today is the last day of 11th Session and also the last day of Budget Session of the 8th Mizoram Legislative Assembly. I feel privilege to speak very seriously on Demand No. 9 - Finance, which is one of the portfolios of the Hon. Chief Minister. Finance Department, being the father of all departments, it directly reflects the administrative and financial position of the three Autonomous District Councils of Mizoram.

Hon. Speaker, Sir, this year I am going to complete 15 years of my political career. During these last 15 years of my political experience, I have been experiencing serious procedural lapses in terms of administration and financial management in CADC which falls under my Assembly Constituency. Unlike the two sisters – MADC and LADC, CADC doesn't have any recruitment rules till today. It has been clearly mentioned in One-man Inquiry Commission's report which was released on the 24th of this month in this august House. As an answer to my *Unstarred Question* No. 269, the said One-man Inquiry Commission report totally exposed the MNF led 5th Executive Committees of 10th CADC which was headed by five Chief Executive members within a period of four and half a year. Taking the advantage of absence of any recruitment rules, the five Chief Executive Members have appointed more than 750 nos. new employees within these four and half a year, hon. Speaker, Sir.

The answer to my *Unstarred Question* No. 230, dated 21st February, 2023, as replied by the hon. Minister of District Council & Minority Affairs Minister clearly proves what I am saying now. It is clearly mentioned here, hon. Speaker, Sir.

Hon. Speaker, Sir, this illegal employment of these huge number of employees is one of the main reasons for imposition of Governor's Rule in CADC on the 16th December, 2022. This august House will be extremely surprised to know that, in spite of imposition of Governor's Rule in CADC, the act of such illegal appointment is still going on through back door. A copy of the proceedings of Executive Secretary with All Head of Departments in CADC Conference Hall on the 10th February, 2023 at 12: 30 PM, Resolution No. 5 clearly says that... Let me read it out the Resolution No. 5, hon. Speaker, Sir.

“New staff who have not yet joined and reported to duty till date shall be struck out from the A-Rolls from the month of January, 2023. This clearly implies that appointments are still going on despite imposition of Governor's Rule, hon. Speaker, Sir. Due to these huge number of appointments, the employees of CADC are falling

short of two months of salaries, i.e., for the months of February and March, 2023. Unless financial grants under the first quarter of the new Financial Year, 2023-24 is released by the Govt. of Mizoram, CADC employees will remain empty handed, without any salary whereas Biju, our main festival is drawing very near.

Hon. Speaker, Sir, let me highlight the budget deficit of CADC for the last four years -

1. Financial Year 2022-21 was ₹12,86,83,000/- as per BE;
2. Financial Year 2021-22 went up to ₹28,18,39,000/-;
3. Financial Year 2022-23 jumped up to ₹51,32,77,000/-.

In spite of this huge amount of deficit, our hon. Finance Minister has given additional grant of ₹12,57,58,000/- only whereas the deficit is now ₹51 crore i.e., as per BE. But in case of RE, we suspect that it will jump upto 65 to 70 crore.

Hon. Speaker, Sir, to bail out CADC from this severe financial crisis, I strongly demand for grant of sufficient fund out of State consolidated fund. Frankly speaking, Sir, I am not against giving employment to unemployed youth but it should be given depending upon the availability of fund. If Govt. of Mizoram is not able to grant sufficient grant to CADC, hon. Chief Minister/Finance Minister should initiate action base on the finding of One-Man's Inquiry Commission Report. Let all such unnecessary appointments be cancelled immediately to reduce the huge financial burden. This is the One-Man's Inquiry Commission Report which was tabled in this august House.

Let me enter Demand No. 45 - PWD. Hon. Speaker, Sir, though I am sitting on the opposition bench in this august House, I do not feel shy of conveying my heartfelt thanks and gratitude to our hon. chief minister for granting ₹48.81 crore under Rural Infrastructure Development Funds, NABARD for black-topping of Chawngte - Chhotapansury road. This road is the real lifeline for Tuichawng and the surrounding villages. As per reply to my *Starred Question* No. 175 i.e., on the 22nd February, 2023. (*Hon. Speaker gives warning bell*)

Pu Speaker, niminah khan minute 4 chauh hun ka hmang a, wawiinah hi chuan hun min pek belh turin ka ngen a che. a ni.

The work is expected to start during this working season. Hon. Speaker Sir, I shall be expecting that the quality of road will be durable unlike the PMGSY Road which are worst in quality in my Assembly Constituency. Only a few meters of this PMGSY roads are found to be good where the labourer's might have accidentally some good proportion of cements in the absence of contractor/supervisor of the PMGSY road. So, the hon. PWD-cum-Chief Minister may kindly take a note on my grievances.

Moreover, the internal roads of Kamlanagar, the Headquarters of CADC are also in worst shape due to frequent changes of CEM; no Executive Committee of CADC pay any attention to this road. During the pandemic of Covid-19, I, somehow manage to repair the pot-holes out of my MLAD funds. But surprisingly, the CEM Pu Rasik Mohan Chakma damaged some portions of such repairing roads by driving his official vehicle over the road before the curing period was over. This is about PWD.

Let me now enter Demand No. 22 - Sports & Youth Services. About Sports & Youth Services, I want to say something I really feel pain Pu Speaker, Sir, that most of the *Starred* and *Unstarred* Questions of this Session are of PMJVK scheme. As the hon. minister for Sports has clearly stated that under PMJVK Scheme, *Sport* is one of the most important disciplines of Education. But till now, I don't have any idea because my teacher used to tell that "*Sports* are the co-curricular activities of Education". So, how can our hon. Sports minister say that *Sports* as one of the most important disciplines in the Education System? That is why, as per PMJVK guidelines that only *Health* should be given priority list No. 1 and *Education* should be given priority No. 2. But unluckily, all the moneys had been pumped out for development of sports infrastructure only.

Hon. Speaker, Sir, if i am not wrong, i just want to say that Education without Sports can survive but Sportsperson without any skill about the Sports can survive in Education. But, Sports person without education cannot survive. We have seen many sportspersons interviewing in the television and I am very proud of our very owned sportsperson, a weight-lifter, Jeremy Lalrinnunga as he is well-versed in Hindi and he can speak English too. As such is the case, without having the basic knowledge of English Grammar, Mathematics or Science, Sports is nothing. After winning any match, the winning team/the prize winner have to give the interview in front of television, and if they cannot speak English or Hindi in India, how can they flourish in the Sports discipline? (**Speaker:** Please conclude your speech.) Minute chanve chauh min pek belh rawh, Pu Speaker. That is why, our hon. Sports minister gives utmost importance on Education and Health.

During your time as a Minister for Health, hon. Speaker, Sir, you have granted us so many PHEs, PHCs and even sub-centres, but all such buildings remained vacant and without any health supervisor, healthcare staff and that is why, Mr. Speaker, Sir, these things must be taken into consideration. And, with these few words, let me conclude my speech. Thank you, Speaker.

SPEAKER : Tunge sawi leh ang le? Awle, member zahawmtak, Pu C. Lasawivunga ka sawm e.

PU C. LALSAWIVUNGA: Pu Speaker, ka lawm e.

I dinglama mite ho hi tlailam-um-pawng-par an tum deuh nge ni, an reh thup reng mai a, ka han ding mai ang a. An sawi huphurh nge; an sawi ngam lo a nih ka ring a. Vawiin kan demand hi an tan chuan sawi a nuam lovin, an huphurh a nih ka ring a, an tan chuan sawi a huphurh awm viau maithei a ni.

Demand No. 22-ah hian ka han lut mai ang a, Sport-ah hian. Nikumah khan kan minister zahawmtak tak hian Assembly Session-ah hian Upper Republic Hall sak belh anih tur thu te, estimate peih fel tawh thu te, sanction amount te pawh in-principle a sanction a nih tawh thu te min hrilh a, kha kha vawiin niah hian ka han remind duh a. Tin, Bethlehem Vengah gym te pawh sak theih mai a inbeisei thu te min hrilh bawk a, ka han remind bawk a ni. Tin, Republic Vengah hian volleyball court leh futsal ground te pawh sak beisei a nih thu leh, tum a nih thu khan min chhang a. Amaherawhchu, futsal ground bika hi sawi ka duh a awm a.

Khumi futsal ground siamna tur hmun, Sport Council ram chhungah khuan anmahni hnuai thawk chhungkua te depts. remtihnain Assam type in sa in hun eng emaw chhung an lo awm tawh a ni. Nikum December-ah khan a pension chiah a, kumin 16th January bawr velah khan depts. in a in thiata chhuahsan turin JE hnen atangin phone call an dawng a; an mangang em em a, hun te pawh an dil belh a, mahse an pe thei lova. Tichuan, ni thum chhung lekin an thiat a, an han thiat zo a, JCB-in ni khat vel an lai a, vawiin ni thleng hian engmah khawih chhunzawm a ni leh chuang si lova. Hetianga mihring inzah tawna thinlung te leh inpawisakna thinlung te hi a pawimawh viauin ka hria a; inzhana awm lova khatia inalzut vak mai leh hmalak chhunzawmna awm chuang silo lai karah khan ‘an rilru a hliam khawp mai’ tih ka han sawichhuak duh a ni. Engtikah nge khawih chhunzawm leh a nih ang?

Tin, Thlamual Committee te pawhin an ramah khan ‘NOC min pe’ tih te a ni a, ‘tunge a signatory?’ tih leh, ‘Thlanual Committee te khan an pe ngei em?’ tih kha ka zawhbelhna a ni a, min han chhang sela.

Tin, Republic Vengthlang-a Hawla Indoor Stadium-ah khan Aizawl Indoor Stadium sak tur a ni a, *Khelo India* atangin a pawisa cheng nuai 450 pawh kha awm vek tawh a ni a, kan Dy. Chief Minister zahawm takin a lungphum pawh a phum tawh a. Amaherawhchu, hmalak a nih theih lohna chhanah khan, Republic Vengthlang YMA-ten an phal lo nia kan Minister zahawm takin a sawi kha a pawi ka ti khawp mai a. Engtin nge ‘hmalak chhunzawm te a ni em?’ tih te, hmalak chhunzawm a nih loh pawhin, ‘a pawisa nuai 450 kha thil danga hman pen nge a nih a, khawiah nge a awm?’ tih te pawh kan minister zahawm tak khan min hrilhfiah se ka beisei a ni.

Tin, unstarred question-a ka zawhnate ka bihlet a, chuta tanga ka thil hmuhah chuan thil danglam, dangdai deuh hlek, mak tih deuh mai hi ka nei a, chu chu vawiin niah hian sawichhuah ka duh a.

Hna chi hrang hrang thawh a ni a, kan hre vek a. Chutah chuan a amount inang, lakh 102.59 hlr, hna hrang hrang hmun 28-ah siam a ni a, chu chu Junior Consultancy Farm-ten an thawk vek a. Tin, hna hrang hrang nuai 31.2, a amount inang thiau kha hna 26 siam a ni bawk a, chu chu Junior Consultancy Farm-te hian an thawk vek bawk a ni. Heihi ka ngaihtuah a, a mak hi ka ti a. Nikum August (Dy. Speaker-in Chair a la a)

DEPUTY SPEAKER : Sawi chhonzawm rawh le.

PU C. LALSAWIVUNGA: Minute 5 chu a kal hmanin ka hria. Pu Dy. Speaker, nikum August thla chhung ringawta hemi work-order te pawh hi pek a nih hmel a ni. Hei hi a mak ka ti a, a dangdai ka ti a. *Hnam Run*-ah mi tam tak MNF hruaitute pawhin hna an mamawh ngawih ngawih a, Block hruaitute pawhin an mamawh ngawih ngawih a, Group leh Unit-a MNF hruaitute pawhin hna an mamawh ngawih ngawih a, helaia mi tlemte duhsak biknaah pawisa heti zat a kal a, hna heti zat pek a ni bik hi a paw ka ti a, ‘party mipuite inzahlohna leh inpawisaklohna a awm em aw?’ tih kha ka ngaihtuahnaah a awm hial a ni.

Tin, Sports Department-ah hian restricted tender hmanga hna pek zat hi 48 a awm a, departmental works hi 60 lai a awm bawk a. PMJVK hnuaia hna 84 awmah hian 3 thawh zawh niin a lang a, a bak zawng hi chu 10% te, 20% te kha a ni deuh vek a ni. ‘Engatinge pawisa awm vek tawh si, hna hi thawh a nih loh?’ tih kha Pu Dy. Speaker, vawiinniah hian ka zawt duh a ni.

Tin, Agriculture Department bikah hian han lut leh ta ila, tawitein. Tun kum kal mek 2022-2023 budget ai hian kumthar 2023-2024 a hemi demand han en hian, Agriculture bikah hian capital expenditure-ah nuai 1 chauh dah a ni a, chutihruual chuan a budget, a demand hrim hrim hi -2.74 in a tlem a ni. Tin, Demand No. 47 - Irrigation & Water Resources-ah pawh hian -3.28% in a tlem bawk a ni. Kum 3 chhunga buh leh bala intodelh te kan intiam a, vai-buhfai ring lova mizo-buhfai ei tawh tur tein kan intiam a, engatinge kan agriculture-te, kan irrigation te hi buh leh bal, thlaia kan intodelhna tur lamah hian a hniam zawng veka hetia kan kal?

Pu Speaker, kan thusawiah hian kan ding lo ni hian a lang tlat mai a, a pawh pawh ka ti khawp mai a. Ei leh bar, sum leh paiah kan intodelh lova, state dang atangin buhfai kan lalut a, vawiin ni thleng hian. Kan ramah bu leh bal kan intodelh theihna turin phaizawl hmun tha, awih tha Pathian-in min pe a, tui kan laka, tui lak hmanga hna kan thawh theihna turin pawisa pawh irrigation-ah te, agriculture-ah te hian dah tam ila, tichuan tui lakna te nei tha ila, buh leh balah hian kan intodelh mai dawn a ni. Tin, kum 5 dawn lai budget pass-naah kan tel ve a, Pathian leh mipuite zarah, kuthnathawktute an thlai thar an thawh rah an seng vena tur hian Mizoram budget-ah tun kum 5 chung hian thali thar leina tur cheng khatmah dah a la awm lo; hei ringawt pawh hi

kuthnathawktute tan a pawl a ni. Chuvang chuan, khawvelin ram hmasawna a tehna lian ber chu 'kuthnathawktute dinhmun dawmkannaah hian a ni thin a ni' tih lai hi ka sawi uar duh a.

Tin, Demand No. 45 - PWD hi tlemte talin han tarlang ve ila. Tun dinhmunah hian Mizoram PWD hnuaiah contractor bill ba tlingkhawm hi crore ₹165.58 a awm mek a, supplier bill ba hi ₹7,66,640 a awm bawk a. Tin, company emaw, firm emaw hnena PWD hnuaia ba tlingkhawm hi crore ₹24.92 a tling bawk a ni. Chutih lai chuan, PWD demand han en ila, -49.66 in a tlahniam si a, PWD bika kan leiba ringawt pawh heti zah anih lai hian, kan demand-ah hian a tlahniam hle a ni.

Engpawh nise, Pu Dy. Speaker, ka sawi duh chu, kum thar budget-ah hian Kamrula te, Majumdara te, Zoramchhana te an lar em emna tur budget hi a ni leh ang tih hi ka hlau em em a ni. Chuvang chuan, vawiinniah hian heng kan demand atanga han en hian, Mizoram mipuiin kan mamawh kawngpui tha, kan basic infrastructure siamna tur hi hmuh tur a awm lo niin a ngaih theih a, hei hi a pawl ka ti khawp mai a. 'Hmasawn tak tak hi kan tum lo nge?' tiin vawiinniah hian ka ngaihtuahna ka seng a ni.

Finance pawh ka lut hman ta lova, han luh pawh ka duh viau nain. Engpawh ni se, kan sum bawmpuia *other charges*-ah Finance-ah khan nuai ₹22,200 chuang kan dah a, SEDP-ah crore 595, a hlawm hlawkin kan dah tawh bawk a, *major works*-ah crore eng emaw zat a awm bawk a ni. Heng zawng zawngte hi PWD-ah hma kan sawna tur atante Agriculture-ah te Irrigation-ah te hian Pu Dy. Speaker, a tam thei angin pawisa dah ni sela, mipui tan kan budget hi hmang turin 'ke i pen ang u' tih kha ka sawi duh a ni e. Ka lawm e.

DEPUTY SPEAKER : Awle, Member zahawm tak Pu Zothantluanga ka sawm e.

PU ZOTHANTLUANGA : Pu Dy. Speaker, ka lawm e.

Vawiinah hian kan chief minister zahawm tak demand te, Pu C. Lalrinsanga leh Pu Robert Romawia, kan minister zahawm takte demand sawina hun kan nei thei a. Kan budget session hnunung bera kan thusawi hnun berna hun kan han thleng tur hi 'a lunglen thlak dawn hle mai' tih te ka ngaihtuah a. Tichuan, demand hi sawi chho mawlh mawlh mai ila a tha awm e. Demand No. 22, Sports & Youth Services chungchang hi ka han sawi hmasa ber ang a.

Hmanniah khan *Private Members Resolution*-ah khan hei hi ka subject a nih avangin sawi tur ka nei teuh mai a, minute 40 chuang ka lo sawi tawh kha a ni a, nimahsela, eng emaw zat han sawi leh ka duh a. Tichuan, tun MNF sorkara Sports-in hma kan sawna em em pakhatnaah chuan - *Mizoram Sports Policy, 2019* kan neih kha

sports-a hma kan sawnna ber leh, a bul tanna a ni a. Hei hian sportpersons te tan sorkar hna Group B hnuai lamah *reservation* a siam a, 5% dah a ni a. Tichuan, department te hian kan hrechiang lo nge ka hre lova, kan recruitment siamah pawh kan tihdanglam chhoh a ngai tawh dawn a ni. Hei hi kan hriatreng a pawimawh awm e.

Tin, a dang leh ah chuan, Sports chu '*industry*' ah siam a ni a. Industry-a dah a nih hian, sports chu sumdawng thei, sports hmanrua te leh hmunhmate sumdawn theihna atana kan han siam te hian sports-ah nasa takin hma min sawn tir a ni.

Tin, Mizoram State Sports Council kha technical authority-a dah a lo nih khan, hei hian nasa takin sports-ah hma min lak tir thei a. Sports avangin cash incentive award kha siam a ni a, chu chuan sportpersons te nasa takin a ti tang a. Kan hriat angin Jeremy te, Remsiami te pawhin he policy siamthatna avangin 'sum leh pai tam tak an dawng a ni' tih pawh kan hria a. Zonal, National leh International level-a lawman, bronze a ni emaw, silver a ni emaw, gold a ni emaw a incentive kha a danglam chho a ni tih kha kan hria a. Chuvang chuan, hei hian nasa takin kan thalaite a tiphur chho a, a lawmawm hlein ka hria a.

Tin, sports ruhrel tam tak he sorkarah hian siam a ni a. Central atanga sum kan hmuh te, State atanga sum kan hman te, CSR atanga kan hmuh atang tein kum 2019 atanga vawiin thleng hian ₹571.77 crore kha sports atan hian kan lo hmang tawh a ni tih kan hria a. Tin, phullem phahna tur synthetic turf Mizoram-a hmun 28 ah phah a lo ni tawh a. Tin, District Sports Complex hi Mamit, Lunglei leh Lawngtlai ah te siam mek a ni bawk a, Residential Sports School hi khaw 5 siam mek a ni bawk a, Basketball court leh volleyball court pawh Mizoram-ah hmun 28 laia siam a ni bawk a, Tin, Multipurpose Community Centre hi hmun 4 ah siam a ni bawk a, Girls Hostel pawh hmun hrang hrangah siam a lo ni chho a. Tin, motor sports lama 'race track' tih te kan la hriat ngai reng reng loh, Northeast State dangte pawhin an la neih ngai loh te nei turin tunah hian construction tih mek a ni te hi a ropui em em a ni.

Tin, *River Rafting Rules, 2021* leh *Aerosports Rules, 2021* te kan lo siam ta a. Tin, sports ah hian football ringawt ni lovin, a department-a discipline hrang hrangah kan sorkar hian chak takin hma a la a ni tih hi hmanni ah pawh kan sawi tawh a, Zoram mipuite pawhin an hria a. Heng kawngah hian kan sorkar hi fak loh theihloh a ni. Kan Sports Minister leh Chief Minister te inpekna leh remhriatna avangin heng hi kan chan a ni a, lawmthu sawi mawlh mawlh a ngaiin ka hria a.

Tin, Demand No. 43 - Tourism ah hian lut leh lawk ila. Tourist Lodge kan neih te hi upgrade a ngai khawp mai a. Tunah pawh G20 kan thleng dawn a ni a, ram hrang hrang atangin mipawimawh tak tak an lokal dawn a, thlenna tur tha kan neilo hi inngaihtuahna hun atan hmang ila. Khawpui leh district capital-ah te thlenna tlak tourist lodge tha tak kan buatsaih a pawimawh khawpin ka hria a. A bik takin 'External aided

project' an tihah khan Sports-ah crore 1,250 earmark a ni a, chutiang bawkin Tourism-ah hian crore 1,000 earmark a ni bawk a. Hengte hmang hian hma kan lak chhoh theih a rinawmin ka hria a, a nghahhlelh awm hle in ka hria a ni.

Tin, Demand No. 48 - Information & Communication Technology hi a pawimawh khawp mai a. Ka biala high school pathumah computer set, a full-set in 7 min pe tawh a tin, school dang kan la neihlohnaah pawh hian min lo pek belh zel sela. Naupangten computer thiamna lama an zir zelna ah 'hma an sawnpui viau dawn a ni' tih kha hria ila a tha awm e.

Tin, Demand No. 37 - Co-operation ah hian kan Minister zahawm tak Pu C. Lalrinsanga leh Board lampanga hruaitute bakah Apex Bank officer-te an fakawm hlein ka hria a. Keini bial khu a chenbeh deuh avangin ATM hmun hnihah - Luangmual leh Rangvamual truck terminal ah khuan min siamsak mek a. Tunah hian Luangmual chu hawn tawh a ni a, truck terminal ami pawh hawn theiha peih a ni. Tunah khuan Sairang ah branch leh ATM hman theih turin an siam mek bawk a, hemi kawngah hian lawmthu sawi tur tam tak a awmin ka hria a.

Tin, Demand No. 47 - Irrigation & Water Resources pawh hi sawi a tulin ka hria a. Mizoram ah leilet te kan nei a, thlai te kan ching a, tlangram huan te kan siam a. Horticulture thil reng rengah hian kan hlawhchhamna ber chu tui lakah hian a ni. Eng pawh hi thlai a ni emaw, leilet thil a ni emaw, buh a ni emaw kan that theihna tur chu, tui a awm hian a ni a. Kan ser huan te bakah huan chi hrang hrang - kuhva huan te pawh tui kan neihloh avangin tuihalin an thi a. Tichuan, 'a tam; a thi' kan ti thin a ni. Chuvang chuan, heng a tam ber hi irrigation lama hma kan lak a ngaih zualna a niin ka hria a. Hetah hian tan a ngai hlein ka hria.

Tin, Demand No. 1 - Legislative Assembly-ah hian lawmthu sawina tur a tam hlein ka hria a. Kan Commissioner, officer-te leh Assembly-a thawk zawng zawngte an thawk hah em em a, zanah rei tak tak thleng budget sawiin kan meng a, chumi zawhah kan haw tawh hnuah a tuk leha kan programme tur te an rawn buatsaih char char a. An inpeih hun hunah, zanrei pawh sawi lovin MLA te min han pe thei te hi a lawmawm hlein ka hria a ni.

PWD hi tlem tal han sawi a ngaiin ka hria a. Mizoram-ah hian rel transportation kawng hman tur kan nei lova, tin, lawng kan hmang lo bawk a, thlawhna tlem kan nei a, kan kawng pawimawh zawng zawng hi kawngpui a ni a. Hetah hian kan Chief Minister hian kawng tha hi a ngaipawimawh em em a. Kan ram climate in a zir lova, kan lung a chang tawk lova. Chuvang chuan, fur ah te han chhe deuh thin mah sela, politics inchirhtheh nan han hmang thin mah ila, kan ram kawngte pawh a lo tha nasa tawh hle a.

Tin, kan Chief Minister-in a ngaih pawimawh han sawi ka duh chu -kan ram lung hi a no em em avangin, han roll te pawh hian a keh a, kan kawng a tlo thei lova. Flexible pavement kan tih hian fur khatah a chhe leh thin a ni. Kan lung vang te leh hot-mix plant kan neih that tawh loh vang te pawh a ni a. Mix plant atangin hla deuh deuhah kan phur a, a lo dai a, a roll that hleihtheih lova. Khatiang khan harsatna kan tawh a.

Tunah hian kan Chief Minister hian kan ram kawng a lo tlo theihna tur leh, kawng tha kan neih rei theihna tur atan flexible pavement, alkatra luan aiin hmun tam zawkah rigid-pavement concrete-a siam kan ram kawngah hian a tlo zawk a ni. Kan lung a no chung chung pawhin cement te leh balu te nen a in chawpawlh that chuan kan ram kawng hi a titlo zawk a ni tih hi hriain, chutiang zawng chuan hma a la a ni tih kan hria a.

Tin, hei, Kamrula hi in sawi reng mai a, sorkar hmasa khan ka han chhut thuak thuak a, nuai ₹4,400 man chuang hi hna an pe a ni a, hei a list pawh ka nei vek a ni. Sorkar hmasa in an lo duhsak khan kan sorkar tam tak chuan hna an nei lova, mahse hna lianah reng reng chuan an work-done, kum 10 chhung en te a ngai a, kum 10 chung hna neilo Mizo contractor class I leh II an awm teuh laiin, hetiang ang duhsak loh theih loh, hna lian apiang chhang theia dah tute hi sorkar hmasa an nih avangin, a chhunzawm loh theih loh a ni.

Pu Dy. Speaker, min hriatthiam avangin ka lawm e.

DEPUTY SPEAKER : Member zahawm tak Dr. K. Pachhunga kan sawm e.

DR. K. PACHHUNGA : Pu Dy. Speaker, ka lawm e. Vawiin niah Chief Minister zahawm tak leh a department chante demand leh Pu C. Lalrinsanga leh kan Sport Minister demand te, hei, demand pakhatna CM chanah hian, kan Assembly te an zahawm a, an taima a, an sincere-in an entawn tlak a, an chungah lawmthu kan sawi a.

Tin, finance hi, finance deptt. nih pawh zahthlak khawpin kan au nasa a, kei ka inthlahrung ang reng a. Finance deptt-a thawkte in hah tehreng nen, enkawl thiamlo” kan ti bawih bawih mai a, tubohin kan chhu pawp pawp mai a, ka lainat takzet che u a. Theihtawpin in tang a, kan central service mi thiam kan neihte in ni a. Tin, kan CM pawh a taima a, kan dinhmun a khirh em a. Dik tak chuan kan hre vek a, mahse kan hrelo lui a, sorkarna inchuhna a na bawh a ni ang a, tih kha kan sawi tel duh a.

Tin, member zahawm tak Pu Valtea sawi ang khan, *Kamrula politics* hi kan vawrh lar em em a, social media ah te; MNF hrin chhuak emaw tih khawpin mipui kan bum a. Sorkar hmasaah hna lian deuh deuh 8 (ka hriat sual loh chuan) nuai ₹4000 chung lam a thawh a, chutah work done te thawh zawm loh theih loh, chhunzawm loh theih loh te a awm a, MNF mangai chhuah emaw kan tih hi chu a dik lova. Anih leh, tunge

tribal certificate petu; eng sorkarah nge an pek le? Sorkar hmasa anih kha tribal certificate petu. Anih leh, tunge cancel? MNF sorkarin a cancel a ni lawm ni? Thil hi a lehlingin mipui kan zirtir a, wrong information kan pe hnem lutuk hi chu hrehawm ka ti a.

Tin, healthcare kan sawi chamchi a, tak taah chuan healthcare leiba chu a awm e, mahse, ba hi nawmsip bawlna ni lova, mipui mamawh leh hmasawna (development) atana sorkarin ba a neih, mimal pawhin kan ba a, in kan sak dawn pawhin kan ba a, car kan lei dawn pawhin kan ba a ni. Nawmsip bawlna a ni lova, healthcare-ah hian tih tak takah chuan sorkar hmasa Congress hunlai khan damlo healthcare atanga ba an pek sak chu, ka hriat sual loh chuan kum khatah vaibelchhe ₹8.4 sak a, MNF sorkar, tun sorkar hian hun khirh karah pawh kum 4 chhung, tun financial year chhunga damlo healthcare atangin pek sak a. Chu ka hriat sual loh chuan, vaibelchhe ₹38.6 a ni. Sorkar hmasaah khan healthcare-ah mirethei tan vaibelchhe ₹8.4 kum khatah a pek sak a, tun kan sorkar 'financial management thiam lo' tia kan auh kan auh hian mirethei tan vaibelchhe ₹38.6 hi kum tin a pe a ni tih kha mipuiin kan hriat pawh a ngai a ni. Tun financial year chhung, kum khatah MNF sorkarin damlo, mirethei tan vaibelchhia ₹38.6 a pe a ni.

Tin, Sports Deptt. hmalaknain Zoram khawvel a luah nasa a, ka rilru a lo lan danah chuan, hmanlain mihring nature-ah Europe-ah pawh khawvel civilization hrim hrimah, an khuua nula hmeltha chu 'khawhring a vei' kan ti thin; Europe *Witch-hunt* ah pawh a ni. A awmzia chu, itsikna nen; tun tumah kan Sports minister a che tha em em a, theihtawpin a tang a, sum tam tak a hawn a, sports mite leh thalaite kan lawm a, kan bialte pawhin kan duh a. Mahse, nula hmeltha ber chu khawhring angin kan sawi ta a, mipui pawh awm ngaihna hrelo khawpin kan han au vel te hi chu zahthlak ang reng chu ka ti. Chuvang chuan, 'a work a chhe deuh e; chulai, kha lai chu siam that a ngai' han inbeih bap bap hi chu a awm lutuk a ni. Mahse, mipui mamawh leh kan ram mamawhte rawn hawntu lo vuak hlum kan tum hi chu politician-te pawh hian sim ila a thain ka ring a.

Tin, Tourism-ah pawh potential kan nei tha em em a, kan ram a mawi a, keiniin a mawi kan tih loh hi mite chuan mawi an ti a, an rawn lut ruih ruih a. Tin, tourist project - circuit house ang chi te pawh in nei dawn a tiin ka hria a, khang te pawh kha min han react sak sela ka duh a.

Tin, PWD-ah let leh ila. Kan zin vei vah apiang hian kan kamchhe tleuhnan kan hmang nasa lutuk a; a chhe lai a awm lo thei lova. Kan ruah sur dan kan hria a, 'torrential rain, climate change avangin ruah a sur rei thin lutuk bawk a, hnathawhna hun tha kan nei lo thin' tih te pawh duh chuan a chhuanlam theih a, mahse mipui mamawhna vangin theih tawpin an tanga, kawngtha pawh a tam a, a chhe lai pawh a awm a.

Tin, khawngaihtakin min lo chhinchiah sak se ka duh chu - Lunglei leh Aizawl ATL Road hi kan sawi nasa a, ruahsur vanglai chuan a turu a, a chhiaah kan kal nitin thin a. A thenah te chuan work hi a chak lo em mai a; fur a tla ang a, kan chhe leh lutuk ang tih te hi a hlauhawm a. Khawngaih takin department lam pawhin hei hi chu theih tawpa kawng tha min pek vat kan mamawh a, hei hi min lo chhinchiah sak ula ka duh hle mai.

Tin, ei leh bara intodelh chungchangah Pu Sangtea demand hi - hmanlaiin kan pi leh pu hunah buh chu kan intodelh ngei a, mahse kan changkang chuang lova. Mamawh tam tak kan nei a, kan tlabal em em a. Vawiin niah medical-ah nasa takin he sorkar hian bungthar a kai a, Mizo mipui tan a ni a. Chutih laiin PWD-ah pawh nasa takin thil a ti a, 'a tha seng lo' kan ti a. Lei pawh kan ba, nimahsela kan lei bat hi nawmsip bawlna ni lova, mipuite mamawh leh development thawhna, he ram thang zel tura tan a ni. A nih leh, fapa kan nei a, 'engmah ba suh; in pawh sa lo mai rawh; car pawh nei lo mai rawh' tia ek cheh thuta thut tir tur kan ni em le? Ei leh bar intodelhna tak tak tur chuan agriculture department a awm a, theihtawpin an tang a. Central scheme hrang hrang a kal reng a.

Tin, kan sorkar, kan chief minister-in thapui thawha hmalak a ni a, SEDP kan pek te hi ei leh bara intodelhna tur vek a ni. A nih leh, theih tawpin 'SEDP an pe dawn lo; an pe thei lo; pe rawh se' an ti a, kan han pek dawn tak tak chuan a hrehawm ti pawl kha kan awm a ni. Chuvang chuan, politics-a kan awmna chhan, bial te ina min thlan chhan chu, inti lal tura thlan pawh kan niin ka hre lova. Kan mite tan theih tawpin kan tang ang a, mahse kan mawmawh zawng zawng hi term khatah kan ti seng lova. Chuvang chuan, ka lo sawi tawh fo thin, kan hruaitu, kan hotu kal hmasate chawimawina chang hre lova lal duh lutuk vanga sawi chhiat bawih bawih te hi sim a tha ka ti. Theihtawp an chhuah theuh a, tun sorkar pawhin theihtawp a chhuah a ni.

Ei leh bara intodelh kan duh avangin SEDP pawh theihtawpin kan tang a. Mahse, 'nuai 3 a sem dawn lo, a sem thei lo' tih te. Ni e, keini pawh Silchar-ah kal kan tum a, Durtlang kan thlang a, hma kan sawn zel a lawm le. Vawi leh khata nuai 3 pe tla vek thei tur sorkar hi an awm kher lo mai thei a ni, tun ang mass scale-ah chuan. Heng te pawh hi mipui te hrilhhriat thiam, Pathianin rem a tih chuan a hun, takah sawi sawi mahse kan sorkar tho a ni a. Chuvang chuan, vawiinnia kan healthcare te, medical leh sorkar department hrim hrim he hun thim leh khirh kara he ram min hruai dan, kan CM leh kan sum enkawl danah te, kan hnathawh te en hian leh pekah kan sorkar ngei pawh ka ring a. Mipuite pawhin kan hriat, tute'n emaw kan mit lo hupbeh an tum a, chhe tin reng a thil an sawi 'Kamrula' hi tunge a nih? A nih leh *trolley politic* hi engnge a nih tak tak? Airport a chhiat zia kan hria a, a hrehawm lutuk; kan zin thin a, kan zak a ni. Mahse, kan sorkarin kan CM-in Airport tha lutuk siam a tum a, a riruang, a thlalak te phei chu a hmuhawm lutuk a, *a-international* a ni, chu chu Mizoram ta a ni a. In kan sak lai chuan thenawm te bungrua pawh kan hawh a, kan tuthlawh te a bo a, kan suahdur te a

bo a. Chuvang chuan, trolley tichingpentu emaw, a hawhtute emaw hi sorkarin a hrem reng a, a chawi pawh an chawi tir a, kan hua a ni. Mahse, kan Airport tha lutuk tur hi chu ‘mipuite ta a ni’ tih kha Pu Dy. Speaker, ka kan sawi tel duh a. Sawi tur tam tak a awm a.

Kan hon. CM demand te, kan Sports Minister leh Pu Sangtea demand te hi, he Zoram leh hnam hmasawn nan leh that nan ‘pass ngei ni se’ tih kha ka rawn support a ni e.

DEPUTY SPEAKER : Member zahawm tak Pu Lalrindika Ralte ka sawm e.

PU LALRINDIKA RALTE: Pu Dy. Speaker, ka lawm e.

Vawiin hi a tawp ni a ni a, tin, budget session kan neihna ni hnukung ber tur a ni a. Rilruin thil hrang hrang a dap ve a. Pathian leh mipuite zarah helai hmunah hian ding ve theiin kan lo awm a, a lawmawmin ka hria a. Amaherawhchu, ‘ram leh mipuite duhthusam ka ni em?’ tih erawh chu ka inngaihtuah thin a; rilruah thahnemngaihna te a awm ve a. ‘Kan mipuite mit hi ka tlung ang em?’ tih te ka ngaihtuah a. Ka bial mipuite pawh ka rilruah hian ka hre reng thin a. ‘Eng angin nge mi hian min ngaih ang a, eng angin nge min hmuh ang aw’ tih hi ka rilruah a awm thin a. Amaherawhchu, ka ngaihtuahnaah chuan, an niin tling tawk lova min ngai a nih chuan min hnawl mai turah ka ngai a. Chutiang chuan ka inbuatsaih bawk a, keimah hi chu. A hranpaa va nih luh vak tum emaw, va tih luh vak emaw hi kei chuan tumna pakhatmah ka nei lova. Ram leh hnam tan kan penchhuak kan ti a, mipui rawngbawl turin kan penchhuak kan ti a, kan rawngbawl sak mipuiten an rawng bawl lova min hria a nih chuan, an duh hun hunah min paihthla mai turah ka ngai a. ‘Kan ta a ni lo’ tih hi ka chiang khawp mai a. A neitu dik tak chu ‘kan mipuite hi an ni’ tih hi ka hria a. Chumi hre chung chuan phak ang tawkin helai hmunah hian thu te kan sawi ve thin a, ram leh hnam tan te ngaihtuahna kan seng ve a ni tih ka sawi hmasa duh bawk a.

Tin, kan senior tam tak, mi zahawm tak takte an awm a. Helai hmunah hian mi hrang hrangte kan awmkhawm a, kan inau buai nak nak thin a. Engpawh ni se, heng hi ‘ram leh hnam tan a ni’ tih hi kan hriat nawn a thain ka hria a. Mimal inhuatna te leh mimal thil anga dawnsawn loh hi a thain ka hria a. Tin, chutiang ngaihtuahna nei chung thu kan sawi a nih chuan, kan rilru kha a dik lo a ni mai a. Chuvang chuan, chutiang ngaihtuahna nei chuan an lo tuar ve deuh a nih pawhin, anmahni tuar awm tak an tuar ve ah ka ngai mai bawk a ni. A tawpna ber a nih avangin chungte chu han sawikual kha ka duh ve deuh a, Pu Dy. Speaker. Engpawh ni sela, ram leh hnam tan theitawp kan chhuah tlan zel hi a thain ka hria a.

Tin, kei chuan ka ngaih pawimawh em em chu, kan rilru put hmang hi a dik chuan, kan hre thuk viau lo a nih pawhin, kan rilru a dik hrim hrim hi chuan, chu rilru dika chu a pawimawhin ka hria a. Hmasawinna kan han sawi thin pawh hian a nihna takah chuan, hmasawinna daltu hi chu ‘kan rilru put hmang hi a ni’ tih a chiangin ka hria a. Politics kan khelh danah pawh hian party rilru hi inthlan vel laia kan lo pu a nih hi chuan a tawk viauin ka hria a. Inthlan tawh hnu helaia ram kan kaihhruai tawh hnu hi chuan, chu thinlung chu kan paih ngei ngei hi a thain ka hria a. Chu chu ‘ram hmasawinna daltu a ni’ tih hi a chiangin ka hria a. Vawiinah hian chumi rilru pu chuan ram hi kan kaihhruai ngei ngei a thain ka hria a ni.

Demand No. 31 hi han sawi lawk ka duh chu - a pawimawh a, Agriculture hi. Pathianin mihring min siam danah hian leilung hi a dah pawimawh em em a. Leilung nena inlaichinna neia eizawng tur hian pathianin mihringte min siam a. Vawiina mahni hmasialna kan tih zawng zawng leh corruption kan sawia pawh hi leilung rahchhuah ei leh, chu ta tanga khawsak siam kan tum loh avang chuan corruption pawh hi, chu chu a bul chu a ni. Chuvang chuan, Agriculture hi a pawimawhin ka hria a. Tin, leilung hi Pathianin kan inngahna tur, kan eizawna tura min pek a ni tih hi kan hriat nawn a thain ka hria a. Leilung hi kan hman tangkai a pawimawh a, hman tangkai kan tum pawh a pawimawh a, chu chu a’-Pathian-thu bawk a ni’ tih kan hriat a thain ka hria a. Tin, thawhrimna tel lo hlawhtlinna hi Pathian meuh pawh hian min kawhhmuh loh avangin, keini pawh hian kan mipuite hi ‘thawhrimna tel lo hlawhtlinna hi kan kawhhmuh tur a ni lo’ tih hi kan hriat a thain ka hria a.

Israel Prime Minister Golda Meir-i hian thil pakhat a sawi a, ‘Mosia lakah hian keini Israel fate hian vui-vaina pakhat kan neih ve chu - kum 40 chhung thlalerah min kal kualpui a, min hruaichhuak a. Chutah, a tawpah Middle East-ah tuialhthei awm ve lohna hmunah min hruaichhuak a’ tiin a sawi a. Amaherawhchu, Arab ram kan han ngaihtuah pawh hian, vawiinniah chuan Israel dinhmun hi kan duhthusam ber zawk a ni ang. Chuvang chuan, leilung hauhsakna kan tih lai pawh hian, thawhrimna tel lo hauhsakna hi chu Israel fate pawh kha Pathianin ‘a tum puilo a ni’ tih hi kan hriatchian a thain ka hria a. Chuvang chuan, he hnam hi thawkrim tura kan inbuatsaiha, ‘chutah lo chuan hlawhtlinna tak tak leh lungawina hi a awm lo a ni’ tih hi kan hriatchian a thain ka hria a. Agriculture kan sawi lai hian chu chu ka han sawi tel duh bawk a ni.

Tin, Pu Dy. Speaker, PWD-ah hian tlem te han sawi tel ve ka duh chu – hei, kan bial tlem ka sawi duh a. Zamuang leh Hriphaw inkar kawng khu kan buaipui ve hle a, a upa tawh a. Khu khu kan Chief Minister hian min ngaihpawimawh sak ve se ka duh khawp mai a. Metal khu a rei tawh a, kum eng zat a upa nge ka hre chiah lova, a chhe nasa tawh hle mai a. Khu khu kawng thui lo-te a ni a, km 9 vel lek emaw a ni a. Khu khu min ngaih pawimawh sak theih chuan ka lawm ngawt ang.

Tin, lei-dawh khu a awm ve nual a, Teirei-ah khuan hmun hnihah lei khu dawh a ni a, Langkaih-ah khuan dawh mek a ni bawk a. Hei hi a rei tawh ang reng khawp mai a, hmanhmawh a pawimawh bawk si a. A hmanhmawh theih dan hi min ngaihtuahpuia, Chief Minister hian hma min lak sak ngei se ka duh bawk a ni.

Sports-ah hian tlem han sawi ka duh bawk chu - sports hi kan ti nasa bawk a, 'smart city' tih zawng zawng nen, sports-ah field siam hi kan buaipui viau mai a, ram kan than tir tum dan hi kan ngaihtuah nawn a thain ka hria a. Sports hi hmasawnnain a ken tel a ni a, mahse hmasawanna tak tak miin an sawi hian 'sports' hi an dah hmasa ngai lo; miin an dah pawimawh chu – 'education' te an dah pawimawh a, 'health' te an dah pawimawh a ni. Hriselna leh ngaihtuahna tel lo hian sports-ah hian dinhmun ropui tak thlen a harsa khawp mai. Chuvang chuan, sports-in a demand nghal chu 'thahrui' a ni; thahrui nei tur hian hriselna te a pawimawh; chumi taksa hriselna piah lamah chuan kan ngaihtuahna hi a hrisel a pawimawh a, thahrui hi chuan thui tak kal a har khawp. Vawiina kan ngaihtuah tur chu - *ngaihtuahna*, mihring chhungril ngaihtuahna, kan ngaihtuahna zawng zawng drive tu hi kan ngaihpawimawh a thain ka hria a, chumi tel lo chuan ropui a har; tharum hian khawvelah ram inchi khat pawh a lak tak tak theih tawh loh tunlaiah.

Chuvang chuan, chutiang ngaihtuah tel chung chuan kan ram hi kan kaihhruai a pawimawh a, kan pawlin a tha kan tih chauh te maw, keiin a tha ka ti chauh emaw hi kan ram leh hnam tan a lo tha ber kher lo thei. Kan ram leh hnam tan a tha lo a nih chuan kan party a ni emaw, keimah a ni emaw, ka dinhmun thatna tur pawh ni se, chu chu kan malmak ngam a pawimawhin ka hria a. Chutiang ngaihtuahna dik tak pu chung chuan kan ram hi kan kaihhruai a pawimawhin ka hria a, 'mipuite min beiseina pawh a ni' tih kan hriat nawn a thain ka hria a ni. Ka lawm e.

DEPUTY SPEAKER : Member zahawm tak Dr. ZR Thiamsanga ka sawm e.

DR. Z.R. THIAM SANGA: Pu Deputy Speaker, ka lawm e. Vawiin hi Mizoram Legislative Assembly vawi 8-na hun tawp kan lo thleng leh ta der mai a. A hmasa berin, he hun min hruai thlengtu Pathian hnenah lawmthu ka sawi a. First-timer te kan ni a, sawi sual leh tih dikloh tam tak te pawh kan nei ang a, chungah chuan ka member-pui zahawm tak tak te leh mipui min lo thlirtute chungah pawh, tih dikloh te ka neih chuan min ngaihdam ka han dil nghal a. He rorelna sang ber uluk taka lo thlirtu Zoram mipui zawng zawngte leh a bik takin Champhai North, ka bial mipuite chungah lawmthu ka sawi a ni.

Vawiinah hian demand pawimawh tak tak mai, kan CM zahawm tak demand te, kan Agriculture Minister zahawm tak Pu C. Lalrinsanga leh kan Sports Minister zahawm tak Pu Robert Romawia Royte te demand kan sawiho a ni a. A hmasa berin kan

Finance Minister, ka Chief Minister zahawm tak ni bawk demand chungchang hi han sawi hmasak ka duh a.

Healthcare scheme chungchang hi a hmasa berah sawi ka duh a ni. Mizoram hian kan hriat chian a ngaiin ka hria a, Mizoram State-Healthcare Scheme hi ka sawi fo tawh thin angin kan Chief Minister-in a vei a, a bul a rawn tan a ni. Pu Zoramthanga hian 2008-ah bul a rawn tan a ni. Hei hi Mizoram mipui hriatah he House zahawm takah hian ka sawi nawn duh fo a ni. Tichuan, 2008-ah corpus fund atangin vaibelchhe 50 a dah a, kan sorkarna a lo tla ta a. Sorkar thar hi 2018-ah kan han inthlak leh a, 2018-2019-ah vaibelchhe 50 corpus fund-ah a rawn dah leh a, tun 2022-2023 budget-ah vaibelchhe 50 a rawn dah leh hi a lawmawm ka ti hle a ni.

Nichina kan hriat leh ngaihlak tak ang khan, he Mizoram State-Healthcare Scheme hi tun MNF sorkar term kum 5 pawh la nilo, kum 4 chhung hian damlo bill pek chhuah zat kha ₹1,38,43,36,500 a ni a, tun kum 4 chhung hian. Sorkar hmasaah pawh MNF-in an lo duan sa an han kalpui tak kum 10 chhungin ₹82,82,44,013, kum 10 chhung khan he Healthcare bill-ah hian pawisa an pe a ni. A inthlau hle, kum 10 leh tun kum 4 chhung pawh kha a inthlau hle a ni. Healthcare-ah hian sorkar dang te pawhin Mizoram budget atang hian a corpus fund-ah te sum hi an la dah lo niin ka hria a. Hei hi kan sawi kan sawi chi pawh a ni lova, a ba angin kan sawi leh thin a, ‘vaibelchhe 60 an ba’ kan han ti leh thin a, ‘engtiangin nge ni heng vaibelchhe 65 hi damlote tan hian a rulh dan te pawh hi kan ngaihtuahho ang’ tih te hi kan sawiho zawk awm tak a ni a, Pu Dy. Speaker, i sawiho zawk ang u, hei hi. ‘An ba’ kan han ti leh thin a, niminah phei kha chuan hrehawm ka lo ti a. Mizoram Healthcare Scheme-ah te kan pek tam tawh zia hi, kan ba tam ang, bat chu; amaherawhchu, bat chu ‘bat’ a ni a, he sorkar hian a rulh theihna turin tunah pawh Asian Development Bank atangin vaibelchhe sang 1011 puk an dil mek a, a tha mi lehnghal maw, tam tak vaibelchhe 700 chuang kha central tum tur a ni leh nghal, vaibelchhe 750 vel kha. Chuvang chuan, Healthcare Scheme kum khat leh a chanve deuhthaw mai kalpui theilo sorkar ina engatinge maw ni le? Kan sawi sel kan sawi sel hi chu a dik lo a ni. ‘I ti ho ang u; i thawk ho ang u’ tih hi kan tih tur a ni. mipui hma kan hmangaih tak taka, kan damlote kan hmangaih a nih chuan, i thawk ho ang u. Sawisel lam ni lo hian ‘i thawk tlang ang u’ tiin i ngaihtuah tlang teh ang u.

SEDP ah te pawh, ‘lem ang min der san’ an ti a, kan han sem tan a ni, Pu Dy. Speaker; ₹25,000/- kan han sem a, a nuam a nia; mipui pawh an lawm a ni. ‘Lem ang kan der lo, a tak kan ti a ni’ tih hi vawiinah hian ka sawi duh a ni. Chubakah *untied fund*-ah te pawh vaibelchhe 25 kan han dah leh a, tunah pawh vaibelchhe 300 kan han dah leh bawk, SEDP-ah hian. Tin, scheme hrang hranga *counterpart funding* atan vaibelchhe 220 kan han dah leh a, kum an her tha ang a, project te kan han siam chho tan dawn a ni; kan sorkar leh ngei dawn a ni, Pathian zarah, maw. Chutah chuan healthcare scheme-ah bat kan neih hi ka ring tawh lo; kan ba pawh hi damlo rethei tak

tak ten min lo hrethiam hram rawh u, Zoram mipuite khan. Hei hi chu kan hotute hian pek leh tumin ‘theih tawp an chhuah mek a ni’ tih hi wawiinah hian ka sawi duh a ni.

Sawi tur hi a tam si a, Pu Dy. Speaker, PWD lam hi ka han sawi tawh mai ang a. Hetianga kum harsa, Covid-ina kum 2 lai mai min han tlakbuak hnuah pawh theihtawp an chhuah a, a changtu kan Chief Minister leh a thawhpui PWD ho an fakawm hlein ka hria a. Hmun tinah kawngpui hi a phe suau mai a, mahsela, nakinah fur a rawn ni ang a, a min lo thei dawn lo; kawng tha tak mai kha kan la sial zo lo deuh si a, khangte pawh kan in hriatthiam deuh chu a ngaiin ka hria a. Tunah hi chuan Champhai pawh, kan sawi tawh ang khan nidangah darkar 10-12 deuhthaw kal thin kha, tunah chuan darkar 5 lekah kan thleng zur zur tawh, kan lehleng thei tawh a ni, Pu Dy. Speaker. Hmanni Lunglei ka kal pawh kha tlemin tunlai hian thual ngai an thual mek a, tunah chuan darkar 4-ah kan thleng deuh thaw mai a. Chutiang khawp chuan kawngah na na na hi chuan he sorkar hian tunhma atang khan hma nasa takin a la ni.

Nichin khan ka sawi hmaih a, a tir lamah khan, Mizoram Assembly Secretariat hi an fakawm hlein ka hria a, a tir atanga wawiin thlenga taima taka an thawhna leh an thawhrimna hi a lawmawm ka tih thu ka sawi a ni.

Sports lam hi ka han sawi ang e. Sports hi a pawimawh a, Mizo thalaite tan eizawna mai ni lovin, hriselna leh Zofate khawvela min phochhuahna hmanraw tha berte zinga mi a ni a, kan hria a ni. Chuvang chuan, he sorkar hian thalaite hmakhua ngaiin theih tawpin tunah district hrang hrangah hma an la a, kan sawi seng lo ang a. Amaherawhchu, ni e, hei mahni bial kan sawi lo thei lova, a hma khan PMJVK khan keini district hi min huam ve loh avangin sports lamah hian kan la hnufual a. Chuvang chuan, tunah hian kan Minister zahawm tak hnena ka chah duh chu - New Champhai Sports Complex, Champhai-a tuna ruahman mek hi min tihpuitlin sak se kan duh a. Tin, Sports Authority of India - Science Centre hi Champhai-ah khian min dah sak ve ngei se; Volleyball Indoor Stadium, Champhai district hian zan lama changtlung taka volleyball kan khelh ve theihna turin min siamsak bawk se kan duh a. Sorkar hmasain Zotlang Sports Stadium tha deuh min siam sak a, kan lawm khawp mai a. Mahse 40 meter lane track tlinglo khi tling ngei turin leh football coaching centre-a min siamsak turin kan ngen a. Tin, ka biala Hnahlan field cheithat leh turf min han phahsak ve turin ka duh a; Hmunhmeltha Hockey Training Centre atan ram pawh an pe phal a, khi khi min siamsak bawk se; Champhai District Badminton ten *Khelo India* centre-an dil hi min bawhzui sak se kan ti bawk a. A tawpnaah chuan, Rabunga-ah karate trainer tha tak khi sorkar hian min recognize sak ve se kan duh khawp mai a. Tin, an field min lo chei sak tawh kha min puitlin sak se ka duh bawk a ni.

Pu Dy. Speaker, a pawimawh ber, Mizoram-a a pawimawh berte zinga mi, Agriculture Deptt. hi tlem sawina hun ka la neiin ka hria a. Niminah ka sawi tawh a, *Best Performing State in Agriculture in North-East State* kan nih thu te, 2021 Good

Governance index-ah agriculture hrang hranga hill state-ah lawmman *pakhatna* kan lo dawng tawh a ni. Kan Agriculture Minister leh a thawhpui Agriculture Deptt. A thawkte an fakawm thlawt a ni.

Buh-a kan intodelh theihna turin hmalakna - leilet siam, land development thar hectare 484.67 siam a ni a. Tin, land development avanga leilet tha tak tak neih phah chhungkua tam tak te hi kan minister leh a department chungah hian kan awm hle a ni. Chutih laiin Hnahlan, ka bial phai khi Mizoram-ah chuan agriculture potential area tha berte zinga mi a ni a, tunah khian agriculture development leh land development an bei mup mup mai a....

DEPUTY SPEAKER : Kan chawlh hun a lo thleng leh ta a, i sawi laklawh viau mai a. Kan sawi zawh tir law law dawn em ni? (*House-in a remti a..*) Awle, sawi zo rawh le.

DR. Z.R. THIAMSANGA: Kum tharah chuan buh pawh kan thar tam hle tawhin kan ring a.

Nichinah khan ka sawi hmaih hlauh mai a; Champhai leh Hnahlan-ah grape nasa tak maiin, kan sorkar hmasaa chul ram ang maia awm tawh hnu kha, he sorkar thar hian min han min han tuai thar tir leh a. Tunah phei chuan *Grapewine Rules* min han siam sak ta a, mi tam takin eizawn nan hmangin, a nuaih tel tunah khian an lo nei thei ta a, kan lawm hle a ni.

Agriculture-ah tlem ka han sawi belh leh ang e. Irrigation & Water Deptt. chungchangah pawh tunah hian hma min laksak mek a, nasa takin kut hnathawktute tan; ka bial mai ni lovin, Mizoram hmun hrang hrangah Agriculture Deptt. hian hma nasa takin a la a. Hun khirh leh harsa tak Covid karah pawh theih tawp an chhuah a, duh ang erawh chuan Covid avangin buh leh balah, ‘mizo-buh hlang kan ei ang’ kan tih pawh kha, Covid hi awm lo se chu mizo-buh hlang hi kan ei theiin kan ring a ni. Covid hi kan chhuanlam lo thei lo; ram changkang tak takte pawh an beidawng a, tam tak an inawhhlum phah a, industrialist tam tak te pawh. Chuvangin, he kum thar, sorkar tharah hi chuan hun thar a awm ang a, agriculture leh development hrang hrangah pawh ‘Zoram hian hma kan sawn ngei ang’ tih ka beisei a ni.

Pu Dy. Speaker, hun min pek belh avangin ka lawm a. Demand pathum - kan CM demand te, Pu C. Lalrinsanga demand leh Pu Robert Romawia demand te hi ka thlawp a, pass ngei turin ka rawn support a ni e. Ka lawm e.

DEPUTY SPEAKER : Tunah chuan kan chawl ang a, 2:00 PM ah sitting kan chhunzawm leh dawn a nia.

2:00 PM

DEPUTY SPEAKER : Quorum kan form em? (*House-in Quorum a form a...*) Awle, demand sawiho kan chhonzawm leh ang a. Tunge sawi hmasa ber ang le? Member zahawm tak Pu VL Zaithanzama kan sawm e.

PU VL. ZAITHANZAMA: Pu Dy. Speaker, ka lawm e. Demand No. 45 - PWD-ah hian ka han lut nghal mai ang e.

Kan Budget han en hian a zahve dawn, 49.66-in a tlahniam a, ‘kawng tha neih kan tum lo em ni?’ han ti dawn ila, PWD changtu kan CM zahawm tak hi kawng tha duh hle kha a ni bawk si a. Heti chungka kawng tha tak min neihpui theih chuan a lawmawm hle turah ka han ngai a ni.

Hmanni lawkah Dampa Constituency leh Aizawl West-III inrina, Tlawng Kai-ah lei dawh contractor, Sath Guru Engineering & Allied Services Private Limited te hna muang lutuk avangin an department hotute leh Central YMA hruaituten an zuk endik kha kan hmu a, a hnuah keini pawh kan zuk kal ve a. February Ni 28, 2019 a zawh tura tih kha vawiin thlengin zawh a la ni lova. Tun thla hi, hmanna an indawr danah kha chuan, lei dawh zawh hun tura an intiama kha a ni a. An la zo lo hle mai a, ka rilru a tina khawp mai. Hetianga MPWD pawhin *show-cause notice* tum hnih lai an pe hi; Superintendent Engineer, Central Circle atangin tum khat show cause notice pek a ni bawk a. He mi ka han sawi duhna chu, kan mi rawihte, kan hnuai a thawkte kan ngam lo; hna an chawhlsan rei avangin lei (Bridge) siamna tur structure an siam te hnimin a bawh luk a, hmanna an han sam fai a, zawi zawi chuan hma an han la leh chu a ni a. Tun hnu zelah mahni rawihte ngam lo em em, hetia mihring inzah lo, Mizoram sorkar leh mipui min zah lo em em mai hi, ‘engtin nge kan tih dawn’ tih te ka rilruah a awm a, ka han sawi chhuak a ni.

A pawl leh zual em em chu - khumi Tlawng Lei hlui zawk khu a tuiiek nasa tawhin, rei daih tur a ni tawh lova, motor lian tan zawh ngam a ni tawh lova. Accident leh nunna tana hlauhawm tak te thleng mai thei dinhmunah a ding a. Chuvangin, he contractor hi hnathawk chak leh zual tura nawr zel a va tul em.

PWD ka sawi lai hian ka bial chhunga Secretariat Complex atanga Maubawk-Lawipui chung lawka hawlh tlang; tlem han cheia kawng tha tak ni mai tur; Secretariat Complex chin phe chu tha taka tih; mumal lo taka tawp ta ringawt saw, sum tlem te hmangin nawr tlang theih mai a ni a. Hei hi kan minister zahawm tak hian min lo chhinchhiah sak se la; saw kawng saw a tlang chuan Dampa lam atanga office rawn dawr tur, Khatla kawn traffic buai nang lovin awlsam tein Secretariat an rawn dawr thei dawn a; Aizawl tlak lam tan kawng tangkai tak a nih dawn avangin ka han sawi ri hram a ni.

Tichuan, Demand No. 11 - GAD-ah han lut leh zuai i la. Sinlung Hill Council hi kan siam ta sa sa a; Ministry hmasa tawp lama remna siam kha a ni a, tunah hian office te hawngin an inbawl hrang ve a. Hetia kan tih rau rau hi chuan, tun aia changkang deuh, 'hna thawk theia siam a va tha em tih ka ngaihtuah a; 'a hming chauha office hawnsak ringawt lo deuh hian' tih ka rilruah a awm a ni.

GAD kan sawi lai hian, tunhmaa ka sawi tawh min veipui vak loh - India ram khawpui hrang hranga Mizoram House kan neihte kan enkawl dan hi tun aia *mizo-a* enkawl hi ka va duh em. Mizo ka ni a, kei chu; zing-chaw te, tlai-chaw te ei ka duh a, mizo-chawhmeh siam ei chakin pawn lamah te kan ei chhuak a. Khutiang khu a dik lovin ka hria a. Mizo takin, a thawktute pawh khu 'a tam thei ang ber Mizo lak ni se' tih kha ka han sawi a ni. Vawiinah hian demand sawi tur kan ngah deuh avangin ka han hawl deuh thuak thuak ang e.

Demand No. 32 - Horticulture-ah hian, raw-chi lei nan nuai ₹648 zet kan hman tawh a, raw hralhna atang hian nuai ₹200 lei chhuah pawh thil huphurhawm tak niin ka hria a. Hmanni lawkah kan Chief Minister zahawm takin mau, metric ton nuai 250 Mizoram-ah a awm niin a sawi a. Tiang khawpa mau kan ngah si chuan, a dang chin belh ringawt kan buaipui hi, 'a awm sa tih ral dan ngaihtuah hi a tul zawk lo maw' tih ka ngaihtuah a ni.

Tin, thil lawmawm tak mai - khaw chhak lam Thenzawl District in tomato an han thar teuh mai te khi lawmawm ka ti a, quintal 18,420 zet an thar a, Tualte ringawt pawhin tam tak an thar a, Sialhawk-in lakhuihthei tam tak an thar bawk a. Hei hi han sawi rik hram ka duhna chhan chu - Sialhawk hi ka pianna khua a ni a. Kan naupan lai chuan serthlum, lakhuihthei tih vel te hi Tuichangral-ah khian ei tling tura kan ngaih loh a ni a. Amaherawhchu, khawvel a lo danglam a, kan ram Pathian-in mal a sawm a, ti hian tun hma a thlai thar theih lohna ram leh mualah te thlai a lo thar thei ta zel a. Sorkar thar lo piang tur kalphung thar rawn intannaah te ka han ngai deuh a, ka han sawiri hram a ni e.

Demand No. 31- Agriculture-ah hian, buh ni lovin, vaimim-a intodelh kan tum ta mai em ni aw ka ti a. Vaimim chi nuai 390 man kan han lei a, engzat tak thar chhuak ang i maw. He mi ka ngaihtuah lai renga ka rilrua awm chu – 'sem policy' hi mipuiin kan chhawr lem lo; a semtute an hlawk ber zel. Chuvang chuan, 'sem policy' hi chu kalpui zel tawh loh a va tha em. Vaimim-ah tal hian intodelh thei i la chu ran vulhte tan pawh hlawkna a lo ni ve tur hi a ni a; chu pawh chu kan la thleng pha chuang hlei lova.

Tichuan, Demand No. 47 – Irrigation-ah hian vaibelchhe 89 zet kan dah a. He Department hi a pawimawh hle mai a. Agriculture, Irrigation leh Cooperation te minister pakhat enkawl na hnuai a awm hi a fuh ka ti a, hma lak pawh a nuam dawn a.

Irrigation hi a pawimawh hle mai a. Agriculture-a hlawhtling tura kan mamawh chu – tuilak leh transportation a ni a. Irrigation kan tih that chuan, agriculture tan hian hlawkna a ni a. Department inhne rial, pakhatan dahkhawm mai pawh hi rem tak a ni.

Demand No. 22 - Sports hi sawiloh theih a ni lova. Phullem hmun 22-ah phah a ni tawh a - football khelh mual 20 leh hockey khelhmual 20; hockey khelhmual hi Thenzawl leh Kawnpui-ah a awm a, Mizo-thalaitan olympic-a kan lan theihna a ni a; NI. Lalremsiami record ropui tak neiin a rawn haw a, ka la hre vek awm e. Rampum huap inelna hockey-ah hian buatsaih dawn ila, Kawnpui-ah emaw, Thenzawl-ah emaw chuan a buaithlak a. National level emaw, North East level emaw pawh thleng dawn ila, mikhual tan a buaithlak a. Chuvangin, Aizawl-ah ngei hian hockey khelhmual pakhat tal an va mamawh em! Neih ve hi an phu ngawih ngawih a ni.

Tin, combat games ho hi medal kan lak tam theihna tha a ni a, Mizo-thalaitan talent neiin hi kan ngaihsak tha tawh lova, an tan hian hall pakhat tal sak sak hi an phu ngawih ngawih a ni. Archery thal kaha Mizo-tlangval Lalremsanga, Mizo-Olympian *hmasa ber* kan neiin hi hlamchhiah theih a ni lova. Chuvangin sports complex hmun hrang hrangah kan sa a, ‘combat games-te tan hian sak tumna a awm em?’ tih kha ka han zawt nghal a ni.

Pu Dy. Speaker, pakhat lek; sawi loh chuan a fel dawn lova, Demand No. 37 - Cooperation-ah hian. India rama cooperative movement chak ber ni tur hian theihna kan neiin ka hria a, amaherawhchu, kan la kal fuh hlei thei lova. Kan pi leh pute, Mizo khawsak dan kha a *cooperative* em em a ni. Kan awmdan pangngaia awm hian ‘engatinge cooperative society hlawhtling tak awmna ram kan nih mai loh’ tih te ka ngaihtuah a. (**Dy. Speaker:** Awle, duhtawh dawn tawh rawh le.) Awle; Pu Dy. Speaker, ka lawm e.

DEPUTY SPEAKER ₹: Kan sawi tawh thin ang khan, hun hi warning bell minute hnih a la awmin hmeh a ni a. A hnu minute hnih hun in la neiin chung khan fihlim tum hram kha a tha khawp mai. Chuti lo chuan kan zo tlai leh lutuk ang e.

Awle, tunah tunge sawi leh ang le? Member zahawm tak Pu Lawmawma Tohhawng ka sawm e.

PU LAWMAWMA TOCHHAWNG: Pu Dy. Speaker, ka lawm e. Kan Minister zahawm tak tak pathum - Pu Robert Romawia Royte, a department chan - Sports, Tourism leh Information te, Pu C. Lalremsanga, a department chan - Agriculture, Cooperation leh Irrigation te leh kan Chief Minister zahawm tak, a department chan – Legislative Assembly, Governor, Council of Minister etc. te thlawp chungin, hunin min daih chen chen ka han sawi ang a. Kan sawi kim vek hman lo anih pawhin min lo

hriatthiam ka beisei e. A hmasa berah chuan Demand No. 22 - Sports & Youth Services Department hnuai a mi hi han sawi lawk i la.

Sports & Youth Services Department hi a len loh ngaihtuahin, a thawm a na a, State budget-ah pheih chuan sum neitlem berte zinga mi a ni. Mahse ram pum - thingtlang leh khawpui dapchhuak si an ni a. Hun kal tawh leh kal meka an hnathawh leh an dinhmun pawimawh zia en leh an thiltihte en hi chuan, a tul dan leh a remchan dan ang zela sumte pawh pek belh zel an phu ngawtin ka hria. Mizoram sum tlang tihek lo ni satliah mai lova, Mizoram sumbawm tiphuisui zawk mah chung hian chhim leh hmar, chhak leh thlangah hna an thawk a. An sulhnu hmuh tur awm zut zut hian a changtu minister leh department te awm mai mai loh zia leh an thawhrim zia a tilang chiang hlein ka hria a, an inpekna a fakawm hle a ni. Inkaihruaina mumal zawk leh kawng-hmang fel tak neia Sports han kalpui anih meuh chuan kan Mizo thalai infiammite theihna haichuahin a lo awm a. India mai pawh nilo, khawvel huap pawha hmehhriat kan lo nih phah ta a nih hi.

Demand kan sawi lai a ni bawk a, Lunglei lam demand han tarlang tel lawk ila, Pu Dy. Speaker. Lunglei bial hrang hranga infiammite hmakhua tur atan infrastructure Sports Department-in min rawn hlui ngawt te pawh saw chhiar tham fe a awm ta a, infiamna lama kan awt tur tham a ni tawh a ni. A lawmawm tak meuh meuh a, kan lawm a ni. Chutih lai chuan kan Minister zahawm takin min lo hriatpui tura ka duh chu – Zobawk-a State Sports Academy hna kal mup mup lai, a tawp kan bawk tawh dawn emaw kan tih laia harsatna tawka ‘stay’ kan ni saw Lunglei lampang tan chuan lungchhiatthlak a, a hrehawm kan ti tak meuh meuh a ni. State sorkar level-a chinfel theih a nih chuan khawngaih takin min lo hriatsaka, min lo chinfel ran sak turin ka han ngen a ni, ram pum huap thil a ni tho bawk si a.

Pu Dy. Speaker, sports kaihhnawih kan sawi apianga lo lang ve ta chu ‘PMJVK’ hi a ni a. Ngaihdan nghet tak leh thlir dan dang ka lo neih ve chu - dan bawhchhiain, dan lo angin PMJVK-ah hian sum hi dil ni ve ta sela, an ni hian an rawn pe lek lo ang. Chuvang chuan, guidelines ang thlapa dil thin anih avangin sum hi an rawn pe thin a, tangkai takin keiniin kan lo hmang a ni lawm mi? Chuvang chuan, engnge han sawi leh vak tur awm le? Dan bawhchhiatna a awm em ni? A dan hretu chu Central lam hleihlei an ni dawn lawm mi?

Pu Dy. Speaker, Demand No. 43 - Tourism Department-ah hian han kal leh lawk ila. Ram dang leh India state dangah te pawh sorkar sum hnar tha berte zinga mi a ni a. Tourism lama kan hmasawna hi eng emaw zat awm mah se la, thil pahnih khat chauh han sawina hun a awmin kan hria. Thalaite kaihhruai leh eizawna atana an hmalakna, kum hmasa lam atang bul an lo tan tawh - Tour Guide-te training neihpui leh certificate nena *Registered Tour Guide '89* an lo chherchhuak te, tin, SEDP hnuai *Tour Guide '26* train chhuak an lo awm ta te hi a va lawmawm em! Mizoram chauh ni lo, India ram leh

ram pawn lam pawha hnathawh theihna kawng an lo sialsak a ni a; tam tak zingah hei hi ka han sawichhuak duh a ni. Tourism hmanga sum leh pai hailuh hi uar lehzual ta ila kan ram tan thil chenpakawm tak a nih ngei ka beisei a ni.

Pu Dy. Speaker, Demand No. 45 - PWD hi han sawikai leh lawk i la. PWD hi tunah rih chuan kan ram hmasawna ruhrel khawihtu pawimawh ber a ni a. An mawhphurhna pawh a sang em em mai a, an tihthat leh chhiat hian kan ram leh hnam hmel a chhiat leh a that a tilang thei a. Kawngpui bula in sa ang mai an ni a, fak leh sel pawh an hlawh na ngiang e.

Ram pum huap chuan sawisen a nih dawn loh avangin Lunglei lam Demand han sawi ve leh lawk ila. Lunglei khawpui chhunga kan House Leader zahawm takin budget hnunung bera min tiam ang takin tunah sawn Lunglei khawpui chhunga AOC - Kikawn road chu tha taka black topping-in resurface a ni tawh a, tunah saw chuan motor han tlan vel pawh saw an nui ha ha tawh a ni. Motor-te an hmuhdawm khawp mai; a nawm pawh a nuam a, lawmthu kan sawi a ni. Sawi ban theih loh thil pakhat a awm a, chu chu - Lunglei by-pass road khawthlang lampanga mi saw a ni a. Hei hi ruahmanna kan neih dan leh kan kalpui tawh chin te, kan tum dan te chiang taka min hrilh nawn leh turin a changtu kan Chief Minister zahawm tak ka han ngen bawka a ni. Haulawng - Dawn inkar, PMGSY hnuai kawng laih mek saw a rei ta hle mai a, a thawh tan hun nena en pheih chuan zawh hun a ni tawh viau a; laih zawh hma ni pheih se chuan, by-pass kan neih hma pawha tangkai lutuk tur a ni a. Bill pek leh lak lamah te hian a contractor-te hian harsatna an nei em aw ka ti a. A lo ni a nih chuan, a bik deuh tak pawha lo ngaihtuah ni se la. Sawlai kawng saw tlang se la chuan motor tlan vel leh chhim lam mipui zawng zawng tan thil tangkai a ni thei dawn a, Lunglei khawpui tan ngei pawh chenpakawm tak a ni thei dawn a ni.

A dang lehah chuan, Lunglei Circuit House saw tuna Lunglei hmai tibaltu a ni tlat mai a, sawi tam ngai loin circuit house mamawhna chu a chiang mai awm e. Ruahmanna hmasa kumin financial year, tuna kan pharh mekah hi chuan hma han la tan thei ila kan va duh em. A dang lehah chuan Covid hripui avanga kan tihzui theih tak loh Lunglei by-pass, Eastern-side roadway kan sawi kha, tuna kan sawi tam tak kha chu khawthlang lama mi a ni a, tuna ka sawi hi chu chhuah lampanga mi a ni a. Hei hi kan Chief Minister zahawm tak PWD changtu hian min hriat reng sak sela, min theihngihl sak loh hram sela kan duh khawp mai. Bawngtuhtlawh cheh hnih-khat tal han cheh loh pawhin, a ruahmanna tal chu kalpui hman ila kan thawhuai ang ka ring.

Chhim lam pumpuiin kan hmang tangkai leh Lawngtlai, Siaha, Chawngte, Tlabung te kan lifeline a nih em loh pawhin, kan backbone kawngpui LTL sawi hlawh em em mai saw zawh thuai thuai kan va duh em. Ram mipui tan a tangkai dawn si a. Pu Dy Speaker, chi hnihin siam theih a awm a, a rang chi leh a rang lo chi; Thenzawl - Lunglei road saw uluk taka zira, a tha leh tlo zawka siam dan awm se kan ti ngawt mai.

Demand No. 9 leh No. 14 - Finance leh Planning-ah hian, anni hi Mizoram-buhzem enkawltu leh vawngtu an ni a, ngaihtuah chian poh leh an fakawm kan ti. Covid hripuiin kum hnih chuang the meuh min nuaina hnuaiah hian, sum hmuh tur ang hmu lo chung leh ram mipuite'n kan thawhchhuah ang te te pawh thawk chhuak thei lovin kan awm a, pawn pawh chhuak ngam lovin kan inkharkhip kha a ni a. Ram puma ei leh bar mai piah lamah taksa, rilru leh thlarau nun ten a chhe zawnga min nghawng chung pawh khan, chham lo leh nghei lovin min siam kha a ni a. Faroa hun laia tampui a tlaka, finance minister Faroa ruahmanna fel tak ram mipuite mai bakah a chheh vel ramte pawh puarna tham khawpa tam tuarte a lo chhawmdawl ang khan, a hmun leh a hun takah chung lamin Finance Minister leh a thawhpui Finance Department taima tak tak leh remhria min pe te hi, chumi avang chuan Covid kha khatiang khan kan paltlang niin ka hria.

Pu Dy. Speaker, sawi tur tam tak karah thil pakhat han sawi leh lawk ka duh chu - Covid hrichhia kha 'chhuanlam a tling lo' tiin sawi a lo awm ta a, a hun laia kan mangan thlaphan tehluul nen khan, thihna tlang dang a awmin ka hria. Covid avang khan Biak In kum hnih chuang zet kha kharin a hu-hova Pathian biak, Pathian fak thei lova kan awm kha; Kohhran ten Biak In kha kan khar lem lem lo. Tin, Krismas leh Kumthar kan hmangho thei lo te kha lemchang kan ni lova, task force, VLPF leh LLPF te kha khawdaiah thosi leh vangvat karah a lem lemin an duty lo; Covid-in a nghawng kal zel a ni. Pu Dy. Speaker, Covid dona kawnga ramdang pawhin hmuhawm an tih Kohhran, NGO, mimir leh sorkar thawhhona tha lutuk pawh kha eng emaw zawnga ngaih theih lek lekin, 'engatinge MNF sorkarin a tih loh; Kohhranin engatinge a puan; NGO tel lovin a tih theih loh em ni' tia Kohhran, NGO, mipuite thawhhona tha tak si kha, 'NGO leh Kohhrante hi hnawk kan ti ta deuh em ni' tih ngaih theih tura sawi a awm ta zeuh zeuh a, 'ingaihtuah nawn a tul awm mang e' ka ti a ni.

Pu Dy. Speaker, Agriculture hnuaia kawng hrang hranga kan hnathawhte hi chhuanawm tham a awm a, ka sawi hman hman lovah ka ngai. Chuvang chuan, heng demand pathumte hi thlawp chungin, kha kha ka sawi theih ni se la. Ka lawm e.

DEPUTY SPEAKER : Tunge sawi leh ang le? Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Dy. Speaker, ka lawm e.

Vawiin Chief Minister zahawm tak leh kan minister zahawm takte demand kan sawiho a ni a. Pu Dy. Speaker, tun tum hi Budget Session hnuhnung ber ni a ni a, a hmasa bera ka sawi duh chu - Heti chen hi kan kal chho tawh a. Finance Department chungchang leh Mizoram kan dinmun harsat zia kan hre vek a, revenue kan hmuh dan te kan hre vek a, capital expenditure te pawh kan hria a. Kan hriat angin, vawiin hi last

working day a ni. Service sector-a awm hi an tam a A ahun taka hlawh kan pe thei lo hi paw ka ti. Mizoram-ah Industry sawitham pawh kan nei lova, service sector hi kan inngahna ber a ni a, chuvangin, a hun takah an hlawh te hi pe thei ila ka duh khawp mai.

Nichinah member zahawm tak Pu Lawmawma Tochwawng khan Circuit House chungchang kha a sawi a. General Administration Department hnuai a ni a, keini chhim lamah kan bial fangin emaw official-a kan zinnaah te pawh riahna tur kan nei lova. Hei hi a rei tawh khawp mai a. sak theih a la nih loh pawhin renovate tal te chu min tih sak theih se kan duh khawp mai.

Demand No. 22 - Sporst & Youth Services Deptt-ah hian, Pu Dy. Speaker, kan minister zahawm tak hi kan hre vek a, hmun Mizoram hrang hrangah sports infrastructure lama a thawh nasat zia a lang a ni. PMKY hi ka sawi lo thei lova. Hei, Governor speech-ah pawh hian a sawi chiang a, Pu Deputy Speaker, i phalnain ka lo chhiar ang a –

“The Ministry of minorities, Govt. of India has approved ₹ 80,858.48 lakhs under the PMKVY scheme for the implementation of project in the minority concentrate area in the State” a ti a; ka bial, West Tuipui hi ‘*minority concentrate area*’ a ni lo em mi? Kan minister zahawm takin kha kha min lo chhinchhiah sak se ka duh khawp mai. Ka vui a ni; waviin hian ka vuina thu nangma kaltlangin ka sawi a ni. PMKVY hnuai hna tam tak an thawk a, hna 18 lai a ni a chhiar dawn ila, hun pawhin min daih dawn lova. Chutih siin Tlabung pakhat mah a tel lo hi paw ka ti hle. Hei hi engvang nge, eng a chhan? Tlangbung hi Sub-Division hmasa ber a ni a, Mizoram khawhlun a ni. Chuvangin, Sports infrastructure te pawh kan mamawh ve a, mahse, kan tel ve lova, ‘Engnge a chhan’ tih hi kan Minister hian min sawifiah sak thei se, sports infrastructure Tlabung-ah pakhat mah an dah lo hi. Thalai sports lama tui mite pawh kan nei ve a volleyball, football leh swimming lama tui tam tak kan awm ve a, infrastructure kan neih loh avangin hma kan sawn thei lo a ni, Pu Dy. Speaker.

Agriculture Department-ah lut leh ila. House-ah pawh hian vawi tam tak kan sawi tawh a, sorkarin min ngaihsak loh avangin vawi tam tak sawi ka ni. Indo-Bangladesh border fencing ina a thlen water-logging in mi tam tak eizawna a tichhia a, he problem hi engtia solve tur nge kan ngaihtuah a tul a ni. Economic survey-a a lan dan chuan, buhah kan intodelh lo nasa hle mai. Kum khata buh kan mamawh chu metric tonne 1,80,000 a ni a, chuti laiin kan kan thar chhuah chu metric tonne 62,182 chauh a ni. A gap hi a nasa hle mai. Kan area hian potential a nei nasa a, land development-ah chuan ka bial hi *pakhatna* a ni. Mahse kan potential area chhungah hian hmalakna tak tak a la awm lo hi a paw khawp mai. Hmalakna tak tak awm se chuan Mizoram pumpui a nih loh pawhin Tlabung Sub-Division hi chu kan intodelh thei a ni, Pu Dy. Speaker.

Ka han sawi leh duh chu, Pu Dy. Speaker, Block Agriculture Office chungchang hi. Tunhma chuan Sub-Divisional Agriculture Office hi a awm ve thin a, restructuring avangin Tlabung atangin Lungsen-ah an sawn a ni. Tunah hian RD Block te pawh kan nei tawh a, engtikah nge Agriculture Block office hi Tlabung-ah kan hawn theih ang? Office building chu kan nei a, a thawktu tur dah kha hmabak chu a ni mai a. Chuvang chuan, a hma thei ang berin kan Minister zahawm tak hian min dah sak thei se ka duh khawp mai.

Pu Dy. Speaker, PWD chungchang hi kan sawi nasa a. Hmanniah Private Member's Resolution-ah pawh kan sawiho tawh a. Ka bialah PMGSY hna tam tak thawh mek a ni a, mahsela, *quality of work* hi ngaihpaawimawh a ngai a ni. Thil pakhat chu - Tlabung ral lehlam kalna tur leihlawn hi tun thlengin a la awm lova, eng ang pawhin kawng hi siam ila, leilawn a awm loh chuan hman tangkaina tur a awm vak lova. Chuvangin Chief Minister Demand-a ka sawi duh chu, Khawthlang-Tuipui-a leilawn dawh kan mamawhna hi min hriat sak se ka lawm hle ang.

A tawp berah chuan, Pu Dy. Speaker, Legislative chungchang hi ka hmaa mite pawhin an sawi tawh a. Nikum khan Golden Jubilee kan hmang a. Assembly chung bikah hian, kei hi Assembly campus-a sei lian ka ni a, Golden Jubilee lai te pawh khan ka sawi chhuak nghe nghe a. Assembly hi *like*-na ka nei a. A thawktute an fel em em a an za vaia chungah lawmthu ka sawi a ni.

Tin, Demand No. 43 - Tourism chungchang hi, tun sorkar tharah hian Tourism Deptt. hmalakna Tlabung lamah engmah a awm lova. Keini chuan potential kan nei tha a, Tlabung lamah Tourism lama eizawwna nghet a awm thei a. Tunah hian Tourist Lodge pahnih lai kan nei a, pakhat chu a thar a ni a, a dang hi renovate ngai a ni. Mahse, official quarters kan nei lova, hei hi khawngaihin min sak sak kan mamawh khawp mai.

Pu Dy. Speaker, khati zawng kha ka sawi theih ni mai se. Ka lawm e.

DEPUTY SPEAKER : Member zahawm tak, Pu Lalrinsanga Ralte.

PU LALRINSANGA RALTE: Pu Dy. Speaker, ka lawm e.

Ka han sawi duh hmasak ber chu Demand No. 1 - Legislative Assembly hi a ni a. A thawkte an hah thei hle mai a. A bik takin session lai phei chuann an tlaivar chho hi a ni deuh reng mai a, an inpekna a fakawm hlein ka hria. Tin, an efficient a, an hna thawh hi a ropui a, keini memberte min enkawl dan te hi a ropui hlein ka hria. An inpeknaah fak an phu hle tih ka han sawi duh a.

Tin, Legislative Assembly hian staff an indaih vak lo ni tein ka hria a. Heng te pawh hi ruahmanna neihpui theih a nih chuan a tha ngawtin ka ring a. Tin, Golden

Jubilee ropui takin kan lawm a, khangah te khan Speaker leh a staff te an inpekna leh thawhrimnaah te khan lawmawm ka ti a, a hlimawm tak zet a ni.

Pu Dy. Speaker, Demand No. 9 - Finance Department hi han sawi ve lawk ila. Kan hre theuh a, kan ramin harsatna kan tawk a, khawvel, India, Mizoram-in kan tawk a ni. Covid leh thil hrang hrangah harsatna kan tawh rualin covid hian mi a hrek na viau mai a. India ram, central atangin kan sum hmuh tur ang kan hmu lo nen. Chu bakah kan ramin keimahni thawhchhuah, keimahni inenkawl na daih kan la nei lo nen, central atanga kan sum hmuh a tlahniam zel bawk a, sum hman tur kan duh thawh chho viau zel si a. Chutiang karah chuan tuna kan finance dinhmun leh kan Finance Minister-in min enkawl dan hi, 'a tha ber e; a fel fai vek e' kan ti a ni lova, tun dinhmunah erawh hi chuan, 'heng bak hi chu a awm thei chuang lo e' tih kha ka sawi duh a.

Tin, kan Finance Minister hi sum enkawl pawh a thiam hlein ka hria a. Kan sorkar han kal chho ah healthcare chungchang emawah pawh Ba chu kan nei ngei e, amaherawhchu hun tha Pathian zarah a rawn her chhuak leh turah ka ngai a. Tunah pawh hian healthcare-ah sum crore ₹60 chuang a awm thei te hi lawmawm hlein ka hria. Tin, SEDP ah crore ₹595 dah a ni a, *family-oriented* atan crore ₹300 leh *Untied-fund* atan crore ₹25 dah a ni te hi a ropui a. A bik takin keini thingtlang mipuite hian kan nghakhlel hle tawh a ni. Tin, Samagra hnuaiyah zirtirtute hlawh punna tura state-matching share atan crore ₹38.27 dah a ni leh an hlawh pung pekna tur crore ₹52. 98 dah hran a ni te hi lawmawm hlein ka hria a. Samagra zirtirtute tel lo hian kan kal hlei thei tawh lova, an hlawh ah harsatna awm lo tura hetiangah dah hran a ni te hi a lawmawm hlein ka hria a ni.

Tin, Demand No. 45 - PWD hi, tun term chhung hian PWD te hi an thawk tha hlein ka hria a Hhna thawh pawh an ngah a. Vawiin niah ka sawi duh chu – 'kan kawng zawng zawngte hi duhthusamin a tha ta e,' kan ti reng reng lo; amaherawhchu term hmasa ai kha chuan tun dinhmunah hi chu a ziaawm hle tawh a ni. Tin, road formation cutting km 351 te, flexible pavement km 280 te leh rigid pavement km 212 lai mai siam a ni te hi a ropui ka ti a, an hnathawhah hian an fakawm hlein ka hria a, department official-te chungah pawh lawmthu ka sawi a. Chuti rual erawh chuan Pu Dy. Speaker, kan national highway hi company te kutah hian eng emaw zat a awm a, hei erawh hi chu kan enpui deuh a tulin ka hria. A bik takin NHIDCL kawng siam hi a fuh vak lo thin a, Mizoram sorkar hian eng chen nge kan inrawl theih ka hre chiah lova, tun aia nasa zawka kan inrawl a tul hlein ka hria. Ka bial Bilkhawthlir leh Vairengte inkar khu NHIDCL kawng a ni a, nikum February thla khan an luan dum zuih mai a, a tha khawp mai a. Amaherawhchu, fur a ni a, a diak nghal vek mai a, a kawin nghal vek a. Tunah khuan repair an han ti ve leh a, amaherawhchu, NHIDCL te hi central lam kuta engkim awm a nih avang hian an hna hi fuh tawk lovin ka hria a, Mizoram sorkara PWD pawh hian kan enzuipui deuh a tulin ka ring deuh a ni.

Tin, Pu Dy. Speaker, mahni bial lamah ka han luh ve lawk ang a. Ramri-kawng laih Buarchep-ah te, Aitlang-ah te hian a maintenance kan PWD kaltlang hian kan ti leh mek a, a ropui takzet a. Huan-lo-ram tam tak khulayah khuan mipuiin kan nei tawh a, chungah te kea kal ngai thin kha tunah chuan motor leh scooty tein kan thleng thei tawh a. Heng kawng PCC flooring bakah culvert leh leihlawn dawh a ni te hi lawmawm hlein ka hria a. Tin, Bilkhawthlir-ah hian PWD IB min sak sak a, kan zo tep tawh a, thla 2-1 hnuah hawn theih a ni dawn a, hengah te hian lawmthu kan sawi takzet a ni.

Tin, tunah hian Phainuam - Saipum - Zero-Point inkar kawng siam mek a ni a, khulai kawng khu kawng pawimawh tak tur a ni a, Serlui balu lakchhuahna kawng tur a ni tih kha kan sawi duh a ni. Chuvang chuan, khu khu kan lawm takzet a. Tin, Serkhan - Bagha Road hi a buaithlak khawp mai a, a kawng a fuh leh vak tawh lova, hei hi cheithat a ngai a ni a. Tin, Pu Dy. Speaker, PWD changtu minister-in min lo chhinchhiah saka min lo react hram tura ka duh chu - Tunah hian Rengtekawn Zero-point leh Bawktlang sub-station inkar hi km khat vel lek a ni a, hei hi kan sawi ngun tawh khawp mai a, lehkha te pawhin kan ziak a, DC pawhin PWD EE-ah, amaherawh chu, 'sum kan la nei lo' tih kha a ni a. Tunah hian road fund board-ah te hian tihluh theih dan awm se, km khat vel chauh a ni baw k a, tun thal lai hian re-surfacing tih ngei ngei a ngai a. Hei hi special taka min tihsak turin ka ngen a. Khu lai Bawktlang sub-Station khu hmun pawimawh tak a, Rengtekawn khaw chhung kawng pawimawh tak a ni baw k a. Km khat pawh a tling lova, a re-surfacing dan hi min ngaihtuah sak thei se tiin kha ngen duh a.

Tin, Demand No. 22 - Sports Department hi, kan minister hmalakna a ropui, a fakawm khawp mai. Amaherawhchu, kan bial hi PMJVK-in min huam ve loh avang hian sports infrastructure tha hi tun term-ah hian engmah kan dawng ve lova. Tunah hian ka hriat dan chuan PMJVK hi Mizoram pumpuih hman theih ni ta a, hengah hian Sports Department atang hian hmasawna tam tak kan dawng ngeiin ka ring a, 'kan lawm hle dawn a ni' tih kha kan sawi duh a. Min rawn enzui sak deuh turin ka ngen duh a ni.

Tin, SASCI atangin tunah hian Vairengte - Joint YMA Field phullem phah a ni a, Sports department kaltlang hian kan lawmthu ka sawi a. Hei hi hma chak taka min laksaka, May thla vel tal hian zawha hawn hman kan duh kan ti a. Kan Sports Minister-in remruatna min neihpui zung zung a, hma chak takin an la a, kan kal thui viau tawh a ni. A chungah kan lawm takzet a ni.

Tin, Demand No. 43 - Tourism Department-a han sawi zawk ka duh chu - EAP hnuayah hian sum eng emaw zat Tourism Department hian an dawng niin ka hria a, a dik em ka chiang lova. Tourism Department hian proposal te, DPR te siamin Serlui tuikhuah khu rawn chei an tum tawhin ka hria a, hengte hi kaltlang thei se; tourism hmun atana han siam te, water-sports leh adventure sports atan te pawhin hmun-

duhthusam a ni a. Hei hi zoram thalaite leh mipui tan anih dawn bakah sorkarin revenue tam tak kan hmuh phah theiin ka ring a. Chuvang chuan, Tourism Department hian hma min han laksak turin ka ngen duh bawka a ni.

Tin, Demand No. 31 - Agriculture Department-ah hian han sawi zawk ka duh chu - Agriculture Minister leh a department te hnathawh a ropuiin a lawmawm hle a. Agriculture link road hmun eng emaw zatah laih a ni a. Tin, land-levelling hi a pawimawh khawp mai a, land levelling tur hmun tam takah ruahmanna siam a ni te, ka bialah pawh hmun eng emaw zatah an ti dawn bawka a. Tunah hian kan thlaichin leh buhte pawh kan thar tha viau tawh a, kan lawm takzet a ni. Tin, a bik takin Serlui khu leilet hmupui anih avangin tun ramri buaiah khan a enkawltu hnamdangte an haw deuh vek mai a, a neitu ten kan han enkawl chho ta a ni a. Chutah chuan changkang zawk leh hlawk zawka kan thar theihna tur hian he potential area hi, kan ti kan ti bawka a, power tiller te, grass cutter leh custom hiring centre te 'hei aia nasa hian hmuh theih a tha mang e' tih kha kan sawi duh a ni.

Tin, thil pakhat han sawi leh ka duh chu - Agriculture Department re-structure anih hian harsatna kan tawka nual mai a; hmanni lawkah N. Vanlaiphai-ah a pawh a thleng a, hei hi a pawka ti a. Keini bial Vairengte pawh khu AEO hmun thin a ni a, khaw lian tak leh potential tha tak, agriculture leilet hmun tha tam tak awmna a ni a. Hengah hian Agriculture hmunte khu enkawltu awm mang lo hian a ruak ta huai mai a. Chuvang chuan, kan department te hian DAO hnuaia *Gram Sevak* an dah te hi DAO office-a thu kher lo hian, AEO hmuna hian staff te nen, mipui tana awlsam zawk hian hna thawh theih ni se a tha hlein ka ring a ni.

Pu Dy. Speaker, kan Chief Minister leh kan Minister pahnihte demand hi tha ka ti a, ka rawn support a ni e. Ka lawm e.

DEPUTY SPEAKER : Tunge sawi leh ang le? Member zahawm tak Pu C. Lalmuanpuia.

PU C. LALMUANPUIA : Pu Dy. Speaker, ka lawm e.

Hei, vawiinah kan Chief Minister leh kan Minister zahawm tak takte pahnih demand sawi theia ka awm hi ka lawm hle a. Eighth Legislative Assembly, Mizoram Budget hnuhnung ber min hruai thlengtu leh, hetiang a hun tha min petu Pathian hnenah lawmthu ka sawi a ni. Vawiinah hian kan Minister zahawm tak takte pathum demand-te hi ka luhchilh thuk hman dawn lova, a tlangpui thuak thuak ka han sawi hman chauh dawn a ni a. Chutah chuan, Demand No. 1 - Legislative Assembly hi kan sawi hmasa ber ang a.

Hei, kan Assembly dinhmun chu kan hria a; an hah em em a, an inpekna a ropui ka ti a. Min kaihhruainaah te lawmthu kan sawi duh a. Tun Assembly lai pheih chuan an hah em em a ni a, zan tairek thlengin tlaivar dawn dawnin hna an thawk a, zingah hma tak leh a hun takah an rawn tifel leh thlap thei te hi an chhuanawm khawp mai a. Hetianga an hnathawhna kawngah hian lawmthu ka sawi a. Tin, a thawktute pawh hi an indaih lo tan viau niin ka hria a, indaihlohna te pawh a nasa a. Hetah hian, ‘an indaihlohna phuhruk dan kawng a awm chuan’ tih kha kan Chief Minister zahawm takin min lo chhinchhiah sak se tiin ka han ngenpui bawk a ni.

Demand No. 9 - Finance hi ka sawi leh duh a. Hei, kan sum leh pai dinhmun kan hria a, kan khawvel dinhmun te pawh. Kan tum leh kan duh vang ni lovin covid-19 hripuiin khawvel pum min tibuai a, chutah India ram-Mizoram pawh mahnia state intodelh lo kan nihna te a lo lang tan a, chutah chuan finance changtu nih pawh hi a hrehawm viauin ka ring a. Amaherawhchu, budget te kan han pharh a, nikum budget aiin kumin budget te pawh a tlem kan ring rum rum a, mahse hma kan han sawn hret thei te hi a lawmawm ka ti takzet zet a ni.

Chutah chuan kan sawi hmaih hauh lo tur chu - kan sorkar *flagship programme*-a kan neih, kan kalpui mek SEDP te pawh ‘engtingge kan kalpui zel ang’ tih ngaihtuahna kan sen laiin, SEDP-ah crore ₹595 dah a ni a. Tin, *family-oriented*, chhungkaw tana hmasawna awm thei turah te crore ₹300 dah a ni te leh, kan hriselna dinhmun ngaihtuaha Zokhaw lam te leh kan zavai tana crore ₹50 dah hran a ni te hi a lawmawm ka ti khawp mai a.

Tin, kan sawi leh duh chu - revenue surplus crore ₹417.87 awm thei khawpa ruahmanna Finance Department-in a rawn siam thei te kha tun sum harsat laiah chuan a chhuanawm hlein ka hria a ni. Tin, scheme hrang hrang - CSS te, EAP te leh NCDC te ang chi pawh, a venna tur sum tam zawk, SMS a tan te pawh ani ang chu, chungah chuan cheng crore ₹220 dah thei dinhmuna kan la ding te hi a lawmawm ka ti khawp mai. Ka vei deuh chu, SDRMF - disaster lamah pawh sum crore ₹52 zet mai dah a ni a, lawmawm ka ti a. Kan ram dinhmun kan hria a - fur a lo thleng a, furpui a na em em a; chutah chuan leimin leh chhiatna chi hrang hrangte kan tawng thin a, chungah tan chuan 80% medication-a a awm te kha; khang kaihhruaina tur leh thawmthatna tura ruahmanna an rawn nei te hi an chhuanawm tak zet zetin ka hria a ni.

Demand No. 45 - Public Works lamah hian, PWD te hnathawh kawng hrang hrang han en hian a ropui ka ti a. Kan Chief Minister zahawm tak hian kawng a vei em em a, kan han sorkar phat a tangin a department hote nen hma an han la a siam tur leh tih tur a lo tam em em a, a zavai erawh chuan siam zawh sen a ni lova. Tunah erawh chuan, hmalam panin kan kal a, formation cutting leh flexible pavement te, kawng hrang hranga an hmalakna bridge (leihlawn) eng emaw zah an han dawh bawk a; khang han hmuh te khan a lawmawm ka ti a, hmasawna lo lang hi a lawmawm em em a ni.

Tin, building project lian tak tak kan han kalpui a, chung zingah chuan kan District Court building te, High Court building te sak a ni a, a lawmawm hle mai a. Tin, kan sawi hmaih hauh lo tur chu - Pu Dy. Speaker, Lengpui Airport terminal building renovate a ni hi lawmawm ka ti a, Mizoram hmel lanna pawimawh tak leh khualzin leh foreigner te thlengin kan hmuh hmasak chu kan Airport a ni a. Kan Airport hi tute pawhin kan sit deuh vek tawhin ka hria a, chutah chuan renovation kalpui a ni hi a lawmawm ka ti a. A lehlamah chuan thil hi tih fuh vek theih a ni lova, a building te pawh a then lai han chim te pawh awm mahse, thil thar tha zawkrawn hringchhuak sela. Tunah hian tha zawka siam turin hma lak mek a ni hi a lawmawm ka ti khawp mai. Tin, trolley thlengin sawi a awm a, trolley te pawh a hmanna lo tura lo hman te kha a pawikan ti a. Amaherawhchu, hma lak vat niin, a thara thlak a ni te kha a lawmawm ka ti khawp mai. Kan Airport building te cheithat zel theih kan inbeisei a, chutiang taka hma an han la te hi a lawmawm ka ti khawp mai.

Tin, Pu Dy. Speaker, Demand No. 32 - Horticulture hi a pawimawh khawp mai a. Thlai leh eitur chi hrang hranga kan intodelh theihna tur kawng hrang hrang ruahman a ni a. Tomato te pawh hmun hrang hrangah an ching a, kan farmer-te hlawhtlinna a takin a lo lang a. Tualte-ah han kalin an tomato chinna te ka han hmu ve tawh a, a tha khawp mai a. Engpawh nisela, Tualte-ah tomato crore ₹2 (nuai ₹200) chuang man an thar niin ka lo hria a, ka lawmpui khawp mai a. SEDP - family-oriented hmangin khing zikhlum chinna te, tomato chinna te hmun hrang hrangah Horticulture Department hmanga kalpui a ni hi a lawmawm ka ti tak zet zet a ni.

Tin, Pu Dy. Speaker, PWD chungchangah khan, tunhnai (nimin) chanchinbu *Vanglaini* headlines-ah khan, Chandmari - Vaivakawn Road siam meka duhthusam lo lai awmte kha a lo lang a. Amaherawhchu, vawiin maiah hma lak a ni nghal hi kan PWD hotute leh a changtu kan Chief Minister zahawm tak chungah lawmthu ka sawi a ni. Tha taka siam turin vawiinah pawh hma an la mup mup a ni.

Tichuan, Sports lamah ka han lut thuk thuk ang a. Demand No. 22 - Sports & Youth Services ah hian. Hei, Mizoram-in *Sport Policy, 2019* te kan han nei chho a Tin, sorkar hnathawk Group B leh a hnuailamah Sportsperson tan 5% sorkar hna hauhsak an nih bakah, Sports hi 'industry' nihna pek a ni te pawh hi a hlu hle mai. Hmun hrang hrangah khelmual (field te min han siamsak a, an hmalakna a zarah khelmual te pawh kan bialchhung Edenthah leh Zarkawt-ah te ruahmanna min han siamsak hi kan lawm em em a ni. Chu bakah cash incentive scheme hnuai kan infiam mi - Lalremsiami te, Jeremy Lalrinnunga te ang mi tamtak tan ruahmanna siama sum pek an ni te hi a lawmawmin, an chhuanawm khawp mai.

Tichuan, Demand No. 31- Agriculture-ah lut ila. FOCUS hnuai project hrang hrang - Champhai, Mamit, Serchhip, Kolasib, Khawzawl leh Saitual-ah te kalpui a ni a. Thingtlang khaw 300 lai an cover a, chhungkua 55,000 bawr vel huama hmalak a ni te

hi a lawmawm ka ti tak zet zet a ni. Tin, Pu Dy. Speaker IRDF NABARD atang hian WRC hnuaiah Land Development scheme district 11-a kalpui a ni hi a lawmawm ka ti khawp mai a. Henga an hmalakna te hi hmuh a nuam a, a lawmawm khawp mai a. Tin, kuthnathawk kan farmer-te tan tui pipe te leh tanky siamna ruahman a ni thin te hi a hluin, a tangkai em em a ni.

A tawp berah chuan, Pu Dy. Speaker, PWD bawkah ka kan lut leh lawk ang a. Kan bial chhung Hunthar Veng lei-tlahniam lai hi PWD kaltlangin min siamsak a, geology expert ten hma an la a. Khulai lei-tlahniam, Aizawl khawpui kan lifeline - kan eitur lakluhna lai khu kawng chhak leh thlang min han siamsak a, kawngpui pawh tha takin a kal a. Khulai kawng chhak leh thlanga PWD te hmalakna, kan bial chhung leh kan zavaia tana hmalakna tangkai, kawngpui tlabal mai tur min han siamthat sak te hi lawmthu ka han sawi duh a ni e.

A tawp berah chuan, kan Chief Minister zahawm tak leh kan Minister zahawm tak takte pahnih Demand-te hi pass ngei turin ka rawn thlawp ani e, Ka lawm e.

DEPUTY SPEAKER : Tunge han sawi leh ang le? Hun a kal zel a, sawi tur kha chuan sawi zung zung ila. Dinglamin an sawi tam deuh a, chuti laiin veilam hi in ngawi riau mai a. Demand hi tha in ti lutuk a, sawi tur in hrelo zawk nge? Member zahawm tak Pu Lalchhuanthanga ka sawm e.

PU LALCHHUANTHANGA: Pu Dy. Speaker. ka lawm e. A hmasa berin Demand No. 31 - Agriculture atang hian tan ta ila.

Hei kumin kumthar atana agriculture budget-ah hian pawisa kan dah tlem ta deuh a, 'hei hi engnge a awm zia ni ang aw' ka ti deuh a. Intodelh lamah hian kan bei a dawng deuh ta em ni? Zo-buhfai ring tura kan inbuatsaihna hmarua kha a ni ve a, mahse kan budget-ah hian a lo tlahniam ta a. 'Agriculture lamah hian beidawna kan nei ta em ni' tih theih hial a ni.

Tin, Horticulture-ah hian mau tiak hi nuai 2 chuang an semchhuak tawh a, pawisa pawh nuai 648 lai kan hmang tawh a. Hei hi engnge a hlawhtlinna? Hetiang zat zat pawisa kan hmannaah hian 'ramin engnge hlawkna a neih' tih hi kan Finance Minister zahawm takin min rawn react thei sela a lawmawm khawp ang.

Demand No. 9 - Finance hi han sawi leh ta ila. Hei kuminah MLA-Local Area Development Fund te kan hmu leh thei dawn a a lawmawm khawp mai a. Amaherawhchu, helaiah hian thil sawi duh ka nei chu - Kan fund te hi min sanction chak lo em em mai a Ttun kum kal taa 2nd installment pawh tun kumtharah kan dawng thei chauh a. Krismas hma te khan han dawng ta ila development atana kan thawh bakah Krismas bazaar-na tur, mi harsa zawkte tana inhlawhfakna han siam te kha kan chak

tehlul nen. Amaherawhchu, sanction hi kan hmu tlai thin a. Tin tunah hian kan hnathawh sa final bill te hi a tang rei lutuk mai a, hengte hi tihchak theih dan a awm em? Hetih lai hian ‘Kamrula te, Zoramchhana te bill hi a tang ve ngai lo; nikhatah a lehlang thin’ tih te kan lo hria a. Heta member lo kalkhawmte hian Kamrula leh Zoramchhana te hi kan tluklo lutuk deuh a ni lo maw? Kan bill te rei tak tak tang ve lo se la, min sanction tawh sa te hi min tihfel sak zung zung turin ka han ngen duh a ni.

Tin, PWD lamah hian han kal leh ta ila. Mizoram state kan nih tirh atangin PWD hi department lian a ni a, kan Chief Minister ten an chang deuh chawt thin a. MNF Ministry hmasaah khan Pu R. Tlanghmingthanga khan reilote a chang tihloh kha chu, kan CM ten an chang ta char char a. Kan lo ngaihdanah chuan, CM in PWD a chan chuan kan kawng te pawh a lo that zawk kan beisei a ni. Amaherawhchu, chutiang lam ni lovin ‘kan CM te hian kan kawng te hi an lo ngaihsak tehchiam lo em ni chu aw’ tih tur a ni a. Supply leh contract pekah hian kan duh tawk ta a ni mai lo maw, heti em ema kan kawngte a chhiat reng mai hi! Kan kawng te, side-drain te pawh hi maintain a ngai a, a maintain chu sawi loh, kan kawng te hi a hnim chhem chhum mai a ni. Tin lei tla tlemte te pawh paihfai lohin kumtluana side drain hnawhin a awm thin a, hengte hi a ngaihpawimawhawm ka ti a. Hengah te hian kan PWD Minister hian chak leh zuala hma a lak ka duh a. Tin, PWD hi Chief Minister-in a lak avang hian em maw ni, kan engineering officer te hian contractor te hi an hlau em em tlat mai a. Hna endik kawngah te, hna vil kawngah te kan engineering officer-te hian hma an la ngam lo thin a, hei hi a pawl lai tak niin ka hria. Kan engineering officer thiam tak takte hian kawng tha leh ram tan rotling siam an duh ve rual rualin, engmah hi an sawi ngam thin lova. Hei hi kan ‘Chief Minister ten PWD an lak thin vang a ni mai lo maw’ tih ka ngaihtuah a ni.

Tin, Demand No. 22 - Sports & Youth Services hi han sawi leh ta ila. Kan hriat angin kan sorkar hrawn mek leh kan lo hrawn tawh te hian ‘thalaite hmakhua kan ngai’ kan ti a, a dik khawp mai a. Sports infiamna ruhrelah te pawh hma kan sawn a, kan kalthui khawp mai. Amaherawhchu, sport lama mi-tuite hi veng tinah hian mi tlemte chauh an ni; 1% pawh an tling meuh lo a ni, dik tak chuan. Central lam atanga minority mipuite hriselna leh education atana hman tur te sports lamah hian kan hmang tam ta hle mai a. ‘Sport hi a tha lo’ ka tihna a ni lova, kan kal zel ang; hma kan la zel ang. Amaherawhchu kan thalaite mamawh chu sports lam hi a ni ber lo; hnathawh tur kan duh a ni. Skill development atan te leh eizawwna ngelnghet neih hi kan duh em em a ni; hetah hian kan tui a hal a ni. Dik tak chuan kan thalai, rilru nei, fel tak tak, thiam tak takte hian hnathawh an chak a, ‘he lampang kawngah hian ke kan pen thiam lo em ni’ ka ti hial a ni. He lampangah hian hma ila teh ang u. A dik tak chuan kan thalai tam takte hian hnathawh tur mumal an neih loh avangin nupui-pasal pawh an innei ngam mang lo a ni; hei hi kan chian a ngai khawp mai. Chuvang chuan, kan thalaite tan eizawwna ngelnghet, skill development te hi kan kalpui a tul tawh a, kan ram mamawh a ni. Sports lampang kha kan hnualsuat a ni lo; a kal tho ang. Amaherawhchu, helamah hian kan thalaite tan chak zawkin ke i pen ang u. Kan thalaite tuihalna hi a na lutuk tawh

tunah hian. Hnathawh an chak; hnathawh tur an duh; amaherawhchu, tihngaihna a awm lo. Kan sorkar hi helamah hian ke a pen chak lo lutuk.

Tin, Sports hi ‘kan ngai pawimawh e’ kan tih rual rual hian, a hna inpek hi kan tui tawk chauh a ni lo maw, helamah hian? Hotu lu lamah hian a hna insem leh pekah hian kan duh tawk ani mai lo maw? A tak ram kan thlenpui tur hian kan tuipui tawk lo a ni maithei. Chuvang chuan, Pu Dy. Speaker, kan thalai hma khua kan ngai tak tak anih chuan, *skill development* lamah te, eizawna nghelnghet an neih ve theihna tur hian ke pen i tum ang u, ke penna tur tam tak a awmin ka hria. Hei hi tunlaia kan mamawh a ni.

Kan sawi thin ang khan, finance lamah te pawh kan pawisa neih ang ang te hi a tangkai leh pawimawh zawkah te hian hmang teh ang u. Kan pawisa hman dan te pawh hi a uchuak deuh a ni lo maw? Pawisa hi a tam leh a tlem lam pawh a ni lova, a hmanna hi a pawimawh a. Dik tak in i hmang ang u.

Chuvangin Pu Dy. Speaker, “kan budget hi tangkai takin tun atang hian hman i tum tawh ang u”, tih hi ka sawitheih tawk ni sela. Ka lawm e.

DEPUTY SPEAKER : Member zahawmtak Pu Ramthanmawia ka sawm e.

PU RAMTHANMAWIA : Pu Speaker, ka lawm e. Hun a tlem si a, ka han sawi deuh zung zung ang e. Vawiina kan House Leader, kan CM ni bawk Pu Zoramthanga leh kan Minister zahawmtak pahnih - Pu C. Lalrinsanga leh Pu Robert Romawia demand te hi ka rawn thlawp a, ‘ka support e’ tih ka rawn sawi hmasa a.

A hmasa berah Finance-ah lut ila. Tun Eighth Assembly ah hian MLA kan han ni ve a; ka ngaihtuah vang vang a hun kal tawh te, ‘MLA term zawng zawngah chuan a vanduai ber kan ni mai awm mang e aw, kan zavai hian’ ka ti a. A chhan chu - hun danga kan thlen/tawn leh hriat ngailoh hripuiin min han nuai a; MLA te pawhin kan MLA fund mai bakah kan hlawh leh kan pocket atang tein kan bial tan nasa takin hna kan thawk a ni a, chu chu term danga awm ngai lo a ni. Kan vanduai dana hi a thua em em a, tun sorkar pheih chu kan hria a, a hmasa berah kan bialah lirnghing a thleng thin a, sorkar bakah leh Pawl leh Kohhran atangin nasa takin tanpuina kan pelut a; chutiang chuan hun eng emaw chen mi khawngaihna dawngin kan bialah kan hartsatna te min hriatpui a. A han reh deuh a, hripui a lo lut leh nghal a, sorkar tan tihngaihna awmlo khawpin kan hun tawn kha kan hria a ni. 2019 kan sorkar hlim kha chuan nuam pawh kan ti tan viau a ni. Bial theuh kan la a, MLA-te, ruling leh opposition pawh ni se kan bialah kan hlim em em a, harsatna kan paltlang a ni. Kan House Leader pawhin he House-ah ngei sum leh pai a ren loh thu leh, central lamah pawh dil thiam dan azira thahnem thei a nih zia te pawh a auchhuahpui a ni. Kha hun khan kan sorkar khan kum khat chhung chu harsatna kan tawk lova, mahse 2020-atang khan harsatna kan han tawk chho ta kha a ni a, kha Covid-ina min nuaina kha sawi nep chi pawh a ni lova. A chhan chu, kan u leh

nau, kan thian tha tak tak, kan nu leh pa te leh kan fate'n nunna an chan a, chhungkua kha an buai vek a ni. Covid avanga sum leh pai kan hmuh loh mai kha a ni lo v, nunna tamtak kan chan a, vawiin niah pawh khang vanga chhungkaw inenkawlina kawnga harsatna tawk pawh kan thahnem em em a ni. Chuvang chuan, 'hei hi chhuanlam a tling lo' kan ti a, nunna kan chan kha chhuanlam a tling dawn lo em ni? Chhuanlam a tling a ni. Chuvang chuan, hei hi chu kan ngaihtuah chian loh vang mai mai a ni.

Chutih lain kan hotupa berin, "Zu-chhiah (tax) avanga hausak ai chuan, retheih pawh ka huam ang" a tih angin, MNF sorkar atangin zu kan zuar ta lova, zu-chhiah kan hmu ta lo a ni. Congress sorkar lai kum 2 chhung lekah pawh khan zu-chhiah ₹317,196011 kan hmu hman a ni a; a tha hnem khawp mai. Covid hrileng nen kha zu-chhiah kha itawm tak chu a ni a. Mahse heti hian Pathianin min hruai a, dam khawchhuahna tur kan hotupa ber ngaihtuahna atangin, Pathian a tha a, heti hian vawiin ni hi kan thleng a ni. Hei hi thudik a ni; a retheih pawh kan rethei a ni.

Pu Dy. Speaker, PWD-ah hian han lut zawk ila. Kan sorkar ve leh khan kawngte pawh a lo chhe nual a, kan hria a. Aizawl khawpui pawh sum awm ang angin an han thuam a, an siam mawlh mawlh a, hma kan sawn chho hret hret a. Tichuan, tlangdung kawngpui te pawh a lo ziaawm chho a. Ka bial te pawh tunhmaa kan hmuh leh tawn ngai loh kawngpui tha min han siam sak a, kan lawm em em a ni. Hengte hi kan hotupa berina kawngpui tha a vei avanga lo chhuak zel a ni.

Kan hriat angin kan ram hi furah ruahtui a tam a; chung chuan kan ram kawng thaa kan hriat te pawh hi alo tichhe ve thin a, heng erawh hi chu 'ngaihvena repair reng a ngai' tih hi ka sawi duh a ni. Chuvang chuan, kawng chungchangah hi chuan 'tun sorkar baka kawng vei hi an awm dawn emaw ni aw' ka ti thin a ni. Duhthusam chu ni lo mahse, kawng chungchangah hi chuan 'kan thawk tha tawk viau a ni lawm ni' ka ti a ni.

Tin, GAD-ah lut zawk ila. Helicopter hi sorkar hmasa atanga bul an lo tan khan lawmawm hi kan ti khawp mai a. Kan bial Farkawn leh Khawbung-ah service kan han nei a; nunna tamtak min chhan sak tawh a ni. Helicopter service awm lo se thi mai tur hi, helicopter service a awm a, kan han hmang a, nunna eng emaw zat min chhanhim sak tawh a, a lawmawm kan ti a ni. Chuvang chuan, kan biala helicopter service hi kan tangkaipui em avangin Vaphai leh Bungzung te pawh hianin neih ve kan chak a; hei hi kan House leader khan min hriatsak sela. Nunna chhanna tura helicopter hman hi kan bial chuan kan sawibang lo a ni.

Tichuan, Sports-ah hian han lut leh lawk ila. Hei, kan hriat angin, tunhmain kan bial leh bial dang bakah district lamah te PMJVK hi a hman theih loh avangin sports infrastructure kan nei tha lo deuh vek a ni. Hei hi chu thudik a ni a, kan duh vang reng pawh a ni lova, central policy a nih miau avangin. Nikum atang khan PMJVK hi district

thenkhatah pawh hman ve a ni a, keini pawh kan han hlim khawp mai a. Kan Sport Minister, amah pawh hian sport lamah thahnemngai takin PMJVK hnuai ah hian ka bial leh bial dangah te hmalak a ni tur hi kan lo welcome a, ‘kan lo nghakhleh hle a ni’ tih kha kan sawi duh bawk a ni.

Tin, member zahawmtak khan “thalaite hi, infiamna ringawt a ni lo”, a tih kha a dik rualin, chhungkuaah hian han thlir vang vang ta ila, thalai hi an tam zual a ni. Nu leh pa te pahnih chauh kan ni a; fa hi pali, panga, pariat, pakua an awm deuh vek a. ‘Thalai’ hi chhungkuaah hian an tam zawk a, thalaite hmakhua, an future hi kan ngaih pawimawh a ngai em em a. Kan Sports minister pawhin chu chu hriain nasa takin tan arawn la a, kan lawm khawp a.

Tichuan, Tourism Department-ah lut lawk ila. Tourism hi kan minister hian theihtawp a chhuah na a, ‘hma lak a har viau a ni’ tih kan hriatpui a. Chuvang chuan, PMJVK atang hian Farkawn, Khawbung, Vaphai, Khuangleng-ah te khualtha han thlenna tur hi kan nei mumal tawh lova, kan neihte pawh an lian lova, hei hi lian zawka hma min laksak turin ka ngen duh bawk a ni.

Demand No. 31 - Agriculture-ah hian lut ila. Agriculture hi kan tangkaipui khawp mai a, keini bial hi WR - *potential area* hectare 541 kan nei a, chungah chuan hectare 399-ah land development min tih sak tawh a, hmabak hi hectare 295 kan la nei a. Hengte hi remchang a awm chuan kan han ngen leh duh a. Tin, buh vuakna-khawl pawh hi kan mamawh chho ve ta khawp mai a, heng te pawh hi ka han ngen duh bawk a. Tin, Vaphai-ah khian Agriculture Rest House, hun rei tawh taka sak hi a awm a, mikhual 5 chauh thlen theihna a ni a. Hei hi sak that emaw, renovate emaw a ngai khawp mai a, kan kal changa kan riahna a ni a, keini kan riah kha chuan midang kha an leng lo nghal mai a. Vaphai-ah khian riak duh mah ila khualtha riahna kan nei loh avangin, khilailah khian ‘Tourism atang pawh khan hma kan lak a ngai’ tih kha ka sawi duh bawk a ni.

Thil tam tak sawina hun a nih tawh loh avangin Pu Dy. Speaker, ti hian ka han ti tawp ang a. MI-project pawh kan tangkaipui khawp mai. Hengte pawh hi theihtawp min chhuahpui leh turin ka han ngen a ni. Kha kha ka sawi theih tawk ni mai se. Pu Dy. Speaker, ka lawm e.

DEPUTY SPEAKER : Tunge sawi leh ang le? Awle, Member zahawm tak Pu K. Laldawngliana ka sawm e.

PU K. LALDAWNGLIANA: Pu Dy. Speaker, ka lawm e.

Chief Minister te, Cabinet Minister leh kan Minister of State zahawm takte chanpual, tun term-a budget session hnuhnung berah boruak tha tak karah kan ram

kalphung tur sawina ka nei thei hi, tun dinhmuna min hlangkaitu Pathian leh bial mipuite bakah MNF party hruaitute chungah thinlung takin lawmthu ka sawi a ni. Kumkhat leh thla hnih chhunga Tuirial bial ka enkawlna chungchangah hian kan sorkar chungah lawmthu ka sawi a, vuina ka nei lova; lawm chungin Pathian leh ram tan thahnem ngai takin hna ka thawk a ni. “*Mite’n min chhiar, min thlir reng e; i awm dan zawng zawng an hai lo; Krista nunmawi leh chanchintha nangmahah hian hmuh an chak thin*” tiin Mizoram mipui aiawh MLA mi 40 zinga ka han tel ve hi, kan nihna hi kan hriat thar a pawimawh em em a ni. Chu chu, kei mi tlinglo junior ber hian ka sawi ve duh a ni.

Demand No. 32 - Horticulture Department hi mihring hriselna tur atana tha thlai leh thei thawhchhuahna lama an hmalak tam tak hi ropui ka ti a, staff-te leh a changtu kan Chief Minister zahawm takte an fakawm hle a ni. Tualte khuaa horticulture hmun te ka tlawh ve nasa a, tomato hralhna hi nuai ₹914.32 a ni a, zikhlum - nuai ₹370, dawnfawh - vaibelchhia ₹3.8, dragon fruit-ah ringawt pawh hian nuai ₹1,324 hmuhchhuah a ni a, farmer-te hamthatna, malsawmna thlentu an nihna hi a ropui ka ti hle a ni.

Demand No. 45 - Public Works Department-ah hian hmasawmna sawi tur a tam a, duhthusam loh lai pawh a tam a ni. Zoram chhungah an hnathawh - formation cutting km 351 tih zawh tawh te, flexible pavement km 260 te, rigid pavement km 212 chuang te, bridge dawh that te, District Court building sak thar te, High Court siam thar te, sawi tur tam tak a awm awm e. A thawktute leh a changtute inpekna a ropui ka ti a, Aizawl by-pass lo awm tur pawh hi kan nghakhlel hle mai.

Ka bial chhungah han lut zawk ila. Kan Chief Minister zahawm tak hnenah pawh ka thlen tawh a, Thingdawl PWD (Division-III ‘E’) in office hmun an neih loh avangin Kolasib-ah an insawn mek a, bial mipui pawhin lo ngaithla thap ula ka duh hle mai, kan sawi tam tawh a. Kan Chief Minister zahawm takin min hriatpui a, hei hi a hma lamin Thingdawl Polytechnic hmunah sawn luh leh tura hma min lakpuinaah lawmthu ka sawi duh a. Chutih rualin, SDO, PWD thla 8 vel a awm hnuin min sawnchhuah sak a, hei hi min ngaihtuah sak leh tur pawhin an hnenah thlen a ni tawh a ni. Bial chhungah hmasawmna - approach road te, retaining wall te kan hmuhnaah lawmthu

(Chairman Pu L. Thangmawia ’n Chair a la a..)

CHAIRMAN : Awle, sawi chhonzawm rawh le.

PU K. LALDAWNGLIANA: Pu Chairman, a lawmawm e.

Hortoki strengthening te, Kawnpui - Khamrang tunah zawh tawh a ni a, hengte hi a lawmawm kan ti a. Chutihlaiin Mualkhang - Khamrang kawng PMGSY-III

hnuaiia ruahmanna awm tawh hi min lo chhinchhiahsak sela. Tin, Hortoki kawng resurfacing te, Kawnpui leh Thingdawl khawchhung internal road te; tin, Hortoki 'khaw-mawngping' kan tih kha khaw lun tak ni turin tunah hian Meidum - Hortoki kawng hi kei pawhin vawi hnih ka zu tlawh tawh a, nuam takin tunah laih a ni tawh a, Hortoki khaw mipui aiawhin lawmthu ka sawi bawk a ni. Hmasawwnna ropui tak kan hmuhna hi a ropui kan ti a ni. Chutihruah erawh chuan, hnathawktute vil deuh emaw, tur deuh emawa hma kan lak erawh chu a tul hle a ni

Demand No. 31 - Agriculture Department hi, Mizoram chhungah Agriculture Department hian farmer-te hamthatna tur nasa takin a ngaihtuah a, scheme hrang hranga hmalak a ni a, chung zinga ka sawi duh chu - NEC project hnuaiia Alu chi-tha siamna (quality potato seed) siamchhuahna project Thingdawl Agriculture Department farm hnuaiia kal mek te hi a lawmawmin, ram tan chhenfakawm tak a ni. Tin, agriculture link-road hmun hrang hrangah laih a ni a. Chumi karah chuan kan bial chhung - Bukpui leh Thingdawl-ah te hmalak a nih avang tein lawmthu ka sawi duh bawk a. Tin, farmer-te mamawh tui-pipe, tanky leh a tul ang te nasa taka pek a ni te hi a ropui kan ti a. Farmer-te mamawh leitha (fertilizer) dealer siam tum a ni te hi lawmawm ka ti hle bawk a ni. Chu mai a ni lova, Land Development hmangin district hrang hrangah WRC thar hectare 484.7 siambelh a ni te hi a ropui a, Animal feed plant te Serchhip-a siam anih avanga vaimim hralhna an hmuh phah te hi a tha hle a ni.

Demand No. 37 - Cooperation Department hi a lunglengthlak hle mai. Department pawimawh tak leh te anga lang, lian tak si a ni a. Mirethei leh mihausa thliar lohna, party inrawlhlohna, kohhran bil awm lohna, Mizoram tan inngahna tlak leh Mizo society mila kal a ni a. Cooperation Department hnuaiia in register pawh 1179 an awm mek a, State-Level Cooperative Federation pawh 12 a awm mek a ni. Mahni intodelh, Zoram ei leh bar leh nitin mamawh buaipuitu an ni a. Mizoram sorkarah atanga assistance dawn pawh a awm ngai mang lova, federation hrang hrangte hi intodelh an ni a, Mizoram sorkarah pawh chhiah tam tak an chhunglut a ni.

Tin, Cooperative Society hian a tum tak chu - market rate control a ni a. Mirethei harsa zawk te inchhawmdawlina leh hmasawwnna tura ke pen pawl an ni. Cooperation Department hi kan hriatchian a ni a, District Office pawh an mamawh hle mai a, hengte pawh hi kan ngaihsak deuh a ngaiin ka hria. Tin, staff indaihloh hi a nasa em em mai a ni, department dang ang hian. Hei pawh hi kan hriatreng atan ka han sawilang duh bawk a ni. A pawimawh ber chu - Mizoram Cooperative Development Council din hi a ni. Member pawh an awm a, hmanni pawh khan an thukhawm tawh a. Hei hi kan hmasawwnna tura kut-ke pawimawh tak a nih avangin, ngaihpawimawh zuala hmalak fo a tul a ni.

Demand No. 22 - Sports & Youth Services hi, sports infrastructure liantham lutuk mai, kan zo lo emaw tihur khawpin kan minister chak lutuk hian budget piahlamah

hma a la a, a fakawm thlawt a ni. Nimahsela, a thawhna leh contractor chungchangah kan buai deuh a nih hmel a, kan sawi hmanah hian. Amaherawhchu, sports lover kan nihnaah leh thalai rual ten 'hei aia nasaa hma la zel tur hian kan beisei che a, kan duhsak bawk che a ni' tih kha ka sawilang duh bawk a ni.

Ka bialchhungah Kawnpui field hmalak mek a ni a, hei hi June thla tirh khan kan puang a. Hei hi a thawktute min lo nawrpui ve turin kan beisei chein, kan ngen bawk che a ni. Bial chhungah football ground te, futsal playground te buaipui mek tam tak a awm a, chungte pawh chu ka han sawilang tel duh bawk a ni.

Demand No.43 - Tourism Department hi a pawimawhna kan hre chho ve zel a. Tun term tharah hian 'kalphung thar' ka ti mai a Tourism Industry - thalaite tana eizawna tling siam chhoh a ni ta te hi a ropui ka ti a. Mizoram-ah a vawikhatna atan tour-guide tur mi 89 training zawh tawh te, SEDP hnuaiyah district hrang hranga mi 26 training chhuak awm te, India ramah pawh nei mumal an la awm loh laia *Tourism Policy, 2020* kan nei te hi a lawmawm hle a ni.

Tin, thil lawmawm tak chu - nikum khan tourist-mikhual nuai 2 chuang kan nei hi a ropui ka ti a ni. Tin, Hmasawna tur atan ka bial chhung Khamrang-ah eco-tourism project lian tak kan neih te hi hma a sawn zel theihna turin kan beisei bawk che a. Tin, project lian 7 dang kan hmu pawh hi ropui kan ti hle a ni.

Demand No. 9 - Finance Department hi, chhungkaw tinah pa kan tam zawk a, a enkawl ngailo tan chuan finance pawh hi thiam a har a. A thu mai hi a ni lo, a tak a ni a, kan Chief Minister zahawm tak hian a enkawl rei tawh hle a ni. Tin, chumi piah lamah chuan Finance Department-in full support pein leh an theihna zawng zawnga department an enkawl naah thawktute leh a changtute 'an fakawm thlawt a ni' tih ka han sawilang tel duh a.

A tawp berah chuan, Demand No. 1 - Legislative Assembly hnathawktute in hmalakna leh min enkawl na zawng zawngah in chungah lawmthu kan sawi bawk a ni. Tichuan, demand pathumte hi ka rawn support a, pawm turin ka rawn thlawp e. Pu Chairman, ka lawm e.

CHAIRMAN : Member zahawm tak Dr. Vanlalhlana ka sawm e.

DR. VANLALTHLANA : Pu Chairman, ka lawm e. Vawiinah hian kan Minister-te an department ka chuk vek hman dawn lova, min lo hriatthiam ka ngen a ni. Pu C. Lalrinsanga, Minister zahawm tak chan atang hian ka han tan ang a.

Mizoram hi midang aia kan chungnunna chu - *organic farming* kan kalpui thei hi a ni a, niminah pawh sawi a ni tawh a. 'Farm to table' an tih, huan atanga a eitute

dawhkana a luh dan tur hi ngunthluk taka kan buaipuia, kan ngaihvena, khulaiah a market zir tur leh buaipui turte pawh a hrana kan rawiha, phaia kan tirthchhuah a ngai niin ka hria a. Chu chu ka sawi hmasa duh a; tan kan lak a ngai hle.

Intodelh chungchang kan han sawi a, hei hi chu ka vei tawp a ni. Kumthar thuchahah ‘kan intodelh dawn’ kan ti a, budget kan han pharh a, intodelhna thu kan han dah a, budget speech-ah. A taka kan hmu lo hi chu a fuh lo thlawt a ni. Kuminah pawh State hian engnge kan tih ve dawn? Kan tih ve tur tawh chu a awma lawm. Capital Outlay-ah hian nuai khat chauh a awm a, engatinge agriculture hi kan ngaihthah em em? Mihring 60% chuang kan ti a, ‘engatinge hetiang mai maia budget kan tih kual le’ tih hi rilruah a lo awm a. A fuh lo a ni; a takin i che ang u.

Tin, fertilizer chungchang niminah ka sawi tawh a, ka sawi leh duh chu - MRP kha niminah khan ka sawi lova. Khulai Bairabi-ah point-ah an leina rate ₹260/- a ni a, an hralh lehna lam chu hriatpui an har tawh khawp mai; an duh duhin an hralh a ni deuh ber a. Farmers ho an inchan lova, harsatna an tawh a. Chuvang chuan, fertilizer thilah hi chuan, ‘kut hnathawktute nekchepin awm tawh suh se’ tih hi ka sawi duh a ni a. Dealers ten duh duhin Burma-ah an hralh mai mai tur a ni lo; helaiah kan mamawh a nih chuan kan hmang tur a ni. Kurtai hi chocolate ang deuh hian khehsawm theiha ti tur hian kan minister hi ka ngen thin a; ti sela chu, ‘*Pu Sangtea kurtai*’ kan ti kumtluan tawh dawn a. Chema han tihsawm nawk nawk ngai lo hian a mould hi a awm a; hmingchherna tha tak a nih ka ring a.

Tin, Cooperation ah hian, 2008 kum khan Pu Chairman, I ding lama mite an sorkar tum khan MUCO Bank atangin mi tam tak loan pek an ni a, an rul tha lova. Tunah hian vaibelchhe engzatnge, an ngennaah pawh vaibelchhe tam tak a ni; ka sawilo ang chu chu. Ka zawhnaah pawh a awm a, *Unstarred*-in a lo la chhuak dawn. Loan rul tha duh lo te ‘sorkar suma rulh sak kan tum emaw ni’ tih mai tur khawpin tunah kan buai ta hi chu, a fuh lovin ka hria. Anmahniin rul rawh se.

Pu Robert Romawia Royte, Minster zahawm tak demand-ah ka han lut ve ang a, sports chungchangah. Infrastructure - ruhrel siamna lamah kan kal leh lutuk a, promotional fund ah kan kal lova. Kei ngei pawh association hruaitu ka ni ve; kan hre Chiang a ni. A sum lah kha diklo a lo awm a, tunah pawh investigation tih mek a ni. Chuvang chuan, ruhrel siam leh association tanpuina, player an thawnchhuahna te, tournament an lo buatsaih vena tur te a inkhairual lo lutuk; a inhen lo lutuk hi chu kan ngaihtuah a ngaiin ka hria a. PMJVK hnuaiyah ‘nuai singli chuang a rawn lut e’ kan ti a, helaiah kut kan beng dur dur a, dawhkan kan chum a. Tute nge enkawl tunah hian? AE pakhat an nei a, JE pathum vel a ni lawm ni an neih chauh? Khang ho khan nuai singli man hi, an thlawk an thlawk a nih ngawt loh chuan, engtin nge an ven tehlu ang? A endikna lampangah kan chak leh si lova, a hnathawktu turte nen a kan tan a ngai a Aawmze neia kan kal a ngai.

PMJVK chungchangah hian Sports Minister hi kan bei hran reng reng lo. Amaherawhchu, hmasawna kalpuinaah hian ‘a khai rual lo e,’ tiin ka sawi a ni. ICT te, Tourism-ah te pawh khan PMJVK hnuai dawn a ni tho; mahse kan sawi em em hleinem. Amaherawhchu, heng zirna te, hriselna te, skill development te, entrepreneurship-ah te kan kal a ngai; kan indawm a ngai a, helama sum kal ta lo lutuk leh sports lama kal ta hum huma hi ‘a fuh lo’ ka ti a, ka han auchhuahpui mai a ni. Sports hi kan haw reng reng lo; kei phe chu inkhel-mi ka ni Tin, sports ruh-rel nuai ₹40,000 chuang man tunah kan buaipui a. Ka bialah Ramhlun Sports Complex a awm; basketball a chhuat siam that a ngai a, rawng kan hnawih a, light te kan dah a; boxing hall pawh tunah buaipui a ngai leh tawh. Tennis khelhna kan buaipui a, wrestling hovin min rawn ko a, tunah weight lifting lamin harsatna an nei a, cricket-pitch pawh a nuai tela siamthat te a ngai. Sorkar atang chuan a siamna kan nei hleithe hleinem. Maintenance fund kan nei tha lova, engtingge a nuai ₹40,000 man kan maintain ang? Ngaituahna kan sen a ngai a ni. Kan rem chhoh a ngai; thil pakhatna kal lutuk hian harsatna kan tawh thin. A maintain lehna turah sawlai Ramhlun Sports Complex pawh khawih hleitheih loh, MLA fund-a kan buaipui ngaia saw, engtingge a aia lian nuai ₹40,000 man chu kan enkawl tehlu ang? Ruahmanna neih kan ngai a, chumi tur chuan hma kan lak a ngai khawp mai. Kan Minister zahawm hi tourism lama a hmalakna erawh hi chu tha ka ti; a khaw hawi a zau ka ti a, helamah hi chuan ‘ka support a ni’ tih hi ka tarlang tel duh a.

Pu Zoramthanga, kan Minister zahawm tak leh kan CM ni bawh hi a demand thenkhatah han luhpui ka duh a.

SEDP policy-ah ‘pilot project’ kan ti a, pilot project chu ‘enchhinna’ a ni; ‘ai-te-chhinna’ te pawh a ni ang chu. Sorkar hmasaah ‘ai-te-chhinna’ tiin kan lo sawi tawh a, khata tanga inzir reng reng lo khan tunah sorkarna kan kalpui leh a. Chutiang bawh chuan, SEDP-ah ai-te-chhinna pilot project kan ti a, a pilot project atang chuan SEDP board khan an lo endik ang a, guidelines - a kalphung tih dan turte an lo ziak ang a, report te an pe turah ka ngai a. Tukin zinga ka zawhna kan CM zahawm takina min chhannaah chuan, ruahmanna report engmah an lo pe reng reng hlei nem. Kumtin cheng vaibelchhe 3 bawr vel kan senna kha engtin nge ni ta le? Pu Chairman, i awmna board erawh kha chu report in pe a, in ti tha khawp mai a. A hma pawhin ka sawi tawh; a bak board te hi chu, ‘engnge an tih’ tih pawh a hriat hleihnem; nuam tawl sorkar a ni mai lo maw.

Industrial policy kan sawi tam lova, entrepreneurship policy kan sawi tam lova; kan nei reng a nia. Water policy te kan sawi tam lo, amaherawhchu Pu Chairman, i ding lama thute khan an rawn sawi ve vak zel a, kan sawi tam vang a ni a. A hrana inzir tum lem lovin helaia opposition tena kan sawi tam atangin, ‘a.. hei hi sawi a tha ang e,’ an rawn ti a, an rawn bei ni ve deuh maiin ka hria a. Kalphung tur felfai kan neih a ngai

khawp mai; hmasawna hi a khai rual tur a ni. Kan budget atang hian, ‘a khai rual em; kan hman dan a khai rual em’ tih hi example pakhat rawn sawi ka duh –

Nikumah Aizawl East-I bial chhungah hian ‘minor works - major pawh ni lovah, engtin nge sum hman a nih; 2019 atang khan engtin nge sum hman a nih?’ tih kha ka zawt a, chutah kawng siamna, ka theih ang ang ka lakchhuahah chuan - ₹15,09, 98,000, a ‘10’ ang te pawhin a sawi theih ang a, ₹15,09,98,000 kha Aizawl East-I ah minor works PWD hnuai kawng siamna nan kan hmang. Tun session-a ‘Lunglei khaw chhung kawng siamna atan engzat nge sen a nih?’ tih zawhna-chhannaah khan, nuai ₹573 chauh sen a ni leh si a, bial pakhat kan CM biala minor works kawng siamna atan chauha kan hman kha Lunglei kawng siamna let-3 dawn a ni tlat. Vawiinah ka chhanna a rawn chhuak a, ka han belh nghal char char a, theih ang angin, chutah chuan Aizawl East-I chhunga kawng siamna nan hian nuai ₹5,356 a nil; a let-10 dawn (a let-9 chuang) Lunglei pumpuini kawng siamna tana a dawn a let 9 chuanga kha Aizawl East-I ah hman a ni. Chu chu alawm, ‘hmasawna khai rual lo; a priority set a ngai’ kan tih thin. Kan prioritize a ngai; a sector-ah te, a hmunah te hian Lunglei mipuite an zahawm ka ti khawp mai. Aizawl – Lunglei, ATL road te pawh saw ka sawi fo thin; kal a hrehawm lutuk. Saw te saw a siam theih reng; hmun dangah pawh kan siam thei a ni lawm ni? Engati nge saw saw kan ngaihthah em em ni? Chhim lam MLA te an ngawi reng hi chu, a hrehawm chu ka ti ang reng. Lo tawng chhuak ve rawh se; kan chhim lam pasaltha ho - Chawngbawla te, Dokulha te, Hlawnehheua teho an va zahawm em! Chhim lam atang khan mi huaisen an lo chhuak thin a ni lawm ni? Kei pawh hi chhim fa ka ni; Chawngbawla thlah kal zel ka la ni. Huaisen takin ka rawn sawi ngam kei chu. Kan MLA te ho khan huaisen-zia i chhuah ang u; Chhim ho kan dawih ngai lo a ni lawm ni kha?

‘Covid-19 harsatna kan tawk lo’ kan ti lova, Covid-19 ah hian harsatna kan tawk teh meuh mai; a kohhran leh task force zawng zawnga rawn pawh-pen kha a tul lo; kan pawisa dawn kimloh kan chhuanlam foa hi, kan dawn belh hian a rawn khuh a ni. Chutah chuan, ‘chhuanlam a tling lo e’ kan ti a ni mai a ni. Topic pawh-pen phet tuma hi chu a fuh lovin ka hria a. Chhung-inkhawmah fate bulah thu-tha te kan la sawi ve duh ang e; khatiang lo zawng khan i ti ang hmiang, ka han ti a ni.

Pu Chairman, ka duhtawk tan dawn hnai tawh a. 1966-ah Assam sorkar leh sorkar laipuiin harsatna kan tawh te min tawrhpu ve lova, ‘kan nat rualin an na lo e’ kan tih vangin, thalai tam tak an tei-chhuak a, thih ngamin ram chhan nan an tei-chhuak a. Chutih lai chuan ram chhan tura lo pen-chhuaktute lakah tunah hian Mizoram chhan a ngai tlat. Corruption chungchangah restricted tender phei chu kan sawi ngun tawh lutuk. Ram hruai dan kan hriatna aia tlin dan hriatna kan nei sang zawk. Ka sawi leh ang, ram hruai dan kan hriatna aia tlin dan kan hriatna nei sang zawk kan tam vang hian em ni ram dang kan aw h em em thin? Kan ngaihtuah a ngai khawp mai hei hi ..
(**Chairman:** A zo thei dawn tawh em aw?)

Pu Chairman, kan chhe vek hran lo; ka tawp dawn. I ding lama mite kha an chhe vek hran lova, amaherawhchu, kalphung thaa hrui loh annih avangin harsatna an tawk a ni. Hei te hi Pu Chairman, i phalnain ka han sawi duh a. “Corruption sawrkar nge, Kristian sorkar?” tih, Mizo National Youth Front Headquarters thuchhuah, hei, a kawm pawh thla ka rawn la a. Chumia thu inziak chu ka han chhiar duh a ni. I phalnain, Pu Chairman, “Huanah rukru a lut a, mipuiin kan hual a, paltlanga dingin ‘lo chhuak rawh’ kan ti a, mahse, he rukru-pa hi chuan zak map loin, thing lera thuin a la ei ta mawlh mawlh mai a nih hi,” tih kan CM zahawm takin a ziahna lehkhabu a ni a, Chu chu kan ngaithuah chian a ngai khawp mai. ‘Tungea ei mawlh mawlh tu chu’ tih hi ngaituahnaah cheng zui sela, tih a ni. Ka lawm e.

CHAIRMAN : Tunge sawi leh ang? Awle, Member zahawmtak Er. H. Lalzirliana ka sawm e.

ER. H. LALZIRLIANA : Pu Chairman, ka lawm e.

Vawiinah 8th Legislative Assembly Budget Session hnukung ber thleng ve theia ka awm hi Pathian hnenah lawmthu ka sawi a. Tin, khati laia i thut lai nen hian kan innang fuh thei riau mai a, i inhmeah a, khalai hmun kha i awmna tur tak niin ka hria. Hei, vawiinah kan Minister zahawm tak tak te - Pu Robert Romawia Royte, Pu C. Lalrinsanga leh Pu Zoramthanga te demand kan han sawiho a ni a. An chungah hian lawmthu sawi tur tam tak a awm thei ang a, kan sawi vek seng lo ang a. Demand-ah hian ka han kal ve pawp ang a. Information & Communication Technology hi ka han sawi lawk ang a.

He department-a thawktu zawng zawngte a hmasa berin ka congratulate duh a. India ram khawpui hrang hrangte rualin 5G service min han launch sak thei hi a ropui ka ti a, an hnenah lawmthu kan sawi a ni. Kan Union Finance Minister Pi Sitharamani’n budget a present-ah khan, “*Amrit Kaal Budget* is technology driven and knowledge based economy with strong public finances” a ti a. Chutah chuan, he kan ram inrelbawl danah kan finance management system a ni emaw, kan hmalakna reng reng emaw hi ‘technology driven’ a ni ang a. Chutah chuan, “economy hi thalaite, hmeichhiate, hnam-hnuaihning zawkte leh rah-beha awm zawkte tana vanneihna tur a ni” tiin he budget a hi kalpui a ni a. Chutah chuan, ‘connectivity’ a pawimawh khawp a.

Pakhat lek ka han sawibelh duh chu - ka bialah khuan, Mamit-khawper a ni mai a, jail a awm a, jail-tlang. Tin, khumi khuaah khuan North Sabual a awm a, a thlang lawkah Bualzau a awm a, khutah khuan signal hi a la tha lo a ni. Bial fanga kan kal chuan inbiakpawh theih loh a ni. Hei hi khawngaih takin kan ICT Minister leh a thawktu ten min lo chhinchhiah sak se la ka duh a ni.

Tichuan, central sorkar hian infrastructure hi a ngai pawimawh khawp mai a. Priorities No. 3-ah pheii chuan, ‘Infrastructure & Investment’ a ti a. Chutah chuan, hei ‘sports’ kan han tih te, ‘tourism’ kan tih te hi a tel vek mai a. Sports-ah hian keini Mamit District, a bik takin ‘aspirational district’ kan ni a, infrastructure lian pui pui, kan hmuh ngai loh leh kan dawn ve tur pawha kan rin phak loh tunah hian infrastructure bunin kan han ti ve tluk tluk mai hi, a district mipuite chuan beng thleng thlengin ke kan khai a ni. Mizoram hian, ‘*Tlawng thlangah khua a var thei lo*’ an tih kha, ‘Look West Policy’ kan nei ve tawh a nih hi a! “He sorkar hian khawthlang lam min ngaihtuah ve tawh a nih hi a!” tiin kan rilru ah mipuite kan lawm em em a ni. Tun atanga hun reiloteah heng te hi a nihna ang tur taka hmu thei turah kan inngai a, kan lawm hle a, a minister te leh a thawktute zawng zawng chungah lawmthu kan sawi ni se la.

Tin, central sorkar hian he investment, capital investment a tan hian pawisa pawh a dah hnem khawp a, 10 lakh crore, kum 3 chhunga a increase-na 33% a ni a, chu chu ‘3.3 of GDP’ a ni nghe nghe a ni. Chuti khawp chuan central sorkar hian investment, infrastructure-a investment hi a ngai pawimawh a ni.

Tin, tourism hi a ngai pawimawh khawp mai baw a, central sorkar hian. Hei, middle class-te pawh ina kan enjoy tur policy te, scheme te pawh a siam a. Chutah chuan, ‘foreigner tourism’ ringawt ni lovin, ‘domestic tourism’ pawh hi a ngai pawimawh a. Chutah chuan, scheme lian tak takte a siam a. Chumia tel pawimawh chu, ‘*Dekho Aapna Desh*’ a ti a; a ram chhung mipui ten kan ram chhung kil thenkhat kan la hmuh loh, potential awm leh tourist attraction, tourist place pawimawh tak tak te *Entirnan*: South India atang te chuan North-east rawn thlen ringawt pawh hi an chak a ni. Chutiang chuan, hetiang scheme te kalpui a ni a. Chutah chuan, State sorkar te nena thawk hova, PPP mode te, infrastructure din te leh tourism circuit siam te chu an hna leh an ngaihpawimawh a ni a. Keini pawh chutiang hawi zawng chuan ke kan pen a pawimawh hle dawn niin ka hria a.

Tin, Pu C. Lalrinsanga demand-ah hian hei Agriculture, Cooperation leh Irrigation hi kalkawp vek a ni a. Central sorkar pawhin a ngai pawimawh, ‘green growth’ a ti a, Cooperation pawh a ngai pawimawh hle a ni. Hemi develop-na a tan hian sum tam tak pawh a dah a. Tin, irrigation & Water Resource hi a lo pawimawh khawp mai a, heng zawng zawng ti hlawhtling tur chuan Irrigation & Water Resources hi a function that a ngai ta a ni. Project pakhat central-ah kan theh lut a, *Jal Shakti Mission*-ah. Kan CM zahawm tak pawhin DO Letter te min ziah sakin Tuidai khuah tur kan buaipui a. State sorkar-a Planning atang tein min forward sak a, kan zuk bawhzui a, kan um nasa a ni. Chutah chuan, a han kal kual a han kal kual a, a tawp a a rawn luhna chu Shillong-ah, Central Water Commission-ah a rawn thleng chho a, chuta tang chuan Mizoram-ah Irrigation Department-ah a lut a ni. Tichuan Irrigation Department ten hma lain survey leh chutianga project han tih hnu ah khutah baw a approval te leh he programme a hlawhtlin theihna tura tih tum a ni a. Chutah chuan, Mamit District te

potential area kan ni tih hriain Minister hian theihtawp min chhuahpui tih kan hria a, kan lawm hle a ni.

Tin, kan CM zahawm tak demand-ah, Legislative Assembly kum 50-na chibai a tharin kan inbuk leh ni se la. He kum 50-na lawmna kumah keini hun a lo inher ve chiah te hi kan vannei hle a ni. Kan Assembly te hi an efficient em em a, an inpekna a nasa a. Keini experience nei lo leh engmah hre lo, 'hei hi kan MLA a ni a' tiin, helai campus hrim hrim hi ka vawikhat luhna a ni a. Chutiang chung chung chuan min dawhthei em em a, kan mamawh te, kan tih tur hriat loh te pawh min kawhmmuh thin a, an chungah lawmthu kan sawi ni se la.

Tin, he sorkarah hian nihna min pe ta sela, Finance Department chan hi ka hreh ber tur niin ka hria a. Kawng tam takah harsatna kan nei a, Covid 19 a ni a; ramri buai kan nei a; refugee buai kan nei a; ran hri leng kan nei a. Chuatiang karah chuan 'engtingge ni, harsatna namen lo India ram mai ni lo, khawvel pumin harsatna kan tawh, central-ah pawh an sawi nasat ber chu 'Covid-19 effect' hi a ni. Mithiamte'n an zirnaah phei chuan, he Covid-19 effect hian kum engzah dang hi nge min la effect dawn tih hi an sawi thei lo. GST collection a tla hniam a, industries an closed a, factory an closed a, chhungkaw tam takin eizawna an hlauh phah a. Chutiang chuan namen lovin harsatna kan tawh a ni.

PRS training nikuma kan kal khan MLA thenkhatte nen Agra kan va tlawh a, chung hunah te chuan Agra chu kum dang ang ni se tourists an phu luai luai tawh a ni; kal hleih theih loh khawpin an in nek tawh; mahse chung hunah pawh chuan kan la thawl rang mai. Star Hotel Agra khawpuia awm, zan khata sing 2-3 rent te pawh 50%-a an discount chung pawhin luahtu tur a zahve pawh an la hmu lo. Hotel dang leh restaurants te, a sira eizawna lo nei, tourists guide te, monuments lo zuar te zawng zawng tan khan eizawna a bo vek a ni. Chung chu kan dinhmun a ni a, heng karah hian 'Finance Minister nih hi a va han hrehawm dawn em' ka ti a. Theih ang angin min kalpuin, flagship programme SEDP te hial pawh tam takin kan kal thei dawn lo a ni kan tih laiin hetiang kan han kalpui chho te hi a lawmawm ka ti. Duhthu chu a sam hauh lo; kan beisei ang pawh a ni lo; heti chung chung tun dinhmun kan thleng leh hetiang dinhmuna min han hruai chhuak hi kan Finance Minister a fakawmin ka hria a, ka sawi lo theih lo a ni. (Pu Chairman, minute 1 chiah aw, please?)

Horticulture hi a pawimawh khawp mai a, Covid-19 kan tawn khan a hlut zia kan hmu chhuak a ni. '*Necessities is a mother of invention*' tih ang khan horticulture te hnathawh leh an efficiency kan hmu a. Horticulture department hi an fakawm ka ti khawp mai a, Mizoram-ah kan hmuh ngai loh leh kan hriat ngai loh thei leh thali chi hrang hrangte min han lakchhuah sak a, Mizoram leilung hi a lo ngeih ve em em mai a, khaw tam tak, hmun tam takah eizawna tam tak, Mizoram mipuite'n kan tlak chham lai pawha min chawmtu an lo ni ta a ni (**Chairman:** I titawp thei dawn tawh em aw?)

Awle, Pu Chairman, sawi duh tam tak chu ka la nei tho mai a, ti khan kan duh tawk mai ang e. Ka lawm e.

CHAIRMAN : Member zahawm tak Dr. F. Lalnunmawia ka sawm e.

DR. F. LALNUNMAWIA : Pu Chairman, ka lawm e.

Kan chief Minister zahawm tak leh Minister pahnihte demand-ah hian, a hmasain kan Minister zahawm tak Pu Robert Romawia Royte department atangin ka han tan ang a. A department chante hi a hranpaa sawi lovin a pathum hian ka han sawi pawlh mai ang a, hun a rei loh zawk nan.

Kan hriat angin kan Sports Minister zahawm tak kaihhruainain SEDP – Sports, ICT, Tourism Development Board din a ni a, a kaihhruaina hnuaiah he board te leh departmentte hmalaknain central atangin sum tam tak haichhuah a ni a. Pu Chairman, tun hmaa kan hriat ngai lem loh sum thahnem tak an haichhuak tawh a, a ropui hlein ka hria a. Sports mai ni lovin, Mizoram IT tihhmasawna tur sum te, tourism tihhmasawna tur NABARD leh EAP fund hmanga hmalakna tur eng emaw zah te an ruahman a ni.

Pu Chairman, nikum kum tawp khan kan Sports Minister zahawm tak hi a hnung zuiin Delhi-ah kan zuk kal ve a, Central Ministry, North Block-ah te Finance Ministry dawrin a hnung ka zuk zui a Ssorkar laipui a dawr thiam zia te a takin ka zuk hmu ve a. A department chanah a experience te a hmang thiam em em a, churang chuan, Mizoram tan hian sum tak a hailut a ni. A thiamna leh a finna te Sports lamah te hmangin, a tuina sa te a lo ni bawk a, hmasawna tam tak kan hmu a, Mizoram thalaite beiseina tam tak siamtu pawh a lo ni ta a ni. Mizo thalai tena kan mamawh em em - internet connectivity tha te leh sports hmun-hma (infrastructure) te hi a ni a. Hemi 2 hi Zoram thalaitena an aw h em em leh an tui pui a ni a, heng te hi hriain nasa takin hma a rawn la a, internet connection tha zawk te kan lo nei chho ta mek a, a lawmawm tak zet in ka hria a ni.

Tin, Pu Chairman, ka bial Muallungthu-ah sports complex-ah playground/football ground pawh phullem min phah sak ve a, tha takin an zo tawh a, tunah hian hawn mai hmabakin kan awm a, thla thar lamah hian hawn kan beisei a ni. Vawiah hian Pu Chairman, i vei lama mite pawh hi min lawmpui ve tur pawhin ka sawm a, a lawm hun/a hawn hunah chuan kan bial thalaite lawm zia, sport mite, football tui mite lawm zia te min rawn hmu pui ve tur pawhin ka sawm nghal a ni. Min rawn telpui ve ngei sela, helai awmhmuna a sawi-hnawm zawng chauh ni lovin, mite lawm zia, thalaite lawm zia te a tak ngeiin rawn hmu ve se tiin ka han sawm duh a ni.

Sport lamah hian kan Sport Minister hian nasa takin a thawk a. Kan opposition unauhte pawhin an helh deuh te pawh a ni ang a, theihtawpa beih te a han tawk a. Ka rilruah chuan, ‘balhla pawh a rah a that chuan, dotu pawh a ngah thin’ tih ang deuh khan, a rah a tha a, dotu pawh a ngah ni ve deuh te pawhin kan ngai a ni. Chak tak leh huai takin hma la zel turin ka han fuih duh a. Kan veilama thute pawh hian an beih lutuk chuan ‘Zoram thalai infiam mite, sports tui mite an ti hnual palh ang’ tih te pawh kan hlau ve deuh a ni.

Tin, Pu Chairman, Sports lam kan sawi rual hian department dang demand kan sawi takah te pawh khan an titha thawkhat viauin ka hria. Health leh Education-ah te, tui intur pek chungchangah te, *Ni-100 inhlawhna* thua te, minister demand kan sawi takte kha ‘an titha lo mang e’ tia sawi tur a awm lovin ka hria a, Sports lam khan hliahkhuh tir kan tum ta lutuk deuhin ka hria a. Khang ho zawng zawng pawh khan an titha em em a ni tih kha ka sawi duh a ni.

Kan Chief Minister zahawm tak chanah hian ka han kai ang a, Horticulture hian sawi a hlauh lo riauvin ka hria a, Pu Chairman. A tuiawm hlein ka hria a, tawite ka han sawi ang a.

Horticulture Department-ah hian kan sorkar chhungin hma kan sawn hle a, a bik takin thali te, tomato te, zikhlum te leh thei thenkhat dragon fruit te, grape te, lakhuihthetei, serthlum te, dawnfawh te thar a pung hle a. Pu Chairman, i bial Ngopa leh a chhehvel phei chu dawnfawh thar nasa ber an ni a, nuai 100 tel nikum khan an lei chhuak a ni a, a lawmawm hlein ka hria. Horticulture Department puihnain thei leh thlaiah te Mizoram-in nasa takin sum kan lalut chho mek a ni.

Tunlai chu thenkhatten kha lampang kha an sawi tlem angreng si a, hmalakna la hlawhtling lo mau deuh chauh hi a then chuan an sawi tui deuhin ka hria a. ‘*Ka bawngnhnute in sawi duh mang si lova, ka zu in hlir in sawi mai*’ tih ang deuh kha niin ka han hria a. Chuvangin, a bawngnhnute in lampang pawh kha min han sawipui tam ve deuh se ka han ti deuh a ni.

Pu Chairman, Horticulture hmalaknaah hian tui khawlina tam tak Horticulture Department-in a siam sak a, greenhouse te an pe a.. (**Chairman:** Ngawih lawk rawh aw. Hei, dar 4:00 PM a ri a, nimin lama kan tih dan ang khan dar 5:00 PM kan tlang leh mai dawn em ni? Engnge member te ngaih dan? A nih, tlang mai ang aw) Pu Chairman, kan Dy. CM zahawm tak bial Tualte-ah phei chuan thalaite’n tomato an tharchhuah atangin vaiho siam ang *tomato ketchup* te pawh an siam thiam tawh a, tunah hian an siam chho mek tawh a, a lawmawm hlein ka hria. Tin, kan sorkara kan CM kaihhruaina hnuaiha Mizoram-in ‘Best Horticulture Award’ te kan dawng tawh a. Tin, nikum khan Agriculture & Horticulture Expo, Delhi-a neihah *Second Prize for Best Display Award*

Mizoram-in kan dawng bawk a ni. Hengte hi sawichhuah loh atan chuan ka ui a, horticulture lamah hian hma kan sawn hle a ni tih Pu Chairman, ka sawi duh bawk a ni.

PWD-ah hian lut ila. Hei, kan sorkar kum 4 zet kan lo hmang liam ta a, sum harsa karah kawngpui chei mek niin, siam belh a ni bawk a. Tin, hemi chhung hian Pu Chairman, kan CM-in theih tawpin Delhi-ah tan a la a, sum pawh tam tak a haichhuak a ni. Kan sorkar tir khan Delhi-ah Ministry a zuk dawr a, thenkhatin fiamthu hmangin ‘vuak dup’ tih tein kan sawi thin kha, fiamthu nan an hmang daih te a nih kha. Mahse hun a kal a, Covid te a lo kian meuh chuan tam tak a lo hlawhtling ta a. Kan CM hmalaknain, state dangten an dawn ve loh crore ₹600 zet mai PM-DeVINE scheme-ah dah a ni a, a ropui ka ti a. Chung zingah chuan Aizawl khawthlang leh hmar lam kawng sialna tur te, by-pass road siamna tur te, bamboo link road project te leh Mizoram leh thenawm state inkalpawhna tur kawng te pawm a lo ni ta a. Kan CM zahawm tak hmalaknaah hian hmun hrang hrangah hma thar kan la dawn ta hi a ropui hle a ni.

Pu Chairman, ka sawi duh chu – ‘sorkarin sum a ren lo mang e’ ka tih rual hian, kawng bikah phei chuan tan lak a ngai hlein ka hria a. Kawngpui a that chuan mi rethei leh mi hausa pawhin kan chhawr tlang a, ruling leh opposition pawhin kan chhawr tlang a ni. Chuvangin, kan zaa lawmman tur niin ka hria a, hei hi kan CM zahawm tak hian a hmu Chiang hlein ka hria a ni. Sum kan hmanna te kan ngaihtuah chuan, ‘mipui tan vek a ni’ tih ka sawi lang duh a ni. Kan CM hmalaknain airport tihchangtlun a ni a, tunah hian G20 meeting neih tumah khan Lengpui Airport chu la zo lo mahse, tunah hian mawihnai takin, zahpuiawm lo takin mikhual kan lo dawngsawng thei hi a ropui ka ti a. Chung a hmalaknate avang chuan, ‘Most Proactive State Award, 2022’ pawh Mizoram-in hemi regional connectivity scheme-ah hian kan dawng nghe nghe a nih kha. Hengte hi a ropui ka ti a. Khawilai kawmkar leh kilkhawr chauh sawi lo hian, ‘a lawmawm lam te pawh hi i sawi tam tlang ang u’ tih hi Pu Chairman, ka tarlang duh a ni.

A tawp nan Agriculture Minister zahawm tak demand hi tarlan ka duh a. A ni hian nasa takin hma a la a, a bik takin leilet tihhmasawna (land development) lamah nasa takin hma a la a, kan bialah pawh mi tam takin an chhawr a, an buh tharte a pung mek a ni. Tin, PMKSY hnuaiyah tui khawlina tanky leh pipe min pe thin a, kan lawm khawp mai. Lui, phai ruama tui pump chhuah tur tein hmun hrang hrangah hmalak a ni a, a ropui ka ti a ni. Agriculture Deptt-ah hian sorkarin nasa taka hma lain, tunah hian SEDP loneitu leh kuthnathawktute dawm kan tum a ni. Ka sawi tel duh chu - SEDP sum hi tawngpawng sem a ni lova, chumi entirnan chuan pawisa an pek bakah a chi - vaimim chi te, bekang chi te, kuhva tiak te leh mau tiak te sem a ni. Chung chuan a entir chu, ‘a takin kuthnathawktute hi thawh tir kan tum a, a chi leh a pawisain kan pui a ni’ tih ka sawi duh a ni.

Kawng hrang hrangin, duhthusamin la thang lo mah ila, Mizoram hian tun sorkar kaihhruaina hnuaiyah hian awmze neiin hma kan sawn zel ang. Term khatnaah chuan duhthusam ni lo mah ila, a lehpekah chuan hma kan sawn viau ka beisei a ni.

Tichuan, kan Chief Minister zahawm tak Demand te, kan Minister pahnih - Pu C. Lalrinsanga leh Pu Robert Romawia Royte Demand te hi lawm takin ka thlawp e. Ka lawm e.

CHAIRMAN : Ka biala dawnfawh i sawi avangin second 11 ka belh che a nih kha. Tunge sawi leh ang le? Member zahawm tak Pu Vanlalhlana ka sawm e.

PU VANLALHLANA : Pu Chairman, ka lawm e.

Kan ramin G20 kan thleng a, sorkar leh mipuite pawh an inbuatsaih mup mup a, thil tha tak herchhuak turah kan beiseiin, kan ngai a ni. Chutih rual chuan kan inbuatsaihnaah hian a tuar pawlthe pawh a awm loh theih loh a. Ka hriat danin kawng bula inzuar ho hi ni-thum chhung chu an dawr khar turin an ti ni awm tak a ni a, mirethei te te, nitina ei chawp zawng an ni a, ni-thum chhung han off tir kha ‘an khawngaihthlak mang e; a lehlamah ram tana thil tha tak he G20 hian a hrin chhuah kan beisei baw si a’ tih ka tarlang hmasa duh a ni.

Demand No. 31 - Agriculture-ah hian ka tan tan ang a. Ei leh bara intodelh hi sorkarin a tum laimu a ni a. Kan inzirtir pawh, ‘kan sorkar chuan mizo-buh kan ei vek ang’ tih te pawh kan sawirik thin kha. Amaherawhchu, kan nihna takah chuan, agriculture-ah hian a hniam zawngin kan kalin ka hria a. Nikum budget estimate kan en chuan crore ₹175 a ni a, kumin budget estimate chu crore ₹170 a ni a, nikum kan pha lo phawt a ni. Tin, kan buh tharchhuah hi 2015-2016-ah a tam lai berin metric tonne 62,089 a ni a. Chumi hnuah chuan metric tonne 62,000 hi kan pha ta lo a ni. Metric tonne 59,000 te, metric tonne 60,000 velah te kan tla ta char char a, 2015-2016 a kan tharchhuah kha kan pha leh ta lova, tan lak a ngai deuh awm e. Mizo mipuite’n kan mamawh hi chu metric tonne 2,00,000 a ni a, chutah chuan kan tharchhuah hi metric tonne 60,000 vel a ni. Chuvangin, agriculture-a kan dinhmun hi tan lak a ngai viau a ni.

Demand No. 22 - Sports & Youth Services-ah hian ka sawi duh chu - PMJKV kan sawi thin a, tukin pawh khan zawhbelh ka duh viau a, hun kan chang ta lova. Ka tarlan duh chu - sports infrastructure hi PMJVK zarah kan nei ta viau a, hemi scheme-ah hian a maintenance a awm lovin ka hria a. PMJVK atanga sports infrastructure kan siam zawng zawng hi a maintain tur chu kan ni ta a ni. Kan neih tawh sa ngaituah hian a hautak hle dawnin ka hria a, kan la neih belh dawn pawh a ni mai thei a. A maintenance a that loh chuan, a tlo dawn lo tihna a ni a. Chuvangin, Lawngtlai Residential Sports School kha chu maintenance titu tur kha a Chiang mai a, ‘a dang zawng zawng hi eng anga maintain tur nge’ tih kan minister hian min hrilhfiyah se ka duh a.

Basketball court leh volleyball court tam tak kan nei a, chutih karah chuan Local Council inthlan dawna kan Sports minister Durtlang North-a a lo kala futsal field a tiam kha, vawiinah hian ka thing leh duh a ni. Remchangah hian ka sawi ziah a, a chhan chu a lo kal a, a intiam a, ‘min vote tling ula’ a ti a, kan vote tling a; vawiin thlengin kan la nei si lova, a tih tur a la ti ve lo niin ka hria a ni.

Demand No. 43 - Tourism-ah hian skywalk leh ropeway a lar hle a. Sikkim te nen sanctioned rual kan ni a, keini chu hmuh tur a la awm lova, Lokayukta lamah a la kual zak zak ni awmin a thuin ka hria a. Hei hi kan dinhmun chiang tak leh, ‘eng vanga state dangin an neiha la nei thei lo nge kan nih’ tih hi min hrilh turah ka ngai a ni.

Kan House Leader demand-ah hian ka kal ang a. A ni hi a chhuanawm ka ti a, hruaitu danglam tak pawh a niin ka hria a, ngaihnam tak leh fiah taka thusawi thiam a ni a. Mizo nih a tinuam thin a, a tawngkam te hi Pu Chairman, han ngaithla nawn leh ta ila - “Mizo mipui chu kan ram hian a chawm zo; ruahtui tha baw si, ralmuang baw si, lekhathiam tamna ni baw si; tawng khat hmang, sakhaw pakhat bia, disciplined society ni baw si” a tih hi; khang zawng zawng awmkhawm retheih viau ringawt kha a theih loh reng reng. Khing bakah khian a hnuaiah, ‘oil leh gas tam ropui si’ a ti a; heti chung a retheih viau ringawt hi a theih loh reng reng; ‘chhungkua zawng zawng hi millionaire kan ni thei a ni” a ti baw a, a ngaihnam ka ti a.

(*Hon. Dy. Speaker-in Chair a la a..*)

DEPUTY SPEAKER : Sawi chhonzawm rawh le.

PU VANLALHLANA : “Aizawl hi India ram state capital-a traffic jam awm lohna awmchhunah ka siam dawn a ni” han tih te hi, a ngaihnam ka ti a, ‘a theih tak tak dawn emaw ni’ te pawh ka han ti a. Mahse term khat an han sorkar hian, a theih loh deuh nge ni; an hmalakna chu a la awm lem hlei lova. Amaherawhchu, a ngaihnamna erawh chu a bang chuang lovin ka hria.

Demand No. 14 - Planning & Programme Implementation hi, sorkarin hmalakna lian tham a neihna tura ruahmanna lo siama, a kalpui dan tur lo ruahmantu a ni a. SEDP - MNF flagship programme te pawh an kutah a awm a, *Sorkar flagship programme* a lo ni ta nghe nghe a. Mipuite beiseina leh din chhuah ve duh thalaite tan hmakna tur tam tak a chuang a ni. Amaherawhchu, ‘an serious lo’ ka ti a, he thil an kalpui danah hian. December 8, 2018-ah sorkar a lo dina a hnu February 8, 2022-ah, MNF sorkar atanga kum 3 hnuah chauh a vawi khatna atan SEDP - Executive Board hi an thukhawm a ni. Hei hian, ‘an ngai pawimawh lo a ni’ tih hi a tilangin ka hria.

Demand No. 5 - Vigilance-ah hian ka han kal leh ang a. Parliament-ah, central-ah chuan *Lokpal* a awm a, State-ah *Lokayukta* kan nei a, Independent Statutory Body a

ni. Mizoram hian 2014-ah *Mizoram Ayukta Act* kan nei a, he House-ah ngei hian pass a ni. Hei hian a tum chu - politician corrupt te chhuia hremtu tur *body* a ni. Awlsam vak lovin Mizoram-ah kan nei ve a. Amaherawhchu, kan Act han zir chian hian, State-ah pawh a tha pawl tak niin ka hria a. Chief Minister te, Speaker te, Minister dangte leh political authority officials hote pawh hrem theihna dan hi a awm a ni.

Mizoram Lokayukta Chapter 3-ah chuan hetiang hi a awm a - “Constitution of Directorate of Inquiry and Investigation and Constitution of Directorate of Prosecution” tih a chuang a ni. A awmzia chu - “He Ayukta office-ah hian inquiry, investigation titu tur *wing* a awm ang a, chu bakah, *prosecution wing* a awm bawk ang” tih a ni. Amaherawhchu, vawiinah hian chung wing pahnihte chu a la awm ta lova. Chuvangin, report an ziahnaah pawh hian, Chairman hian lungchhe takin, “Now we have to depend on the services of Anti-corruption Bureau controlled by State Government and the CBI which have been denied permission by the State Government” a ti hial ta a ni.

Miin corruption case-ah political authority te a charge ta a, complain a theh lut ta a. Tichuan, anni chuan an lo examine a, an pawm chuan case an register ta a. Preliminary investigation ti turin ACB te emaw, CBI te emaw hnenah an refer ta a. Hetiang case tam tak hi *Anti-Corruption Bureau* hnenah an refer a. Amaherawhchu, anni chu sorkar control an nih avangin, anni hian pending tam tak an lo nei leh ta a, chuvangin, an hna pawh hi a chak thei lova, an thawh tur dik tak hi an thawh theih loh phah a ni.

Demand No. 32 - Horticulture-ah hian point pakhat chauh ka han tarlan duh chu - Chawngtlai-a tomato chingtute tana *drip irrigation* siam nan chhungkaw khat hnenah cheng ₹30,000/- zel pein, tanky siamna tur a ni. MNF Block-in an hna hi an chhuhsak a, hei hi thil belhchianawm a ni em ka hre lova, kan Minister hian min lo hriatsak ta sela.

Tin, Demand No. 1 - Legislative Assembly-ah hian, kan Assembly staff-te an hah zia, an khawngaihthlak zia kan ngaithla a; a ni reng a. Zan tairek thleng thlengin, kan haw hnuah pawh hian an la meng a ni. Chuvangin, February thla pumpui chu Session-in kan awm a. Zingah chaw kaw puar ei lovin an lo kal a, zan tairekah an haw leh a; chawlh hi an phui vein ka hria. Pu Chairman, naktuk te hi chu ‘chhuti te hi i pe thei lo em maw ni le’ tih kha ka ngaihtuahnaah a awm a, ka han ngensak bawk a ni.

Tin, a dawt lehah chuan, MLA fund chungchang ka sawi duh a. Kan Chief Minister hnenah hian lawmthu te pawh ka han sawi a. Kuminah, tun term-ah fund a full-in kan hmu leh dawn ni te pawhin a lang a. Chuta ka han sawi chuan duha chu - he fund hi, November thlaah kan inthlang dawn a, October thlaah te chuan inthlan puang ta se *Model Code of Conduct* te kha enforce a lo ni ang a, a chet theih dawn tawh loh a ni. Chuvangin, hemi hma ngei hian kan MLA fund hi a full-in min pe ta se, mipui hnenah

pawh a thleng tha ang a, hna kan thawk tha ang a, tichuan, inthlan pawh a ti nuam deuh ang chu maw le. Chuvangin, kan Minister zahawm tak hian a full-in ‘October thlaah hian min pe se’ tih kha ka han ngen duh a ni.

Chu zawng chu ni mai teh se. Pu Dy. Speaker, ka lawm e.

DEPUTY SPEAKER : Member zahawm tak Dr. Vanlaltanpuia kan sawm e.

DR. VANLALTANPUIA : Pu Dy. Speaker, ka lawm e. Kan House record hi kan uluk viau thinin ka hria a. Kan inzirtir danah te hian, tawngkam uchuak deuh te, tawngkam mawi lo deuh te hi hman loh ni se; chutiang a lo awm a nih chuan ‘delete ni se’ tih ang tluk khan kan inzirtir niin ka hria a.

Tukin zinga *Starred Question* No. 243 - 2019 atanga *GSDP to Debt* percent zat zawhnaah khan ka thianpa Mathlantea, MLA zahawm tak thu sawi kha tlem nawh-reh ngai a awmin ka hria a. A chhan chu, kan Chief Minister, Finance changtu kha *GSDP to Debt* percent chungchangah khan, ‘a lo hre ve a’ han tih tawngkama kha a uchuak deuh hlekin ka hria a. Kha kha chu Pu Deputy Speaker, nawh-reh a thain ka hria. 1987 vel atanga Finance lo enkawl tawh te kha chuan leiba awmzia kha chu an hre hle turah ka ngai a. Kha kha, ‘nawh-reh a thain ka hria a ni’ tih ka han sawi duh a ni.

Demand No. 456 - Public Works-ah hian kal ka duh a. Mizoram kawng zawng zawngah hian Vairengte - Aizawl tih lohah chuan Aizawl – Thenzawl - Lunglei Road hi ‘a pawimawh ber’ tih theih a niin ka hria a ni. Chuvang chuan, hei hi kan ngaipawimawh viau a. kan Chief Minister hi nichinah khan bialah te an hman nasat thu leh, ‘ATL Road maintenance aiin a tam zawk’ tih te a ni a. Amaherawhchu, ka sawi duh chu, he sorkarah hian 2019-a sorkarna kan han lak tan chiah atang khan pot-hole leh patch-repair kha tih zawh vek a ni a. Tin, 2019 kum tirah khan a chhe zual em em lai, Haulawng - Pukpui inkar pawh re-surfacing tih vek a ni. A awmzia chu - financial year khat ngawt kha chhiar tur a ni lova, a series kha a kal tam a. Chu chu kan sorkar tir atang khan kha repairing series kha a kal tam a ni. Chuvang chuan, 2019-ah khan portion khat kha min cover sak a, tichuan, a kum lehah portion khat min cover sak leh a. Chutiang chuan sorkarin pawisa te vawi khatah kan neih vek loh avangin ‘he kawng hi kan ngaihtuah hle a ni’ tih ka han sawi duh a.

Dik taka sawi chuan, sorkar ang atanga khati zat pawisa, vaibelchhe tam tak kan pek tawh chuan, tlo tura ngaih a ni. Kan technical mite leh kan official hote pawhin hei hi chu hria se tha ka ti. Kan kawng, ramin sum leh pai kan neih loh chung chung a kan tih te hi ‘tlo rawh se; daih rei rawh se’ tih ka sawi duh a. Tin, Pu Dy. Speaker, he House zahawm takah hian session kan neih apiangin he a chhiat zualna lai bialtu MLA ka nihna angin ka sawi ziah thin a, ‘Chhim MLA-te hi kan ngawi miah lo’ tih hi sawi ka duh leh bawk a nih chu.

Tin, ATL Road hi tunah pawh hian buaina kan la tawk tho a. Nikum lamah khan side drain leh culvert awm that lohna hmunah te a chhe nasa a. Tui-tling te kha dil ang maia chhuaha thlalak te a tam em em mai a, kei pawhin chu chu ka sawi nghe nghe a ni. Chuvang chuan, kan technical mi te pawhin hria sela - stone quality te, tin, tun dinhmunah hian pot hole repairing te a kal leh mek a, patch repair te; lung an hnawh mek a. Chunga tan chuan hot-mix plant hi Pukpui-ah an nei niin ka hria a. Hei hi a chhia niin ka hria a, khawngaih takin kan Chief Minister, PWD changtu hian min hriatsak se la, 'hei hi min han en ngun sak deuh se la' tiin ka sawi duh a.

Tin, 'manpower mobilisation' hi kan ti tam tawk lutuk lo niin ka hria a. Fur hi reilo teah a lo kal leh dawn avangin uar takin ka lo sawi leh duh a - ATL Road hi khawngaih takin uluk zawk leh nasa zawka buatsaih ni rawh se; damage prone area Tlawng - Pukpui te, Horticulture - *Centre of Excellence* Saichhoh bul te, Sekhum - Mualthuam te, a chhe duh zual laite hi 'special attention pein siam ni se' tiin vawiinah hian ka sawi duh bawk a ni. Tin, kan official-te pawhin min hriatsak se ka duh chu - tunah hian mipuiin kawng chhuat problem an neia kan buai luai luai lain, hmannah ka va kal a, (ka sawi tawh, ka han sawi nawn leh ang a), retaining wall-te kan lo siam nasa a, amaherawhchu, kan mamawh zawk tak chu - *kawng chhuat* a ni. Nachina ka thianpain a sawi ang khan, '*priority setting* hi a pawimawh hle a ni' tih hi vawin hian ka sawi duh bawk a ni.

Tin, he House zahawm taka kan Chief Minister-in min assured tawh, Bualpui V - Chhiphir inkar km 7 vel hi min siamsak thei se, min assured tawh angin Cchu chu ka han sawi nawn leh duh bawk a. Tin, Thenzawl - Zote South hi hun liam taah khan siam a ni a, defect liability hi kan la hmang thei niin ka hria a, hengte hi uluk zawka hman theih ni se. Khang kha Public Works atana ka sawi theih chu ni phawt se la.

(Hon. Speaker-in Chair a la a..)

Demand No. 15 - GAD-ah hian Pu Speaker, kan lut ang a. Kan sorkarah hian district thar pathum kan pe a, chung zingah chuan kan bial chhunga khaw pasarih lai Hnathial District-ah rin luh a ni a. Pu Speaker, kan Minister, GAD changtu hian min hriatsak se - Chhiphir leh Bualpui V-te Hnathial District-ah kan dah hi kan harsatpui tak zet zet a. A chhan chu - kawng a awm loh avangin, district ngai bawk Lunglei atanga kala Hnathial-a kal te a ngaih thin avangin, district khawpui access a har em em a. Hei hi khawngaih takin min chhinchhiah sak se.

Nikum Ocotber velah khan Mumbai-ah ka zuk kal a, Mumbai Mizoram House hi kan member zahawm tak Pu C. Ngunlianchunga pawh hian a sawi thin a, a sawi kha 'a awm viau a ni' tih ka zuk hmuchhuak ve a. Cancer-veite zuk kalkhawmna hmun a ni a, Mizoram House tur hi SIDCO, Mumbai Municipal thuneitute'n Mizoram House atan hian ram min pe a. Amaherawhchu, kan sa hleitheih lova, hei hi buaina kan tawk a.

Tuna Mizoram House kan neih lai mek hi a buaithlak in a chhe em em mai a. Mizote meizial zuk ching te kan lo ni a, hnam dang nena in luahpawlh te an nih avangin an buai em em mai a. Tin, Mizote chu chawhmeh rim tuilo deuh te lo siam thin kan nih avangin, hnam dang hote hnen atangin complain a awm nasa em em a ni. Chuvangin, ‘Mizoram House – Mumbai hi ngaihtuah thuai theih ni se’ tiin duhthu karawn sam bawka.

Chutiang bawkin Bangalore-ah hian Karnataka sorkarin Mizoram House sakna tur hmun tha tak hi min lo pe tawh a. A hmun-hma pawh an chei uluk viau a; ‘hei pawh hi hriat ni se la’ tiin vawiinah hian he House-ah hian ka sawi leh duh bawka ni.

Demand No. 43 - Tourism-ah hian ka han lut daih ang a. Ka bialah *Zotlang-Tourist Lodge* a awm a. He hmun bul vel hi sinking area, leitlahniam duh deuh mai area a ni a, a panna kawng hi a tlanhniam thei nasa em em a. Chuvang chuan, kan Minister zahawm tak hian khawngaih takin min lo hriatsak se. Tin, sak a nih dawn lai vel khan ram hi a lo fel chiah lo a ni mai thei a. Ka hnena ram chungchang complain hi pahnih vel an awm a. Khawngaih takin kna Minister hian min hriatpui se; *Zotlang Tourist Lodge*-a mimalin ‘kan ram’ tia claim ve hi an awm a, khawngaih takin an ram-buai hi min enfel sak turin ka ngen bawka ni.

Tin, Pu Speaker, ka sawi thin chu - Mizoram-in kan mamawh em em chu, ‘tourism promotion’ hi a ni a. Mi ram tana an revenue pawimawh tak a nih ang hian Mizoram pawhin kan mamawh a. Chumi atana pawimawh deuh nia ka hriat chu, ‘local tourism’ hi a ni a. Kan thinlunga ‘tourism’ tiha lo lang nghal hi chu, pawn lam atanga mikhualrawn lut zut zuta, chutianga sum te pawh lo raised tur ang hian kan mitthla deuh thin a. Tih hmasak ber ngai nia ka hriat chu, ‘local tourism promotion’ hi a ni a. Hei hi khawngaih takin department hian min enfel sak se ka duh viau a ni.

Pu Speaker, ka inbuatsaih ve viau a, ka sawi zo hman dawn ta lova. Engpawh nise, vawiina kan Minister pathumte - kan Chief Minister, Pu Robert Romawia Royte leh Pu C. Lalrinsanga te demand anrawn parh hi karawn thlawp a ni e. Ka lawm e.

SPEAKER : Tunge han sawi leh ang? Nichin khan Dr. Vanlaltanpuia khan chawhma lama Member zahawm tak Dr. Vanlalhlana thusawi, kan Chief Minister a chhannaa ‘a lo hre *..’ tih lai kha *expunge* arawn dil a.

PU L. THANGMAWIA : Pu Speaker, khawngaih takin. Khalai kha ka lo sawi lawk thei ang em, minute chanve lekin?

A sawi dan taka kha Zonet record-ah khan minute 42 leh second 36-naah a awm ang a. Kan Chief Minister zahawm takin leiba chungchanga *GSDP to Debt* ratio percentage-a sawinaah khan “kha, kan Minister khan *GSDP to debt* ratio percentage kha

a lo hre *.. tih kha a lo lang a” a ti a. Mizo anga hetiang a kan intih hi chuan, Pu Speaker, kan nau deuh hlek leh kan ngaihsan loh zawng, thiam inti takin midang hre ve lo anga ngaiha kan tihna thin a ang ka ti a; chu chu a rilru a ni lo maithei a. Kan Member zahawm tak Dr. Mathlantea khan, kan Chief Minister 1987 atanga Finance lo la tawh, tunah pawh kum 5 dawn la leh tawh, sorkar hmasaa kum 10 lo la kha chuan *GSDP to debt* percentage kha chu Dr. Mathlantea ai chuan a hre turah ka ngai, Pu Speaker.

SPEAKER : Member zahawm tak te'n; Ni e, Member zahawm tak Pu Mathlantea tanghma ngaiin *expunge* an rawn dil a. Pu Mathlantea kha khalai kha a tawngsual ve palh a ni ang a. Kei pawhin record-ah chuan awm lo se ka duh hle mai, kha kher kha chu.

Awle, a nih leh kan *expunge* ang aw; a mawi the zan lo e. Heti hian a ti a - “Kha, kan Minister khan *GSDP to debt* percentage kha a lo hre *.. tih kha a lang a, a lawmawm khawp mai” a ti a. Ni e, record-ah chuan awm lo teh se. First timer-in sixth timer hmusit anga lan kha ka phal bik lo e aw. Duhsakna avangin *expunge* ang; kha kha kan official te'n lo hria ula.

(*Expunged by order of the Chair).

SPEAKER : Member zahawm tak Pu KT Rokhaw ka sawm e.

PU K.T. ROKHAW : Pu Speaker, ka lawm e. A hmasain vawiin hi kan Chief Minister demand sawi ni a ni a. Chief Minister demand-ah hi chuan kha leh chen kha, a subject pawh ni lo zalen takin duh duh kan sawina thin a ni a.

Vawiin hian Assembly staff-te, Pu Speaker, an thawkrim em em a. Hei, thla-khat deuhthaw session kan han nei a, an thawhrimna leh an taimakna chungchangah hian lawmthu sawi tur kan ba viauin ka hria a. Tin, tunlai an suit hi a mawi ka ti khawp mai a, House hi a tizahawm hlein ka hre bawka ni. Hemi chungchangah pawh hian, kan Speaker remhriatna hi faktlak niin ka hria.

Pu Speaker, Finance-ah hian ka han sawi duh chu – hei, kan MDC-te hlawh tun thlengin tihpun a la ni lova. Keini MLA-te hlawh chu term tir khan tihpun a lo ni tawh a. Kan hlawh hi kum 4-5 dawn lai kan a pungin kan la tawh a. Chutilaiin MDC-te hlawh erawh chu vawiin thlengin tihpun a ni lova. Tuna an hlawh hi UDC te hlawh nen a inang thuak a. MDC te hi Council-a piang leh seilian an nih avangin mipuite hian an hlawh hi an eipui takzet a, an harsa hle hlawm a ni. Vawi eng emaw zat an hlawh tipung turin an rawn thlen tawh a. Chuvangin, hei hi a rang lama tih hlawhtlin a nih theih chuan a lawmawm ngawt ang.

Tin, Pu Speaker, chhim lama kan policy ‘*Direct funding*’ hi tlem han sawilan ka duh chu - ‘Direct funding’ hi central sorkar atanga District Council-te direct-a sum pek tumna lam ni lovin, tuna District Council-te ina fund an hmuh dan hi a lungawi thlak loh viau thin a. Central sorkarin Mizoram sorkar *Grant-in-Aid* a pek atangin Mizoram sorkarin a duh angin District Council hi an pe mai thin a. Tun sorkar phei chuan District Council te hnenah, “in budget tur hi same size-in lo siam rawh u”, an ti tlangpui a ni. Chuvang chuan, ‘central-in Mizoram sorkar Grant-in-Aid a lo pek rual hian, District Council-te tan hian a hran liau liau, separate allocation-in *ear mark* ve se, chumi sum zat chiah chu District Council-te hi Mizoram sorkar kaltlangin pek thin ni se’, tih a ni a. A awmzia ber chu - Mizoram sorkar sum hmuh tur ei-hek miah lovin, ‘a hran liau liauin Article 280 hnuuia District Council-te sum hmuh tur hi ruahman sak ni se’, tih a ni mai a. Chutianga a hranpaa sum ruahman a nih chuan, Mizoram sorkar atanga central *Grant-in-Aid* a pek hi cheng khat mah a ei-hek dawn lova, Mizoram sorkar tan pawh ‘hei hi a tha zawk lo em ni?’ tih kha ka sawi duh a.

Tin, Pu Speaker, *Parliamentary Standing Committee* nichina kan sawi te, nimin lamah te pawh kan sawi tawh a. Consultative Meeting te neia State ngaihlan an zawhnaah pawh, Assam State te, Meghalaya State te, Tripura State te chuan ‘positive comment’ an pe vek thei lain, tun MNF sorkar erawh hi chuan ‘negative comment’ min pe tlat mai a ni. A vanduaithlak khawpin ka hria. State sorkar hi a pe theitu a ni lova, central-in a pe thei a, positive comment te min pe ve mai sela, kan lawm hle tur hi a ni a; negative comment min pe mai kha mak kan ti a. Vawiinah hian Congress party sorkar ta sela chuan, positive comment min pek ngei ka ring a ni. Pu Lal Thanhawla kaihhruai, Congress sorkar khan, hnam tlem zawk leh te zawkte min hmangaih em em a, Direct funding kan dil pawh khan Council of Ministers Meeting-in direct funding kha min recomment a ni. Hei chauh a ni lova, amah Chief Minister ngei khan DO letter-in direct funding recomment-na lehkha, khati hunlaia Pi Sonia Gandhi UPA Chairperson hnenah pawh khan min ziah sak a, Pu CL Ruala, kan MP pawh khan Prime Minister hnenah direct funding recomment-na kha min ziah sak a ni. Tun sorkar erawh hi chu min duhsak tura kan ngen pawhin *negative comment* min pe tho a, a pawi takzet a ni.

Pu Speaker, PWD demand-a ka sawi duh chu, Laki – Vahia road hi NABARD atanga laih a ni a, fur laiin a diak em em a. Nikum Budget Session-ah pawh khan Chief Minister ka ngen tawh a, Chief Minister pawhin, “black-top turin theihtawp kan lo chhuah ang e” a ti a. Mahse, vawiin thleng hian black topping tih a la ni lova. Hei hi khawngaiha black top sak turin ka ngen duh a.

Tin, Chakhei - Siasih kawng, CRIF hi vawiin thlengin zawh a ni lova. Chief Minister hnenah pawh a hmain ka sawi tawh a. Siasih atangin ‘River Beino’ kan ti a, Chhimtuipui a thlenna turin metre 200 erh-awrh chauh a ngai a, black topping lohna chu. Engpawh ni se, hei hi black topping min tih sak thei sela ka lawm hle ang. Vawiin

thlenga zawh a ni thei lo hi pawl kan ti a; hei hi nakinah min lo react sak sela, khawngaihin.

Pu Speaker, Kawlchaw - Serkawr kawng km 8 strengthening (improvement) atana nuai ₹318 dah a ni hi lawmawm ka ti a. Sawlai kan Missionary hmun panna kawng chhe lutuk siamthatna tur atana sum min lo dah sak hi lawmawm ka ti hle a. Tunah hian tender a la ni lova, hei hi a rang lama tender-a min siam sak turin ka ngen duh a.

Tin, Niawhtlang - Chakhei road hi a rei tawh hle a, kum 25 kal ta atanga an laih tawh, black-topping pawh khami hunlai atanga tender an pek tawh, vawiinni thleng hian zawh a la ni lova. Tunah hian he hna, nuai ₹1615 man hi Pu Biakliana hnenah pek a ni a. He black-topping hna hi km 6 bawr vel chauh siam a nih hnuin tunah hian chawlsan leh tawh a ni a. Hei pawh hi a rang lama min siam sak turin ka lo ngen bawk a ni.

Pu Speaker, Sport & Youth Services hi ka sawi ang a. Artificial-grass playground, Meisatlah-ah kan nei hi a gallery a te lutuk a, mi tam tak en theihna tur a ni lova. Khawngaih takin gallery tha tak min siam sak rawh se. Pu Speaker, minute 2-1 chauh, khawngaihin.

Tourism Department hi tlem ka han sawi leh ang a, nikum Budget Session-ah khan ka sawi tawh a. Lodawh - ‘*Castle of Beino*’ kan tih saw a lung ropui tak mai en turin tourist an lo kal tam thin a. Lodawh saw thingtlang a ni a, riahna tur mumal pawh a awm thin lova, hetah hian tourist lodge khawngaihin min sak sak sela. Nikum khan, “sak kan tum dawn nia” min ti kha a ni a, mahse vawiin thleng hian hmalak a ni lova. Khawngaihin hei hi min lo ngai pawimawh sak sela kan lawm ngawt ang.

Tin, Agriculture Minister hi a bik takin chhim lam min duhsak khawp mai a, Tractor-te pawh chhim lamah, Siaha District-ah pe tha pawl berk an ni a. Chu chauh ni lovin leilet hactre tam tak min laih sak a. Tin, Siaha District Food Security Consultative Meeting kan din a. Dr. K.Beichhua a Minister lai khan Chairman niin chu chu leilet hactre tam tak kan laih a, mahse, kan laih tawha saw tui kawng kan nei loh avangin a thenah hman tlak a ni lova. Chuvang chuan tui ka wng hi a pawimawh ang ang min siam sak turin ka ngen duh bawk a.

Tichuan, Cooperation-ah hian, ka bial Tipa-ah sawn Apex Bank khawngaihin min hawn sak sela. Tin, ka bial khawhtlang lamah Phura leh Siasi inkar hi a hla khawp mai a, Phura-ah hian Apex Bank min hawn sak hram bawk turin ka ngen bawk a. A hma khan Zero Point-ah pawh hian Bank kan mamawh zia ka thlen tawh a. Chungte chu Pu Speaker, min tihhlawhtlin sak turin kan Minister hnenah hian ka ngen duh bawk a.

Tin, Pu Speaker, ka bialah sawn ‘Sala-zawl’ kan tih, Sala Lui kam saw thali chinna hmun tha tak, tomato leh antam te that duhna em em mai a ni a. Amaherawhchu,

a tui pump chhuahna tur lifting kan mamawh a. Khawngaihin takin kan Minister hian sawlaia lo neitute hnena water pumping pek dan min ngaihtuah sak sela ka lawm ngawt ang. Ka lawm e, Pu Speaker.

SPEAKER : Sawi leh hmain; nichina kan rorela kha - khami thu reng reng kha chu lang zui lo se ka duh a. Research te an la rawn nei ang a, sulhnu mawi lo kan neih loh nan member zahawm tak, Dr. Vanlaltanpuia'n *expunge* tura a rawn ngenna thu pawh kha *expunge* leh bawk ila; Tin, Dr. L. Thangmawia'n a rawn tihna thu pawh kha *expunge* leh ila. Kha laia thil pawr tur, mawi lo tur zawng zawng kha, khar vek ang. Kha pawh kha kan la *expunge* dawn nia aw.

PU LALDUHOMA : Helai hi a pawimawh ka ti a. Session apiangin kan leiba neih zat kan sawi dan a inang lo thin a. Keiniin RBI data hmangin kan sawi a, kan Chief Minister khan (**Speaker:** Ngawi rawh; aw nakinah i sawi mai dawn nia, i hunah) ...kan sawi dan a rawn thlawp a, lawmthu a sawi mai a nih kha. Thil huat-thla la em em em ni?

SPEAKER : 'Lawmthu' a ni emaw, ni lo emaw, member zahawm tak Dr. Vanlalhlana hi ka tan mihrang a ni lova. Chuvang chuan, tuna heta rawn sawi rikah chuan, tlang takin ka han sawi mai ang e - chapo tak anga miin an hmuh kha ka phal bik lo a ni. Chuvanga *expunge* duh chu ka ni, a future ka ngaihtuah a. He Assembly records hi a awm reng dawn si a. Chuvang chuan, chu kan sawihona zawng zawng, ka thusawi pawh hi correct-naah ka rawn sawi leh dawn a ni; chu chu a pawimawh ka ti a. House hi a zahawm a. Zirlai an lo kal ang a, research an rawn nei ang a; kha kha ka hlauhthawnpui vang a ni a. Member pahnih laiin an rawn sawi avang khan.

Awle, Member zahawm tak Dr. L. Thangmawia.

PU L. THANGMAWIA : Pu Speaker, ka lawm e. Tun term kal mek budget session-a ka thusawi hnuhnung ber tur a lo ni ta a. Pathian min hruaina a lawmawm viau a. Tin, hemi ni tak maia kan Chief Minister chan, Demand 1-na - Legislative Assembly te a han awm hi lawmawm hlein ka hria.

Pu Speaker, vawiin chu ka bial lam pawh ka sawi hman lo mai thei a. Amaherawhchu, tum kum li chuang budget session vawi 5 kan han neih chhunga kan experience te leh kan senior-te min lo kaihhraina te pawh han tar lan ka duh a. A hmasa berah chuan kan sawi khat deuh mai, Demand No. 2 - Governor chungchang atangin ka han tan ve tlat ang a.

Governor hi sawi a hlauh lo hlein ka hria a, tun kum 4-5 chhung hian. Governor hi tha tak tak kan lo nei tawh thin a, UT hun lai te leh State nih tawh hnuah. Eng chen nge an thu neihna leh an tih dan chu kan hre lova, mahse kan Governor thenkhatte an

zin kualnaa sorkar hna thawkte lo koa, han tite pawh an awm a. An thahnemngaihna chu a that viau rualin, hetiang te hi ‘state dangah an ti ve em; India President hian a ti ve em’ tih te hi ka rilruah a lian thin a. Heng hi a changtu Minister kal tlanga tih leh tho ngai te a nih thin avang hian, heng hi hnam anga ‘a fuh lo zawk tur thei te a ni em’ tih hi kan zavai, kan House member zawng zawngin ngaihtuahna kan hman tlan atan kan sawi ni ta sela. State danga an tih ngam loh tur kan state-ah an tih chuan, a dik dawn lova. Kawng leh lamah erawh chuan, an thahnem ngaihna chu a ngaihsanawm ka ti a. A sawisel zawng hrim hrim a rawn sawi phei chu ka ni lo a ni.

Tin, Demand No. 1 - Legislative Assembly hi, nikumah kum 50-na te kan han lawm a. Heti laiah Pathian leh Lengteng bial mipuite duhsakna changin, beidawn tawh lamah a niang chu; tling thei lovin kan han tla kan han tla a, vawi 3-naah, tlangval senior nupui nei ang deuh te hi ka inchan a, kan han lut ve a. Chutah chuan kan bangbo em em a, kan thu sawi vawikhatnaah te phei chuan ke lam kha a sai dar dar a ni. Amaherawhchu, kan senior, i ding lama thute chauh ni lovin, i vei lama thute thlengin, recess room-ah thu tha te min hrilhin min encourage thin a, hei hian experience tam tak min pe a. Kan senior member, first-timer ni lo ho, hei, CLP Leader Pu Zodintluanga te phei chuan fiamthu titak deuh hian thil tha min hrilh thin a; “I thu sawiah hian *Saitual to Saichal road* tel lo hi chuan a tawp lovang tih ka ring reng a” te a han ti a. Kha kha min titlangnel em em a, tun hun kan thleng a ni.

Tin, ram tana kan thawhhona kawngah thahnem kan ngaihndan leh kan kehme tih te inan loh changte awm mah sela, hnam thilah chuan, he Assembly-ah hian ka awm chinah kan inthural thei zel pawhin ka hria a. Veilama mite resolution pawh ni se, ram tana a that chuan kan pass thei mai a. Tin, i dinglama mite resolution te pawh lungruah taka min pass-pui, i vei lam a miten tun kum 4 chhung hian an nei bawka, lawmawm ka ti em em bawka a ni.

Tin, sawi loh atan chuan ka ui a, hetah ka han kal leh ang a. Sports-ah hian hmasawna ropui tak a thleng a. A hma chuan, ‘thleng se’ kan lo tih kha, a thlen tam lutukah chuan, ‘a dang hi ni zawk se’ te kan han ti a. Hei hi hmasawna chi khat tho a niin ka hria a. A tlem lai kha chuan, ‘kan khuaah kan duh; heti lai kan district-ah kan duh’ kan tin a, a han tam ta lutuka hi kawng leh lamah chuan thil lawmawm tak niin ka hre zawka, kei chuan.

Hei, EAP te pawh kan han hmu dawn a. Hei hi session hmasa lama kan Minister zahawm takin, ‘House-ah chuan ka tiam ngam chiah lo che a’, a tiha kha, tunah chuan min tiam ngam tawh turah ka ngai a. EAP chuan Ngopa field velah chuan phullem phah kha ‘kan mitthlaah kha a lang tawh a ni’ tih kha, kan lo chhut hmaih palh hlauh ka hlau a, ka han sawi tel ni ta sela.

Tin, ICT lamah hian, tun tum hi ka inchhir khawp mai, kei pawh. “Central sorkar hian Mizoram khaw puma internet connection a that theih nan hma la rawh se”, tih resolution a put luh kha ka rilruah, a theih tawh loh hnuah a rawn awm a. Remchang te a la awm thei a nih chuan, hei hi put luh a, khaw 100 pawh tling tawh mang lo connection tha tawh lo hi tihthat a ngaiin ka hria a. Hei hi kan Minister pawh theihtawp a chhuahin ka hria a. Tunlai chu central-in ration laknaah te, Ni-100 inhlawhnaah te ‘upload nghal tur’ an ti a. Kha kha khaw thenawm signal thatnaah hmanhmawh taka han pan thin hi ka bialah pawh an awm a, ‘tihbo theih dan zawn ni se’ tih kha ram pum huap angin ka ngaihpawimawh ka rawn sawi a.

Tin, a dawt lehah, kan Minister zahawm tak Pu C. Lalrinsanga chan Agriculture-ah pawh ka bialah hian nasa takin hma lak a ni a. Dawnfawh kan chin chungchangah te Horticulture nen min pui nasa a. Tunah pawh warehouse te pawh min tih sak dawn niin ka hria a. Tunah hian Horticulture nen min rawn chum chilh a, KTP General Conference kan thlen tur atan greenhouse te pawh 50 chuang min rawn tihsak a. A hmun pawh hi Session zawhah officer-te nen a rem chuan han en ka duh a. Kumthar thalah chuan thal-thlai kha tih chhoh kan tum bawk a ni.

A tawp lamah chuan ti tawh mai ila, General Administration-ah hian sorkar hmasain *Sialkal Range Development Board* a lo din a, ‘Council’ tiin an thlak leh a, a kum lehah. Chu chu Lengteng bial MLA apiang Chairman tur a tih a nih avangin, inthlana ka chuh vang pawh ni lo, Lengteng bial mipuiten min thlan tlin avangin ka ni a. Hetah hian rin phak bakin kan Chief Minister-in min duhsaknaah, budget pawh nuaih ₹50 atanga nuai ₹200 ah, tunah phei chuan nuai ₹220 chuangah, nuai ₹10-in budget pawh a pung leh a, lawmthu, area mipui aiawhin kan Budget Session hnukung berah hian ka sawi a. Amaherawhchu, he House ngeia ka lo sawi tawh angin area mipui duh dan chuan GAD notification mai ni lo, *Legislate* an duh ve a ni. Hei erawh hi chu Session pakhat kan la nei bawk a, kan hotute’n ngaihtuahna min lo sen saka, SRDC hi duh hun huna notification-a paih mai theih loh, House-a vote ve ngaia dah, khatiang kha an duh a ni. chu chu mipuite aiawhin ka rawn thlen ni ta sela.

Tichuan, Finance lam hi tlem han sawi ka duh a, thiam lo ber ka ni chungin. Tun tum hi kan hriat theuh angin Chief Minister zahawm tak hian hloh huamin, zu-chhiah chan huamin bul min tan pui a. Central-in ‘CSS sum zawng release tur’ a rawn ti a; chutah Covid kan tuar a, lirnghing te nen, vawk-pulh hri te nen khatiang zawng khan nasa takin kan tuar a. Tin, kan Member zahawm tak Aizawl North-II bialtu Dr. Vanlalhlana khanin ‘a dang an dawng tho alawm’ a ti a. Hei, central atanga kan dawn zawng zawng hi hei, 14th leh 15th Finance Commission hi ka han la a, 14th Finance Commission-ah hian Post-Devolution, Revenue Deficit Grant (PDRRDG) hi crore ₹2000 aia tlem dawn kan nei lo a ni. Kum 2015-2016 ah pawh crore ₹2,139 a ni a. Tichuan, 15th Finance kan luh khan interim report-ah pawh kha crore ₹1,422 a ni a;

crore ₹2000 dawn kan nei tawh lo a ni. Chu chu a ni a, ka chhiar vek dawn chuan a thui a.

Tichuan, 15th Finance Commission-in a zuih zawnga kal turin a han ti leh nghal a, 2025-2026-ah phei chuan crore 586 chauh a ni dawn a ni. Chutih laiin sale of tax atanga interim-a 0.506 state eng emaw zat insem tura an tih kha a hmaa recommendationah kha chuan 42% an hlai-thla kha a ni a, mahse Jammu & Kahmir lam tana 1% an hlai thlak hnua 41%-a ah han kal leh ta nghal a. Chuvangin, 15th Finance Commmission hi helaiah hian 14th Finance Commission nena han khaikhin phei chuan tah a chhuak zawk a ni. Tichuan, ka sawi ang khan covid te tiang khan kan han dawng bawk a, chutih lai erawh chuan kan Chief Minister-in theitawp a rawn chhuah a, kan hre theuhin ka ring a. Sorkar hmasaah pawh khan Govt. of Mizoram, *Privatization of Vehicle Scheme, 2001* khan a duang-chhuak a, hetah hian officer motor kawl lai 534 kha tihral niin, ₹1,74,23,258 kha sokar sum-bawmah a lut ta kha a ni a.

Tunah pawh hian hemi atan hian Mizoram Resource Mobilization Committee hi nikum 21st January khan a din leh a, hemi rawtna avang hian cheng ₹35.74 crore zet sorkar sum-bawmah tun kum kal lai mekah a luh phah nghe nghe a. Tin, Ni 19 November, 2019 khan sokar motor thar leina leh a hlui enkawl na tam lutuk, workshop bill te hi ‘a tam thin lutuk’ kan ti a, kei ka hre ve lova engzatnge tih; mahse a hre deuh ho sawiah hian vaibelchhe tel tak tak sorkar motor enkawl nana awm thina kha tih tawp nan leh sum save nan the *Govt. of Mizoram Vehicle Outssourcing, 2019* kalpui a ni a, hemi kalpui hnu hi chuan officer, sorkarin tul a tih bik ho lo tan chuan motor thar lei phal a ni lova, driver hlawh a ngai tawh lova, an out-source-na te khan driver an intum tur a ni a, POL erawh chu sorkarin a tum a; tiang khan a repairna pawh sorkarin a tum a ngai tawh lova. Sorkar sum renchem nan tiang khan a ti leh a. Heta tang hi chuan chhut thiam pawh a har a, sorkar hian vaibelchhe tel a hlawh chhuah a rinawm a ni.

Engpawh nise, hun harsa karah kan han awm a, kan senior-te, kan hotute kaihhraina hnuaiah term hmang zo theia kan han awm hi Lengteng bial mipuite leh Pathian hnenah lawmthu ka sawi a. Tluang taka, Pu Speaker, nakum budget session-ah kan inhmuh leh vek theih nan kan member zawng zawngte duhsakna ka hlan a ni. Ka lawm e.

SPEAKER : Member zahawm tak Pu Lalrintluanga Sailo; a sawi tawi thiam ang chu maw.

PU LALRINTLUANGA SAILO: Pu Speaker, ka lawm e. Tuna Lengteng bialtu zahawm takin a sawi ang deuh hlek khan, kan hriat angin Eighth Legislative Assembly Budget Session hnuhnung ber, a lehlam zawnga sawi chuan ‘farewell budget session’ kan han nei hi a lawmawm hlein ka hria. Pu Speaker, keini first-timer ho hi mi-inang lo tak takte kan ni hlawm a, kan thusawi duh dan te pawh a inang lo thei a. Chuvang chuan,

in mi-hriatthiamna thui tak, hei, kum hei leh chen kan inhrawn chhunga ka chan avangin lawmthu ka sawi a. Vawiinah hian he House-a ka awm ve chhungah hian kan hruaitu hmasate sunna hunte kan hmang neuh neuhin ka hria a; i ding leh i veia mite pawhin kan pawlte an nih loh pawhin mihring dan angin an huntawpah hi chuan kan han fak tlangpui a ni a. Dam laia infak hi mizo Kristian ten kan harsat em em mai hi mak ka ti thin a.

Vawiinah hian tawi tea han sawi ka duh chu - Kan House Leader chungchangah hian; nasa takin beihna a tawh a, chutih rual erawh chuan a vannei hlein ka hria a, ka lawmpui a. Vawiina political party leader Congress anni emaw, ZPM anni emaw, BJP anni emaw an leader zawng zawng hi vawiina kan leader zahawm tak pum chhuak vek hi an ni a, in-hrang an chan hnu hian ngaihndan hran an rawn nei mai mai ni hian ka hria a. Chulai chu tawi tein Pu Speaker, ka sawi duh a ni.

Nichinah Pu Hlana khan ngaihthlaknawm tak mai khan kan House Leader thusawite kha a han sawi chhawng a. Ni e, politics-ah hian miin vision fel tak an nei a, an vision an tihlawhtlin vek loh pawhin ‘miin hmahlir fel tak an nei a ni’ tih kha keini memberte hian kan pawm thain ka hria a, ‘vision neilo hruaitu erawh hi chu in zui rei mah mah ang’ tih hi ka hlauhpuoi khawp mai che u a. A tlachawp deuh, issue base-a kal ang chi hi chu kan ram hian a zo chiah lo deuh ni te pawhin ka hria a ni.

Tin, Pu Speaker, memberte hi mi thiam tak tak, i dinglamah pawh hian doctorate degree nei mi 4 an awm a, professor te kan nei a, khatah khan khawhar takin pakhat i veilamah khan a thu ve a, a ni thusawi kan khel laih laih lai thin te pawh kha a awm a. Keini, Pu Nguna teho nen hi chuan kan thleng sang lo ang reng khawp mai a, education qualification hi chu kan nei tha lo, amaherawhchu politics-ah hian experience chu kan nei vein ka hre tlat a. Kum 10 tel hi public leader-a thlan tlin kan lo ni ve tawh a, a level a sang emaw, a hniam emaw a enga pawh kha ni sela. Chuvang chuan, senior members te ngaihndan hi kan ngaihchan thiam fo a pawimawhin ka hria a.

I veilama mite khan nichinah khan kan chhimlam MLA-te kha duhthawhnain, a-chhim zawng MLA-te pawh huap vek khan kan han sawi duh thin laia te hi ‘a puitling ber em aw’ ka ti a. Chutih rual chuan first-timer ina budget hre em em, thiam ber anga kan intarlang te hi kei ka ngaihndan a ni lova. Budget hi tumah thiam bik kan awm lo, finance-ah pawh specialist deuha kan ngaih pawh hi an che buai ve fo thin a ni. Chuvangin, Germany Finance Minister pawh March, 2020 khan a lo inawhhlum phah hial a ni a. Advanced country an ni a, covid avanga financial crisis an han tawha finance-ah an han tlakchhiat tak tak kha chuan inawhhlumna hial a thleng a ni. Chuti chunga kan ram hotupa ber ina harsatna pawh hmachhawn ngama finance a la ngam hi a ropui hlein ka hria a ni.

Tin, lehkha kan zir lai pawhin emaw, thil eng emaw kan train pawh hian, a theory-in kan thiam a ni mai a, a theory-a thiamna hi a practical hian a hman tlak loh a, 'a lo practicable vek lo thin a ni' tih te hi mihring hian kan pawm a thain ka hria a, 'chuti zat paper ka present tawh' tihah hian finance-ah hian awmzia tak tak a nei lo niin ka hria. Keini member 40 zinga 39 hi chuan dik tak chuan kan nupui leh keini hlawnh bak hi thlatin hian kan budget hi kan khawih lo hrim hrim mai a, han thiam em em tura han insawi laia hi chu a dik chiah lo te pawhin kan hre ve a ni. Tin, 'kan sawi duhdan te' in han ti a, pawisa pukah hian sawi duhdan hrang a awm theiin ka hre lo; ka thenawmpain cheng nuai khat a puk a, 'a faten chuti zat percent an ba a ni' tumahin an ti lo; nuai khat an ba a ni mai. Kan kawmthlang-nuin sing khat a puk leh a, 'kan chhungkuain chumi percent chu kan ba' tumahin an ti lo, Pu Speaker; kan chhungkua khan kan ba a ni mai. I vei lama mi legislator thenkhat khan khati zawng ngaihndan kha an nei a, percentage-a chhut vek chi hi a ni lem lo a ni. Hetah HIV-Aids te nen tehkhin chi pawh a ni lo; HIV-Aids te hi a puka puk chi pawh a ni lo a ni; vanduaiin an kai mai ni te pawhin ka han hre ve mai mai a ni.

SPEAKER : Ngawi teh aw. Hei, dar 5 a pel a, a sawi laklawh a, kan sawi zawh tir dawn em? (*House-in sawi zawh tir a remti a..*) Awle, sawi zawm rawh le.

PU LALRINTLUANGA SAILO: Ka lawm e, Pu Speaker. Kan thusawi duhdana hi, patling nupui-fanau chawm theuh theuh hi kan hmui kan han dah rinawm te te a, i veilama mi pheikha chuan aw te kan han tipuam vel thin kha, mi tamtak an nuaih a za ve deuh thin a ni. A tawp lam te a ni a, hlim te pawh hi a thain ka hria a. Bible hian lawm thei miah lo te hi a duh vak lo; hlim theih te hi a tha; lawm theih te hi a tha.

Hei, congress legislature hi ka fak khawp mai a, an party atanga private resolution kha lawm takin i dinglama miten kan pass-pui a, an lawm em em mai a ni. An Leader lah kha pass lai khan a thu duh der lo mai a, miracle a tlingin ka hre tlat, hei hi. Mahni party resolution pass laia thu duh miah lo leader hi chu. A mah khan 'min ngaisang' te a ti a; ka ngaihsan chu - hei kum 48 Pu Speaker, ka zui tawh a ni, kan leader hi; ka la thlak lo tawp a ni. Politics-ah a vision a lo sawifuh loh te chu kan hria, chuvangin political party reng reng hi hruaitua inngat vek a ni. Min hruai dan hi ka han en a, kei pawhin, kan CM zahawm tak hi kum 48 chhung second khat pawh chawl miah lovin ka lo zui tawh a, thihna luikawr ruam te pawh kan lo zawh ho tawh a. Amaherawhchu, ka hriata chu hei hi a ni - A tihdik loh hi sawi dawn ila, ka sawi teuh thei ang; a sawi fuh loh deuh te pawh. Chuti chung chuan tun thleng hian 'zuitlak a ni' tih hi ka ngaihndan tlangtak a ni.

Vawiinah hian kan Leader hi dawta, sual tinrenga min sawichhiat sak hnuah hian, 'kan eng a la thawl dawn inthlanah hian' tih hi a langin ka hria a. Chuvang chuan, 'inthlan zawha krismas hmang nuam lo tur te hi an awm deuh ang em aw' tih te hi a ni

ka ngaihtuah ni. Keini, Pu Nguna te nen education qualification pawh nei tha lote hi min lo duh leh phian ang em? A chhan chu, khatiang lam ni lem lo, kan Pathian hi a mak ang rengin ka hria a, mi-mai mai hi khawvelah hian a siam tam ber a ni. Politics-ah chuan mi-mai mai lam hawi hi a pawimawh ber; mi-mai mai lam kan hawi chhung hi chuan kan tla lo turah te pawh ka ngai ve thin a ni a. Chuvangin, a intellectual laia hi kan han sawi-vung hluah nangin an lo tlem ang reng riau kan bial angah chuan.

Awle, Demand No. 31 - Agriculture-ah hian ...(**Speaker:** Demand-a i luh hma khan han khak che ka tum a, 'a eng demand ber hi nge a sawi aw' ka ti a. Awle, Demand ah lut rawh le.)

Hei, ka bial ah hian Block Agriculture Officer post 2 min han pek sak a. Tin, tuilet hnua thil awm ngai miah lo, Phuldungsei-ah te, Lungphun-ah te, hei kan Agriculture minister hi mizo tawng thiam lutuk lo mahse, a chhannaah khan member dangte lungawi chiah lo mah ula, a thiltihah hian 'a lungawithlak a ni' ka ti a ni. Chuvangin vawiin niah warehouse te pawh Phaileng-ah min sak sak a, Reiek-ah an tan leh mai a. Thil tihah hian a practicable hlein ka hria; practically-a thil a ti thin hi a ropui ka ti a, ka fak duh a.

Tin, ka bula thu Sports Minister hi kan fak duh a, khawi scheme-ah maha awm lo tawp, i veilama mi ten an hriatthiam phak loh a rawn sawichhuak thin hi a ropui ka ti tlat a ni. 'Smart City a tangin a pawt peng; a pawt peng lo' ti tein kan inhnial a. A bu ang thlapa hrechiantu a ni a, kan ram thalaite mamawh, mihringin a an ngaih ber, an tuina ber, an hriselna pawhin a permit ber 'Sports' hi heti khawp hian a promote a, a ropui ka ti takzet.

Tin, kan CM pawh hetah a demand-te kan sawi zel ang a. Demand No. 45 - Public Works-ah hian, Lengpui Airport atangin State dang dangah kan zin ve thin a, khuti khawp khuan a sawi danglam vek a ni. Tin, chu chang a ni lova, Demand No. 15 - General Administration te thleng hian ka ngaihtuah ve thin a ni. Tunhma Opposition hunlai te pawhin kan lo zin kan lo zin ve tawh a, kan zinna a piangah 'hei hi tu sulhnu nge' kan han ti a. Kan officer-te hi an fel ang reng khawp a, kan House Cliff Colony, Shillong-a kan neih te a sawi danglam a, NEIGHRIMS-ah tunah damlo tan a ti a, Guwahati-ah ti bawk a. Khatiang khan hetah Imphal lamah, Agartala thlengin a mit a len a ni. Chuvang chuan, keini ho hian sawichhe thin mah ila, khawlaiah pawh khan kan va kala, khatah khan inthlahrung miah lovin thlen leh kan tum tho a ni. Hengte hi a ropui danglam ve ka ti tlat a, ka sawi duh a ni. Vawiin niah hian lawmna chang hre miah lote nena kum 4 hman hi a rei viau a, amaherawhchu, mizo-tawng takin, a tawp kum 5-na ah chuan hlim taka kan awm ho ve leh mai te pawh hi a tha viauin kan hria a.

Tin, Agriculture hmalakna chungchangah te, i vei lama ZPM te pawh, 'sorkar ta ula, engnge in hmalakna ni ang' tia an zawhna-chhanna chu -'sawhthing' tih a ni. 'A

hralhna i hria em ni?’ ti ila – “Hre lo, Bagha phai velah khuan Sundar Ali a awm a, a hralhna kan zawt ang a, min hrilh duh loh pawhin ZPM thalai hian a einaah kan ei ang a, a riahnaah kan riak dawn a ni” a ti a ni. ‘Kum 5 kan zui chuan kan hre em em ang ang’ ti. Chuvangin, ‘a tlachawp politics hi an khel zawk mah em aw’ tih te hi vawiin niah hian ka ngaihtuahnaah a awm a.

Vawiin kan Eighth Legislative Assembly hun tawpah hian chungte chu Pu Speaker, kan sawi duh a, ka vei zawng kha a ni ve tlat a. Chuvang chuan, hengte te hi kan ram inngahna, nu leh pa te thusawi thin kha a ni a, ‘ropui lo takte pawh a awm ve awm mang e aw’ tih te pawh min ngaihtuah tir a ni. Chuvang chuan, Pu Speaker, vawiin niah kan CM leh kan Minister pahnih - Pu Robert Romawia Royte leh Pu C. Lalrinsanga te hna chanpual kan han sawite hi ‘lungawi takin i pass ang u’ tiin kan support a ni e. Ka lawm e.

SPEAKER : Awle, demand-a i luh hma zawng kha chu Council of Ministers-ah ka ngaihsak mai ang che.

Tunah kan chawl ang a, zanriah kan kil ho ang a. Tichuan, dar 6:00 PM-ah kan thu leh dawn nia.

6:00 PM

SPEAKER : Aw le, tun tum kan term-a kan budget sawihona hnunng ber chu kan hual zim sawt tawh hle mai; hun tam a ni tawh lo e. Tunge han sawi leh ang le?

Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e. Demand No. 1 - Legislative Assembly hi tawi tea rawn sawi ka duh a. Kei, kum 20 dawn kal ta khan he lai House-ah opposition MLA niin kan rawn lut a, engmah hre lovin. Amaherawhchu, chuti chung chuan he laiah Pu Speaker, Assembly-a kan staff te’n min lo duat a, thil engkim kan hriat loh min zirtir a, inthlahrung lovin kan thiamloh thil te min zirtir thin a, an chungah lawmthu ka sawi a. Hei, vawiinah leh kum tin mai Budget Session te kan han neih hian an hah em em thin a. An chungah hian kei pawhin personal takin lawmthu ka rawn sawi hmasa duh a ni.

Demand No. 9 - Finance-ah hian Pu Speaker, ka rawn lut hmasa duh a. Mi rama budget an pharh hian mipuite’n beiseina sang tak nen an thlir thin a. Sumdawnge, zirlaite, sorkar-hnathawkte, a tu pawh mai hian ‘kan budget-ah hian eng nge lo kal dawn; kan budget hian engnge kan ramah nghawng a neih dawn’ tiin an thlir a. “Job-

opportunity a awm em; a tha em; tax a sang anga thil man a to dawn em, nge tax hi a tlem zawk dawn” tih tein an lo thlir thin a ni.

Mahse kan ramah chuan, budget discussion te kan han nei ve a, ‘Kamrula’ tih vel leh, ‘ka bang ang; bang lo ang; ngaihdam dil rawh se’ tih vel hi kan budget chhunga kan sawi a la ni tlat mai a, a manangthlak ka ti hle a ni. Ram-hnuk khawih thil, ram-hnuk siamthatna tur budget hi kan departmen-ah hian a awm tlat lo a ni.

Hei, kar hmasa atangin demand kan han sawi tan a, nilengin hun kan hmang a. Minister-te demand han en hian hnathawk thei turin kan siam lova. Minister te’n anmahni ir-awm chhuaka, anmahni chan departmen-ah hian hmasawna siamna tur budget kan dah lo a ni. A ti thei fal deuh minister te chuan sorkar hnathawk an lak dawnin, departmen lak pawh ni lo khawtlangin an lak mai mai, written test pawh awm lo, interview pawh awm lo, chutiang chu an mamawh zat zat an la thei a. A ti thei ve lo vek vek minister-te chuan an bulah han sawi i la, engkim maiah, ‘kan indaih lo; hna kan thawk thei lo’ an ti lawi si a. Kan sorkar pawh hi minister thenkhat lamah hi chuan ‘*lem ang a der ve hle mai*’ tih hi ka rawn sawi duh a ni.

State dangah chuan, Pu Speaker, fiscal deficit tihnam tur hian tan an la nasa viau mai a, waviinah hian kan leiba interest rate te hi a sang em em mai a ni. Heng pawisa tuna kan pukte hi thalai, nakin zelah kan ram hruaitu nihna te an rawn chelh ve hunan an rulh zel tur a ni; hei hi kan fimkhur a ngai khawp mai. ‘An pawisa hman tur waviinah hian kan lo hmansak a ni’ tih hi kan hriat chian a ngai khawp mai. Chuti a nih loh chuan, kum 20-30 a lo kal ang a, kan thalaite, helai hmuna la thu turte hman tur pawisa hi waviinah kan hmang duak duak a. Hei, ‘SASCI’ kan tih te pawh kan han hmang ve a, mahse a nghawng tur hi chu kum tam tak hnu ah a ni dawn. He thil hi kan thalaite eizawna lamah tangkaipui ngawih ngawih tura ngaih a nih lai hian, chuti lam hawi chuan engmah a awm si lo hi a pawi ka ti a ni.

Tin, State dangah chuan Pu Speaker, education sector-ah te hian budget hi an dah hnem thei em em a, an thalaite hi hnam dang nen *open market*-a compete phak turin an siam thin a ni. Tamil Nadu-ah phei chuan Primary School atangin programme siamin subject pangngai bakah English, Tamil leh Science subject-ah te hian written leh spoken pangngai teaching aids te pein volunteer ho nen te an bei hial a ni. Engineering College-ah pawh Pu Speaker, an final year-ah chuan Chinese, German, Japanese tawngte chu *compulsory* an ti hial tawh a ni. Anni chuan job opportunity - kan zirlaite an zir zawh hnu, degree an neih hnua hna an hmuh theihna tur atan khan tan an la nasa a. Tin, health sector te an dah sang em em thin a ni.

Waviin niah chuan Pu Speaker, khatiang lam zawng kan hmu lova. Hei, waviinah pawh Ruling MLA te’n an han sawi ve a, an bial tana mamawh takngial pawh an sawi tawh lem lo. A awmzia chu - Demand Bu kan en a, Demand Bu-ah khan Minister

demand-ah pawisa dah a awm si lova, dil ngai pawh ni se, khatiang dil tur kha a awm lo tih an hria a ni. Amaherawhchu, khang pawisa te kha Chief Minister-ah engkim dah khawm a ni a. Chief Minister atanga dil chhuah leh ngai budget vawiin niah hian kan pass dawn a ni a, a pawhi ka ti khawp mai a. Sorkar pangngaiiah chuan Planning Department te hi kan hmang tangkai thin. Mahse, vawiinah hian Planning Department hi a awm lo ang tluk a ni. Planning Department chuan department allocation te a siam a, department lian leh an mamawh tur awm te kha an duang thin a ni. Vawiinah chuan Planning Department-in awmzia a nei lova, Chief Minister-in a pek phal, a ti thei deuhin ‘chuti zat chu ka mamawh ka pu’ an ti a, ‘Aw, lo pe rawh’ tia sign mai mai kha a ni. Hmanlaia District Council area-a CEM pakhat an sawi ang deuh kha a ni a - Budget a lo kal a, an dawhkanah pawisa an dahkhawm a; ‘kha nang i ta; nang i ta’ an ti a, an insem ral mai mai” an ti a; chutiang deuh chu vawiina kan budget hi a ni a. Kan hman tur hi MLA rual ten he House-a pass ngei ngei ngai kan pass miah loh hi a ni nghal ringawt mai a, Supplementary-ah kan lut nghal ringawt mai a ni. A pawhi ka ti khawp mai.

Tin, Finance-a pawimawh em em mai - Finance Commission hi engatinge vawiin thlenga kan tih theih loh hi ka hrethiam thei lo a ni. Kum 2020 leh 2025 ami tur, tunah kum 2023 a ni tawh a, recommendation pawh kan la thehlut lo reng reng. Hetiang anih chuan, 16th Finance Commission hian min rawn hrek lo ang tih pawh a sawi theih tlat loh. Pu Speaker, Finance Commission nei tur hian 73rd Amendment-ah khan, ka hriat sual loh chuan *mandatory* a niin ka hria a. Chutiang chuan Congress sorkarah chuan Finance Commission kan nei a, an niin ‘village council-ah; local council-ah heti zat in hmang tur a ni’ tiin ruahmanna fel tak an nei, vawiin thlengin. Chutihlaiin kum 2020-2023 ah pawh Finance Commission nei thei lova kan awm hi, ‘finance lamah hian kan expert ta lutuk zawk em ni; finance an tha lo kan tih thin hi, an expert lutuk vang zawk em ni’ a tih theih a ni.

Tin, Healthcare hi kan sawi nasa a. Pu Speaker, *in lian pui sak tur duana sa zo leh thei si lo* hi kan ang ka ti. Healthcare ropui takin an din a, an puitlin leh thei si lova; vawiinah vaibelchhe 60 chuang bat a ni a, chung vaibelchhe 60 chuang ba chu, a rulh nan ADB atangin kan ba leh dawn a ni. ‘Ba’ chu ‘ba’ bawka rulh kan han tum te hi a pawhi ka ti a ni. Kan State budget hi Pu Speaker, nichina ka sawi tawh ang khan a tam zawk hi SEDP atan engtin nge kan hman ang tih la ruahman chawp tur a ni a, state-matching share-ah eng emaw zat kan han dah ta ringawt a, hei hian vision kan neih loh zia a tichiang viauin ka hria.

State-matching share kan dah ringawt hian, central sorkar ina scheme a neih apiang lo dawn kan tum ringawt mai a ni. ‘Kan ram tan a tha em; kan ramin kan hlawkpui em’ tih ngaihtuah lova, central sorkar scheme PMJVKY a nih chuan kan bawh huam huam a, ‘chumi scheme chu a lo kal a’ kan ti a, building sakna tur a awm a, building lian pui pui sak kha kan ropuina a ni lo, Pu Speaker. Kan kut hnathawktu

miretheite kan chawikanna tur scheme te hi kan ngaihtuah a ngai a ni. Central atanga sum lakchhuah tam hrim hrima intlansiak hi he sorkarah hian a tam lutuk a, chu chu ‘ram hruaitu lo la kal zel tur leh, kan tu leh fate tawrhna tur a ni’ tih hi karawn sawi duh a ni. Sum enkawl thiam Congress party sorkarin sum kan enkawl lai chuan, sorkar a lo tlak pawhin Pu Speaker, sawrkar lo kal lehin hahdam takin a chhonzawm theih a ni.

Governor speech-ah kan Chief Minister, Finance changtu ni bawkin a sawi kha uluk deuhin ka lo ngaithla a, kum 2019-a sum tam tak tak kan neih lai nawm zia kha a sawi a, kha kha sorkar tha-in kan hnutchhiah a ni. Vawiina kan sorkar, November-a tla mai tur dawt leha sorkar tum tan pawh a huphurhawm a ni. Leiba nei nasa tak nei tunin bul kan tan leh dawn a ni a, chutilaiin sorkar hnathawk hlawh pawh kan pe thei baw si lova.

Vawiinah kan Minister ten zawhnate an han chhang a, February thla tawp a ni tawh a, January thla hlawh kan pek te kha ha-hipin zuk sawi a maw le! January thla tawpah an hlawh kha la mai rawh se; February thla tawpa January hlawh an la kha an lawm em em mai a ni. Sorkar mak tak hi a ni. Tunah chuan leiba in kan tan dawn a, sorkar hnathawk hlawh te hi, Pathian leh mipui zarah kanrawn sorkar ang a, “January thla atangin a hun takah an la zat zat dawn a, an DA pawh kan pe dawn a ni” tih vawiin hian Pu Speaker, ka sawi duh a ni. Khati lamah kha chuan duhtawh tawh ila.

Horticulture vel hi sawi ka han chak khawp mai a, chumi hmain demand No. 45, PWD ah hian ka hanrawn lut ve lawk ang a.

Kan sawrkar lo pian tirh khan helaiah hian resolution an pass a, ‘MNF sorkara kawng that tawh zia hi’ an ti a, kut an beng dur dur mai a, a kum khatnaah khan. Thal lai a ni a, kum 5 a han liam ve meuh chuan nimin piah maiah resolution kan han pass a lungrual takin, ‘kawngpui leh building te tha taka enkawl ni rawh se’ kan han ti leh a. Kum tira an resolution leh kum 5 hnua an resolution hi chu dang tak a ni. A buaithlak khawp mai. Tin, Aizawl-Thenzawl- Lunglei road hi Pu Speaker, kan House leader hnena karawn ngen duh chu - Aizawl - Thenzawl hi chu a tha khawp mai a, Thenzawl - Lunglei saw enkawl a ngai bik a. Hei UQ chhannaah hian ‘Thenzawl-Lunglei chu resurface mek’ tih a ni ti a, a chhe vek zawk mai a. Chu ai chuan tun kuma pawisa an dah hi Sateek vela kawng siamna a ni a. Hei hi kan House leader zahawm hnena ka ngen duh chu, Aizawl-Thenzawl hi chu a la kal thei a, nawm pawh a la nuam a, han resurfacing leh rik ngawt ai chuan Thenzawl-Lunglei kawng, mipui tena hreawm taka kan hman mek black-topping nan hmang zawk ila’ tih kha karawn ngen a ni.

Lengpui Airport-a Kamrula te, Zoramchhana te hnathawh han sawi ka han chak tehreng nen hun minute 2 chauh ka nei tawh si a. Chu aia pawimawh zawk Lunglei-bypass road leh Lunglei circuit house hi congress sawrkar ina pawisa kan dah vaibelchhe 10 dawn khan bul tan ve theih awm tak a ni a. Hei kum 5 a liam ta a, a ai

lian zawka an tum thu an sawi a, mahse vawiin thleng hian bul tan a la ni lo te hi, chhim mipuite hian he sorkarah hian beiseina an nei tlem hle tawh a ni. Bul tanna tura pawisa awm ngawih ngawih pawh hmun danga hman a ni hi, ‘chhim lam hi he sorkar hian min ngaihsak lo a ni’ tih Pu Speaker, vawiin hian ka han sawi duh a ni.

Tin, GAD, Demand No. 15-ah hian ka han lut leh lawk ang a. Civil Aviation Wing-ah hian Congress thlai ten sum hman chungchangah ‘thil diklo tam tak a awm a ni’ tih Lok Ayukta-ah complaint an theh lut a, Lok Ayukta pawhin an an complaint chu a pawmpui a, CBI chhui turin a ti a. Kum a liam tawh a, kan sorkar hian CBI a chhui tir ngam lova, Civil Aviation sum dik lo taka hmanna awm hi hum a tum em ni? Engati nge Lok Ayukta pawhina CBI hnena chhui tura a tih kha vawiin thlenga chhui tir a la nih loh? Kha kha a pawl ka ti khawp mai.

Tin, Pu Speaker, Agriculture chungchangah hian, *buh leh bala intodelh* kha kan thupui ber a ni a. Kan Supply Minister hian buh thar lei tur awm loh thu hi a sawi fo mai a. Kan policy, vai-buh ringa kan awm tawhloh tur thu kha chu kum 5 hnu pawh hian ‘awmze nei lo a ni’ tih kha ka sawi duh a. Pakhat chiah, Pu Speaker - an sorkar tirha an flagship programme emaw kan tih *mau leh rua* chungchang hi kumin hian Governor speech-ah a lang lova, budget speech-ah pawh a awm lova. Chumi atana pawisa dah pawh awm lo hian mau leh rua kum khata vawi 3 tuai thei te, ‘mau-raw hung khat neih chuan garage lo siam nghal rawh u’ tih a ni te kha, kan sorkar hi a beidawng em ni hi? Pu Speaker, ka lawm e.

SPEAKER : Tunge han sawi leh ang? Member zahawm tak Pu C. Ngunlianchnunga ka sawm e.

PU C. NGUNLIANCHUNGA: Pu Speaker, ka lawm e. Ka thusawi hmian thil han sawi fiah lawk ka duh a. Nimina kan zawhna UD & PA leh DP & AR atangte khan chhanna kan hmu a. Ka hming hi ‘Ngunlianchnunga’ a ni lova, ‘C. Ngunlianchnunga’ a ni a, proceeding bu pakhat pawh ‘C’ an lo dah lova; ‘Ngunlianchnunga’ kha chu MLA a ni lo, ‘C. Ngunlianchnunga’ hi MLA chu a ni. Chuvang chuan department lam pawh khan min en sak se Pu Speaker, ka duh khawp mai.

Pu Rintluanga *kehme* leh ka *kehme* a inang dawn lo tlat mai erawh hi chu a pawl ka tikhawp mai a. Pu Speaker, 8th Legislative Assembly budget hnunung ber dam taka kan han awm tlang dial dial thei hi a lawmawm ka ti a. Term leha MLA ni tawh lote kan awm a nih pawhin kan intheihngihl tawh dawn lo, khawvel a awm chhung chuan; ‘8th term-ah khan MLA kan ni ho a sin maw le’ kan la ti zel dawn a. Kan inngai tlang dawn khawp mai a. MLA kan lo ni leh tlang a nih chuan, a lawmawm a, kan ni tlang tawh lo a nih pawhin, duhsakna member puite ka han hlan a ni.

Pu Speaker, kan Chief Minister hi a fel tehlul nen hian House-ah *assurance* vawihnih min pe a, October, 2021 proceeding phok 89-naah leh, March, 2021 proceeding phok 301-naah khan a awm a. Thil dik lo deuh mai PWD-ina Vanglaini chanchinbu, Ni 2.9.2021 chhuakah khan KMMTP road compensation claim zat hi mizoram aia zau claim anga chhuah a ni a, hei hi a dik lo a ni. Claim theih zat chu ‘2.3959 a ni’ tih he House-ah vawihnih ka sawi tawh a, heta an chhut chhuah mathematical calculation leh a pass kha ‘min pe thei ang em’ tiin ka ngen a, kan Chief Minister zahawm tak PWD changtu hian “pe thei e; lo ziaak tha leh la, theihngihl te kan lo theihngihl thei a” a ti a. Ka ziaak tha leh a, mahse vawiin thleng hian pek ka la ni lova. Hei hi kan Chief Minister zahawm takin min ngaihthlak sakin, min pe ngei se ka duh bawk a ni. A chhan chu - ram leh hnam ang pawhin he thil hi inpuh hmingschhiatna a ni a, Lairam-a awmte saw chuti taka pamham leh mahni huang lo han hai dawt dawt mi kan ni lem lo a ni. Amaherawhchu, heta a lan dan hi chuan, Mizoram zau zawng ai maha sq. metre 25,940.05 claim anga tih a ni lai kha a fel lo; chhutsual niin kan hria a. Amaherawhchu, a chhutsualna lai kha, ‘hei hi kan lo chhutsual a ni e’ tih pawh chu vawiin thlengin a awm lova. He House-ah hian hei hi ‘vawih thum ka dinpuina a ni tawh a ni’ tih kha Pu Speaker, ka sawi duh a ni.

Awle, demand-ah ka han lut ang a. Pakhatnaah chuan - Kan Agriculture Minister hi a khawngaihthlak ka ti a, CSS bak hi ram hmasawna atana han khawih ve tur a nei lo hle mai a. Leilette an han lai ve a, ka thianpa, Tipa bialtuin zawhna - chhannaah khan hectare 50 kha an han tihtheih tawk a ni a. He House-a ka lo sawi ve tawh thin chu, ‘tuna kan kal dan anga thei sema sem mai lovin, bawh bik nei ila, potential area-ah in concentrate ila, tichuan, ei leh barah pawh kan intodelh ang’ tih hi a ni a. Vawinah chuan kan *inthei-sem* a, engmah tham ni lovin *a-fahrah puan hlai* duai ringawt a, hlawhtlinna tak tak leh rah chhuah hmuh tur a awm lo a ni. He kum nga chhung hian a bik takin buh leh balah, sawrkar tantirh khan ‘zo-buh kan ei ang’ tih kha a ni a, a tharna tur a hmun ber kan siam si loh chuan thar ngaihna a awm lova, lei tur a awm lova, lei ngaihna pawh a awm bawk lo a ni.

Kan ramah hian, a bik takin ka bial Lawngtlai West-ah sawn Zoram-a lar em em ‘Belisora luikam’ tih te Pu Saikhuma’n inlarnaa a lo hmuh tawh te leh Chamdur project te saw leilet hmun atana tha em em mai a ni a, mahse hmalakna sawi tlak a awm lova. Ei leh bara intodelh turin tuna hmalakna kan Agriculture Minister-in a han neih deuh pawh FOCUS, distirct parukah Congress hunlai pawh khan ruahmanna a kal tawh a, tun sorkar tantirh atang khan a han buaipui tan nghal a. Khang bak kha chu capital expenditure atang hian hmasawna tur lam hawi hi a awm lo tlat a ni, Pu Speaker. Chuvang chuan, agriculture kan ngaihpaawimawh lova, ei leh bara kan intodelh loh chuan engtik lai mahin kan zahawm lovang.

Sports infrastructure tha pui pui, phul lem phah te, tennis court te, basketball court te artificial grass-turf phah changkang tak tak nei mah ila, ei leh bara kan intodelh

si loh chuan Mizo-fate hi kan ropui ngai dawn lo; mi chungah kan leng ngai dawn lo. Kan hnam a lo zahawm leh a lo ropuina tur atan chuan ei leh bara kan intodelha, keimahni kan insawhngheh a ngai a ni. Chutiang zawng chuan sorkar hian hma la se a pawimawh khawp mai.

Tin, a pahnihnaah chuan - Horticulture Department hi kan Chief Minister-in a han la chat mai a. Amaherawhchu, horticulture lamah pawh hian a tuimi leh ti tak tak, potential area tha tak neite pawh party mi an nih loh chuan a tih theihloh. Hetiang a nih chuan, he ram hi englai mahin kan siamtha ngai dawn lo hrim hrim. Chuvang chuan, vawiinah hian he ram leh hnam hi a dinchhuah tak tak kan duh a nih chuan, a taimate, a thawk peihthe leh mi inpete sorkar hian a thlan a ngai a ni. Chutiang a nih loha, 'kan party mi a nih loh chuan leh a department pawhina 'ram nei tha, mi taima' tia an lo thlan tawhte pawh, 'kan party mi an ni loh chuan kan lo thlak zel dawn' tih kha Lawngtlai-ah te, Champhai-ah te pawh a ni tho a. Khatianga kan kalpui dawn anih chuan he ram hi a ding chhuak ngai dawn lo.

Vawiinah Pu Rintluanga khan a sawi a; ka hming kha a lam zing deuh a, han lam ve lawk ila. Leiba kan ngah em em a, vaibelchhe ₹14,209.80 a ni a. Vaibelchhe ₹13,500 chuang leiba kan nei a, chu chu RBI-a kan leiba a ni. Contractor hnathawhna leiba kan ngah em em; sorkar hnathawk leh pension te hlawh kan pe thei lo; an GP fund kan pe thei lo; healthcare nen lam kan ba. Chuti siin kan eng a la thawl em em mai a, kan la hahdam em em a. Mut theih lohna tur tham a ni tawh, Pu Speaker, vawiina kan leiba hi.

Tunlai hian Zonet tv-ah, 'Zofate hi mipakhatin cheng nuai kua theuh ba ang kan ni' a tih kha; chutiang khawpa leibain min delh chung pawh hian, a puk tur lamah kan la tui em em mai a, leiba rulhna tur tia leiba dang va lak leh kha, chutiang chu kan kalphung a ni a. He ram hi i ngaihtuah ang u; he ram lo hi ramdang kan nei lo. He ramah hian, he ram leh hnam hian hma lo sawn ve sela. Vawiina he sorkar a lo din atanga kum li-nga a kalnaah hian tawngkam, Mizoram a la awm ngai reng reng lo 'thluaka sum lut' tih te hi a lo piang ta a nih hi! '*Tawngkama distinction ni lo, hnathawha distinction kan duh tawh*' tih te hi maicham atang min sawi khum tawh a ni hi! Eng vang nge? Keimahni chuan tha kan inti a ni mai thei, miin min hria a ni; miin min hmu a ni. Kan mihringpuite hian kan chezia leh kan hawiher hi an hria a ni. Chuvang chuan, chapo zawngin min ngaihthlak sak lo ula, Pathian khawngaihna avang chauh a ni a. Zing tin hian rorelna dik in kalpui theih nan hian in tan ka tawngtaisak ve thin che u. He ramah hian rorelna tha leh rorelna dik hi awm sela, he ram hian hmasawn sela, he ram hi ram nuamah keini lo chu siamtu tur dang an awm chuang lo. Chuvang chuan, kan party puite chu kan lo duhsak deuh anih pawhin, a tawh i nei ang u.

Kha, chawhma lamah khan ruling lam atangin kan ngaithla a, SEDP beneficiary 93% kha party mite an thlang a, tun tum SEDP-ah hian 20% party mi an thlangin ka hria. Keini lam phei chuan kan beisei lo reng reng; beisei tinah pawh kan tin lo. Hetianga

kan kal reng a nih chuan, he ram hi a ding chhuak ngai lovang. He ram hi leibain a la delh ang a, he sorkar tan pawh hian kal theihloh chin a la awm ang.

Pu Speaker, sawi tur a tam si a, kan inbuatsaih nasa a, zan pawh mu mang lovin ka han bei a, a manganthlak a ni. Darkar khat min teh, Pu Speaker. Ka lawm e.

SPEAKER : Member zahawm tak Pu Lalduhoma ka sawm e.

PU LALDUHOMA : Pu Speaker, demand-a ka luh hmian - Kan address che hian, ‘*Speaker zahawm tak*’ kan ti ve lo che a, a dang zawng zawng hian ‘*zahawm tak*’ hi kan inti a, hei hi a tul kher em; a tihloh theih em le? A *mizo* lo riau te hian kan hria a, hun a heh bawk si a. Dan-in a khap te a nihloh chuan, min lo hrethiam ula; inzhlohna vang ni lovin, ka ti vak dawn lo a nia, kei chuan.

Awle, tun kum 4 chhunga zoram mipui ti ti luah bertu chu - contract thawhna kawnga induhsakna hleihluak awm hi a ni a. Hei, Kamrula hian ni khat thil thuah, kum 2021, September Ni 20 ah khan work order pathum, a rualin nikhatah a hmu a, chu chu nuai ₹88 man a ni a, a vaiin. Dt 3. 12.21 ah work order pathum nikhatah a hmu leh a, hei hi nuai ₹3,350 man a ni; a hmu hnem khawp mai. Tichuan, Dt 24.6.2019 – 3.12.2021 (kum thum leh thla 29) chhunga a contract hmuh hi vaibelchhe ₹212.98 niin ka chhut a, chu chu thla tin nuai ₹734 man chawh rualin a tling a ni. Hetiang khawpa contractor ropui nuai ₹730 chuang man thla tin maia thawk zo thei kan lo nei reng mai hi a ropui hle a ni. Zoramchhana pawh chutiang deuh tho chu a ni a, kan sawi tawh lo ang a.

Ka sawi tum tak zawk chu - restricted tender inpek hian *dan* 5 pawimawh tak tak a bawhchhia a ni. Chung *dan* te chu –

- 1) Rule 162 of General Financial Rules;
- 2) Rule 16 of Public Procurement Rules;
- 3) Central Vigilance Commission circular no. 04/04/21 4),
- 4) Article 14 of Indian Constitution;
- 5) Supreme Court ruling SPO civil no. 10121 of 2006 te,

heng zawng zawng hi Mizoram-a contract kan inpek dan hian a bawhchhe par par a. Tichuan, heng *dan* te hian thil tam tak a sawi zinga tlem te ka han sawi ang a –

Pakhatna-ah chuan - restricted tender hi ‘a tlem berah firm pathum aia tam hnen atanga invite tur’ tih a ni a, Kamrula case-ah hian firm pathum chauh thlan a ni a. Kan ramah hian Class-1 contractor 162 kan nei a, registered Grade-A firm 116 kan nei a, chung zawng zawng zingah chuan comparision siamna atan pathum chauh thlan chhuah an ni a, hei hian dan a kalh a ni. A *pahnihna*-ah chuan – ‘restricted tender hian nuai ₹25 a pel tur a ni lo’ tih a awm bawk a. A dawt leh ah chuan – ‘midang reng rengin an thawh theihloh, amah chauhin a thawh theih a ni tur a ni’ tih te a ni a.

ZMP Tlau ina RTI, PWD-a a zawhna-chhannaah khan –Kamrula hian building construction experience a neih an hriat loh thu an zia a ni; chutiang chu restricted tender-in kan pe miao a. Tichuan, exceptional case, a pehhel theih dan a awm leh a, a pehhel theih dan awm chhun chu – ‘State sorkarin natural calamity emaw, emergency emaw a declare tur a ni’ tih a ni. Chutiang chu kan ramin vanneih thlak takin kan tawng lova, sorkar pawhin emergency a puang lo a ni. Chuti chung chung chuan kan sorkar hian thil pahnih tlawhchhan a nei a, *pakhatna*-ah chuan - CPWD Manual 2022, para 1.5 a ni; *pahnihna*-ah chuan - SOP 2022 of CPWD Manual, annexure 66, serial No.19 a ni. Heng an tlawhchhan *dan* te ngei pawh hian, ‘restricted tender a nih dawn chuan heng hi a awm tur a ni’ a ti a, chungte chu – ‘Lirnging, hurricane emaw, tornado emaw, tek tlain a den emaw, tsunami emaw, tuilian emaw, terrorist hovin min beih emaw, a nih loh leh building leh bridge te a chim thut emaw chauhin’ a ti a ni. An *dan* tlawhchhan ngei pawh hian tuna an inpek dan anga an inpek hi a phal lo a ni.

Tin, ‘a hmanhmawh thlak tur a ni’ tih a ni leh bawl a; a hmanhmawh thlak loh zia chu, kan Airport-a daily passenger average hi nikhatah passenger 700-900 in kar a ni a, India ram capital-a passenger nei tlem ber kan ni. Han chei that deuh te chu a awm e, tlema zawng te chuan. Amaherawh chu, sum leh paiah kan per-capita income te a tlakhniam duai duai lai leh mipui riltama kan awm laia, heti zat sum airport atana kan insiam hi, Airport-a kan rilru kan dah vang ni lovin, sum siamna tan kan duh a ang mah mah hian a lang a ni. Chung zawng zawng a ni chung chuan kan CM hian a approve a ni; approval a pe a ni. Chuvang chuan, MPYCC te chuan slab chim avangin Lok Ayokta ah thubuai an thehluat a. A case number chu - Case No. MLC42/2022 a ni.

Adang leh chu, *Mizoram First*-in Chief Minister lakah case an thehluat leh a, Case No. MLC44/2022 a ni a, hei hi *under-enquiry* a ni. Tichuan, *Mizoram First* chuan kan Chief Minister hi ‘Prevention of Corruption Act’ hnuaiah prosecute ngei ngei an ngen a ni, tunah hian. Tichuan, ‘case a ni lo’ tih te nimin lamah kan sawi a. Dictionary kan en chuan, engnge ‘case’ hi - ‘Object of investigation’ a ti a ni. “*A situation requiring investigation or action*’ a ti a ni. *Case* awm lovin *enquiry* a awm thei lo, *case* a awm phawt a, *enquiry* te, *investigation* te a awm thin a ni. Chuvang chuan, Lok Ayukta pawhin an ziahnaah hian case number an pe thlap a, ‘chutiang chu case a tling lo e’ kan ti dawn a nih chuan, ‘case’ tih hi zia tawh lo se kan ti dawn em ni ang?

Tichuan, Pu Speaker, department dang kan en chuan, PWD-ah ringawt pawh hian restricted tender 121 an lo ti a, Sports Deptt-ah te, Health Deptt-ah te a tam em em a, kan sawi seng lova; kan *priority* thlan dan hi a mak a ni. Gwuhati ah patient lodge kan mamawh em em a, damlo an inseh-mur a, awmna an hre lova. Chumi atan chuan 2019-ah ram kan lei tawh a, chungte chu a hmanhmawhthlak zawk lo em ni, kan Airport cheithat vak ai hian? Kan priority, kan ngaihpaawimawh hmasak hian ram development emaw, mipui hamthatna emaw lam ni lovin, sum siamna a kawkw tlat zela hi, hei hi lungawi har kan ti a. PMJVK pawh kan sawi tam; “80% hi Education, Health leh Skill

Development-ah te hman tur” tih a inziak kuau a, 20% kha a dangah a kal ve ang a, chu 20% chu Sports leh department dangte’n an lo chang ve chauh tur a nih lain, 100% te, 80% te a chang a. Chuvang chuan, kan rorel dan hi mipui a tinzawn lo a ni kan ti a ni....
(*interruption*) **Pu Lalrintluanga Sailo:** Pu Speaker, *point of clarification* - Pu Speaker, khawngaihini. ‘PMJVK hi education leh department dang’ tih lai kha an sawi si lova, Sports a nih chauha an sawi ri hi engnge a awmzia?)

“PMJVK hi 80% Education, Health leh Skill Development-ah hman tur” tih a inziak kuau a ni. (**Pu Lalrintluanga Sailo:** A inziak si kha Education demand-ah khan i sawi si lova..) Aw, chang ve hek lo; sawi tham an chang lo a lawm. A sawi tel loh Sports Department hian 100% te, 80% te a chang hi ‘a dik lo e’ kan ti a ni. (**Pu Lalrintluanga Sailo:** Tin, case te kha, thubuai miin an hekna kha, ‘case an thehlut’ te kha i ti a; case theh luh hi a ni ngai em ni? FIR miin an thehluh hian an pawm a nih chuan, case an siam chauh a ni lawm ni? Police kum 6 lai i tan laiin i hre lo em ni?)

SPEAKER : Ngawi rawh u; ngawi rawh u. Clarification kha i rawn dil a, ti khan a tawk mai aw. nakinah in sawi mai ang.

PU LALDUHOMA : *Dampa savawm* hi a rawn chhuak leh thin a, a buaithlak khawp mai a. Hei, ka hun a la hek a nih kha; min pek leh ka beisei.

‘Lok Ayukta hi engtin nge kan enkawl?’ tih nichinah kan ngaithla tawh a. Select Committee hi 2014-ah din a ni a, khatih laia kan Chief Minister Pu Hawla leh Group Leader Pu Vanlalawma te hovin an tih a ni a. Tichuan, 2019-ah *Chairman* appoint a lo ni ta a. Tunah kum 4 a upa a ni tawh a, Investigation Wing pawh a la nei miah lo a ni. ACB an hmang hawh a, Lok Ayukta hian, ACB ho chu an transfer thei lova, an post thei bawh hek lova, ACR an ziah sak bawh hek lova; khatiangah discipline a awm thei lo reng reng. ACB chuan an hlauh zawk chu Home Minister te, Chief Minister te a la ni reng. Loh Ayukta hnuaiah hian an va awm hawh mai mai a ni, an ACR pawh an ziah thei lo. Chutiang chuan Lok Ayukta hi kan dah a, ‘eirukna tihtawp hi kan hlau a ni’ tih hi a lang chiang em em a ni.

Tin, hmannah khan kum 5 chhunga a let 3 - 7 a Hausa kan hruiute mi 12 hming media-ah kan lo hmu a, a *..... ka ti khawp mai. Kan Chief Minister hian a hlauh tam ber a, kum khata nuai 22 leh sang 8 chauh a hlauh. Hmang miah lo pawh ni se in hmun tha deuh leina khawp pawh a tling lo. Chuti ni si....

(* *expunged as ordered by the Chair*)

SPEAKER : Ngawi rawh u aw. Senior-in lam loh tur kan ti thin ‘a zahthlak’ tih te, Pu Duh, vawihnih i lam ta a, kha kha chu expunge ang aw.

PU LALDUHOMA : Aw, expunge rawh. Mahse, ‘zahthlak’ ka tihna chu a reh chuang lovang. Kum khata kan hlawh hi hmang hauh lovin dah tha ta ila in hmun tha deuh leina khawp pawh a tling lo. Chuti ni si chuan MLA term khat kan ni dek dek a, minister term khat kan ni dek dek a, kan hausa lutuk; kan in leh lote hi a tha lutuk. Chuvang chuan, ‘kan eiru a ni’ tih hi a chiang khawp mai; heng hian a tichiang em em a ni. Hei, kan inthlang dawn a, i dinglam a mite hi, “hei, nuai 3 te in sem tha bawk a, in sorkar leh ang” han ti ila, an haw tlat mai a, ‘min tiel’ an ti tlat mai a. Kan lo sorkar ve hlauh a nih chuan *witch-hunting* hi ka duh lo; ‘Sulhnu chhui’ hi kei a mimal pawhin ka duh lo; tumah kha lo hlauthawng suh u. Amaherawhchu, tunlaiah mi an active tawh; mi thahnemngai an tam tawh. Minister dangte pawh dan kalha hna pe an tam si a, kan kal zel dan turah hian thil fel lo tak tak hian min nang ang a, kan hun tawp lam hi chhe deuhin kan hmang ang tih hi ka hlau khawp mai. I fimkhur teh ang u. Duhsak zawng kan nei a nih pawhin, ‘*dan* hnuaiiah i duhsak hram hram teh ang u’ ka ti duh a ni.

Tin, kan ramin a tuar a ni, hetiang a kan awm avang hian. Tunah hian kan GSDP kan en chuan 2021-22 ah ‘-11’ ah kan chhukthla a, 2022-23 ah ‘-9’ ah tunah kan ding mek a. A thang zawng ni lovin, a chhukthla zawngin, a hnungtawlh zawngin kan ram a thang a, kan pawisa hman dan a dik loh vang a ni. Tin, leiba te pawh 2020-21-ah India ramah a ba hmem ber *pakhatna* kan ni a, 2021-22-ah *pakhatna* kan ni leh a, 22-23 ah *pakhatna* kan ni leh a, financial year pathum a zawnin India rama leiba tam ber *pakhatna* kan ni zat zat. Chuvangin, Pu Speaker, kan Chief Minister tena ‘India rama leiba tlem ber pahnihna kan ni’ an tih kha, expunge ka ngen a che. Thu dik lo hi kan House-ah record in awm suh se. Heng hi RBI statement leh data a ni. Chuvang chuan, record dik lo hi kan House-ah hian kan vawng reng turah ka ngai lo a ni. Public expenditure review committee te din tur a ni a, an din duh miah lova; engtin nge kan kal that theih ang? Kan *FRBM Act* hian a phut tlat a, mahse kan ti duh si lo a ni. Chuvang chuan, kan budget bu hi, ‘Ba-bu’ a ni; chu chu zep thu a awm lo.

Ka han sawi leh duh chu Pu Speaker, SEDP hi a ni. Kan ramina kan buaipui len ber dang pakhat chu - SEDP hi a ni; tumahin kan pha lovang. Tichuan, mak deuh mai chu - SEDP a tana sum sorkarin a dah zat Finance Minister-in budget speech-a a sawi ang hi a ni ngai miah lo; hei hi mipui bumna a ni. A ni ngai miah lova, a aia tlem demand-ah an rawn dah leh si a Demdand pawh chu a vaiin an withdraw leh vek a. Tichuan, an withdraw leh hnuah khan re-provision a ni leh ta a. Pakhat chauh, kum khat chauh hi ka han sawi ang a - 2020-21-ah hian Finance Minister speech-ah ₹513 crore a ni a, demand-ah ₹428 crore a ni. An hman zat chu - ₹113 crore chauh a ni. Tichuan, hei kum 4 chhung hian Finance Minister speech-ah chuan ₹2,363 crore a ni a, *Demand for Grant*-ah chuan ₹2,208 crore a ni. An hman zat erawh chu ₹967 crore a ni a, hman loh hi ₹1395 crore a awm a, a chanve pawh an hmang lo. ‘Mipui bum nan; politics khelh nan em ni pawisa heti zat kan dah?’ kan ti a, a chanve pawh an hmang leh si lova.

Chuvang chuan, Finance Minister speech te, demand te leh a tak taka a kal dan te hi a inang ta lova. Tin, *Capital* hnuaiah booked a ni a, mahse capital hnuaiah chuan Sports leh PWD-ah chauh an hmang; a dang zawng zawng chu Revenue Expenditure-ah a kal vek. Chumi awmzia chu - revenue expenditure a san lutuk hlauin mipui bum nan capital hnuaiah kan dah a, a rugin revenue-ah kan hmang leh tho si a ni. Chuvangin, kan budget pumpuiah hian *transparency* a awm lova, *accountability* a awm bawk lova, mipui bumna a ni a. Tin, inngah ngamna a ni bawk lova, kan budget bu hi 'Inbumna-Bu' tih hial tlakin a rintlak loh a ni. Hetiang hi kan dinhmun a nih avangin, a paw ka ti em em a, kan hun tawp, kan budget hnuhnung ber kan khar dan hi a lungawi loh thlak hlein ka hria.

Pu Speaker, ka hun i tih tawp hmian 'ka lawm e' ka han tih khalh mai ang che. Ka lawm e.

SPEAKER : Awle, tunah chuan kan sawihona te kan lo duh tawk tawh ang a. 'Minister zahawm tak' ka rawn ti dawn a, a chhan chu - kum 50 chuang kan lo hmang tawh a, ka ti lo thei bik lo a ni e, kan House-ah hian. Tunah chuan, Minister zahawm tak Pu Robert Romawia Royte kan sawihona te wind up-a, sawi fiah ngai a tih te rawn sawi fiahin, a demand te House-ah pass rawn dil nghal turin ka sawm e.

PU ROBERT ROMAWIA ROYTE, MINISTER: Pu Speaker, ka lawm e.

Vawiinah ka demand kan budget session tawp niah sawihona tha tak kan nei hi ka lawm hle mai a. MLA zahawm tak tak ten an sawi ang khan kei pawh he House-ah hian *first-timer* ka ni a, Pathian leh kan Chief Minister duhsaknain MLA ka han tlin vawikhatnaah minister te kan han ni ve a, tihsual leh tihawm tih lo tam tak pawh ka neiin ka ring a, kha lam kha chu sawi thui a ngai lovin ka hria a. He House-a kan chet tlat vel dan chungchangah nang kan Speaker zahawm tak te, Dy. Speaker zahawm tak te, Assembly-a kan Commissioner te leh thawktu zawng zawngte mittlun lohna emawte pawh ka nei ang a. Chutiang bawk chuan, ka MLA puite, minister puite mittlun lohna te pawh ka nei ang tih ka ring a. Vawiinah hian kan budget session, tun term bikah chuan budget session tawp niah hian Assembly-a thawktu zawng zawng, kan Speaker leh Dy. Speaker hovin an chungah lawmthu ka sawi rualin tih awm loh tak ka lo tihpalh a awm chuan ngaihdam ka dil a. An fel hi ka ti a, laklawh tak tak ten an Library session han luh dawn chawpchilh takah te pawh hian Library han luh thut a lehkhabu ka mamawh te han lam te pawh hi ka ching a, tha takin min lo dawngsawng thin a, an chungah ka lawm tak zet a ni tih kha ka sawi duh bawk a. Tin, Kan senior te min kaihhrainaah lawmthu ka sawi bawk a ni.

Zaninah hian Aizawl East-II mipuite chungah pawh lawmthu ka sawi duh a, min support tha a, an zarah he House-ah hian ka lut ve a ni tih ka hre chiang em em a, thinlung thuk ber atangin Aizawl East-II mipuite chungah lawmthu ka sawi a. Ka

thusawi hmasak ber khan he House-ah hian India rama Assembly House thil ti thei ber nia ka hriat - Karnataka, Tamil Nadu leh Uttar Pradesh te aia thil tithei House-ah member ka ni ve hi ka lawm a, Pathian hnenah pawh lawmthu ka sawi a ni. Kha kha eng dang ni lovin, MNF leh India sorkar inremna thuthlung bawhzuia India Constitution Amendment Act siam, Article C7 (1)(g) dinhmunah he House hi India Constitution-in a dah vang a ni a. Article 371 (a)(b)(c)(d)(e)(f)(g) a tam chho a Mahse Mizoram Assembly hi a dang em em a, Nagaland nen khian khawi nge duhawm zawk ang aw tih te ka chhut thin a, Constitution lam te kan lo zir ve thin a nih avangin.

Vawiinah hian budget session, tun term bikah ka thusawi hnunungna ber tur a nih avangin he inremna thuthlung lo ziak tute Pu Ladenga te, Pu Zoramthanga te, Pu Tawnluia te leh midang boral tawh te pawh an awm a, la dam te pawh an awm a, zaninah hian *Zahna* ka hlan duh a. Mizote tana inhungna dan, ‘Constitution of Safeguards’ an lo sual chhuak hi a ropui a, he House-ah ngei hian a ropui zia a vawihnih nan ka sawi leh duh a ni. Assembly House lian zawk, member tam zawk tam tak an awm, sum leh paiah pawh hausa zawk tam tak an awm; mahse India Parliament-in hnam dan leh hraite, sakhua dan leh hraite, in hmun lo ram chungchangah te, India Parliament dan siam pawh he House hian kan duh lovin kan hnar thei; chu thuneihna chu Pu Laldenga te zarah Mizoram-in kan nei a, thalai ten zahna chang kan hre thar chho leh te hi a lawmawm a, nationalism-a thalai te kan harh thar hi lawmawm ka ti a, vawiinah hian lawmthu ka han sawi ve duh hrim hrim a ni.

Zaninah hian necktie te ka rawn awrh a, tih dan vak lovin, tukin zing lamah pawh khan ka sawi tawh a, ka sawi duh lem loh thin eng emaw issue keima chungchang a awm a, eng emaw deuha social media leh party ang te pawhin *organized manner* deuh te pawh hi a ni em aw ka ti a. Kei min han troll hrep hrepna thin leh eng emaw lai vel hi zanin chu sawi ve a thain ka hria a. Ka inawrh nalh bawk a, min hrethiam ula, ‘he House-a sawi chi a ni dawn em maw ni le’ kan ti mai thei a, mahse tunlai ngaihdam dil boruak zan vel atang khan thil hlui eng emaw han tihdarh vel te a awm a, thudik hi he House-ah hian ka sawi hi a hun tawhin ka hria a, ka nghak rein ka hria a, ka sawi duh a ni.

Kum 2014-ah tum loh leh beisei loh takin MP candidate turin opposition lam ten min han sawm a, a tirah chuan ka han nui mai mai a, mahse a kal chho a kal chho a, ‘party tinte kan inthural a lawm le’ an ti a, kan han ti chho a, ZNP erawh kha chu rilru chu an tihah rei angreng a. Tlai hnunawhah khan an rawn lut ve a, an rawn luh dan vel kha chu ka sawi lo ang. Kan han campaign a, chhim lamah kan kal a, Siaha kan va thlen khan, kan thianpa pakhatin, “Ngawi, Pu Robert, helaia campaign a lo kal hmasa te khan Mamit-a i thawh laiin i eiru Chiang niin an sawi a, sawifiah deuh te a tha ang a” a ti a, ka nui mai mai a, ka sawifiah dan chu ka sawi lo ang a. Kan kal kual zel a, Champhai kan han thlen chuan, “Pu Robert Romawia Royte hian Zawlnuam Police-a a thawh laiin sum a eiru” tih te kha a han ri a. Kan lo kir thla leh a, Serchhip kan han thlen chuan,

“Pu Robert Romawia Royte hian Zawlnuam Police-a a thawh laiin sum a eiru a, Police man a hlau a, a a der a” tih te a lo ri a. Tichuan, hun a kal chho hret hret a, thu eng eng emaw, ‘ek a cheh a; a ek a ei a’ tih te, ‘phul te pawh a ei a’ tih te, mak tak tak kha a awm a. Eng emaw deuh a awm hian he thil dawt muhlum chiang lutuk hi sawi leh thin a ni a.

Hei vawiinah hian, ka nalh bawk a, nui seng sawng chung hian ka sawi mai mai duh a. Kei chuan engah mah ka ngai chuang lova, ka chhungte pawhin engah mah an ngai lova, mahse mi-thenkhat rilru a na thin niin ka hria a, chu chu remchangah ka sawi duh a ni. Khatih lai khan MPSC-in CEO exam a buatsaih a, chutah chuan Pathian zarah toppe ka ni. Tin, khatih lai vel bawk khan Assam University-ah Ph. D zir turin University leh College lecturer eng emawzat te nen kan zuk interview a, kei chiah Ph.D zir tura thlan ka ni. (**Pu Nihar Kanti Chakma**: Pu Speaker, kha kha chu public meeting-ah hian sawi lo se; a windup nan hmang se.) Pu Speaker, ka duh tawk tep e, tunlai issue a awm deuh vang mai mai a ni, Ka lo sawi thui deuh mah mah pawh a ni mai thei; sawi tur tam tak ka nei ve a.

Hun a kal hret a, SSA Project te Pu F. Malsawma hunlaiin a lo chhuak a, a ni hunlai chuan thil tam tak kan ti thei lova. Hei, Pu Thangtea, kan senior minister a rawn ni chho a, State Planning team convener-ah te min han thlang ve a, kan minister-in a zir bawk a, khatih laia CM-in a zir te pawh a niang chu, India ramah ‘Education for All’ movement-ah Mizoram kha *India Today* chanchinbu-in pakhatna lawmman a pe a. Tichuan, Lal Bahadur Shastri National Academy, Mussoorie hnuaia ‘NIAR’ an tih, National Institute of Administrative Research-a national consultant tur national paper hrang hranga an lak dawn khan ka dil ve a, ka zuk interview ve vang vang a, chutah chuan Pathian zarah engmah ni lo kha, ‘tribal-ah chuan nangmah hi a tling masa ber i ni’ te min ti ve a, Joint Director rank a ni a. Khatih lai kha chuan, kan rank atang kha chuan a sang zawk a, mahse hei, Dr. R. Lalthangliana, kan Minister hian kan inah meuh lo kalin ‘kal lo mai rawh, RMSA project a rawn chhuak chiah si a, nodal officer-ah kan ruat hman si che a’ a ti a. Tichuan, RMSA project-ah kan han pakai chho a, India ramah RMSA-ah hian Mizoram hi sum hmu hmasa ber kan ni a, Model School leh Girls Hostel Scheme-ah pawh. Nagaland ten min han sawm ve a, Meghalaya-ah te kan han pakai chho a, ‘North East - *Man of the Year*’-ah te min han thlang ve a, *Time* magazine-in; India Vice President-in a tih khan, kan club kha ‘*Club of the Year*’-ah kan tang a. ‘*Sports Illustrated*’, khawvel a magazine lar berah pawh hian, ‘*Editor Choice of the Club*’ kha Union Minister hnen atangin kan dawng a ni.

Khang ka sawina chhan chu - mi diriamna te, mi hmuhsitna te ka tawng tam khawp mai a, kan thalaite, vawiinah hian ‘Youth Minister’ ka nih angin he House kaltlang hian ka ngen duh a - tumruh a ngai a, tih tak tak a ngai a, taimak a ngai a, ‘*a little extra*’ hi hlawhtling tur chuan a ngai a ni. IT minister ka nih angin social media-ah fake account hmanga mi beih vak vak te, kan CM zahawm tak te, kan Opposition

Group Leader zahawm tak te pawh hi an beih nasat pawl an niin ka hria, Pu Zoramthanga leh Pu Lalduhoma te. Hetiang hi *Sports & Youth Affairs Minister* ka nih angin tihzui zel loh hi a va tha em! Kan tribal society dang pawh hian hetiang vak vak hian mi an ti lo a nia. Chuvang chuan, vawiinah hian ICT budget sawi hova, ICT Deptt-a hmsawnnate kan sawi rual hian, ‘hetiang zawnga mizote hi kan kal zel chuan a tha lo ang a’ tih ka sawi duh a ni.

Sawi tur tam tak a awm a, mahse ka hnunglamah hian kan senior-te leh kan CM-in department tam zawkte an rawn sawi dawn avangin a tawi deuh zawnga sawi ka tum ang a.

Pakhatna-ah chuan, a lar bawk a, PMJVK chungchang hi hmannah pawh kan sawi tawh a, sawi leh tho a thain ka hria a, ka sawi tawh lo ang ka ti deuh a mahse ka han sawi leh tho ang e. PMJVK sum sanction tu hi Mizoram sorkar a ni lo; PMJVK-a sum petu leh sum allocation siamtu hi kan Chief Minister zahawm tak Pu Zoramthanga hi a ni lo; kan Council of Minister-te an ni lo; Govt. of India hnuai a ‘Empower Committee a ni’ tih hi vawiinah hian chiang deuhin hria ila. PMJVK-a Mizoram sum an rawn pek hi helaia ‘chula chu an ti si lova’lo tih mai mai chi a ni lo. Pu Speaker, nangmah kaltlanga eng eng emaw sawi thinte hi zawhna ka han zawt teh ang - Mizoram sorkar-a Health Deptt-in financial year tawpa sum a hman loh, K-Deposit emaw, *unspent balance* emaw, *unutilized money* tam tak nei ta se la, ‘Health Ministry, Govt. of India khuan PMJVK sum hi a recommend thei ang em?’ tih hi ngaihtuah zui atan ka han sawi mai mai teh ang.

Chawhma lam khan ka sawi tawh a, PMJVK hi ‘gap-funding scheme’ emaw, ‘gap filled-in scheme’ te pawh an ti a, chuti lo zawng pawhin ka han sawi leh ang a. Anmahni Ministry ngei pawhin sum hmang zo thei lova *money surrender* fund tam tak neite khuan PMJVK hnuai a states’ line department-te kha sum an recommend sak ngam ang em? “Engatinge nangmahni khanin *surrender amount* kha in state ngaih pawimawh chu in pek mai loh” an lo ti mai lo ang maw, empowered committee Niti Aayog te, Financial Ministry-a tel te khuan?

COVID second wave hnua PMJVK hming hre ve chauhin, a hre ber ni awm taka he House-a an sawi thin hi chu a dikin ka hre lo; a ken tel leh a procedure hi khirh deuh a nia. Minority Affairs Ministry khuan a rawn sanction mai theih emaw kan ti deuhin ka hria; chutianga a ni teuh lo. Sports-ah chuan Sports Ministry-in sum a nei lova, financial year tawp dawn lamah phei chuan sum a awm tawh lova kan buai kan buai thin. Kan hrat laka sum hi kan hmu ve mai mai ni pawhin ka hre deuh a. Sports project a lo thlen chuan, Sports Ministry a zuk thlen khan Sports Ministry chuan, ‘gap kan ngah si a’ tiin SAI-ah a thawn a; SAI-in Imphal-ah an rawn thawn chho a, Imphal atangin physical verification an rawn ti a; chutianga process thui taka kal a ni a. Project dang

ang deuha a ministry-in ama thua project approval board emaw, Grant-in-Aid committee-in emaw an lo sanction mai ang deuha kan ngai hi a fuh lo a ni.

Chu mai a ni lova. Kan State sorkarin Sports a ngaihpawimawh avanga Sports-in sum hmu ang lek leka kan han ngai thin te phehi hi chu a dik lo hrim hrim a. He PMJVK fund Sports Department lamin kan hmuh hian, hmanah pawh ka sawi tawh, department dang sum tur cheng khatmah a ei lo. Chuvang chuan, Sports Department atana empowered committee-in sum a rawn sanction hi tuna kan hman anga kan hman loh chuan, *guidelines-bawhchhia*, *dan-bawhchhia* kan ni zawk dawn a. A hmuh dan tur dik takin kan hmu a, a hman dan tur dik takin kan hmang a. Pathian khawngaihna zarah leh kan contractors leh kan department te zarah tun thleng hian PMJVK hnaah hian, ‘chulai chu a chhe deuh mang e’ tih tur hi pakhat mah a la awm lo a ni, cheng nuai 40,000 chuang hnaah hian. Pathian khawngaihna pawh kan dawng; he project hi Pathian pawhin mal a sawm tlat a ni. Chuvang chuan, kan thutna lamin a zir loh avanga pawng sa sawisel ringawt hi chu a dik lovin ka hria.

A tir te atangin a scheme hian Mizoram zawng zawng a huam lo hi dik lo ka ti ve em em thin a. IDMI scheme te pawh a awm a, minority scheme tho a ni. Mizoram zawng zawng a huam a, a chhan chu *25% of the population* kha kristian an nih chuan ‘minority area’ a ngaih a ni. Chutiang ni chung chuan PMJVK hian 90% te, 80% te Champhai District 90% aia tam kristian kan nihna te, Serchhip District phehi chu a aiin a sang maithei, PMJVK in a huam lo hi dik lo ka ti thin a, keipawhin meeting-ah te pawh ka sawi a, lehkha te pawh ka ziaa a. An guidelines siam that an tum pawh khan ka inrawlh thuk ve khawp mai. ‘Sports pawh hi rawn ziaa lang ve rawh u, chuti lo chu Mizoram-ah chuan kan fing hlawm lutuk a, sports-ah chauh thil an ti a nia’ te ka ti a; an nui nasa khawp a, chumi tum phehi chuan.

Tichuan, guidelines tharah chuan Mizoram pumpui a huam a, India ram hmun hrang hrang atang pawh khan ‘*minority concentration area* hrim hrim kha chu huam vek rawh se’ tihna kha a lo tam ve tho a, ‘tunah chuan Mizoram pumpui hi a huam ta a ni’ tih kha ka sawi ve hrim hrim duh a. Hetah hian hre lo zawkte chuan, ‘a sawi deuh hlek a ni ang a, an thil tih dan hi’ an lo ti mai thei ang em, tih tur khan thil a kal thin a, fiah deuh khan ka han sawi law law a nih chu.

Phullem chungchang hi tawite ka sawi duh a. Phullem hi Pu Speaker, kan opposition MLA pawh hian an bial atana an thil duh berte zinga mi a ni tlat a nia; ka hre ru kiau a ni. A chhan chu, thalaite duh leh thalaite mamawh hi a ni tlat mai a ni. Pawtawh deuh deuha inpuhna te a awm a, kan Health Minister zahawm tak Dr. R. Lalthangliana’n a bial Hnahthial-a phullem pah field a hawn tum khan, Hnahthial-ah hian phullem kan rawn pah a, tihian kan hawng hi a liam mai a ni lo; Hnahthial-a kan phullem project atang hian Mizoram sorkarin nuai tam tak a dawng a, chu chu hetia sum kan harsat zual

laia covid do nan te pawh hian a tha khawpin ka ring a ni. An lo report chhawn vel danah khan, 'Pu Roberta'n phul lem hi covid do nan a tha a ti' tih kha a awm a.

Engpawh nise, 100% central funding a ni a, kan sum hmuhna kha, nuai 670 lai a niin ka hria a, khata tanga GST leh labour cess kha chu nuai 60 nge, nuai 50 emaw lai kha a ni a. Chuvang chuan, Hnahthial phullem phah atang khan Mizoram sorkarin 'maktaduai tam tak' i han ti zawk teh ang, kalphung thar zia deuhin, maktaduai tam tak a dawng a, khang kha 4C atan te, 3C atan te pawh khan a tha tiu teu bawk a ni. Chuvang chuan, phullem chungchangah khalai te kha ka sawi ve duh hrim hrim a.

Tun kan sorkar chhung hian phullem hi Assembly zawhna-chhannaah khan 28 vel siam zo hman tur ang khan kan insawi a, mahse kan lo ti kim lo hret a, ngaihdam pawh ka dil duh a. UD & PA-in Siaha District-a a siam tur pakhat kha, siam tur dang kha chu kan collect khawm tho a, kha kha kan lo hmaih palh a, kha nen chuan 29 vel Pathian zarah kan siam dawn a, kan la duh tawh lo hle a, thalaite a tam poh leh hian demand a sang a. Tunah hian Lengteng tlangdungah leh Ngopa tlangdungah te phullem kan la phah lova, Hnahlan, Champhai North lamah te, khitah Melbuk lam, Burma border area-ah te, ka sawi vek seng lova.

Hmanni chu mi pakhatin minrawn phone a, Ngopa lam atangin, 'phullem a tawh tawh e; a tam lutuk' ti party kha chu kan khaw lamah chuanrawn zin chho suh se, kan lo um haw dawn; kan nghahhlelh teh lul nen an ti a. Zaninah hian kan thalaite mentality hi he House-ah hian 'kan tina nasa em aw' tihte hi rilruah a awm a. Chuvang chuan, mi chan tur hai then chuang si lovin phullem te thenkhatin an lo phah a, MLA te remhriatnaah te, kan Chief Minister remhriatnaah te an lo phah a nih kha chuan hrethiam ila. Mizoram budget atang tea thildang ti lova kan ti vak vak a nih chuan sawisel ila; mahse, pawtawh taka pawng sawisel thin hi chu kan thalaite rilru a na thin. Zaninah pawh hian Sports-ah hi chuan whatsapp group leh hengte hi a tam khawp a, an ti leh mur mur ang a, chung chu zaninah hian ka sawi duh a. Thalai ten kan la mamawh dana zirin phullem chu, kan sorkar leh turah te pawh ngai ila, EAP te an sawi ri bawh a, kan la phah zel dawn a nih hmel e.

GST leh labour cess chungchang kha kan sawi tel a. Department lamin an chhut dan chuan, GST leh labour cess te tunlaih hian a lutlo theilo a, a minimum rate 18% phei hi chu a lut ngei ngei lo theilo a, a aia tam daih pawh hi a lut thei a ni. Contractor-in pawisa faia GST a peka, vendors te leh cement zuartute, iron rod zuartu ten an hralhna atanga GST an pek bawh chuan leh contractor khan ICT te a claim lem lo a nih kha chuan GST kha 18% aia tam daih pawh kha a lut thei a, a tlem bera lut tur ang tuna lut tawh pawh hi a tam khawp mai a, Sports atang hian; department dang atang pawhin a tam thoin ka ring a, Sports bik atang hian ₹6,000 lakh chuang hi GST leh labour cess-ah Mizoram sorkar sumah a lut dawn a. 'In ti nasa' min ti a, tih nasatna lai area te pawh a awm a, hmabak ngai tam tak kan nei a.

Ka sawi duh chu - mithiamte kan han chhut tir a, an chhut dan chuan, Mizoram Sports Department hian kum 4 chhunga infrastructure siam nan hian ₹560 lakhs vel chiah hi Mizoram sorkar sum hi hmang tur kan ni an ti a. A chhan chu - GST-ah labour cess-a lut let kha a tam em avangin khatianga share kan han hman kha an rawn adjust a. Chuvang chuan, kan ti ve nual chung hian 'Mizoram sorkar sum chu kan hmang tlem khawp mai' tih kha kan sawi tel duh bawk a ni.

Tichuan, *Demand driven*-in kan kal tih kha ka sawi duh a. Tunah hian kan la tih theihloh tam tak a la awm a, Sports demand hi a sang tlat mai a ni. Kan Opposition member zahawm tak tak te'n in rawn sawi, 'contact sports duhsak' tih chungchang te pawh kha, nangni ang tho khan heng tihsak hlan hi kan nghakhlel khawp mai a. Sorkar sum pangngai bakah hian CSR atang te, Railways atang te pawh hian sum kan hmu thei ang a, kan ti a. Railways-Sports Board-a an hotupa te pawh kan ko chhuak a, Contact Sports Centre changkang tak Pu Valtea hmalaknain Ainawn Veng-a din kan tum a. Tunah hian source thum atangin sum kan chang mek a ni. Tin, 'Sports promotion lam kan uar lo deuh' tih kha ka pawm khawp mai a. Sum te kan nei lo deuh a, kan duh ang kan nei lova. Mahse, ka sawi duh erawh chu, 'Pathianin min hruai' ka ti a, kan Chief Minister ho hian. Kan sportsperson zawng zawngte pawh, tukin kha chuan a figure ka nei a, ka inchhawp nasa lutuk a; vawiin chu ka la urh deuh a, ka dahna ka zawng hmu leh ta mai lova. International medal hi tun kum 4 chhung hian kan la tam khawp mai a, National medal pawh kan la tam a. Zonal ang te te khan an then avangin sports promotion lamah pawh hian 'kan hotute an che tha thawkhat a ni ang' tih te rilruah a awm a.

Hmanni North-East Olympics-ah 'kan che tha lova, a hnuai lamah kan awm' tih te kha a dik khawp mai. Sports Association-te pawh kan inkokhawm ngat a, chuta an sawi chu a lo dik khawp mai a - Kan level a san tawh avangin, North East level competition ai chuan National level competition kal duh leh National camp-a awmte kha kohlet kan duh lova. National camp-a awm tam tak Mizote zingah an awm ve tawh a. Gold-medal pahnih-khat lek lakbelh ila chuan, pathumna nichho daih thei kan ni a. A la tur chiangsa, zung tanga kawih theih North East Olympic Games-a tel lo sportsperson tam tak an awm a. National Games leh National Championship lam hi kan priority-a ni tawh a. Chu chu 'mipui hian an hrethiam chiah lo a ni ang' a tih te an sawi a. Sportsperson, gold-medalist ngei ngei tur North East Olympic Games-a kal lo kha an lo tam khawp mai a. Kan result a that loh avanga chhuanlam siam hrim hrim ka ni lova, *fact of the case* kha kan hriat ve a tha a.

Tin, sports infrastructure hi, 'contractor-te hna pek duh vangin helam pang hi inphur lutuk deuh' tih ngaihtuahna sir leh eng emaw deuh te kha kan sportsperson-te hriat atan pawh a tha lo mang e ka ti a. Contractor-te chu ruat danphung a awm a, *restricted* pawh ni se established procedure-a awm a. Uluk takin restricted tenderer tur pawh kha kan department-te hian thlan dan tur an thiam ve ang tih kha ring ila, chutah

comparative assesement siam dan tur a standard te pawh fel tak a awm a. Tin, Works Advisory Committee, Minister-te kan va inrawlh theihna pawh ni lovah Finance Department te, Law Department te, allied department leh nodal department-te an lo awm a. Khangte khan a case a zirin presentation te an lo tih tir a. An work-done leh key-personnel an neih dan te tehfung hrang hrang awmin, chutiang chuan an lo ti thin a. Chuvang chuan, kan official-te hi i ring ngam ang u. Kan official ten works advisory system tha tak nei a, chung kaltlanga contractor an thlante hi a pawnga puia an hming avang te emawa he House zahawm taka an hming han lamchhuah vak vak te pawh hi kan la junior viau na a, Political Science student kan nih angin, tih ngailoh deuh niin ka hria a. Kalphung thar lam hian ‘kan uar deuh em aw’ tih tur hian, mimal leh company hmingte kan tiri bawrh bawrh zel mai a.

Ka pa min hrilh ka hriat reng chu “Assembly Session chu an thusawi hi a pawimawh lutuk a, mimal hmingte hi an sawi ri ngai lo reng reng; officer tha hi, award an dawng emaw te a nih loh chuan, an hming an sawiri ngai lo” a ti a. Pa te ring chi hi ka ni ve a, kha kha ka lo thanhnan a, ka lo mur uai uai a. Hmannia Lalnunsiami hming a han ri te kha, a pawhi hi ka ti lutuk a, sawiho ni hmasaah pawh khan ka hre reng a, ka chhang duh lo kha a ni a, mimal hming sawi ka duh loh avangin; khang kha kan sawilang tel duh bawka a ni.

Tichuan promotion lamah pawh member zawng zawngte in support-na kan ngen a, kan coach-te pawh an tha tawkin ka hria a. Residential leh non-residential training te pawh hi keiniin *in-house* veka ti kan ni. Chuvang chuan, tunah pawh hian hmun tam takah (Aizawl leh a chhehvel chauh hi kan mitthla thin a, Aizawl lo lam hi a ni kan chet natna zawk) association tha tak tak kan nei a, anmahni tawkah theihtawp chhuahin tan an la mek a. Kan pawisa neihchhun pawh a tlema tlemin ‘kan hmang tangkai viau a ni’ tih kha vawiinah hian ka sawi duh bawka a ni.

Hetia han khaihkhawm hian ka la tihthan loh deuhna hi a lang thin a. Supplementary Demand lai vel te pawh hi han sawi ila. (**Pu Lalduhoma:** Kan Minister khan PMJVK hi ‘100%’ a ti zeuh khan ka hria a...?) PMJVK ni loin, Pu Speaker, kan Opposition Group Leader zahawm takin a rawn sawi awm lai kha ka hre deuh a. Hnahthial field kha a ni a, ‘100%’ ka tih chu. (**Pu Lalduhoma:** Eng fund nge ni le chu chu?) NECS atangin a ni a, sorkar hmasain bul an lo tan tawh kha a ni. Sports Minister hmasa hi a awm lova, han fak te pawh ka duh viau a. An bul tan a ni a, Saitual nen khian. Mahse a scheme kha a tawp thut mai a, scheme a tawp kha chuan, kan hre vek a, tawplo thei a ni lova. Ka minister pawh khan ka hma hmasa ber a. Hetia scheme a tawpa, a chhunzawmna pawh siam lova central sorkarin scheme a titawp tawp thin hi ‘a diklo reng reng’ tih hi hman atanga ka ngaihtuah thin a ni a. Chutah chuan Saitual leh Hnahthial, tawp hlen tawh tura ngaih kha Delhi-ah te zuk kalin Pu Rathore-a, Union Sports Minister-a nih lai kha a ni a, (a ti ti thu deuh tawh maithei e..) uluk takin ka dil a, officer-te koin NECS-ah khan aligned ministry an nih angin authoritative takin thu a

ziak a, min rawn pek zawm leh a, kan lawm em em a. Bialtute pahnih - Pu R. Lalzirliana leh Dr. R. Lalthangliana pawh hi kei ai mahin an lawm ve vein ka hria; bial chhung mipuite pawh an lawm a. Sports chu khati chin kha ni phawt mai se la. A react lam kha chu nakinah tawi te tein, thusawi tawi ka thiam a, ka rawn ti ang.

Tourism hi a pawimawh khawp mai. Kha, in ngaipawimawh hlawm a, sawi pawh kan awm nual a. Budget Session hmasa wind up-na ah khan ka sawi theihngihlh tlat mai a, 'Peace Bonus' kha; ka sawi rei lutuk vang te pawh a ni mai thei a. Peace Bonus a awm chian zia leh a tak taka rawn sanction a nih dan te kha ka sawi ta daih a, khami tum khan. Vawiinah hian Tourism chungchang sawi ka duh a.

Hei, tourist lodge te hi 'an khuain an dil a' tih vel vang mai mai hian kan Chief Minister zahawm tak Pu Zoramthanga kaihhruai hi chuan kan sa na zen lova. Tourism atana potential a nih dan te uluk taka zirin, Tourist food form te thlirin Tourism Deptt. hian tunah chuan '*tourist attraction*' emaw, '*destination development*' emaw hi kan kalpui a ni. Tourism minister ka nih khan, (minister dangte pawhin an tih vek anih ka ring a), *Allocation of Business Rules* kan en hmasak ber a ni, official duty-ah chuan. a chhan chu - *Allocation of Business Rules* kan en chuan, 'sorkarin engti turin nge Tourism Department hi a beisei' tih lanna chu, '*Allocation of Business Rules*' a ni. Ka en khan ka lungawi lo ang reng a. State dang *Allocation of Business Rules* ka en a, sorkar hmasa khan *Allocation of Business Rules* siam that a tum lai kha a lo ni bawk a, a committee-ah khan kan duh dan te ka thlen ve a. Chair ka lak hmasak berna chu 2019 a ni a. He sorkar hian Tourism tihhmasawn nan *Allocation of Business Rules* kan siam tha a. Chutah chuan hospitality service lam te, hotel te, restaurant te, tunhmaa eng department subject mah a ni thin lo 'Tourism Department' ah kan han dah lut a. Chu chuan kori a tuh tak meuh meuh a, hlawkna tam tak pawh a awm a. Tunah chuan hotel registration pawh mumal tak - an standard maintain dan tur te, an chaw serve dan tur te, an inbuatsaih dan tur te, an room dan phung tur te, an grading system te, khatiang khan chi hrang hrangin tunah hian hma lak a ni a. Member zahawm tak tak te hi Pu Speaker, ka ngen duh nghe nghe a - Tunhnai hian Aizawl-a hotel hrang hrang hi tlawh kual ula; revolution a thleng a ni. An standard a tha tawh hlawm khawp mai a, kei pawhin ka lawm a. Hmannia Internation Tourism Mart (ITM) kan buatsaih pawh khan Govt. of India atanga Ricky team lo kal te pawh khan kan hotel neitute an fak a, vawiinah hian co-operation tha tak anmahni atang tein department-in kan dawng a. He House kaltlang hian hotel neitu zawng zawngte, restaurant neitu zawng zawngte chungah pawh lawmthu ka sawi duh a, an mi-thawhpuiinaah ka lawm hle a. Tin, keini lam atang pawhin, Covid lai te khan sum leh pai an harsatna an income te, khualzinte an awm lova, rent pek reng a lo ngai a, fee leh a bill te pek reng ngai kha, keini pawhin a theih ang ang assumption kan pek turte kha kan pe vein ka hria a; ka chiang chiah ta lova. A theih dan danin kan duhsak ve a ni.

Tin ‘*Mizoram - Responsible Tourism Policy, 2020*’ Covid khirh lai khan he *Dan* hi kan duanchhuak a, Council of Ministers-in min pawmpuiin, he House-ah ngei pawh kan pharh tawh a. Tourism development atan chuan a bul thut pawimawh tak, a foundation pawimawh tak a ni a. He policy avang hian Mizoram Tourism hi rahchhan neiin department leh sorkarin kan kalpui thei ta a. Tin, central sorkarah pawh ‘*responsible tourism policy*’ kan nei ta e; tanpui tlak kan ni e; tanpui ngam kan ni e; tanpui phu kan ni e’ kan ti thei ta a. Hei hi *game-changer* pawimawh tak, tourism history-ah a ni.

Tin chulo lehah chuan, *Mizoram Tourism of Tourist Trade Act, 2020* ah kan siam a, guidelines hrang hrang kan siam a. Hei hi Covid tangkaina tak pawh ka hria a. ‘Guidelines for Caravan Tourism in Mizoram’ tih te, ‘Guidelines for Tourmiteries and Hotels in Mizoram’ tih te, ‘Guidelines for Home-Stay in Mizoram’ tih te, ‘Guidelines for Co-operators in Mizoram’ tih te, ‘Guidelines for Mizoram Ticketing Cells in agent Tribal in Mizoram’ tih te, ‘Guidelines for tour-guide in Mizoram’ tih te, ‘Operational Guidelines for Registration of Restaureant in Mizoram’ tih te, ‘Operational Guidelines for Organizing Festival’ te leh duh dan dana lo organize ang chi te tan operational guidelines te kan han siam a, mi te pawhin an zawm tha a. ‘Guidelines for Recognition of Tourism Service Provider’ leh ‘Guidelines for Recognition of Tourism Service Provider Association’ tih te pawh kan siam a, mite pawhin an zawm tha a.

Tunah hian keimah mimawl ina ka ngaituah dan chuan - Tourism hi chak tak leh thui tak kal thei turin a legal foundation hi chu kan siam kimin ka hria a, ka lawm ve em em a; thawhpui ka nei tha em em a. Tourism Department-ah hian ICT leh Sports Department ang bawkin zaninah hian a point thlap thlapa tih dan hi ka thiam vak lova. Tourism Department-a ka thawhpuite, officer leh staff zawng zawngte chungah pawh salute ka pe a ni. **(PU C. Ngunlianchunga:** Pu Speaker, khawngaih takin Tourism a sawi lai khan, Bungtlang South ka bial ve a, sorkar hmasain tourist lodge an sak, Session-ah pawh ka sawi tawh a; kha kha he kum chhung hian ngaihsak a hlawh lo reng reng mai a. Khuti khuan, cheng tam tak senga sak khu an kalsan mai dawn nge; hmalak tumna te a awm ve em? Bungtlang South - tourist lodge sak zawh ti ti tawh, commission mai tura dah kha a awm ngaiin a la awm reng mai a, kha kha a chhan min han hrilhfiah thei se.)

Pu Speaker, Member zahawm tak Lawngtlai bialtu Pu C. Ngunlianchunga khan session hmasa lamah pawh khan a sawi tawh a. A rawn sawi kha kan lo ngaipawimawh khawp mai a, a hmunah a sawi hma pawhin thla pawh kan va la vek tawh a. Tin, tunhnai deuhah pawh hian a zawhna tur emaw, a siamthat ngai siam thatna tur emaw hi chu, ‘sum ngaituah ila’ kan lo tih mek lai a ni a. Tun financial year hian kan ti hman ang nge chu ka hre chiah lova, tihna tur chu kan nei a. Mahse, kan sorkar lai hian Pathian zarah leh kan Chief Minister zarah tha taka hawn theihin kan siam thei ka ring a.

Tourism hian vanduaina deuh kan nei a, sawi pawh pawl lovin ka hria a - Tourism Department-in tourist lodge a sak, Tourism Department-in minrawn hlan an tuma kan dawn duh loh hi a awm nual a ni; keimah ngei pawhin ka tlawh hi a awm a. Tuipang tourist lodge pawh kan dawng thei lova, 'kan dawng ngam lo' an lo ti a, term hmasa lamah. Chutiang deuh chu hmun dang pawh a awm a. Tunah Pu C. Ngunlianchunga, MLA zahawm takin a sawi pawh kha, khatiang chi kha nge nia, PICC scheme? A scheme tawp ta kha ka hre chiah lova, tunah hian ka sawi phak chu a nilo na a, SASCI sum hian a laklawh han chhonzawm te pawh a thei ang tih kha SASCI (Part-I) guidelines ah khan a awmin ka hria a, kan Chief Minister pawh ka lo sawipui dawn nia; kha kha a pawimawh tlat.

Tin, *Tourist Arrival* chungchangah hian, Covid hrilen lai 2020-2021 te khan Mizoram hi kan chhe khawp mai a, zep thu a cheng lova. Mahse 2022-23 ah hian covid len hma chiah 2019-20 khan mi 1,61,677, kan population atanga 14% *tourist foot fall* kan nei a, kan lawm ve em em a. A dawt kum 2 kha chu a beidawn thlak lutuk a, sawi tham pawh kan nei lova. Kuminah hian hei, thla khat zan a la awm a, chutah chuan mi nuai 1,83,099, hei hi *Tourist Destination* leh hotel atangin a ni a, reliable source atanga kan lak a ni a. Rawn lut satliah leh eng emaw chin kha chu kan chhiar lo mai thei. Hei hi kan lawm ve khawp mai a, 16.6%, kum a la tawp hmian kan nei a ni.

Tin, *Convention Centre Chite Veng*-ah kan sa a, a sanction amount chu ₹4,600 lakh a ni a, an sa chak khawp mai a, a work order ang chuan nakum lama zawh tur a ni a. Work-post hi execution agency turin kan ruat a,, an niin e-tender hmang ten an ti a, tunah khuan. Hman nia department hotute nen kan tlawh chuan, 'September thla ral hmian zawh kan tum a ni' an ti a, chhun-zan zawmin an bei a; Convention Centre tha tak Chite Veng-ah kan nei dawn a ni. He scheme hi a interesting khawp mai a, ka han sawi mai mai ang a. India ramah Mizoram chiah hi he scheme atang a sum sanction hmu kan ni a, tun hnaiah an sanction a nih loh chuan. An Joint Secretary pawhin nasa takin min congratulate a. Mizo nu-pakhat, Manipur lama kan unau, an Under Secretary a ni em aw, chu pawh chuan 'State dang hian dilna chang an hre miah lo' a ti a. Hei hi Central PSU kal tlanga sak ngai chu a ni a, 100% funding a ni a. A that em emna chu - an sak zawh hian Mizoram sorkarah min hlan ang a, kum 3 running course min la pe zui dawn ni awm tak a ni a, kan lawm hle a ni.

Tin, Beraw Tourism Resort saw Chief Minister hma laknain SASCI hnuaiyah ₹606 lakhs sengin kan sa dawn a; NESIT hnuaiyah, Reiek-ah ₹560 lakh sengin sak mek a ni bawk a; Khamrang-ah NESIT hnuaiyah bawk ₹800 lakh sengin, hei pawh hi 100% funding tho niin ka hria a, an sa mek a; Micological Park, Chakhei-ah ₹236.17 lakh sengin NEC atangin tender kan zo chiah tawh a, contractor tur hi an la thlang nge, ka hre lova. Tin, Samtlang, Tlungvel leh Reiek-ah kawng upgrade-na tur ₹601.25 lakh kan nei bawk a, hei pawh hi tender mek a ni a. Prasad scheme hnuaiyah ₹4,488.52 pawh hi 100% funding a ni a, tender mek niin ka hria a. Tin, 'Swadesh Darshan-II' an ti a, 2.0,

hetah hian Champhai District bakah Aizawl leh an surroundings atan hian ₹7,000 - ₹8,000 lakhs, *in principle*-a earmarked (approval chu a la ni chiah lo deuhin ka hria a), chu chu a DPR te siam mek a ni. Tin, Mini-Prasad scheme hnuaiah Sairang, Changsil Kai, Bethel Ministry hmunah leh Vangchhia-ah *Heritage & Religious Tourism* lama hmalakna atan ₹1,213 lakh kan submit mek baw k a.

International Mart kha hlawhtling takin kan thlengah kan inngai ve a. Chu chu a rawn kal te remarks kan dawn dan a ni a. Mimal anga lawmthu sawina te pawh kan staff ten an dawng nawlh nawlh a. Thil thleng khat tak a nih ka ring a, kan sawi mai ang a, a pawl lo ang chu maw; a lawmawm lam a ni baw k a - Tourism Department-a kan Asst. Tourism Officer Lalawmpui chu Union Secretary, Arvind Singh-a LO tura ruat kha a ni a. Amah khan smart a ti em em a, fel a tihna lehkha, department-ah min rawn thawn a; thil thleng khat tak pawh a ni mai thei e. Tourism Department-a kan officer leh staff-te hi ‘an smart hle a ni’ tih kha, chu chuan a tilang awm e.

Tin, online booking hmangin Thenzawl Tourist Lodge te tih tawh a ni a, a tangkai hlein ka hria a, hei hian eirukna te pawh a dal a. YUVA Tourism Club hi tuna Union Minister GK Reddy khan a ngaipawimawh hle a. Hei hi ‘*call tourism*’, a changkang hmasa ten an lo tih thin dan pawh a ni awm e; High school, College leh University-ah te ‘Yuva Tourism Club din tur a ni’ tih central sorkarinn a rawn thlen a, Mizoram chu a bawhzui hmasaah kan tang a. Tun ITM-ah pawh khan kan volunteers tam tak kha Yuva Tourism Volunteers te an ni a, central sorkar pawhin min recognised na pawimawh tak a ni.

Tin, nichina ‘tender mek’ ka han tih kha, covid te a ni tawh lo baw k a, ‘restricted tender lo pawhin thil hlauhawm a ni tawh lo ang chu maw’ kan ti a, ‘open tender’ in kan ti a. Hei hi kei pawh ka nghahhlelh ve thin a ni a, restricted tender han tih hi a tha em em tho a. Nichina kan Opposition Leader-in a sawi ang khan, ‘proprietary nature’ ang chi leh eng emaw ang chin, a chhangtu an tam loha ‘open tender’ a nih khan, a rate kha sang vak thei tho a ni. A chhan chu - an inthural a, ‘nang hei hi chhang la’ emaw, ‘30% *up* hian chhang teh ang; insiam rem teh ang’ ti emaw khan, a chhang tur an tam si loh chuan, open tender pawh hi remote area-ah chuan rate sang tak taka hna inpekna remchang a ni ve tho a ni. *Entirnan*: Nagaland chu rambuai a ni a, hna chhang duh leh hna chhang ngamte an lo tam lova, open tender-a an tih pheih chuan khata *schedule of rate* baka a sanna te kha an insem leh a; Khatiang chi kha thil awm thei tak a ni a.

Tin, covid lai pheih kha chuan, Pu Speaker, i vei lama mite pawh hi Minister leh CM ni ta sela, restricted tender thoin an kal ka ring a. Chutiang lova han tih vak kha, khatiang situation-ah chuan ngam awm loh tak a ni. Ka han sawi tum chu - tuna kan project 6, nuai eng emaw fe chu a ni ve a; kha kha open tender-in kan han ti tan thei a, ka lawm khawp a. Kha lam kha chu official lam mawh phurhna a ni a. An recommendation te ka hmu tawh nge, ka la hmu lo ka hre chiah lova. Chung hunah

chuan tuna contractor tha tak ten Tourism-ah te, PMGK-ah te tha tak taka hna an thawk ang hian, an thawh ve ka ring a ni.

He House zahawm taka membrete pawh, ‘in chhungkua tein riak thin ula; chawl thin ula’ tiin ka sawm duh che u a. A tak takah chuan *difference* hi chu a awm a ni. Kawng sira hotel leh restaurant te pawh improve tir vek kan tum a, an ei leh in dan phung te kan check a, kan la check zel dawn a, kan la ti tak tak hmang lova. Tourist Lodge phei hi chuan ‘brand’ a nei ve a. Chuvang chuan, in chhungkuain, in thiante nen pawh, in vei-vah changin; tunah chuan kan tourist lodge-te hi chawlhna tlak; hmanah kha chuan chawl turin ka sawn ngam lo che u ka ti a, tunah chuan ka sawm ngam tawh che u; sawm ngam tur che uin kan in setup-in, kan intitha tawhin ka hria a, kan tourist lodge-ah hian chawl fo teh u; ‘sorkar sum pekna chikhat a ni ve’ tih kha ka han sawi duh baw a.

Ka theihngilh hmain, information a rawn kal a - international medal hi tun kum li chhung hian 144 kan la tlat a ni; a lawmawm khawp mai. International medal, sports-ah. Tunhmaa Bhutan-ah te an zuk kal a, ‘international medal’ an tih ang khan kan chhiar tawh lo leh nghal a, federation kaltlang ngat, cross kaltlanga *international medal* kan lak kha 144 a ni a, *national medal* hi 233 kan la a, mahse kum 2021 khan kan *nil* deuhthaw a, a chhan chu - mi state-ah covid avangin inkhap baw mahse sports person-te, a bika phalna an pek ang chi kha kan state-ah kan hmu ve thei lova, participation kha a awm hlei thei lova. Chuvang chuan, covid te a reh chhoh chuan, sports lamah hian a infrastructure mai ni lo, a result-ah pawh hian kan tha chho zel ang tih ka ring a ni.

Tichuan, ICT ka la sawi lova. ICT hi a pawimawh khawp mai a, department te reuh te a ni a, a thawktu pawh an tam lova. Mahse, ICT hi ‘ngaihnep ngawt chi chu a ni bik lo’ tih vawiinah hian, ka pawr lutuk in ti mai thei a, mahse ka sawi duh a. Thil an ti nasa khawp mai a, an thupui leh, kei pawhin ‘chutiang zawng chuan inngaihtuah rawh u’ ka tih chu - “mahni tawh duah ai chuan, thawhchhuah tam kha a pawimawh zawk” tih hi an thupui ve a ni a. Minister ka nih ve hnu hian ICT-ah thawktu han inlakbelh te pawh kan chak ve a, mahse pakhatmah additional post, kan post neih sa bak hi post siambelh kan nei lovin ka hria a. Chuti chung chung chuan ICT-ah hian hmasawna tam tak kan nei ve a ni. A thawktu hi, sawi ang khan tlemte kan ni a, kan budget pawh ₹500 lakh kuminah hian a tling ve a, ‘a tam hle mai’ kan ti a. Mahse, kum kal meka kan supplementary demand kha in en chuan, supplementary demand-ah khan ICT hian ₹7,250 lakh nge, ₹7,700 lakh zawk emaw ni kha kan nei ve tlat mai a. ‘Thenkhat hi chuan supplementary demand-ah sum an inpek belh teuh teuh a’ tih te hi a ri thin a, hei hi sawifiahna remchangah ka han hmang ang a. ICT-in supplementary demand hmanga nuai ₹7,000 lakh chuang nge, a tlinglo deuh kan neih hi, kan thawh chhuah liau liau a ni. Tun financial year kal laia kan budget kum tira kan pass hnu khan theihtawpin kan officer leh kan staff-te an tang a, kei pawhin theihtawp ka chhuah ve a ni. Tichuan, central sorkar - PMGVK te, MEITY Ministry te, DOT atang tein sum kan hmu a.

Tichuan, financial year tawp dawn ruaiin ₹7,000 lakh leh tih kan hmu a, kan budget ₹494 lakh emaw lek nei khan sum hman tur ₹7,000 lakh leh tih (**Hon. Speaker:** ₹7,697.50 lakh a ni e.) Thank you, Pu Speaker. ₹7,697 lakh, supplementary demand-a kan han nei thei hi a lawmawm khawp mai a. Kan infuih thinna chu - kan budget estimate hi chu tlem mahse, supplementary demand lamah buk tum ang aw' kan ti thin a. Social media leh facebook velah mi thenkhatin 'supplementary demand te an ti vak vak mai a' an tih kha, hei hi an hre fuh chiah lo deuhin ka hria a. Supplementary Demand nei tam thei nih hi ka department 3-te hi chuan 'kan tum a ni' tih kha, vawinah hian kan sawi lang duh bawk a. Heng hi a takin kan implement chho mek a, tuna kan sum han hmuh tharte chuan district leh block headquarter zawng zawngte pawhin *5G service* an neih theih nan, a tul tul tih kan tum a. Tin, tih tur tam tak chhawp sa, sanction neih sa bawk si hi kan nei a Pu Speaker. Ka rei ta lutuk a, ka inthlahrung deuh bawk si a; ka hnunga mite an hraw si a, 'i budget tlem tlem nen, i sawi rei' min ti ang tih chu ka hlau angreng a.

Hei, thingtlang khua zawng zawng hi mobile signal pek vek kan tum; hei hi ka sawisual lo turah ka ngai a. Kan pek loh hi a tam tawh lova, tin, 'pek theihna tur provision kan nei a ni' tih kha kan sawi duh a. Hei hian Pu L. Thangmawia, Lengteng bialtu zahawm takte leh Er. H. Lalzirliana ten, 'khaw hnih; mobile connection la nei lo' an tih ang chi te kha a huam thei turah ngai ila. Tin, '5G' chu kan hria a, hmanni lawkah kan chief minister-in a hawng a, Jio pawhin 5G an nei ve tawh a, Aizawl-ah chuan; district dang pawhin an nghakhlel khawp mai a, keipawh minrawn phone zur zut a. Tunah hian department lamin an lo ruahman dan leh an lo plan dan chuan, tun kum *calendar year* kalchho mekah hian 5G connection leh 5G service hi (state capital chu a Chiang Tawh a,) district capital zawng zawngah tih kan tum a. Hei, 5G hi a pui khawp mai a; 1st October khan kan Chief Secretary Dr. Rehnu Sharma leh Pu Maringa, Senior Informatic Officer te nen 5G launch-naah khan kan zuk tel a, Narendra Modi'n 5G a launch-naah khan, Ministers Conference leh Inkhawmpui lianah hian ka tel ve fo tawh a, mahse 'a dang khawp mai' tih ka sawi duh a. IT Ministry leh IT Company lian ho chetdan kha, India Mobile Congress kha a ni pah bawk a, chu Mobile Congress - mobile related a meeting-ah chuan Asia-ah a lian ber a ni an lo ti thin bawk a, 'chungte chu ka hlawkpui khawp mai' tih kha ka han share chak che u a.

Tichuan, thingtlang khaw 500 ah *free wifi* pek kan tum a, a list te han siam nghal pawh ka chak viau a, mahse ka rawn inring chiah lova. Tin, state capital Aizawl atanga district zawng zawng leh block inthlunzawmna, '*digital super-highway*' hi kan siam dawn a ni. Truck tlanna lo tur highway te pawh hi kan chief minister zahawm tak ho hian kan siam zel dawn anih awm hi maw! Tichuan, RD Block 15-ah '*Village Knowledge Centre*' din turin sanction pawh kan nei tawh a, hei hi tunah hian tender process mek a ni. Tin, mipui ina an awmna hmun atanga awlsam taka an dawr theihna tur, 'Mobile e-Service Portal' changtlung tak kan buatsaih mek a, hei hian mipui nunah 'positive change' a siam turah ka ngai a, ka phur hle a ni.

Tin, Mizoram chhunga sorkar department zawng zawng information leh document dahthatna tur 'Cloud-enable State Data Centre' kan siam dawn a. Tichuan, 'supplementary demand-ah chuti chuan kan hmu tlat mai' ka han tih kha, hengah te hian sum kan hmang dawn a ni. Tin, minority area chhunga IT Skill Development and Training Centre hmun 7-ah PMJVK a tangin kan siam dawn bawk a ni. Hei, telecommunication lamah pawh hian hmalakna tam tak a awm a, 4G hi saturate vek tum a ni a. Tunah hian, hmanna ka sawi ang khan khaw 70 covered loh kan nei a, chu chu Tower 57 hmanga covered tur a ni a, hei hi rei tawh lo turah kan ngai a. 5G erawh hi chu ka sawi tawh lovang a.

Hei, point tam taka kan hotute hian hmalakna leh kan hlawhtlinna an rawn chhawpchuak a, mahse a rei zel loh nan ka sawi rei tawh lovang a. Tichuan Software Development lamah hian department hrang hrang hi ICT Department lam hian an pui thin a ni tih chu kan hriain ka ring a. Tin, 'kan budget a tlem' tih kha, a dik reng mai a. Mahse mi budget hian hna kan thawk ve nual tih hi ka han sawi duh a. Hei MSAC kan nei a, 'Mizoram e-Governance Society', mithiam tak tak an ni a, private te pawh hian an ruai a, private farm leh corporate farm te, tin sorkar te pawhin an ruai a. An hnathawhna hi kan budget ni lovin, State Department hrang hrangin IT leh software atan te budget an nei a, khang hmang khan kan thawktute hi an lo ruai ve thin a ni. Tin, M-Covid leh ICT te Covid laia an role pawimawh zia te kha chu sawi ngai lovin kan hre vek a. M-Covid nen lo kha chuan kan che thei lo; kha kha State dangte pawhin a tha an tih ve em em kha a ni a. Khangte kha *indigenously*-a in-house-a tiha ICT Department-in a siamchhuah ve liau liau kha a ni a.

A tawi zawngin, 'ICT Department hi te mahse, a thawhchhuah chu a lian a ni' tih hi a khaikhawmnan a thain ka hria a. A la thawk nasa dawn chauh; kumin chhoah phei chuan fund te kan han nei ta bawk a, nasa leh zuala tanlak pawh kan tum a. Kuminah hian project siamthar tur pahnih-pathum hi rilrua neih sa, kei phei chuan ka nei a. Hei, kan Session ang hian kan officer-te nen kan la ti ti hman lova. Project 3 emaw kan hmuh leh theih phei chuan, helaia 'a te, a te' tih hi 'kan ti lutuk deuh lo maw' kan ti leh mai thei a ni. Engpawhnise, kha kha ICT chungchang nisela. ICT chungchangah hian mi 2 lekin an sawi a, tuna ka chhanna kha a tawh tawh mai ang a, chhanna thatak kan department lamin an rawn siam a, ka chhiarchhuak lo mai ang a. 'Covered kan tum e, la covered loh khua te kha' tih kha a tawi zawngin ka chhanna ni sela.

Tichuan, member zahawm tak tak ten khunkhan takin in ngaih pawimawh te in sawi a, khang han react loh kha a chi loh ang em ka hrethiam chiah lova. A tawi zawngin han react kan tum dawn ang a.

Pu Zothantluanga thusawiah khan han react ngai lutuk a awm lova, a lawm turah hian kan ngai ve ringawt a. A chhan chu - Sairang field laih te, Phunchawng field laih te kha programme-ah tih kan han tum chho mek a. Tin, RR tihdanglam chungchang

erawh kha chu a pawimawh khawp mai a. Sorkarin sportspersons te tan Direct Recruitment, 'Permanent Direct Recruitment zawng zawngah 5% reserve tur' tiin thutlukna a siam tawh a. Department thenkhat an RR la tidanglam lo te, tidanglam hreh deuhte pawh kan awm a ni mai thei. Hei hi kan ziak tawh a, department dang zawng zawngah kan la ziak leh ang a.

He House-ah hian member zahawm tak takte, kan Chief Minister leh kan Dy. Chief Minister pawh DP & AR changtu a nih angin ka han ngen nghal ni sela - He thutlukna thatak mai sorkarin a siam hi a tak a chan theihnan 'RR siamthat ngai zawng zawng siamthat rawt ni se kan duh hle' tih kha ka sawi duh bawk a.

Tin, Tourism chungchanga Pu Zothantluanga rawn sawi kha, *a rana rana lo* deuh chu a la ni a, '₹1,000 crore' tih kha, nichina kan Minister Pu Thangtea'n a sawi ang khan, Home Ministry te, Defence Ministry te, External Affairs Ministry te Nitiyayog te, DONER te, Tourism Ministry te chuan min recommend vek tawh a. Finance Ministry - screening committee pawhin min recommend tawh a. PRF angin an kalchho ang a, PRF recommend zah a tang hian ₹1,000 crore chu min pek an tum a ni, kan qualified chhoh zel chuan.

Hetah hian ngaihtuahna ka nei a, he ₹1,000 crore-ah hian ₹720 crore kha central sorkar leh ADB inkara agreement tur a ni a. Mizoram hian loan kan puk ang deuh tea sawi a awm thin a, hei hi hriatsual palh a ni a. Central Sorkarin kan tan loan an puk dawn kha a ni a, A arulh ve tur kha tlem kan nei ve dawn tihna a ni. Mahse Tourism bikah hi chuan, Mizoram sorkarin sum pakhatmah a sen loha, Public-Private Farmership zawng emaw, management contract zawng tein emaw, Mizoram sorkar tum tur ai tuma, khatianga hotel te, resort te, amusement park te, khatiang rawn siam tur kha an awm nual dawn niin a lang a.

Hmanni Delhi ka kal hnuhnung ber khan Addl. Secretary, Screening Committee Chairman ni bawk nen eng emaw kan ti ti mai mai a. 'State share te hi kan tan a harsa thin si a, kan State share tum ai tum tur, hotel rawn din tur engemaw chi kha agreement te siam ila, a tha viau lo maw' ka ti a, 'kan duhthusam a lawm' a ti daih mai a; phalloh lam kha a awm lova. Chuvang chuan, Tourism-ah hi chuan miin sum an rawn invest duh dawn a. Kan Finance Department lam pawh lo luhai lutukna chi a ni dawn lo niin a lang a. Anih chuan, a takin a hlawhtling ngei dawn tihna a ni mai a, Private Company tena tourism lama sum an rawn sen duh kha chuan hotel lianpui pui emaw, building lianpui pui emaw kha a ding thlawndawn lova, a takin a *run* chho dawn tih a chiang reng a. Tin, 'kum eng emaw zat hnuah sorkarin a nei let leh ang a, a tha dawn em a sin' te min ti a. Chuvangin, 'ka phur viau a ni' tih kha EAP chungchang kan sawirual hian kan sawi duh a. Tunah hian ngawrh takin bawhzui zel a ni a, sum leh a sanction zawng zawng hi a ruala kan hmuh loh pawhin, eng emaw zat hmuh vat kan duh hle a. Kan

Chief Minister puih pawh kan la ngaih ka ring a, ani pawh min pui turin kan beisei a ni.

Hemi sawi rual hian, Sports - integrated project nena kal kawp a ni a. Sports-ah hian EAP atangin crore 1250, he meeting minutes-ah pawh chiang taka an ziah angin, kan han beisei bawk a. A pahnih hian ‘integrated’ a nih angin ₹2,250 lakh anih chuan, Mizoram-a sanction pakhat ‘Mizoram-World Record’ tur ni te pawh hian kan han hre deuh a, kan lawm viau a. Kan officers ten smart takin an umzui mek a ni tih kha ka sawi duh a. Heng hi a chhuah chuan, Lammual a ni emaw, Champhai District Sports Complex tih emaw te hi kan vei khawp mai a, infiam mitha an tamna a ni a, Khawzawl District Sports Complex pawh kan Dy. CM hian ka hnenah pawh vawi 2-3 a sawi tawh a, a hmun te pawh ka en tawh a; Saitual-ah te pawh hian an la nei lova, Darlawn lamah te pawh khian phullem hi an nghakhlal a, ‘mini sports complex’ ang chi kha a daih tam viau ka ring a. Heta tang hian kan sum dinhmun pawh nasa takin kan chawikangin ka ring a. A chhan chu - rullh ngai lo te a ni dawn bawk a, a thlawna ₹720 crore, ₹1400-1500 crore chuang a ni dawn a, ₹1500 crore chuang Mizoram-in a thlawna kan dawn chuan a tam tiu teu dawn khawp mai a, kan financial management thiam Chief Minister kan neihna hi a takin a lang zel a ni.

‘Financial management’ tih hi kan sawi the chawk a, ‘income management’ hi a pawimawh ber, financial management-ah chuan; a sum hmuh theih, a sum lakluhna hriat, a sum a tak taka lakluh hi financial management-ah a pawimawh lai ber, ka training ve thin lai pawha kan zirtirtu ten pawimawh an tih thin a ni a. Helai sawi lova, inrena zawnga financial management tih tum te hi changkanna hnuh-hniamna, ‘development holiday’ siamna mai mai a ni. Chuvang chuan, ‘sum hmuh tama hman tam hi, financial management-ah a pawimawh ber a ni’ tih kha ka sawi lang duh bawk a ni.

Tichuan, Sports bikah te phei chuan gaps hi a la tam khawp mai a. Thalai ten zanina kan thusawite pawh hi an lo hre dawn a. District 3 chauh kan han cover a, PMJVK atangin, ‘lutuk’ te kan member thenkhatin an han ti a. Ka sawi fo chu, kan thenawm hnai state ina stadium pakhat an sakna man pawh a la tling lo a ni; chuvang chuan, ‘lutuk’ hi i ti hma lo ang u. Kan thalaite an duh a sang ve tawh a, an thiamna pawh a sang tawh a, North East Olympics te pawh ‘helai ai chuan national camp-a awm a tha zawk; national competition-a tel a tha zawk’ an tih tawh laia, infrastructure tha an dawng tur dal zawnga Assembly House meuha kan thusawi pawh an association meeting dawnah te an print chhuah theiha, sports infrastructure sawi mawi lo leh sawi hnawng zawnga kan tawng thin hi chu ‘politically pawh hian a fuh lo thei ang em; November velah hian kan tuar mai ang em?’ tih te hi a hlauhawmin ka hria a. Chuvang chuan, Sports-ah hian rilru zau tak kan put tlan te pawh a ngaiin ka hria.

Chumai bakah ka sawi leh duh chu – Sports-ah hian sports-a tuilo te, takkaa rualban lohna neite, sports nuam ti lo te, hengte hi ‘kan VIP’ tur an ni. A chhan chu,

National Education Policy, 2020 kan en chuan, (a bu karawn keng ang ka ti a, a phok number nen lam khan ka chhinchhiah vek a..) *National Education Policy, 2020*-ah khan Sports hi wawi 30 tlawng a inziak a ni, a policy document-ah khan; in chhiar tawh hlawn maithei a, kei pawhin comment te pawh ka pe ve a, Union Education Minister-in a draft min rawn thawn khan. Chutah chuan ‘Sports hi school hour-ah pawh uar tur’ a ti tlat mai a ni, school pawn lam mai ni lovin. Kan ram hi ram changkang (develop country) ni tur chuan mihringte kan fit-a, mihringte kan productive-a, mihringte kan hrisel a pawimawh a, hrisel tur chuan ‘physical activity’ kan uar te pawh a ngai a.

Chuvang chuan, Sports hi perspective tharin, tarmit thar nen, Sports Minister ka nih ang hian MLA zawng zawngte hi thlir tur leh a *education aspect* pawh hi hmu thiam turin ka ngen duh che u a. ‘Sports is no longer co-curricular activity’ tih headlines hmang te khan kan chanchinbu lian ten an chhuah kulh kulh tawh a, kan lo chhiar ve nge, ka hre lova. ‘It has become a curricular activity, Sports hi ‘curricular activity’ a ni tawh a, ‘co’ kha an paih tawh a ni. Chuvang chuan, fapa mathematics thiam tak neih ai chuan, fapa fit tak neih te hi tunlai mite chuan kan chak tawh a ni lawm ni ti raw; a pahniha thiamte kha chu ni sela, a tha a. Chuvangin, helaia ‘Sports’ kan ngaihtuahnaah hian chutiang zawng chuan kan ngaihtuah ang a. *National Education Policy* perspective atanga thlir phei chuan gaps hi a tam lutuk a ni. Kan Education Minister zahawm tak Pu Lalchandama Ralte nen pawh kan sawi dun thin a, “committee te hi din a ngai em; engtin nge he policy a taka a kan tih hlawhtlin theih nan hian sports te nen hian kan tan ho ang” tih pawh hi a ngai a, chutiang zawng chuan ngaihtuahna kan hman a pawimawhin ka hria a... (*interruption*)

PU C. NGUNLIANCHUNGA : Pu Speaker, *Point of Clarification* - hei hi a din lai khan min han react sak lawk teh se, khawngaihtakin –

Kum 2021 August thla khan Sangau Tourist Lodge-ah kan lo hmuak a, party mi ten, chuta a thusawi chu, “tui chhak lamah hian bar thla a lo her ve leh hian JCB pahnih ka lo dah ang a, field siam that ngai zawng zawng leh laih ngai zawng zawngte thla khat chhungin kan thawk zo vek ang” tiin a sawi a, kan lawm a, kut kan beng dar dar a, tun thleng hian engmah tih a la ni si lova, hei hi ‘min lo zawh sak teh’ an ti a. Pu Speaker, khawngaih takin hei hi a sawifiah theih chuan a lawmawm khawp ang.

PU ROBERT ROMAWIA ROYTE, MINISTER: Awle, kan Speaker hi a zau a, *senior politician* te a ni a, zawhna, zawh belhna ni awm tak pawh kha, kan chhanna, session lo hmu tena an rawn message te kha a han zawh belh zel thei a, ka tan chhanna chance a ni a, ka lawm hle mai.

‘*Operation Mualzavata*’ tih hi kan pu style takin ka phuah chawp ve a, tunah hian fund te kan han zawng khawm ve a. *Operation Mualzavata* scheme hnuaih Pu Rintluanga bial Darlung-ah te, kan Home Minister zahawm tak bial Keitum-ah te an lai map map

tawh a. Tin, Theiriat field kha kan lo earmark sa tawh a ni bawh a, nichina zawhna kha, tunah hian Pu Valtea bialah hian kan ti leh dawn a. Chutah chuan, mimala thawh te pawh a ni ang a, CSR te pawh hi kan hmu dawnin ka hria a, a thal lai kha a ngai si a. Pu Ngunlianchnunga, Lawngtlai West bialtu-in a rawn sawi chhuah kha keipawhin ka la hre reng a, mahse tui chhaka field zawng zawng kha ka ti miah lo a nia; a field thlan bik kha a ngai a, thla khat chauh kha chance an nei dawn a. Thla khat chhung khan JCB pahnih kan dah ang a, a bialtu MLA, Dy. Speaker zahawm tak Pu H. Biakzaua phei chuan a nghakhlel tawh angreng a, mahse a kaisang tawh lutuk a, a hre zui zel nge ka hre tawh chiah lova; chu chu tih kan tum a, kan duh aiin kan tan tlai a. A chhan chu - Session te a lo ni nen, sorkar sum, SASCI atang te pawhin a awm thei mai thei a. MLA Fund, hei Pu Rintluanga hi chuan “JCB oil zawng ka tum ang” a ti a, a JCB hire-na kha keiniin kan tum ve ang a, sum tlem-te hmang hian kan han target chhin chu field 100 vel, khatia MLA tena eng emaw an contribution theih kha chuan a awm theih ang a; *Mualzavata* kan hriat reng theihna te pawh a ni ang a. *Operation Mualzavata* scheme kal tlang khan eng eng emaw chu tih kan tum a, chungah chuan Tuichhak kha kan tumte zinga mi a la ni reng a, a zawng zawng kha chu kan ti thei lo mai thei a, mahse, ‘tih ngei kan tum’ tih kha ka chhan theih dan ni mai rawh se. **(Pu KT Rokhaw:** Pu Speaker, khawngaihin nichina ka sawi - Siaha Meisatla playground gallery kha min tihsak thei dawn ta em? Tin, Lodawh Tourist Lodge kha, ‘*Castle of Beino*’ kan tih en tura kal tourist an tam thin a, chuvangin, nikum pawh khan tourist lodge kha ka sawi a ni a; kha kha min sak sak thei dawn em?) Awle, Pu Speaker, a mal mal khan ka react seng dawn lova, kan department atangin sawifiahna ka sem mai ang tih kha sawi ka tum mek a. Mahse, chhim lam hi kan party hi chuan kan ngai pawimawh a. Tin, kei pawhin ka ngai pawimawh a, *Sixth Schedule* area a ni a. Kei pawh sixth schedule hi M. Phil. degree ka lakna a lo ni ve a, chuvang chuan, an pawimawh zia hriain, han react a thain ka hria a.

Pu C. Ngunlianchnunga zawhna kha enge ni kha? E, Pu Rokhaw zawhna kha - Beino kha DPR kan submit tawh a, sanction kan la hmu lova, nuai 1000 leh tih lai a niin ka hria a. Tin, Meisatla field kha Sport Department-in kan la dawng lova, UD & PA leh kan Dy. CM zahawm tak ruahmannain Sports Deptt. kutah field siam zawh sa hi a rawn lut thin a, kan kut atangin District Football Association-ah emaw, District Sports Committee ah emaw te kan hlan chhawng thin a. Meisatla hi kan la dawng lo niin ka hria a, kan kutah a awm loh avang hian sawi thui a har deuh hlek a, Dy. CM pawh ka lo sawipui ang a. An district-a Football Association te pawhin an rawn dil tawh a, **(Pu KT Rokhaw:** A gallery kha a nia..) approach road pawh an ti; sak lai te pawh khan ka va hmu a. UD & PA sak a ni a, in hand-over a la awm loh avangin kan tan chuan ‘an la sa zawm zel dawn nge’ tih kha kan la hre thei chiah lova. Tin, ‘Lodawh’ tih kha, Bymari thlanga mi kha a ni lawm ni? Anih chuan, tourist lodge a awm kha maw le. Mahse, kan maintain tha lova, a chhan chu, khualzin an awm ngai meuh lo a ni, dik tak chuan; i rawn sawi pawimawh viau na a... **(Pu KT Rokhaw:** Kha kha chu Lomasu-ah a ni a. A awmzia chu – saw mi ‘*Castle of Beino*’ kan tih saw a entu pawh an tam a; mahse,

Lodawh-ah khan riahna tur a awm lova; churang chuan, tourist lodge min sak sak kha ngen ka ni e.) Awle, kan lo chhinchhiah phawt ang.

Touridge Lodge sak hi kan awlsam tawh lo khawp mai a Aa chhan chu - maintain hi kan zo lova, tunah pawh kan touridge lodge eng emaw zat chu privatize management contract hmanga tih turin decision te kan la a. Tin, a hmaa privatize dan ni lo deuh, ‘*improved version*’ ni thei turah kan ngai a. Chutianga tih kan tum mek lai chuan, ‘assessment leh zirchianna mumal tak nen lo chuan kan ti mai lo’ tih khan ka han react ni mai sela

Tichuan, Pu Lalduhoma, Opposition Leader khan PMJVK chungchangah khan a sawi ngai bawh a rawn sawi leh a, ani hi chu a zahawm em mai a, ka han sawi leh ang a.

PMJVK hi central sorkarin a sanction a, a *appraisal* leh *verification* zawng zawngte central sorkar ina an tih vek a ni a. Sports Department-a an lo pe tam deuh a nih chuan, central sorkar kha, ‘engatinge in pek tam deuh’ te zu ti ta ila, anni chuan, “*Dan* ang thlapa pe kan ni e; tunah pawh hian recommend sa kan nei nual a nia” an lo tih zawk ka ring a. Churang chuan, “lianham deuh te hi rawn dil rawh” te min la ti sauh sauh a ni. Khati khan a fiah mai em aw? Tin, a bak kha han react dawn chuan hun ka hmang rei tawh a, ka inthlahrung ang reng a. Aw, ka hrechhuak thut; din a ngai lo - West Tuipui bialtu zahawm tak kan senior MLA, ex-Minister, Pu Nihar Kanti khan, “ka bialah hian i ti ve reng reng lo mai a, MCA kan ni ve tho a” a tih kha, an vanduai khawp mai a, kei pawhin a pawh ka ti a, YCA leh Chakma committee te pawhin an rawn sawi ve a. Kan hmu dawn emaw kan ti a, Tlabung-ah ringawt pawh khan project lian deuh deuh pathum kan siam a, mahse, sawi leh sawi hnu, tun kum kal laiah khan a pawisa hmang tlem deuh leh eng emaw kha nichina ka sawi ang khan, utilization level hniam ang chi kha sum kha an pe ta lova, India ramah hian sum pek tet an nei lo em aw, tun current year-ah hian? Ka hresual palh mai thei e. Chutiang zingah chuan Tlabung hi a tel hlauh mai a, pawh ka tihpui khawp mai a. Mahse, hun thar a rawn inher chhuak zel ang a; hmachhuan dang - EAP te, *Khelo India* te pawh kan nei a, kan lo ngai pawimawh em em ang” tih kha ka chhanna ni sela.

Tin, ‘PMJVK sum hi Sports-ah te kan dah vak vak; kan hmang vak vak’ tih ang chi hi, a letlinga thil hriatna a ni a; kan hmanloh chuan *Dan* kan bawhchhe dawn. Churang chuan, Sports atana sanction a nih angin, Sport-ah hman a ngai. Tin, ‘department dang pawh chuti, khati’ tih kha a awm thei a, a criteria a khirh khawp mai. ‘Last financial year-ah sum surrender an nei em’ tih zawng zawnga han teh hian, Ministry khuan PMJVK atan hian State sorkar rawtna hi an recommend ngawt ngam vak lovang. A chhan chu - a committee-ah khan, ‘surrender pawisa te chu Mizoram sorkar kha in lo pe zawk mai lova?’ an lo tih te kha hlauhawm niin kan Joint Secretary khulaia awm, kan thianpa khan min lo hrilh a ni. Churang chuan, *Chengkawl lengkir*

tla ang vang vang DPR hi a tam mai a ni, PMJVK-ah hian. A tak takah chuan, 2019-2020-ah khan Health Department atang pawh hian tam tak submit a ni a Ttin, chhim lama kan school zawng zawngte pawh kha submit a ni a, mahse, a line-ministry lam atang khan *positive comment* a awm loh avngin PMJVK empowered committee khan an ngaihtuah thei lo a ni. Covid hri enna Lunglei – RT PCR chungchanga kan buai lai pawh khan ka zuk zin thla vang vang a, “Lunglei-ah hian RT PCR dahna in sakna tur min pe tel rawh u; health-ah pawh sum pek theih reng an ti” ka zuk ti a. Union Secretary pawh khan, “Sir, pek theih che u ka chak viau a; RT PCR te chu tunah Health ina sum tam tak an dahna a ni a, kan hre reng a; mahse engtin nge keiniin kan lo pek daih theih ang che u, ‘gaps’ a ni hlei nem” tih kha min lo chhanna a ni, tih kha kan fiah lehzuai nan kaa han sawi duh bawka ni e.

Session hi a a mak ang reng; lehkha tihbo mai te, kan senior te pawhin an ti a, ka sawi tur bu pakhat ka tibo daih mai a; sawi tawh lo mai ang. Pu Speaker, tikhan ka department chu ka sawi kim tawhin ka hria a. Hmanah khan ka department tourism kha ka sawi hmaih a. Min ngaithla a, ka lawm hle mai a; hun pawh ka la rei tih ka hria a; ka department sawi a tam a, rei ve pawh hi ka inthiam ve tho a ni.

Awle, Pu Speaker, ka demand te –

Demand No.	Purpose	Amount (in ₹)
22	Sport & Youth Services	25,37,23,000.00
43	Tourism	11,34,16,000.00
48	Information & Communication Technology	5,07,38,000.00
TOTAL		41,78,77,000.00

te hi, kum 2023-2024 hman atan ka rawn dil a, he House zahawm tak hian min pawmpui turin ka rawn ngen e.

SPEAKER : Awle, Minister zahawm tak Pu Robert Romawia Royte-in a demand te –

Demand No.	Purpose	Amount (in ₹)
22	Sport & Youth Services	25,37,23,000.00
43	Tourism	11,34,16,000.00
48	Information & Communication Technology	5,07,38,000.00
TOTAL		41,78,77,000.00

te hi House-ah pass a rawn dil ta a. A rem ti apiangin, ‘remti’ ti rawh ule. (**Memberte:** Remti.)

Rem tilo kan awm em? Rem tilo kan awm chuan, ‘rem tilo’ ti ula. (*Rem tilo an awm lova..*)

Awle, tunah chuan, Minister zahawm tak Pu Robert Romawia Royte hna chanpual –

Demand No.	Purpose	Amount (in ₹)
22	Sport & Youth Services	25,37,23,000.00
43	Tourism	11,34,16,000.00
48	Information & Communication Technology	5,07,38,000.00
TOTAL		41,78,77,000.00

chu House-in lungrual takin a pass ta a ni. (**Pu Robert Romawia Royte, Minister:** Pu Speaker, ka lawm e.)

SPEAKER : Tunah chuan, Minister zahawm tak.. (**Pu Lalduhoma:** Minister zahawm tak khan, demand a sawi tirh lamah khan ‘ek-ei’ tih chung chang kha a sawi a, kha khan kan proceedings a titawp dawn riau-in ka hre mai a.) Eng maw a sawi? (**Pu Lalduhoma:** ‘Ek-ei’ tih chungchang; thu diklo a nih phei chuan, a tan pawh record-a a awm reng kha a that ka ring lova, thil dik lova inpuh hreawm zia feeling kha ka share a; kha kha i nawt reh teh ang u a, a tawp em mai?) Hman lai proceedings kan en a, kum 50-na kan lawm pawh khan rumour kha awm a; kan minister leh MLA-te infiamnaah khan, ‘hnar satliah a nilo’ tih te pawh a awm ve kha maw le. A hlimawm laiah ngai mai ang aw. (**Pu Robert Romawia, Minister:** Pu Speaker, proceedings-a awm tura ka duh vanga rawn sawi ka ni zawk e.) (**Pu Lalrintluanga Sailo:** Pu Speaker, ‘Dampa-savawm’ tih te pawh kha a mawi lem dawn em ni?) Han hlim ve dar dar hi a nuam a nia. Kei pawhin Pu Roberta thusawi lai khan, ‘tihdan thar a nih hi maw!’ ka ti ve ta mai a nih kha.

Awle, Minister zahawm tak Pu C. Lalrinsanga, kan sawihona te rawn wind up turin ka sawm ang a, sawi fiah ngai a tih te rawn sawi fiah, a demand te house-a pass rawn dil turin ka sawm e.

PU LALRINSANGA, MINISTER: Pu Speaker, ka lawm e. Hei, a tlai ta sa sa, zanin chu kan bei nghek mai ang chu. Ani berina khatia a tih kha chuan a aia tam hlek chu a ngai dawnin ka hria.

Vawiin chu a lunglenthlak ang reng khawp mai a, ka ngaihtuahna a kal let a. kum 19 helaiah hian ka han thu ve ran mai a. Kan Home Minister hi Speaker niin, ka han ngaihtuah let a, kum 19 a lo ni ve der mai a. Kan Commissioner pawh khatih laia Committee Officer niin ka hria a, ka hre sual em aw. Chutiang chuan zaninah 8th Legislative Assembly budget session hnuhnung berah Pathian hruaina leh awmpuina changa ka ding ve leh ta mai te hi mumang te pawh hi ang deuh rum rum a. Kan hotute duhsaknaa he hun hmang ve thei ka nih piah lamah Pathian khawngaihna liau liau a ni te ka han ngaihtuah a, ropui ka ti a. Tin, chumi rualin kan Commissioner leh a hote session rip tak chhunga an chetna ka hmuh hian an hna lawmthu sawina tur hi, a lo

enkawl tawhtu ka nih vena laiah a awm vein ka hria a, chungte chu thuhma-ah ka han nei ve hrim hrim duh a.

React tur, ka chan department han sawi kha in awm ve nual mai a, react tur pawh hi a awm ve tho a. Amaherawhchu, kan react dawn chuan, eng emaw chen kha chu a ni ve deuh nual dawnin ka hria a. Chuvang chuan, ka react vek lo ang a, lekhain nakinah kan la inpe ve leh mai ang a.

Kan han sawi tlangpui leh a ram mipui pawh kan rilrua lian tlangpui chu – ‘Agriculture Department hian intodelh turin hmachhawp/hlen tur a nei’ tih lai hi department ang te, a changtu nihna ang zawng pawh hian mawhphurhna lian tak ka keng hian ka inhria a. Chumi zawnah chuan kan mawhphurhna hlen tura theihtawp kan chhuah chhungah hian kan tum ang tlang kan lawn mai silo laia hi hrehawm ve riau lai hi a awm a ni. Amaherawhchu, chumi chhungah chuan thil pahnih ka ngaihtuahnaah a awm a. Pakhat chu - kan Supply Minister pawh khan ‘buhfai lei tur kan nei lo’ a ti a, kan neih loh chhan kha dap a ngaiina ka hria a. Leilet lamah ka han dap kual a, a lo ni tak a. A bikin tunah hian kan *Rice-bowl* anga kan ngaih chu Mamit leh Kolasib bial te a ni a, chulaiah chuan ‘eng angin nge leilet kan enkawl’ tih te kan han enkual a. Amaherawhchu, a neitute thahnemngai tak leh lu-leta tang an lo ni lo tlangpui vek mai a ni. Hnam dang te an lo ruai a, anni khan an tharchhuah ang ang kha, *Entirnan*: phur 300 an thara phur 100 thar anga an insawi chuan, an insem tur kha chu phur 50 a ni mai a. A leilet neitu kha Aizawl lam mi a lo nih pheii chuan, a bak kha Silchar lamah emaw khulamah a liamthla ta vek mai lai kha thil awmdan phung a ni tih kan han hmu a, ‘hei hi chu siamthat a ngai a ni’ kan han ti a.

Chumi siamtha tur chuan ‘*collective farming policy* kan tih a ngai a ni’ kan ti a. Collective farming policy chhungah chuan FPO te a awm ang a. *Entirnan*: FPO emaw, FPC emaw kha duh chuan helamah entrepreneurship manner-in mechanization emaw leilet atanga a seng, a den chip thlengin kha khawl kha FPO te khan an in chhawp ang a, policy fel tak neiin khatianga kan kal a nih chuan, tuna kan neih ang saah hi chuan ‘eng emaw chen hi chu kan thar ang a’ tih kha rilruah ngaihtuahna a lo awm a.

Tin, chumi rual chuan tlangramah han thlek ve leh ta ila. Tlangram lo neih hi - lo kan vat a, ruah a han sur a, hilly-terrain (ram awih) te a lo ni a, leitha, leilung pawh hi a luangral nasa em em a. Tuna tang kum eng emaw zat hi chu la kal leh ta sela, tuna kan tlang shape pawh tidanglam thei khawp ruahtui kan ngah si a, kha kha thil awm thei a ni. Chuvang chuan, kan lei a lo thur a; eng ang pawhin han bei chiam mah sela, thingtlanga kut-hnathawktute hian tunhma tin khat hmunah khan tam an thar hleithei tlat tawh lova, an tan pawh hian phurawmna a bo a ni. Chumi tiphur thei tur chuan ‘engtin nge kan tih ang’ tih kha kan ngaihtuah leh ta a. Chu tak chu helaiah hian bul ka han tanna tur chu a ni ta a ni.

Engpawh ni sela, Pu Speaker, Agriculture Department hian scheme hrang hrang - Central Sector Scheme te, Central Sponsor Scheme leh Externally Aided Project (EAP) kaltlangin agriculture-in hma a sawn theihna turin hma kan la chho a. Tun kum 2022-23 ah pawh hian a kum hmalam a hmalakna kan chhunzawm kha sawi belh tur leh sawi thar tur hi a awm tlat mai a. Chuta pakhatnaah chuan - Chung tlangrama loneite chu an beidawna ruam atanga kan hnuhchhuah theihna tur atana pawimawh tak nia kan hriat chu, bio-fertilizer emaw, leilung tlabal tawh tih tui lehna tur kha kan tih a ngai a ni. Chutah chuan kum 2020 atangin hma kan la tan a, he project thar kan beisei hi OP12 - Bio-fertilizer Production Unit, Neihbawih-a tuna kan din khi a ni a.

Hei hi kan sawi tawh thin a, research institute pahnih - CSIR leh Northeast Institute of Science & Technology, Jorhat leh Department of Bio-technology, Mizoram University te thawhpuiin khang hmalakna kha kan han kalpui ta a. Tichuan, bio-fertilizer chi khat 'OP12 strain' an ti a, 'microbes' te pawh ti ila a dik mai a, CSIR leh NEIST, Jorhat in a lo duan a ni a. He project hi 'turn-key project' angin kan kalpui a. Hun a lo kal zel a, nikum November khan kan CM hovin a bial a nihna angin khilalah commission te pawh kan han nei tawh a. Tichuan, kan bio-fertilizer hi thla khatah metric tonne 5 aia tam mah siamchhuah theih kan inbeisei a ni.

Tichuan, a dawt leha chuan Pu Speaker, hei oil palm chingtu hi Mizoram-ah hian kan awm ve nual mai a, a bikin western belt, hmar lamah hian kan tam zual deuh a. Lunglei lam te saw chu kan han awm ve deuh na a, tlemin helam ai chuan a fem deuh a. Amaherawhchu, khatiang a eizawna atana hmang tawh tute an lo awm tawh avangin kum 2004-05 a bul lo tan kha, nikum khan National Mission on Edible Oil Palm (NMEOP) scheme hnuaiah oil palm hi chak taka kalpui chhawm a ni ve leh ta a. He scheme thar a lo chhuah hma, nikum hmasa te pawh khan a rah man hi ₹5.50/- emaw chauh a ni a, buaipui tham a man man deuh hlek kha an beisei thin a Amaherawhchu, sorkarin kan tihsak thei bik lova. Amaherawhchu, nikum hmasa khan cheng ₹4.50/- kha chuan kan han pun sak a, tichuan cheng ₹10/- ah kan han thutpui a, mahse rei kan ti thei chuang lova. Vanneihthlak takin sorkar laipui hian formula price a rawn siam ta a, *viability gap payment* leh north-east bikah *special payment* hmangin kan FAB te rate a bi a rawn thliah ta a, chutiang chuan ₹10.28/- in an hralh thei ta par par mai a, an lawm hle a. Tunah pawh hian tun hnai maia hemi scheme kan han tih hlawhtlina an han hralh hnu hian, metric ton 46,412 lai mai khulai Bukvannei-a an oil palm herna khawlah khuan a lut thla tawh a ni. Hei hi a lawmawm ang reng khawp mai a. Tichuan, Lunglei lam, chhim lampangah pawh oil palm enkawltu company tura an rawn ruat Patanjali Food Ltd. ten tunah Lunglei lam tan ruahhmanna an kalpui a, a herna khawl bunna hmun tur te pawh an en mek ni awm tak a ni.

Chumi rual chuan, Pu Speaker kan sawi belh duh chu - he thil hi mipuiaah inzawhna a tam em em mai a, 'a hlauhawm; hlauhawm loh; kan ram a zim si' tih te, tin, 'hei hian tui a heh a kan leilung tui a ei ral thei ang,' tia sawi te kha a awm thin a.

Engpawh nise, hei hi eng emaw thil tih kan neih a ngai a ni. ‘Oil palm chinin Mizoram-ah nghawng pawh leh tha lo a nei em’ tih zirchian tulin kan hria a, a zir chiang tur chuan nikum March khan study team - ‘pilot study on oil palm cultivation and its effect on environment’ tih chu kan han din a, chu study team a tan chuan, heng –
Convener - Senior Scientist and Head, KVK Lengpui, Mamit; Member atan-

1. Representative from ICR - Mizoram Regional Centre, Kolasib;
2. Representative from Deptt. of Forest, MZU Aizawl;
3. Representative from KVK, Kolasib;
4. Dr. Lalramlilana, Associate Professor Deptt. of Geology, PUC;
5. Professor John Zothanzama, Deptt. of Bio-Technology MZU.

Chutiang chuan an hnenah hian ₹6,61,000 sorkarin kan pe a, chumi hmang chuan study an tan chho a, engnge an finding chu kan hre rih lova. Amaherawhchu, mipuite phawklek deuha kan awm ai chuan, ‘heti zawng hian kalpui a tha e’ tih kha sawrkar ngaih pawimawh anih avangin, khati zawng khan ruahhmanna kan kalpui thu kha ka han sawi lang a.

Tin, 2014-a oil palm chin kan han tan khan, West Serzawl-ah khan oil palm seed garden ruahhmanna lo kalpui tawh a ni a, chu chu tunah hian central lam pawh hian min rawn hlutpui a, hmanni lawkah an hotute pawh an lo kal a. Chumi oil palm seed garden-ah chuan kan beisei dan chuan, tunah hian kung 2000 vel enkawl mek niin, ICAR leh IOPR scientist te’n uluk takin an vil reng a. Tichuan, kum 2025 - 2026 atangin oil palm chi siam chhuah theih beisei a ni a, hemi oil palm *sprouted seed* hralhna tanga sum lo lut tur hi kan han chhut dan chuan, sorkar tan pawh revenue income awm thei tur kha a lo ni reng mai a. Heng te pawh hi kawng leh lamah chuan helaiah bul lo tan tuten an lo tanna zelah rah duhawm kan neih theihna tur kawng kha, India hi oil-ah kan intodelh loh em avangin hemi oil palm hi a theih theihnaah tihpun a tum ringawt mai a ni. Tichuan, lo ching sa tawh te kan nih avangin, kan lamah an rawn bur bet leh chho ta deuh chu a ni a. Chutiang chuan North East - Sisters States ten an ching ve dawn a nih chuan, kan hnen atanga *sprout-seed* kan pek khan income generate na tur kawng nasa tak a lo inhawng ve dawn tihna nih chu.

Pu Speaker, a dawt lehah chuan, NEC project, Alu chi tha siamna tur project – ‘*Development of potato seed farm in quantity seed production through tissue culture and epical rooted cutting*’ tih ruahhmanna kan neih kal meka hi kan sawi fo a ni a, helai House-ah ngei pawh ka sawi tawh a. Amaherawhchu, kan promote chhoh ve zelna laite pawh khan han report te pawh a tul ve zel bawk a. Hei, India ramah hian vanneihna tak kan neiha chu, *aeroponic* system-a kalpui tur kha a ni a. Hetiang development project hi India ramah hian 40 a awm a, keini hi 41-na kan ni a. Eng emaw lai khan Engineer Sukinder Singh leh a thianpa lo kal kha ka room-ah kan inkawm a, anni beisei danah chuan, ‘North East Alu chi mamawhna zawng zawng lo phuhruk tum ula’ ti te pawhin min han chah ve kha a ni a. Chutiang chuan a technology hi *aeroponic technology*

hmanga siam tur kha a ni a. Potato mini-tuber kan siam chhuak ang a, ha technology *license fee* pawh pek ngai anih angin hei hi ICAR - Central Potato Research Institute (CPRI) Shimla nen agreement siam fel tawh a ni bawk a ni.

Tin, Alu chi dahthatna tur hybrid storage system - solar cum electric-ran cold storage system 100 metric ton capacity siamna tur RIDF NABARD atangin hmuh a ni tawh a, chu chu NABARD funding hmang hian a hmun-hma te siam remin hma lak mek a ni, Pu Speaker. Converge tur hian RKVY atangin sum te pawh kan han dah a. Tin, a technology a danglam ang reng a, cold storage hi 4-degrees centigrade aia a san chuan a chhawr mai theih thin avangin, chung enkawlna tur equipment atan ruahhmanna te kan siam a ni.

A dawt lehah chuan, *Modern Jaggery Production-cum-Training Centre* ICAR-IISR model Khawhlailung-a tuna kan din chhoh meka hi – tunah hian kurtai chingtute hmun hrang hrangah an awm ve a, amaherawhchu duhsak vek theih an ni lova. Mahse, Khawhlailung hi kan hriat lar leh ‘*Khawhlailung kurtai*’ kan lo tihna chhan te a nih avangin, tun tum hian duhsak takin khilailah khian, ‘Establishment of Modern Jaggery Production-cum-Training Centre, ICAR leh IIS Institute Model, Lucknow ten entrepreneurs development atan ruahhmanna an tihkal kha a ni a. Hei hi anihna takah chuan, ‘conventional method’ an ti a, tuna kan tih danah hi chuan - kan han her a, a thlengah, a thlengte pawh silfai mang lovin; kan herchhuah kha chanchinbuin emaw kan han fun a, furah phei chuan a tui pur a, khang kha a changkang lo kan ti a. Chuvang chuan, modern jaggery production system hmang hian loneitu tam zawkin kurtai fai leh thianghlim zawkte an siam chhuak thei ang a. Tin, heng kan kurtai chanchinbua tuam mai tawh lovin, FSAI certificate te te pawh Vandhan Vikas Kendra (DVK) ah an lo buaipui a. Society hnuai mite an ni a, chung ho chuan tun tumah pawh khan Pu Speaker, kurtai changkang ve khat tak chuan an rawn siam a, a funna te pawh changkang ve takin; tin, brown-sugar te pawh an rawn siam bawk a. Tam a ni lova, kan MLA zahawm tak tak te kan han pek diat diat che u kha in lo hmu turah kan ngai a. He project-in a tum ber chu - ‘Entrepreneurship Development hlawhtling tak, fu chingho ten an kalpui theihna tura hmalakna a ni’ tih kha ka han sawi ni se la.

Tin, tum danga kan hmalakna kal zela hlawhtlinna kha han sawi lan tulin ka hria a. Nichin khan, ‘engtin nge kan leilet te kan tih that ang; kan tlangram te kan tih that ang’ tih kal zelah khan thil dang entailed a nei a. Leh lamah chuan tun tumah hian kan vaimim chinah hian *fall-army worm* leh rodden (sazu puang) hian min tibuai leh hle a ni. Tin, climate change-ah hian rannung chi dang rawn piang tur hi a la awm nawk dawn a. Kan hotu thenkhat thil chik deuchte chuan khawiah emaw chuan an hmu tawh a ni. Chuvang chuan, tunah hian kan mamawh em ema chu, kan sawi fo thin, ‘Biological Control Laboratory’ hi a ni a. Lengpui-ah khuan hma kan la mek a, kuthnathawktute hma kan lak sakna kawngah a ei chhetu leh natna chi hrang hrangte a lo pun tak zel avangin, a venna tur a pesticide hrang hrang kan lo hman te hi tihlem a lo niha, thlai

thianghlim leh hrisel mipui ten kan ei theihna turin, NABARD funding atang hian Biological Control Laboratory, Lengpui-ah kan sa a. Tunah hian staff-quarter leh thil dang tul ang chu sa zo khat tawhah kan inngai a. Tichuan, he Laboratory hman hian Mizoram hmun hrang hranga loneitute hman theih tur predator leh biological agent a tam thei ang ber siamchhuah tum a ni.

Hemi chungchangah hian Pu Speaker, ka sawibelh duh a chu - nikum khan Bangalore-a kan research centre pui - Indian Council of Agriculture Research, National Bureau of Agriculture Insect Resources, Bengaluru kan zu tlawh a. An scientist Dr. Sunil Joshi, Principal Scientist & Head leh Dr. Ankita Gupta, Sr. Scientist leh Dr. Keshavan Subhaharan, Principal Scientist te kan zu hmu a, min lo dawngsawng tha em em mai a. Hei hi ka han sawichhuah chhana chu, tuna kan bio-agent ho, rannung kan thlai eichhetu eichhe let ve tur agent, rannung vek, chung agent te chu min hmuh tir a, a interesting em em a ni. Lengpui-a kan sak mek khu kan sak zawh chuan khung bio-agent hi kei pawhin heng scientist te hnenah pawh, “kan lokalna a hla a, churang chuan, heng hi min pe ve tur a ni; a pekin” kan inti a, nui vur vur chungin, ‘Ni e, kan inpe dawn nia’ te chu min ti a. Khang kha lei ralah chuan rin aiin a to em em dawn a. Tin, min pe thei anih chuan, helaiah kan vulh pung ang a. *Entirnan*: thil pakhat example ka han sawi ang a – *Vual* leiah a lo awm ta a, kha vuala kha *parasitoid* nge ni, ka sawi mai thiam ta lova, kha kha an va chhuah ang a, vual kha a va ei mai dawn a, *toxic* engmah hnutchhiah lovin. *Insecticide* emaw, *pesticide* emaw te chu han ti ta ila chuan, kha khan a that ngei ang. Amaherawhchu, *toxic* hnutchhiah a neih kha nakin zelah kan farmer-te tan a pawi thei dawna kan hriat avangin, tun tumah pawh hian biological control laboratory hi, climate change kal zelah hian ‘kan introduce a ngai hle a ni’ tih kha ka sawi duh a ni. Khang kan hmalakna te kha tunah kan zo tep a, kan zawh chuan, hawn mai theih dinhmunah kan ding a ni.

Tin, a dawt leha kan sawi duh chu - tun tumah hian RKVY rafter atang hian cold storage 14 lai lak kan tum a, chuta tanga 7 hi chu tun tunah hian tihfel vek tawh a ni a, SPAB pawhin min approve sak tawh a. A chhangtu hian a rawn install hun nghah mai kha a ni tawh a. Pu Speaker, hei hi i biala Khanpui-ah pawh kan dah dawn nghe nghe a nia. Anni khi, an *vegetable supply chain* a inlumlet tha em em mai a, pek tlak anni a. Tin, hmun dang kha chu ka sawi zel lo mai ang a, kan dahna tur hmun kha. Chutiang chuan a dang 7 dah belhna tur pawh la ruahman chho turah kan inngai a. *Entirnan*: Bazaar hmuna thlaithar an hralh mai theih loh, hawn leh dawna vuai mai thei ang te han dah lailawk nan te pawh tangkai tak tur a ni a. Churang chuan, cold storage hi kan tih bellh zel ang a. Tin, chutiang chuan solar dryer te pawh hi ruahmanna kan kalpui kha a ni a. Amaherawhchu, eng emaw khaihhlak hlek a awm a; heng te pawh hi la tih chhoh zel kan tum ang a.

Tin, kan sorkar, Pu Zoramthanga kaihhruai hnuaiah hian thilthar lawmawm em em chu – ‘ITC’ kan ti a, Hnahthial-a Integrated Training Centre - Basic Agriculture

Training (BAT) centre kha a ni ringawt mai, a chhungril tak tak zirna, diploma course ang ni lem lova khatia hunrei tak lo kal tawh kha a ni a. Amaherawhchu, kan sorkar hlim khan kan CM min duhsak a, hma min lakpuinain Council of Ministers-in diploma course zirnaa hlankaina tur min tih sak a. Tichuan, school changtlung tak, hostel leh thildang dangte pawh kan nei chho a, tunah hian zirlai 57, 1st year – 30 leh 2nd year - 27 kan nei nghe nghe a ni. Tin, kan rilruah chuan, ‘literal entry te pawh hi tihdan awm se la’ kan ti a, sawta an zir chhuah chuan B.Sc. (Agri) zawm leh theihna tur ruahmanna te kan dap a, kan hotute pawh chung zawngah chuan an inhlei viau a, ‘kan la ninhlei chhuak lo em’ tih erawh chu ka hre lova. Khatiang kha kan tum dan anih thu te kha ka han sawi duh a ni.

Tin, Agriculture link road hi kan hotute khan, ‘i khawngaihthlak em mai’ min ti a, khawngaihthlak em emah pawh ka inngai lova. A lehlamah chuan Pu Speaker, vaviinah hian ka sawi duh chu - sum hi a ni ber lova; a pawimawh ber chu, tunah pawh hian kan farmer-te hian hlawhtlin tumna thinlung tak tak neia hma an lak hi ka duh ber; chu chu a hlu ka ti. Kan farmers tam tak hi an revive tanin, harh thar lehna an chang tan niin ka hria a. Zan hmasa lawk khan message ka dawng a, B.Sc., M.Sc. rual hovin tuna Senram Zau, ‘Hualtu’ kan ti a, FOCUS hnuai, tuna social media-a darh chuai chuai ‘integrated farming system’ kan tih te khan inspiration a pe nge ka hre lova, chungho chu sorkara kal zel loha, sorkar hnathawh tur zawng zel lovin, farming leh entrepreneurship lama ke pen an duh a, ‘rawn kawm che an duh’ an ti a, min rawn message a. ‘A va lawmawm em ve aw’ kan ti a. Khatiang mi kha Aizawl leh hmun hrang hrangah te hian kan awm chho tan a ni.

A tawi zawngin - NABARD leh SASCI fund atang tein a ni mai ang chu, rigid pavement, RCC-flooring 15.63 km. te, link road thar atan 90.63 km laihna tur leh, lei (small bridge) siamna tur ₹1562.58 lakhs ruahmanna kan ti kal a. District hrang hranga kan link road laih te, rigid pavement leh PCC khanga hmalakna te thui tak a kal ve reng a ni.

‘Land Development’ te pawh kha in han sawi a, RIDF-26, NABARD hnuaiiah 2021-2022-ah khan district 8 chhungah land development, hectare 484.67 kan han ti a. Tun tumah hian land development leh PCC tur hi eng emaw zah chu kan hmu dawn a ni awm a, ri ret ret ka hria a. A theih chuan Delhi lama kan kal a ngaih ka ring a. Tun tuma MOS (Agri.) lo kal kha ka lo zui ve reng a, eng emaw te pawh kan han dil a, ngawrh deuha dil chin te pawh ka nei a. Chungah chuan KVK hi cabinet pawhin a pass tawh niin ka hria a, ka hriatsual loh chuan; Saitual-a dah tur a ni ang a. Champhai ta kha Khawzawl-in a neih tak avangin Champhai-ah te, Lunglei ta kha Hnahthial-ah an lak tak avangin Lunglei-ah. Tunah hian KVK sanction 3 rawn tifel tawhin, hun lo kal turah hian ‘a thar neih kan inbeisei’ tih kha he House kan hrilh ni se la.

Tin, Integrated Farming System, FOCUS hnuai hmalakna kha zawhnaah khan kan han sawi nual a, han sawi belhchhah duh chin ka nei a. Integrated Farming System - FOCUS hi a tira inception kan han neih leh a hmaa design kha Congress hun laia tih kha a ni tlat mai a, chu design chu phelh theih tawh si loh, annual work plan anga kal ngei ngei ngai ang kha a nih tawh si avangin, tun tum mid-term evaluation kan han neihah khan rawtna khawng deuh ka nei a - “Tuna kan kal ang hi chuan awmzia a nei lo; pawisa hi a baw ral ringawt dawn. Chuvang chuan, Integrated Farming System-a kan kal hi a ngai; structure fel tak nein kan kal a ngai” tiin, he Integrated Farming System hi kan kalpui ta a. Ka sawi tawh ang khan district 6-a khaw 20-ah hei hi kalpui kan tum mek a. *3-tier system* a ni a, chumi 3 tier-a a chherchhuan tin kha ‘product oriented vek a ni dawn a ni’ tih kha, a tawi zawngin ka han sawi a, Pu Speaker.

A dawt leha ka sawi duh chu - Agriculture hi vanneihna tak kan nei a, keimahni ngau ngau bakah hian extensional, min puibawmtu ‘ATMA’ kan tih - Agriculture Technology Management Agency te, KVK te, Samiti te hian kan farmers te zirtirna an lo pe a. ATMA te phei chu district tinah kan awm darh a, thildang pawh an ti a, ‘seed village’ te siamin hma kan la a, seed production hi kan tih a ngai a ni. Chumi a nih loh chuan Silchar lam atanga lo chho hi *hybrid* a ni emaw, a ni lo emaw a dik lo. ‘Keimahni tharchhuah ngei, keimahniin kan ching tur a ni; chutiang ching thei tur chuan tan lo la rawh u, farmers te nen lo in tied-up rawh u’ kan inti a. Quintal eng emaw zah tunah pawh hian an thar a; la bo (extinct) mai tur te pawh kha kan han chin pun tir leh a. Tunah hian *la-up* kan neih kha kan inzawn tir leh a, an la hmu mai lova, heng *la-up* te pawh hi mizote tana danglam tak a ni a, kan nei variety ve hrim hrim a; chung te pawh chu ka sawi duh a.

Digital Agriculture chungchangah hi, Bangalore-a Minister meeting kan neih khan kan sawiho viau mai a, kan kal chho thei a nih chuan hetia kan ngaih ai hian agriculture development leh improvement tur hi thui tak a la awm dawn a ni.

A dawta ka sawi duh chu, ranchaw siamna hi. Tun tumah hian SEDP atangin ranchaw herna khawl kan Mizopa siam ngei kan leisak a, district 11-ah kan thawn darh a. RKVY atang hian a dang 200 bawr vel siamna tur chu ruahmanna kan kalpui leh a. A nihna takah chuan, khang khawl kha thawn darh lo ila chuan, helaiyah hian a grain, Vety feed mill-a hralh tura rawn lut khawm hi chu a awm nualin ka ring a, mahse khawl kan pek hian a lo lut tura kha a lo dang ve niin a lang a; chutiang chuan district tinah ranchaw siamna khawl din tura ruahman a ni. Falkawn-ah kan nei a, bekang herna khawl kan bun dawn a, a bulah ranchaw herna khawl bun tel turin ruahmanna kan kalpui a ni. Hengte hi kan ti hlawhtling chho a nih chuan, hemi tlangdunga ranchaw mamawhna phuhru thei tur a nih rualin, farmer-te tan pawh an thil tharchhuah an hralh theihna tur, ‘*chain development*’ kha a kal dawn a ni.

Tin, nimin khan kan sawi tawh a, mizo-chili metic tonne 7.5 USA-a kal tur kan tih kha, a leitu tur company kha PGA, USA, Nevada a ni a. He company hi an curious em em a, hmarcha quality tehna pawh kha (ka rawn print ta lem lova) thui deuh mai a ni a, *arcadic* a tel leh tel loh bakah thil dang chi hrang hrang tehnaah khan kan hmarcha kha a *free* a ni. Hei hi ‘Pathian malsawmna liau liau a ni’ tih ka sawi duh a.

Tin, market port chungchang hi sawirik a awm deuh a. Tin, ATMC Act hi hman ngei pawh kan duh a, term tirah khan. Mahse *farm law* chungchangah khulam an buai avangin helaia lo kal ut ut kha a remlohna chin a awm a, kan han ngaichang deuh a. Duh danah phei chuan ‘Agriculture Produce & Livelihood Marketing’, a thlai lam mai ni lo kan ran vulhte pawh tel se ti zawng khan ti ila kan han ti a. Amaherawhchu APMC Act hnuaiah hian market board kan din ang a, kan market board-in hma a lakna tur hi tun kan sorkar chhung hian chak taka kalpui hman a nih ka la beisei a ni.

Ka sawilan ve leh hram duh chu – ‘*International Year of Millets*’ an ti a, hei hi thil thar a ni a, keini Mizo-ah hi chuan a thar chu a ni na a, buhtun a faisa hi a ni a. Asia khawmualpuiah hian China hi millet thar tam ber a ni a mahse tunhnai khan India hian a khum ta tlat mai a. Chumi changchawi chuan United Nations chuan India ram ngenna angin, 2023 hi *International Year of Millets*-ah a puang a. Bangalore-ah pawh kal turin min rawn sawm a, mahse khatih lai khan kalna hun kan nei meuh lova. Millets hi chi tam deuh, chi 12 lai a awm a, *nutritional value* sang tak nei a nih avangin kan chin pun a pawimawh a. ‘Nutria-cereal’ tih te pawhin an lam a. Tui a mamawh tam lova, hmun rovah pawh a chin theih a. Millets hian mihring tan chaw-tha a pai tam hle a, Vitamin B - Calcium, Iron, Potassium, Magnesium, Zinc etc te a pai a ni. Tin, millets hi *gluten-free* a nih mai bakah, *glysemic index* a hniam bawk a. Hei vang hian thisen-sang, zunthlum leh natna dang tam tak neite tan chaw tha tak a ni a. Buh ei tlema millets lam ei tam hi tunlai medical thiamna lamah chuan ‘a tha hle a ni’ tih hriatchhuah a ni.

Pu Speaker, tuna Mizoram-a hma kan lakna chinah chuan ‘*State Level Inauguration Programme Sixth*’ kha 16th January khan kan nei tawh a, digital leh print-media hmangin *awareness* tunah hian kan kalpui mek a ni a. Hmun hrang hrangah hoarding/signboard lian dah a ni a, training programme leh awareness programme pawh kalpui a ni bawk a ni. Kha kha hetia han kal liampui mai ai chuan ka han ti ri leh a ni.

Irrigation-ah hian ka han lut ang a. Kan budget estimate Agriculture leh Irrigation hi nikum ai khan kan hniam ve ve a, mahse, ‘a san leh a hniam lamah kan buai vak lo’ ka ti tawh kha. A pawimawh ber chu - kan thawktute, Agriculture-ah phei chuan central sector scheme leh SSA hnuaia kan scheme neihte hmang hian thil tam tak kan thawk ve tho a ni. PMKSY – ‘*Har Khet Ko Pani*’ an ti a, Surface Monitoring Scheme-ah hian 45 thawh zawhna tur project tharah 36 thawh tan niin, chumi atan chuan ₹4,000 lakh kan nei a. Ground Water Irrigation-ah hian project 13 kan nei a, tun financial year chhung hian thawh zawh vek tum a ni. Heng project-te hian agriculture development tihdanglam

dawrh thei thil a thleng thei dawnin ka hria a. Hmun hrang hrangah kan han verh a, Pu Thangtea hi a bial a vannei khawp mai; South Vanlaiphai-ah 14-15 vel bawr lei hnuai kan zuk verahh khan, 13 vel a hlawhtling tlat mai a, kan hmang tangkai viau dawn a ni.

Tin, *Flood Management Programme* chungchang hi ka sawi duh a. Hmun hrang hranga tuilianin leilet zawl kan neihte a tihchhiat zel venna tur ‘Anti-Erosion Scheme’ kalpui a lo ni tawh thin a. Tlang ram kan ni a, ruahtui kan ngah si a, chuvang chuan, hmun tam takah hetiang scheme hi kan mamawh a ni. Chuvangin, *Anti-Erosion Scheme* thar kalpui turin budget-ah hian ₹500 lakhs dah a ni a. Budget piahlamah hian thil thar ka sawi duh chu - Brahmaputra Board atanga hma la turin ruahmanna siam a ni a, hmanni lawk khan Brahmaputra Board Chairman hnenah pawh lehkhah ka zuk thawn a, tunah hian *Spring-set Project Management* pahnih approved sak kan nih bakah, *Anti-Erosion Scheme* pawh hi min approve sak kan beisei a ni.

Tin, PM-Kusum chungchang hi, MNRE hnuaiyah PM-Kusum Component-B kalpui tura hmalak a ni a, he scheme hnuaiyah hian loneitute solar panel leh pump subsidy pek tura ruahman a ni. A hma khan unit 200 kan nei a, khata tang khan nikum khan MNRE-Minister, kan Unioin Minister RK Singh pawh, a matching share leh a vendor-te lo kal theih loh avanga harsatna kan tawh te leh thil dang dangah khan ka zu hmu a. A tirah phei chuan min manganpui deuh a, ‘in awmna a hla si a, Myanmar adjacent in ni si a’ ti a. ‘E, ngawi rawh, chutiang a ni mai lo. China nen a sin kan in adjacent; chuvang chuan Mizoram-ah khian development hi kal luai luai sela, China hian chumi phe vut vut chu lo hmu se ka duh a sin’ ka ti kha, a nuih a za angreng khawp mai a, a lawm angreng tho bawk a. Chutah chuan a matching share, a *pro-rata* pawh hi tihdanglam te kha min duhpui hial a. “Engpawh ni se, haw chho u la, khitah kan finance minister hi 90:10-a ti turin rawn ti u la; ka hnenah rawn ti bawk u la. Chutiang chuan theihtawp kan chhuah ang a. A matching share kan tihdanglam theih chuan khilaia a vendor-te tan pawh rawn kal a awlsam deuh ang” min ti a. Amaherawhchu, kha kha thil harsa ve deuh tak chu a nih ka ring a, Union Cabinet-in a resolve loha thil kal thei lo a nih ka ring ta deuh a. Heti hian vendor tur thlanna contract, a *bidding rate* te pawh an rawn ti chho a, kar lovah kan hlawhtlin mai theih pawh kan inbeisei a ni.

Tin, JICA Project hi Pu Speaker, tun kan budget piah lamah hian Irrigation & Water Resources Department chuan central sector scheme leh scheme dangte pawh kan kalpui mek a. Japan International Co-operation Agency (JICA) nen hian kum eng emaw zat kan lo thawk ho ta a. Anni nen hian *technical co-operation* project kalpui a, he project hi kumin March thla hian a lo tawp dawn ta a. Japan mi thiamte hian he mi chhunga ei leh bara kan intodelh theihna tura tana ruahmanna min siampui a awm a. Sustainable development kan neih theih nan kalphung thar, tuna kan kalphung thlak dawrh thei tur ang ruahmanna kha an han duang a. Chu chu ‘JICA - *Sustainable Farming System* (JIFAS) tiin kan ko nghe nghe a.

He kalphung thar hnuaiah hian block, department leh State level-ah te committee inkhaidiat mumal tak a awm ang a, a lu berah hian Chief Minister tur a ni a. Hei, kan CM zahawm tak nen pawh hian kan sawi dun a; file te nena um zuin, ani hian min khai khawm ang a. Chutiang chuan he JIFAS hi kal tur a ni a. *Bottom-up Approach* hman a ni ang a, planning stage-ah loneitute nen *need-based assessment*-in uluk taka tih thin a ni ang. Tin, Conversion Planning, Agri & Allied hnuaiah hmalakna awm zawng zawngah line-department te leh Irrigation & Water Resources Department te inrawn khawmin ruahmanna siam ho thin a ni ang a. Line department tin ten CSS leh scheme dang kan neihte hmangin *conversion activity* kan kalpui ang a. Hei hian transparency a siam bakah duplicacy a tibo thei dawn a ni.

Tin, ‘right activity at the right time’ tih a ni a kum khat chhunga hnathawh tur annual activity plan fel tak, mumal tak duan angin a hun tak zela thawh zawh a ni ang. Hei hi a tak a thlenna chu manual-a titu leh saw laia enkawlina hnuai ngeiah pawh thil dang ti lova, a *timing* dik taka an tih khan a thar (yielding) kha a hlawk tlat mai a ni. Chu technology te pawh chu thil ho te angin a lang na a, amaherawhchu, thil thuk tak ni hian ka hria a, project cycle management thlirlet leh, a tha lo laite siamthata ruahmanna mumal tak siam thin tura ruahmanna kalpui a ni dawn a ni.

Tichuan hei, ODA loan chungchang hi Pu Speaker, ei leh bara Mizoram a intodelh theih nan JICA hnuai Japan mi thiamte hian *master-plan* min siamsak a. He *master-plan* hlawhtling tura sum mamawh te hi kan neih tawh loh avangin, ODA loan dil a ni a. Tunah hian a tul ang te tih fel thawkhat ni tawhin, thehluh tura ruahman mek a ni. Hei hi ‘*Land & Water Resources Development & Management Project for Livelihood Improvement in Mizoram*’ tih a ni a, sum ruahman zat chu crore ₹628.18 a ni.

Tin, thawktu indaihlohna laite pawh inrawn tarlang a. Heng hi kan han sawi ri ve tho thin a. Amaherawhchu, kan sum dinhmun a zira nei a, nei lo kan nih zel tho lai pawh a awm a. Ni e, sum te pawhin ziaawm lam a pan chho zel ang a, chung hunah chuan kan la neih hun te pawh awm chek turah ngai ta i la.

Cooperation-ah hian tlema zawng han tarlan duh ka nei bawh a, Pu Speaker. Hei, phok khat emaw lek chhunga mi hi a ni a. Cooperative Movement pawimawhzia hi helaiah ngei pawh hian ka sawi thin a. Ram changkangte changkanna chhan hi ‘*Cooperative Concept* a ni’ ka ti thin a. Chumi ruali chuan ‘Ownership’, hei, wawiina i ding lam leh vei lama mite kan han debate bar bar kara ka rilru a lo awm chu, khawi lai atangin nge ni aw, ka Chiang ta lova. “Politics-a va inkheuh tumna zawng ni lovin, a tha tura hi chu, ‘a tha’ i ti zel mai ang u. Khatiang lo kha chuan kan kal zelna tur, kan politics kal zelna turah hian thil hi in-um-elh kal reng kan siam dawnin kan hria a ni” tih kha. Kha kha a dikna lai pawh awmin ka hria a.

Hei, i vei lam leh ding lam te hi, lehlamin ‘a dum’ an tih chuan, lehlamin ‘a var’ tih tum tlat ang deuh zawnga ngaihtuahna te pawh kha a awm thin a. Amaherawhchu, hei, vawiin niah, tun Session chhungah hian lungrual taka Private Member’s Resolution kan han pass thei te kha a lawmawm ka ti a.

Tichuan, hei, Mizoram-ah hian Primary Cooperative Society 1179 a awm mek a, Cooperative Federation 12 a awm bawk a. Heng cooperative society te pawimawhna hi kan hre tawk zo lo fo a. Tin, thingtlangah hian heng kan society, consumer society kan neih te hian thil an zuar a. a man tlawma mi harsa zawkte pawhin an lei theihna turin thil a tlawmin an zuar a. Chung chuan nasa takin thingtlangah mi-harsate harsatna sutkianna hmanruaah Cooperative Movement hi kan hmang a ni.

Tin, chutih rual chuan, ka lo la hriat ngai lutuk loh thil lawmawm deuh chu, sorkar-a revenue kan chhun luh hi a lo tam hle mai a, ka awih ang em aw ka ti a; ka la chhutchianpui chiah lova. Primary leh State level-a kan Cooperative Society te hian sorkarah chhiah tam tak an chhung lut reng a ni. Heng an revenue chhunluh a tam zawk hi department kaltlang lova anmahni society atanga Taxation Department lama chhunluh a nih vangin Cooperation Department ina revenue a chhunluh hi tam angin a lang lo mai chauh a. Kumtin hian kan revenue chhunluh hi department budget estimate ai hian a tam deuh zel thin a. Hetiang a nih chuan, cooperative movement-a kan society te leh sorkara contribution an neih hi ‘a lova han sang ve le’ tih te ka ngaihtuahnaah a awm a, a lawmawm khawp mai.

Tin, a dawt lehah chuan PACS - ‘Primary Agriculture Credit Society’ kan han tih hi registered primary registered cooperative society a ni a. RBI pawmpui niin PACS-ah hian mipui te’n an awmna hmunah loan dil tura application va dil buai kher ngai lovin a hun leh bi awm chuang lova loan an lak mai theihna tur PACS hnuaiyah hian a awm a ni. Tunah hian kan thang chak ve ta hle mai a, Mizoram-ah pawh hmun hrang hrangah PACS kan indin ta a. Khawpui chhungah pawh Luangmual-ah leh kan pu bial Sihphir-ah te pawh PACS kan han din a, an thang chak em em a ni. Naupangte pawh kan sawi fo thin angin account an hawn sak a, an sweet leina ai te kha an va deposit a, chu chuan naupang thinlungah inrenchemna rilru a lo pek te pawh kha a hlu hle mai a. Heng PACS zawng zawngte hi computerised vek tura ruahmanna kalpui mek a ni.

Tin, PMVY hi kan hmang tangkai em em mai a. Hei hi han sawi hawanna ka la nei lo deuh bawk a, ka han sawi hrim hrim ang a. Sorkar laipui scheme pakhat a ni a, Trifed te nen hian MoU kan sign a, chungte nena kalpui kan ni a. VDVK hi phase 1-ah khan 59%, phase 2-ah 15% kan enkawl mek a ni a. Heng BDVK-te hi kan Cooperative Society hnuaiyah din niin, eizawna bul an tanna tur hmanrua chi hrang hrang pek an ni a. Hmun thenkhatah chuan aieng-herna leh a pack-na khawl nen a keng tel a, a launching pawh kan ti nual tawh a ni. Opposition Group Leader Pu Duha bialah ni tain ka hria a, aieng, sawhthing leh hmarcha herna khawl set te, ranchaw siamna atan vaimin herna

khawl te a set ang zel khan, nimbu herna khawl te leh thil chi hrang hrang a tam mai. VDVK kan han din atang hian tuna an thil hralh chhuah hi ₹282 lakh, khang a chenbeh te teho inbawrkhawmah khan zuk tling thei tlat a maw le! Chuvang chuan, hei hi a hlu hlein kan hria a ni. Tun February Ni 17, 2017 kha Trifed-in Dyand Chand National Stadium, New Delhi-ah *Adhi Mahotsav - Showcasing Tribunal on National Stage* a buatsaihah pawh Mizoram VDVK te stall pakhat luahin an zuk kal ve a, Reiek VDVK te an ni a. An zuk kalnaah khan Prime Minister hmuin an lo lawm a. An lo biaksawm leh thil an leisak te kha an lawm em em mai a, kan naute zuk kal kha. Chu mai a ni lova, Tribal Affairs Minister, Arjun Munda nen te pawh an zuk inhmu a. Chutiang chuan phur deuhin hun an zuk hmang a ni.

Pu Speaker, khati kha a ni deuh mai a, thil dang han sawi belh tur pawh a la tam khawp mai a. Amaherawhchu, a rei lutuk dawnin ka hria a, ka chhawk ta teuh mai a ni. Kha min rawn khap tel deuh thoin ka hria a nia. Chuvang chuan ka duh tawk mai ang a.

Ka Demand te –

Demand No.	Purpose	Amount (in ₹)
31	Agriculture	1,70,24,25,000.00
37	Cooperation Department	16,59,29,000.00
47	Irrigation & Water Resources	89,49,22,000.00
TOTAL		2,76,32,76,000.00

House zahawm takah hian min pass pui turin ka rawn ngen e. Ka lawm e.

SPEAKER : Tunah chuan kan Minister zahawm tak Pu C. Lalrinsanga Demand te –

Demand No.	Purpose	Amount (in ₹)
31	Agriculture	1,70,24,25,000.00
37	Cooperation Department	16,59,29,000.00
47	Irrigation & Water Resources	89,49,22,000.00
TOTAL		2,76,32,76,000.00

te hi House-ah pass a rawn dil a. Tunah remti apiangin, ‘remti’ ti rawh u le. (**Memberte:** Remti) Remti lo kan awm em? Kan awm chuan, ‘remti lo’ ti u la. (*Remti lo an awm lova..*)

Awle, Minister zahawm tak Pu C. Lalrinsanga hna chanpual Demand te –

Demand No.	Purpose	Amount (in ₹)
31	Agriculture	1,70,24,25,000.00
37	Cooperation Department	16,59,29,000.00
47	Irrigation & Water Resources	89,49,22,000.00
TOTAL		2,76,32,76,000.00

House-in lungrual takin a pass a ni. (**Pu C. Lalrinsanga, hon. Minister:** Pu Speaker, ka lawm e.)

Tunah Chief Minister zahawm tak Pu Zoramthanga kan sawm ang a. Kan sawihona te rawn wind-up turin leh sawifiah ngai a tihte rawn sawifiahin, a demand-te House-ah pass rawn dil turin ka sawm e.

PU ZORAMTHANGA, CHIEF MINISTER: Pu Speaker, ka lawm e.

Dar 9:00 a pel tawh a. Room atangin tv-a ka lo en zawk chhung pawhin ham zau tak taka ang ka hmu nual mai a, kan mut a chhuak deuh tawh pawh ani maithei a. Sawi tur tam tak awm mahse, tawifel deuha sawi ka han tum ang a. Tlangvalho Pathianthu sawi ngaithlain, ‘a sawi rei lo apiang hi thiam kan ti’ an tih ang deuhna period kha a ni tawh a. Khaikhawm zo hma apiang hi thiam kan nih tawh hmel a.

Ka sawi hmasak duh chu - eng emaw han react tur laia kha ziakin kan nei vek a, a mimal kan rawn pe mai ang che u ang a; chuti lo chu, zan a rei lutuk dah ang e. A pawimawh zual pahnih-pathum vel erawh chu ka han sawi zawk ang a. Chung zinga ka han sawi duh chu –

Member tu berin nge, ‘SEDP kha nuai 3 pektlin in nei reng em?’ a ti a. Vawk-vulh lamah hian ‘mi 220 hnehah nuai 3 kan petling e’, kan rawn ti a ni.

Tin, Finance Commission chungchang min zawttu kha Pu Zodintluanga maw? Kha kha, State Finance Commission 12-na tunah kan kal mek a ni a, 31st December, 2022 ah khan kan siam a; chumite chuan an buaipui mek a. Tichuan, an term a tawp avangin thla 6 kan extend a, chu chu kumin June thla tawpa tawp tur a ni a, chuti hunah chuan report pawh an thehluh hman kan ring a ni.

Tin, member zahawm tak Pu C. Ngunlianchunga sawi kha, a chhanna min rawn pe a. A chhanna hi 20th April, 2022 a siam a ni a, nikuma mi tawh kha a lehkhha a hmu lo a nih ka ring a. Pu Speaker, engpawh nise, Mizoram aia zau mah sawlai compensate tur ram chungchang thu kha a ni a, a chhiarkawpa chawh sual a ni a. Nakinah a lehkhain uluk takin, a connect te nen kan rawn pe ang a.

Chuta tawite ka sawi duh chu - hemi compensation tur hi a tira 25,940.05 Sq. km nia sawina kha, an semna lamah an tihsual a, ‘25.94 sq. km. tur kha an semna lamah

2,59,040.05 sq. km. angin an dah palh a ni e', tih a ni a. (**Pu C. Ngunlianchunga:** Pu Speaker, khawngaihni a nihna taka kha, department lamin chanchinbu-ah tal a tihsual lai kha min chhuah sak se ka va duh em?). Kan lo chhuah ang e. A lehkha tak pawh hi Pu Speaker, amah kan lo thawn dawn nia; chanchinbu lamah pawh an lo tihsual palh a nih kha. Kan department te kan lo tih tir dawn nia.

A dang chu wind-up pangngaiin ka kalpui ang a, Pu Speaker. Hei, kan budget session hnuhnung ber tur a ni a. Amaherawhchu, vawikhat session nei leh turah inngai ila; thla 6 ral hmaa nei leh tur a nih avangin tun atanga thla 6 velah chuan kan nei leh tho chu a ngai a, budget erawh chu a ni tawh lo ang a.

Kha, hawihawm takin duhsakna te kan inpe tliar tliar a, 'kan vaiin inhmuh kim leh ila a tha a ni' te kha kan han ti a, a tha khawp a. Kan inhmuh leh them them chuan kan sorkar leh dawn chu a ni si a; 'kan duh tak tak chiah em maw ni' tih pawh kha Pu Speaker, ngaihtuahnaah a awm a ni a. Amaherawhchu, hawihawmna tawngkam tha a ni a. A lawmawm e. Tichuan, mimal thusawi react-na chu a ziakin ka rawn ti ang ka tih kha.

A hmasa berin kan Legislative Assembly-ah hian lawmthu ka sawi duh a. Pu Speaker, I kaihhruiina hnuaiah, mi tam tak phei chuan, 'Speaker-a efficient ber pawl leh a kaihhrui hneh ber pawl a ni' tih khawpin min kaihruai a, kan lawm a. Thawktute an hahzia kan hria a, buatsaihna thar - kan seat leh thil dang zawng zawngte an lo ti a, hengah hian an fakawm ka ti a. Chuvangin Legislative Assembly chungah lawmthu ka sawi a ni.

Tin, ka Demand hian avai hian react chi pawh a ni lova. Governor te, Council of Ministers te, eng eng emaw te a ni a, a pawimawh zual ka sawi ang a. Secretariat Administration thua tawite ka sawi duh chu - kan Secretary leh Administration deptt-ah hian hnaruak a tam lutuk tawh a. Grade-IV etc. te; DC leh adangte pawh hi kan mangang tawh a. Lehlamah chuan finance lamin tam han lak kha chu kan huphurh ve ang reng baw si a, amaherawhchu loh theih loh chin erawh chu kan han ti char char a, a lak pawh kan la a. Tin, 'MR' kan tih 'PE' ni ta, hengte han regularize-na tur pawh kha ren lovin, 'khang kha chu i kalpui zel ang; engmah inkhapna awm tawh lovin' kan ti a, kan kalpui chho zar zar a, regularize pawh an tam a. Hna ruak a tam thei ang, finance lamin kan tlin ang chin fill up hram hram pawh kan tum baw a ni.

Thil pakhat ka sawi tel duh chu - Secretariat ah sawi tel mai tur chi nge ni, G20 meeting kha. A lawmawm a, India ram G20-ah kan Prime Minister hotupa ber a nih lain meeting pui kan han nei dawn ta a. G20 hian a ken tel B20, a business forum kha state-in kan lo thleng a. North East lam min duhsak a, Mizoram pawhin damtea Pathianin rem a tih chuan naktukah an lo thleng tan dawn a. Naktuk zanah Governor-in dinner a siam ang a, a tuk leh lamah a meeting-pui a ni ang a. Tin, Zirtawpni kan kut

kha, ‘chawhma lam tal chu min hmanpui rawh u’ kan ti kha a ni a, chawhnu lamah an thlawh haw theih nan. Khangte nen khan kan G20 Meet tur kha theihtawpin kan han inbuatsaih a, kan hotute a kal tur remchang kha chuan ‘theihtawpin intawiawm ila a tha ang’ kan ti a.

Tin, Vigilance connected-ah khan, member zahawm tak Pu Hlana sawi pakhat connected kha a ni bawk a, Lok Ayukta-ah hian inquiry or investigation leh prosecution hi directorate pakhat hnuaia dah a ni a, hei hi Supreme Court-in a awih lova. Inquiry hi a hranin a awm tur a ni a, prosecution hi chu a chhung zawkah Lok Ayukta lamah prosecute turin a awm ang a, inquiry kha chu pawnlam atanga tih tur a ni a, directorate khata dah tur a ni lova. Chuti lo chuan inquiry latuin a prosecute nghal kha ‘a diklo’ an tih avanga then hran tuma hma kan laknaah kan dan pawh siamtha turin ‘kan Law minister hova committee-in a thlir vel mek a ni e’ tih kha kan sawi tel duh a ni.

Tin, hemi connected-ah hian Opposition group leader zahawm tak Pu Duha han sawi, ‘kan House leader hian thubuai court case a nei’ a tihah khan, kei pawhin ka han zawt fe thin a. Kan Police IPS senior officer, heti lama khawihute leh kan senior Ukil-te ka han zawh hian, complaint Lok Ayukta an zu pe a, an lo register ngei a; chu chu Lok Ayukta-in, ‘preliminary inquiry va la rawh u’ a ti a, preliminary inquiry keini complaint ah khan an la mek a, kan la zo lova. Khatih laia ‘court case nei’ han intih kha chu, keini chuan kan ti ngai lo hrim hrim an ti a. Kha kha ka hriat ve chin chu a ni. (**Pu Lalduhoma**: Pu Speaker, ‘court case’ kan ti lo, court hi ka sawi ri lo hrim hrimin ka hria; ‘case a nei’ kan ti mai chauh a ni. ‘Court’ tih a tel lovin a inziakah pawh case no. a in pe thla vek a ni.) Engpawh nise, a chianga chu - court case chu ka neilo hrim hrim. Preliminary inquiry an ti tan chauh a, kha mite khan *prima facie* case an hmuh a, Lok Ayukta-ah an dah a, an niin, ‘khai le, heti anih chuan *prima facie* case a awm a lawm; court-ah case lo register rawh u’ an tih khan, case a intan a ni. Tunah chuan preliminary inquiry an ti a, case an la zo lova, ‘hotupa-in case a nei’ lo tih vak kha chu, a hma lam deuh chu a ni e ka ti a ni. Heta kan officer lian te khan

PU VANLALHLANA : Pu Speaker, ‘List of corruption cases in Mizoram Lok Ayukta’ tiha Sl. No. 44-ah hian a chuang a, chutah chuan, ‘case no.’ tiin a inziak a ni. ‘case no.’ a ti a, a hnuaiah chuan ‘nature of complaint’ a ti ta a. Tichuan, mi tuin emaw Lok Ayukta-ah a theh lut ta a, an lo pawm a, an register a. Tichuan, preliminary inquiry tura thawn niin a lang. (**Pu Zoramthanga, CM**: Chu chu i sawi chu ka pawm thlap a ni.) I pawm thlap chuan, case no. pek hi pawm ve tur a ni ang chu.. **Pu Zoramthanga, CM**: Court case hawn a ni lova; Lok Ayukta-ah an thlen a, anni khan complaint thleng na na chu a hmingah ‘problem’ emaw, ‘item’ emaw an ti lova, ‘case’ an ti a. Chuvang mai chuan...) Lok Ayukta hian complaint hi a pawm a ni.

SPEAKER : Court Case anih chuan, Under section engah nge chu chu? (**Pu Vanlalhlana**: A in ziak lo.)

PU LALRINTLUANGA SAILO: Pu Speaker, kan House Leader in case a neih chuan, tunge a case IO, Case IO nei lovin case a awm thei em ni?

PU VANLALHLANA : ‘Case No. Nature of Complaint’ tiin a inziak a ni.

SPEAKER : Aw... Ngawi rawh u. Vawikhat lai kha chu Pu Duha khan, ‘court case ka ti lo e’ a rawn ti a, a tawk viau a ni.

PU ZORAMTHANGA, CHIEF MINISTER: ‘Court Case hi House Leader-in a la nei lo hrim hrim’ tih kha zanina kan hriat chu a nih chu. Kan che hma deuh thin a lawm.

A dawt lehah chuan, GAD-ah hian Delhi-ah khuan Mizoram House kan neih khu duhthu a sam lova, damlo kan thahnem si a; hmun dangah Mizoram House tur kan han zawng a, theihtawpin kan bei a, kan la bei zel a. Tuna awmah khuan a tawt a tawtin kan han inrem khawm a. Tin, member zahawm tak ten ‘mess te pawh khu *mizo* thei ang berin ti ila a tha lawm ni’ an tih kha a dik a; kha kha kan lo hrih zel ang a. Amaherawhchu, kan chawhmeh duhdan zawngte a inang lo lutuk a, a titute pawh an buai ve bawh thin a ni. Bai lampang chu awm bawh mahsela, ‘hetiang, a ninawm’ ti pawl an awm bawh a. Engpawh nise, a thlengate mamawh ang serve thei turin kan mess siamtute pawh theihtawpa lo in adjust turin kan lo hrih ang e.

Tin, Kolkata-ah khuan *Patient Lodge* New town-ah kan nei a, kan nei fuh em em mai a, kan chhuang ve deuh pawh a ni ang a. A ranga rangin New Town-ah khuan Tata in cancer hospital a din dawn tih hriain rang takin Joyti Basu hnenah khan ka kal a, ‘New Town-ah hmun min pe rawh’ ka ti a. ‘Kan minister nen hian lo in be rawh u’ a ti a, kan inbia a, min pe ta a. Tichuan, sak kan tan dawn a, ‘Meghalaya hovin min ti e’ an tih ang deuhin, ‘a damdawi in ber pawh laih khat, cheh khat pawh an la chek lova, engatinge maw House hi in lo neih hmanhmawh le; in va han che rang em em ve’ min ti a; a ni lah bawh tak a. Khu khu a lawmawm em em mai a, kan damlo ho thlen khawmna a ni a. Mahsela, khu pawh khu kan tawt lutuk a, mikhual thleng tur kan ngah bawh si a. Chuti laiin kan in hmasa bera khu a tawng tawh a, thiah te pawh tul tawh tak a ni a.

Tichuan, kan neih chhun Ballygunge-a awm kha kan han sa dawn a, kan han thiat a; G+3 - chhawng thum chauh kha an phal si a, a buaithlak khawp mai a. Va kal a har tawh si a, a outdated tawh si a, lehlamah chuan sawlai vela awm tan chuan hlu em em mai a ni a. Mahsela, keini tan khan chhawng 3 chauha sak a nih dawn chuan kan damlote kha tam an awm thei dawn miah lo mai a. Thurawn min petu ho chuan, ‘hei hi hralh ula, in tihfuh chuan vaibelchhe 30 - 40 pawhin in hralh theih mai thei a nia. New Town-ah emaw, Salt Lake-ah emaw hmun lei ula, hemi hmun tiat emaw, a aia lian emaw pawh a man chanve hi chuan in lei thei em em ang, a tuna rate awmah. Khatia a nih chuan, a

chanve dang emaw, tlem belh emawin a aia tha deuh ni se, chutah chuan in awmkhawm thei ang' an ti a, 'a ni awm mang e' kan ti a, tunah hian kan en vel mek a ni.

A dawt lelah chuan, Guwahati-ah pawh House lei sa a awm a, Covid avang khan a then sak uaih tawh, a chung lam la zawm that loh; lian tha ve angreng fu, damlo thlen theihna tur kha a ni a. Tunah hian SASCI suma zuk sak zawha, Guwahati-ah mikhual leh damlo a tam thei ang ber an thlenna tur zuk sak zawh hram hram kan tum ang a, nuai 23-24 hian. Chutiang chuan Guwahati lamah pawh damlo awmna leh mikhual awmna pawh tam zawk kan neih theih kan beisei a ni.

Tin, Shillong-ah pawh House kan nei a, hmun tha deuh mai min pe a, tunah hian an damdawi in bulah kan sa mek a. Amaherawhchu, tlema fuh lo deuh lai a awm a, kan thiat a, kan han sa tha leh a. Chuvangin, tha taka contractor ten an sak nan engineer ten an veng a. Tichuan Shillong ami khu chuan min dawl zo turah kan ngai a ni.

Tin, lehlamah member ten an han sawi, New Mumbai-a kan ram neih kha zuk sak law law kan ngaihtuah a. Engpawh nise, SASCI hi tun tumah hian kan han en ang a, kan sa zo mai thei lo a nih pawhin leh kumina kan neihin a daih lo deuh a nih pawhin, nakumah SASCI lo kal leh turah ngai ila, chu nen chuan a inchhunzawm chho ve zel ang a. Mumbai-ah pawh khuan hla deuh mah sela, tunlaiah te chuan motor a awm a, cancer damdawi-in te chu an pan thei tho a, khung khu 'a sak dan ngaihtuah ila' tiin ka rilruah chuan a awm a, engpawh nise kan lo enzui ang e.

Tin, Bangalore pawh kha an rawn sawi a, amaherawhchu Mumbai nen a rual chuan kan ti thei lo ang a. A map nen min rawn pe a, Bangalore a mi chu, a zau tha a. Khu pawh khu a hma thei anga tih kan lo tum ang a, kan sum neih dan a zirin kalpui kan lo tum ang e.

Tin, GAD lamah kha, Assam Rifles hi nikum kum tawp lam August-September vel nge, Delhi-a ka zin khan Amit Shah kha, 'Assam Rifles complex hi rawn hawng rawh' ka ti a, ani chuan, 'engnge kan lo kal nana thla tha ber' a ti a, 'November a nuam ber ang' ka ti a, 'November-ah ka lo kal ang e' a ti a. Amaherawhchu, khami chhoah khan 'an mahni home-town' ti mai ila, Gujarat-ah inthlanna an han nei ta a, Prime Minister Modi nen khan a bilinga balangin an tang ta a, ka zuk phone a, 'engnge chanchin' ka zuk ti a, 'kan state-ah kan inthlang a, hmun dangah han che thei kan ni lo reng reng' a ti a. Ni 6 bawr velah inthlan an zova, ni 7 bawr velah khatah khan Parliament session an han nei zui a. Tichuan, North East-ah an inthlang a, nimin velah vote a tla zo tih vel kha a ni a. Tichuan, anni pawh an tul ve nasa a, kan Chief Secretary-in a Secretary-te a zuk phone a, an han inbia a, 'tun thla ni 17 (Zirtawpni) khian lo kal ka tum ang a, chutah chuan Assam Rifles complex-pui leh Laldenga Centre lungphum chu ka rawn tum dawn nia' a rawn ti chu a ni a. Amaherawhchu, Pathian thu thu ni sela, a kar lakah eng emaw kan sawi leh kan hriat lawkloh harsatna nei palh ve thei tho an ni

a, keini lamah pawh a awm thei a. Engpawhnise, tunah chuan a hnen atanga kan hmuh, 'ni 17-ah Assam Rifles hmun hawn leh Laldenga Centre lung phum pawh kan rawn ti dawn nia' an angin, chumi tur pawh chuan kan lo inbuatsaih ve phawt dawn a ni.

A dawt lehah chuan, kan Airport khu khu sawi a hlawh khawp mai a, han zawh thuai thuai hi ka nghakhlel khawp mai a, an sawi luai luai pawh hi a lo awm reng a. 'A lo tha em mai' tih tur khawpa zawh hram hram kan tum a ni. Kan Airport chungchangah hian thildang chu thildang nisela, a buaithlak ber chu - a hmaa pindan zawng zawng kan thiat a. Tikhan, covid period passenger tlem lai kan kan chuh a, tichuan kan han titha ta a. Kan thiat dar vek tawh si a, trolley dahthatna tur room pawh a awm tawh si loh avngin, khami thiat darh nuaih zingah khan a awm si a, thil han nawr mai nan khan a lo rem em em mai bawk nen. Chuvangin, a contractor te tan cement nawrna, tui nawrna bakah police leh CRP lam tan pawh hman a lo rem em em mai a, an lo hmang sup sup mai a, kan hriatloh chhung khan an lo tichhe teuh mai a. Chuvang chuan, kan han inkhap a, 'engatinge' kan han ti a, a chhiate kan han repair tir a. Tunah hian a tha pangngai 70 vel a awm a, khu khuan tuna hman tawk chu a dawl zo thawkhat a. Amaherawhchu, a dang 100 tal chu kan la mamawh dawn a, 'i lei ang' kan ti a; 'nang a contractor Kamrula kha, i ho ten an tichhe tam ber' te kan ti a, "ka hote tihchhiat chu a tam ber ang a, mahse, kan tihchhiat vek chu a ni bik miah lo a nia' a ti a. Mahsela, "a contractor ber, pawisa i ngah ber ang; in tihchhiat a tam ber, lei rawh' kan ti a, "100 vel chu ka lo lei ang e" a ti a; 170 vel kha chuan kan in manage thei turah kan ngai a.

Tin, kan Opposition Group Leader Pu Duha han sawi kha, nakinah a record kha min pe ula, khati em ema Kamrula'n hna a hmu tam kha ka lo hre lova; ka hriatloh te hian thil a lo kal em? 'Thla khatah nuai 700 ang rate-in kum khat chhung chu a hmu a ni' tih khan ka hria a, ka hresual em ka hre lova; kha kha a dik em? Tichuan, khati anih chuan thlatin crore 7, kum khatah vawi 12 chu crore 84, crore 84 kan la hmang lo hrim hrim mai a. Khalai kha record diklo a awm palh a nih chuan, nakinah Pu Speaker, a ziak kha min pe ula, thudik tak khamiah khan kan hmuh theih nan. Kan hriat lova thil awm te hi a lo awm palh em? A, a finance minister hriat lohin thil a lo awm palh em? Work order lo kal te a awm ngai reng em kan lo en ang a; a tam lutuk em mai a! kha kha khawngaih taka min pek theih chuan ka lawm khawp ang, a record dik kan hriat theih nan.

Tin, Kamrula hi, hemi connection-a ka han sawi duh chu - tukin khan Pu Duha zawhna kha a chhuak hman lek lek a, "Bill engzat nge Kamrula Chhangte hian a a lak?" tih kha, a chhuak hman lo chiah chiah a. 'Engmah a la lo' an ti vek mai si a, an ti hmanin ka ring a. Amaherawhchu, a chhanna treasury lam atanga an laka kha, 'engzat nge' tih kha a ni a, 'engmah a la lo' tih kha a ni a, Treasury Bill kha. Kha kha kei pawh ka hmuh a ni a. Mahse, khata ka han sawi belh duh chu - niawma ka rin chu, kan sorkar hma atang tawhin 'Kamrula' ni lovin 'Kamlova Chhangte' tih kha a ni a, 'Kamrula' tih hming khan bill a awm ka ring miah lova, 'Kamlova Chhangte' tih a nih ka ring a. Chuvang

chuan, a khatah kha chuan a lak a awm ka ring lo' tih kha a ni a. Amaherawhchu, ka rinthu a ni a, ka chhanna kha. Tukina chhuak hman lek lek kha a zawt tu Pu Duha khan, 'engti zia nge' a tih palh takin ka han sawi ve a nih chu.

Awle, Horticulture lamah chuan, kha kan member zahawm tak ten an sawi a. Tualte tomato te, Champhai grape te, Sialhawk lakhuihthei leh dragon-fruit tea hmalakna horticulture deptt. hian a titha khawp mai a. Mizoram-in kan larpui theih khawpin hma an la a, kan Horticulture Department te an fakawm tak tak a ni. Tin, 'Bamboo kha engatinge CM hian a va sawi ri ta lo ve' an ti a. Kan sawirik tam leh, 'hei ringawt a buaipui' an ti a, sawi rik loh leh, 'engatinge' an ti bawk si a. "Engatinge kawngka i hawn huau, tunge lo lut se i tih" a nupui a ti a; a kharin, 'tunge i tawmpui a ti leh bawk si a' tih ang deuh khan, hei hi kan sawi tam leh, 'engatinge' an ti bawk si a. A nihna takah chuan bamboo hi kan phun tam tawh khawp mai a, mahse, puitling tura han ti chho zung zung tur chuan a theih rih lova. A puitling sa atanga a tuai tur erawh chuan mizopa zawng zawngin kan hriat angin, 'June thlaah a tuai a, December thla-ah chuan a nu a tiat a ni' tih chu kan hre vek mai. Amaherawhchu, a puitling sain a hrin a ni; a tet lai atanga enkawl thiam loh chuan kum 5 te a ngai ve tlat a, puitling tak tak tur chuan. Kha vang khan kan phun tam tak pawh kha a puitling tawh lova. Tunlaih an lo kal nasa mai a, 'in mau hi a chhia zawng zawng pawh, a tha zawng zawng pawh lak vekin, a tangte, a hnah nen lamin ethanol siam nan te, bamboo charcoal te, a vinegar high class siamna tur nen; heta a hmuna rawn leia, a root atanga rawn tan vek kan duh a ni; kan rawn harvest vek duh a ni' an ti a. Amaherawhchu, ataka rawn titu an rawn kal tan a, engnge a an zel dawn; a tak takin an ti zel dawn em kan hre lova. A thatna chu - a lei hrutah pawh tan vek mah ila, a kumah khan a pangngaiin a lo chawr leh mai a, hah awm lo khan thil tha tak mai *environmental friendly*-in khalai kha a kal theihna lai tak pawh a ni nghe nghe a ni.

Engpawh nise, a chi tha nena kal hi keini lama buaithlak ber chu Delhi lama kan pawisa hmuhna ber te hi kan phur angin an la phur lova, kan convince zo lo a, link road kan tih lahin crore 100 te min han pe a, a buaithlak lutuk a. Chuvangin G20-ah pawh an beng chhut hawn nan subject pakhtah neiha, hengah hian 'carbon trading scheme te hi min ngaihtuah pui teh u' tia theihtawpa lo au pui kan tum a ni. (**Pu Lalduhoma:** Pu Speaker, Chawngtlai tomato chingtute chungchang kha a rawn react thei em aw?) Kha kha engtin nge ni kha? (**Pu Lalduhoma:** Tomato kha an chin tir a, horticulture atangin, drip irrigation tih nan khan an huan theuhah tankey te tak te te siam theuh tur a ni a, ₹30,000 man. Chu chu anmahni account-a thun tur a ni a, an account no. te pawh an la vek tawh a. 'MNF block hruaitu ten min chhuh sak' an ti a, kha kha chhe deuha an chhuah kha an hlau ve a ni.) Awl, kan lo enpui ang e. Chutia inchhuhsak ngawt chi a ni lo ang a. Department-in a project an enchian a tha ang a, chuti lo chu khawi lai report emaw hi tlema suak bak ve deuh hi a awm thin a. Khaw khata inchhuhsak ringawt hi chu, hei a bialtu pawh a awm a, kan lo en zui dawn nia.

PWD lamah ka han lut ve leh ang a, PWD-ah hian kan hria a, tunah chuan national highway-in chhim leh hmar, chhak leh thlang min chhun tir tumin double-lane road an bei ta mup mup mai a. Khutah Silchar - Vairengte atangin four lane-in Aizawl rawn thlen tira, Aizawl atangin Lunglei-ah two-lane in sawtah Tipa lam thlengin kalpui tum a ni a. Tin, khawchhak lamah Seling atangin Champhai lamah two-lane in a chho mup mup bawk a. Seling atanga tlangin Tipaimukh thlenga tlang pheik vekin, tin, Lunglei lam-ah sawtah Lawngtlai leh Tipa thlengin a kal mup mup a.

Tin, hetah kawng lian tha takin khaw thlang lam Kanhmun lamah Tuidam leh Mamit lamah a chhuk thla a. Kan hria a, a chhim leh hmar, chhak leh thlang zawngin kawng highway chu a kal a kha kha a thawktute chu NHIDCL an ni a. Mahse, anni pawh a neitu an nih loh avangin, ‘environment tichhe zawngin an che tam lutuk e’ tiin kan ang nak nak a. Theihtawpin sorkara PWD leh NGO lamte nen pawh kan tang tlang a, kan lo enzui zel dawn nia.

A dawt lehah chuan, PMGSY kha chu kan hriat sa a ni a. PMGSY kan tlawlhna leh kan chhian tam ber chu – ‘open tender-in in ti tur a ni’ an ti a, ka sawi tawh ang khan open tender-in hman atang khan kan ti a, an han inchhanhnam siak a, tichuan, a hniam ta lutuk si a. A then *25% below* te, *50% below* tea chhang zu han awm a maw le! Amaherawh chu, kha kha zawng pek ngaihna pawh a awm lova. Khami khan an han thawk ta a, an zo tha leh thei si lova, hralh ti tihin a zuih ta a. Kan PMGSY chhian tam ber hi khatiang deuh vek kha a ni. Amaherawhchu, khulama miten open tender-a ti turin min ti si a. A hnuai kan pek lohin, court-ah an kal bawk si a Hhei hi kawng siamtute luhaina ber a ni.

Chubakah chuan, State Road a awm ta a, keimahni State funding-a kan tih neuh neuh, a then NEC lam atang te, NABARD atang te leh hmun dang atang te pawhin a kal a, khatiang khan kan kalpui ta a. PM-DeVINE atang pawhin Aizawl by-pass road atan ₹500 crore lai min pe a. Kan buaina ber leh chu - a hma kha chuan a ziaawm a, PMGSY pawh a hma kha chuan compensation component an rawn ti lova, amah insuchhuak tura tih a ni a, chu chu hre sa in kan kalpui a ni. Amaherawhchu, National Highway an rawn ti ta a, NHIDCL-in compensation component pawk deuh maiin an rawn ti a, an la ta teuh teuh mai si a. A dawtah khan PM-DeVINE sanction a lo kal a, compensation component a awm ve si lova. National Highway titu ten an tivir laklawh a; kan hmu thup a, a itawm si a. State-in kan kawng laih turah khan compensation a tel ve tawh bawk si lova, khawilai culvert leh lungrem nen emawa inbiakrem kha a ngai tawh a, chu chu a harsatna lai ber chu a ni ta a ni. Eng pawh ni sela, theihtawpin kan ti ang a, kan phurrit a ni ve mai a. Amaherawhchu, kan hotute’n he kan harsatna hi min hriatpui a ni tih lai kha ka sawi duh chu a ni.

Tin, building - circuit house te, office building te member zahawm tak ten in han sawi kha kan lo chhinchhiah a. Circuit house leh eng emaw building sak ngai tih te hi

chu kei a kal tam lo ber pawh hian, mahni department ni ta chu ka beng a rawn tiri hi an tam a, ka *by-heart* ve nasa mai a, a chhim, a hmar, a chhak, a thlangin. Chuvangin, kan pawisa neih dan tur kan han chhut ve ang a, member zahawm tak ten in sawi kha a tlin chin chu han sak hram pawh a tha a, bikin tunah hi chuan SASCI atang hian tih kan tum e.

PU C. NGUNLIANCHUNGA: Pu Speaker, khawngaih takin PWD a sawi lai khan, thil pawimawh lutuk mai - Nikum March Ni 3 khan *Starred Question* No. 72 - Dam Lui, Vaseikai, Chawngte atanga PMGSY road kal chho kha main road thleng lovin, Dam Lui-ah a tawp tlat mai a. Question-ah khan ka zawt a, 'sanction awm ve leh tih kan tum dawn nia' tih kha a ni a. Khalai kha Pu Speaker, SASCI atang hian min laih sak thei ang em, km 4 lek a ni a? Min laih sak theih loh chuan MLA fund pawha laih mai kha ka duh a. A chhan chu - kawngpui Chawngte atanga rawn chho khan km 4 lekin a destination a thlen loh avangin; kha kha *pakhatna* ni se.

Pahnihna-ah chuan, a pawimawh si a, ka han tihram ang e. Kan Chief Minister hian a hre tho ang a; Sangau-Saisihchhuah NEC atanga crore 66, 14th Finance Commission atanga lokal kha heta ka zawhna *Starred Question* No. 3 leh 4 a ni a, 'Hei hi BRO kutah a awm a, kan hriatpui lo' tih tawp mai hi; Defense Road kha he kawngah tho, Thingsai - Saisihchhuah - Pangkhua - Sangau road kha abandoned a tawh a ni a. Khi khi khawchhak lam nena kan inpawhna tur a ni a, tunah hian NEC atangin ₹66 crore a awm a, 14th Finance Commission ami kha; tuna a fel loh chuan, a lapse leh mai dawn a. Kha lai kha min han hrihfhah teh se.

PU ZORAMTHANGA, CHIEF MINISTER: Kha kha kan hotute'n a khua paltlang lo leh compensation lian ti lova kal tir an rem ti tawh a, an sign thlap a, chu nen chuan a sanctioning authority-ah an theh thla a, a lo chhuak thei dawn tawh ni awm tak chuan ka hria a; a pakhat zawk pawh kha kan lo hria ang a. Amaherawh chu, i sawi lai taka kha ka hriat loh takin, ziakin nakin ah min pe la ka duh khawp mai.

Thil pakhat kan sawi leh lawk duh chu - kan district thar pathum - Saitual, Khawzawl leh Hnahthial-ah te khan SASCI atangin ₹1000 lakh (₹10 crore) theuh kan pe a, chung chuan building lian pui an sa a, Secretariat Complex ang ve deuh turin; khatah khan DC leh department leng ang ang hmun khatah inkhung khawm sela, hmun dangah a dawr tura mipui kal kual ngai lova hmun khatah an dawr theih nan kan ti a. Amaherawh chu, kha kha a la lian tawk lova, la tihlen zela, 'department hotute hmun khatah awmkhawm vek se' tih kha target-in tunah hian a thawh pawh an thawk tha a. A then chu a pum zo tawh a, zawh lek lek tawh te pawh a awm a, khang pawh kha chhunzawm zel kan tum e.

Finance lamah ka han kal ang a, rei lutuk lova tih ka tum ang e. Hei Finance kan demand hi a han tam em em khawp a. Ka demand kha han en ila, ₹4,388 crore lai mai

a ni a, 'a van tam em em, a tlar thui si a' tiin tun hma te pawhin CM demand hi an sawi thin a. Han tam lo chi pawh a ni lova, pension ringawt pawh ₹1,875 crore a ni a, kha pawh kha department eng emaw zat demand belhkhawm zat a ni a, vaibelchhe ₹1,875 chuang kha pension hlawm khat finance a awm ringawt kha a ni a. Khang te a nih avang khan, hlawh zawng zawng a han tlingkhawm a, engkim mai hengah hian an inbawkhawm si a, chuvanga tam a ni tih kha hriat kan duh a.

Tin, budget system hi kan tling lo kan tling lovin hei chen finance khawihin kan lo awm ve a. Term hmasa (kum 10 chhung), 1998 - 2008 chhung Finance Minister ka nih lai, Planning Commission awmlai, earmark sector tam lai, khang lai khan kan lo kalpui ve tawh a. Chi hrang hrangin kan en a, a buaithlakna lai pawh a tam a. Khatih laia kan tih dan deuh ber chu - 'sem sem dam dam' kan ti a, department-a an hlawh tur bakah minor works tiin emaw, 'nangni ₹5 crore; nangni ₹3 crore' kan ti a, kan sem den den a ni. Tichuan, kha kha a ranga rangin department chuan thahnem an lo ngai a, 'hei hi in sak nan; hei hi kawng laih nan' an ti a, an lo hmang zo zung zung ve a ni a. Delhi lamah project kan han siam a, state-matching share tur kha an lo hmang zo vek tawh mai a, 'planning-in min tum mai rawh u', an ti a, planning-in a hranin a lo dah tawh lova, kan budget neih ang ang kha kan lo sem zo tawh si a. A chi tura kan pek kha an lo kang puak zo vek tawh thin a, chu chu kan buaina a ni. Chuvangin, Delhi lamin, 'pawisa a tam; engatinge project in rawn siam loh; heta hi crore 10 - 100 telin a awm a lawm' an rawn ti a, a matching share tur kan nei tawh si lova. Chuvangin, tun tumah chuan a chi dang daihin kan kal ta reng a ni. Chuvangin, 'chawfunah khang kha chu; hei, chaw fun ula, nakinah han vat hawk ula, in thar chu rawn phur haw rawh u' tih system-in kan budget system hi kan kal ta a ni.

Amaherawhchu, kha state-matching share tura kha department-a kan sem chuan a zo leh nghal vek tih kan hria a, hmunkhatah kan dahkhawm ta a ni. Hmunkhatah kan dahkhawm a, department pawh, 'project siam rawh u, Delhi-ah pawisa a tam lutuk; a crore a nuai telin a awm. Chuvangin, agriculture-in, horticulture-in, khu khu zuk ti ula, a matching share tur planning-a kan dah hi rawn la rawh u' tiin kan tur ve ta a ni. Chutah chuan, an theihtawpin an ti a, tikhan matching share-a problem awm lovin khutah a crore 10 - 100 tel kha a lakchhuah theih ang ang nen kan kal ta a, chu chu a hlawk ber. Chuti lova, 'nangni department hi an va pe tlem che u ve' tia kan neih sa kha a chia kan sem ral leh vek chuan, kan kang puak zo leh vek thin a ni. Chu chu tunah hian tha kan ti lova. Tunah phei chuan matching share an rawn tisang ve a, 90:10 pawh ni lo, 90:20 te a lo awm a, 90:50 te. Khami tura kha hetah SMS bawmpui kan dah a, a rawn thawkchhuak thei apiang matching-ah kan lo dah a, kha kha, 'Finance Minister-in kha kha i control a, Finance Minister-Dictator' an ti a. Finance Minister te chu finance-ah te chuan, Chief Minister nih bawk te chuan thu an neih bawk lovin maw le. Pa-berin a chhungkaw sum thua thu kan neih loh chuan, chu chhungkua chu ngaihtuahawm tak a ni tawh a ni. Chuvangin, khatiang khan pa-chan changin uluk takin tunah hian, a dawt lehah tu-party pawh rawn sorkar se la, khatiang system-a an kal loha an sem den den

chuan, matching share tur a spare kha an nei si lo ang a, a zo vek ang a, a tha hauh lovang. Hetiang hian tupawh sorkar sela kal turin ka advise a ni. Chuvangin, keini pawhin tifuh kan inti a ni.

Chu lova ka sawi duh chu - Covid sum avanga kan harsatna chu vawi tam ka sawi a, ka sawinawn tawh lo ang a; crore 3000 hu chu hetah hian kan hloh a ni. Amaherawhchu, 'Covid hnuah kan pawisa a lo thleng leh teuh tawha lawm; khangte chu sawi sawi tur a ni lo' an ti a. Lo thleng teuh e; mahsela, field siamna tur te, agriculture thil tur te, kawnglaihna te, in sakna te a ni a. Kan mamawh ber *Untied-fund*, hlawha hman theih, a tul ang zela kan hman turah khan rawn dah se, kan lawm dan tur chu; mahse an dah duh si lova. Khami purpose atan bik a ni si a, memberte chuan kan hre vek. Kawng laihna tur sum kha khawilai hlawh atan emawa hman ngawt theih a ni lo reng reng. Chuvangin, khami *Untied-fund*-a kan neih chu - *share of taxes* te; tin, *Untied-fund* khawi lai emawa duh ang anga hman theih tur a volume-a kha tam deuh hret hret pawh a ni lova; *share of taxes*-ah chuan a tam hret a. Amaherawhchu, *devolution*-ah chuan a tlahniam zel bawk si a, a ngai reng mai a ni. Chu chu, kan hlawhah te kan buaina hi a ni. Chuti nilo sela, nikumah khan SASCI-ah crore 700+400 kan la a, kuminah 500 kan la a. Khangte kha untied-fund-a *share of taxes* anga kan hman theih tur te khan lo kal se la chuan engah nge problem kan neih ang? Amaherawh chu, India sorkar *Financial Rules*-ah ni lo, *Sanction* atan chiah khan hman tur te chu a lo kal teuh reng e. Hei, tunah pawh kan han ti ang a, supplementary demand a kan zu sawichhuah zawng zawng, kan feh chhuak ina kan phurh haw zawng zawng helaia budget-a kan pass hman loh kha, Delhi-ah department-in an zuk kal a, crore 10 - 20, kawng atan chuan tam tak an rawn phur hawng a, an feh khan. Khang kha heath House-in a lo pass loh chuan hman thian a ni lova. Tin, pass loh theih pawh kha a ni tawh lova, kha kha. Chung zawng zawng chu a tawpah supplementary demand-ah, a then hlawh tura tih hman zawh loh te, a daih lo siam rem ngai ang te kha a ni a.

Tichuan, 'Supplementary demand hi engah nge hetia in tih vak vak' tih chi a ni lova, kohhran zawng zawng pawh kum khat chhunga an pawisa hman tur zawng zawng supplementary ngai miah lova zo tumah an awm lo, a theih lo reng reng. Mahni pawh han inen ila, 'thla khata kan hman tur heti chin hi' tih kha chhungkua pawhin kan thei lo a ni. Thlaihna man a lo to tum a awm a, a tlawm tum a awm a, chhungkaw pawh in adjustment ngai vek kan ni a. Chuvangin, ram khat, kum khata vaibelchhe tel pawisa hman tur kum tira kan pharh ang chiah khan a kum tawpah a awm chuan, *talent khat kawltu* ang lek kha kan ni dawn a sin. Chuvangin, 'hei hi Delhi-ah feh chhuahpui la, vaibelchhe 10 rawn hawn rawh' tiin, a phur hawngin, 'khai le, kan rawn phur hawng ta' kan tih kha supplementary demand-ah min formalize sak a ngai a, tihdanglam theih pawh a ni chuang lova; sawi khawm vak mah i la, awmzia a nei lova. 'E, a ni maw' an ti a, tha an ti a, an pass a, chu chu kan kumtin tih dan, kum 40 deuh thaw kan tih dan pangngai kha, mi State pawhin a ni hrim hrim a. A ni hrana sawi khawm vak chi pawh a ni lova, sawi khawm khan awmzia pawh a nei tawh bawk hek lo. Chuvangin, hei hi

supplementary demand a ni a, kha tak kha kuminah pawh, supplementary demand-a *additional sanction* belh tur kan ngah pauh leh kan talent kan tipung tam a, ‘bawih tha leh rinawm kan ni’ tihna kha a ni. Chu tak chu *Supplementary Demand* awmzia hi a ni e.

Awle, leiba kha ka han sawi leh zawk ang a. Kan sawi dan kha a inang lo lutuk a; dik tho si, sawi dan inang lo kha. Percentage-a han chhut khan, India rama ba tam berte zinga mi ah min chhuah ang reng si a, hetah hian State zawng zawng leiba kha a awm vek mai si a. India rama State (Delhi tel lovin) 29 list lo kal, 2013 atanga 2022 thleng khan kan leiba hi a inziak vek a, kan hotute pawhin in nei thoin ka ring a, duh duhin a lak theih a ni. A leiba tlem ber State chu - Sikkim a ni; tuna thar ber 2023 January Ni 16 chinah khan. Sikkim-in leiba 12,982.60 crore a nei a, keiniin kan dawt a, 12991.20 crore niin, 9 crore-in kan tam hret a. Chu chu, India rama a ba tam ber pawl anga han chhuah tlat kha, Vahrit leh Chepa khaikhina, ‘*Che-a hi a khin zawk e*’ tih kha kan ang riauin ka hria; a nilo Chiang em mai. Lehlam atangin kan en a, ‘GSDP atangin a percentage kan la a lawm’ tih kha, a percentage chhutna chi hrang hrang chu a awm ang; kan GSDP chhut dan pawh hi, 2019 base-a an tih kha Covid-in min chiah a, a tlahniam si a, khulamin an rawn tih kha a dik ta lo a. Tunah hian kan hotute’n an chhut tha leh a, a hnunung bera mi chu hmana crore 50 leh tiha kan ngaih kha, a takah chuan crore 41-ah a tla tawh a ni.

Engpawh nise, mipuiin kan hriat thiam chu, nichina kan hotute’n an tih ang khan ‘GSDP atangin chuti zah percentage chu a ni’ tih kha a ni. Chuvangin, ‘in sang ber; in hniam ber’ tih kha mipui kan buai. “In khua leibat zawng zawng chu, chuti zat percentage chu in ba” tih emaw, anih loh leh, “patling chin percentage kan chhut chuan, chuti zat in ba. Chuvangin, in khaw thenawm zawng zawng ai chuan in ba tam” kan ti a. “Ngawi teh, kan buai; engzat chiah nge kan khua chuan kan bat” an tih a, ‘₹3,500’ kan tih chuan, “Aw, kan Chiang ta. Engahnge chuti chuan a tirah in sawi mai loh; kan thenawmte’n engzatnge an bat” an tiha, ‘₹4000’ kan tih chuan, “A, a Chiang der a lawm” an ti a, khatiang chiah kha a ni mai a. Chuvangin, a percentage hian kan rul dawn lova, a tak takin kan rul dawn a ni.

Tin, state zawng zawng leiba, member zahawm takte chuan in hmu vek a, keini chu crore ₹12,000 tih bawr vel a ni a, kan thenawm, kan tlukpuia kan ngaih - Manipur, Nagaland, Meghalaya leh Arunachal te chu keini aia sang vek an ni; Sikkim chiah keini aiin crore 9 -in an hniam. A dangte pheih chu crore ₹10,000 crore mai ni lo, crore ₹4,00,000 - ₹6,00,000 te, crore ₹3,00,000 te a ni. Engti kawng mahin Chea kha a khin thei lo reng reng a ni. A ziak a awm vek a, thudang a awm lo e. Kan mipuite hriatthiam zawngin, ‘India ram state-ah leiba tlem ber dawttu kan ni’ tih a Chiang mai a ni.

Awle, Healthcare chungchang a tawp nan tlemte ka han sawi ang a, tichuan Pu Speaker, ka tawp dawn tawh ang.

Harsatna tinreng karah healthcare hi mipui tan a tha si a, tlin lo chung chungin kan ti a ni. Mahse nakinah chuan mipui an lawmna tur a ni. Hei, tunah, ‘leiba nei chungin healthcare-ah sum in han puk leh a’ an ti a. Kan puk hi a thatna chu, crore 720 kha India sorkarin mi rulh sak vek dawna lawm; keini kha puk ang pawhin an ti lova, “crore 280 chu nangmahni, khami atan khan in thawh ve tur a ni; crore 720 chu kan rulhsak vek ang che u; kan pe ang che u” an tihna a nih chu. Kan puk kan tih kha min rulhsak vek tur; crore 280 bawr vel kha chu kan thawh ve a ngai; kan ta, kan hman tura kan thawh a ngai a ni. Chu chu engti kawng pawhin han sawi tha lo eng ang mah ila, a tha em em mai a ni. State dang hian an sawi dan hi hria se mak an tih ka ring a, crore 720 central-ina min tumsak vek tur kha, thalo em em anga han sawi chi pawh niin ka hre lo.

Chuvangin, hei hi chu nakinah a han fel ang a. Hei, tuna kan rawn sorkar leh hnuah chuan a tirah nei lo chung chungin crore 50 kan dah a, a hnuah khan ka hre ta chiah lova, Covid lai khan crore 10 - 20 velin emaw ni kum khatah kan dahbelh a, kuminah 60 kan han dahbelh leh a, 150 dawn lai niin ka hria. Tun kan sorkar hnu pawhin crore 150 dawn lai kan la dah leh ta talh a ni, heti khawpa harsa chung hian. Tichuan, crore 1,000 kha a lo thlen phei chuan, kan han dah chuan mipuite’n hahdam takin healthcare hi chu kan kalpui thei tawh ang tih kan ring a. Chutih hunah chuan, kan airport sawisel tam em em ang deuhin, sak zawhah chuan, ‘a lo tha hle mai a, kan lo sawi kan lo sawi na a’ kan tih ang deuhin, healthcare pawh hi ‘a lo tha khawp mai a’ kan tih hun a la thlen ngei ka ring a ni.

Aw le, Pu Speaker, kha kha a tlangpuia ka sawi theih chu ni se. Ka Demand te –

Demand No.	Purpose	Amount (in ₹)
1	Legislative Assembly	42,39,97,000.00
2	Governor	30,60,000.00
3	Council of Minister	7,13,18,000.00
4	Vigilance	6,60,51,000.00
5	Finance	32,24,74,79,000.00
6	Secretariat Administration	1,25,49,29,000.00
7	Planning & Programme Implementation	93,17,21,000.00
8	General Administration	93,49,93,000.00
9	Horticulture	1,04,45,28,000.00
10	Public Works	5,91,17,92,000.00
TOTAL		43,88,98,68,000.000

hi he House hian min pass sak turin ka rawn dil e.

SPEAKER : Awle, Chief Minister zahawm tak Pu Zoramthanga’n a Demand te –

Demand No.	Purpose	Amount (in ₹)
1	Legislative Assembly	42,39,97,000.00
2	Governor	30,60,000.00
3	Council of Minister	7,13,18,000.00
4	Vigilance	6,60,51,000.00
5	Finance	32,24,74,79,000.00
6	Secretariat Administration	1,25,49,29,000.00
7	Planning & Programme Implementation	93,17,21,000.00
8	General Administration	93,49,93,000.00
9	Horticulture	1,04,45,28,000.00
10	Public Works	5,91,17,92,000.00
TOTAL		43,88,98,68,000.000

te hi House-ah pass a rawn dil ta a. Rem ti apiangin, ‘rem ti’ ti rawh u le. (**Member: Remti.**)

Rem ti lo kan awm em? Rem ti lo kan awm chuan, ‘rem tilo’ ti u la. (*Member remti lo an awm lova.*)

Awle, Chief Minister zahawm tak Demand –

Demand No.	Purpose	Amount (in ₹)
1	Legislative Assembly	42,39,97,000.00
2	Governor	30,60,000.00
3	Council of Minister	7,13,18,000.00
4	Vigilance	6,60,51,000.00
5	Finance	32,24,74,79,000.00
6	Secretariat Administration	1,25,49,29,000.00
7	Planning & Programme Implementation	93,17,21,000.00
8	General Administration	93,49,93,000.00
9	Horticulture	1,04,45,28,000.00
10	Public Works	5,91,17,92,000.00
TOTAL		43,88,98,68,000.000

chu House-in lungrual takin a pass ta a ni. (**Pu Zoramthanga, Chief Minister: Pu Speaker, ka lawm e.**)

Kan la zo lova, tih tur a la tam khawp mai a. Tunah chuan, *Discussion & Voting on Supplementary Demands for the year, 2023*-ah kan kal ang a. Bulletin, Ni 13.2.2023-a chhuak budget document-ah kan rawn telh vek tawh a. Tin, Supplementary Demand hi sawi ho ngai a ni lo a. Amaherawhchu, member ten hriat thiam loh zualpui tak tak a awma, eng emaw loh theih loh a nih te chuan, chungte tan chuan hun a awm lo derah

ngai lo i la. Tichuan, Chief Minister zahawm tak, Finance changtu Pu Zoramthanga'n Supplementary Demand, 2022 - 2023 chu House-ah submit turin ka sawm e.

DISCUSSION & VOTING ON SUPPLEMENTARY DEMANDS FOR THE YEAR, 2023

PU ZORAMTHANGA, CHIEF MINISTER: Pu Speaker, i remtihna leh House remtihna 'The Mizoram Appropriation Supplementary Demand for Grant, 2022 - 2023' chu he House-ah hian introduce ka rawn dil e.

SPEAKER : Awle, rawn submit zawk langin; introduce a ngai lo e. I rawn submit ang.

PU ZORAMTHANGA, CHIEF MINISTER: Awle, Pu Speaker, i remtihna leh he House remtihna, 'The Mizoram Appropriation Supplementary Demand for Grant 2022 - 2023 Bill, 2023' chu he House-ah hian ka rawn submit e.

SPEAKER : Awle, a rawn submit ta a. Kan sawi tak ang khan Bulletin-ah engkim kan rawn dah a ni a. Sawiho ngai a ni lova. Amaherawhchu, hriatthiam loh zual nei kan awm em?

PU LALDUHOMA : Pu Speaker, ka lawm e.

Session hmasa lamah khan kan sawi tawh a. Demand ve tho a ni a, 'Discussion & Voting' tih a ni thlap a ni, Supplementary Demand hi. Chuvang chuan, sawiho ve deuh te pawh a tha lawm ni? Amaherawhchu, zan a rei tawh avangin sawi teh chiam kha ka tum chuang lova. Pawimawh ka tih tlem han sawilan ka duh a.

Supplementary Demand-a *ways and means advance* hi kum dangah chuan a lang tel thin a, kuminah hian a rawn lang ta miah lo mai a. Hei hian kan supplementary demand hi a tilang tlem ta em em mai a ni. Kohhranin loan kan la a, kan loan lak hi kan sum hmuhnaah kan ziak lut a, kan hmanna leh kan rullhna kha kan hmannah kan ziaklut ang mai khan *ways and means advance* hi a lo luh hian *capital receipt*-ah a lut ang a, kan hman hian, *capital expenditure*-ah a chhuak ve leh mai tur a ni. Tin, voting ngai a ni a, *Appropriation Bill* leh *Act* tel lovin cheng khat mah a hman theih loh a. Kumina *ways and means* lo hman tawh zawng zawng kha he House phalna tel lovin, 'dan lo angin kan hmang mai dawn ta em ni?' tih kha han inhrilhfiyah deuh a tha ka ti a.

Tin, Supplementary Demand-ah hian a tha leh tha lo a awm a, a tha chu heng CSS te kan hruaitute'n thil tangkai tak tak infrastructure development atana in han lakchhuak te hi a ni a, a tam poh leh a lawmawm a ni tih kan hria a, kan pawm vek a ni. Amaherawhchu, a tha lo chi a awm a, a tha lo chi chu revenue expenditure-ah hian a tam em em ta a. *Entirnan*: Salary leh pension-ah a tira budget estimate-ah a daih tawh

dah si lovin *revenue surplus* nei angin kan show kum tin a, a lo ni leh miah si lova. Supplementary Demand-ah chuan revenue expenditure kha a lo tam leh em em si a. Kan budget ang hian revenue surplus hi nei tak tak ang ta ila, nichina *tied fund* kan Chief Minister-in a sawi ang kha development-ah kan hmang vek thei a, a tha lutuk a ni. Amaherawhchu, kan revenue receipt-a *surplus* nei anga kan insawi hi a dik loh avangin, hei hian mi a bum a. Kha khan kan nih tur ang min nih tir thei lova, kan Supplementary Demand a realistic lo lutuk hi a tha lo ka ti a. Budget hi a nihna ang tak hian present hram hram tum tawh thin a tha mang e, ka ti a.

Tin, CSS-ah pawh hian infrastructure kan han siam vak vak a, a maintenance-ah hian kan buai leh em em thin a ni. Chuvang chuan, project kan thlan dawn hian a maintenance-a kha buai lehna tur leh kan zawh loh tur hi chu avoid hram hram a tha ka ti. Tin, state matching share tam chi pawh hi a loh theih loh anih loh chuan, pumpelth theih a tha ka ti a. Nichina ka sawi tawh '*Public Expenditure Committee*' hi kan din lo niin ka hria a, he committee hian a report chu House-ah hian a lay ve tur a ni a. Hengte pawh hi kan neih loh avang hian kam budget pawh hi han zir tak tak tur pawh hian a famkim tawh thin lova. Chuvang chuan, heng hi tunhnuah kan zavai hian inziran hmang ila, kan performance pawh tha leh zuala tihchhoh zel hi kan tum tlan turah ka ngai a. *Ways and means* heti zat tel ta lo ringawt mai leh, kan pass tur zinga a tel ta lo tur te hi chu kumdanga kan kalphung pawh a ni lova, hei hi, 'a dik chiah dawn em ni?' ka ti a ni.

SPEAKER : Awle, kan sawi ang khan kum 50 hi an sawi ngai lova. Tin, Ni 13.2.2023-ah khan kan House Leader, kan Chief Minister khan budget a present a, khatah khan *allied papers* te hi a tel a, kan hriat tlan angin. Tuna Supplementary Demand hi arawn ziak tel vek mai a; 'hei hi engtizia nge' tih te leh han hriatthiam loh bik lai te kha tiin member-te zah takin ka han sawm che u a. Amaherawhchu, Pu Duhoma rawn sawi kha, midang sawi tur kan awm lo anih chuan, kan CM, Finance changtu kan sawm ang a, khalai te pawh kha han sawifiah a duh chuan i lo sawm ang u.

PU ZORAMTHANGA, CHIEF MINISTER: Pu Speaker, ka sawifiah zawhah khan pass ka dil nghal dawn nge? (**Speaker:** Aw ni e.)

Pu Speaker, member zahawm tak Pu Duha han sawi kha - kan budget hi kan estimate tak tak a ni a, kan rin dana kan dah a ni a, a then chu kan dah tam lutuk a, a then chu kan dah tlem lutuk a. Kha kha, a hmingah pawh BE (Budget Estimate) a ni. Chuvangin, a thenah chuan, 'theihtawpin tan inlak nan in target pawh hetiang hian hmu turin kan dah a ni' te pawh kan ti a. Budget kha kawng chi hrang hranga han tih kha chu kan tihdan pangngai a ni a. Amaherawhchu, *realistic* theih ang chuan kan ti a, mahse realistic-a tih kan duh lai khan, target dah sana han tih chuan, a tawpah chuan a realistic thei chuang lo reng reng a, rinthu kha anih avangin.

Khalai kha theih ang tawk chuan kan lo en ang a, mahse a *realistic* kan tih pawh kha supplementary demand-ah a dik tak RE-a a lo kal leh khan siam dik leh tho a ngai a, chulaiah chuan, ‘hei chu in uar deuh a ni lo maw’ han in tih lai te chu a awm ang a, ‘hei hi chu in titem mah mah a ni’ tih lai pawh a awmin ka ring a, kha kha chu dik pawh a dik e. Tin, *ways and means* hi chu bawm khatah kan la a, bawm khata hetia revolve mai kha a ni a, vawiinah kan hmang a, a tukah emaw kan rual leh mai a. Chuvangin, AG pawh hian heng hi chu ‘zero’ angin an record mai thin a. Chuvangin, khata ziah vak mai kha, *ways and means* chu problem a lo tam deuh chuan ziak dawn ila, a han tlar tam tur zia mai chu; kha kha bawm khata revolve thei tura dah anih avangin, hei hi a record-ah a ‘zero’ ngei ngei tur a ni a, khatiang ni tura kan ti kual mai anih avanga *ways and means* hi dah lo kan ni a. Hei hi anihna takah chuan, thil dang atanga lo kal ‘kan zuk puk, nakina rulh leh’ tih lam pawh a ni lova. RBI-in a operate theihna tur atana bawm kan zuk laka kan dah leh limit erawh chu an siam vek a. Kha kha a zing si a, min phut lova; heta vote kher tur atan khan kan dah lova. Kan *expenditure* leh *receipt* kha bawm khata awm anih avangin kha kha chu kan ti lo mai a ni e.

Tichuan, Pu Speaker (**Speaker:** Pass rawn dil nghal se.) He kan *Supplementary Demand for Grant, 2022-2023* hi he House hian lawm taka min pass sak turin ka rawn dil e.

SPEAKER : Awle, Chief Minister zahawm tak Pu Zoramthanga’n *Supplementary Demand for the year, 2022-2023*, voted amount ₹3141,35,78,000/- chu House-ah pass a rawn dil a, pass remtiin, “remti” ti rawh u le. (**Memberte:** Remti.) Remti lo kan awm chuan, “Remti lo” ti ula... (*Remti lo an awm lova*)

Awle, *Supplementary Demand for the year 2022-2023* chu House-in lungrual takin a passed ta a ni. (**Pu Zoramthanga, Chief Minister:** Pu Speaker, ka lawm e.)

Awle, tunah business dangah kan kal leh ang a, tuna kan passed tak, *Supplementary Demand for the year, 2022-2023* kan hman theihna bill kan ngaihtuah dawn a ni. Chief Minister zahawm tak Pu Zoramthanga, “*The Mizoram Appropriation (Supplementary Demand for the year, 2022-2023) Bill, 2023*” hi House ah introduce phalna rawn dil se, kan sawm e.

LEGISLATIVE BUSINESS

PU ZORAMTHANGA, CHIEF MINISTER: Pu Speaker, i remtihna leh House remtihna “*The Mizoram Appropriation (Supplementary Demand for Grant, 2022-2023) Bill, 2023*” chu House-ah introduce ka rawn dil e.

SPEAKER : Awle, introduce a rawn dil a; kan remti em? (*House-in a remti a..*) Awle, a copy kha han sem ula. Kan chang kim em? (*Memberte an chang kim a..*)

Awle, Chief Minister zahawm tak Pu Zoramthanga, Finance changtuin “*The Mizoram Appropriation (Supplementary Demand for Grant, 2022-2023) Bill, 2023*” House-a a introduce tak chu rawn move-a, pass rawn dil nghal turin ka sawm e.

PU ZORAMTHANGA, CHIEF MINISTER: Pu Speaker, ka lawm e.

Hei, a bill hi han chhiar ila - “*A Bill to Authorised payment and Appropriation of Certain sums from and out of the Consolidated Fund of the State for the Service of the Financial Year, 2023-2024*” tih hman phalna, *Payment Authorized*-na kha House kan rawn dil a, kan passed vek tawh kha a ni a. Amaherawhchu, hman phalna a ngaih avangin Legislative Assembly, kan House hian he pawisa “*Consolidated Fund of the State, 2023-2024*” a kan hman turin ₹14341,94,64,000/- hi hman min phalsaka, min pass sak turin House ka rawn dil e.

SPEAKER : Awle, *Appropriation Bill* kan sawiho .. (*interruption*)

PU LALCHAMLIANA, MINISTER: Khawngaihin tuna Appropriation Bill kan ngaihtuah hi *Demand for Grant, 2023-2024* ni khan ka hria a. Chair atang khan i tihsual khat tehlul nen, ‘*Supplementary*’ tih kha i telh palh niin ka hria a. Aw, ‘*Supplementary*’ kha i titel tlat a nia.) Nilo, heta hi a in ziak tlat a lawm; hetah hian a inziak tlat si a, a inziak ang hian ka chhiar a ni. An ziak sualah i ngai kang aw. Ka hlauh ang nge nge a ni e. Hei hi kei chuan a ziak ang thlap hian ka ti a ni.

Awle, hei hi kan sawiho ngai lova, Chief Minister zahawm takin pass a rawn dil nghal bawk a. Kan buk nghal mai ang a.

“*The Mizoram Appropriation (Supplementary Demand for Grant, 2022-2023) Bill, 2023*” chu, “*Supplementary Demand for Grant, 2022-2023 Bill, 2023*” tiin hetah hian a inziak a ni. A dik a ni, hei hi 2023-2024 a ni.

SPEAKER : Hetah a inti sia lawm. Ngawi rawh u, ka tisual lo; a lo kal dawn chauh a ni. Hei hi pass remti apiangin, ‘remti’ ti rawh u le. (**Memberte: Remti**).

Awle, “*The Mizoram Appropriation (Supplementary Demand for Grants) 2022-2023, voted amount - ₹31,41,35,78,000.00; charge - ₹1,24,33,51,000.00, a belkhawm - ₹32,65,69,29,000.00* hman theihna tur bill, “*The Mizoram Appropriation*

(*Supplementary Demand for Grants 2022-2023) Bill, 2003*)” chu House-in lungrual takin a pass ta a ni.

Hetah hian tuna a rawn sawi takah kha kan la kal leh dawn a ni. Ka ti sual lo viauin ka hria a. (**Pu Lalduhoma:** Pu Speaker, hei, a copy pawh hi min pe hmasa phawt ang a, kan pass ang a; chumi hnuah hei hi min pe tur a ang khawp mai. A rualin in rawn sem bawk si a). Ngawi rawh, i la hmanhmawh a ni. Kan Assembly hian a tisual lo ang; ka ti sual lo ang, ka inring tawh viau a ni.

Awle, tunah chuan *Legislative Business* dangah kan kal leh ang a. Kum 2023-2024 chhunga minister ten an demand chante an enkawlina tur ‘*Demand for Grants*’ kan vote tak zawng zawng leh, *charge* hnuai sum hman turte hman a nih theih nan Bill kan pass a ngai a, a rawn dik chho thlap thlap dawn a ni.

Tunah Chief Minister zahawm tak, Finance Department changtu Pu Zoramthanga, “*The Mizoram Appropriation (Demand for Grants 2023-2024) Bill, 2023*” hi House-a introduce phalna rawn dil turin ka sawm e.

PU ZORAMTHANGA, CHIEF MINISTER: Pu Speaker, “*The Mizoram Appropriation (Demand for Grants, 2023-2024) Bill, 2023*” chu House-a introduce ka rawn dil e.

SPEAKER : Awle, kan remti em? (*House-in a remti a.*) Kan remtih chuan, han introduce se.

PU ZORAMTHANGA, CHIEF MINISTER: Pu Speaker, “*The Mizoram Appropriation (Demand for Grants, 2023-2024) Bill, 2023*” chu he House-ah hian ka rawn introduce e.

SPEAKER : A copy kha han sem ula. Pu Duha kha han pe hmasa ber ula, khatiang khan kan rawn ti chho zel dawn a lawm. An lo pe double che a nih kha; kan tisual lo ang.

PU LALDUHOMA : Kan Chief Minister khan nichina a thusawi kha a record hunah rawn siamtha (expunge) mai se la, a hmasa kha ‘*Demand for Grants*’ ang khan a rawn dil tlat a nia. Kha kha amahin a rawn correct hunah a speech kha rawn tirem mai sela a fel ang a.

SPEAKER : Khami anih chuan, a copy semtute kha an ni ang; an chau ve deuh tawh te pawh a ni ang e. Kha laia kan naute, a semtute kha an chau ve tawh a nih kha.

Tichuan, a copy kha kan chang kim eng le? Lo chang double te pawh an awm e; an chang a ni ang.

Chief Minister zahawm tak kan sawm leh ang a, “*The Mizoram Appropriation (Demand for Grants, 2023-2024) Bill, 2023*” House-a introduce tak chu rawn move-a, pass dil nghal mai turin ka sawm e.

PU ZORAMTHANGA, CHIEF MINISTER: Pu Speaker, a pahnih hian pass rawn dil kawp mai ila.. (**Speaker:** Awle) Anih aw. Chutilo chu a hma khan tuna i tih tak chu kan rawn move a, kan pass zo chiah a ni baw k si a.

Awle, Pu Speaker, eng emaw sem sual vang a ni a, he House-ah hian ka rawn introduce tawh sa bill pahnih, a pakhat chu “*The Mizoram Appropriation (Supplementary Demand for Grants, 2022-2023) Bill, 2023*” leh a hnung zawk, “*The Mizoram Appropriation (Demand for Grants, 2023-2024) Bill, 2023*” te hi he House hian min pass sak turin ka rawn dil e.

SPEAKER : Awle, *Appropriation Bill* hi kan sawi ngai lova, kan Chief Minister zahawm takin pass a rawn dil nghal baw k a.

Tunah, “*The Mizoram Appropriation (Supplementary Demand for Grants, 2022-2023) Bill, 2023*” leh a hnunga “*The Mizoram Appropriation (Demand for Grants, 2023-2024) Bill, 2023*” te hi pass remti apiangin, ‘remti’ ti ula. (**Memberte:** Remti.) Awle, remti lo kan awm chuan, ‘remti lo’ ti ula.

Awle, kum 2023 - 2024 chhunga sorkar sum mamawh *voted amount* - ₹1,21,12,96,63,000.00 leh *charge amount* - ₹20,28,98,01,000.00, a belhkhawm – ₹1,43,41,94,64,000.00 hman theihna tur bill, “*The Mizoram Appropriation (Demand for Grants, 2023-2024) Bill, 2023*” chu House-in lungrual takin a pass ta a ni. (**Pu Zoramthanga, Chief Minister:** Pu Speaker, ka lawm e.)

PU LALDUHOMA : Hei pawh hi thlakthleng chi a va ni em. ‘64’ hi ‘65’ zawk, ‘65’ hi ‘64’ zawk tur a va ang ve?

SPEAKER : Awle, khalai kha chu kan lo ti ang e. Kan hmaa mite hian lo hma ve rawh se aw.

**SUMMARY OF BUSINESS TRANSACTED DURING 11TH SESSION OF THE
EIGHTH MIZORAM LEGISLATIVE ASSEMBLY.**

Awle, kan tih tur kan zo dawn hnai tawh a, tunah kan tihdan phung pangngai a lo ni thin bawk a; kan hnathawhte – ‘*Summary of business transacted during 11th Session of the Eighth Mizoram Legislative Assembly* report ka han pe ve ang e.

Eighth Legislative Assembly Session vawi 11-na leh Budget Session ni bawk chu ni 7.2.2023-a neih tan turin Governor zahawm tak chuan a kova. Business Advisory Committee, Ni 25 January, 2023 thukhawmin a rel angin Session hi ni 22 chhung awhin, ni 15 thu tura duan a ni a. Session neih dan tur duan lawk tawh chu tihdanglam ngai hrette tidanglam, Ni 13 February, 2023 khan Business Advisory Committee thutkhawm leh a ni a, Budget 2023 leh 2024 sawiin tluang takin hun kan hmang a, vawiin hi kan thutkhawm ni hnuhnung ber a lo ni ta reng mai a. Tichuan, tun Session chhunga member zahawm tak takte hnathawh tlangpui chu hengte hi a ni -

MOTION OF THANKS ON THE GOVERNOR’S ADDRESS:

Governor zahawm takin Ni 7.2.2023, Session tan niah khan thusawina a nei a, chuta a thusawi “*Motion of thanks*” chu Dr. ZR Thiamsanga’n a rawn pulut a, tin, Member zahawm tak Dr. Vanlaltanpuia’n a rawn thlawp a. House-ah sawi ho a nih hnuin lungrual takin kan pawm tlang a ni.

LAYING OF PAPERS:

Session chhung hian House-ah Report 4 present a ni a, chungte chu –

1. 11th Report of the Business Advisory Committee;
2. 12th Report of Business Advisory Committee;
3. 8th Report of Committee on Government Assurances relating to Assurances given by Ministers in the 5th and 6th Session of the Eighth Mizoram Legislative Assembly;
4. 2nd Report on Action Taken by the Government against the recommendation contained in the First Report of Committee on Petition relating to School Education Department.

Panel of Chairmen-ah Member zahawm tak takte –

1. Dr. L. Thangmawia,
2. Lalrindika Ralte,
3. Pu Zothantluanga,
4. Pu K. Laldawngliana te ruat an ni.

House zahawm taka member lo ni tawhte - Pu Lalhmingthanga, Pu R. Khawpuithanga leh Pu Lalrinmawia te sunna House-ah neih a ni a. Pu Zoramthanga, House Leader-in an chanchin tawi te sawina leh sunna thu a sawi hnuah, heng member 8-te hian sunna thu an sawi bawk a. Member zahawm takte – Pu Zodintluanga Ralte, Pu Lalduhoma, Pu Vanlalhlana, Pu KT Rokhaw, Pu Lalchamlana, Minister, Dr. R.

Lalthangliana, Minister, Pu Tawnluia, Dy. Chief Minister leh Pu Lalrintluanga Sailo, Dy. Chief Whip te an ni.

Hemi zawhah hian sunna entirnan ngawi rengin memberte minute khat an ding a ni.

ELECTION OF DEPUTY SPEAKER:

Ni 8 February, 2023 (Nilaini) khan Pu H. BiakzauA, MLA zahawmtak, Lawngtlai East bialtu chu chuhtu awm lovin Deputy Speaker atan thlan tlin a ni. Hetah hian Opposition Memberte pawh ka fak che u a ni.

ZAWHNA:

Mizoram Legislative Assembly hian Golden Jubilee hial kan lawm tawh a. Tun tum 8th Legislative Assembly, Eleventh Budget Session hi Question luh tam ber tum niin record a ni a, zawhna zawng zawng hi 1529 a lut a, chungte chu –

Starred Questions:

i)	Zawhna lut zat	-	1160
ii)	Zawhna admit zat	-	1152
iii)	Reject zat	-	8 (Reject chhan hi, a sei lutuk avang tea reject an ni. Kan danah khan, ‘a tawi tur a ni’ tih a ni.)
iv)	List of Business a dah zat	-	260
v)	House a chhan zat	-	64
vi)	House a chhan hmanloh	-	195
vii)	Withdrawn (hnuh kir leh)	-	3 (House-a withdrawn - 1)
viii)	Chhanna dawn loh	-	59

Unstarred Questions:

i)	Zawhna lut zat	-	369
ii)	Zawhna admit zat	-	365
iii)	Zawhna reject zat	-	4
iv)	<i>Starred</i> Question, <i>unstarred</i> Queastion-a leh zat	-	693
v)	Chhanna dawn loh	-	43

LAYING OF PAPERS:

Paper 41 (sawmli pakhat) House-ah lay a ni a, paper lay-tu te chu:

- i) Pu Zoramthanga, hon. Chief Minister,
- ii) Pu Tawnluia, hon. Deputy Chief Minister,
- iii) Dr. R. Lalthangliana, Minister,
- iv) Pu Lalchamlia, Minister,
- v) Pu R. Lalzirliana, Minister,

- vi) Pu Lalchhandama Ralte, Minister,
- vii) Er. Lalrinawma, Minister,
- viii) Dr. ZR. Thiamsanga, member zahawm takte anni.

BILLS:

Tun Session chhung hian Government Bill 6 (paruk) a lut a, a vaiin passed a ni. Chungte chu -

- i) The Mizoram (Restriction on use of Transferred Lands) (Amendment) Bill, 2023;
- ii) The Sinlung Hills Council (Amendment) Bill, 2023;
- iii) The Mizoram Scheduled Tribe and Scheduled Castes (Regulation of Issuance and Verification of) Community Certificates (Amendment) Bill, 2023;
- iv) The Indian Stamp (Mizoram Amendment) Bill, 2023;
- v) The Mizoram Appropriation (Demand for Grants 2023-24) Bill, 2023 (tuna mi kha);
- vi) The Mizoram Appropriation (Supplementary Demand for Grants 2022-23) Bill, 2023 te an ni.

PRIVATE MEMBERS' BILL

The Mizoram (Land Revenue) (Amendment) Bill, 2023 - He bill hi Dr. Vanlalhlana'n a rawn pulut a, sawiho a nih hnuin *voice* vote hmangin Select Committee-a ngaihtuah atan dah a ni.

RESOLUTIONS

Tun Session chhung hian Private Members' Resolution 86 (sawmriat paruk) dawn a ni a, admit vek a ni. A hnuiaia Resolution-te hi sawiho a nih hnuin Sl.No. (i) & (ii) te hi voice vote hmangin adopt a ni a, Sl.No. (iii) hi amend a nih hnuin adopt a ni. Chungte chu:

- i) *“Mizoram Sawrkar kal mek a Sports Infrastructure din kawng a hmasawwnna nasa tak kan nei hi lawmawm kan ti.”*
- ii) *“Kawngpui tha leh building tha kan neih theih nan tun aia ulukin hna thawh ni rawh se”.*
- iii) *“Kan ram thenawm Myanmar leh Bangladesh atanga sahimna zawnga kan unau raltlana lo kalte Mizoram Sawrkar leh Zoram mipui ten tha taka kan lo dawngsawng hi a lawmawm kan ti a, a tul ang zel a tuamhlawm chhunzawmin, an awmna tur leh an mamawhte ngaihtuah zel ni se kan ti” tih hi a ni.*

Hei hi House zahawm taka ka han sawi duh chu - in zar ka zo a, nizan khan telephone USA atangin ka dawng a, kan Chin unau ten hengte avang hian an lawm em em mai a, ‘USA-ah lo kalin khawngaihtakin hun min rawn hman pui rawh’ an ti a.

Pathianin rem a tih chuan, kan Chief Minister-in min phalsak ka ring a, kal ka tum a nih chu.

OFFICIAL RESOLUTION:

Pu Lalchamlia, Minister zahawm tak hnen atangin hetiang hian Official Resolution dawn a ni a - “*That this House unanimously resolves to oppose any step taken or proposed to be taken for enactment of Uniform Civil Code in India*” tih a ni. He official resolution hi sawiho a nih hnuin lungrual taka adopt/pawm a ni.

STATEMENT BY A MINISTER:

Pu R. Lalzirlia, Minister, District Council & Minority Affairs Department chuan, Ni 23.2.2023 (Ningani) a Autonomous District Council te tana direct funding chungchang a thusawiah Hon. Speaker hna a dil angin statement a siam.

PRESENTATION OF BUDGET:

Pu Zoramthanga, Hon. Chief Minister, Finance changtu chuan hengte hi House-ah a present a -

- i) *The Annual Budget for the year, 2023-2024 (with allied papers);*
- ii) *Supplementary Demand for Grants for the year, 2022-2023.*

Member ten an sawiho hnuin lungrual taka pass a ni.

Ka tlangkawm hmain, lawmthu sawina pakhat ka neih duh chu - kan member zahawm tak Pu L. Thangmawia, MLA chu Doctorate Degree a neih hmain Associate Professor-ah a promotion a, MLA nih laia Ph. D. hmu a ni a, a lawmawm em mai a, thil danglam a ni a. Thangthar zel te leh kan House member te tan challenge anih avangin, hei hi ka han puang ve duh hrim hrim a ni.

Kan Session ni hnunng ber chu tluang takin kan lo thleng leh ta a. Kan Session a tih tur kan duan ang *List of Business*-a kan dah te tluang takin kan kal thei a. Lok Sabha leh Rajya Sabha-ah te, State dang tam takah te an tih theih loh a ni a, hetiang hi, keini erawh chu tluang takin kan ti thei zel a. Ram tana leh mipui tana thahnem ngai taka inhnial bawrh bawrh awm mahse, pawn lama inkhakna leh inhuat zuina reng reng awm lo thin hi a lawmawmin, entawntlak kan nihna te pawh a rawn lang thin a.

President of India helai hmunah tun hun chung hian President pahnih leh Vice President hial helai hmunah an lo kal a, chungah te pawh chuan an rawn sawi chhuak kha a ni a. Hei hi a lawmawmin, vawn nun zel a tha hle a ni.

Session chung zawnga Memberte thahnemngai taka kan ram leh hnam tana in tha leh zung, in rilru leh ngaihtuahna te hmanga kan thawhhona hian rah duhawm tak a chhuah ngei ka beisei bawka a ni.

He Session tluang taka a kal theihna tura department hrang hrangte, thawktu zawng zawngte chungah lawmthu ka sawi a. Tin, hmanna ka sawi lawk tawh ang khan, a bik takin kan Finance Department te vawiinah hian fak lo thei lo ka ni. A chhan chu kan hriat angin, a tlangpuiin February ni 1-ah Union Budget hi pharh a ni thin a, tun angah hian session la tan ngai loh reng reng a ni a. G20 India ina *Presidency* an neih ve kum, chu chuan kan ram hlimthla te a rawn hril chho dawn si a, chungah in hmangte chu kan official duhawm tak takte an ni hlawm si a tiin kan va ngen a, Finance Department hi; a chawpchilh hle a ni. Mahse luletin an tang a, kan Chief Minister-in a ho a, Principal Secretary leh Chief Secretary te pawh ka han fak tel ang e - hei, an rawn peih fel hman a, a lawmawm ka ti tak meuh meuh a. Kum 50 chuang a lo kal ta a, vawikhatmah February thlaa budget zawh hi a la awm ngai lo a ni. Chuvang chuan, kan CM leh a thawhpui Finance Department te-ah hian credit ka pe lo thei lova, lawmthu ka sawi bawka a ni.

Tin, venhimna hi a pawimawh em em a, Police Department lam te, tin, Health Department te an titha em em a, Minister hovin health-clinic special tak maiin kan hriselnate min rawn endikin, hun tha min rawn siamsak a, kan lawm em em a ni.

Tin, ka thawhpuite mah ni se, Assembly Secretariat staff-te hi ka fak a. Pu Hruaia, kan Commissioner & Secretary thar hovin kan bei a. Tunah hian kan hriat angin, inthlan dawn kum a ni bawka a, kan thahnemngaih dan hi a thuk/ril hlawm khawp a, zawhna 1500 chuang chu, pui tak a ni. Zawhna pakhat chhanna ringawt pawh hei hi a ni a, inches 5 dawna chhah a ni a, hei hi Question No. 73 a ni a. An hah em em a, tlaivar dawn dawnin an bei tak meuh meuh a ni. Chuvang chuan, kan naute pawh hi, kha, tuna lehkha han sema 1-2 tihpalh te pawh kha lo hrethiam teh u khai; an hah hi ka ti ve thlawt a ni. Kei lah hi tihsual hlau reng rengin zingah ka han khawm a, chutiang chuan kan tang a ni. Kan thawhpuite hi an fakawm ka ti lo thei lo a ni.

Tin, kan member mithiam pui pui leh mi zahawm tak takte, kan han meeting a, hetah hian inhnial mah ula, pawna inhuat zui leh rilru invei zui lo tura siam che u ka tum ve hram hram a. Keiin tlinglo taka ka kaihhruaina thin che u invaia in ngaipawimawh thiam thin kha ka lawm tak meuh a, duhsakna ka hlan che u a. Hun lo kal turah Pathianin vengin malsawm zel che u rawh se.

Tunah chuan kan tih tur kan zo ta a.

The House is adjourned sine die. (10:50 PM)